

22/11/22

Mahaveera Charitram

"Gunachandra Sori"

87.1097

134 H
H 431

इइ सिरिचन्दकुलीणऽभयदेवसूरिपट्टहसिरिपसणचंदसूरिवियेण सिरिसुमइ-

वायगविणेयगणिसिरिगुणचन्दनिम्मियं कप्पडवाणिज्जिभिजण-

गोवद्धणसुतजज्जणागपुत्तसिट्ठवीरगहकारियं

सिरिवीराजिणचारियं सम्मत्तं.

इति श्रेष्ठि-देवचन्द लालभाई-जैनपुस्तकोद्धारे ग्रंथांकः ७५ ॥

1616

Shreshthi Devachand Lalbhai Jain Pustakoddhara Series, No. 75.

Śrī MAHĀVĪRA CHARITAM

(PRĀKRITAM)

BY

Śrī GUNACHANDRA SŪRI

Copies 1250]

Price Rs. 4-0-0.

[A. D. 1929,

[All rights reserved by the Trustees of the Fund,]

Printed by Ramchandra Yesu Shedge, at the Nirayana-sagar Press, 26-28, Kolbhat Lane, Bombay.

Published by Jivachand Sakarchand Zaveri, on behalf of Seth Devachand Lalbhai Jain Pustakoddhara
Fund. No. 121-123, Javeri Bazar, Bombay.

श्रीमहावीरचरित्रस्योपोद्घातः ।

श्रमणस्य भगवतो महावीरस्य चरित्रमिदमुपदाक्रियमाणं सज्जनेभ्योऽस्ति, यद्यपि भगवतश्चरित्राणि नैकानि श्रीहेमचन्द्राचार्य-नेमि-
चन्द्राचार्योदिमिविहितानि सुन्दरतराणि मुद्रितपूर्वाणि च परं न किमप्येतावन्माणं ग्रहं चातः किमपि, यत एतच्चरित्रं वैकभीयायां द्वादशस-
ताब्द्यामेकोनचत्वारिंशदधिकेषु समानां व्यतीतेषु विहब्धं द्वादशसहस्रमानं च, रचयितारश्चास्य चान्द्रकुलीनाः श्रीभक्तो गुणचन्द्राः
सुमतिवाचकविनेयाः, एतच्च प्रस्तुतचरित्रग्रान्तभागावलोकनात् स्पष्टमवसीयते, यत आहुस्तत्र ते—

सिरिसुमहवायगाणं विणयेलेसेण । गणिणा गुणचदेणं रइयं सिरिवीरचरियमिणं ॥ ५७ ॥

गणिनश्चेमे चान्द्रकुलीनश्रीवर्धमान-जिनेश्चरबुद्धिसागर-जिनचन्द्र-अभयदेवसूरिशिष्यश्रीप्रसन्नचन्द्राचार्यवचनेन
उक्तं ग्रन्थकृद्भिरत्रैव ग्रान्त्यभागे—

साहाइ तस्स चंदे कुलंमि निप्पडिमपसमकुलभवणं । आसि सिरिवद्धमाणो मुणिनाहो संजमनिहिच्च ॥ ४८ ॥

बहलकलकालतमपसरपूरियासेसविसमसमभागो । दीवेणंव मुणीणं पयासिओ जेण मुत्तिपहो ॥ ४९ ॥

मुणिवइणो तस्स हरअट्ठहासियजसपसाहियासस्स । आसि दुवे वरसीसा जयपयडा सूरससिणोच्च ॥ ५० ॥

भवजलहिवीइसंभतमवियसंताणतारणसमत्थो । बोहित्थोच्च महत्थो सिरिसूरिजिणेसरो पढमो ॥ ५१ ॥

गुस्ताराओ धवलउ सुविहिया (निम्मला पु.) साहुसंतई जाया । हिमवंताओ गंगच्च निग्गया सयलजणपुजा ॥ ५२ ॥

अन्नो य पुन्निमायंदसुदरो बुद्धिसागरो स्री । निम्मावियपववागणछंदसत्थो पसत्थमई ॥ ५३ ॥
 एंगंतवायविलसिरपरवाइकुंगमंगसीहाणं । तेसिं सीसो जिणचंदसूरिनामो समुप्पन्नो ॥ ५४ ॥
 संवेगंगरंगसाला न केवलं कव्वविरयणा जेण । भव्वजणविन्हयकरी विहिया संजमपवित्तीवि ॥ ५५ ॥
 ससमयपरसमयन्नू विसुद्धसिद्धतंदसणकुसलो । सयलमहिवल्यवित्तो अन्नोऽभयदेवसूररिति ॥ ५६ ॥
 जेणालंकारधरा सलक्खणा वरपया पसन्ना य । नव्वंग (सिद्धंत पु.) वित्तिरयणेण भारई कामिणिव्व कया ॥ ५७ ॥
 तेसिं अत्थि विणेओ समत्थसत्थत्थबोहकुसलमई । स्री पसन्नचंदो चंदो इव जणमणणंदो ॥ ५८ ॥
 तव्वयणेणं सिरिसुमइवायगगणं विणयेलेसेण । गणिणा गुणचंदेणं रइयं सिरिवीरचरियमिमं ॥ ५९ ॥

अत्र नहि खरतरगच्छप्रादुर्भावस्य गन्धोऽपि, एवमेव च न श्रीजिनेश्वरसूरिशिष्यश्रीजिनचन्द्रकृतयां संवेगंगसालायां न च श्रीअभय-
 देवसूरिकृतायां शास्त्रतौ न च श्रीअल्लदेवोपाध्यायकृते सुसुन्दरीचरिते यावत् अशीत्यधिके समासहस्रे जवालिपुरि चतुर्मासीस्थिताभ्यां
 श्रीमज्जिनेश्वरबुद्धिसागरसूरिभ्यां विहितयोरष्टकवृत्तिबुद्धिसागरव्याकरणयोरपि न खरतरगच्छप्रादुर्भावगन्धोऽपि, एवं यदि श्रीजिनेश्वरसूरिभिस्त-
 सद्देवैश्चान्यैः सूरिभिर्न स्वीकृता तदा खरतरोसत्तिस्तर्हि तत्परम्पराया बहिर्वर्त्तिभिः प्रलपितेन किम् ? खरतरगच्छप्ररूपणमूलभूतो जिनवल्लभ
 एव प्रश्नोत्तरैकषष्टिशतके स्वस्य कूर्चपुरीयजिनेश्वरशिष्यतामाह, किंच-युग्यपत्तनस्था या कोट्याचार्याया विशेषावश्यकवृत्तिपुस्तिका सापि
 स्पष्टमेव निगदति यदुत न श्रीजिनेश्वरसूरः खरतारिखंदं न च जिनवल्लभस्तत्परंपरागत इति, यतः सा एकादशशतकीयसप्तविंशद्वर्षेषु लि-
 खिता, लेखकश्चास्या जिनवल्लभस्यान्तेवासी नेमिकुमारः, स स्पष्टमाख्याति यदुत कूर्चपुरीयजिनेश्वरशिष्यजिनवल्लभार्थं पुस्तकमिदमलेखीति,


अन्यच्च विशेषवश्यकमाष्यप्रतेः ग्रान्तेऽपि नेमिकुमार इत्यभेवाह, तथा च न तत्र जिनेश्वरसूरेः खरतरबिरुदं जिनवल्लभस्य तत्परपरानि-
र्गता च, पाश्चात्यैः खरतरैर्महतामभिधानेन प्रतिष्ठाभिलाषुकैः कल्पित एवैषः वृत्तान्तः, अत एवोपदेशसप्ततिकारैः 'येभ्यः प्रतिष्ठाभाषणो,
गच्छः खरतराभिधः' इति वाक्येन स्वाधानां प्रलापो ध्वनितः सत्य एव लक्ष्यते ।

किंच—या खरतरगच्छमूलभूतेन जिनवल्लभेन श्रीवीरस्य भगवतो गर्भापहारः षष्ठकल्याणकतया मतः सोऽपि नैभिर्गणिभिर्मतः,
अत एव च श्रीमद्भिरत्र चतुर्थप्रस्तावस्योपसंहारे पत्रे १४१ 'गञ्जावयारजम्मणदिक्खाकल्लाणकहणणडिबद्धो—चउत्थओ एस पत्था-
वो' इत्युक्त्वा गर्भापहारस्य कल्याणकता निराकृता, यद्यपि श्रीमद्भिर्हरिभद्रसूरिभिर्यात्रापञ्चाशके श्रीमद्भिरभयदेवसूरिभिः स्वाधैरात्मपूर्वज-
तया स्वीकृतैश्च तद्वृत्तौ 'हत्थुत्तरजोएणं चउरो' इत्येतत्सूत्रेण तद्विवरणेन च स्पष्टतया षट्कल्याणकवादिनां जिनवल्लभादीनां यदृच्छावादिता
दर्शितैव तथापि केचन स्वगच्छाग्रहवन्त आहुः यदुत सर्वजिनकल्याणकानां समतां दर्शयितुं तैस्तथोक्तं, यद्यपि केचनपि षष्ठकल्याण-
कस्यानुक्ततया न तत् श्रद्धातुं शक्यमागमरसिकैः, परमत्र तैरपि तथा वक्तुं न शक्यं, यतो वीरचरित्रे अत्र अन्यत्र च कुत्रापि विहाय
जिनवल्लभं तदनुसारिणं च न कोऽप्यागमश्रद्धालुराह कल्याणकषट्कं, तथा च यथा श्रीमलयगिरिभिः जिनवल्लभस्य संहननानां शक्तिवा-
चकतां सिद्धान्तानभिहितमपि सिद्धान्ताभिहितां मन्वानस्योत्सूत्रवादिता श्रीजीवाभिगमप्रज्ञापनादिवृत्तौ स्पष्टमभिहिता तथैवात्रापि तस्य
तथात्वं ध्वन्यमानं न व्याहन्यते इत्यलं चसूर्या गच्छकदाग्रहरसिकैः ।

चरित्रे चात्र स्त्रीबालसुबोधा प्राकृतैर्वादिता भाषा, तथाच प्राकृतवाणीविलासिनामप्राकृतानामतीवादरास्पदमिदं, विशेषतस्तत्र तत्रा-
नेकविषयगतान् प्रबन्धान् दिदृक्षूणां । प्रस्तावाश्चात्र श्रीमद्भिः कृता अष्ट, प्रतिप्रस्तावं चात्राधिकारा इमे

प्रस्तावः	विषयः	पत्रं	प्रस्तावः	विषयः	पत्रं
१	श्रीवीरस्य सम्यक्त्वलाभः	२	५	चण्डकौशिकप्रतिबोधनावसानं वृत्तं	१८२
२	मरीचिः षट्परिवाजकभवाश्च	२८	६	गोशालकाय तेजोलेशयोपयकथनान्तं वृत्तं	२२३
३	प्रियमित्रान्ता भवाः	७०	७	केवलज्ञानोत्पत्त्यवसानं वृत्तं	२५०
४	श्रीवीरस्य च्यवनगर्भजन्मदीक्षाः	१४१	८	निर्वाणान्तं वृत्तं ग्रन्थकृतशस्त्रिश्च	३६०

चरित्रं चैतत् श्रीमतां प्रसन्नचन्द्रसूरीणां वंचनेन श्रीमद्भिर्विहितं, परं विधापनायाभ्यर्थिताः श्रीमन्तः श्रीमद्भ्यां छत्रावली (छत्राल) वास्तव्याभ्यां श्रेष्ठिभ्यां शिष्टवीरनामभ्यां, तयोः पिता जज्जनागः कर्पटवाणिज्यात् छत्रावल्यामागतः, तत्र च कर्पटवाणिज्ये जज्जनागपित्रा श्रीमद्वाङ्मयगच्छीयजीवदेवसूरीतच्छिष्यश्रीजिनदत्ताभ्यामधिगतसम्यक्त्वेन नन्दीश्वरचैत्यं विहितं श्रीमता गोवर्धनश्रेष्ठिना, तत्तुहम्बवृक्षश्रायं



स्पष्टं चेदं ग्रन्थप्रशस्तौ, तथाहि—

एयस्स विरयणमी निब्बंधो जेसि गाढमुण्णन्नो । ते पुण मूलाओ चिय साहिज्जेते निसामेहो ॥ ६० ॥
सियजसजोणहाधवलियनायकुलनहयले मयकुव्व । पुव्वमहेसि महेसीपणओ सिरिजीवदेवपहू ॥ ६१ ॥
तस्स सुसिस्सो सिद्धंतसिद्धसुविसिद्धसंजमामिओ । गुणरयणरोहणगिरी पयडो जिनदत्तस्सूरीति ॥ ६२ ॥
गंभीरिमाए पसमेण बुद्धिविभवेण दक्खिणत्तेण । सुंदरनएण जेसिं कोऽवि न तुछो जए जाओ ॥ ६३ ॥
तेहिंतो पडिबुद्धो 'वायड'कुलभवणजयपडायनिमो । कप्पडवाणिज्जपुरे सेढी गोवद्धणो आसि ॥ ६४ ॥
नंदीसरावलोयणमणण भव्वाण दंसणत्थं च । कारावियं सुतुंगं वावन्नजिणालयं जेण ॥ ६५ ॥
धम्मधरणीए गिहिणीए तस्स सोढित्ति नामधेयाए । अगणियगुणगणनिलया पुत्ता चत्तारि उण्णन्ना ॥ ६६ ॥
पढमो अम्मयनामो बीओ सिद्धोत्ति जज्जणागो य । तइओ चउत्थओ पुण विक्खाओ नन्नओ नाम ॥ ६७ ॥
नयविणयसच्चधम्मत्थसीलकलिहं जेहिं दिट्ठहिं । नूणं जुहिट्ठलाईवि सद्धिज्जेति सप्पुरिसा ॥ ६८ ॥
अहं संथारयदिव्वलं पवज्जितं भावसारमंतंमि । गोवद्धणंमि समं गयंमि तह पढमपुत्तदुगे ॥ ६९ ॥
सो सेढी जज्जणागो छत्तावल्लीए वासमकरिंसु । सव्वकणिट्ठो नन्नयसेढी पुण मूलाणेवि ॥ ७० ॥
तेसिं च भइणिणुत्तो नियपुत्ताओवि गाढपडिबंधो । आसि जसणागनामो सेढी सुविसिद्धगुणनिलओ ॥ ७१ ॥
अहं नन्नयस्स पुत्ता पयडा सावित्तिकुच्छिसंभूया । दोन्नि चिय उण्णन्ना गोवाइओ कवड्डी य ॥ ७२ ॥

सत्तुंजयपुसुहसमत्यतित्यजता पयद्विया जेण । पढमं चिय तस्स कवड्डिसेद्धिणो को समो होअ ? ॥ ७३ ॥
 पुरिसत्यकरणनिरयस्स जअणागस्स विस्सुयजसस्स । अत्थि जिणधम्मनिरया कलत्तमिह सुंदरी नाम ॥ ७४ ॥
 जाओ तीसे सुंदरविचित्तक्खणविराइयसरीरो । जेहो सिहो पुत्तो बीओ पुत्तो वीरनामोत्ति ॥ ७५ ॥
 को तेसि दाणविन्नाणबुद्धिसुविमुद्धधम्मगेहाण । निउणोऽवि गुणलवंपि हु होअ समथो पवित्थरिउं ? ॥ ७६ ॥
 नागो इव पिंडिअइ बंभंडकरंडए अमायंतो । जस्स जसोहो सारयनिसिच्छणमयलच्छणच्छओ ॥ ७७ ॥
 जिणविबुसुपसत्यतित्यजताइधम्मकरणेण । धम्मियजणाण मज्जे जेहि य पत्ता पढमेरहा ॥ ७८ ॥
 अन्नाणतण्हसमणी सुयनाणपवा पयद्विया जेहिं । सयलागमपोत्थयलेहणेण निच्चंपि भव्वाण ॥ ७९ ॥
 तेहिं तित्थाहिवपरमभत्तिसव्वस्समुव्वहेतेहिं । वीरजिणचरियमेयं कारवियं मुद्धबोहकरं ॥ ८० ॥
 जमजुत्तमेत्थ भणियं नियमइदुब्बलओ मए किंपि । तं साहंतु गुणट्ठा ओच्छाइयमच्छरा विउसा ॥ ८१ ॥
 छत्तावल्लिपुरीए सुणिअथेसरगिहंमि रइयमिमं । लिहियं च लेहएणं माहवनाभेण गुणनिहिणा ॥ ८२ ॥
 नंदसिहिरुदंसखे(११३९)वेक्कंते विक्कमाओ कालंमि । जेहस्स सुद्धतइयातिहिंमि सोमे समत्तमिमं ॥ ८३ ॥
 विट्ठब्धं चैतच्चरित्रं छात्रावल्यां श्रीमद्भिः स्थितिं दधद्भिः, मानं चास्य द्वादश सहस्राणि श्लोकानां ॥ चरित्रे चात्र विचक्षणानां विलोक-
 नाहोणि बहूनि स्थानानि, विशेषेण चेमानि-
 १ पत्तो मगहाविसए, तहिं दिट्ठा कोडिपुरिसवोज्जा महासिला—मोत्तणं कोडिसिलं, पत्रे ५९, अत्र कोटीशिलेति शिला कास्तीति
 प्रश्ने निश्चितं तस्मा मगधविषये स्थानमिति

२ जिणवरो नाउं । चालइ मेरुं चलणंगुलीइ १२० । इह चावधेयं सिद्धान्तश्रद्धारहितैः, यतो न श्रीमद्भिह्मचन्द्रैः केवलमेतत् मेरुचालनं प्रत्यपादि, किन्तु तत्प्राक्कालीनैरपि श्रीगुणचन्द्रगणिभिः, श्रीमहानिशीथतृतीयाध्ययने श्रीपद्मचरित्रेऽपि च एवमेवाख्यातं स्पष्टतया

३ सिरिवद्धमाणचरियंमि—गम्भावयारजम्मणदिक्खक्खणकहणपडिबद्धो—चउत्थओ एस पत्थावो १४१, अनेन वचसा खा-
द्यानां जिनवल्लभादीनां षट्कल्याणकवादिनां श्रीमज्जिनेश्वराभयेदवसूयोः परंपराया बहिर्वर्तिता स्पष्टीभवति

४ ताहे तिलेयनाहो शुब्बंतो देवनरनरिंदहिं—कप्पोत्ति तहवि साहइ २५१, अनेन वचसा भगवतः प्रथमदेशनाक्षणे नैव देवनराणां सम्राव इति न समंतं गणिभिः, 'पुब्बि देवाणं धम्मं आइक्खइ' इत्यादिवाक्यं तु देवर्षत्प्राधान्येनेति ख्यापितं श्रीमद्भिः

५ तामलित्तिदसम्भुरवीभयचंपाउज्जेणीगयपुरकंपिळ्ळनंदिपुरमहुरापुरेसु महानगरेसु भव्वसत्तजणं पडिबोहिता २६१, अनेन वचसा निरस्तास्ते मूलतो ये निजगदुरवन्त्यादीनां देशानां श्रीसंप्रतिनृपात् प्रागनार्यतां, यतः स्पष्टतयाऽत्र श्रीवीरस्य केवलत्वे उज्जयिनीदशार्णभद्रा-
दिषु विहारो दर्शितः, तेषां भ्रममूलं कौशाम्ब्या अटव्याः स्थाने कौशाब्ब्या नगर्यां ग्रहः, अस्ति च गोदावर्या उपकंठं कौशाब्ब्यटवी यत्र श्रीकृष्णस्य प्रेतता पाण्डुमथुरां गच्छतः, एवं च सौराष्ट्रकलिंगादीनां न व्याहन्येत श्रीवीरकालेऽप्यार्यता

६ अन्नया सेट्ठिणी नरिंदपत्ती य पंचवण्णसुराहिक्कुसुमदहिथक्खयसुगंधिगंधवूववासपडिपुण्णपडलकरपरियरियाओ गयाओ जिणालयं, विरइया अणेगविच्छित्तिमणहरा सव्वण्णुबिंबाण पूया ३२७, अनेन स्त्रीणां जिनबिम्बानां पूजाया निषेधकस्य जिनदत्तस्य शास-
नतत्त्वापलपिता ध्वनिता

७ कप्पसमत्तीए विहरिया मुणिओ ३२९, इत्युत्तया मासकल्पविहारसोत्सूत्रतावादिनो जिनदत्तस्य सूत्रोत्तीर्णवादिता व्यक्तीकृता

६. गुरुसाराजो धवलउ सुबिहया साहुसतई जाया ३४०, इत्येवं श्रीजिनेश्वरसूरेः सुबिहितनसुद्धो वर्णितः, तथाच तेभ्यः
 स्वतरोत्पत्तिं वावदुका दूरं निरस्ताः, यद्यपि कैश्चिदपास्य भवभियं न्यस्तमत्र 'खरयया' इति पदं न च तत् प्रब्रज्वादेशु, न च यथार्थं,
 तदनुयायिभिर्यव्यकरणसंवेगंगशालादिवृत्तिसुरमुन्दरीचरित्रादिषु तदुल्लेखस्याकृतेः, न च मात्रागणोऽपि लकारादारब्धो यथायथं समाप्नोति
 इत्यलमतिविस्तरेण । चरित्रस्यास्य मुद्रणमारब्धपूर्वं श्रेष्ठि देवचंद लालभाइ जैनपुस्तकोद्धारसंस्थया, परं समाप्तस्वरसरे श्रीराजनगरे
 श्रेष्ठिसुवाभाइ रवचंद इत्यनेन स्थापिताया विद्याशालासंस्थायाः कार्यवाहकैः श्रेष्ठिशिवाभाइ मोहनभाइ (३) जीवनभाइ
 इत्येभिः आगमाराधनोत्सवागतेनान्येन च द्रव्येण साहाय्यं चिकीर्षुभिः पंचविंशतिशतिका दत्ता इम्माणां संस्थायै एतस्यै, तेनानया
 संस्थया यथायथं समाप्य प्राकाश्यं नीतं चरित्रमेतत् । शोधने विहितेऽपि श्रमे स्वलितं यत् शोधयन्तु धीमन्तः सज्जनास्तदित्यर्थयेत
 आनन्दसागरः १९८५ कार्तिकशुक्ला ३ गुरुवासरे राजनगरात्

श्रीवीरचरित्रस्य विषयानुक्रमः



१ प्रस्तावः

प्रस्तावना

महावप्रजयन्तीशत्रुमर्दनवर्णनं

नयसारवर्णनं

अटवीमध्ये साधुभ्यो दानं

धर्मदेशना सम्यक्त्वं च

सौधर्मो देवत्वं धर्मकार्यं च

२ प्रस्तावः

विनीतावर्णनं

श्रीऋषभप्रभुवर्णनं

समवसरणवर्णनं

वामासुतमरीचिदीक्षा

२ अंगारवधकट्टष्टान्तः

३ पारिव्रज्यं

३ मरीचिदेशनादि

४ इन्द्रचक्रिकृतमवग्रहदानं

मरीचेः कुलमदः

अष्टापदे चैतं तद्गुणाश्च

कपिलदीक्षा मरीचिकालः आसुरि-

दीक्षा अव्यक्तादि

७ सूरसेनपरिव्राजकचरित्रं अग्निद्योतदीक्षा

९ सनत्कुमारे देवः श्वेतांबिकायां भारद्वाजः

१० माहेन्द्रे देवः संसारः

११ परिवाड्वृत्तं भोगदोषाः श्वावरदीक्षा

१३ ब्रह्मदेवः

१४ ३ प्रस्तावः

१५ विश्वभूतेर्मधुक्रीडा

१७ देव्याग्रहः कूटपुरुषाः रणजाना विश्वना-

१९ न्दिक्रीडा विश्वभूतेरपमानं संवेगश्च

२० संभूत्याचार्यवर्णनं देशना विश्वभूतिदीक्षा

परिजनाक्रन्दः बोधश्च

२३ विश्वभूतेस्तपः गोनुन्नस्य भातः विद्वानं ३१

२५ महाशुके देवः

रिपुमर्दनः अचलः मृगावती पुत्री रक्षो न

२५ सप्त स्वप्नाः त्रिपुसुजन्म ३३

प्रेक्षणकं अथग्रीवदूतापमानं सिंहवधः ५०

युद्धं प्रतिवासुदेववधः अंतःपुरविलापः

अंगादिदेशसाधनं कोटीशिलोत्पादनं ६०

पोतनपुरे श्रेयांसजिनागमः धर्मकथा

सम्यक्त्वं ६२

गायकमुनिः देव्यपमानं सप्तभनरकगमनं ६३

धर्मघोषसूरिदेशना अचलदीक्षामोक्षौ ६३

प्रियमित्रचक्री अनार्यदेशसाधनं चक्रिकृद्धिः

वैराग्यं प्रोष्ठिलाचार्यदेशना दीक्षा शुक्रदेवः ७१

४ प्रस्तावः

तन्दनजन्म प्रोष्ठिलाचार्याः देशना ७२

नृपो नरसिंहः चम्पकमालादेवी मन्त्रिवर्गः

सुतचिन्ता घोरशिवागमः मन्त्रसाधनं

घोरशिवमूर्च्छा श्रीभवनपुरं अवन्ति-

सेनो राजा वीरसेनविजयसेनौ राज्यं

स्वेचयुद्धं गगनवल्लभं विजयराजसुतो

जयशेखरः वैर्यमिततेजाः वीरसेनरा-

जत्यापहारः विजयसेनकृतो राज्यक्रमः

सोमदत्तगृहे स्थानं प्रस्थानं योग्याचार्यो

महाकालनामा प्रव्रज्या, अष्टशतेन होमः

क्षत्रियैः, वैताल्यगमनं चंपकमालया

ध्वजस्वप्नः घोरशिवस्य राज्यं नर-

विक्रमाभिधानं हर्षपुराधिपदेवसेनदु-

हितुर्वरणं कालमेघमल्लजयः शीलवत्यै

पितृशिक्षा पुरप्रवेशः युवतिविभ्रमा

जयकुञ्जरवशीकरणं कुमारस्य प्रवासः

पाटलगृहे वासः शीलवत्या अपहारः

जयवर्धने राज्यं नद्या नरविक्रमापहारः

सामन्तभद्रः देशना सुतौ गोकु-

लिकुट्टहे सुतसंयोगः शीलदाल्यौ शी-

लवत्या योगः मालाकाराय चौडराज्य-

दानं जयन्त्यां गुरोर्गमनं देशना पित्रा

योगः राज्यभिक्षेकः शिक्षा साधु-

नृपयोः १०९

नन्दननृपस्य दीक्षा विंशतिस्थानकारा-

धनं प्राणते देवः १११

देवानन्दकुक्षववतारः स्वप्नानामुपलभश्च १११

इन्द्रस्तुतिः गर्भापहारः देवानन्दकंदः ११२

त्रिशलाकुक्षौ संक्रमः स्वप्ना वृद्धिसनोरथाः ११४

निष्पन्दत्वं शोकः अभिग्रहः ११५

श्रीवीरस्य जन्मनि दिक्कुमारीमहः ११७

अभिक्षेकसासप्री मेरुचालनं अभिक्षेकः १२३

नृपकृतो महः

वर्धमाननामकरणं सुरपिशाचसर्परूपा-

भ्यामभीतिः लेखशालानयनं

यशोदाभिधानकरणं

यशोदया श्रीवीरस्य विवाहः, प्रियदर्शना-

जन्म

मातापित्रोः स्वर्गमनं, नन्दिवर्धनस्य रा-

ज्याभिषेकः

संवत्सरदानं नन्दिवर्धनकृता महानसशा-

ला लोकान्तिकागमनं च

दीक्षाभिषेकः चन्द्रप्रभा शिविका दीक्षा-

महोत्सवः

५ प्रस्तावः

सोमब्राह्मणाय वक्षार्धदानम्

१२५ क्रूर्मोद्गामे गोपोपसर्गः शक्रकृता निर्भ-

र्त्सना दूहजंताश्रमे गमनं वर्षायाः

पक्षे गते निर्गमः अभिग्रहपंचकं १४८

वर्धमानग्रामस्थास्थिग्रामत्वे हेतुः वृषस्या-

प्रतिजागरणाद् द्वेषः मारिः चैत्यम् १५२

शूलपाणिकृता उपसर्गः तत्प्रतिबोधः

स्वप्नदशकं इन्द्रशर्मोक्तं तत्फलं (१) १५६

अच्छंदकस्य कुटिलता शक्रशिक्षादि १५८

सुवर्णवालुकायां वक्षार्धस्य पातः, नन्दि-

वर्धनाय लक्ष्णेण दानं तस्य १५९

कनकखलाश्रमः (गोभट्टो विप्रः वना-

रसीप्रस्थानं विद्यासिद्धाकृष्टा रसवती

युवतिश्च शीलदाक्ष्यं जालन्धरे चन्द्र-

लेखाचन्द्रक्रान्ते ईशानचंद्रः रक्षान-

लयं गंगायां प्रवेशः नास्तिक्यकू-

जालन्धरे गमनं ईशानचन्द्ररक्षा यो-

गिनीशान्तिः परस्त्रीनियमः गृहे आ-

गमनं भार्यामरणश्रवणं धर्मयोगस्य

देशना दीक्षा मंडूकीविराघना क्रोधः

ज्योतिष्कः तापसः चंडकौशिकः

बोधः

उत्तरवाचाला श्वेतांविकायां गृहेशि-

नृपकृता स्तुतिः

सुरमिपुरं सुदंष्ट्रसुरोपसर्गः कंबलशंखौ

मथुरा जिनदासः साधुदासी गंगोत्तरः

स्थूणके गमनं पुण्यबोधः १८२

६ प्रस्तावः

राजगृहनालन्दायां तन्तुबाधाजुचालायां

वर्षावासः (२)

१८३

उत्तरापथे सिलिन्ध्रे केशवशिवापुत्रो मं-
खः पूर्वप्रियोपलब्धये पट्टिकाकृतिः मं-
खलीमुमद्रयोर्मखत्वं गोशालजन्म,
श्रीवीरेण मीलनं कोलाके सिध्यत्वं प्रा-
गृहीताया नियतेः स्थालीस्फोटे दाल्ढ्यं
ब्राह्मणग्रामे उपनन्दगृहदहः चंपायां
वर्षावासः (३) कालके पात्रालके च ताडनं
कुमारे मुनिचन्द्राः चौराके सोमाजय-
न्तीभ्यां मोचनं पृष्ठचम्पायां वर्षावासः (४)
कुतांगले हरिद्राः श्रावस्यां मनुष्यमांसं
हरिद्रुमेऽग्निः मंगलाग्रामे वासुदेवगृहे
आर्वते बलदेवगृहे च स्थानं चौराके
मंडपदहः कलंबुकायां कालमेघह-
स्तिनौ म्लेच्छदेशे गमनं पूर्णकलशे स्ते-

नवधः भट्टिलायां वर्षावासः (५) कद-
लीसमागमे जंबूखंडे चास्तारिकामके
तंबाके नन्दिषेणाः कूणिके विजयाप्र-
गलभाभ्यां मोचनं वैशालीप्रस्थानं (६)
गोशालो बाधितः अयस्कारघातः १९८
विभेलकयक्षस्योत्थानपर्याणिका २१२
शालिशिषे कटपूतनोपसर्गः लोकावधिः २१३
आलम्बिकायां वर्षारित्रः (७) २१३
गोशालमीलनं २१३
कुण्डागे मधुमथनगृहे गोशालचेष्टा मर्दन-
ग्रामे बलदेवगृहे च २१३
सालाग्रामे सालज्जोपसर्गपूजे २१४
लोहांगले जितशयुकृतः सत्कारः २१४

पुरिमताले वगुराश्रेष्ठिकृता पूजा, धर्मवेष-
सूर्युकं पूजाफलं दानं च २१७
तुमागपथे श्रीभूमौ च गोशालस्य ताडनं
राजगृहेऽष्टमौ वर्षावासः (८) २१८
लाढावज्रभूमिशुद्धभूमिपूषतर्गाः वृक्षपूले
वर्षावासः (९) २१८
सिद्धार्थकूर्माश्रमयोरन्तराले तिलप्रश्नादि २१८
वैश्यायनस्योत्थानपर्याणिका तेजोलेख्या २२३
तन्निवारणं तदुपायप्रश्नोत्तरे २२३
कूर्मारसिद्धार्थपुरोरन्तराले तिलनिश्चयात्
प्रवृत्तिपरिहारो नियतिवाददाल्ढ्यं च
श्रावस्यां तेजोलेख्या पार्थन्तेवसि-
संगमः २२४

७ प्रस्तावः

वैद्याभ्यां शंससत्कारः गंडकिकायां नावि-

कोपसर्गः ऋतुषट्स्यविकारिता २१९

वाणिज्यग्रामे आनन्दगाथापतिः अव-

धिमान् २१९

श्रावस्यां वर्षारत्रः (१०) सानुषष्टिके

प्रतिमाः २२६

दृढभूमौ पेढाले संगमोपसर्गः, संगम-

कस्य सौधमोन्निर्वासनं २३१

आलंभिकायां विद्युत्कुमारेन्द्रस्तुतिः श्वेतां-

विकायां हरिस्सहस्तुतिः श्रावस्यां स्क-

न्द्रप्रतिमासत्कारः कौशाभ्यां चन्द्र-

सूर्यवतारः वाराणस्यामिन्द्रपूजा रा-

जगृहे ईशानार्चो मिथिलयां जनक-

स्तुतिः धरणेन्द्रवन्दना २३३

राजगृहे वर्षारत्रः (११) भूतानन्दस्तुतिः

जीर्णश्रेष्ठिभावना केवलदेशना २३४

चमरेन्द्रोत्पातः सुसुमारे

भोगपुरे माहेन्द्रोपसर्गः सनत्कुमारेन्द्र-

नतिः नन्दीग्रामे नन्दिस्तुतिः ४४१

चम्पापातः धारणीमरणं चन्दना कुलमा-

षाभिग्रहः २४७

षाण्मासिकः कीलकोपसर्गः मध्यमापापायां

कीलकनिर्गमः २५०

तपःसंकलना केवलज्ञानं च

८ प्रस्तावः ३५१

समवसरणरचनं धर्मदेशना

२५३

गणधराणां प्रतिबोधः दीक्षा

दीक्षा संघस्थापना २५९

ऋषभदत्तस्य देवानन्दयात्रा दीक्षा

क्षत्रियकुण्डे समवसरणं पर्यदेशं नन्दि-

वर्धनकृता स्तुतिः जगालिदीक्षा (भा-

त्रादिवचनप्रतिवचनानि) महः २६९

जमालेनिहृवत्वं प्रियदर्शनाया बोधः ज-

मालेर्गतिः २६९

कौशाम्ब्यां सुरप्रियलब्धवरे नृपस्य क्रोधः

चण्डप्रद्योतकृता भृगावत्याः प्रार्थना क्षी-

लरक्षार्थं छलं भृगावत्या दीक्षा या रा-

सा सोदाहरणं आनन्ददीपनां वीणि-

ज्यग्रामादिषु बोधः कोशाभ्यां चन्द्र-

सूर्यवतरणं कैवल्यं २७३


आश्चर्यदशकं आनन्दश्रवणः गोशालक-	सुदंष्ट्रीविकर्षकस्य दीक्षा तन्मोचनं च	सामयिके कामदेवकथा	३२३
कृत उपसर्गः सर्वानुभूतिः सहसारे सु-	तामलित्यादिषु विहारः प्रसन्नचन्द्रादी-	देशवकाशिके सागरदत्तकथा	३२५
नक्षत्रोऽच्युते	नां बोधश्च	पोषधोषवासो जिनदासकथा	३२७
गोशालकदाहः अयंपुत्रः शिष्येभ्यो निहं-	राजगृहे समवसरणं	अतिथिसंविभागे साधुरक्षितकथा	३२९
रणदेशः सप्तमदिने सम्यक्त्वं आदेशः	प्रथमाणुव्रते हरिवर्मकथा	सेडुकद्विजवृत्तं	३३४
सिंहानीतौषधेन नीरोगत्वं श्रीवीरस्य	द्वितीयाणुव्रते सत्यश्रेष्ठिकथा	गागलिप्रवज्यादि	३३४
गोशालकस्य भवाः	तृतीयाणुव्रते वसुदत्तकथा	अष्टापदयात्रा तापसानां बोधादि	३३५
राजगृहे धर्मदेशना मेघकुमारस्य दीक्षा	तुर्याणुव्रते सुरेन्द्रदत्तकथा (शुभंकर-	मिथिलायां दुष्प्रपामाश्रुगोक्तिः	३३७
भग्नमनस्कत्वं पूर्वभवौ	कथा)	आयुर्वर्धने विज्ञप्तिः	३३८
तन्निषेणस्य दीक्षा, देवेन कृतो निषेधः	पंचमाणुव्रते वासवदत्तकथा	निर्वाणमहः गौतमकेवलं	३३९
जिनेनापि, वेश्यागृहे स्थानं दशकदश-	द्विष्रते जिनपालितकथा	परम्परा ग्रन्थकारकाणामितिहा च	३४१
कबोधः दीक्षा देवत्वं	भोगोपभोगमाने रविपालकथा	इति श्रीमहावीरचरित्रस्य विषयानुक्रमः	
	अनर्थदण्डविरतौ कोरंटकथा		३२२

शेठ-देवचन्द-लालभाई-जैन-पुस्तकोद्धारसंस्थायाः क्रेयग्रंथाः

अंक.	मूल्य.	अंक.	मूल्य.	अंक.	मूल्य.
३०	आनन्दकाव्यम० मौक्तिक ४ शृं ०-१२-०	६०	विंशतिस्थानचरित्रं पद्यबद्धं १-०-०	६८	नवपदप्रकरणं लघुवृत्तिः १-०-०
३२	" " ५ मुं ०-१०-०	६१	कल्पसूत्रसुबोधिका २-०-०	६९	पंचवस्तुग्रंथः सटीकः ३-०-०
४३	" " ६ हुं ०-१२-०	६२	सुबोधा सामाचारी ०-८-०	७०	आनन्दकाव्यम० मौक्तिक ८ शृं.
४८	श्राद्धप्रतिक्रमणसूत्रवृत्तिः २-०-०	६३	श्रीपालचरित्रं प्राकृते साव- चूर्णिकं १-४-०		
५१	सेनप्रश्नानि (प्रश्नोत्तररत्नाकरः) १-०-०	६४	प्रवचनसारोद्धारः सटीकः उ- त्तरार्ध, ४-०-०	७१	आचारप्रदीपः १-४-०
५३	आवश्यकदिप्पनं. १-१२-०			७२	विचाररत्नाकरः ३-०-०
५४	जम्बूद्वीपप्रज्ञप्तिः सटीकादुत्तरार्ध. २-०-०	६५	(द्रव्य) लोकप्रकाशः भाग १ लो २-०-०	७३	नवपदप्रकरणं बृहद्वृत्तिः ४-०-०
५६	श्रीपालचरित्रं संस्कृते. ०-१४-०	६६	आनन्दकाव्य म० मौक्तिक ७ मुं. १-८-०	७४	(क्षेत्र) लोकप्रकाश भाग. २ जी २-४-०
५७	सूक्तमुक्तावली. २-०-०	६७	तत्त्वार्थधिगमसूत्रं भाष्यटीका- युक्तं पूर्वार्ध ६-०-०	७५	महावीरचरियम् ४-०-०
५८	प्रवचनसारोद्धारः सटीकः पूर्वार्ध. ३-०-०			७६	प्रियङ्करनृपकथादि १-०-०
५९	तंदुलवैयालीयपयन्नो सटीक. १-८-०				

श्रीआगमोदय-समिति संस्थायाः क्रेयग्रंथाः

अंक.	नाम.	किंमत.	अंक.	नाम.	किंमत.
३४	विशेषा० गाथा विषयक्रमः	०-५-०	४८	विशेषा० भाषांतर भाग २ जो	३-०-०
३५	विचारसारप्रकरणं	०-८-०	५०	जीवसमासः	१-८-०
३६	गच्छाचारपयज्ञो	०-६-०	५१	शोभनस्तुतिः (संस्कृत) प्रेसमां	८-०-०
३७	धर्मबिन्दुप्रकरणं	०-१२-०	५२	स्तुतिचतुर्विंशतिका सचित्रा शोभनसुनिवृता	६-०-०
३८	विशेषा० भाषांतर भाग १ लो	२-०-०	५३	चतुर्विंशतिका सचित्रा वज्रमहिम्नरिक्त	६-०-०
३९	जैनफिलोसोफी (अंग्रेजी)	१-०-०	५४	भक्तामरकाव्यसंग्रह भाग २ जो	३-८-०
४०	योग "	०-१४-०	५५	नंदादिसप्तसूत्रीगाथाऽपकारादियुतो विषयानुक्रमः	२-०-०
४१	कर्म "	०-१२-०	५६	आवश्यकमलयगिरिरिक्तटीका भाग १ लो	४-०-०
४३	अनुयोगद्वारसूत्रं	२-८-०	५७	श्रीचतुर्विंशतिजिनानन्दस्तुतयः सविवरणाः सचित्राः	१-४-०
४४	नंदीसूत्रं	२-४-०	५९	जैनधर्मवरत्नोत्तर	प्रेसमां
४५	भक्तामरकाव्यसंग्रह भाग १ लो	३-०-०		लोकप्रकाश गुजरातीभाषांतर भाग १ लो	प्रेसमां
४६	दशपयज्ञा छायायुक्त	२-०-०		आवश्यकमलयगिरिरिक्तटीका भाग २ जो	प्रेसमां
४७	पंचसंग्रहः (स्वयम्भूतियुतः)	२-८-०		प्राप्तिस्थान सुरत गोपीपुरा.	



श्री देवचन्द लालभाई जेठानी

जन्म १९०९ चैत्रमान्दे

निर्याणम् १९६२ वैशाख-६

कार्तिकयुक्तेकादश्यां (देवदीपावली सोमवासरे) पोषकृष्णवृत्तीयायाम् (वाकर संमन्वयसंज्ञाभासरे)
सूर्यपुरे. मुम्बयनगर.

The Late Sheth Devchand Lalbhai Javeri.

Born 22nd Nov. 1852 A. D. Surat,

Died 13th January 1906 A. D. Bombay

7-27 :- Copies 5000.

N. S. P.

॥ नमो वीतरगाय ॥

॥ श्रीमहावीरचरित्रम् ॥

॥ श्रीमद्गुणचन्द्रसूरिवर्यनिर्मितं ॥



पयडियसमत्थपरमत्थवित्थरं भवचक्ककयसोक्खं । विण्णुरइ जस्स रविमंडलं व नाणं निहयदोसं ॥ १ ॥
जस्स य सोहइ पणमंतसक्कसंकंतनयणकमलवणं । कमविमलसरं तललीणमीणमयरं नंहसुजलं ॥ २ ॥
संगमयपणइणीहिं कडक्खविक्खेवखोभदक्खाहिं । जस्स मणांगं पि मणो न चालियं नियपइण्णाओ ॥ ३ ॥
नरत्तिरियदेवविहिओवसगरिउवग्गविजयजायजसो । ओहामियउण्णवीरो सो जयइ जिणो महावीरो ॥ ४ ॥
पणमह सिरिसहजिणिंदचंदसुद्धामकामवलदलणं । गिहिसाहुधम्मपासायमूलपीढाइयं जेण ॥ ५ ॥
अजियाइणो जिणिंदा सुरिंदसंदोहनभियकमकमला । धम्ममहिधरणधीरा सेसव्व जयंति सेसावि ॥ ६ ॥
सो जयइ जिणो पासो जस्स सिरि सहइ फणिफणकड्ढो । पायडियसत्तजीवाइत्तसंखं व दावित्तो ॥ ७ ॥
कविसेवियपयकमला सुत्तीहि पसाहिया महाभोगा । गोवग्गजणियसोक्खा सरस्सई जयइ सरियव्व ॥ ८ ॥

दंसिथसमगसगापवगसग्गाण गोयभाईणं । गुणवंताण गुरूणं शुणामि पयंपकयं निचं ॥ ९ ॥
 इय संथवणिज्जण्यपणाममाहप्पनिह्लियविग्घो । भव्वाण सोक्समूलं धम्ममुवएसं पयंपमि ॥ १० ॥
 जलहजलगलियरणं व दुल्लहं पाविऊण मणुयत्तं । पुरिसत्थज्जणकज्जे उज्जमियवं वुहज्जेणं ॥ ११ ॥
 तत्थ पुरिसत्थमत्थयचूडामणिविब्भमो परं धम्मो । सो पुण पइदिणसचरियसवणओ हवइ भव्वाणं ॥ १२ ॥
 तस्स य धम्मस्स जिणो पणायगो संपयं महावीरो । चरियंपि उ तस्सेव य सुणिज्जमाणं तओ जुत्तं ॥ १३ ॥
 तं पुण निस्सेसागमसमुहसवणासमत्थसत्ताणं । निउणेणावि न गुरुणा समग्गमवि तीरण् वोत्तुं ॥ १४ ॥
 ता जह भुवणेक्कगुरू निप्पडिमपभावधरियधम्मधुरो । भिच्छत्तिभिमुसुमूरणेक्कमिहिरो महावीरो ॥ १५ ॥
 अच्चंतमणंतमणोरपारभववारिरासिमणवरयं । पुवं परियट्ठिय तिरियतियसपुरिसाइभावणं ॥ १६ ॥
 ओसण्णिणी इमीए पढमं चिय गामचित्तगभवंपि । नीसेससोक्खमूलं सम्मत्तमणुत्तमं पत्तो ॥ १७ ॥
 तत्तो पाविय देवत्तमुत्तमं भरहचक्कवट्ठिस्स । मिरिइत्ति सुओ होउं काउं जिणदेसियं दिक्खं ॥ १८ ॥
 दुस्सहपरिसहनिम्महियमाणसो पयडिउं तिदंडियं । भिच्छत्तविलुत्तमई कविलस्स कुदेसणं काउं ॥ १९ ॥
 तद्दोसेणं अयराण वड्डुं कोडकोडिसंसारं । छब्भवगहणे पुणरवि पारिद्वज्जं पवज्जित्ता ॥ २० ॥
 दीहं संसारं हिंदिऊण रायग्गिहंमि रायसुओ । होऊण विस्समई घोरं संजममणुचरित्ता ॥ २१ ॥

मरणे नियाणबधं निवत्तिय सुरसुहं च भोत्तणं । पोयणपुरे तिविद्धु परिपालिय वासुदेवत्तं ॥ २२ ॥
 मूत्राए पिथमिच्चो चक्कित्तं संजमं च अणुचरिउं । छत्तगाए नंदण नरनाहत्तं च पव्वज्जं ॥ २३ ॥
 परिपालिय वीसइकारणेहिं तित्थाहिवत्तमज्जिणिउं । पाणयकप्पा चविउं कुंडग्गामंमि नयरंमि ॥ २४ ॥
 सिद्धत्थरायपुत्तो होउं जंतूणमुद्धरणहेउं । सबविरेइ पवज्जिय दुव्विसहपरीसहे सहिउं ॥ २५ ॥
 केवललच्छिं लहिउं संपत्तो मोक्खसोक्खमक्खंडं । अट्ठहिं पत्थावेहिं सिद्धताओ तह केहमि ॥ २६ ॥

द्वादशभिः कुलकम् ॥ अहवा-

कत्थ सुवणेक्कपहुणो चरियं अहारिसो कहिं कुकई ? । साहसमिममसमुयहिपवाहतरणाभिलासोव ॥ २७ ॥
 तहवि हु गुरुजणवयणोवरोहओ सुद्धलोयसुहवोहं । विरएमि चरियमेयं खमियव्वं एत्थ सूरीहिं ॥ २८ ॥
 एत्थ य पत्थुयचरिए नाणाविहसंविहाणागाइन्ने । अमयजलकुल्लतुल्ले महल्लकल्लाणवल्लीणं ॥ २९ ॥

कत्थवि जइवि हु किंपिप्पसंगओ किंपि वुहवयणाओ । सत्थंतराणुसरणाओ किंपि किर भणइ अउव्वं ॥ ३० ॥
 चरिएयरंति तहवि हु न संकियव्वं कहिंपि कुसलेहिं । उवकहपसुहं एत्तो पज्जत्तं बहुपसंगेणं ॥ ३१ ॥ विशेषकम्

अत्थि समत्थावरविदेहालंकारकण्णपहुमणिमउडविडंकिविहरणकंतिविच्छुरियचरणजिगनाहविहरणप-
 संतडिंबडमरं अमरागारसमुत्तुंगसिंगसमुवहसियहिमगिरिवरं वरवेरुलियकणयकलहोयपमुहमहागरसोहियवसुंधराभोगं

भोगोवभोगलालसज्जणजणियपरितोसं सुरभूमिसोहगमडप्फरुसं महावण्यं नाम विजयखेत्तं, तत्थ य विसालसा-
लवलयखाइयापरिक्खित्ता नाणाविहविहारवापीकूवमहासरसरियपरिसराभिरामा सुविभत्तत्तियचलक्कचरचउप्पह-
पसोहिया पासायसयमालालंकिया सुइनेवत्थमहिच्छच्छेयजणसंकुला पागसासणपुरिच्च दीसंतनाणाविहरयणा कम-
लासणमुत्तिच्च सबओमुही विंझगिरिमेहलच्च पुद्गागनागसोहिया जहत्थाभिहाणा जयंती नाम नयरी

कुलसेलुचुंगथणत्थलीएँ नहनइजलेहहाराए । धरणीरमणीएँ मुहे जा सोहइ चित्तेहव्व ॥ ३२ ॥

सत्तमुणिमेत्तगच्चियमणेगमुणिसंकुला सुरपुरिंपि । एगबुहं भूरिविबुहा हसइ व जा तूरसिएँहिं ॥ ३३ ॥

जीए य कमलसंडाण भित्तविरहसंकोथपीडणाणि मुणिवराण करवालुप्पाडणं वालुकुंजेसुं कलहसदो रंहंगभि-
हुणाण पियविरहवेयणा तंतुवायसालसु वसणुब्भवो, न कयाइ लोएसु, तहिं च-सायरपणमंतमहतसामंतमउल्लिमा-
लामणिमसिणियपायवीढो पयंडमुयदंडमंडलियकोडंडनित्तित्तिकखलुरुप्पखंडियसयसत्तुमुंडमंडियसमरंगणो, दणुब्भ-
डसुहडपरिसुडदंडनाहसस्साणुसरिजमाणमगो मगणगणवंचाइरित्तपूरियमणोरहो, रहोच्च सुसिलिट्ठलुट्ठसुचक्कक-
यसचरणो रणरसियपुरिसोव कयवहुक्कयपरिगहो गहगणोव कविमुहगुरुवयणाणुगओ गओव अणवयदाणवरिसो
रिसिच्च निग्गहियछवग्गपयारो पाथारोव पुव्वपुहइपालपवत्तियनयनयरीए हिमगिरिच्च डिंडीरिंपिंडपंडुराकित्तिसुरस-
रियाए जलहिच्च अणेगगणगणरयणरासीए

विपक्खदप्पखंडणो नरिंदवंसमंडणो, अजायभंगसासणो कुनीइलोयनासणो ।

असेससोक्खकारणं करेइ लोयपालणं, नरिंदसत्तुमहणो म(ज)णंमि चित्तनंदणो ॥ ३४ ॥

जंमि य नराहिवे पवलबलसालिभुयपरिहारोविधरणिभारे रायनीइमेत्तं मंतिणो सोहा हरिकरिरहजोहसामग्गी
आडंबरं असिचक्कचावसरकुंतप्पमुहपहरणपरिग्गहो सेवगा पणयावेक्खा सजीयनिरेक्खंगरक्खपरिक्खेवपरिकम्पणा ।
तस्स य रण्णो विसिट्ठायारपरिपालणपरायणो धम्मसत्थसवणवियाणिग्रहेज्जोवादेधवत्थुसुरूवो गंभीरिमाइगुणग-
णावासो पयइसरलो पयइविणीओ पयइपियंवओ पयइपरोवयारपरो पुहइप्पइट्ठाननामंमि गामे नयसारो नाम गाम-
चित्तगो अहेसि । जो य तहाविहसाहुसेवाविरहेऽवि अलसो अक्खपचित्तीए परम्मुहो परपीडाए सयण्हो गुणगणो-
वज्जणाए अचक्खू परछिइपलोयणाए । एवंविहगुणो य सो सविसेसगुणक्करिससाहणनिमित्तं भणिओ गुरुअणेण,
जहा-धणरिद्धी दूरं वड्डियावि दुव्विणयपवणपडिहणिया । एक्कपएच्चिय पुत्तय ! पणस्सए दीवयसिहव्व ॥ ३५ ॥

णीहारहारधवलोवि वच्छ ! सेसो गुणाण संघाओ । विणएण विणा वयणं व नयणरहिंयं न सोहेइ ॥ ३६ ॥

अचंतपिओऽवि परोवयारकारीवि भुयणपयडोऽवि । वज्जिज्जइ पुरिसो विणयवज्जिओ गुरुभुयंगोव्व ॥ ३७ ॥

इय दुव्विणयत्तणदोसनिवहमवलोकण बुद्धीए । पुत्त ! रमेज्जसु विणए समत्थक्खणकुलभवणे ॥ ३८ ॥

तहाहि—विणएणं हुंति गुणा गुणेहिं लोगोऽणुरागमुव्वहइ । अणुरत्तसयल्लोयस्स हुंति सवाओ रिद्धीओ ॥ ३९ ॥

रिद्धीहिं संगओ गयचरोव अणवरयदाणवरिसेण । मग्गणगणपणईणं उवयारं कुणइ लीलाए ॥ ४० ॥

उवयरणेणं तेसिं लब्भइ आचंदकालिया किन्ती । तीएऽविहु लद्धाए किं नो लद्धं तिहुयणेऽवि ? ॥ ४१ ॥

एसच्चिय जेण थिरा जुगविगमेऽविहु न वच्चइ विणासं । उप्पत्तिपलयकलियं सेसं पुण थेवदियहथिरं ॥ ४२ ॥

इय गुरुजणसिक्खं गिण्हिऊण तह कहवि संपयदो(सो) । वीसासट्ठाणं नरवइस्स परमं जहा जाओ ॥ ४३ ॥

अग्नया य सत्तुमद्दणनराहिवेण भवणसंदणाइनिमित्तं पवरदारूहिं पओयणंमि संपत्ते आणत्तो एसो-भइ !
गच्छसु तुमं पभूयं सगडसमूहं किंकरनरनियरं च गहाय दारुनिमित्तं महाडवीएत्ति, तओ सिरसा सासनं से पडि-
च्छिय विसिट्ठसंवलगसमेओ समग्गसामगीसणाहो पट्ठिओ गामचिंतगो, पत्तो य अणवरयगमणेण महाडवीए,
जा य केरिसी?—गयणयलाणुलिहंतमहंतचित्ततरुवराभोगावरद्धदिसावगासा अणवरयझरंतगिरिनिज्झइकारमणहरा
जहिच्छविसरंतरुविरुयारिछहरिहरिणसदूलभीसणा महपुसिसवच्छत्थलिव सिरिवच्छालंकिया मिगरायकंधव
केसरविसरविराइया उवसनगरभूमिव मायंगकुलसंकुला सुहडावलिव धरियवाणासणा । तहिं च निउत्तपुरिसेहिं
सरला य दीहरा य विसाला सुंदरा य सुजायवट्ठखंधवद्धा य तरुणो समारद्धा छिंदिं, एवं च छिंदताण जाओ मज्झणह-
समओ, संपत्ता भोयणवेला, पगुणीभूओ भोयणकराणय गामचिंतगो, उवणीया किंकरगणेण विचित्तखंडखण्णहाणा
रसवई, जइ पुण सत्थपरिब्भट्ठो वा मग्गं अयाणमाणो वा एत्थ तडियकण्णडियसमणप्पमुहो अतिही छुहाभिभूओ एज्ज

ता तस्स दाऊण सयं भुंजामिति संपधारिऊण गामचित्तगेण थेंवं भूमिभागं गंतूण तक्खणमवलोकयं दिसावलयं, एत्थंतरे सत्थपरिब्भट्ठा संता परिसंता खुहापिवासाभिभूया मज्झंदिणदिणयरतावविगलंतसेयसलिलधरा तरुवरनि-
वडणकड्यडारावनिसामणसंभावियसत्थावासा समागया तं पएसं तवस्सिणो, दिट्ठा य तेण ससंभमं, गओ तदभिमुहं,
गाढकरुणारसाउरिज्जमाणमाणसेण पणमिऊण पुच्छिया अणेण—भयवं! किमेवं विजणविहारमायरहं?, साहूहिं भणि-
यं—भइ! सत्थेण(समं)पढमं अम्हे पत्थिया, भोगणकाले जाव असणपाणट्ठा गामं पविट्ठा ताव गओ सत्थो, अम्हेऽवि-
तुरंता सत्थाणुमगलग्गा इंता निग्गया एत्थ महाडवीए, गामचित्तगेण भणियं—अहो निक्करुणया अहो दुट्ठसीलया अहो
नरकनिवासललसत्तणं अहो वीसत्थवाइत्तणं अहो पावाभीरुत्तणं अहो आजम्मा नियकुलकलंककरणं तेसिं सत्थियाणं,
अविय—सत्तपयमेत्तसंथववसेऽवि सुयणाण बहूए नेहो । आजम्मदंसणेऽविहु निहयचित्ताण न खलाणं ॥ ४४ ॥

सत्थाणुसरणकालेऽवि वारिया किं न पावबुद्धीहिं । एए महाणुभावा पढमं चिय साहुणो तेहिं? ॥ ४५ ॥

जइ एएसिं सीहाइएहिं कीरेज्ज एत्थ विदवणं । ता नूणमेव तेसिं नरगेऽविहु होज्ज संवासो ॥ ४६ ॥

अहवा पावाण कहाए होउ नियधम्मदूसणकरीए । आगच्छह आवासं कुणह पसायं ममेयाणिं ॥ ४७ ॥

इय भणिए ते सुणिणो जुगमेत्तनिहित्तचक्खुणो धीरा । तस्सावासंमि गया पच्चक्खा धम्मनिहिणो व्व ॥ ४८ ॥

पुणवससाहुदंसणसिणेहसंजायतिव्वसद्धेणं । विउलेहिं असणपाणेहिं तेणऽवि पडिलाहिया विहिणा ॥ ४९ ॥

गहियभत्तपाणेहि य पडिनियत्तिऊण जीवोवरोहरहिए थंडिलमि पडिक्कंता ईरियावहिया आलोइयं भत्तपाणं कयं चितिवंदणं विहिओ तक्कालोचिओ सज्जाओ, सुहज्जाणेण खणंतरं गमिऊण समुज्झय रागदोसं मुणिणो परिजिमियत्ति, गामचिंतगोऽपि कयत्थमप्पाणं मन्नंतो भोत्तूण समागओ तेसिं सगासे भणिउं पवत्तो—भयवं ! आगच्छह तुम्हे जेण नगरगामिणिं वत्तिणिं उवदसेमि, तओ पत्थिया साहुणो तेण सद्धि, तेसिं च मज्झे एगो सुणी धम्मकहालद्धिसंनो, तेण य णायं—जहा एस धम्मजोगोत्ति, ता अवस्सं सद्धम्मे निजुजियव्वो होइत्तिचिंत्तिऊण भणिओ सो गामचिंतगो—भो महायस ! कुमगणरिब्भमणपीडियाणं तण्हाखुहाभिमूयाणं अट्ठाणं तहाविहपडि-वत्तीए असणपाणदानेण य परमोवयारी तंऽसि ता किंपि अणुसासिउं समीहामो, गामचिंतएण भणियं—भयवं ! किमेवमासंकह ? नियसिस्सनिव्विसेसं सिक्खवेहित्ति, तओ साहुणा पारद्धा धम्मदेसणा, जहा—

घणुसिक्खाविरहियणुरिसिखितसरजणिगराहवेहं व । तुडिजोगा मणुयत्तं लद्धूणं कुसलबुद्धिमया ॥ ५० ॥

सग्गापवगगफलसाहगस्स धम्मस्स पायवस्सेव । मूलं सम्मत्तमहो जाणेयव्वं पयत्तेणं ॥ ५१ ॥

भिच्छत्तंपकपडलावलुत्तसन्नाणनयणपसराणं । सिरसूलमूलमेसा जणाण सम्मत्तवत्तावि ॥ ५२ ॥

जुत्ताजुत्तं केणवि करुणापरबुद्धिणोवइट्ठपि । दुस्सुमिणंपिव सोउं नेव वंछति तुच्छमई ॥ ५३ ॥

दढमूढगुरुपरुवणवसेण कम्मं च तं पकुवंति । जेण निमज्जति अहो कूवक्खणणुज्जयनरो व्व ॥ ५४ ॥

जं मिच्छतोदयओ अगुरुं पि गुरुं अदेवमवि देवं । धत्तुरिओव्व गेण्हइ लेहुं व सुवण्णबुद्धीए ॥ ५५ ॥
 तेणं चिय पाणिगणो गणणाइकंतवेलमणुभवइ । तं किंपि दुक्खनिवहं जं जाणइ केवली सम्मं ॥ ५६ ॥
 इय भो देवाणुप्पिय ! मिच्छत्तं सयलदोसकुलभयणं । नीसेसदुग्गदुग्गइसंसगकरं लेहुं चयसु ॥ ५७ ॥
 सम्मत्तं पुण नीसेसदोसविरहियमसेससुहफलं । जीवाण तिव्वजरमरणदुक्खवुच्छेयणसमत्थं ॥ ५८ ॥
 जं मोहणिज्जपवलत्तविगमओ गुरुवसा सयं वाचि । उल्लसई कल्लायवल्लीजलकुल्लतुल्लं व ॥ ५९ ॥
 तत्तो अट्टारसदोसवज्जिए जिणवरंमि पडिवत्ती । देवोत्ति समुप्पज्जइ निरवज्जा वज्जघडियव्व ॥ ६० ॥
 सयमवि धम्मपरेसुं सिद्धंतवियारेणेक्ककुसलेसुं । धम्मोवएसनिएसु होज्ज साहसु गुरुबुद्धी ॥ ६१ ॥
 ता जिणवयणायणणविण्णायसमत्थत्तत्तरयणस्स । विरमइ य मई लोइयधम्माउ कुवस्सयाउव्व ॥ ६२ ॥
 अवगणइ गोपयं पिव दुग्गइदुहमयरभीसणावत्तं । कम्मजलुण्णीलाउलमरइउहं भवसमुहं ॥ ६३ ॥
 तहा—सम्मत्तुत्तमसन्नाहिविहियरक्खो खणेण विक्खिवइ । सुहडोव्व तित्थियभडुब्भंडपि मिच्छत्तसंगमं ॥ ६४ ॥
 पासायस्स व पीढं पुरस्स दारं व मूलमिव तरुणो । बारसविहधम्मस्सवि आइं किंत्तिंति सम्मत्तं ॥ ६५ ॥
 इय भो एवं लक्खिय निरवेक्खो लोइएसु मग्गेसु । सहहणनाणसारं सरहसमणुसरसु सम्मत्तं ॥ ६६ ॥
 ताहे भत्तिभरोणयभालयलमिलंतमउलकरकमलो । सोचा सो गुरुवयणं भत्तीए भणिउमाढत्तो ॥ ६७ ॥

तहा—सम्मत्तुत्तमसन्नाहिविहियरक्खो खणेण विक्खिवइ । सुहडोव्व तित्थियभडुब्भंडपि मिच्छत्तसंगमं ॥ ६४ ॥

भयवं ! किमेवमुवइसह पावनिरयाण बुद्धिरहियाणं । पच्चक्खपसूणं पिव अम्हाणं दढमजोसाणं ॥ ६८ ॥
गुरुणा भणियं मा वयसु एरिसं जेण जोगया तुज्झ । जाणिज्झइ संपन्ना संपइ पच्चक्खलिंगेहिं ॥ ६९ ॥
कहमण्णहेमंविहमहाडवीनिवडिया तए अम्हे । दिट्ठा पइपब्भट्ठा गाढस्समसुट्ठिय(सिटिल)सव्वंगा ? ॥ ७० ॥
कह तत्थवि दंसणमेत्तओऽवि चिरदिट्ठवल्हजणे व्व । पुल्लयपडलणुमेओ उप्पण्णो तुह पमोयभरो ? ॥ ७१ ॥
कह वा भोयणसमओवणीयनियभोयणेण दाणमई । जाया अम्हाणुवरिं खुहापिवासाभिभूयाणं ? ॥ ७२ ॥
एवंविहपरिणामो उप्पज्झइ नेव पुण्णरहियाणं । एवंविहा य अतिही न य चक्खुपहं पवजंति ॥ ७३ ॥
रथनिहाणं किं रोमंदिरे किं मरुमि कप्पतरू । कत्थवि थलंमि जलकमलसंभवो हवइ कइयावि ? ॥ ७४ ॥
ता एवंविहविघडंतवत्थुसंघडणलिंगसद्धया । कहमिव तुज्झ न सद्धम्मजोगया भद्दमुह ! होज्जा ? ॥ ७५ ॥
जेणेरिस सामग्गी निरवगहपुण्णपगरिसवसेण । सिवलच्छिपेच्छियाणं निच्छयओ घडइ मणुयाणं ॥ ७६ ॥
किंच—आरियखेत्तुप्पत्ती कुलमकलंकं नरत्तसंपत्ती । निरुवहयरूवलाहो रोगोरगदूरविगमो य ॥ ७७ ॥
आउयमवि पडिपुण्णं कलाकलावंमि कोसलं विमलं । साहूहिं समं जोगो एत्तिथमेत्तं तए पत्तं ॥ ७८ ॥
एत्तो एगयरंपिहु पण्णं व सकम्मपवणपडिहणिया । संसारंमि भमंता अणंतसत्ता ण संपत्ता ॥ ७९ ॥
तुमए पुण सब्बमिमं उवलद्धं पुण्णपगरिसवसेणं । ता एत्तो निरुवममोक्खसोक्खफलदाणदुल्लियं ॥ ८० ॥

सिहिणो सिंहं व सारं फणिवइफणरणचक्कवालं व । एकं अपत्तुपुं गिणहसु जिणेदिसियं धम्मं ॥ ८१ ॥ युग्मम्
 इय भणिए सो चित्तोउमारद्धो तिच्चजायसंवेगो । कह नियकज्जपसाहणपरम्मुहाणं गुणनिहीणं ॥ ८२ ॥
 केवलकरुणारससाधराण समगणियरायरोराणं । जाओ मइ पडिबंधो गुरुण खणदंसणे वावि ? ॥ ८३ ॥ युग्मम्
 निष्पुण्णेषु जणेषु चक्खुं पि खिवंति नेरिसा समणा । ता सव्वहेसि वयणं जुत्तं मह संपयं काउं ॥ ८४ ॥
 विस्संभरतलविलुलंतमउलिमह पणमिऊण गुरुचलणे । आणंदसंदिंसूनयणो सो भणिउमाढत्तो ॥ ८५ ॥
 निक्कारणेक्कवच्छल ! भयवं नीसेससत्ताणपरा । आरोहेसु मभिणिं ह सम्मत्तं भवविरत्तस्स ॥ ८६ ॥
 तोहे गुरुणा जिणभणियनीईओ नायजोगयगुणेण । चित्तुच्छाहप्पमुहपहाणसउणोवलंभमि ॥ ८७ ॥
 अरिहं देवो गुरुणो य साहुणो जिणमयं मयं तुज्झ । इय एवं आरोवियमाजम्मं तस्स सम्मत्तं ॥ ८८ ॥
 भणिओ य वच्छ ! निव्वाणलच्छिवीयं मए इमं दिण्णं । संकाइदोसविरहेण सव्वहा ता जएज्ज इहं ॥ ८९ ॥
 धन्नाउसि तुमं भइय ! दुहसयरुद्धमि भवससुद्धमि । जेण तए जिणधम्मो तरणतरंडोवमो पत्तो ॥ ९० ॥
 एयस्स पभावणं पालिजंतस्स सव्वकालं पि । जीवेहिं अणंतेहिं दुक्खाण जलंजली दिण्णो ॥ ९१ ॥
 पयइए खणविणस्स संसारुभवसुहस्स कज्जेणं । एयंमि मा पमायं काहिसि तं भइ ! कइयावि ॥ ९२ ॥
 अह सो नमिउं चरणे गुरुण भवभीयपाणिगणसरणे । हरिसभरवंधुरगिरं उदाहरित्था वयणमेयं ॥ ९३ ॥

धेवोवयारिणोऽविहु लोधा पूयं करीति सविसेसं । एवंविहोवयारीण तुम्ह किं संपयं करिमो ? ॥ ९४ ॥
तहवि नियत्तह भयवं ! गिण्हह धणरणभवणसंसारं । अहवा किमेत्तिण्णं ? जीयंप्पिहु तुम्ह आयत्तं ॥ ९५ ॥
गुरुणोववूहिओ सो ससरिरेऽवि हु ममत्तरहिण्ण । सम्मं कयं महायस ! तयत्ति एवं जओ भणियं ॥ ९६ ॥
सम्मत्तदायगाणं दुप्पडियारं भवेसु बहुएसुं । सब्वगुणमेलियाहिंवि उवयारसहस्सकोडीहिं ॥ ९७ ॥
परमत्थेण महायस ! दिण्णं तुमए समत्थमम्हाणं । एयंमि धम्मकम्ममि निच्चमब्भुज्जमत्तेण ॥ ९८ ॥
इय गुरुणा सिक्खविउं जिणिंदधम्मस्स सब्वपरमत्थं । भणिओ सो अणुजाणसु एत्तो अम्हे गमणकज्जे ॥ ९९ ॥
दूसहगुरुदंसणविरहवेयणावाउलीकयसरीरो । दूरपहं अणुगच्छिय दंसिय मगं नियत्तो सो ॥ १०० ॥
भावेत्तो गुरुवयणं चिंततो भवभयं महाघोरं । सम्मत्तभावियमई निययावासंमि संपत्तो ॥ १०१ ॥

तथो काऊणमणंतरकरणीयं भरिऊणं सगडाणि विसिट्टकट्टाणं नीसेसभिच्चजणसमेओ नियत्तो नियगामाभिमुहं,
पत्तो य कालक्कमेण, पेसियाणि दारूणि नारिंदस्स । तथो पइदिणं अब्भस्संतो जिणधम्मं पल्लुवासंतो मुणिजणं
परिचिंतितो जीवाजीवाइणो नव पयत्थे रक्खंतो पाणिणं बहु माणंतो साहम्मियजणं सद्वायेण पभावैत्तो जिण-
सासणं कालं गमेइ । अणण्या य मरणपज्जवसाणयाए जीवलोयस्स खणभंगुरत्तणओ सब्भवावाणं तहाविहुमुक्कम-
णकारणं पाविऊण सोसम्मं परिपालियाविरयस्समदंसणभावो कयपज्जंताराहणाविहाणो सुमरंतो पंचनमोक्कारं

पंचतत्त्वगुणोक्ति ।

उपवर्णो सोहम्मे पलियाउसुरो तओ सुदिट्ठीओ । अंतोसुहुत्तमेत्तेण पत्तपज्जत्तभावो य ॥ १०२ ॥
जय जय नंदा ! भदत्ति वाहरंतेण किंकरजणेणं । हरिसभरनिम्भरेणं कारियतक्कालकायवो ॥ १०३ ॥
उत्तुंगथोरथणवट्टलट्टरेहतमोत्तियसरीहिं । छणमयलंछणसच्छहवयणाहिं कुवल्यच्छीहिं ॥ १०४ ॥
निम्मलक्कवोलतललिहियचित्तविच्छित्तिपत्तवल्लीहिं । करकिसलयपरिघोलिरचामीयरचारुवलयार्हिं ॥ १०५ ॥
सुरसुंदरीहिं सद्धिं कीलंतो तेसु तेसु ठाणेषुं । रइसागरावगाढो कालं वोलेइ लीलाए ॥ १०६ ॥ तीहिंविसे
कळाणगेसु पंचसु चवणप्पमुहेसु जिणवरिंदाणं । नंदीसरदीवाइसु परिचत्तासेसवावारो ॥ १०७ ॥
भवजलहितरंडमिमं तिटुक्खतत्ताणममयेयंति । मणवंछियत्थपूरणांचिंतामणिपचलमिमंति ॥ १०८ ॥

अम्हारिसाणमविरइपराण इय विहियगाढबहुमाणो । हरिसभरनिम्भरंगो कुणइ य अट्ठाहियामहिमं ॥ १०९ ॥ तीहिंविसे
हिमवंतमहाहिमवंतपमुहुक्कुलपव्वएसु अणवरयं । दिव्वविमाणारूढो सिद्धाययाणि पेच्छइ य ॥ ११० ॥
सुणइ य पचक्खं चिय विहरंतऽरिहतं वयणकमलाओ । संसारुव्वेयकरं भत्तीए धम्मसव्वस्सं ॥ १११ ॥
दुक्करतवचरणकिसंग(सारए)संगवज्जिए मुणिणो । मणवयणकायगुत्ते भत्तीए पज्जुवासइ य ॥ ११२ ॥
इय पवरसिद्धिमंदिरसोआणपंपरासरिच्छंमि । सिरिवीरनाहजिणवरचरियंमि गुणोलिनिलयंमि ॥ ११३ ॥

अचंतुत्तमसम्मत्तलाभनामो समत्थिओ एसो । भव्वजणचित्तसंतोसकारओ पढमपत्थावो ।
सम्मत्तलाभनिरुवणो पढमो पत्थावो ।

अह बिइओ पत्थावो

एवं लाभो बोहीएँ परमसिवसाहिबीयभूयाए । भणिओ एत्तो सम्मं मिरीइवत्तव्वयं सुणह ॥ १ ॥

एत्थेव समत्थसमुद्ददीववलओवगूढपज्जते । मेरुविराइयमज्जे जंबूदीवंमि दीवम्मि ॥ २ ॥

आरोविघघणुगुणसञ्छहंमि तह दाहिणहुभरहंमि । गंगासिंधूण महानईण बहुमज्झयारंमि ॥ ३ ॥

अत्थि पसत्थविविहतरुसंडमंडियपरिसरा परंतपरुढपंडुच्छुताडनीवारविराइया नाणामणिरयणइयधर-
णिर्वीढा अमरावइव्व नासच्चाहिट्ठिया अहिणवपुरिव्व नवकुलालंक्रिया जणयतणयव्व कुसलवलालसा विलासिणिव्व
दीहरच्छोवसोहिया रामएवसेणव्व अदिट्ठिविहीसणदोसा पायालयुरिव्व अहीणजणाणुगया सुरिंदवयणोवरोहहरिसि-
यवेसमणजक्खविणिम्मिया बारसजोयणदीहा नवजोयणविच्छिण्णा समुत्तुंगकणयपायपरिकिसत्ता पवरभवणसा-
लासहस्साभिरामा धणकणयरयणपरिपूरिया विणीया नाम नयरी ॥

जत्थ वम्महो इव अखंडरूवलावणजोव्वणगुणविब्भमो रेहइ पउरजणो, अकित्तिमंडणाओ सुरसुंदरीओ-
वि परिहवन्ति नियरूवेण तरुणीओ, जहिं च स्रोसु चैव सुव्वइ मगणसद्दो दोसियाणं दोसाभिलासो तरुवराणं गया-

परावत्तो रयणेसु वहरसहो ॥ तं च रक्खेह खंचियचलियासणागयाखंडलकरकलियकणयकलसविहियरज्जाभिसेओ
तक्कालसंगहियउगगभोगरायन्नखत्तिथचउव्विहपहाणपरियरो सुरवइविइण्णकणयकड्यतुडियमणिमउडपमुहदिव्वालं-
कारालंकिक्सरीरो सिरिउसभनराहिवो ॥

कसिणासाढचउत्थीए चत्तसव्वत्थसिद्धिवासो जो । उत्तरसाढानक्खत्तजोगभिंदुमि संकंते ॥ ४ ॥

कुलगरनाभिस्स गिहे चोइसगयपमुहसुमिणकयसूओ । मरुदेवीए गब्भे पाउब्भूओ महाभूइ ॥ ५ ॥

पुव्वज्जियपुण्णसमूहचलियसिंहासणेण सक्केण । भत्तीए जस्स पणया जणणी गब्भावयारंमि ॥ ६ ॥

चेत्तवहुलुट्टमीए उत्तरसाढासु अद्धरत्तंमि । भुवणजणजणियतोसो जाओ जो पुण्णचंदोव्व ॥ ७ ॥

जस्स य जम्मणकम्मं तक्खणचलियासणा उ अकरिंसु । निययहिगारणुरूवं छप्पण्णदिसाकुमारीओ ॥ ८ ॥

वत्तीससुरिंदहिं नीसेसामरसमूहसहिएहिं । मेरुंमि जम्मज्जणमहूसवो निम्मिओ जस्स ॥ ९ ॥

जस्सोरुवसभल्लणदंसणसंजायहरिसपुलएण । सिरिनाभिगरिंदेणं उसभोत्ति पइट्ठियं नामं ॥ १० ॥

सुरायपाणितलसंठिओब्बुलट्ठिं करे धरंतेण । जेण जहत्थभिहाणं निम्मियमिक्खलगुंवसस्स ॥ ११ ॥

लेहप्पमुहा वावत्तरी कला जेण देसिया पढमं । बहुभेयं कासवलोहचित्तवडवत्थसिण्यं च ॥ १२ ॥

कम्मं च खेत्तवाणिज्जपमुहमाई निंदसियं जेण । अबिपक्ककणविभक्खणहुक्खियजणजलणपयणं च ॥ १३ ॥

दुन्नयपसत्यजणसिक्खणत्थमुवदासिया जए जेणं । सिट्ठजणक्खणद्धा सामाइ चउविहा नीई ॥ १४ ॥
 दारपरिग्गहसमए जस्स सुरिदेण परमरिद्धीए । पुंखणगविहिसणाहो विवाहमहूसवो विहिओ ॥ १५ ॥
 वागरणछंदकहक्कयमगजोइसपमोक्खवहुविज्जा । लद्धा जेणुवइद्धा पढमं चिय सुद्धबुद्धीए ॥ १६ ॥
 नियनियकम्मनिसेवण नियमेणं गुरुजणस्स नमणं च । जायकुलाण ववत्था जेण समत्था कया भुयणे ॥ १७ ॥
 किं बहुणा-जुत्ताजुत्तवत्थुविण्णणसुण्णहियएसु । नीई अज्जवि विफुरइ जस्स कित्तिव्व सव्वगया ॥ १८ ॥
 तस्स य गयतुरयपमुहरज्जंगपरिवुडस्स संसएसु य ववत्थासु य कुलायोरेसु य परोप्परविसंवाएसु य सयल-
 जणपुच्छणिज्जस्स नंदाए देवीए सुमंगलाए य समं विसयसुहमणुहवंतस्स वंचंति वासरा, अण्णया य सुमंगलाए
 देवीए भरहो वंभी य मिहुणगं जायं, तहा सुनंदाएऽवि देवीए बाहुवली सुंदरी य जुवल्यं जायं, एवं वंचंतंमि काले
 पुणोऽवि सुमंगला देवी अण्णणि एग्गणपन्नासं पुत्तजुयलगाणि पसूया, ते य भरहण्णमुहा कुमार वहुंति सरीरेण
 नीसेसकलाकलावकोसलेण य, एवं च निंदसिय सयलकला कुलव्वत्थाए सुहल्लेयवावारो उत्तमन्नरिसरो तेयासी-
 पुव्वलक्खाइं जाव परिपालिज्जण गिहत्थपज्जायं अवलोइऊण परल्लेयमगाणुरूवधम्मवावारविरिहियं भवपंकनिमज्जमाणं
 (जणं) मणे अच्चंत्तरुणारसालिद्धबुद्धी तक्कालचलियासणागयसारस्सयपमुहल्लेगंतियतियससमहियसुच्छाहियचित्तवित्ती
 विणिचित्तभोगपिचासो भरहपमुहपुत्तसयसंविभत्तपरिचित्तवसुंधाराभारो आसंवच्छरुणवारिधारविसाभिणिंदियदी-

णमगगजणो चेतस्स बहुलुट्ठीए उत्तरासाढनक्खत्ते पच्छिमपहरावसेसे दिवसे कच्छमहाकच्छपमुहाणं नियनियपुण-
 (च)निहित्तरज्जवावडाणं चउहिं सहस्सेहिं मंडलेसराणं परिउडो देवदाणबुक्खित्तविचित्तोवसोहियमुंदसणाभि-
 हाणसिबिकाधिरूढो परमविमूर्धए समगकाणणलच्छिलीलावणंमि उज्जाणे कयकट्टुक्किट्टवकम्भो परिचत्तसंघसं-
 गिरयणाभरणो सधमेव चाउमुट्ठियं लोयं काऊण कयसिद्धनमोक्कारो पडिवणणसव्वसावज्जजोगविरती बत्तीससुरेसरेहिं
 चउव्विहदेवनिकायसहिएहिं सन्भावसाराहिं महत्थाहिं पसत्थाहिं गिराहिं शुव्वमाणो पंचिंदियदित्तुरयदमणो
 समणो जाओत्ति ॥

सुरारयनिसिद्धिसिद्धसंसावलंवि वहमाणो । कच्छमहाकच्छपमोक्खभिव्खुलोएण परियरिओ ॥ १९ ॥
 परिचत्तसव्वसावज्जजोगसंगो तिगुत्तिगुत्तो य । अप्पडिवद्धो गामाणुगाममह विहरिओ भयवं ॥ २० ॥ जुम्मं ।
 धणकणयसमिद्धसमुद्धरा य मणुया मुणंति नो तइया । का भिक्खा के तग्गाहिणोत्ति भिक्खं भमंतंमि ॥ २१ ॥
 परमेसरंमि ताहे नियपहुपणएण कणगकरितुरए । इत्थी महत्थवत्थे पणया मणुया पणांमेति ॥ २२ ॥ जुम्मं ।
 भिक्खं अपावमाणा कच्छमहाकच्छपभिइणो सुणिणो । पइदियहमणसणेणं संजायसरीरसंतावा ॥ २३ ॥
 तेलोक्कनायगे मोणमस्सिए ते उवायमलभंता । परिसडियपंडुपत्ताइमोइणो काणणंमि ठिया ॥ २४ ॥ जुम्मं
 भयवंपि निप्पकंपो सुरसेलो इव विसिट्ठसंघयणो । पइदिणमदीणचित्तो एगागी विहरइ महंमि ॥ २५ ॥

कच्छमहाकच्छमुया नमिचिनी रायलच्छिमिच्छता । चिंतामणिव्व सव्वाथेण सेवति भयवंतं ॥ २६ ॥
तब्भत्तिरजियमणेण नागराण दिग्गवरविज्जा । विज्जाहरायत्तं पाविय विगया जहाभिमयं ॥ २७ ॥
भयवंपि गामनगरागरेसु भिक्खं अपावमाणोऽवि । विहरंतो किमियत्तणू कुरुदेसे गयपुरंसि गओ ॥ २८ ॥
जिणंदसणसुसरियपुव्वजम्मसंजायतिव्वसद्धेण । सेज्जंसकुमारणं सिरिबाहुवल्लिस्स पउत्तेणं ॥ २९ ॥
तक्कालागयपुरिसोवणीयपंडुच्छुगंडयरसेणं । संवच्छरपज्जेते भयवं पाराविओ तत्थ ॥ ३० ॥ जुम्मं ।
पडिया य कणयधारा तियसीहं समाहयाइं तूराइं । मिलिओ य पउरलोओ तेणवि कहिओ सवुत्तंतो ॥ ३१ ॥
भयवंपि पारणयं काऊण बहलीयडंबइल्लुसुवण्णभूमिपग्गेसु देसेसु विहरमाणो तव्वासिमणुयाणं भोणमल्लिणोऽवि
समाहप्पेण भद्गभावं जणंतो विविहतवचरणपरायणो असंक्किल्लियाए तक्कालियलोयस्स अतहाविवहेयणीयकम्मओ
य निरुवसगं संजमणुपालितो समइक्कते एंगमि वाससहस्से विणीयनयरीपचासण्णमि पुरिसत्तालंमि नयरंमि
संपत्तो, तस्स उत्तरपुरत्थिमे दिसीभाए सगडमुहं नाम उज्जाणं, तंमि नगोहपायवस्स हेद्दा संठियस्स अट्टमणं भत्तेणं
पुव्वणहदेसकाले फग्गुणवहुल्लेकारसीए उत्तरासाढानवखत्ते भगवओ तिहुयणेक्कवंधवस्स ज्ञाणंतरियाए बट्टमाणस्स
दिव्वं अणंतं लोयालोयगयभावाभाघसहावत्थुसत्थपरमत्थनिब्भासणसगतं केवलनाणं समुण्णणं ॥ अह जिणना-
हनाणुण्णायमाहप्पपरिकंपियसीहासणप्पलोयणपउत्तावहिमुणिप्रनाणवइयरा पहयपडहप्पमुहंगंभीरतूरत्ता संखोभि-

यसुरलोया सरभसपणचिरसुरसुंदरीमुयलयालोलंतरयणवलयरणज्झणारवनिब्भरभरियभुवणंतरा आंगंतूणं वत्तीसं
ससुरा सुरिंदा समवसरणं विरइंति । केरिसं चिय ?—

अइसुरभिसिसिरमारुयपडिहयत्तणुरेणुत्तकणुकेरं । द्युसिणघणसारंगंधाभिरामसलिलोवसंतरयं ॥ ३२ ॥

आजाणुमेत्तविक्खत्तकुसुमेरंहंतरयणमहिवीढं । डज्झंतधूवधूमंधयारघणसंकियसिंहिं ॥ ३३ ॥

मणिचामीयरनिद्धत्तरुण्णपायारवलयतियकलियं । सब्वत्तोमुहमणिरयणरइयसिंहासणसणाहं ॥ ३४ ॥

डिंडीरपिंडपंडुरछत्तत्तयरुद्धरविकराभोयं । पवणुवेल्लियकंकल्लिपल्लुल्लिहियनहविवरं ॥ ३५ ॥

गयणट्टियसुरकरपहयगहिरवज्जंतंदुडुहिसमूहं । दिसिसुहपसरियनिम्भलभामंडलखंडियतमोहं ॥ ३६ ॥

सरयनिसायरकरनियरागारधुव्वंतचामरुणीलं । इय एवंविहमुद्दामदोसहरणं समोसरणं ॥ ३७ ॥ छहिं कुलयं ।

तंमि य भुवणेक्कपहू पवरे सीहासणे तियसपणओ । पुव्वासुहो निसीयइ तित्थस्स नमोत्ति भणिऊणं ॥ ३८ ॥

हरिसभरनिब्भरुब्भणपुलयपडलोवसोहियसरीरा । सट्ठाणेषु निलीयंति तक्खणं चउविहा देवा ॥ ३९ ॥

पूरिज्जइ अंवरमित्तंततियसाण पंचवणेहिं । उड्डूयचिंधेहिं विमाणलक्खमालासहस्सेहिं ॥ ४० ॥

एत्थंतरे जिणपउत्तिपरिन्नाणनिमित्तं पुव्वनिउत्ता केवलनाणुपत्तिनिवेयणत्थं तहा पहरणसालापउभूयप-

भूयजक्खसमहिट्ठियनिस्सामन्नफुरंतफारपहाभरनिकत्तियपंधतमंकंडुहुगमरचक्करयणवइयरसंसणत्थं च भरहजरिंदस्स

पुरञो जुगवं चिय समागया बद्धवेगा पुरिसा । तञो भरहो इहलोयतुच्छमुहमेत्तसंपायणपचलत्तं निच्छिऊण चक्ररय-
णस्स उभयलोगमुहजणगत्तं पुण परमेसरस्स पवरकरेणुगाखंधाधिरोहियसुयविरहविहुरमरुदेवासमेओ नीसेसकुमारानि-
यरपरियरिओ समग्गवलवाहणो हरिसभरनिब्भङ्गो भग्गवओ केवलमहिंमं काळं संपत्थिओ । अंतरेण मरुदेवीए
भग्गवओ छत्ताइछत्तपमुहं विभूइसमुदयं पेच्छंतीए तहाविहभवियव्यवसेण सुहज्झाणपरायणाए अंतगडकेवलत्तं
जायं । भरहखेत्ते पढमसिद्धोत्ति परिचित्तिऊण देवदाणवेहिं कया तीसे महिमा, खित्तं खीरोयसायरे से सरिं, भरहो
य परमपमोयमुव्वहतो तित्थयरं तिपयाहिणीकाऊण बहुप्पयारं थोऊण सदेवमणुयासुराए सभाए आसीणो । सामि-
णावि सजलजलहरारावंगंभीराए आजोयणप्पमाणखेत्तपडिण्णफलणपचलाए पइजणमेक्ककालं संसयसयवुच्छेयजण-
णीए वाणीए पारद्धा धम्मदेसणा ॥ कहं ?

भो भो महाणुभावा ! दुलहं लहिऊण माणुसं जम्मं । उप्पत्तिपलयकलियं वियाणिळं भवसरूखं च ॥ ४१ ॥
कीसायासनिवंधणसयणसरीरेसु मोहवामूढा । धम्मोवज्जणरहिया निरत्थयं गमह नियजीयं ? ॥ ४२ ॥
सुमरह किं न निरंतरमणंतसो तिव्खदुक्खसंतत्ता । विवसाएसु ववसिया जं भे चउसुंपि विगइसुं ॥ ४३ ॥
तथाहि-नरए परमाहम्मियपहरणच्छिज्जंतअंगपचंगा । तिरियत्ते वहवंधणदहणंकणवाहणाभिहया ॥ ४४ ॥
देवत्तेऽवि य ईसाविसायपेसत्तावसंतत्ता । मणुयत्ते पुण दोगच्चवाहिविहुरा चिरं दुत्था ॥ ४५ ॥

इय चउगइदुहनिवहं अणुसुमरिय मोक्खसोक्खकंखिछा । निरवज्जं पव्वज्जं पव्वज्जिउं उज्जमह धम्मो ॥ ४६ ॥
 एवमाइ भगवओ धम्मदेसणं का(सो)ऊण भरहो सावगो जाओ, बंभी य पव्वइया, भरहपुत्तो पुव्वभववद्ध-
 गणहरनामगोत्तो उसभसेणो नास, सो य जायसंवेगो पव्वइओ, सुंदरी पुण साविगा जाया, एस चउव्विहो समण-
 संघो पढमसमोसरणे भगवओ पाउब्भूओत्ति । ते य कच्छमहाकच्छव्वा तावसा सुणिऊण जिणनाहेकवलनाणमहिमं
 भवणवइवाणमंतरवेमाणियजोइसियदेवगणपरिवुडं भगवंतं दट्ठुण पव्वइया । एत्थंतरे जायभववेरग्गा पडलगतणं
 व रायसुहं उज्झिऊण भरहस्स पंच पुत्ताणं सत्त नत्तुयाणं सयाइं समकालमेव तंमि चेव समोसरणे पव्वज्जं पव्वणाइं ।

अह गामचिंतगजिओ सोहम्मो पालिऊण देवत्तं । पलिओवमपज्जते भरहनरिंदस्स भज्जाए ॥ ४७ ॥

वम्माए गब्भंमि पाउब्भूओ सुसुमिणकयसूओ । पुव्वभवसाहुंदसणपावियधम्ममाणुभावेण ॥ ४८ ॥

अद्धट्ठमदियसाहिय नव मासे वसिय गब्भवासंमि । उववन्नो कयपुन्नो पवित्तनक्खत्तसुमुत्ते ॥ ४९ ॥

दसदिसिमुहेसु पसरंतसुत्तमं निहयतिमिरसंभारं । जाओ सूरौव्व तओ मिरियजालं विमुवंतो? ॥ ५० ॥

परमब्भयभूयं जम्मवइयरं चक्किणा निसुणिऊण । तस्स जहत्थं ताहे मिरिइत्ति पइट्ठियं नामं ॥ ५१ ॥

करकिसलयसोहिछो कंकिछितरुव्व जणमणाणंदो । देहोवचएण तओ कुमारभावं समणुपत्तो ॥ ५२ ॥

अन्नया य सो मिरिई कुमारो भगवओ आइतित्थगरस्स असोगणुण्णुट्ठिपमुहं च पाडिहरविभूइं चउव्विहदेवनि-

काएण कीरमाणिं दद्वण तीयाणागयपडुपणवत्थुसत्थवित्थरगयसदहसदोहदहणपसमणेक्कीजसधाराजुगारणिं
धम्मदेसणं निसामिऊण य करिकलहकन्नतालतरलमवल्लोइऊण जीविथं उव्वेल्लिमहल्लविसवेल्लरीसरित्थं निच्छि-
ऊण कुवल्लयच्छिसंजोगसमुब्भमुहं अयंउतडिंदंभंगुरं जाणिऊण पणइज्जणेपेम्मणवंधं परुडगादसद्धमपरिणामो
महाविमूर्हए पियामहस्स पासे पव्वइओत्ति ।

तओ सम्ममहिगयसमणधम्मो पंचण्यारायासमायरणपरायणो पंचसमिइसमिओ तिगुत्तिगुत्तो पंचमहव्वयर-
वखणवद्धलक्खो ससरीरेऽवि निरवेक्खो रयणवणिओ इव परिचत्तलोहायरो सायरो इव मयरहिओ दिगयरो इव दो-
सुम्मूलणकरो नागराओव्व दूरुद्धूसमावल्लो मंदरो इव निम्माहियणल्लही सुहलो इव निहयविसमकरणो गामा-
गरनगरेसु अप्पडिवद्धो थेराण पासे सामाइयाइं एक्कारसंगाइं समुत्ताइं सअत्थाइं थिरपरिच्चियाइं करेमाणो सायिणा
सद्धिं विहरइत्ति ।

इओ य-भरहराया समुणन्नचकरणो चाउरंगवल्लिओ पुव्वदिसाए गागहतित्थं दाहिणेण वरदामं पच्छि-
मेण पहासं उत्तरेण य चुल्लहिमवंतपरिसरं जाव साहिऊण लक्खंडंभरहं सट्टीए वारासहस्सोहिं वत्तीसन्नरइसहस्सपरि-
यरिओ अइगओ विणीयरायहाणिं, कओ से वारस वासाइं महारायाहिसेओ, विसज्जिया अ रणा नियनियट्टणेसु
दूरदेसागथा नरवइणो ।

अन्नया य भरहो अट्टाणउइए चुलभाउयाणं दूयं पेसेइ, भणावेइ य जहा-मम सेवं पडियज्जह अहवा रज्जाइं परिहरह जुञ्जसज्जा वा हवह उवायंतरं वा परिकप्पहत्ति, एवं च राइवयणं सम्ममवधारिऊण गओ दूओ, निवे-इओ तेसिं भरहनरिंदाएसो, तं च समायन्निऊण कोवावरत्तनेत्तेहिं लीलाजट्टिताडियधरणिवट्टेहिं भणियं तेहिं-रे दूया-हम ! को भरहो ? को वा एसिसवत्तव्वे तस्साहिगारो ? जेण तस्स अम्हाणं च ताएणं दिण्णं रजं तग्हा ताओ चव जं आणवेही तं करिस्सामोत्ति, रोसेण कंठे घेत्तुण निद्धाडिओ दूओ अवद्दारेणं । एत्थंतरे गामाणुपायेण विहरमाणो भयवं आईतित्थयरो अट्टावयंमि नगवरे समोसरिओ, आगओ चउव्विहदेवनिकाओ, तेऽवि अट्टाणउइपि लुभारा तुरियं समोसरणमागया, सहसिं च सामी वंदिऊण निसन्ना सदुणो, पत्थावे य भरहाएसं कहिऊण पुहुं तेहिं-ताय ! कहेसु किं जुञ्जामो उयाहु रज्जाइं चयामोत्ति, ताहे सामी तेसिं जोगयसुन्नलब्भ भोगनिवित्तिनिगित्तं असम्भावपट्टावणाए इंगालदाहगदिट्ठं कहिउमाढत्तो-

जह एगो किर पुरिसो भायणमेगं तु भरिउ सलिलस्स । इंगालाण निमित्तं काले गिरहे वणंगि गओ ॥ ५३ ॥
तत्थेगत्य बहूइं खायरपमुहाइं सारकट्टाइं । सो भेलिऊण जलणं पज्जलइ तस्समीवगओ ॥ ५४ ॥
इच्चंतकडसिहिताविउत्ति संछिन्नदारुसमिओत्ति । गज्जंदिणदिणयरपीडिओत्ति तण्हाउरो सुत्तो ॥ ५५ ॥
तं पुव्वानीयं जलमसेसमापियइ तत्थ सुगिणंमि । गिंसुम्भवदिणयरकिरणनिहुरमरुथरसहोव्व ॥ ५६ ॥

तद्विदुः असमिधतणहो गेहे गंतूण सयलकलसजलं । निद्विज्जण निलीयइ पोक्खरिणीवाविकूवेसु ॥ ५७ ॥
 धीए तस्सलिलंमिवि गंगाइमहानईसु ओगाढो । ताओऽविहु सोसई पलएव्व पयंडमत्तंडो ॥ ५८ ॥
 तत्तो जलहजलं पिय अंजलिसलिलं व पियइ नो तहवि । तस्स उवसमइ तण्हा अवि अहिययरं पवइहे ॥ ५९ ॥
 ताहे अपावमाणो कहिं पि सलिलं समत्थमुयणेऽवि । अवलोइउं पवत्तो सो संतत्तो पयत्तेण ॥ ६० ॥
 अह एगत्य पएसे अइउंडो पूइयव्वो य (पूइथोव)सलिलोव्व(य) । तेणं दिट्ठो कूवो चिरेण परितुट्ठचित्तेण ॥ ६१ ॥
 पविसिउमसमत्थो दीहरज्जुणा वंधिज्जण तणपूलं । सो खिवइ तत्थ तण्हासमत्थदुक्खस्स पसमट्ठा ॥ ६२ ॥
 तो तक्कहिइयपूलयपरंतगलंतविदुसंदोहं । उट्ठं विथारियसुहो आसायंतो गमइ कालं ॥ ६३ ॥
 जह तस्स वाविदीहियसायरसलिलोहिं अहयतणहस्स । नो किं पि होज्ज तेसिं तणगल्लगेहिं बिदुहिं ॥ ६४ ॥
 एवं देवाणुपिया ! तुम्हाणं पुव्वकालियभवेसु । उवमुत्तपवरंपंचप्पयारसहाइविसयाणं ॥ ६५ ॥
 पुणरवि सन्वाणुत्तरसत्थविमाणपत्तसोक्खाण । तेत्तीसं अयराइ निव्विग्घमणंतरभवमि ॥ ६६ ॥
 जइ भो महाणुभावा ! तित्ती भोगे पडुच नो जाया । ता किं इमिणा होही भुत्तेणं तुच्छरज्जेण ? ॥ ६७ ॥
 तो असुइसंभवेसुं तुच्छेसुं माणुसेसु भोएसु । अइथोव्वकालिएसुं पज्जते दुहविवागेसुं ॥ ६८ ॥
 सुहमदुरेसुं आवइसहस्सहेज्जसु निंदणिज्जेसु । साहुजणवज्जिएसुं सुहुत्तमवि मा कुणह संगं ॥ ६९ ॥

तत्स्वणकयवेयालियपवरज्झयेण बोहिज्जेवं । ते जिणवरेण सम्मं मुणिदिकखं गाहिया सब्बे ॥ ७० ॥
तो सुचरियसामन्ना विणिहयनीसेसघाइकम्मसा । भुवणजणपणयचरणा जाया सब्बेडवि केवल्लो ॥ ७१ ॥
विहरंति जिणेण समं गामाणनगरमंडियं वसुहं । अह दूयं भरहवई पुण पेसइ बाहुबल्लोडवि ॥ ७२ ॥
तेणवि दूयं निब्भच्छिऊण भरहेण सह समारद्धो । दिट्ठीवायाइओ संगामो जाव पव्वइओ ॥ ७३ ॥
तत्थेवुस्सग्गठिओ कह लहुभाईण वंदणं काहं ? । बंभीमुंदरिपेसण ओयरणं कुणसु हत्थीओ ॥ ७४ ॥
वुत्ते चिंतानाणं जिणस्स पासंमि गमणमह तस्स । भरहोडवि हयविपक्खं भुंजइ रज्जं सनगरीए ॥ ७५ ॥

इओ य-तस्स मिरियस्स दसविहचक्खवालसामायारीनिरयस्स सिद्धन्तपसिद्धसंजमकरणपरायणस्स संसारा-
सारयं परिभावितस्स अट्ठारसविहं बंभचेरमणुपालेतस्स बोलीणाइं बहूइं वरिसाइं, एगया य गिम्हमासे विष्णुं-
तेसु जलणजालकरालेसु रविकरेसु धम्ममाणलोहागरनिज्जा(ज्झा)भयसरिसेसु वायंतेसु खरसमीरणेसु विरहिणीजणहिय-
यव्व तत्तंमि महियलंमि अण्हाणवसविसग्गपमाणबहलमलाविलसरीरत्तणेण पव्वहंतसेयसल्लुधिपलाउलत्तणेण य
बाढं किलंतस्स दढचारित्तावणीयकम्मदोसेण महलहिययस्स परिचत्तकुमित्तस्सवि गुल्लुलवासे ठियस्सावि लट्ठमा-
इनिट्ठुरतवकिसियसरीरगस्सवि सयावि सुत्तत्थे विपरिभाविरस्स एक्कारसंगाइं तण्हाभिहयस्स पयंडगिंसत्तत्त-
सव्वगत्तस्स पल्लहत्थं संजमओ झडत्ति चित्तं मिरियस्स ।

अइगाढो मोहभडो जमेरिसाणवि मणो विकपेइ । अघडंतघडणपडुयाण किं व सज्झं न कम्ममाणं ? ॥ ७६ ॥
अन्नं च-तावच्चिय धम्ममई तावच्चिय निंदियत्थपरिहारो । जावज्जवि मोहमहापिसायपासमि नो पडइ ॥ ७७ ॥
एत्तो चिय मोक्खमहानिहाणमुक्खणिथमुज्झं समणं । धाडिति विसहरा इव बावीस परिसहा सहसा ॥ ७८ ॥

अह मिरिइणा चित्तियं-न सब्बहा समत्थोऽम्हि सम्मभियाणिं समणत्तणमणुट्ठं, ता किं करेमि ? कमुवाय-
मणुसरामि ? किं देसंतरं वच्चामि ? कस्स वा साहेमि ? होउ वा विकप्पिएणं, पव्वजापरिच्चाएणं नियभवणगमणं
संपयं मे पत्तकालंति, अहवा-चउजलहेमहलामंडलाए महिमहिलाए अहिवइस्स पयंडमुयदंडदलियदुइंतवइरिव
गस्स सयलपणमंतमहिवालमउलिकिरणावलिकब्बुरियवलथ(चलण)स्स छन्नवइगामकोडिनाहस्स अप्पडिहयसा-
सणस्स भरहचक्कवइणो पुत्तो होऊण सयमेव परिच्चंतं मंदिरमणुसरंतो कहं न लज्जामि ?, कहं वा तत्थगयं निह-
यपइणं मं जाणिऊण न लज्जाए हेट्टमुहा ठाइस्संति जणणिजणया ? कहं वा तुसारहारगोखीरकुंदेदुधवलस्स
इक्खागुक्कुलस्स पढमकलंको न भविस्सामि ? के वा परिच्चत्तुत्तमंगीकयधम्मस्स न करिस्संति हीलं सहसंवड्डियावि
बंधुणो ? कस्स कस्स वा महापावकारिणो निंदंसणं न भविस्सामि ?, ता सब्बहा न जुत्तं गिहगमणं, किं तु सब्ब-
प्पयारेहिवि परिसुद्धं नियमणस्सेव नियमणं मे काउं जुज्जइ, तं पुण सेलसिरयलोदुट्ठोलंगंडसेलंपिव जुगंतसमय-
समीरणुद्धयसिंधुसमुच्छलियमहल्लकल्लोलपडलं पिव पयंडमंतंडमंडलपगलंतपहाजालं पिव दढमुक्ककाणगयमहाडुया-

सणं पिव न मणांगपि सकेमि संठविउं, अयं च जइधम्मो अचंतमप्पमत्तचित्तमहासत्तनिव्वहणिज्जो, अहं पुण दुइतग-
दमो इव ससुद्धुरखंधसिंधुरमहल्लयणोवसरणं कायरो इव दुग्गसंगासभीमसवडं मुहुब्भडभिडंतसुहडभिउडिफडाडोवं
दुस्सहपरीसहचमूपराजियमाणसो न सकेमि अट्टारससीलंगसहस्साभिरामं सव्वहा जहुत्तं समणधम्ममणुचरिउं ।

अविय—

सुरसेल्लुल्लभारो एसो अहि(अहयं तु)भग्गपरिणामो । आजम्मं वोढव्वो कह तं एवंविहेण मए ? ॥ ७९ ॥
एसोऽवि भवविरक्ख(क्ख)णपडयपभावो पियामहो जइवि । करकलियामलयं पिव जाणइ मम विहडियं चित्तं ८०
तहविहु संसारुव्वेयविरत्तओ कहमहं महाघोरं । काउं सुणीण धम्मं तरामि एयाणुवित्तीए ? ॥ ८१ ॥
कीरइ अणुवित्तीविहु सद्धम्मगुरूण थोवदिणसज्जे । कज्जे आजम्मं पुण कायव्वो संजमो कह णु ? ॥ ८२ ॥
इओ य-(असुह)गिहत्यभावं संजममकलंकमवि न सकेमि । काउं किलिद्धचित्तो कमुवायं संपवज्जामि ? ॥ ८३ ॥
एवं च तस्स किंकायव्वयाअ मूढस्स अचित्तीयमहिमयाए कम्मयाणं अपारसंसारसागरपरिब्भमाणुकूलसी-
लयाए जीवस्स अवस्सं भवियव्वयाए तहाविहभावस्स इओ तओ उभयमग्गाणुसारिणमुवायं मग्गमाणस्स सह-
सच्चिय सयमेव एयारिसी बुद्धी पाउब्भूया, जहा—किर भागवंतो मुणिणो मणवयणकायदंडत्तरहिआ असुभवाचारप-
रिच्चाएणं सया संलीणसरीरा अहं पुण न एवंविहगुणजुत्तो, जओ पराजिओ इंदिएहिं अहिभूओ य उस्सिखलेहिं

मणवयणकायदेहिं, तम्हा एरिसस्स मम हवउ सच्चरियपयडणपरंतिदंडं चिंधं, जइ पुण एयं अणवरयं पेच्छमाणस्स सटुच्चरियपच्छायावेण विसिट्ठपरिवालणुज्जमो होज्जा १, तथा मुणिणो सिरकेसावणयेण सव्विदियनिगहेण य मुंडिया भवंति, मम पुण इंदियनिगहरहियस्स किं निरत्थयं मत्थयलुंचणेण ? अओ खुरमुंडणं मुणिवेसविसरिसत्त-
परूवणपरं सिहाधरणं च संपज्जउत्ति २, तथा समणा भयवंतो तिविहं तिविहेण पच्चक्खायसुहुमवायरपमुहमे-
यपाणाइवाया संजममणुणालेंति, मज्झं पुण अतहाविहजोगयाजुत्तस्स थूलपाणाइवायवेरमणं जुत्तंति ३, परिचत्तस-
मरगकिंचणा मुणिणो, अहं पुण न एयंविहो ता नियमग्गाविसरणनिमित्तं सुवण्णपवित्तगाइमेत्तं मम किंचणमवि-
हवउ ४, तथा जिणवरुदिट्ठसमग्गसीलजलपक्खालियकम्ममलसेयत्तणेण निचं सुंदरगन्धाभिरामा (मुणिवरा) अहं
पुण निम्मलत्तणेण दुगुल्लियगंधो ता बाहिं पि तस्सावणयणनिमित्तं गंधचंदणाइपरिग्गहो मम समुचिओत्ति ५,
तथा ववगयमोहा निक्कारणविमुक्कोवाहणपरिभोगा य तवस्सिणो, अहं पुण महामोहाभिभूतो सरीरक्खापरो अओ
छत्तयधरणं उवाहणापरिभोगो य मम संपज्जउत्ति ६, तथा परिजुवमुदुक्कुत्थियथेवसुक्खिवत्थपरिग्गहा महणुभावा
मुणिणो, अहं पुण गाढकसायकलुसियबुद्धिपसरो तम्हा धाउरसरत्ताणि वत्थाणि मए परिहियव्वाणि ७, तथा
सावज्जजोगभीरुणो जइणो मणसावि न पत्थंति बहुजीवाउलं जलारंभं, अहं तु संसाराणुसारिबुद्धो तम्हा
परिमिएणं सलिलेण पाणण्हाणाइं वावारमणुचरिस्सामिच्चि ८ ॥

एवं सबुद्धिपरिकल्पिण जहविसरिसेण वेसेणं । मुणिधम्ममग्गचत्तो पारिव्वज्जं पयत्तेइ ॥ ८४ ॥
 गामागरनगराइसु सिरिरिसहजिणेण सह परिब्भमइ । सुस्सवणपक्खवायं निचं हियएण वहमाणो ॥ ८५ ॥
 अह तं करयलगहियच्छत्तयं दीहलंबिरिसिहंडं । पासविमुक्कतिदंडं पवित्तमाईहिं परियरियं ॥ ८६ ॥
 गेरुयरसरत्तसुयविराइयं संझसूरविंव व । चंदणचच्चियेदहं उवाहणारोवियकमं च ॥ ८७ ॥
 असरिसरूवं नीसेससमणसंधस्स मज्झयारंमि । दहुं कोऊहलिओ बहुजणो पुच्छए धम्मं ॥ ८८ ॥
 मिरिईवि सम्ममहिगयसुत्तथो तत्तदेसणसमत्थो । साहेइ वित्थरेणं मुणिधम्मविहिं जणस्स पुणो ॥ ८९ ॥
 जह एत्थं आजम्मं बायरसुहुमेसु सब्बजीवेसु । संघट्टणविद्ववणाइ वज्जणिज्जं पयत्तेणं ॥ ९० ॥
 कोहेण व लोभेण व हासेण भएण वावि माऽ(ना)सचं । जीवोवघायजणगं भासेयध्वं विणासेऽवि ॥ ९१ ॥
 गामे वा नयरे वा थोवं वा भूरि वा न घेत्तध्वं । सच्चित्तमचित्तं वा सब्बमदत्तंपि तिविहेण ॥ ९२ ॥
 देवनरतिरियरमणीसु पवरलायणसुंदरंगीसु । पच्चक्खमुयंगीसु व खणंपि नो अभिरमेयध्वं ॥ ९३ ॥
 धम्मोवयारि मोत्तुं वत्थपडिग्गहपमोक्खसुवगरणं । सेसमहिगरणरूवं परिहरियध्वं पयत्तेण ॥ ९४ ॥
 संथारगमेक्कं वज्जिऊग नेवोवहाणतूलीओ । फासस्साणुगुणाओ कइयावि य पत्थणिज्जाओ ॥ ९५ ॥
 असरविरसन्नपाणेहिं पीडिएणावि महुरदित्तरसे । नो भोयणंमि चित्तं निवेसियध्वं मणांगंपि ॥ ९६ ॥

रम्मसु बडलमालइकुवलयगंधेसु तदियरेसुपि । घाणिंदियगोयमइगएसु तुलेण होयवं ॥ ९७ ॥
 रूवेसु सुंदरेसुं नयणमणांदणेसु दिट्ठेसु । तच्चइरित्तेसुं वा तोसपओसा न कायवा ॥ ९८ ॥
 सदेसु वेणुवीणाकिन्नरकंदुभवेसु विविहेसु । खरमज्जारभवेसुपि सुणिएसु समेण होयवं ॥ ९९ ॥
 तज्जणतालणहीलणकरणपसत्तेऽवि बालिसज्जांसि । चिररूढगाढपणएव रूसियवं न थेवंपि ॥ १०० ॥
 जयपयडेहिवि नीसेसलोयविम्हयकरेहिवि गुणेहिं । जुत्तेण मणांगपिवि माणो न मणंसि ठवियवो ॥ १०१ ॥
 विस्सासविणासणकारिणित्ति सुहगइदुवारपरिहोत्ति । दुहनंदियत्ति माया परिहरियवा कुभज्जव ॥ १०२ ॥
 थेवंपि कज्जछिइं पाविय पावस्स छलणसीलस्स । लोहस्स पिसायस्स व अवगासो नेव दायवो ॥ १०३ ॥
 सच्छायं तिव्वफलं मइसउणं पवरसीलतरुसंडं । भंजंतो दुट्ठमणो बंधेयवो वणकरिव ॥ १०४ ॥
 निस्संबंधं सावज्जजोगये जंतुदुक्खजणगे तु । सच्चेऽवि भासियवे जीहावि पडिक्खलेयवा ॥ १०५ ॥
 तत्तायगोलओ इव पमत्तचित्तंगविविहवावारो । किं नेव विह्वेज्जा ? ता देहो संठेयवो ॥ १०६ ॥
 सत्तरसभेयभिन्नो जइधम्मो नूणमप्यमत्तेणं । जं कायव्वो निचं तेणेसो दुक्करो होइ ॥ १०७ ॥
 गिम्हुणहपीडिएणवि न छत्तयं न उवाहणाओऽवि । परिमुत्तन्वा हेओ सव्वोऽवि सरिस्सक्कारो ॥ १०८ ॥
 नो सिरलोयप्पमुहं कट्ठाणुट्ठाणमवि विमोत्तवं । रत्ताइवणवत्थपि पत्थणिज्जं कयाइ नवि ॥ १०९ ॥

इय जइधम्मो सधो कायव्वविही निवेइओ तुम्ह । अक्खंडं सिवसोक्खं जइ वंछह ता तयं कुणह ॥ ११० ॥
 एवमायन्निज्जण जणो पहिट्ठमाणो भणिउमाढत्तो—भयवं ! जइ एवंविहो चरणधम्मो ता कीस तुम्हे छत्तप्प-
 सुहसुवगरणं गिण्हह ? सिरलोयाइयं च न सम्ममायरहत्ति, मिरिइणा भणियं—भो भो महाणुभावा ! मा एवमासं-
 क्ह, जहा एसो अण्णहा भासइ अण्णहा करेइत्ति, अहं हि संसाराणुसारिबुद्धी पराजिओ मोहमहामल्लेणं पडिक्ख-
 लिओ उस्सिखलकसायखलेहिं सुसियपसमघणो दुद्धंतिदियचोरोहिं सायरमवल्लोइओ दुग्गइदुक्खरक्खसीए, ता मम
 दोसगुणविभावणं उज्झिऊणं नीओवणीयं पिव महामणिं खचरसमणियं पिव परमविज्जं मायंगदेसियं पिव समी-
 हियपुरपथाणं रोगविहुरवेज्जोवइट्ठं व परमोसहं अंगीकरेह सब्बहा तुम्हे सुणिधम्मंति ।

एवमाइन्निज्जण संजायभववेरगा निउणबुद्धिपरिभावियपरमथा तणं व परिचत्तपुत्तकलत्तमित्तवित्ता जिण-
 धम्मनिवेसियथिरचित्ता समणदिक्खागहणत्थं पाउब्भवन्ति अणेगउगभोगराइण्णपमुहा जणा, मिरिइइवि ते
 सिस्सभावेणोवट्ठिए णाऊण भगवओ भुवणपईवस्स संसारतरुहणदहणदावानलस्स अट्ठप्पयारपवरपाडिहेरपयडप्प-
 भावस्स उसभसामिणो समण्णेइ । एवं च पइदिणं सद्धम्मदेसणाए पडिबोहेमाणो नियदुचरिअं निरंतरं निंदमाणो
 सुस्समणपक्खवायं वहमाणो सुत्तत्थाइं मणे परिभावेमाणो सुहसीलयाए सबुद्धिपरिक्खियपरिच्चायगवेसं धरेमाणो
 गामागराईसु सामिणा सद्धिं विहरमाणो कालं गमेइत्ति ।

अह अन्नया कयाई भयवं गामागरेसु विहरिऊण अट्ठावयंमि समोसरिओ, भरहचक्कवट्ठीवि भाउणो पव्वइए निसामिऊण संजायतिव्वसोगो जइ पुण भोगे दिज्जमाणे अज्जवि गेण्हंतित्ति संचित्तिऊण भगवंतं उसमसामिं सवि-
णयं वंदिऊण भाउगे भोगेहिं निमंतेइ, इहलोइयसुहनिरवेक्खाहिं भणिओ तोहिं—

भो महायस !—सयमेव परिचत्ते दुहनिवहुप्पत्तिकारुण्भूए । उरनिहयसल्लुछे कहमिय भोगे अणुसराभो ? १११
अच्छंतु पेम्मनिब्भरतरुणीसंबंधंधुरा भोगा । तेसिं न संकहंषिचि सोउं संपइ समीहामो ॥ ११२ ॥

एवं भोगेसु पडिसिद्धेसु भरहो परिचत्तसंगाण एएसिं आहारदाणेणावि ताव धम्ममायराभित्ति विकप्पिऊण पवरलक्खणभोगणभरिएहिं पंचहिं सगडसएहिं असणदाणत्थमुवट्ठिओ, पुणरवि निवारिओ तेहिं—अहो महायस !
न कप्पइ आहाकम्मं आहडं च असणपाणं परिभोचुं सुणीणं, तओ गिहनिमित्तसंसिद्धभोगेण निमंतेइ, सोऽवि रायपिंडो न कप्पइत्तिकऊण निसिद्धो साहहिं, हा सव्वपगारेहिं परिचत्तो अहमियाणिं एण्हिति दढं चित्तसंताव-
मुवगओ भरहचक्कवट्ठी, तं च सोगविहुरं नाऊण वियाणमाणेणावि सक्केण तस्स परितोसनिमित्तं पुच्छओ भयवं सप्पभेयभोगहं, पुट्ठेण य भगवया भणियं—मुरिंद ! पंचविहो उगगहो, तंजहा—देविंदोगगहो रायावगगहो गिहियइअ-
वगगहो सागारियावगगहो साहम्मियावगगहो, तत्थ देविंदावगगहो जहा किर जंबुदीवदाहिणखेत्ताहिवई तुमं, अहो सक्क !
तुहाणुजाणवणेण कप्पइ समणाण तहिं विहरित्तेए, राया पुण छस्खंडभरहाहिवई जहा संपयं भरहो, तस्साणुणाए

मुणीहिं तद्देसे वसियच्चं, गिहवईय मंडलेसरो, सोऽवि समंडलनायगत्तणेण अणुणवणजोगो, तदणुमए चेव टाइयच्चं, सागारिओ पुण सेज्जायरो, सेज्जा य सनिमित्तकयतहाविहगेहसालापमुहो भवणविसेसो, तद्दणेण तरइ संसारसायरंति सेज्जातरो गुणनिष्फन्नमो । कंहं पुण सेज्जाए तरइत्ति ? , भन्नइ—

तत्थ ठिया मुणिवसहा सज्जायज्झाणझोसियसरीरा । जं धम्मदेसणाईहिं भवलोयं उवयरंति ॥ ११३ ॥

जं वा अपुव्वसत्थं पढंति तह संजमे पयदंति । छट्ठमाइयतवो दुक्करमवि जं पवज्जंति ॥ ११४ ॥

अन्नत्तोऽविहु जं वत्थपत्तभत्ताइणा न सीयंति । परमत्थेणं सबत्थ तत्थ सेज्जा भवे हेऊ ॥ ११५ ॥

इय-सेज्जादाणेण महल्लुक्खकल्लोलसंकुलमगाहं । संसारसायरं गोपयं व दाया लहुं तरइ ॥ ११६ ॥

इहरा सेज्जाऽभावे न जीवरक्खावि निव्वहइ सम्मं । किं पुण समग्गसद्धम्मपालणं होज्ज निव्विग्घं ? ॥ ११७ ॥

साहम्मियावग्गहो पुण सिद्धंतपसिद्धनाएण परोप्परं समणाण एग्खेत्ते निवसिउकामाणमवंगंतवो । एवं च पंचविहावग्गहपरूवणमायन्निऊण पंचंगपणिवायपुरस्सरं सक्को भणिउमाढत्तो-भयवं ! जे इमे अज्जप्पभिइं दाहिं णखेत्ते समणा निग्गंथा विहरंति एएसि णं अहं ओग्गहमणुजाणामि, भगवया भणियं-जुत्तमेयं, एयं च आयन्निऊण भरहोऽवि जायपरितोसो भणइ-भयवं ! अहंपि भारहे वासे साहुणो विहरमाणे अणुमण्णेत्ति । तंपि तहाऽऽनीयगसणं

अणुघ्नयगुणव्ययसिक्खावयगुणसंगयाणं सावगाणं सक्कवयणाओ भरहेण दावियं, तहा एवंपि निज्जरा होउत्ति सण्णमा-
णेण सावगाणं पइदिणं भोयणदाणं कयं, भयवंपि अन्नत्थ विहरिओ ।

तेऽवि सावगा परिचत्तासेसघवावारा भरहणीयजिणथुइगम्भे वेदे परावत्तयंता छट्टे मासे परिण्णानिनिमित्तं का-
गिणीरयणेण उत्तरासंगनाएण आलिहियतिरेहा निरवज्जवित्तीए कालं गमेति । अन्नया य भयवं पडिबोहिऊण तेसु तेसु
ठाणेसु भव्वज्जणं पुणरवि अट्ठावयमागओ, देवेहिं कयं विसालसालत्तयविहारं छत्ताइच्छत्तरमणिज्जं आजानुमेत्तभूमि-
निहित्तरुंतभमरं पंचप्पयारपुण्णुजोवयारं गयणं गणोयंरतं तियसविमाणमालासहस्साभिरामं मंदमंदमुद्धवजयंती-
सयसोहिंयं पवरमणिभयमहप्पमाणासोगतरुविराइयं पंचवन्नरयणविणिम्भयसिंघासणं समवसरणं, तत्थ य निसन्नो
तइलोकपियामहो भयवं पढमज्जिणो, निविट्ठा कमेण गणहरपमुहा साहुवग्गा, आसीणा अणेगसुरकोडिपरिबुडा
वत्तीसंपि सुरिंदा, विण्णायजिणागमवुत्तंतो समागओ सब्बविभूइए भरहो, परमभत्तीए पणमिय भयवं आसीणो
उचियभूमिभाए ।

अह सो तहाविहं भवणच्छरियं नीसेसतिहुयणसिरिविरइयंपिव सब्बभुदयगेहंपि व समवसरणसोहं भगवओ
परमिस्सरियं च पासिऊण हरिसुप्फुल्लोयणो पुच्छिउमयं पवत्तो-त्ताय ! जारिसा तुम्हे भवणगुरुणो एवंविहपूयाप-
यरिसपत्ता किमेत्थ भरेह अण्णेऽवि एरिसा भविस्संति न वा ? भगवया भणियं-भविस्संति, भरहेण भणियं-केरिसा ? ,

ताहे तेवीस जिणे अजियाई वीरनाहपज्जते । समबुद्धिबलायारे तिहुयणजणपणययपउमे ॥ ११८ ॥
 तह तेसिं च अण्णोऽण्णमंतरं सयलकालकलणेणं । वण्णं पमाणमाउं गोत्तं तह जणणि जणगा य ॥ ११९ ॥
 जम्मणनयरे य तहा कुमारज्जाइ सब्वपरियागं । सिद्धिगईपज्जंतं भयवं भरहस्स साहेइ ॥ १२० ॥
 पुणरवि पुच्छइ भरहो मम सारिच्छा कईह होहिंति ? । सगराई एकारस चक्कहरे कहइ सव्वन्नू ॥ १२१ ॥
 अण्णुट्ठोऽविहु भयवं पुणोऽवि वागरइ भरहनाहस्स । नव वासुदेवबलदेवजुवलए भाविणो भरहे ॥ १२२ ॥
 पुणरवि भणिओ भरहाहिवेण तहलोक्कमंदिरपईवो । अवलोइऊण परिसं खयरामरनियरपरियरियं ॥ १२३ ॥
 छट्ठमाइतवकिसियसाहुसुधम्मकारिगिहिकलियं । भयवं ! किमेत्थ कोऽवि हुपाविस्सइ तित्थयरलामं ? ॥ १२४ ॥
 तह चक्कवट्ठिलिच्छं चोइसवरयणगुणमहघवियं । अहवावि वासुदेवत्तणंपि पावेज्ज भरहंमि ? ॥ १२५ ॥
 ताहे कलियकुलिं मिरिइं एंगंतसंठियं भयवं । दावइ जह एस जिणो चरिमो होही तुह सुओत्ति ॥ १२६ ॥
 एसोच्चिय गामागरनगरसमिद्धस्स भारहद्धस्स । सामी तिविट्ठुनामो पढमो तह वासुदेवाणं ॥ १२७ ॥
 एसो महाविदेहे पियमित्तो नाम चक्कवट्ठीवि । मूयाए नयरीए भविस्सइ परमरिद्धिजुओ ॥ १२८ ॥
 एवं च आयन्निज्जण भरहनरिंदो पटिट्ठमणो पणमिऊण भयवंतस्स चरणसरोरुहं तक्खणमेव अणेगसुहसेणाव-
 इनिवहपरिखुडो पय्हो नियसुयस्स मिरियस्स वंदणणिमित्तं, तदंतरे चारणलद्धिसंपन्ने ओहिंनाणधरे मणपज्जवनाणिणो

विगिहृतवकरणनिरए सूरामिमुहायावणापरायणे वीरासणाइदुक्काकायिकिलसकारए भंगियसुयपढणेक्कमाणसे यमहासु-
णिणो परमभत्तीए ठाणे ठाणे विणयपणमतमउलिमंडलं वंदंतो अणिमिसदिट्ठीए पेच्छमाणो य पत्तो जत्थ सो एक्कदे-
सविमुक्कवेणुतिंदडो पंडुरंडरियनिवारियरविकरपसरो नियमइपरिकणियपवित्तिगाइउवगरणविसरिसरुवदंसणको-
उहलाउलियागयलोयधम्मकहणवक्खित्तचित्तो मिरिई निवसइत्ति, तं च दूराओ चिय निस्सामणभत्तिभरनिस्सरं-
तुव्व रोमंचच्छेण अंतरे अस्सायंतं व सिणेहसवस्ससुगिरंतो पढमदंसणुन्नाभियमत्थयनिवडंतुसुमनिभेण अगघं व
वियरंतो विमलकरयलंगुलिमुद्दारयणकिरणजालेण दिसामुहपसरिएण मंगलदीवनिवहं व बोहिंतो पयाहिणादाणेण
तिगरणभत्तिपगरिसं व साहेंतो भूमितलविलुलंतुत्तमंगं पणमिऊण पमोयभरनिभरगिरं भणिउमाढत्तो, कहं?—

वच्छ ! तुमं चिय नीसेसपवरलक्खणनिहाणभूओऽसि । सुकयत्थाणं मज्झे तुज्झ परं पढमिया रेहा ॥ १२९ ॥
तिहुयणमुवणस्सुवरिं इक्खागूणं न होइ कह वंसो ? । जत्थ विमला विरायइ विजयपडाइव तुह कित्ती ॥ १३०
तुह भाविरिद्धिमायन्नऊण रंजिज्जए न कस्स मणं ? । कह वा नो वंदिज्जइ तुह पयपउमंकिया पुहइ ! ॥ १३१
कीरंतु नाम दुक्कतवोविहाणाइं भव्वलोएणं । जं तेसि फलं तं पुण तुमएचिय पावियं सव्वं ॥ १३२ ॥
जओ-सिट्ठोऽसि तुमं ताएण भारहे कुंडगामनयरंमि । सिद्धत्थपत्थिवसुओ किर चरिमो एत्थ तित्थयरो १३३
पुणरवि दसारवगे आइमो तं तिविहुनमेण । पोयणपुरंमि नयेरे तिवंडभरहस्स सामिति ॥ १३४ ॥

मूयाए नयरीए महाविदेहमि तह य चक्यइ । वत्तीससहस्समहानरिंदसंदोहनयचरणो ॥ १३५ ॥
 पारिवज्जं जम्मं च तुज्झ नो पणिवयामि किंपि अहं । जं होहिसि तित्थरो चरिमो तं तेण वंदामि ॥ १३६ ॥
 एवं थोऊण बहं गिराहिं अब्भहियभावग्भाहिं । जयकुंजरमारूढो विणीयनगरिं गओ भरहो ॥ १३७ ॥
 मिरिईवि इमं सोउं हरिसुग्गयपुल्लयजालपीणंगो । गरुयकुलजम्मसहजायमूरि गंभीरिमं मोत्तुं ॥ १३८ ॥
 जिणवयणत्थविभावनसंपन्नविवेयमवि परिचइउं । देहुगयनिरवगह लज्जापसरं पि पडिखलितं ॥ १३९ ॥
 दुवारवेगपफुरियफारमुम्मायमेक्कमासज्ज । दणुब्भडमप्फोडिय तिवइं मल्लो व रंगमि ॥ १४० ॥

पच्चासन्नमहासुणिसमक्खमह लोयमज्झयारंमि । आणदसंदिरच्छो फुडक्खरं भणिउमादत्तो ॥ १४१ ॥ चउहिं कलावयं ।
 जइ पट्टम वासुदेवो महाविदेहमि चक्कवट्ठीवि । चरमो तित्थरोऽविहु अहं भविस्सामि भरहमि ॥ १४२ ॥
 ता तिहुयणेऽवि नूणं अण्णो नो पुण्णवं ममाहिंतो । कस्सऽण्णस्स व एरिस फलदायी होज्ज सुकयतरू ॥ १४३ ॥
 तथा—अज्जो तित्थयराणं पढमो जणगो य चक्किवंसस्स । अहयं च दसाराणं अहो कुलं उत्तिमं मज्झ ॥ १४४ ॥
 एयं नियकुलचंगिमउक्कित्तणपच्चएण संजणियं । नीयागोयं कम्मं मिरिइपरिस्वियायेण दढं ॥ १४५ ॥

भयवं च जयपियामहो विहरिऊण तेसु तेसु गामागरपुरमंडबदोणसुहपमुहेसु ठाणेसु किंचूणं पुव्वसयसहस्स
 केवल्लिपरियाणं पाउणित्ता आउयकम्मस्स सावसेसयं नाऊण अट्ठावयपव्वयमारूढो, तओ महामासवहुलतेरसीए अभि-

ईनक्षत्तुवागए चंदे पुवणहसमयंमि सुसमदूसमाए एगूणनउइपक्खेसु सेसेसु कयचउहसमतवोक्कम्मो दसहिं मुणि-
सहस्सेहिं सद्धिं परिचत्तचउविहारो कयपाओवगमणो पज्जंकासणसंठिओ वेयणियाउयनामगोयक्कम्माणं अंतं
करित्ता सिधमयलमणुत्तरं पत्तोत्ति ।

अह वत्तीसंपि सुरिंदा दुस्सहदुक्खविदुरेण भरहनरिंदेण समेया वाहणव्वाहाउल्लोयणजुयला पणमिऊण भग-
वंतं नंदणवणाओ सरसगोसीसकसणागरुपमुहसोक्खकट्टाई आणाविति ।

तओ—पुव्वेण जिणस्स कए वद्दायारं चियं रयाविति । दक्खिणदिसाए तंसं इक्खागुकुलुभवनिमित्तं ॥ १४६ ॥

अवरेण उ चउरंसं वित्थरवंतं विसिद्धकट्टेहिं । अवसेसाण मुणीणं सरीरसकारकज्जेणं ॥ १४७ ॥

ताहे खीरोदय(जल)ण्हवणसुइसुराहिचंदणविलितं । आरोवेति सरीरं चियाए सक्का जिणिंदस्स ॥ १४८ ॥

भवणवइपमुहदेवा ण्हवियविलित्ताइं सेससाहूणं । आरोवेति दुहत्ता देहाइं नियनियचियासु ॥ १४९ ॥

तत्तो अग्गिकुमारा जहक्कमं तासु सक्कवयेणं । वयणेहिं निराणंदा मुयंति जालउलं जलणं ॥ १५० ॥

एवं सरीरसकारमायेणं सुरेसरा काउं । नियनियठणेसु गया विच्छायमुहा विणयसोहा ॥ १५१ ॥

भरहनरिंदो पुण महासोगाभिभूओ सगिहभागओ, तत्थ य ददवज्जपडणाइरित्तसोगसंभारज्जिरियसरीरो मनु-
प्रियगल्लसरणी संकंदणपोक्कमुक्कारा(वा)णुसारोयणारावविहियसोगपमोक्खो अट्टावयसेलसिहरंमि सवयरणमयं महंतं

श्रुमं रयावेह, बाहुबलिपसुहाण य नवणउईए भाउगाणं अण्णाणि नवनउइ श्रूमाणि निवत्तावेह, तहा भगवओ नि-
 व्वाणलामण्णएसे तिगाउयउस्सेहं जेयणायामं सिंहनिसा(सेज्जा)इयं सव्वरयणविणिम्मियनियनियवणणप्पमाणोवेवेय-
 चउवीसजिणपडिमाहिट्टियं सुविमत्तसालिभंजियाभिरामतोरणावद्धबंधुरासिलाणवंदणमालं दुवारदेसोभयपासपइट्टिय-
 लट्ठपुंडरीयपिहाणपुण्णकणयकलसं सरसपंचप्पयारपुण्णजोवयारकलियं कालागुरुकुंदुरुक्कप्परपमुहवत्थुसिद्धधूधूमं-
 धयारियदिसाहोयं अणेगतियसंगणाजणुत्तालकरतालपुरस्सरदिज्जमाणारासयं भत्तिभरनिब्भरगायंतकिंनरनियरं दूरदेसा
 गयविज्जाहरचारणमुणिजणविचित्तथुइथोत्तखवहुंतहलबोलं पइट्टियलोहमयजंतदुवारपालं जिणभवणं कारावेह ।
 जं च—संसारोयहिनिवंडतत्तसंतताणजाणवत्तं व । रेहइ पवणुदुयधवलधयवडाडोवरमणिजं ॥ १५३ ॥

इक्खागुल्लुब्भभवभूवकित्तिकूडं व संठियं पयडं । सोहइ महीए केलाससेलसमसीसियाएव्व ॥ १५३ ॥

पवणपणोल्लिरजलहरपडलाउलसिहरपरिसराभोगं । परिभमिरभरनियरं विरायए कुमुयमउलं व ॥ १५४ ॥

मन्ने पवणपणोल्लिरएयमहद्वयपलोयेणेण जणे । पवयसिरनिवडिरगयणसरियकित्तीफुडं जाया ॥ १५५ ॥

भरहनरिंदनिवेसियजिणमंदिरदंसणाणुसारेणं । सेसजणोऽवि पयद्दो जिणविंबाईण कारवणे ॥ १५६ ॥

जुत्तं च एयं, जेण—

एयं खु दुग्गइदुवार(पिहाण)फलिहोवमं जिणा विति । नीसेसत्तसंतताणदाणेक्कहेउं च ॥ १५७ ॥

एकौ(त्तो)चिय तक्कालियमुणिगणहरकेवलीहिं न निसिद्धं । चेइहरामात्रे जं तित्थुच्छेओ भवे पच्छा ॥ १५८ ॥
 तथा—जिणसंतर्बिबंदसणविन्नायजहत्यवत्थुपरमत्थो । पडिबज्जइ जइ किरियं कोइ संसारभयभीओ ॥ १५९ ॥
 मुणिणोऽवि बंदणत्थं इओ तओ इति नियविहारेणं । तेऽवि य करंति सट्ठम्मदेमणं समयनीईए ॥ १६० ॥
 पडिबुज्झंति य भव्वा गिणहंति जिणिंदधम्ममकलंकं । एवं च तित्थबुद्धी होइ कया सब्बकालेपि ॥ १६१ ॥
 किं बहुणा!—जिणभवणाइनिवेशणसमुच्चियपुण्णपगरिसवसेणं । सग्गापयगलच्छी निवमइ भव्वाण करकमले १६२
 इय सो भरहनरिंदो निवेशिज्जणं जिणिंदयरभवणं । उवमुंजइ नियज्जं विसयसमिद्धं बहुं कालं ॥ १६३ ॥
 अह अन्नया पविट्ठो आयंसघरंमि विमलफलहमए । नियरूवपेच्छणकए सब्बालंकारियसरीरो ॥ १६४ ॥
 विविहपयारं पेच्छंतयस्स अह अंगुलीयगं गलियं । करकिसलयाउ ताहे वीभच्छा अंगुली जाया ॥ १६५ ॥
 ववगयसोहं तं पासिज्जण सब्बंगसंगि याभरणं । सुक्कं साहावियरूवदंसणत्थं महीवइणा ॥ १६६ ॥
 अत्थमियसयलतारं व नहयलं लुणियसस्समिव छेतं । ववगयकमलं व सरं तरं व संलिन्नसाहगं ॥ १६७ ॥
 दट्ठं च कट्ठधडियं व निण्हं विगयरूवलायन्नं । चम्मावणद्धनिविडिट्ठिंपजरागारमह देहं ॥ १६८ ॥
 तो चित्तिउं पवत्तो सुनिउणबुद्धीए जायसंवेगो । वेरग्गावडियमई सरीरासारयं भरहो ॥ १६९ ॥
 एवंविहनिंदियदेहकारणा कह मए महापावं । कयमंचंतरउद्दं अहो विमूढेण चिरकालं ? ॥ १७० ॥

कह वा विसयामिसमोहिण जणनाहदेसिओ धम्मो । निप्पुणएण न मए सिवफलओ सम्मभारिओ ? १७१
 किं चित्तामणिमह कप्पतरुवरं कामधेणुमह यावि । कोऽवि सयन्नो कहमवि लद्धूण परम्मुहो होज्जा ? १७२ ॥
 ते बाहुबलिपमोक्खा धण्णा मह भाउणो महाभागा । जेहिं असारसरीरेण साहिओ सुंदरो मोक्खो ॥ १७३ ॥
 एमाइसुहज्जवसाणजलण(जाले)जलाविउं झत्ति । निहड्डो तणरासिब मोहपसरो भरहवइणा ॥ १७४ ॥
 उप्पाडियं च केवलनाणं निप्पचवायसुहहेउं । देविसमप्पियलिं गोहाओ निग्गओ ताहे ॥ १७५ ॥
 इसहि सहस्सेहिं नरेसराण तक्कालगहियदिक्खाणं । परियरिओ भयवं भरहकेवली विहरिओ वसुहं ॥ १७६ ॥
 अह पुव्वसयसहस्सं केवलपज्जायपालणं काउं । एक्कसमयेण निव्वाणमुवगओ भरहमुणिवसहो ॥ १७७ ॥
 इओ य सो मिरिई परिव्वायगो सामिमि निव्वाणमुवगएऽवि साहहिं समं गामागरनगराइसु अप्पडिबद्धो

विहरइ, अपुव्वठाणेसु य धम्मदेसणं कुणइ, जो य कोवि पडिबुज्जइ पव्वज्जागहणं च समीहेइ तं साहूणं समण्येइत्ति ।
 एवं च तस्स विहरमाणस्स अन्नया कयाइ सरीरेलण्णया महती पाउब्भूया, तव्वसेण य सो न तरइ अप्पणो निमित्तम-
 सणपाणंपि आहरिउं, न खमइ सरीरचेट्ठपि अणुट्ठिउं, न पव्वइ वइमेत्तमवि भासिउंति, ते य सगासट्ठिया पेळंति
 साहुणो तं तहट्ठियं तहावि असंजउत्ति कलिऊण न पुच्छंति सरीरवत्तं, न समण्येति भत्तपाणं, न दंसेति वेजस्स, न
 उवयरंति ओसहाणं, किं बहुणा ? न संकहंपि करिंति तस्स, मिरिईवि जातसंकिलेसो चित्तेह-अहो निदया

अहो निरप्यणाचिता अहो सकज्जपसाहणपरायणा अहो लोचववहारपरम्मुहा अहो नियउदरभरणसिया इमे सा-
हुणो जं उवयारिण्यपि चिरपरिचियपि एगगुरुदिचिस्त्रयंपि पासपरिवत्तिणंपि समाणधम्मपडिवद्धंपि अणवरयगुणग-
हणपरायणंपि ममं सिणिद्धचवबुक्खवेत्तेणवि णाणुगिण्हंति, अहवा न सम्ममणुचितियमेयं मए, जओ एए,
महाणुभावा सरीरस्सवि पडियारमकुणंता कं मम अस्संजयस्स उवयारे वद्धुं?, केवलं जइ अंहपि इमाओ रोग-
महण्णवाओ पारं पावेमि ता निच्छियं पव्वजागहणुज्जुयं कमवि सयमेव पवावयामि, न एगाणीहिं तीरिज्जंति
सोढुमावयाओ, अह कंहंपि भवियव्वयाए वसेण खओवसमओ वेयणीयस्सं चिरकालभवियवत्तणओ पारिवज्ज-
पासंडवसस्स तहाविहोसहसामग्गीउवहारओ ववगयरेणो सो समत्यसरीरो संपन्नो, विहरिओ य अण्णत्थ ।

अण्णया य धम्मदेसणं कुणमाणस्स तस्स कविलो नाम रायपुत्तो सगासमहोणो, तेणावि पंचमहव्वयरक्ख-
णपहाणो पसमाइगुणाहिद्धिओ पंचिंदियनिग्गहविसुद्धो निस्सेयसफलदायी पस्सविओ से सुस्समणधम्मो, कविलेण
य वुत्तं-भयवं ! अण्णहा तुम्हं बज्जनेवत्थमुवहह, इमं च अण्णहा पणवेह, किमेत्थ तत्तं?, मिरिइणा भणियं-
मह ! एसो सुसाहुधम्मो तुह निवेइओ, इमं पुण जहुत्तसाहुधम्मामसमत्थयाए पवलपावकम्मयाए दुग्गइगमणसी-
लयाए य सबुद्धिसिप्पपरिकप्पियं कुलिंगं मए अब्भुवगयं, तात ! एयं पारगच्छियं, अओ पडिवज्जमु निस्सं-

१ यद्यपि चतुर्णां धातिनामेव ध्योपपन्नमस्तथापि अत्र प्रागुदितस्य वेदनीयस्य ध्यः नवस्य चेदयनिरोध इति क्षयोपशमता ज्ञेया, न तु मिश्रीभावात्तदत्र ।

सयं समणधम्मं, कविलेण वुत्तं-भयवं ! तुम्ह संति ए एत्थ तहावि अत्थि किंपि णिज्जराठाणं नवा ?, मिरिइणा भणियं-भइ ! समणधम्मो ताव अत्थि, इहावि मणांगति, एवं च तेण अजहट्टियवत्थुदेसणओ निचिट्ठो सागरोव-मकोडाकोडिमेत्तो संसारीत्ति । नणु किं एत्तियमेत्तविरीयकहणेऽवि एवं संभवइ ?, किमिह चोळं ?, जेण-

विरीयजिणागमपयमेत्त(स्स)परूवणेऽवि मिच्छत्तं । अप्पत्थभोयेणेण व दुहजणं रोगमज्जिणइ ॥ १७८ ॥

एत्तोच्चिय मूलुत्तरगुणगणविरहेऽवि लिंगधारीवि । सुवइ सब्वन्नमयं जहट्टियं पन्नवेमाणो ॥ १७९ ॥

किं एत्तोऽवि हु ए(पा)वं जं सरणगए णु भवमएण जणे । उम्मग्गदेसणातिक्खखगघाएण विहवइ ॥ १८० ॥
गरुंयपि कयं पावं न तहा जीवस्स दुक्खमावहइ । जह जिणवरवयणपसूयसमयविरीयपरिकहणं ॥ १८१ ॥
अलं वित्थरेण । पत्थुयं भण्णइ-

सो कविलो सन्निवायाभिभूओ इव परमोसहं महागहपरिगहिओ इव तहाविहं मंतकिरियं पुव्ववुग्गाहिओ इव सम्मपरिकहणं महापवलमिच्छत्तणओ न पडिवण्णो मणांगं पि समणधम्मं, तओ मिरिइणा चित्थियं-न ताव परिगिणहइ एस जइधम्मं, ममावि छत्तगाइपरियरूवहणे गामंतरगमणे सरीरेल्लणे अचंतिगपओयणे एगेण सहाइणा कज्जमत्थि, तम्हा पद्दावेमि एवंति चित्तिऊण कविलो गाहिओ नियदिक्खं, सिक्खविओ किंपि वज्झं कट्ठाणुट्ठाणं, एवं च सो नियंसियकासायवत्थजुयलो पाणिपरिगहियतिदंडो पवित्तिगापमुहोवगरणपरियरिओ

गामाणुगामं पियरं च देवयं च सामियं च परमोद्यगारिणं च रयणनिहाणदेसगं च जीवियदायारं च मिरिहं पञ्जवासंतो परिभमइत्ति, एवं च काले बोलंतंमि मिरिहं चउरासीहं पुव्वसयसहस्ताइं सघाउयं पालइत्ता अणालो-
इयपडिक्कतनियदुच्चरिओ कालं काऊण बंमलोए कप्पे दससागरोवमाऊ देवो जाओत्ति ।

सोऽवि कविलो अपढियसत्थपरमत्थो बज्जोवगरणधरणेत्तरसिगो जहादिट्ठकट्ठाणुट्ठाणपत्तपरमकट्ठो गंगागी
परियडइ । सुणिविलक्खणागारदंसणेण पुव्वक्रमेण समल्लियइ य से समीवे धम्मसवणत्थं बहू जणो, सोऽवि अ-
वियक्खणत्तणओ समणसत्थेसु तहाविहधम्मदेसणमवियाणमाणो 'युक्तायुक्तपरिज्ञानशून्यचित्तस्य देहिनः । अलब्ध-
मच्चताहेतुमौनं सर्वार्थसाधनम् ॥ १ ॥' इति परिचित्तो गाढपरिग्गहियमोणव्वओ दिणगमणियं करोइ । अन्नया
य आसुरिरायपुत्तपमुहं सिस्सगणं पव्वाविऊण जथादिट्ठं बज्जाणुट्ठाणं दंसिऊण य चिरकालं कयबालतवो मरिऊण
बंमलोए कप्पे देवो उववज्जइ । ताहिं च—

असुयं अदिठ्ठपुव्वं सुरलच्छि पेच्छिऊण तारिच्छं । अणुचित्तिउं पयत्तो अइविम्हियमाणसो कविलो ॥ १८२ ॥
किं मन्ने होज्ज मए दारुणरूवं तवं समायरिउं (यं) ? किं मयलंछणसच्छहमणुचरियमणुत्तमं सीलं ? ॥ १८३ ॥
किं वा दुक्कतवनियमनिरयचित्तेसु साहुपत्तेसु । होज्ज निहित्तं वित्तं नियमुयजुयलज्जियं पुब्बिं ? ॥ १८४ ॥
किं वा साहसमवलंबिऊण खित्तं हवेज्ज नियदेहं । पज्जलियतिव्वजालासहस्सज्जडिलमि जलणंमि ॥ १८५ ॥

एमाइविविहसंसयसंकिचित्तो खणं विगमिऊणं । सम्मं वियाणणट्ठा ओहिण्णाणं पउजेइ ॥ १८६ ॥
 पारिषज्जपवन्नं अह देहं नियइ तं विगयजीयं । तेऽवि ससिस्से गंथत्थवाहिरे मुद्धबुद्धीए ॥ १८७ ॥
 ताहे नियदंसणपक्खवायओ चत्तदेवकायव्वो । ओयरिओ आयासे सिस्साणं तत्थ(त्त)कहणट्ठा ॥ १८८ ॥
 वरपंचवणमंडलमज्झगओऽदिस्समाणरूवो य । आसुरिपमुहे सिस्से भासइ संबोहिऊणेवं ॥ १८९ ॥
 अवत्ताओ वत्तं पभवइ इचाइ तत्तसंदोहं । तो सट्ठितंतगंथं तं सोच्चा आसुरी कुणइ ॥ १९० ॥
 अब्वोच्छत्ती य तओ जाया सीसप्पसीसवग्गस्स । एवं सति वित्थरियं सव्वत्थ तिदंडिपासंडं ॥ १९१ ॥
 कविलोऽपि हरिसियमणो ठाणाओ तओ गओ सुरावासं । तत्थ य अण्णसरिसे पंचविहे मुंजए भोए ॥ १९२ ॥
 अह सो मिरिई आउयखयंमि चइऊण वंभलोगाओ । दूरदिसागयेनेगमपणियाउलविवणिमग्गंमि ॥ १९३ ॥
 परिसरेसट्ठियसाहुवग्गपारद्धधम्मकम्मंमि । नीसेसगामतिलए कोल्लागे संनिवेसंमि ॥ १९४ ॥ जुम्मं ।
 छक्कम्मनिरियचित्तो वेयत्थवियारकुसलबुद्धी य । जाओ जयपयडजसो नामेणं कोसिओ विप्पो ॥ १९५ ॥
 सो विसयपत्तमणो दविणज्जणकयविचित्तवावारो । पाणवहपमुहुगुरुपावठाणनिरवेक्खचित्तो य ॥ १९६ ॥
 मिच्छत्तनिहयबुद्धी तिदंडिदक्खं निसेविउं अंते । असीई उ पुव्वलक्खे सव्वाउं पालिऊण मओ ॥ १९७ ॥

अह सकयकम्मजणिण्ण सुरतिरिपामोक्खविहिट्ठाणंमि । उववज्जिऊण बहुसो पमुव विवसो दुहाभिहओ १९८
भमिऊण चिरं कालं भवंमि धूणायसंनिवेसंमि । माहणिमाहणपुत्तो जाओ सो पुस्समित्तोत्ति ॥ १९९ ॥ जुम्मं ।
तत्थवि चिरकालं निवसिऊण निविन्नकामभोगो सो । परिवायगदिकखं पडिवज्जेउण धम्मबुद्धीण्ण ॥ २०० ॥
काऊण तवं विविहं पालिय नियसमयसिद्धधम्मविहिं । सव्वाउयं च धरिउं वावत्तरिण्वलक्खाइं ॥ २०१ ॥
मरिऊण पुस्समित्तो तत्तो सोहम्मदेवलोणंमि । दिव्वाभरणविभूसियदेहो देवो समुप्पन्नो ॥ २०२ ॥

कालक्रमेण तत्तो चइऊणं चेइयंमि य निवेसे । अग्गिज्जोओनामा(स)वंभणो(अह)समुप्पन्नो ॥ २०३ ॥

सो य चउसहिं पुव्वलक्खाइं परिपालिऊण आउयं गहिऊण परिवायगदिकखं मरिऊण ईसाण देवलोगे
मज्झिमाऊ तियसो होऊण चिरं कालं भोगे भुंजिऊण आउक्खए चुओ संतो मंदिराभिहाणसंनिवेसे सोमिलस्स
वंभणस्स सिवभद्दाए भारियाए पुत्तत्तेण उववन्नोत्ति, कयं च से अग्गिभूइत्ति नामं, सो य पत्तो तारुन्नं, अन्नया
य तत्थ संनिवेसे परिब्भममाणो समागओ सूरसेणो णाम परिवायगो, सो कुसलो सद्वित्तसिद्धते विवक्खणोधम्मकहाव-
क्खमाणे छेओ परचित्तपरिणणो, तं चागयं सोऊण समागओ बहुजणो, आरद्धो य तेण नियदरिणतत्तपरूवणापवंचो,
आणंदियहियओ गओ य सट्ठाणं जणो, जाया पसिद्धी, वीयदिवसे अग्गिभूइ अण्णो य लोओ आगओ तस्स सयासं,
कया उचियपडिवत्ती, उवविट्ठो संनिहियपदेसे, कहिओ य तेण महया पगारेण नियदरिणणाभिष्पाओ, हरिसिया

सवे, एतथंतरे एगेण मणुसेण पुच्छिओ सो परिवायगो, जहा भयवं ! मयलंछणे इव जणनयणाणंदे मुत्ताकलवेव सह-
रिसहरिणच्छिसिहिण(हण्डि)संवासोचिए नंदणवणे इव विविहविलासजोगे जलहिंमिव लावणपुण्णे रसायलेव भुं-
गंसंगसमुचिए भग्गवम्महसोहग्गे किमेरिसंमि तारुणे अणुट्ठियं तुमए पव्वज्जागहणंति ? , न खलु मुणालंतंरुज्ज परि-
खमइ मत्तसिंधुरखंधणफ्फिक्खेवं न यावि सहइ सहयारमंजरी जरढढंक्कपरिक्खेवचरणभारं न य पभवइ धाराकराल-
करवालसिद्धेहलीलं कमलदलं, न सब्वहा तुह एरिसी सररीसिरी काउमरिहइ निट्ठुरजणजोगं तवचरणंति, केवलं
दोयवमेत्थ पणइणीविरहेण वा धणभंगेण वा सयणविप्पियंदसेणेण वा अण्णेण वा केणइ कारणेण, वाढं कोऊहलं
मे, साहेह सब्वहा जइ न दूरमकहणिज्जंति । परिव्वायेगेण भणियं—भइ ! तुम्हारिसाणवि किं किंपि अकहणि-
ज्जमत्थि ? , सुणसु जइ अत्थि कोऊहलं, अहं किर पुवं कोसंबीए नयरीए असंखदविणभायणं अणेगाणं दीणाण
दुत्थिपाणा विदेसियाण भयंताण य सत्ताणं ताणदाणपरायणो आसि, अण्णया य रयणीए मे पसुत्तस्स सहसा
समुच्छलिओ तुमुलो रवो, तओ संभंतोऽहं समुट्ठिओ सयणीआओ जाव पेच्छामि आइट्ठियनिसियखग्गे दढावव-
द्धपरियरे चावचक्कुंतपमुहाउहहत्ये हण हणत्ति भणंते धराणियलगयंपि सयं निहित्तमिव अत्थसंचयं गिण्हमाणे
तहट्ठियाउ चेव तुंगमंदुराओ अप्पायत्ताओ करेमाणे संमुहट्ठियं परियणं विविहप्पयारोहिं विदेमाणे कंसं दोसं
परवक्खरं च अवहरेमाणे जमसुहडे इव कलिकालमित्ते इव पावपियामहे इव भीसणे निक्किवे भिल्लपुरिसे, ते य

दद्रूण मरणभयविदुरेण सिग्धं अवक्कमिज्जण मए वाहरिया आरक्खिया, त य जाव मत्ता इव मुच्चिया इव गयचे-
यणा इव बहु बोछावियावि हुंकारमेत्तमवि न दित्ति ताव नायं मए नूणमेण, ओसोवणिमंतण वा ओसहपओगेण
वा एएहिं चोरेहिं निहयचेयणा कया भविस्संति, कहमणहा एवं निहा विह्वेजा?, होउ वा ताव सजीवियं
रक्खामित्तिपरिभाविज्जण सणियं सणियं निछुक्को एगत्थ वणगहणे, भिछावि भयणसिलायंभाइयं मोत्तूण सेसं
वराडमेत्तंपि गहाय गया, कमेण पहाया रयणी, उट्ठिओ जणो, जाया पुरे वत्ता, आगओ लोओ अहं च, अवलोइयं
गेहं जाव तत्थ एगदिणभोयणमेत्तंपि नत्थि, खीणविभवत्तणओ कलंतराइपलत्तंपि दविणजायं न पावेमि, जओ
नत्थि कोऽपि निव्वाहो तओ चित्तियं मए-

नीसेसजणपहाणत्तणेण ठाज्जण एत्थ नयरंमि । संपइ कण्णडिओ इव कह निवसंतो न लज्जामि ? ॥ २०४ ॥
दीणाण दुत्थियाण य दाउं भोयणविहिं कुणंतस्स । इण्हि तु निओदरभरणमेत्तनिरयस्स का सोहा ? ॥ २०५ ॥
कह वा तुरगारूढो भुंन्वि भमिज्जण पुरिसपरियरिओ । वच्चिस्सं एगागी इण्हि तु पयण्णयोरेण ? ॥ २०६ ॥
कह वा सहपंसुकालियबंधवलोयस्स वंछियत्थस्स । अविपूरितो जीयं निरत्थयं उव्वहिस्साभि ? ॥ २०७ ॥
दुव्वहगव्वुदुरवइरिविसरदुन्विसहदुव्वयणजायं । पब्भट्ठलट्ठविभवो पच्चक्खं कह सुणिस्साभि ? ॥ २०८ ॥
ता मोत्तूण इमं ठाणं देसंतरं वच्चाभित्ति चित्तिज्जण चलिओऽहमुत्तरावहाभिमुहं, कालंतरेण पत्तो एगंमि सन्नि-

वेसे, भिक्खापरिभ्रमणेण कथा पाणविती, बुत्थो तत्थेव किंचिकालं, अण्णदिवसे य दिट्ठो भए एणो तिंदी,
 वंदिऊण सद्वायेण उवविट्ठो से समीवे, बुच्छिओऽहं जहा मए तहा तेणवि नियवइयरं, निवइओ य मए संसेवेण,
 तिंदंढिणा भणियं-पुत्त ! परिचयसु सोयसंतावं, अणुसरसु धीरत्तणं, सबसाहारणो हि एस वइयरो, किं च-

किं वयणिज्जं जं निदिए जणे नो थिरत्तणं कुणइ ? । पुरिसुत्तमं पि लच्छी लइइ महिलच्च दुवीला ॥२०९॥

नो सुइकुलं न रूवं नो विण्णाणं न विक्कमं न वलं । बालच्च गयविवेया अवेक्खए किं पि पुयमाणा ॥२१०॥

अहवा जलनिहिकल्लोलसंगसंगचंचलत्ताए । कोत्थुहमणिसहजम्मणवहियदढनिद्रत्ताए ॥ २११ ॥

मयलंछणसमसी(सा)सियमइलाणुस्सरणवद्धसीलाए । सुरगइतुरंगसंगइदूरुज्झियवरविवेयाए ॥ २१२ ॥

दुस्सहविसमेत्ती(व)सदावियपजंतदुहविवेयाए । कंबुसिणेहसमुच्छूढगाढकुडिलत्तबुद्धीए ॥ २१३ ॥

तह पारियायपणयपभावजडजायपक्खवायाए । निचं लवणोयहिवाससुक्कमधुरत्तभावाए ॥ २१४ ॥

एयाए सचरियं कंहं हवेज्जा महाणुभावाए ? । न हि विसरिससंसग्गी चिसिट्ठुणसाहणं कुणइ ॥ २१५ ॥

ता चयसु सोगमहुणा पोरुसमुवहसु कुणसु करणिज्जं । न हि विण्णायसरूवे गुण्यंति कहिं पि सणुरिसा २१६

किं भइ ! तुमं एगो इमीए मुक्को ? जमेवमइगरुयं । संतावं वहसि न पत्तकालमहुणा समायरसि ॥ २१७ ॥

भणियं च मए भयवं ! किं पुण एत्तोऽवि पत्तकालं मे ? । तेण कहिं यं ! महायस ! निच्छओ सवहा धम्मो ॥२१८॥

एयविउत्ताण जओ विहडंति समुद्धुरावि रिद्धीओ । एएण संपउत्ताण हुंति दूरं पलीणावि ॥ २१९ ॥
 एयं च मए आयन्निऊण संजायभवविरागेणं । एसा तिदंडिदिकखा पडिवन्ना दुकुलनिम्महणी ॥ २२० ॥
 ता भइ ! तए वेरग्गकारणं जं पुरा अहं पुद्धो । तं एयं तुह सिद्धं एत्तोच्चिय कुणसु धम्ममइ ॥ २२१ ॥
 एत्थंतरंमि एयं सोच्चा ओभिन्नवहलरोमंचो । पुणरुत्तनिवासियपारिवज्जदिकखाभिमुहुद्धो ॥ २२२ ॥
 सो अग्गिभूहनामो मिरीइजीयो तिदंडिणं नमिउं । भालयलनिमियपणी पयंपिउं एवमाहुत्तो ॥ २२३ ॥
 भयवं ! जाए वेरग्गकारणे तारिसंमि तुम्हेहिं । जं दिकखापडिवत्ती विहिया तं सम्ममायरियं ॥ २२४ ॥
 एयस्स निसामणओ ममावि घरवासवासणा विगया । छिन्नो मायासोहो विवेयरयणपि विण्णुरियं ॥ २२५ ॥
 ता नियदिकखादाणेणऽणुग्गहं कुणसु संपयं मज्झ । इय वुत्ते तेणं सो पव्वज्जं गाहिओ सहसा ॥ २२६ ॥
 काऊण तवं तो सो धरिउं छण्णण पुव्वलक्खाइं । सव्वाउयं तदंते सणंकुमारे सुरो जाओ ॥ २२७ ॥
 कालक्कमेण चविउं सेयविथाए पुरीए पवराए । वंभणकुले पसूओ भारद्वाओत्ति नामेण ॥ २२८ ॥
 तत्थवि सक्कम्मजणिणए सुहुदुक्खे भुंजिऊण थेत्ते । पुव्वक्कमेण पुणरवि पारिवज्जं पव्वजेइ ॥ २२९ ॥
 काऊण य वालतवं कुदेसणापावधूलिपडलेणं । अवगुंडिऊण वाढं रम्मन्ताणं व बहुकालं ॥ २३० ॥
 सव्वाउयमणुपालिय चउयालीसं तु पुव्वलक्खाइं । पंचत्तगओ संतो तियसो होऊण भाहिंदे ॥ २३१ ॥

निम्मलमणिरयणमउहजालउज्जोविण् विमाणंमि । नियपरियणपरियरिओ कीलइ सच्छंदलीलाए ॥ २३२ ॥
 आउक्खएण तत्तो चविउं सो मणुयतिरियजोणीसु । नरयकुदेवसुप्पिय पुणरुत्तं परिभमेऊण ॥ २३३ ॥
 रायग्गिहंमि नयरे दियवरकविलस्स कंतिमइयाए । गिहिणीए गब्भस्मी पुत्तत्तेणं समुण्णो ॥ २३४ ॥
 जाओ समुचिअसमए नामंपि य थावरोत्ति से विहियं । सत्तेण य गत्तेण य कुमारभावं च वोक्कतो ॥ २३५ ॥
 अणवरयमरणजरजम्मवाहिदुहनिवहपीडियं लोयं । दट्टूण काउकामोवि धम्ममइमोहमूढो सो ॥ २३६ ॥
 नो वच्चइ दुक्करतवविहाणनिरयाण जिणमुणिंदाणं । पासंमि कयावि हुनेव अन्नतित्थियजणस्सावि २३७ जुम्मं ।
 एवं अच्छतो सो पेच्छइ एगं तिंदंडिणं समणं । चिविडियनासावंसं भग्गोट्टुउडं दलियदसणं ॥ २३८ ॥
 कुमुयं व चंदंसणवसेण कमलं व दिणयरुगमओ । सालत्तयतरुणचरणताडणाओ असोगुघ ॥ २३९ ॥
 तं पासिऊण वियसंतनयणनलिणो परं पमोयभरं । अइदुल्लहवल्लहसंगमे व सो पाविओ झत्ति ॥ २४० ॥
 पइजम्भपरिन्वायगदिकखागहणुब्भवंतुनेहाओ । तत्तपरिपुच्छणट्ठा तस्स सगासं समल्लीणो ॥ २४१ ॥
 नमिउं चरणे सच्चायरेण सो पुच्छिओ य धम्मविहिं । जोगोत्ति कलिय तेणवि तिंदंडिणा साहिओ तस्स २४२
 अन्नं च इमं सिट्ठं जहाऽहमिह दुक्खिओ ठिओ पुब्बिं । विसयपिवासाणडिओ कुमलेण तहा न ठायवं ॥ २४३ ॥
 अह थावरेण भणियं भयवं ! कह तं ठिओ इह दुहत्तो ? । विसयपिवासानडिओ कहेहि कोऊहलं मज्झ ॥ २४४ ॥

भणियं च तेण भइय ! सुणसु पुरा विसयसल्लपड्हित्थं । अन्नाणमीणमीमं विसोत्तियाळोळकळोलं ॥ २४५ ॥
 निछज्जिमज्जयेलाविलासमवसत्तुत्तरावत्तं । पावविकप्पणपंकं निस्संखपंचंसंखउलं ॥ २४६ ॥

अभिमाणघोरघोसं पयंडकदप्पवाडवग्गिसिंहं । दोसघणपडळकिन्नं तारुणमहन्नवं पच्चो ॥ २४७ ॥ तीहिं विरोसयं ।

तद्वसेण य परिचत्तसिंहसंवासो दूरुज्झियसयणवंधवो परमतावसो इव विसट्टकंदोदृन्मयणापु पवरपओहरासु
 महाभोगसालिणीसु समुल्लसंतकळोलबाहुविलासासु हंसगणुसरियपयकमलासु सालसकुलकळावागु मरसीय सुंदरासु
 विलासिणीसु कयाभिरई समाणो एगया अणंगसेणाभिहाणाए वेसाए सभं दुत्थो वहुं कालं, तदणुरागवसेण य
 पवरभूसणदाणेण अणवरयमहामोहदोगुल्लसमप्पणेण तंबोलफुल्लविलवणोचणयणेण य निद्विवियं पिथपियामहपमुहपुरि-
 सज्जियं दविणजायं, जाओऽहं निद्वणचंगो, सुणिओ दाइगाए, तओ निष्पीलियालत्तयं व पयत्तपीययाग्णीचसगं व
 मुत्तावसेस भोयणं व तोहिं तेहिं अवमाणकारणेहिं परिचत्तो म्हि तीए, तयणंतरं निग्गओऽहं वेसाघराओ, गओ
 नियगेहे, दिट्ठं च तमणेगच्छिइसयसंकुलं पब्भट्ठपुव्वसोहं मसाणं व भयजणगंति, तओ महाविसायाभिभूओ पयट्ठो
 देसियालिए, गच्छंतेण य पइदिणं एगत्य सुन्नसन्निवसे दिट्ठं भूमिनिवडियं रक्खावल्यं, गहिउं मए विहाड्डियाओ
 निविडजजड्डियाओ रक्खागंठिओ, दिट्ठं च एगस्स मज्झनिहितं लिहियपवरक्खरं भुज्जखंडं, वाइयं च कोज्जहलेण,
 परिभाविओ य तल्लिहियगामनामदिसाभागलंछणसमओ रयणकोडिप्पमाणनिहाणवइयरो, हरिसियमणेण संगो-

वियं च तं सच्चपयारेण, पट्टिओ तयणुसारेणं, पत्तो अकालखेवेण मुज्जलिहियंमि गामे, निरुविओ निहाणपपप्पो,
 अवलोइयाइं लिंगाइं, जाव सच्चाणिवि लिहियाणुसारेण मिलति, तओ मे पाउन्भूओ परमप्पमोओ, पसत्थनिसाए य
 दिसाबलिपक्खेवपुरस्सरं खणिउमाढत्तो णिहाणपएसं जाव य हत्थप्पमाणमेतं तं न खणामि ताव समुट्ठिया उच्च-
 डफडाडोवभीसणा तडिसिहातरललंतजीहयुयला मुहमारुयसंवलियजलणफुल्लिगुगारदारुणा पुच्छच्छटाताडिय-
 धरणिवट्ठा दीवयसीहा फुरंतरत्तदित्तनेत्ता महाभुयंगा, तेहि य संदसेहि व तडतडत्ति तोडियं मह सरिरं, निचिट्ठो
 महाविसावेगेण निवडिओऽहं भूमीए, विइकंता रयणी, ममाणुकंपाएच समुगओ भयवं दिणयो, अवलोइओऽहं
 गामजणेण, विण्णायविसविगारेण य दयाए पडियारिओ, तहाविहोसहमंतकिरियाए जायं च पणुणं सरिरं, पुट्ठोऽहं
 गामजणेण रयणिवइयरं, कहिओ य मए तस्स जहट्ठियनिहाणवुत्तंतो, तओ तत्थेव वीसमिऊण कइवय चासराइं
 पुणरवि पत्थिओ एगदिसाए, अणया य गच्छंतस्स मिलिओ एगो पुरिसो, समानसीलयाए य जाया मज्झ तेण
 समं मेत्ती, पत्थावेण य तेण एगंते सन्भावेण निवेइओ मम विवरप्पवेसजक्खिणीसाहणकप्पो, अच्चत्थिओ य
 सच्चायेरेण जहा-जइ तुमं सहाइभवसि ता विवरं पविसामो, भोगगाढोलोयुयाए पडिवणणेयं माए, तओ अखं-
 डपयाणएहिं गया वलयामुहं नाम विवरं, विरइया से दुवारपूया, तप्पियाओ जोइणीओ, समुहुत्तनक्खत्तंसि गहाय
 बाढं पत्थयणं परिकलियहत्थपईवा पविट्ठा तत्थ, उचनीयटाणाणि चोलिंता सणियं सणियं गया दूरदेसं, दिट्ठा य

झडति एगत्य विज्जुपुंजभासुरा पवरकणगसिंहासणनिघ्निट्ठा एषा जम्बुकन्नगा, अविय—

गंडयललंतुजलकुंडलकिरणोलिविच्छुरियवयणा । नाणामणि(मय)भूषणसतिरियरेहंतदेहलया ॥ २४८ ॥

आमलयथूलमोत्तियनवसरहारारवद्वधणवट्ठा । पण्णुल्लमणहर(हरा)वम्महतरुतरुणसाहव ॥ २४९ ॥

पायालसिरिध्व रहव देवरमणिव जणियमणमोहा । ललियकरकलियलीलासरोरुहा मुंदरावयवा ॥ २५० ॥

भुवणच्छेरयभूयं रूवं दहं अदिट्ठपुवं से । मयरद्धपसरचिहुरा अम्हे तप्पासमलीणा ॥ २५१ ॥

सावि अम्हे आगच्छते पेच्छिऊण सन्निहियपज्जलंतपयंडजालाकराले झडति कुंडे पविट्ठा, अम्हे पुण महान्-
मोगगराहया इव विद्धानवयणा चित्तिं पवत्ता—किं पच्छाहुत्तं नियत्तामो उयाहु तत्थेव तदंगसंगसंलग्गलायन्न-
पुत्रे जलणकुंडे पयंगो इव अत्ताणं खिवामो?, केवलं दारुणो दहणो खणद्धेणवि दहइ देहं, संसइओ य तीणं सद्धिं
मीलणो, जीवता पुणोऽवि भद्दाइ पेच्छिस्सामो, ताव सहसच्चिय एगनिंकुंजाओ कुंजरोव गरुयंगमारो अंगमारधरह-
रियधरणिगतलो धरणिगतलाडणसमुच्छलंतपडिसइयसहस्सवहिरियदिसाभोगो दिसाभोगपसरंतकज्जलगवलगुलि-
यालिवलयकालप्पभाजालो करधरियमहंतनरसिरकवालो कालरत्तिजणगो इव दुप्पेच्छो वयणेण व भूमवत्तिं मुय-
माणो फारकुंफाररउदकसिणभुयंगवद्वकेसमारो समायओ तं पएसं झडति खेत्तवालो, तओ तेण अचंतरोसारुणच्छेण
पेच्छिऊण भणिया अम्हे—रे एरिसाहमा ! विणट्ठसीलसमायारा कायरडियमेत्तवित्तिसियसरीरा किं नियचित्तावदुभं

न मुणह ? जं एत्थ आगया, ता एण्हमणुभवह दुव्विणयफलंति भणिऊण पवणपणुणछिणपणं व भएण कंपमाणा सहसच्चिय चरणे धरिऊण बालच्छलगव्व अम्हे महया वेगेण उल्लालिया तओ पएसाओ, निवडिया य वलयामुह- विवरदुवारमूले, तओ समागयमहानिद्दवेगा इव गमिऊण जामिणिं समुगयंमि दिणयरे उम्मीलियनयणकमला परिचिंतिउं पवत्ता—अहो को एसप्पएसो ? केणेहाणीया ? कहं वा धरणीए पसुत्ता ? कत्थ वा तं विवरं ? कहिं वा सा कण्णगा ? ।

सुमिणं माया वेयं विभीसिया व ? मइविब्भमो वावि ? । एवं चिर संसइया होऊणं मुणियपरमत्था ॥ २५२ ॥
 ठाणाउ तओ चलिया पत्ता बेण्णायडंमि नयरंमि । तत्थवि विज्जासिद्धो दिट्ठो सिचसुंदरो नाम ॥ २५३ ॥
 तो बहुविहप्पयारं विणएणाराहियो पयत्तेणं । तुट्ठेण तेण दिण्णो मज्झं कचाइणीमंतो ॥ २५४ ॥
 कहिओ य साहणविही तओ मए चंडिगाए गेहंमि । गुरुणा जहोवइट्ठो पारद्धो जाव होमविही ॥ २५५ ॥
 साहसरहियत्तणओ तणगकंपेवि भयविसिट्ठस्स । धिट्ठत्तणओचिय मंतसाहणं मम कुणंतस्स ॥ २५६ ॥
 उत्तालुत्तालकरालकालवेयालंचंडपरियरिओ । एगो महापिसाओ सहसच्चिय उट्ठिओ भीमो ॥ २५७ ॥ जुम्मं ।
 ताहे तारिसविगरालंदसणुप्पणमरणमयविहुरो । विस्सुमरियमंतपओ पहाविओऽहं सगिहहुत्तं ॥ २५८ ॥
 तेणावि धिट्ठुस्सिक्खिओत्ति भणिऊण विगयसंकेण । अइलंबपाणिणा करिसिऊण नीओ सिवाए पुरो ॥ २५९ ॥

ताहे सुष्टीएँ हओ तहा जहा चिविडिया भमं नासा । अन्नेऽवि अगदंता भग्ना निधमगस्स्येण ॥ २६० ॥
ता भो महायस ! तएजं पुट्टोऽहं सबइयरं पुवं । सो एस जइ न पत्तिजसीह ता पेच्छ मल्ल मुहं ॥ २६१ ॥
अह थावरेण भणियं भयवं ! पच्चक्खदिस्समाणेऽवि । भोगपिवासादोसे को मइमं नेव पत्तिवइ ? ॥ २६२ ॥
जुत्तं तुम्हेहिं कयं अहं पि काउं इमं समीहामि । ता अणुणिणहह संपइ पारिवज्जण्यमाणं ॥ २६३ ॥
दिण्णा य तेण दिक्खा जाओ सो धम्मकरणनिरयमणो । दढतवियदुस्सहतवो मिच्छत्तविलुत्तभोहेणं ॥ २६४ ॥
चोत्तीसपुबलक्खे सवाउं पालिऊण पज्जंते । मरिऊण वंभलोए उववण्णो भासुरो तियसो ॥ २६५ ॥
नियबुद्धिसिप्पिकप्पियतिदंदिंसणपरूढनेहेणं । पारिवज्जगहणं लब्भवगहणाइ संपत्तं ॥ २६६ ॥
सकुलपंससावइयरनिबद्धददनीयगोयकम्मणेणं । माहणपमुहे नीए कुलंमि जम्मं च मिरियस्स ॥ २६७ ॥
दट्ठूण जिणवरागमविवरीयपरूवणं कुलपसंसं । दूरं परिवज्जह भो वियक्खणा ! सबकालं पि ॥ २६८ ॥
इय वद्धमाणचरिए महल्लकल्लाणवल्लिपरियरिए । मिच्छत्तंपमुमइलियजणमणमल्लालणजलंमि ॥ २६९ ॥
भरहुसुयपढमपयडियतिदंदिपासंडसंसाणाज्ज्भो । भवजणविम्हयकरो सम्मत्तो वीयपत्थावो ॥ २७० ॥

॥ इति गुणचंदसूरिरइए सिरिमहावीरचरिए वीयपत्थावो सम्मत्तो ॥

(ततीयपत्थावो)

तिहंङिभवसमेया भणिथा वत्तव्या य मिरिस्स । एत्तो य जहाविच्चं साहिज्जइ विस्सभूइस्स ॥ १ ॥
 इहेय जंबुदीवे दीवे भारहवाससिरसेहरोवमे पइदिणभवंतविविहमहूसवे नीसेसनयरविकखाए रायगिहे नयर
 पढमो सौंडीरचक्कस्स वल्लहो गुणिवगगस्स सम्मओ पयइल्लोयस्स पाणप्पिओ पणइजणस्स भुयदंडलीलारोविथभूमि-
 भारो विसुद्धुद्धिपगरिसवीमंसियधम्मवियारो विस्सनंदी नाम नराहिवो, मयणलेहा नाम से भारिया, विसाहनंदी
 कुमारो, तथा परूढगाढपेम्माणुबंधो सरोरमेत्तविभिण्णो विसाहभूती जुवराया, तस्स रूवाइगुणरयणरोहणधारिणी
 धारिणी नाम देवी । इओ य सो मिरिइजीवो बंभलोगाओ जुओ संतो चउग्गइयं संसारकंतारमणुपरियट्टिऊण अण-
 तरभवजणियतहाविहकुसलकम्माणुभावेण समुप्पण्णो तीसे गब्भंमि पुत्तत्ताएत्ति, अणण्या पसूओ विसिट्ठे वासरे,
 कयं विस्सभूइत्ति से नामं, कमेण परिचत्तवालभावो गाहिओ सो पिउणा कलाकलावकोसल्लं, तारुणमणुप्पत्तो परि-
 णाविओ बत्तीसं सुरमणीविब्भमाओ पवराराथकुलसमुब्भववालियाओ, ताहि य समं बहुप्पयारं कीलंतो कालं
 गमेइत्ति । अणण्या य सयलतइल्लोयदरिसियवियारो तरुवराणंप्पि विहियलावण्णो मुणीणंप्पि कयचित्तचमत्तारो स-
 मागओ महुमासो, जत्थ य—

पोढपुरंधियोरथणमंडलपडिहयगमणवेणओ । पिययमविरहविट्ठुतरुणीयणदीहरसासतरलिओ ॥ २ ॥

चंद्रगनीवकुसुमकमलायस्कुवलगंगंधबधुरो । दाहिणपवणुदिसिहिं पवियंभइ नावइ गंधसिंधुरो ॥ ३ ॥
अणणं च—चंचलचरणचलणपरिवोलिरमंजुलकणयनेउरं । करयलणझांतमणिंकंकणकलरवपसरमणहरं ॥ ४ ॥
कणिरनियंबविबकांचिगुणकिंकिणिधालयलालयं । सहइ वरंगणण चाउद्दिसिं चचरि चारुगीययं ॥ ५ ॥
एवंविहं महुसमयं दहुं विस्समूहं कुमारो समग्गविमूहं चालुकरनरभल्लचडपरिकिन्नो अंतउतरुणीजणपरिय-
रिओ गओ गुप्फकरंडयं नाम उज्जाणं, जत्थ तरुवराभोगे गायंतिव अमंदमयरंदविंदुपाणपरव्वसभमिरममरगुजिएहिं
पणच्चंतिव खरपवणुवेल्लिरमहल्लपल्लवमुएहिं हसंतिव डिंडीरपिंडपंडुरपरिप्फुडकेयइदीहरदलेहिं । जम्भिय—

जंजुजंबीरखज्जरसाहिंजणा, सज्जनालियरिफ्फणिसप्पला अज्जुणा ।

खइरसिरिखंडकण्णरणीतला, पीलुनिंवलिबउयवडपिप्पला ॥ ६ ॥

कयलिनोमालियामाहवीसालयासल्लइसग्गनवनीविहितालया ।

बउलवंसालिताविच्छयाकच्छिया, सब्बकालंपि रेहंति जलसुत्थिया ॥ ७ ॥

जं च—कहिंचि सहयारतरुभजरीमंडियं, कहिंचि वेइल्लफुल्लतंगंधहुयं ।
कहिंचि कंकेल्लिनवपल्लवालंकिंयं, नाइतरुणीकमालत्तयालंकिंयं ॥ ८ ॥
कहिंचि नवपाडलापुप्फनियराउलं, कहिंचि विरुदंतभमरावलीसंकुलं ।

कहिंचि वरमालईमउलमालच्चियं, नाइनियविहवदंसेणेण रोमंचियं ॥ ९ ॥

अण्णं च—कारंडहंसबगचक्कवायभारुडकीरकुरेहिं । जीवंजीवकविजलजलवायसखंडरीडेहिं ॥ १० ॥

हारीयंपंचवणयपारेवयपमुहविविहपक्खीहिं । सुसिणिद्धबंधवेहि व सेविज्जइ जं सयाकालं ॥ ११ ॥

जत्थ य वम्महदुस्सहसराभिधाएहिं जज्जरंगीओ । बालमुणालुप्पलसत्थरेसु सिसिरेसु रमणीओ ॥ १२ ॥

विणयंति विरहिणीओ दिणाइं करपिहियसवणजुयलाओ । परहुयतारवारसियसवणमुच्छागमभएणं ॥ १३ ॥ जुम्मं ।

रेहंति जत्थ चंपयतरुणो नवकुसुमनियरसेहरिया । आरूढमयणजलणव्व पहियनिवहाण दहणत्थं ॥ १४ ॥

खरपवणुद्धुयमयरंदपिंजरं पेच्छिऊण रविबिंबं । मज्झणहेऽवि हु संझं संकंति रहंगमिहुणाइं ॥ १५ ॥

जत्थऽक्खमयणदमणा तरुणो मुणिणो य सुमणसोवेया । सुहलवलीलालसिया भुयगीओ विलासिणीओ य ॥ १६ ॥

तत्थ एवंविहंमि उज्जाणे सो विस्सभूई कुमारो पवरतरुणीजणसमेओ अणिमिसाए दिट्ठीए पेच्छमाणो वण-
लंछि कोऊहलाउलियपरियणदेसिजमाणमग्गो काणणंतरेसु परिब्भममाणो सायरं पसीयह कुमार ! पेच्छह इओ
मंजरिज्जइ सहयारावली इओ फुल्लंति मल्लियाओ इओ पल्लविज्जंति बालकंकिल्लिणो इओ कोरइज्जंति कुरूवयनि-
उरुंवा इओ कुसुमिज्जंति कणियारनियरा इओ मउरिज्जंति पुट्ठागाइसाहिणोत्ति, एवं उज्जाणपालेण निंदंसिजमाण-
तरुणो वणकीलाए दिणाइं गमेइत्ति । अंतरा य सुणेइ राइनीइसत्थाइं विमरिसेइ गूढत्थपयाइं अभिणयावेइ वि-

सिद्धकविजणविरइयाइं नाडयाइं भरहविज्जाविथक्खणेहिं हावभावहत्थयाइपत्थावणपहुणहिं नड्डजणुरिभिहिं नि-
सामेइ य वेणुवीणाणुणयं गायणजणाओ बहुचोलणप्पयारमणहरं पंचमेणयं, तथा एगंतदेसट्ठिओ विगुणेइ दूरेण
सोवालंभयणाइं । कहे ?—

तीसे संकेयं संसिज्जण पडिजुवइमणुसरतेणं । नाह ! ताए जजीवं दिन्नो लहुयत्तणकलंओ ॥ १७ ॥
सुहय ! तुह विरहदुस्सहसिहिपसमत्थं ममाहरंतीए । तीसे सरसीयुं निट्ठियाइं नवनलिणिनाळाइं ॥ १८ ॥
परिसरसहयारुग्गयनवमंजरिखंडणेण पइदियहं । तीसे ताण निमित्तं धट्ठा मज्झंगुलीण णट्ठा ॥ १९ ॥
पचासण्णे कयविविहकलरवे नीलकंठकलयंटे । परिसंता मज्झ भुया पइक्खणं उट्ठवंतीए ॥ २० ॥
एइ पिउ एइ एसो सो हवसु तं खणं धीरा । थक्का मेणिहं जीहा गुणरुत्तं वाहरंतीए ॥ २१ ॥
इय एरिसा अवत्था वट्ठइ तुह पणयिणीए दुविसहा । जइ जीवंतिं वंळसि कुमार ! ता तं लहुं सरसुं ॥ २२ ॥

तथा कयाइ गोत्तखलियपरिकुवियकामिणीपसायणप्पवणवयणप्पवंचविरयणेण कयाइ सुयमारियासंलवचि-
णोएण कयाइ परोणपरसवत्तिकामिणीकयकलहकोलाहलनिसामणेण कयाइ णाणाविहदूरेदोमोवणीयापुत्तकसं दोह-
दोहलगदाणेण कयाइ समयवणसिंहडितंडवावलोयेण विविहं कीलइ । अण्णया य कुमारस्स काभिणीहिं समं
दुरोदरेण रमतस्स समागओ मज्झंदिणसमओ ।

ततो अंतोरसमेओ चलिओ जलकीलानिमित्तं, पत्तो काणणसरसीए, तयणंतरं च-
सरसीतडिडविसरावमुक्कझपुच्छलंतसलिलभरं । झिल्लइ महल्लकल्लोलपेळणुवेळिरो कुमरो ॥ २३ ॥
मड्डाए तरुणीओ रणंतमणिमहल्लकल्लावाओ । खिप्पंति पराप्परपेछरीउ भयतरलियच्छीओ ॥ २४ ॥
करकलियकणयसिंणयसलिलपहारेहिं पोढरमणीओ । विहवइ कुमारो कोवभरियदरपाडलाटीओ ॥ २५ ॥
पियकरफुंसुल्लासिरनियंवतडतुट्टमहलगुणाहिं । निवडंतकिंकिणीहिं पलाइयं झत्ति बालाहिं ॥ २६ ॥
घोरघणघ(धा)मसमजलवट्टियपूराए झत्ति सरसीए । कमलाइं वयणलायणणनिज्जियाइं व बुडुत्ति ॥ २७ ॥
इय विविहसलिलकीलाहिं कीलितं जुवइसत्थपरियरिओ । ओयरिओ सरसीओ गओ कुमारो नियावासं ॥ २८ ॥
एत्थंतरे अत्थमिओ गयणचूडामणी दिणनाहो, मडलिया कमलसंडा समं माणिणीमन्नुणा, विप्पडत्ताइं
चक्कवायमिहुणाइं सह मिहुणदिणविरहेण, पवट्टियाणंदा इओ तओ परिब्भमिउं पयित्ता कोसिया समं पंगुलिबिल-
याहिं, निलीणाइं नियट्टाणेषु सडणिकुलाइं समं सुणिज्जेण, तहा निसायरसेणं व भीसणं पसरियवधवारं, गयर-
द्धओव विप्फुरिओ सव्वओ पढमप्पओसपइवनिवहा, एवं पयट्टे संझासमए कुमारो काऊण पओसकिचं तेहिं को-
ऊहलनम्मालावकंभणियगीयाइविणोएहिं विगमिऊण खणंतरं पसुत्तो सुहसेज्जाए, कमेण य पमाया रयणी,
समुग्गओ सहस्संसुमाली, उट्टिओ कुमारो सयणीयाओ, कयपाभाइयकायवो पुव्वविहीए दोगुंदुगुव विलारिणीए-
ज्झगओ विलसइत्ति । एवं च तत्थ सायंदिणमभिरममाणस्स सरंति वासरा ।

अत्रया य विस्सनंदिणो महारायस्स अगमहिंसीए दासचेडीओ पुण्फकण्डगुज्जाणं, दिट्ठो ताहिं विस्सभइकुमारो अंतेउरसमेओ बहुप्पयारं तहा विलसंतो, तं च दट्ठण समुण्णणगाढामरिसाहिं ईसी-सल्लभिल्लमाणमाणसाहिं सिग्घमेव पडिनियत्तिऊण कहिओ रायग्गमहिंसीए कुमारस्स काणणकीलावइयारो, खणं-तरे य दीहं नीससिऊण पुणो भणियं ताहिं—देवि ! किं तुज्झ जीविणं ? किं वा रज्जवित्थरणं ? किं वा विभवणं ? जइ तुम्ह पुत्तो विसाहनंदी पुण्फकण्डगुज्जाणे न कील्लजा, एवं च आयच्चिऊण अवियाररमणीयत्तणओ इत्थीसहा-वस्स अदूरंदंसित्तणओ महप्पसरस्स अभीरुत्तणओ नियकुलकलंकुग्गमस्स पकओ महापरिकोओ देवीण, परिचत्तं भोयणं उज्झिओ सरीरसक्कारो पेसियो नियनियठाणसु सहीवग्गो, कइवयदासचेडीपरिवुडा य पविट्ठा कोवघरंमि, रयणिसमए य समागयेण विस्सनंदिनरिदिण देविं अपेच्छमाणेण पुट्ठो कंचुगिप्पमुहो परियणो, कहियं च एगेण-देव ! अमुगंमि गेहे मिलाणवयणकमला केणवि कारणेण देवी गयत्ति, तओ राया तमायच्चिऊण संसंभयं तत्थेव गओ, दिट्ठा य कोवेण मिससिंसी उट्ठसासरोगाउरव दीहं नीससंती देवी, दिट्ठासणे आसीणो नराहिवो भणिउमाढत्तो य-देवि ! किमेरिंसी अवत्था ? किमत्थ कारणं ? साहेसु परमत्थं, न ताव सुमरोमि थोवंपि निय-दुच्चरियं, न यावि ममाणुवित्तिपरायणो परियणोऽपि मणांगंमि अवरज्झइ तुज्झ, नेव य विविहरयणाभरणसंभारोहिं खूणमत्थि, ता किं निरत्थओ एस कोवाडंबरोत्ति ? देवीए भणियं—महाराय ! सबं चित्र नत्थि केणावि पगारेण

खूणं, केवलं किमेण निरत्थएण सयलजणसामणणेण?, रायणा भणियं—किं पुण अनिरत्थयं सयलजणासामणणं च?, देवीए भणियं—महाराय! पुण्फकरंडगुज्जाणे परिभोगो, राइणा जंपियं—किं तेण तुज्झ?, देवीए बुत्तं-त्तेण मे पओयणं विसाहनंदिकुमारस्स रमणत्थंति, राइणा भणियं—देवि! मा कुण्णसु, मुंचसु असदज्झवसायं परिहरसु इत्थीजणसुलभं चावलं समिक्खेसु नियकुलक्कभं, किं तुमए दिट्ठो कोऽवि अम्हाणं कुले सुओ वा एगंमि पुण्फकरंड-गुज्जाणट्टिए पुंघिपि पविसमाणो?, ता कं पुंघपुरिसागयं ववत्थं चूरमि, सब्बाहा अणं किंपि पत्थेसु, देवीए भ-णियं—महाराय! गच्छ निययमंदिरं, उज्जाणलामाभावे केत्तियमेत्ता अणपयत्थपत्थणा? ।

रज्जेणं रट्ठेणं धणेण सयणेण बंधवजणेणं । ससरीरपालणेणवि न कज्जं किंपि मह एत्तो ॥ २९ ॥

जीवंतीविहु नरनाह! नाहमेयं तुहप्पसाएणं । जइ पुत्तं कीलंतं पेच्छामि तदाऽफलं जीयं ॥ ३० ॥

नरनाह! तुह समक्खंपि नेस पुज्जइ मणोरहो जइ मे । पच्छा दूरे सेसं भोयणभेत्तेऽवि संदेहो ॥ ३१ ॥

वज्जघडिओऽसि मन्ने जमेगपुत्तंपि परिभवदुहत्तं । दट्ठूण सुहं चिट्ठमि अहह महानिरणुतावोऽसि ॥ ३२ ॥

इय सलिलेहि व बहुविहवयणेहिं णरिदमाणसं तीए । तडमिव महानईए दुहाकयं नेहनिविडंपि ॥ ३३ ॥

रत्ता भणियं सुंदरि! मा संतप्पसु केसु करणिज्जं । अच्छउ सेसं दूरे जीयंपिह तुज्झ आयत्तं ॥ ३४ ॥

एवं बहुं संठक्खिण गओ नरिंदो अत्थाणमंडवंमि, आहूया मंतिणो, साहिओ तेसिं रहंमि समग्गो देवीको-

ववइयरो सकुलकमववत्था य, मंतीहिं भणियं-देव ! वीसत्था होइ, अम्हे गंतूण देविं यख्वेसो, अणुजाया य राइणा गया देवीए सगासं, भणिया य अणेणप्पगोरोहिं, न य कहं पि संबुज्झइ, तओ विलम्बवयणा सगागया राइणो सगासे, भणिउं पवत्ता य-देव ! निच्छयं देवी गाढजणियकोवा मरणं पि अम्भुवगमेज्जा, ता सवहा जहा तहा अणुणयणजोग्गा, रत्ता भणियं—भो किमेवं वाहरह ? किं तुब्भे न जाणह अम्ह कुलकमं ?—जमेगंभि यममाणे उज्जाणे अन्नो न पविसइ, वसंतमासपविट्ठो य मासगसो चिट्ठइत्ति, मंतीहिं भणियं—देव ! जाणेसो, केवलं दुद्धि-गहो इत्थीमहागहो, राइणा सविसायं भणियं—

एगत्तो मज्जाया पल्हत्थिज्जइ कुलकमपरूढा । अन्नत्तो मरइ पिया आवडियं संकळमियाणि ॥ ३५ ॥

संपज्जइ धुवमोण्ह अपत्तकालेऽविय विहियसेणं । दढनेहवंधवधुरंधवजणचित्तविच्छेओ ॥ ३६ ॥

महिलायत्तो राया जुत्ताजुत्तं न पेच्छए किंपि । इय अवजसो दिसासुं अखलियपसरो चिरं भमिही ॥ ३७ ॥

ता मंतिणो उवायं तमियाणि कुणह कं पि परिसुद्धं । जह सा जीवइ देवी सकुलवत्था य निघट्ठइ ॥ ३८ ॥

एवमायन्निऊण जं देवो आणवेइत्ति भणिऊण ठिया एगंते मंतिणो, सुनिउणवुट्ठोए य सम्मं निच्छिऊण कज्जत्तं साहियं नरिंदस्स, जहा-देव ! एयं पत्तकालं किल पंचंतराया देसमुस्सिखलो विह्वेइ य, एतदत्थसंवद्धा लेहारिया कीरंति, ते य तुम्हाण लेहे समण्येति, तत्थावधारणाणंतरं पयाणयं च दयाविजइ, तहा कए मुग्गइ सागं-

तवगो, कुमारोऽवि विन्नायवइयरो फुफ्फकरंडगुज्जाणं मोत्तण एइत्ति, एयं च उभयमवि सुपडिविहियं भवइ, एव-
मायन्निऊण अब्बुवगयं राइणा, उट्टिया मंतिणो, साहिओ देवीए एगंतट्टियाए एस वइयरो, सहरिसाए कयं तीए
भोयणं, पमुक्को कोवाडंबरो, बीयदिवसे य लिहियकवडलेहहत्था उडूलियजंथा गाढपरिस्समकिलंता उवट्टाविया
मंतीहिं अपुब्बपुरिसा, नीया य रायसमीवे, खित्ता तेहिं लेहा, वाइया सयमेव राइणा, विन्नाओ तदत्थो, कवडको-
वप्फडाडोवपुब्बं च भणिया नियपुरिसा—रेरे पुरिसा ! ताडेह सन्नाहभेरिं, नयरदूरे पइट्टह गुडुरं आयट्टह दिव्वा-
उहाइं समप्पह जयहत्थि जेण केरमि पत्थाणंति वुत्ते तहत्ति निवत्तियं पुरिसेहिं, इओ य भेरीसहसवणओ संयुद्ध
सामंतमंडलं पगुणीकया मयगलंतगंडत्थला कुंजरघडा, संबूढा सुहडसत्था, चउडिंसिपि पयट्टांइ तुरयघट्टांइ, मिलिया
सेणाहिवइणो, किं बहुणा ?—हलहलियं सयलं भूमंडलं, ठिओ पत्थाणंमि णरिंदो, एत्थंतरे अविन्नायपरमत्थो पत्था-
णट्टियमुवलब्भ नराहिवं निगओ पुफ्फकरंडगुज्जाणाओ विस्सभूइ कुमारो समागओ रायसमीवे निवडिओ चलणेणु
पुट्टो वइयरं, साहिउमारद्धो य नरिंदेण, जहा—वच्छ ! अत्थि पचंतसीमालो पुरिससीहो नाम मंडलाहिवो, सो य
पुब्बं पणयभावं आणावत्तित्तणं पडिवज्जिऊण य संपइ दरिसियतिव्ववियारो निहयसीमागामजणो अमह मंडलमइका-
मइ, ता पुत्त ! महंतो एस मे परिभवो । अविय—

सपियपियामहपमुहज्जियं महिं पेच्छिऊण हीरंति । कह सकलंकं जीयं निरत्थयं संपइ वहासो ? ॥ ३९ ॥

तवगो, कुमारोऽवि विन्नायवइयरो फुफ्फकरंडगुज्जाणं मोत्तण एइत्ति, एयं च उभयमवि सुपडिविहियं भवइ, एव-
मायन्निऊण अब्बुवगयं राइणा, उट्टिया मंतिणो, साहिओ देवीए एगंतट्टियाए एस वइयरो, सहरिसाए कयं तीए
भोयणं, पमुक्को कोवाडंबरो, बीयदिवसे य लिहियकवडलेहहत्था उडूलियजंथा गाढपरिस्समकिलंता उवट्टाविया
मंतीहिं अपुब्बपुरिसा, नीया य रायसमीवे, खित्ता तेहिं लेहा, वाइया सयमेव राइणा, विन्नाओ तदत्थो, कवडको-
वप्फडाडोवपुब्बं च भणिया नियपुरिसा—रेरे पुरिसा ! ताडेह सन्नाहभेरिं, नयरदूरे पइट्टह गुडुरं आयट्टह दिब्बा-
उहाइं समप्पह जयहत्थि जेण केरमि पत्थाणंति वुत्ते तहत्ति निवत्तियं पुरिसेहिं, इओ य भेरीसहसवणओ संयुद्ध
सामंतमंडलं पगुणीकया मयगलंतगंडत्थला कुंजरघडा, संबूढा सुहडसत्था, चउडिंसिपि पयट्टांइ तुरयघट्टांइ, मिलिया
सेणाहिवइणो, किं बहुणा ?—हलहलियं सयलं भूमंडलं, ठिओ पत्थाणंमि णरिंदो, एत्थंतरे अविन्नायपरमत्थो पत्था-
णट्टियमुवलब्भ नराहिवं निगओ पुफ्फकरंडगुज्जाणाओ विस्सभूइ कुमारो समागओ रायसमीवे निवडिओ चलणेणु
पुट्टो वइयरं, साहिउमारद्धो य नरिंदेण, जहा—वच्छ ! अत्थि पचंतसीमालो पुरिससीहो नाम मंडलाहिवो, सो य
पुब्बं पणयभावं आणावत्तित्तणं पडिवज्जिऊण य संपइ दरिसियतिव्ववियारो निहयसीमागामजणो अमह मंडलमइक्क-
मइ, ता पुत्त ! महंतो एस मे परिभवो । अविय—

सपियपियामहपमुहज्जियं महिं पेच्छिऊण हीरंति । कह सकलंकं जीयं निरत्थयं संपइ वहासो ? ॥ ३९ ॥

इय भणिण् गाढोवरोहेण दिण्णो आएसो राइणा कुमारस्स, पणामपुब्बयं पडिच्छिऊण दवावियं तेण पयाणयं,
चलियं चाउरंगं सेन्नं, कंहं चिय ?—

गंडत्थलपगलंतुगदाणधारंधयारियदियंता । चलकन्नतालवाडियमयंगंधायट्ठियदुरेहा ॥ ४६ ॥

अइधोरघोसगलगज्जिविहियखीरोयमहणसंकासा । उज्जलताराभरणा गयणाभोगव भांसता ॥ ४७ ॥

कयलीवणकयसोहा गेरुरसलत्तवियडकुंभयडा । जंगमया कुलसेलव पत्थिया हत्थिणो सिग्घं ॥ ४८ ॥

चलिया य पवणवेगा खरखुरसिहखणियखोणिणो तुरया । फेणुगिगरणमिसेणं जसं व कुमारस्स वियरंता ॥ ४९ ॥

करकलियकुंतकोदंडसेल्लमल्लयमुत्तिवखकरवाला । सन्नद्धवद्धकवया पयंडमुयंदडवलकलिया ॥ ५० ॥

नियसोंडीरिमवसओ रिउसेन्नं जरतणं व विगणिंता । सपहुप्पसायपरवसहियया जीएऽवि निरेवस्खा ॥ ५१ ॥

पइखणविमुक्कहक्कारपुक्कारुकरिसतुट्टसन्नाहा । गेहनियत्तियदइया चलिया दण्णुम्भडा सुहडा ॥ ५२ ॥

बडुविहमहरणभरिया रहनिवहा घणघणारवरउद्दा । सवपहेसु पयट्ठा पवणुडुयधयवडाडोवा ॥ ५३ ॥

इय चातुरंगसेन्नं नरवइवयणेण वड्हियाणंदं । मुणिदाणजायपुन्नं व कुमारपासं समल्लीणं ॥ ५४ ॥

तथो भंजंतो गिरिसिहरावद्धमहल्लभिल्लपल्लीओ निच्चच्छंतो जणवयविहवणवद्धलक्खं चरडपक्खं अवलोयंतो
नगनगरगामारामरमणीयं महीमंडलं पडिच्छंतो मग्गे सामंतसमप्पियं विविहालंकारकरितुरयपसुहं पाहुडं पत्तो

श्रीगुणचंद
महावीरच०
३ प्रस्तावः

॥ ३४ ॥

विज्झगिरिसमीपं, एगत्य निवेसिओ खंधावारो, तओ य पहाणवियत्थणपरियणानुगओ चलिओ कोउहतेण विज्झ-
गिरिभवलोहउं । अंतरे य—

उत्तंगमत्तकुंजरकुलाहं पेच्छइ जहिच्छचाराहं । रेवातडरुढमहद्धसहइकवलणपराइं ॥ ५५ ॥
निसुणइ पेम्मभरालसजुवईपरिकिन्नकिन्नरावद्धं । करकलियतालकलरवसंचलियं पंचमुग्गारं ॥ ५६ ॥

निज्झरक्षंकारवायणणघणघोससंकियमणाणं । तंढवमस्सिक्खियपंडियाण पेक्खइ सिंहलीणं ॥ ५७ ॥
तयणंतं च पुरओ पयट्ठो समाणो गायंतं व पवणगुजियसरेणं हसंतं व विप्पुुरियफारफुल्लिगुग्गारेहिं पणचं-
तं व समीरपसरियमहल्लजालाकलावेहिं विलुलियकेसपासं व गयणंमणलवमाणधूमपढटेण नियइ दारुणं दावानलं,
तं च अइलंघिऊण कमेण पहाणपुरिसं व तुंगायां सुवंसपडिन्नदं च, नरेसरं व वरयणकोसं जणाणुगयपायच्छायं च,
काऊरिसं व दुट्टसत्ताहिट्ठियं निट्ठुरसरूवं च, माहियाहियं व दुल्लंघणिजं पओहरोवसोहियं च, आरुढो विंझगिरिं ।
तओ चिरं काणणेसु निज्झरेसु विवरेसु दुरारेहसिहरेसु कयलीलीलाहरेसु देवोवभोगुब्भडगंधेसु सिलावट्टेसु निवि-
हमणोहरप्पेसु विहरिऊण परिस्संतो उवविट्ठो एगंमि माहवीलयाहरे । एत्थंतरे पट्ठियमेगण चारणेण—

विंझो साराणुगओ निच्चं चिय नम्मयाए परियरिओ । सारंगजणियसोहो गयकुलकलहो दयावासो ॥ १ ॥
उच्छूढसमाभारो विबुहपिओ मयणसुंदरसरीरो । एवंविहो तुमं पिव कुमार! किं अब्भहियमेत्थ? ॥ २ ॥ एयमा-

विन्ध्यो-
गमनं.

॥ ३३ ॥

यन्निऊण परितुडो कुमारो, भणियं च-अहो साहु सिलेससारं पढियमेएण, ता देह एयस्स दीणारलक्खंगं, जं देवो आणवेइत्ति भणिऊण पडिवन्नं भंडागारिण, खणंतरेण गओ नियआवासं । कयं पयाणयं, कमेण य पत्तो पंचत-
देसं, तहिं च पेच्छइ पमुइयपक्कीलियं गोमहिसिपुकरहरासहपउरं धणधणणसमिद्धं सुद्धगामागरनगरं नियजण-
जाणवयं, विम्हियजेण य आहूया विसयमहत्तरा सिट्ठिणो य, तंवलदाणाइवहुमाणपुरस्सरं पुच्छिया य लोयसु-
त्थासुत्थवत्तं, तेहिं भणियं-देव ! तुम्ह भुयंपंजरंतरनिलीणाणं अम्हाणं को सयन्नो मणसावि असुत्थयं काउं समीहेज्जा ?,
न हि जीवियसावेक्खो पंचाणणगंधकेसरकुरलं तोहेज्जा भुयगरायफणफलगमंणिं वा गिणहेज्जत्ति, केवलं गत्ति-
यमेव असुत्थं—

जमेत्थ दावियसुद्धायांरेहिं पणतरुणीगणेहिं, नयणचावपमुक्ककडक्खियमगणेहिं । दिसिदिसिनिहयपह-
णिवि पइदिणु पंथियहुं, हीरइ हियउं हयासहि पहि पेक्खंतियहिं ॥ १ ॥ विसयदोसहुसंचयकहणपरायणहं,
धम्ममग्गु देसंतह पइदिणु सुणिजणहं । भोगुवभोगु जहिच्छइ गिहिं निवसंतएहिं, अम्हेहिं करणु न लब्भहिं
भवभयसंकिरिहिं ॥ २ ॥

इय निसुणिऊण कुमरेण दरवियसियक्खोलं हसिऊण सुचिरं पसंसिऊण य तवयणविन्नासं दवावियतंबोला वि-
सज्जिया सिट्ठिणो विसयप्पहाणा य, तयणंतरं दूयवयेण भणाविओ पुरिससिंधो, जहा-कुमारो तुह दंसणुसुओ

वदृशति, एवमायन्निज्जुण य पुरिसांसिधनरवइणा कुमारस्स आणयणनिमित्तं पेसिया नियपहाणपुरिसा, तदणुरोहेण समागओ कुमारो, पेवेसिओ नगरंमि परमविभूइए पुरिससीहेण, काराविओ भोगणं, समण्णिया करितुरयसंदणा, उवणीयमण्णपि पभूयं दविणजायं, विन्नत्तो य भालतलघडियकरसंपुडेण तेण-कुमार ! गाढमणुगगहिओहि तुमए जं नियचरणकमलोहिं पविचीकयं मह भवणं, ता कइवयदिणाइं पडिवालेह एत्थेव, पुणोऽवि दुलहं तुम्हेहिं सह दंसणंति भणिए बुत्तो कुमारेण-भो नरिंद ! अपुवो तुह पेम्मपवंचसारो पियालावो अणणविणयववहारो अच्छेयभूया प-डिवत्ती मणसावि अचिंतणिज्जं सज्जणत्तणं, ता एरिस तुह गुणगणेण गाढमागरिसियं मम खणद्धेणवि चित्तं, जइ पुण कइवय वासराणि तुमए सिद्धिं वसामि नूणं न पहू परवसस्स नियचित्तस्स हवामि, सचं च इमं पढिज्जइ-“अत एव हि नेच्छन्ति, साधवः सत्समागमम् । यद्वियोगासिखूनस्य, मनसो नास्ति भैषजम् ॥ १ ॥” ताऽणुजाणेसि मं गमणाएत्ति बुत्ते दुस्सहतव्विओगसोगदमियमणोऽपुधरं हयगयरहसमगसामगीए अणुगच्छिऊण कुमारं वल्लिओ पुरिससीहो, कुमारोऽवि अक्खंडपयाणगेहिं चलिओ रायगिहनगराभिमुहं । इओ य विस्समंदिणा नरिंदेण सो निययुत्तो विसाहनंदी भणिओ-

वच्छ ! जहिच्छं वणलच्छिपेच्छणं कुण मयच्छिमज्झगओ । परिसंकं सक्कस्सवि अवहतो एत्थ उज्जाणे ॥ १ ॥
एवमायन्निज्जुण विसाहनंदी कुमारो वड्डियाणंदसदोहो पमुक्कनीससवावारंतरो अंतोउरसमेओ विचित्तकीलाहिं

उज्जाणे संठिओ कीलइत्ति । सो य विस्समूई अणवरयमागच्छतो संपत्तो रायगिहे, नियनियठाणे पेसियसामंतसे-
णावइपसुहपरियरो गाढाणुरागेण य चिरदंसणुकंठिओ पुष्पवाहेण पुष्पकरंडगुज्जाणे पविमिउमाढत्तो, भणिओ य
दुवारदेसट्ठिएण पडिहारेण—कुमार ! न जुत्तं तुम्ह एत्थ पविसिउं, जेण विसाहनंदी अंतउरसहिओ इह पविट्ठो
कीलइ, विस्समूइकुमारेण भणियं—भद्द ! कहया पविट्ठो ? तेण भणियं—तुम्ह गमणाणंतरमेव, एवमायन्निऊण समु-
प्पन्नतिव्वकोवभरारुणनयणो णिडालतलधडियभिउडिभासुरियवयणो तक्कालुच्छलियसेयविंदुजलजडिलियसरीरो कु-
मारो एवं चित्तिउमारद्धो—

पचंतकुद्धनरवइवइयरववएसओ धुवं पुंविं । उज्जाणाओ इमाओ नियबुद्धीए नीणिओ रत्ता ॥ १ ॥

जेण सयं चिय दिट्ठो सो देसो सुत्थगामपुरगोट्ठो । परचक्कचोरअभिमरभयरहिओ धणकणसमिद्धो ॥ २ ॥

ता नूनं नियपुत्तस्स कीलणट्ठं इमंमि उज्जाणे । अवजसपरिहरणत्थं कवडमिमं विरइयं सवं ॥ ३ ॥

बाढं अजुत्तमेयं आयरियं निच्छियं नरिदेण । न हि विस्सासपरवसहिययंमि जणे घडइ माया ॥ ४ ॥

एवं खणं निग्गभिऊण तेण समुप्पन्नसमहिगकोवाइरेण तज्जिया विसाहनंदिपुरिसा—रे रेदुरायारा ! मए अप-
रिच्चेऽवि उज्जाणे केण तुम्हे पवेसिया ? को वा तुम्ह पुरिसायारो ? कहं वा अविण्णायपरक्कमा एत्थ सच्छंदमभिरमह ?
मए निहयाणं कत्तो वा तुम्ह परित्ताणंति भणिऊण दुविसहाभिमाणपरव्वसयाए नियवलंदंसणत्थं पहाओ निट्ठसु-

द्विपहारेण फलभरणयसाहो पकिटो कविदृपायवो, तदभिघाण य कुलसेलताडियं व थरहरियं मेइणीवट्टं तुट्टं-
निविडबंघणाइं निवडियाइं सयलफलाइं दंसियाणि य विसाहनंदिपुरिसाणं, सगधं भणिथा य-रे रे गुरिसाहमा !
जह एयाणि पाडियाणि तहा पाडेमि तुम्ह मुंडाणि, अवणेमि दुव्णिणयसीलयं, विहाडेमि उज्जाणरभणकोज्जलं,
केवलं लजेमि तायस्स बीहेमि नियकुलकलंकस्स विचिकिच्छेमि लोयाववायस्सत्ति भणिऊण उवसंततिव्यकोहावेणो
सवेगमग्गमुवगओ एवं चित्तिउमाढत्तो-

विसयपरव्वसहियया हीलं किं किं जणा न पेच्छंति । कत्थ व न दुक्करोमिवि ववसाण् संपयट्ठंति ? ॥ १ ॥
को वा न आवयावत्तवट्ठिया तिक्खदुक्खारिंछोली । दंभोलिनिव्विससा अत्तक्किया निवडइ मिरंमि ॥ २ ॥
तुच्छोवि विबुहज्जानिंदियोऽवि को वा विसुक्कमज्जाओ । न करेज्जा दुव्विणयं विसयपसत्ताण सत्ताणं ॥ ३ ॥
विसयाणं पुण निव्विग्घकारणं निच्छयं मयच्छीओ । विहिणा पावेण विणिम्मियाउ नणु केण कज्जेणं ? ॥ ४ ॥
नूणं न दुग्गदुग्गइपडणदुहाइं कयावि सुमिणेऽवि । पेच्छेज्जा मणुयजणो जइ जुवइपरमुहो होज्जा ॥ ५ ॥
पासव्व करिवराणं हरिणाण व वागुरा विसमबंधो । पंजरमिव विहगाणं पईवकलियव्व सलभाणं ॥ ६ ॥
मीणाणं जालेपिव जणाण सेच्छापथारसुहियाणं । अहह विसमं महंतं महिलाजंतं कयं विहिणा ॥ ७ ॥
अविय-नवमालइपरिमलमंसलोवि नवसुरहिक्कुसुमवरगंधो । किं कुणइ तेमि जेसिं मणंमि नो वसइ हरिणच्छी ॥ ८ ॥

अइरेगुहीविषयम्महोऽवि निम्महियसयल्लोओऽवि । जुवईविरत्तचित्तं नो चालइ मलयपवणोऽवि ॥ ९ ॥
 सरयनिसायरकिरणुज्जलावि नो कोमुई मणांगं पि । दावेज्ज विचारं पंचवाणबलदलणधीराणं ॥ १० ॥
 जोव्वणतिमिरच्छाइयविवेयनयणो पुरा गिहे वसिओ । अहह कंहं दुट्ठमई निरत्थयं एत्तियं काळं ? ॥ ११ ॥
 अहवा किमइकंतत्थसोयणेणं निरत्थएणं मे । अज्जवि किंपि न नट्टं करेमि सद्धम्मकम्ममहं ॥ १२ ॥
 एवं च गरुथसंवेगावन्नमाणसो सव्वहा पवहुमाणविसयविरागो निच्छियसंसारसारत्तो गओ संसूसरिस्स पारो, जो
 य केरिसो ?—

अइपसत्थगुणरयणसायरो, तेयरासिना वइ दिवायरो । सोमयाए संपुन्नचंदओ, जो विसुद्धसुहवेल्लिकंदओ ॥ १॥
 मेरुसेलसिहरव्व निचलो, संघकज्जभरवहणपचलो । सुरनरिंदपणिवयसासणो, दुट्ठकामतमपडलणासणो ॥ २ ॥
 तवऽग्गिदहुपावओ विसुद्धभावभावओ, सया तिगुत्तिगुत्तओ पसत्थेलेसजुत्तओ ।
 पयंडंडवज्जिओ जिण्णिंदमगरंजिओ, पणहुमाणकोहओ विणीयमायमोहओ ॥ ३ ॥
 जणाण बोहकारओ कुतित्थिदप्पदारओ, अपुव्वकप्परुक्खओ पणहुसत्तुपक्खओ ।
 सुणिंदविंदवंदिओ असेसलोनंदिओ, अणेगल्लिन्नसंसओ पणहुसव्वदोसओ ॥ ४ ॥
 तस्स एवंविहस्स गुरुणो पलोयणेण समत्थतित्थंदसणपुयपावं पिवऽप्पाणं मणमाणो सच्चायेण पणभिज्ज

चरणकमलं उवविद्वो सन्निहियभूमिभागे, गुरुणाऽवि पारद्धा महमहणापूरियपंचयणसरवाणुकारिणा सरेण धम्मदे-
सणा । जहा—

संसाररुदरगे सहसूसेहिं व चित्तखेहिं । सो नत्थि किर पणसो जीवेहिं न नचियं जत्थ ॥ १ ॥
चउगइजलपडलालभयणवेऽणेगसो करेतेहिं । दुहिणहिं मज्जणुम्मज्जाणं कुम्मेहि व कहेपि ॥ २ ॥
आरियखेत्तुणत्ती नो पाविज्जइ पभूयकालेऽवि । तीएवि दु पत्ताए कहेचि कम्मकसओवसमा ॥ ३ ॥
धम्मत्थकामसाहणकारणमेगंतियं न मणुयत्तं । पावंति पावविहया समगणा विविहजोणीसु ॥ ४ ॥
लद्धेऽवि तत्थ जरकाससासकंहूपमोक्खदुक्खेहिं । निहयाण धम्मकम्मज्जमोऽवि दूरेण वंचज्जा ॥ ५ ॥
नीरोगत्ते पत्तेऽवि रुद्धारिद्विहुयसरीरा । उदरभरणत्थयाउलचित्ता वोलेति नियजीवं ॥ ६ ॥
इस्सरिएऽविदु वहुदविणवद्धारुक्खविहवावारा । लोभेण भोगणंपिदु काउं न तरेति वेलाए ॥ ७ ॥
संतोसेणवि मिच्छत्तंपकपसरेण मइलमइविमवा । सब्वणुमयं सम्मं भुयंति नेवाववुज्जंति ॥ ८ ॥
सब्वणुधम्मवोहे जाएऽवि दु कम्मपरिणइवसेणं । नीसेसगुणावासो गुरुवि न कहेपि संपडइ ॥ ९ ॥
लद्धेऽवि गुंमि समत्थवत्थुवित्थारपयडणपइवे । सिद्धिपुरपरमपयवी न पयदुइ तहवि विरइमइ ॥ १० ॥
तीएवि तिवखवहुदुक्खलक्खनिरिवेक्खकारणं पावो । पसरंतो न पमाओ खलितं तीरेइ वणकरिस्स ॥ ११ ॥

इय उत्तरोत्तरमहप्पवंधहेउप्पसाहणिज्जंमि । मोक्खसुहे धण्णणं केसिं पि मणो समुल्लसइ ॥ १२ ॥
 अन्नोसिं एवंहिसमगसाभगिसंभवेऽवि मई । उप्पज्जइ संसारियसुहेसु विरसावसाणेसु ॥ १३ ॥
 को वाऽविहु सल्लहेज्जा को वा नांयपि तेसिं गिण्हेज्जा । जे भोगामिसगिद्धा रंमंति इह सारमेयव ॥ १४ ॥
 अविय-जोव्वणपडलच्छाइयविवियनयणा मुणंति तरुणीण । केसेसुं कुडिलत्तं न उणो तासिं चिय मणंमि ॥ १५ ॥
 बहुहारावुद्दामं उब्भडनासं सुदीहरच्छं च । पवियंभियसत्तिलयं नियंति वयणं न उण नरयं ॥ १६ ॥
 परिणाहसालिवित्तं सि थि(थ)णेसुं न धम्मबुद्धिसु नियंति । पेहंति तणुयसुग्रं साणंदा न उण निथयाउं ॥ १७ ॥
 सुरमणुयगईपरिहं पि सुंदरं सुयजुयं पसंसंति । जंधोरुजुयं अइअसुइयं पि उवमिति रंभाए ॥ १८ ॥
 इय भो देवाणुप्पिय ! विप्पियहेउं पि जुवइजणदेहं । मणमोहणवम्महचुण्णपुण्णचिच्चा अभिलसंति ॥ १९ ॥
 तेच्चिय पमाणमवलंविज्जण भोगेसु को पयट्टेज्जा ? । कुपहपवण्णो किं होज्ज कोइ कुसलाणुसरणिज्जो ? ॥ २० ॥
 नवजोव्वणोऽवि निप्पडिसरूयकलिओऽवि लच्छिनिलओऽवि । पवरविलासीवि तुमं भद ! धुवं धम्मजोगोऽसि २१
 तेणेवंविहपवरोवएसरयणाइं तुज्झ दिजंति । न कयावि पुण्णरहिआ चिंतामणिलाभमरिहंति ॥ २२ ॥
 इय भणियंमि गुरूहिं समहिगलंजायधम्मपरिणामो । भत्तिभरनिब्भंगो कुमरो भणिउं समाढत्तो ॥ २३ ॥
 भयवं ! सव्वमसेसं कहियं तुमेहि सिवसुहकण्णं । ता समं पव्वज्जं निरवज्जं देहभह इण्हि ॥ २४ ॥

एवं च भणिए सो गुरुणा समुज्झियरयणाभरणो अंगीकयगुरुचरणसरणो सिद्धंतमणियविहाणेण गाहिओ जिणिंददिक्खं सिक्खविओ पइदिणं कायव्वकलावं जाणाविओ सिक्खमुहनिवंघणं संजमघणं पाढिओ सामाइयप-
मुहं सुत्तंति । इओ य कुमारपव्वज्जासवणवज्जासणिताडणुणणपरमसोगो अंतउरसमओ समं जुवराएण समागओ विस्सनंदी, सविणयं सूरिं वंदिऊण पणमिओ अणेण विस्समूहं साह, भणिओ य सोपालं सपणयं च एसो-पुत्त ! किं जुत्तमेयं पवरकुलुप्पन्नाणं तुम्हारिसाणं ? अनिवेइऊण नियवुत्तं जमेवविहं दुक्करं साहुकिरियं पडिक्खणोऽसि, ता वच्छ ! साहेसु को तुज्झ चित्तनिव्वेयहेऊ ? किं वा अह दूसणं पडिक्खणो ? केण वा तुम्ह वयणं पडिक्खलियं ? कि-
मेवं एक्कपएचिय अदक्खिणत्तणमब्भुवगओऽसि ? हवउ वा सेसजपणेण, तुमं विणा कत्तेय्याणिं अम्हे सकजं सा-
हिमो ? विसमावयानिवडियाणं को वा आलंबणं ? ता सब्वहा अज्जवि परिक्खयसु पव्वजं पडिक्खसु रजं कीलेसु जहिच्छं पुप्फकरंडगुज्जाणे मा पूरेसु सत्तुमणोरेह मा अणाहीकेरेसु बालकमालिणीवणं व सस्मिरीयं बहुजणं मा उवे-
क्खेसु पुव्वपुरिसरक्खियं नियजणवयं मा पडिक्खसु गाढगंठिनिट्टुरहिययत्तणंति ।

तो विस्समूहसुणिणा पसमपहाणं पयपियं एयं । भो सुंचह संतावं कुणह जहावंच्छियं कज्जं ॥ १ ॥
नो किंचिचि वयणिज्जं इहइत्थि सब्वेऽवि नियक्खजेसु । उज्जमह सेसचाणेण जेण लोगेऽवि पयडमिमं ॥ २ ॥
सयणाइसिणेहविमोहिएहिं कीरंति जाइं पावाइं । दुग्गइगयाण ताइं कडुयविवागं फलं देति ॥ ३ ॥

न य बहुमुवयरिओऽविह विहुरे थेवपि कुणइ साहारं । सयणज्जणो मोत्तणं एकं जिणदेसियं धम्मं ॥ ४ ॥
 इय भणिए नियदुच्चरियपेहणुप्पणगाढसंतावो । काऊण पायपडणं जहाऽङ्गं पडिगओ राया ॥ ५ ॥
 विस्सभूई सम्ममहिगयसाहुधम्मो गुरुचरणसुस्ससापरो दूरुज्झियसुहिसयणसंथवो जीवियमरणनिरिवेक्खो
 पंचिदियदित्तसत्तुविजयपरो बहुं कालं गुरुकुलं पज्जुवासेइ । अण्णया य सम्मं समहिगयसुत्तथो विसेसण विहियम-
 णपरिकम्मो जोगोत्ति कलिऊण गुरुणाऽणुण्णाओ समाणो एगल्लविहारित्तणं पडिवज्जिऊण लुट्ठमाइ निद्रुं तवो-
 कम्मं कुणमाणो सम्मं परीसहचमूं अहियासेज्जमाणो वीयरगोव्व गामनगरगराइसु अभमाएंतो पइक्खणं वीराम-
 णुकुड्यासणाइं कुणमाणो पइदिणं सूराभिमुहं आयावित्तो नियजीवियब्भहियं पाणिगणं रक्खित्तो वायालीसदो-
 सविमुद्धविरसाहारहणेण संजमसरीरमणुपालेतो गामाणुगामं विहरेतो समागओ सुरिंदपुरिविब्भमाए महुराए नय-
 रीए, ठिओ थिपसुपंडगविवज्जिए उक्किट्तवनिरयमुणिजणसंगए एंगंतदेसे, तहिं च निवसंतो एगया परमसंवेग-
 गयमाणसो नियजीवियनियमणत्थं चिंतिउमारद्धो । जहा—

एसोऽभिकंखइ सुहाइं जिओ दुहाइं, दूरेण मोत्तुमभिवंछइ तुच्छबुद्धी ।
 एवं न जाणइ जहा न कहिंपि धम्मसंवंधसिद्धिविरहेण भवंति ताइं ॥ १ ॥
 भोगे समीहइ करेइ रइं कहासु, देसित्थिपत्थिवसुभोयणसंगयासु ।

सीउण्हदंसमसगाइ परीसहे य, सम्मं तितिक्खइ न मूढमई पमाया ॥ २ ॥

सत्तू वरं निसियधारकरालकलकंतिच्छडालकरवालकरो सुखुद्धो ।

घायथमुज्जयमई वरमुग्गभोगभोगीसरो छसिउमुहुमरो रुणच्छो ॥ ३ ॥

उड्ढमारुयपईवियदीहजालामालाउलो य जलणो वरसंगलगो ।

नीसेसदोसनिलओ न खणंपि नूणं, जुत्तो न गंतुमहमो हि इमो पमाओ ॥ ४ ॥

एए हि सत्तुपमुहा मणुयाण दित्ति, तिव्वावि एग्गभवगोयसव भज्जु ।

एसो पईभवमुदुस्सहतिकखदुक्खलक्खक्खणी तदहिगं परियज्जणिज्जो ॥ ५ ॥

वज्जणमेयस्स पुणो आहारचागओ घडइ सम्मं । ता सव्वहव जुत्तं भम काउ उग्गतवचरणं ॥ ६ ॥

इइ संपहारिऊण य समारद्धं तेण मासखमणं, कओ विसेसेसुज्जभो समाढत्तो पइदिणं शाणण्यवंधो निरुद्धो मणप्पसरो, एवं च कमेण पडिपुण्णे मासक्खमणे पडिलेहियंढोवगरणो अतुरियं अचवळं जुगमेत्तनिहित्तचक्खुपसरो सुत्तत्थपोरिसिपज्जंतकाले चलिओ भिक्खानिभित्तं उचावयगिहेसु गोयरचरियाए, परिभममाणो उग्गमउप्पायणादोसे सम्मं निरुवेमाणो लामालाभेसुवि अरत्तदुद्धो पगिटुतवाणुद्वाणकरिसियसरीरत्तणेण य तणंपिव पवणेणावि पकंपमाणो परिसोसियमंससोणियत्तणेण य पयडसिराजालावणद्धउट्ठिंपजरो धवलपाडिवयमयलळणो इव कलावसेसो तं रायम-

गमोगाढो जत्थ सो विसाहनंदीकुमारो पिउच्छाए रण्णो अगमहिंसीए धूयापरिणयणत्थं पुब्बमावासिओ चिट्ठइत्ति ।
 अहं तं सुणिं दट्ठण जायपच्चभिण्णाणेहिं पुरिसेहिं भणिओ विसाहनंदी कुमारो, जहा-सामी ! मुणह तुम्हे एवं पवइ-
 यगं ? , सो भणइ-सम्मं न जाणामि, तेहिं भणियं-कुमार ! एसो सो विस्सभूई कुमारो जो पुंघिं पवइओ, तं लक्खिऊण
 जाओ तस्स पुब्बामरिसेण कोवोत्ति, एत्थंतरे सो तवस्सी तंमि पएसे वच्चमाणो इरियासमिइवक्खित्तचित्तत्तणेण अत-
 क्रियमेव पणोल्लिओ अहिणवपसूयाए गावीए, पडिओ य निसट्ठो धरणीए, ताहे तस्मिं विसाहनंदिपमुहुपुरिसेहिं दट्ठण
 तं तहानिवडियं संजायगाढहरिसेहिं कओ सिंहनाओ अण्णोडिया तिवइ दिन्नाओ तालाओ पारद्धो कलयलो, भ-
 णियं च महया सहेण-भो भो कत्थ गयं तमियाणिं कविट्ठफलपाडणवलं जेण गोमेत्तेण विनिवाडिओऽसि ? , इमं च
 निसामिऊण वलियंकंधरो विस्सभूई जाव विण्णारियलोयणो अमरिसेण पलोएइ ताव दिट्ठा विसाहनंदिमुपहा पच्च-
 भिण्णाया य, तयणंतरं च पलीणो से उवसपपरिणामो ववगओ विवेओ समुच्छलिओ महाक्रोवो समुल्लसियं वीरियं,
 धाविऊण य सा गहिया सिंगेसु गावी पडाइयच्च भमाडिया सीसोवरिं पक्खित्ताय धरणीए, अणिया य ते, जहा-रे रे
 दुरायारा ! दुरुम्मुकुपरक्कमा हीणा सन्वसो य विरहिया मं उवहसह, न मुणह जहा दुच्चलस्सट्ठवि पंचाणणस्स सिगा-
 लसहस्सेहिवि न लंघिज्जइ परक्को, सुलुहुयस्सवि विहंगरायस्स न तीरइ सोढुं भुयंगमेहिं चट्ठलचंचुप्पहारो, तहा-
 जइचिहु निट्ठुरतवक्कम्मकिसियकाओ वियाणिओऽहमिह । तहवि न रे ! तुम्हाणं लक्खेणवि अत्थि मम गणणा ॥ १ ॥

रे पिसियपोसिया विउसदूसिया किं परेण भणिण्ण? । अच्छिपडियावि तुम्हे न कुणह मे किंपि परियावं ॥ २ ॥
निब्भच्छिज्जण एवं साहिकखेवं सुत्तिकखयणेहिं । गंतूण य नियठाणं साहू चित्तमादत्तो ॥ ३ ॥
अज्जवि न मणांगंपिवि पुद्वाणुसयं चयंति मइ एए । पव्वल्लोवगयंमिवि निक्कारणवइरिणो पाया ॥ ४ ॥
अहवा एयाणं वालिसाणं किं एत्थ दूसणं? जेण । पुद्वायरियाण मुहामुद्वाण एसो दसावागो ॥ ५ ॥
ता तह केरमि संपइ परभवपत्तो जहा य सुमिणेवि । एवंविहअवमाणट्ठाणं नो कर्हिपि पेंच्छामि ॥ ६ ॥
इय कयसंकप्पो सो अविभावियसमयसत्थपरमत्थो । अविचिंतिउत्तरोत्तरसंसारवडणदुहुनिवत्तो ॥ ७ ॥
भत्तं पच्चक्खाउं नियानबंधं च काउमुजुत्तो । पच्चासण्णमुणीणवि समक्खमेवं पजंपेइ ॥ ८ ॥
जइ ताव ममं दुक्कतवस्स छट्ठमाइरूवस्स । सज्झायझाणसहिथस्सिमस्स सव्वायरकयस्स ॥ ९ ॥
वायालीसेसणदोसरहियसुहुंछुभोयणस्सऽविय । सुत्तत्थतत्तचित्तण[पर]गुरुजणविणयाणुचरणस्स ॥ १० ॥
पंचमहव्वयधरणस्स वावि फलमउलमत्थि नणु किंपि । अतुलियबलकल्लोऽहं ता होज्जा अणजम्ममि ॥ ११ ॥
एवं च नियमिज्जणं ठिओ सुद्धसिलायले, निसामियनियानबंधा य समागया इयरसमीववत्तिणो तवस्सिणो,
भणिओ य सबहुमाणं तेहिं-भो महाणुभाव! सयंचिय सुणियजुत्ताजुत्तस्स नत्थि जइवि तुह किंपि कहणिजं त-
हावि एवं निवेइज्जइ-जेण न लेहकीलियानिमित्तेण कोऽवि कुणइ देवउलपलीवणं, न वा कोडिप्पमाणयणरा-

सिणा किणिज्जइ कागिणी नेव य गोसीसचंदणागरुपमुहसारदारूणि दहिऊण कीरंति इंगाला, न य एवंविहविहिलं-
कसुचिरचरियविविहतवेहिं किंपागफलं पिव पज्जंतदारुणो काउं जुज्जइ नियाणवंधो, अणणं च—

किं पवणगुंजिएहिं कंपिज्जइ मंदरो रउदेहिं । दुज्जणवयणेहिं मणो किं वा पक्खुहइ साहूणं ? ॥ १ ॥

चिरकालुब्बूढं किं मज्जायमइक्कसंति जलनिहिणो । हरिणंकदिणयरा किं तिभिरप्पसरेहिं रुज्झंति ॥ २ ॥

निम्मलगुणरयणमहानिहाण ! तुम्हारिसावि सप्पुरिसा । ववसंति एरिसं जइ धम्मसिरी ता कमल्लियउ ? ॥ ३ ॥

कत्थ ववच्चउ विणओ ? वोढुं को वा खमो खममियाणिं ? । भग्गनिवासो गच्छउ कत्थ वराओ विवेओऽवि ? ॥ ४ ॥

एमाइविविहवयणेहिं भासिओ जा न देइ पडिवयणं । नियनियठाणेसु गया ताव सुणिंदा निराणंदा ॥ ५ ॥

विस्समूइवि अविचलियणियाणवंधज्झवसाओ अणालोइयपडिक्कतो कालमासे कालं किंचा उक्कोसट्ठितीओ
महासुक्के देवलोगे देवो समुप्पण्णो, तत्तो उच्चट्ठित्ता जहा वासुदेवो होही जहा य से पिया पयावइत्ति भविही तदा
एत्तो कहिज्जइ ।

इहेव जंबुदीवे दीवे भारहे वासे पोयणपुरंमि नयरे जहत्थाभिहाणो रिउपडिसत्तू नाम राया, तस्स य सयल
अंतेउरपहाणा भद्दा नाम अग्गमहिसी, तीसे चउमहासुमिणपिसुणियावयारो अयलो नाम पुत्तो, अवंतमहावलो
विस्सुओ य, एगया य तीसे देवीए पाउब्भूओ गब्भो, जाया य कालेण सव्वलक्खणपडिपुण्णसरीरा कण्णगा,

कयं च उचियसमए मिगावइत्ति से नामं, कमेण य निरुवमारुद्धजोव्वणगुणा एवं सोहिउं पवत्ता—
कसिणसुसिणिद्धकुंचिरचिहुरचओ तीए उत्तमंगमि । वयणंदुविच्चमागयविट्ठसोहं समुव्वहइ ॥ १ ॥
भालतलेऽवि लुलंती अतिकुडिला चिहुरवल्ली तीसे । रेहइ वम्महरणो विजयपसत्थिव्व आलिहिया ॥ २ ॥
सरलेहिं लोयणेहिं तीए कयोलेहिं चंदकंतेहिं । अहरेण पउमराणेण रयणट्टाणं व सहइ सुहं ॥ ३ ॥
संखो इव रेहावल्लयलंछियं कंठकंदलं विमलं । संठियविचित्तमणिहट्ठगंठियं सोहए तीए ॥ ४ ॥
कंदप्पनरिंदनिवासविच्चमे तीए थोरथणवट्ठे । हारो पडिहारतुलं आलंवइ लंघमाणो सो ॥ ५ ॥
रंभाभिरामपीवरमूरुजुयं कणयकमलकंतिळं । थंभजुयलं व छज्जइ विसयमहासोक्खभयणस्स ॥ ६ ॥
बहलालत्तयरसपिंजरं व मणिकुट्टिममि संकतं । कमलोवहारसोहं चलणजुयं दावाए तीसे ॥ ७ ॥

एवंविहा य वरजोगत्तिकाज्ज सा सव्वालंकारविभूसियसरीरा भद्दाए पेसिया पिउणो पायवंदणत्थं, गया
चेडीचक्कवालपरिवुडा निवडिया नरिंदचलणेसु पेच्छिया संभमभरियच्छिणा सव्वायरं रण्णा पणयालावपुरस्सरं च
आरोविज्जण तमुच्छंगे रूवेण जोव्वणगुणेण य बाढमक्खित्तचित्तो विचिंतिउमाढत्तो—अहो सुरसुंदरीरूवाइसयपराभव-
करं रूवं अहो सव्वावयवमुंदरं लायणं अहो सरयचंदचदिमानिम्मलं कंतिपडलं, अहो वेणुवीणाविजइणी वाणी,
सव्वहा भुयणच्छेरयभूथमिमीए किंपि विलसियं, नूणं पुंवं एरिसं न निम्मियं खत्तियकुले कन्नगारयणं परमेसरेण

विहिणा, तेणं चिय मयरद्धएण परिगहिया रई तिसूलपाणिणाऽवि परिणीया पव्वयसुथा महुमहेणवि मंइरुमहिय-
 खीरजलहिसमुद्धिया जलमाणसी पणइणी कया पुरंदरेणावि पुलोममुणिकन्नया उच्चूढत्ति, अहो अहं वगो सज्झं
 जस्स अंतउरे रयणायरेव्व एरिसं कण्णगारयणं समुप्पण्णंति ।

अह कोमलुच्छुचावोऽवि वम्महो पंचकुसुम विसिहोऽवि । वज्झयणुलोहनिट्टुरसहस्सवाणो व विष्कुरिओ ॥ १ ॥
 जत्तो जत्तो सा ववलयरुहले लोयणे परिक्खवइ । तत्तो तत्तो सोऽविहु निसियं सरधोरणिं सुयइ ॥ २ ॥

अत्थाणजणोऽविहु वम्महेण संताविओ हु पासेण । रिउपडिसत्तू राया तदेगचित्तो विसेसेण ॥ ३ ॥

एवं च मयणसरण्णहारविहुरियमाणसो सो नरिंदो परिमाविउं पवत्तो—अहो एसा इयाणिं वरजोग्गा नइइ
 ता किं कायव्वं ? किमेरिसरूवाइसया कण्णगा परस्स दाऊण सगिहाओ निस्सारिज्जइ ?, सव्वहा न जुत्त-
 मेयं, जइविहु जणो अविसेसेण कण्णगणं अण्णप्पयाणेण पउत्तो तहावि गडुरिकापवाहो एसो नालंवनट्ठाणं सुउ-
 द्दीणंति कयनिच्छओ अणवेक्खिउं गरुयमाचंदकालियं लोयाववायं अविमंसिऊण चिरप्परूढं नायमग्गमभिगहि-
 ऊण मयणवेयणं अप्पणा चेव तं परिणेतकामो कहकहवि आगारसंवरं काऊण धूयमंतैउरं विसेजेइ, वीगदिधेइ
 वाहराविऊण सेट्ठिसत्थवाहपमुहं नयरमहाजणं सामंतसेणावइवग्गं च सुहासणत्थं सबहुमाणं गणइ—भो भो
 पहाणलोया ! तुम्हे कुलव्वत्थाणं जुत्ताजुत्ताणं नयाणं संसयत्थाणं लोयधामववहाराणं पस्सगा निच्छमकारागा व,

अम्हाणंपि सब्बत्थेसु पुरावि पुच्छणिज्जा, ता संपयं साहेहजमेत्थ विसण्ण रयणमुणज्जइ तस्स को रामी ? अविण्णा-
यपरमत्थेहिं तेहिं भणियं—देव ! किमेत्थ पुच्छणिज्जं ? तुम्हेच्चिय सामिणोच्चियुत्ते तिकियुत्ते पयमेव ययणं भणवि-
रूण नरवइणा उवट्ठाविया साऽवि य कन्नया, भणिया य ते—अहो धूया एता मम अंतरे रयणभूया पालभूया
अओ तुम्हाणुण्णाओ अहमेयं सयं परिणेतं वंछामि, अणइक्कमणिज्जं सु तुम्ह वयणं अट्ठापंति, एवं भणिण्ण लब्धव-
सवलंतकंधरा अवरोप्परसुहमवल्लयमाणा ओहयमणसंकप्पा अपरिभाविधवयणविसहस्राणवित्थीळा भया विविधित्ता-
णेसु पुरजणपगुदस्सा, सा कण्णया अवरवासरे चारिज्जमाणेणअधि भद्दाण्ण देवीण्ण भडिभल्लिअसावणंअनिं कुल्लअत्तरण्णि-
उवहसिज्जमाणेणअनि नम्मसच्चिवेहिं सोवालंभं चज्जिज्जमाणेणनि गंतीहिं दुहविवाअणुसाराणिअभागेवनि वससमुच्चिं य-
णुसरियाविंझेण करेणुवइ(ण)व्व अणिचारियपसरेण गंधववियाहेण परिणीया सा चारिंदव्व, दुनिव्व अणसत्तिगीण, तीसे
सद्धिं विसयसुहमणुमुंजइत्ति । सा य भद्दा देवी दट्ठूण तारिसं जणनिंदणिज्जं उययल्लेययिण्णं निरुचउववचरेसु जणाह-
सणिज्जं रण्णो वइयरं संजायगाढचित्तसंतावा अयलेण पुत्तेण सयं महया रिद्धिपित्थेणं पट्ठाअणमसेवा मया इनिव्व-
णावहं, तत्थ य पसत्थभूमिभागे निवेसिया नयरी निम्मियाइं धवलहराइं उवियाइं सुरागाराइं कारावियाइं पाया-
रगोउराइंति, सा य पुरी मंहतीए ईसरीए कारियति माहेसरिच्चि गुणनिष्कण्णनारेण देसंतरेसु परित्तिं गमा ।
तत्थ य अयलो कुमारो भद्दादेविं मोत्तूण पिउपासमागओ, एवं च काले वचंतंमि लोकेणं तस्स राइणो सअया-

क्रामित्तेणे पयावइत्ति नासं कयं । अण्णया य सो विस्समूहं महासुक्खेवल्लोकाओ चविऊण उव्वण्णो गिगावइत्ति
 देवीए गब्भंमि पुत्ताए, तओ सा रयणंमि सुहपसुत्ता सत्त महासुमिणे पासित्ता णं पडिबुद्धा, पहिद्वहियया य गया
 रण्णो सगासे, निवेइओ सुविणवुत्ततो, रत्ता भणियं-देवि ! निच्छियं भुवणविक्षायजसो सयलसामंतमउलिंउल
 मसिणियकमकमलो पयावपडिहयपडिवक्खो कुलकेऊ तुह पुत्तो भविस्सइ । जेण-

एवंविह सुमिणाइं देवि ! पुण्णेहिं कहवि दीसंति । हरिसभरनिम्भरंगी अभिनंदसु ता तुममिमाइं ॥ १ ॥

इइ जंपिऊण रण्णा वाहरिया सुमिणपाढगा कुसला । ते य नरिंदाएसं तहत्ति पडिवज्जिउं सहसा ॥ २ ॥

ण्हाया कयवलिकम्मा परिहियसुविमुद्धुसुंदरदुगुद्धा । सिरनिहियक्खयकुसुमा निडालकयरोयणातिलया ॥ ३ ॥

करकलियनिमित्तागमपोत्थयसत्था समत्थनयनिउणा । पजायागयविज्जा समागया झत्ति निवभवणं ॥ ४ ॥

सीहासणेसु सव्वायेरेण उव्वेसिया नरिंदेणं । फलफुल्लदाणपुव्वं सुमिणत्थं पुच्छिया ताहे ॥ ५ ॥

तेहि य निमित्तसत्थाइं वित्थरेणं सबुद्धिविवेणं । परिचित्तिऊण तह निच्छयं च काऊण अण्णोऽण्णं ॥ ६ ॥

भणिओ पयावइनिवो जहेरिसाणं विसिट्ठसुमिणाणं । अणुभावेणं नूणं पयडो नीसेसमुवणंमि ॥ ७ ॥

तिक्खंडभरहसामी अप्पडिहयसासणो य तुह पुत्तो । होही अप्पडिमवलो इह पढमो वायुदेवोत्ति ॥ ८ ॥

आयन्निऊण एवं पहिद्वचित्तेण ते नरिंदेण । दाऊण धणं विविहं विसज्जिया नियनियगिहेसु ॥ ९ ॥

सा य भिगावई देवी पुणोऽवि नरदिण कहिए सुमिणपाढगसिट्ठे सुमिणट्ठे पहिद्विहियया सुहेसुहेणं गळभसुवहइ,
अणण्या य पडिपुण्णांमि समए पसत्थंमि वासरे सुकुमारयाडलपाणिपडव तमालदलसापलमरीरं सयलपुसिसणवरल-
कखणचिराइयं तिपिट्ठकरंडगाडंवाभिराभं दारयं पसूया । विण्णायमुअजम्भो पहिट्ठो पयावई, कराविओ सुरमं-
दिरिसु महसवो, तथा—

दिजंतऽनिवारियकणयदाननंदिजमाणमग्गणयं । पम्मुक्कपुप्फपुजोवयाररेहंतरायपहं ॥ १ ॥
मंगलकलयलमुहुलुम्मिलंतमहिलाजणाभिरमणिज्जं । पारद्धसंतिकम्मं जायं नयरं च तं सहस्रा ॥ २ ॥
अवरवासरे य तस्स दारयस्स परमविभूइए तिपिट्ठकरंडगदंसणनिच्छियाभिहाणीपण्ण पद्विंशं तिविदुत्ति
नामं कुलथेरीजणेणं, अह सो तिविदू पंचघाईपरिविखत्तो महारयणं व हत्थाओ हत्थं संचरसो अणेगचेडचाहुकर-
परिगओ कुमारभावमणुप्पत्तो,

ताहे पिडणा जोगोत्ति जाणिउं सोहणे तिहिमुत्ते । उवणीओ सो विहिणा लेहायरियस्स पढणत्थं ॥ १ ॥
सयलो कलाकलावो अकालखेवेण गुरुसयासाओ । नियबुद्धिपरिसेणं सविसेसो तेण गहिओत्ति ॥ २ ॥
अह सुणिअसव्वनायव्ववित्थरो गुरुपए पणमिऊण । तदणुण्णाओ कुमरो गओ सगेहंमि परितुट्ठो ॥ ३ ॥
अयलेण भाडणा सह खणमविय विओगमसहमाणो सो । पवरुज्जाणाईसुं निस्संको कीलइ जहिच्छं ॥ ४ ॥

कोमलकायस्सवि तस्स भुयवलं पेक्खिऊण जायभया । पमिलाणवयणकमला सहस्समल्लवि कंयंति ॥ ५ ॥

लीलाएविहु पयंपकयाइं सो जत्थ जत्थ भेल्लइ । वज्जाहयन्व धरणी तहिं तहिं थरहरइ वाढं ॥ ६ ॥

परिहासेणवि जे तेण पाडिया कहवि सुट्ठिघाएणं । ते नूणं जइ परगेहिणीए पुत्तेहिं जीवंति ॥ ७ ॥

खिवइ य जत्तो दिट्ठि तत्तो चिय सायरं विणयपणया । अहमहमिगाए धावंति किंकरा सुक्कवावारा ॥ ८ ॥

जस्साएसं वियरइ थेवंपि अणायरेणडवि कुमारो । सो लद्धनिहाणो इव मन्नइ कयकिचमप्पाणं ॥ ९ ॥

सो भणइ जत्थ ठाणे तत्थ समप्पंति सेसवावारा । तस्सेव परक्कमवणणेण लोयस्स पुणरुत्तं ॥ १० ॥

इय पुच्चभवज्जियसुकयकम्मवसवट्टमाणसोक्खस्स । अयलसमेयस्स सरंति वासरा अह तिविट्ठुस्स ॥ ११ ॥

इओ य-रायणिहे नयरे भारहद्धवमुंधराहिवमणिमउडकोडिलीढपायवीढो पयलकालमांधंडमंडलुहुामरपयाचकंतिदि-

सिचक्को निधिसंकभुयदंडमंडवनिलीणरायलच्छिविलाससुंदरो समरसीमनिहयमत्तमांयंगकुंभत्थलगलियगुत्ताहलविरइ-

यचउक्को महागोपुरपरिहसन्निहबाहुवद्धवीरवलओ निसियधारुक्कडचकनिकंतियवइरिगीवो आसगीवो नाग राया

पडिवासुदेवो पवरं पंचप्पयारमणिज्जं विसयसिरिमणुहवइ । एवं च बोलंतंमि काले सो विसाहंगंदी कुमारो भिरं

रज्जमणुपालिऊण मओ समाणो नरयतिरिएसु भमिऊण उववण्णो एगंमि गिरिकंदरे सिंहत्तणेणं, पसुक्कवालधवो

य इओ तओ हिंडंतो उवहवेइ तस्स रण्णो पहाणसालिल्लेत्तनिवासिकरिसगज्जे, ते य तेण उवइविज्जमणा आ-

सुतत्र चित्तलिहियच्च लेवघडियच्च रज्जनद्धव्व । मइरामयनिण्फंदियव्व विमुक्कड्ढवावारा ॥ ५ ॥

अणमिसनयणनिवेसा जणपरिसा तक्खणेण सा जाया । अइतुट्ठ तिविट्ठुकुमार रायलोएण सह झत्ति ॥ ६ ॥

एत्थंतरे खीरोयनिम्महणज्जंतुट्ठियविसुगारोव कंप्पियविबुहसत्थो कयंतोव्व अणिवारियागमणो पविट्ठो सो चंड-
वेगाहिहाणो दूओ, तं च दट्ठण ससभमसुट्ठिया, सामिदूओत्ति कलिज्ज कया महती पडिवत्ती, पुट्ठो य आसग्गीव-
नरिंदस्स सरीरारोगवत्तं, सिरसा पडिच्छियं सासणं, संवरियपेच्छणगवावारो नियनियगेहेसु गओ जणो, रंगमंग-
करणेण य बाढं अमरिसिओ तिविट्ठुकुमारो, पुच्छिओ अणेण एगो पुरिसो-अरे ! को एस ? किं वा एयागमणेण अब्भु-
ट्ठिओ ताओ ? कहं वा पविसमाणो दुवारेच्चिय न रुद्धो पडिहारेण ? तेण भणियं-कुमार ! एसो खु रायाहिरायस्स पहा-
णदूओ, अओ सामिच्च दट्ठवोत्ति राइणा अब्भुट्ठिओ, अओच्चिय पडिहारेणवि न खलिओ, एयाणुवित्तीए चेव सुहेणेत्थ
निवसिज्जइ, पमुचिच्चाणुवत्तित्तणं हि सेवगधम्मो, कुमारेण भणियं-जाणियव्वं कोऽवि कस्सवि पसू सेवगो वा, होउ
ताव किं एएण ? अनिवडियपुरिसायाणं विफलो अनुकरिसो निरत्थओ तुंडमंडवो अणुचिओ मुयवलावलो अजुत्तो
नेवत्थफडाडोवो, ता एयं एत्थ पत्तकालं-अरे ! साहेजसु तुमं मम जया एसो सनयराभिमुहं वच्चेज्ज, जेण करेमि
एयस्स पाहुन्नयं, जं कुमारो आणावेइत्तिभणिज्जण अब्भुवगयं पुरिसेण, सो य दूओ गुणदोसे राइणा समं भासिज्ज
साहियनरिंदपओयणो परिगहियविविहपाहुडो कयसक्कारसम्माणो चलिओ सनयराभिमुहं, अंतरा य गच्छतो

विन्नायगमणवइयेणं पडिरुद्धो तिविहुकुमारेण अयलपरिगएणं, भणिओ य—

रे इयाहम ! अइदुट्ठ धिट्ठ पाविट्ठ कत्थ वच्चिहिसि । पेळ्ळणयरंगमंगं तइया काउं मम समक्खं ? ॥ १ ॥
निब्भग्ग ! गरुयराउलसेवणओऽविहु पभूयकोलेणं । पत्थावापत्थावं न मुणसि किं सिक्खिओ तंसि ? ॥ २ ॥
नियज्जण ! वयणविन्नासपसुहगुणवित्थरेण उवहससि । सक्कगुरुरेपि विदूकुह अन्नेव वियट्ठिमा तुज्झ ? ॥ ३ ॥
ता पाव ! पावसु फलं सदुड्ढचेट्ठियतरुस्स दुविसहं । सुमरेसु य इट्ठदेवं माऽक्यधम्मो धुवं मरसु ॥ ४ ॥
इय भणिज्जण तिविदू निदुहसुट्ठिप्पहारमुगिरिउं । जा हणइ नेव दूयं अयलेणं जंपियं ताव ॥ ५ ॥
भो भो कुमार ! विरमसु गोहचंपिव विमुंच एयवहं । दूया रंडा भंडा कयावराहावि अहणणिज्जा ॥ ६ ॥
तोहे भणिया पुरिसा ! रे रे सिग्गं इमस्स पावस्स । मोत्तूण जीवियव्वं सेसं अवहरह वत्थाइं ॥ ७ ॥
पुरिसेहिं तओ कुमारस्स वयणओ लट्ठिसुट्ठिपभिइहिं । गहिज्जण तं समत्थं धणाइयं अवहंडं तस्स ॥ ८ ॥
भयभरविदुहत्तणओ नियंसियं वत्थमविय से गलियं । भूमीए निवडणेणं धूलीए धूसरियमंगं ॥ ९ ॥
अह खमणगोव मुणिउव्व पंडरंगोव्व तक्खणं जाओ । सो चंडवेगदूओ नियजीवियरक्खणट्ठाए ॥ १० ॥
सेसो पुण परिवारो जीवियकंखी य पहरणे मोत्तुं । सयलदिसासु पलाणो दंसणमेत्तेऽवि कुमारस्स ॥ ११ ॥
एवं च लुंचविलुंचियं काउं दूयं वलिया कुमार, जाणिआ य वत्ता पयावइणा, तओ भीउविग्गो चित्तिउमाट्ठो—

अहो असोहणं कथं कुमारोहिं, एयंमि पडिक्कल्लिए परमत्थेण आसग्गीवो पडिक्कलिओ, अजहावलमारंभो मूलं विणा-
सस्स, न य कुमारवरद्धे मम निदोसत्तणं वयणसएणवि कोऽवि पडिवज्जिही, पडिवज्जिएवि पयडो खलु एस वव-
हारो जं भिच्चराहे सामिणो दंडो, ता विसममावडियं, अहवा अलं चित्तिएण, उवाओ चेव उवेयस्स साहगोत्ति-
निच्छिऊण आणाविओ दूओ, सविसेसं कथा पडिवत्ती, समप्पियाइं महासोछाइं पाहुडाइं, कओ य चउग्गुणो
दाणक्खेवो, भणिओ य एसो-अहो महायस! बालभावसुलभनिविदेयत्तणेण जोव्वणवसविसंदुलचिट्ठियत्तणेण राय-
कुलजम्मसहयदुल्लियत्तणेण य जइवि बाढं अवरद्धं कुमारोहिं तुम्ह तहावि सव्वाहा न कायवो चित्तसंतावो, न वो-
दवो अमरिसो, मम निव्विसेसोऽसि तुमं, डिंभदुन्विलसियाणि न करेति चित्तपीडं कहवि जणगत्थाणीयस्स, अहं
जणगो चेव एएसिं, उत्तरोत्तरगुणपगरिसारोहणं पुण तुमए इमेसिं कायव्वं, ता कुणसु पसायं परिहरसु अवमाणं,
दूएण भणियं—महाराय! किमेवमाउलो भवसि?, किं कोऽवि नियडिंभेसु दुव्विणयमासंकेइ?, पेमपरवसहियएसु
वा एगमवि अवराहं न मरिसेति?, राइणा भणियं—एवमेव, जाणामि तुज्झ चित्तवित्तिं लक्खेमि पडिवन्नभरधवल-
त्तणं, केवलं तहा कायव्वं जहा देवो कुमारवइयरं न निसामेइ, इइ भणिए पडिवज्जिऊणं चलिओ चंडवेगो, कमेण
गच्छंतो यत्तो आसग्गीवनरिंदसमीव,

अह पुवागयनरकहियकुमारवइयरनिसामणा रुसिओ । आवद्धभिउडिभीमो रत्तच्छो पेच्छिओ राया ॥ १ ॥

नायं च जहा पुद्वागएहिं सिद्धो स वइयरो रत्नो । ताहे कयप्पणामो उवविट्ठो सो नियट्ठाने ॥ २ ॥
 पुट्ठो य तओ रत्ना कहिओ नीसेसवइयरो तेण । जह कुमरोहिं पइओ अयाणमाणेहि निरवेक्खं ॥ ३ ॥
 जइविहु देवउवरद्धं बालत्तणओ सुएहिं मम किंपि । तइवि पयावइनिवइ अहिगं सोगं समुव्वइ ॥ ४ ॥
 चूडामणिव्व सीसेण सासणं तुम्ह धरइ विणयनओ । निभिच्च(ब्भंत)भिच्चभावं सविसेसं दंसइ सयावि ॥ ५ ॥
 न सुणिज्जइ जुवईणं मंजीरवो कयावि तस्स गिहे । मागहलोएणं तुह गुणनिवहं संथुणतेण ॥ ६ ॥
 किं बहुणा ? माहिचइणो मए सुदिट्ठा कया समग्गावि । किं तु नियसामिभत्तीए तुलइ नो कोऽवि तेण समं ॥ ७ ॥

अह आसग्गीवनरिंदेण सुमरियं नेमिच्चिगवयणं परिकंपिओ मणेणं, चितियं च-अहो निव्वड्डियं ताव एयं नेमिच्चि-
 गवयणं, वीर्यपि जइ इत्थमेव हवेज्ज ता निच्छियं अकुसलंति परिभाविऊण आहूओ अवरो दूओ, भणिओ य जहा-
 गच्छसु रे पयावइस्स सगासे, भणसु य तं मम वयणेण-जेण सालिच्छेत्तेसु करिजमाणेसु सबलवाहनो गंतूण केसरि
 परिकखलइत्ति, जं देवो आणवेइत्ति भणिऊण निग्गओ दूओ, कमेण पत्तो पयावइस्स भवणं, सक्कारिओ रणणा, पुट्ठो
 य आगमणपयोयणं, साहियं च तेण सीहरक्खणरूवं नरिंदसासणं, अब्भुवगयं च पयावइणा, सट्ठाने य पेसिऊण
 दूयं एवं उवालद्धा कुमार—

पुत्ता ! अकाल एव हि तुम्हहिं पवोहिओ धुवं मच्चू । आसग्गीवनरिंदस्स धरिसिओ जमिह सो दूओ ॥ १ ॥

तेणेव अंघडे चिय दारुणरूपा इमा ममावडिया । आणा कयंतविब्भमंपंचाणारक्खणाणुगया ॥ २ ॥

कुमारेहिं भणियं-ताय ! कहं मच्चू पबोहिओ ? , रत्ना भणियं-पुत्ता ! सुणेह, आसग्गीवनरिंदस्स सालिखत्तस्स केसरी कारिसगज्जणं विद्दवइ, सो य पइवरिसं वारोचरण जहक्कमं सव्वनरिंदेहिं रक्खिज्जइ, संपयं पुण धारिसियदूयकुविण्ण आसग्गीवेण अपत्थावेचिय अहं समाइट्ठोऽहि, ता एयं मच्चुए पडिबोहणंति, तेसिं कहिऊण समाढत्तं पयाणयं, एत्थं-तरे विन्नत्तं कुमारेहिं-ताय ! अम्हे वच्चाओ, रत्ना भणियं-पुत्ता ! बालया तुम्हे, न जाणह अज्जावि कज्जाकज्जं, ता विर-मह इमाओ अज्झवसायाओ, अहं सयमेव वच्चिस्सामि, तेहिं भणियं-मव्वहा भोक्कलह, गंतव्वमवस्समम्हेहिं, महंतमेय कोऊहलं, केरिसो सो केसरित्ति ? , राइणा भणियं-अरे पुत्ता ! हरिणं कंभंडलनिक्कलं के कुले समुण्णत्ती कुबेरसमइरगो धण-संचओ अविगलं आणाईसरियं कलाकलावंसि विमलंमि विमलं कुसलत्तणं समत्थमुत्थत्थसु पवीणआ नीसेसेसु पहरणेसु परमो परिस्समो य नीरूवमं वीरियं अप्पडिमा रूवलच्छी, एएसिमेगयरंपि उम्मगपवत्तणसमत्थं, किं पुण एगत्थ समवाओ ? , एयाणि य सच्चाणिवि तुम्ह संति, ता एहिं हीरमाणणं तुम्हाणं को पडिक्खलणकारी ? , जम्हा बद्धमच्छरा वेरिणो उस्सिखला खला अविभावणिज्जागमाओ आवयाओ अच्चंतं पमत्तचित्ता य तुम्हे, न जाणिज्जइ केरिसो विवागो हवइ ? , अओ सुयह गाढगहंति, तेहिं भणियं-ताय ! हवउ किंपि, निच्छयं गंतव्वमम्हेहिं, तओ निवारिज्जमाणावि चलिथा कुमारा पहाणराइणा समेया कइवयकारितुरयहपरियणपरियरिया, पत्ता य तेसु सालिच्छे-

तेसु जत्थ सो केसरी निवसइ, पुढा य तेहिं करिसगा-अरे किह अन्ने राइणो पुंघिं सीहं रक्खयाइया ? , तेहिं भणियं-
 कुमार ! पयंडगुडाडोवभासुरेहिं पवरकुंजरेहिं पवणाइरेगवेगसुंदरंगेहिं जचतुरंगेहिं उंडुङ्गडीवसेल्लभल्लिनारायकुंतपसु-
 हपहरणहत्थेहिं सुहडसत्थेहिं विरइऊण तिउणपायारपरिक्खेवं अंचंतमप्पमत्तचित्ता मरणमहाभयवेवंतसव्वसरीरा केस-
 रिगुहामुहनिहियानिमेसनयणा रक्खंसु नराहिवा, तहा रक्खमाणानवि पइक्खणं सीहनायवससमुच्छलंतपडिसदायन्न-
 णेण अवगणियतिकखंकुसपहारा करडितडपणट्ठमयजला विहडंति करिघडा गाढखलितखलिज्जमाणाइं विदिसो
 दिसिं फट्टंति तुरयघट्टाइं विमुक्कपोरिसाभिमाणानि इट्ठदेवयमणुसरमाणानि सव्वओ पलायंति पायक्काणि, कुमारेण
 भणियं—अहो महापरक्कमो अहो अनन्नविप्फुरियं वीरियं अहो ओहामियसयलसुहडदप्पमाहणं अहो भुवणच्छ-
 रियं चरियं तस्स केसरिणो जं तिरियमेत्तस्सवि एवं परिसंकिज्जइ, अरे केत्तियं पुण कालं एवंविहपरिकिलेसेण एस
 पडिक्खलिज्जइ ?, तेहिं भणियं-कुमार ! जाव सयलं पि करिसणं ण सगिहे पविसइ, कुमारेण भणियं—भो करिसगा !
 को वासारत्तडुव्विसहसीयायाभिहओ नियसुहिसयणपमुहपहाणलोयरहिओ चिक्खल्लोलंमि मेइणितले मेहमालाउले
 दिसिबलए अणवरयं निवडंतीसु दिसिवहूत्तामणिहारविब्भमासु सुणीणं पि कयमयणविथारासु तंडवियसिंहडिभंड-
 लीसु विरहिणीहियनिहिचंगारासु वारिधारासु एत्तियं कालं पडिवालेहि ? , ता दंसेह तं पएसं जत्थ सो निवसइत्ति,
 जं कुमारो आणावेइत्ति भणिऊण दूरट्टिइहिं चेव कहिया सा केसरिगुहा, तओ पुणो पुच्छिया कुमारेण-अरे ! केत्तियो

तस्स परिवारो?, तेहिं भणियं-कुमार! नियसरीरेमत्तो, कुमारेण भणियं—जइ एवं ता
निरत्थयं धी धी वित्थरंति किं पत्थिवा विगयलजा । नियमुयवलावलें गिज्जतं मागहज्जेण? ॥ १ ॥
बहुसुहड्कोडिसंबुडहरिकरिसमदलियमहिबट्ठा । असहायं केसरिणं जमिमे न सरंति भयविहुरा ॥ २ ॥
एसो जयमि धन्नो जणणी एयस्स चव पुत्तमई । जस्स गलगज्जिएणवि गरुयावि सुयंति नियजीयं ॥ ३ ॥
जस्सडनिवारियपसरं पोरिसमेवविहं परिण्फुरइ । एगागिणोडवि स कहं न लहइ पंचाणणपसिद्धिं? ॥ ४ ॥

इय सुचिरं तं पसंसिज्जण गरुयकोऊहलाऊरिज्जिमाणमाणसो नियत्तियसेसपरियरो रहवरारूढो चलिओ गुहा-
भिमुहं कुमारो, कमेण य स पत्तो गुहादेसं, एत्थतरे दंसणकोउगेण मिलिओ बहुलोगो, ठिओ उभयपाससु,
कओ महंतो कोलाहलो, अह कलयलायन्नजायनिहाविगमो जंभाविदारियरउद्वयणो परिमुत्तकुरगरुहिरपाडु-
ग्गारदाढाकडप्पेण संझारुणससिकलं व विडंबमाणो पडिधुणियकडारकेसरो सदुब्भडकंधरो उच्चिरिमहल्लंगूलवेच्छि-
ताडियधरणितडाराववहिरियदियंतरो पढमपाउसमेहोव गजंतो उट्ठिओ केसरी, लीलाए मंदं मंदं कुमारदुत्तमव-
लेइउं पवत्तो य, तिविद्धूवि निरुवयंतो फलभरेण य सस्सं निमुणंतो केयारक्खिगजणरासए कौंतो तस्सालाव-
पेच्छंतो काणणरम्मयं ताव गओ जाव निवडिओ चक्खुगोथरे स सारंगाहिवो, तं च दद्वूण चित्तियं कुमारेण—अहो
एस महाणुभावो महीए चरणेहिं परिसक्कइ, अहं पुण पवरतुरयसंपगाहिं विचित्तपहरणपडिहत्थं रणज्झणिरिकिंकिणी-

जालसंपरिखितं संदणं अधिरूढो, ता विसरिसं जुञ्जं, न जुत्तमेयं उत्तमाणंति भावितो कुवियकयंतजीहाकरालं
 अयसिकुसुमपपासं करवालं गहिऊण दाहिणकरेण वामेण य पडिपुण्णचंदमंडलविब्भमं फुरंतफारतारगगिरायं फूरय
 च ओयरिऊण रहाओ ठिओ भूमीए, ताहे पुणोऽवि चित्तेइ-एस वराओ वयणंतरनिगूढदाढाकरपेरंतकुठकुडिलनह-
 मेत्ताउहो अहं तु तिवखगखगफलहत्यो, एयमवि न जुत्तिजुत्तंति विभाविऊण खगं फलहगं च परिचयइ, एत्थं-
 तरंमि दट्ठूण तारिसं वइससं तिविट्ठुस्स उप्पन्नगाढकोवो सीहो चित्तेउमाढत्तो—

कह मत्तमहामायंगतुरयरहजोहवूहरयेणं । रक्खिज्जंतोऽहमहो महायेणं महीवइहिं ॥ १ ॥

कह मज्झ दंसणपहे कीणासस्स व न कोइ निवडंतो । सुट्ठुवि पगिट्ठबलदप्पिओऽवि रणकम्मरसिओऽवि ? ॥ २ ॥

कह एण्ह दुद्धमुहो तत्थवि णवणीयकोमलसरीरो । तत्थविय तुरगकरिवरपक्कलपाइक्कपम्मुको ? ॥ ३ ॥

तत्थवि य अवन्नाए ओथरिऊण रहाओ पवराओ । अड्ढवियडुं लीलाए भासमाणो महिंमि ठिओ ॥ ४ ॥

तत्थेव य समुयबलावेलवमुक्कप्पहरणाडोवो । मसंगव मं गणंतो एसो पविसइ मम गुहाए ॥ ५ ॥

किं वा जीयंतहिं नो दीसइ किं सुणिज्जए नेव । जं एरिसावि दावेंति संपयं मज्झ अवमाणं ? ॥ ६ ॥

जइवि हुंऊजरसिरदारणोचिया मज्झ कुडिलनहविसिहा । तहविहु इमस्स दसेमि गाढदुब्बियगसाहिफलं ॥ ७ ॥

इय चित्तिऊण गलगज्जियरेण फोडितोव वमंडमंडोयरं, पुच्छच्छडाच्छोडणेण दलितोव मेइणीतलं, मिडंभिय-

वयणदाढामऊहनिवहेण भरतोव्व गयणंतरालं रत्तनयणपहासरेण अयंढनिवडंतविज्जुदंहुडामरं व करंतो दिसिचक्क-
वालं वेगागमणवसविंसंदुल्ललंतकेसरभारेण अंतरे अमायंतं व कोवनिवहं उगिरंतो सज्जियदीहरकमुल्लासवसवि-
सेसखाभोयरत्तणेण अंतरा तुट्टिऊणं व अग्गकाएण गसिउकामो एगहेलाए भुवणजणकवलणकए कयंतुव्व भासमाणो
झडत्ति पत्तो तिविहुकुमारस्स सुणालकमलकरकमलगोथरं, तथो तिविहुणा एगेण करेण हेट्टिल्लोट्टुण्डं अवरेणुत्तरोट्टं
अणायेरेण गहिऊण जिणणपडं व परिसडियपंडुपत्तं व भुज्जतरुतयं व दुहा तडयडत्ति फालिऊण परिमुक्कोत्ति, एत्थं-
तरे उक्किट्टसीहनओ जयजयरवो य कओ लोएणं, अन्नं च—

गंधव्वजक्खरक्खसविज्जाहरकिन्नरोहिं गयणंमि । विक्कमंदंसणसंजायहरिसपफुल्लनयणेहिं ॥ १ ॥

पहयाइं पडहकाहलमुयंगंदुहिपमोक्खतूराइं । कओ य जयजयरवो अहो सुजुज्झंति भणिऊण ॥ २ ॥

तियसंगणाहिं वियसियक्कुवलयदलदामदीहरच्छीहिं । मुक्का य कुमुमवुट्ठी दसद्ववन्ना भसलमुहला ॥ ३ ॥

भाणिमडडकणयंकुंडलकडिसुत्तयतुडियहारपमुहाइं । पवराभरणाइं लहुं सुरेहिं दिन्नाइं कुमरस्स ॥ ४ ॥

तथा-गिज्जंतुद्दामगुण विविहविलासुल्लसंतगोवज्जणं । नच्चंतरुणिसत्थं जायं रणंपि सुपसत्थं ॥ ५ ॥

सो य सीहो तथा दुहाकओऽवि गल्याभिमाणेण परव्वमसरीरो फुरफुरंतो विचिंतैइ-एवं नाम अहं निराउहेण
एगागिणा कुमारमेत्तेण अजुज्झेणं लीलाए विणिहओ, अहो मम काउरिसत्तणं अहो असामत्थं अहो निस्सारसरी-

रत्नं अहो दइवविपरंमुहया, सन्वहा निरत्थयमुवूढो सारंगरायसहो एत्तियं कालं, दुहु दुहु एरिसजीविणंति, एवं च तस्स फुरुफुरायमाणस्स सुणियतदभिष्पाएण कुमारसारहिणा भणियं महरसरेण—

भो भो लीलानिदलियमत्तमायंगुंगवसमूह ! । सारंगराय ! निण्णडिमसत्तिवित्तासियविपक्ख ! ॥ १ ॥

अविलंघियसज्जियकमनियबलपरिभूयनरवइसहस्स ! । सप्पुरिस ! कीस एवं निरत्थयं अमरिसं वहसि ? ॥ २ ॥

मा सुणसु जहा एएण बालरूवेण विणिहओऽहमिह । जं एसो नियकुलनहयलेक्कचंदो जणाणंदो ॥ ३ ॥

वररायलक्खणधरो समग्गवीरगणी गुणावासो । निट्ठरभुयंदडबलो तिविट्ठनामो वरकुमारो ॥ ४ ॥

भावी भरहद्धवसुंधराएं सामित्तणेण परिकहिओ । पढमं चिय सुमिणयपाढएहिं किर वासुदेवोत्ति ॥ ५ ॥

तं भिगसीहो भइय ! एसो पुण नरसमूहसीहोत्ति । सीहे सीहेण हए का अपसिद्धी ? किमवमाणं ? ॥ ६ ॥

अह सो केसरी इमाणि सारहिवयणाणि महुमिव अमयंपिव सवणपुडएहिं सम्मं पाऊण उवसंतचित्तो मरिऊण नरगे नेरइओ उववन्नो । सो य किर सारही एस काले भगवओ महावीरस्स पत्तित्थयत्तस्स पढमो गणहरो गोयमनामो भविस्सइ । तिविट्ठुकुमारोऽवि तं सीहचम्मं गहाय पट्ठिओ सनयराभिमुहं, गच्छंतेण य भणिया करि-
सगा, जहा-रे इमं केसरिचम्मं गेणिहऊण समप्पेज्जह घोडयगीवराइणो, भणेज्जह य तं जहा-वीसत्थो निब्भओ भुंजेसु सालिभोयणं, जायं संपइ अणाबाहंति । पडिवन्नं च करिसगेहिं, तिविट्ठूवि गओ सनयरंति, पयावइ पण-

मिऊण कहिओ सथलवुत्ततो, जाओ पुरे पमोओ । ते य करिसगा गया आसगीवसयासे, निवेइओ पयावइसुय-
विणासियसीहवइयरो, एवमायन्निऊण य खुमिओ मणंमि राया, चित्तिउमाढत्तो-अहो पडिपुन्नं नेमिन्तिगाइहुं संपइ
संविहाणगहुगं, ता निच्छियं पयावइसुआओ मम भयं, किं पुण कायवं?, निवडइ इयाणिं जमरायस्स दंडो, विहडइ
सुदढगुणरज्जुनिगडियावि रायलच्छी, विलोदंति दाणमाणवसीकयावि सेवगा, विवरंमुहे विहिंमि किं किं न वा
होइ?, केवलं अज्जवि न मोत्तन्वा बुद्धिपुरिसयारा, जेण एएहिं भाविणोऽवि अणत्था उवहणिज्जंति गलियाओवि
संपयाओ पुणरवि पाउब्भवंति, तम्हा न जुत्तमुवेक्खणं, जावज्जवि लहुओ वाही ताव चिगिच्छणिज्जो, नहि लहु-
ओत्ति जलणफुल्लिगो न डहइ केलासगिरिरुयंपि दारुरासिं, न वा परिब्भविज्जमाणोवि दिट्ठिविसमुयंगपोयगो न
विणासं पयच्छेज्जा, ता इमं पत्तकालं-ते पयावइसुए उवलोभपुव्वयमिह आणावेऊण विस्संभिऊण य दाणसम्मणा-
ईहिं विणासाविज्जंतित्ति संपहारिऊण य तेसिं आणयणनिमित्तं वाहरिओ दूओ, भणिओ य-अरे पयावइ एवं भणि-
ज्जासि-नुमं हि असमत्थो सेवाए, ता सिग्घं कुमारे पेसेहि जेण तेसिं इयरा सामंतभुत्ती दिज्जइ, जइ पुण न पेसेसि
ता जुज्झसज्जो होज्जाहिति, जं सामी आणावेइत्ति पडिवज्जिऊण निगओ नयराओ दूओ, कमेण य पत्तो पोयण-
पुरं, दिट्ठो राया, कयसक्कारो उवविट्ठो आसणे, पुच्छिओ य पयावइणा आगमणकारणं, तेण भणिंयं-राया आस-
गीवो आणवेइ-नुमं जराज्जरियसरीरो अचंतं परिणयवओ आएसदाणाणुचिओ य ता पेसेसु नियसुए जेण ते

सहस्रेण पूष्टि, वरकरिगनगरागामदाणेण य करेमि गरुयदेसाहिवे, एवमायन्निऊण चित्तिं पयावइणा—अतु-
लबलो आसगीवो दुराराहणिज्जो असमिक्खयत्तिक्खदंडनिवाडणदुविसहो य, अदिट्ठपरभया य मम कुमार, भिसे-
सेण तिचिद्वृत्ति विभाविऊण भणिओऽणेण दूओ—भइ! कुमारा न मुणंति सेवाविहिं न जाणंति वत्तव्विसेसं न लक्खंति
उचियाणुचियं न खमंति नारिदाएसमणुट्ठिउं, ता अहं सयमेव सबलवाहणो सामिसालं ओलगिस्सामि, तेण भणियं-न
एस आपसो पमुस्स, किं वा तुज्झ इमिणा सुणीणं पि दुक्करेण सेवाधम्मणेण ? उवभुंजसु निरंतरमंते उरमज्झगओ जहि-
च्छियं विसयसोक्खं, कुमारावि तत्थ गया सपहुपसाएण जइ पाउणंति रायलच्छि ता किमिव अक्कलाणं तुह हवे-
ज्जा ?, जओ देवो आसगीवो सीहवइयरनिसामणेण परमंसंतुट्ठियओ काराविउं इच्छइ महामंडलोवभोगं आरोविउं
समीहइ समुच्चपीलुखंधे काराविउं वंछइ पाणिगहणंति, राइणा विचिंतिं—अहो एस दूओ इंदवारणीफलंपि
वाहिं रमणीयं अब्भितरदुहविवागं उभयरूवं भासइ, ता सबहा दुहावहमेयं, सम्मं परिआलोयणिज्जं, अइरहुसकम-
कज्जाइं पज्जंतदारुणाइं हवंतीति निच्छिऊण पेसिओ दूओ निययआवासे, ठिओ सयमेगंते, वाहराविया विससयथनि-
णयकरणत्तिक्खबुद्धिणो मंतिणो, सुहासणासीणा य भणिया—अहो आसगीवो मम एवमाणवेइ-कुमार सिग्धं
पेसेहिति, ता साहेह किमिह करणिज्जं ?, मंतीहिं भणियं—देव ! उदामपरक्कमो गूढमंतप्यारो य आसगीवो, तुम्हे

१ परमसंतुष्टः परं असंतुष्टः २ मण्डलं-देशः खनं च ३ पीलुः-स्वर्णं वृक्षश्च ४ पाणिप्रहणं-विवाहः करबन्धश्च

पुण तस्सेव सेवगा अणवरयं आणानिहसवत्तिणो अप्पबला य, ता को तेण सह विरोहो?, ससत्तीए अण्णुरुवकोव-
करणं हि निदाणं विणासस्स, राइणा भणियं-जइ एवं ता पेसिजंतु कुमार, मंतीहिं भणियं-देव! असंजायबला
सेवाविहिअणभिन्ना य कहं पेसिजंति?,

अन्नं च-जइविहु अइविसमत्थप्पसाहणे होज्ज कहवि लच्छीवि। तहविहु भुयंगभीमे विलमि न खिवेज्ज कोऽवि करं ॥ १ ॥

अमुणियगम्मागम्मप्यथारमविगलियकलुसदोसं च। नरवइचित्तं सलिलं व कुणइ निन्नसु नूनं रइं ॥ २ ॥

कप्पासकणिक्काणं व सा णो परकज्जसाहिगा सेवा। उभयत्यविणासणकारिणी उ सेवा नरिदाणं ॥ ३ ॥

जह भणियविहाणपरमुहाण पुरिसाण सिट्ठिलिच्चाणं। दुस्साहियव्व विज्जा विणासमचिरा कुणइ सेवा ॥ ४ ॥

इय देव! नत्थि कुमराण जोगया काऽवि सामिसेवाए। ता संठवेह दूयं सिणेहवग्गूहिं वग्गूहिं ॥ ५ ॥

इइ वुत्ते पयावइणा आहूओ नरिंददूओ, भणिओ य सामवयणेहिं, जहा-भइ! गच्छ तुमं साहेसु आसग्गी-
वस्स, अणुचिया तुम्ह सेवाए कुमार, पयावइ सयमेव ओलग्गिहत्ति, दूएण भणियं-भो पयावइ! किमेवं पित्त-
पलाविओ इव पुणरुत्तं वाहरसि?, कुमारे पेसेसु, जुज्झसओ वा हवसु, एस देवस्स आएसोत्ति भणिज्जण निग्गओ
दूओ, अंतरे य दुव्वयणायन्नणेण रुट्ठेण तिविट्ठुणा कुमारेण निट्ठुलट्ठुमुट्ठिप्पहारेहिं हणिज्जण कंठे घेत्तूण य अवहारेण
निट्ठाडिओ, पत्तो य केमेण आसग्गीवनरिंदमंदिरं, निवेइओ निस्सेसो पयावइवइयरो, तमायन्निज्जण परिकुविओ

राया, खुभिया य सहा, कहं ?—

अणवरयविणिंतुद्दामसेयविदुब्भंडं सुहं सुहडो । परिमुसइ कोऽवि कोवुगमेण अहियं दुरालोयं ॥ १ ॥
नवकुवलयमालाविब्भमंमि निम्मलपहंमि करवाले । निवडइ य भमरिंछोलिसच्छहा कस्सविय दिट्ठी ॥ २ ॥
परपक्खक्खोभकरिं कोवसिहाडंवेरेण भयजणणिं । पच्चक्खं नियसत्तिं व कोऽवि सत्तिं करे धरइ ॥ ३ ॥
कस्सवि निडालवद्धं रेहुक्कडभिउडिभंगदुप्पेच्छं । खयसमयसमुगयराहुभंडलं सहइ गयणं व ॥ ४ ॥
केणावि कुलिसनिट्ठुसुट्ठिपहारेण ताडिया धरणी । अविणीयधारणेणं कयावराहव कंपेइ ॥ ५ ॥
संभावियरणरसनिस्सरंतरोमंचपीवरकरस्स । चिरपरिहियाइं कस्सवि विहडंति य कणयकडयाइं ॥ ६ ॥
कोऽविदु मच्छरसंभारतरिलियं वयणभासणसयणहं । कट्ठेण दसणदट्ठोदुसंपुडेणं खलइ जीहं ॥ ७ ॥
इय जाया कोवभरुल्लसंतदेहाण विविहकिरियाओ । संगमसंगमुक्कंठियाण सुहडाण तवेलं ॥ ८ ॥
एत्थंतरे भणियं आसग्गीवेण—अरे उवेक्खियाणं दुरायाराणं एस चिय गई, को तस्स दोसो?, अन्नाहा—
नियधूयापरियणावराहकालेऽवि जइ तमहं निगिण्हंतो ता किं एवं पसरं लंहंतो, तहा—जो नियधूयं कामेइ
सो नियसामिपि दुहइ किमजुत्तं? । किं वा एएण?, इयाजिंमि विणिधाएमि एयं महापावकारिणं, ता रे ताडिह
पत्थाणविजयट्ठकं, पगुणीकरावेह कुंजरसाहजं, संजत्तावेह तुरयघट्ठाइं, जोत्तावेह संदणगणं, वाहरावेह समगं

नरवहवर्गति, वयणाणंतरमेव कथं पगुणं सयलं किंकरजेण, एत्थंतरे गओ राया मज्जनघरं, परमविभू-
ईए कथं मज्जनं, नियसियाइं कासकुमुमंदुराइं अंनराइं, वद्धाइं केसेसु सुरहिकुमुमाइं, कओ संबंदिओ चंदणर-
सेणगरागो, विहिओ पुरोहिण असिवोवसमनिमित्तं सत्तिकम्मविही, खित्ता दोवक्खया सिर, पइट्ठिओ पुरओ मंगल-
कलसो, दंसियं घयपुणभायणं, लिहिया अट्टमंगलया, उयणीओ य आधोरेण सिंगारियसरीरो सिंदूरपूरारुणकुंभ-
त्यलो गंडयलगलंतमयजलो वइरिदलणदुद्धरो जयकुंजरो, तंमि आरुढो आसग्गीवो, धारियं फारफेणपुंजुज्जलं नियप-
रिमंडलविजियपडिपुणचंदमंडलं लंवतमुत्ताहलकलावावचूल्यं सियायवत्तं, ठिया य उभयपासेसु चामरग्गाहिणीओ,
वज्जियाइं दिसिं कुंजरगलगज्जिगंभीराइं भंभासुगुंदमदलदक्कापसूहतुराइं, ठिओ पत्थाणंमि पत्थियोत्ति । एत्थंतरे—

चलंतकणचामरा पयंडदप्पदुद्धरा, गलंतगंडमंडला तमालनीलसामला ।

अलंघणिज्जविक्रमा महागिरिंदविन्भमा, रणंतवद्धंधटया महाययाणपट्टिया ॥ १ ॥

पलंबपुच्छसोहिया असेससिक्खगाहिया, सुवेयतुट्टसामिणो समीरवेगगामिणो ।

विसिट्ठलक्खणंक्रिया परेण नो निरिक्खिया, दिण्णिंदवाइविन्भमा पयट्टिया तुरंगमा ॥ २ ॥

विचित्तचित्तवंधुरा महाउहोहनिन्भरा, जओवलंभपच्छा रणंतकिंकिणीकुला ।

निलीणभूरसत्थया पगिट्ठेकउमत्थया, दुसज्झवेरिमइणा पवाहिया पसंदणा ॥ ३ ॥

सरासिचक्रधारिणो विपक्वसूरदारिणो, ससामिभित्तिमंतया अईव जुत्तिजुत्तया ।
जएक्कलभललसा अर्चितणिजसाहसा, सरीरबद्धकंडा पयट्टिया महाभडा ॥ ४ ॥

अह लाडचोडमरहट्टकच्छकालिंगपमुहनरवइणो । आणामेत्तेणं चिय समुब्झियासेसनियकज्जा ॥ ५ ॥
सन्नद्धबद्धकवया बहुपहरणसालिणो जयपसिद्धा । आसग्गीवसयासं पत्ता सयलेणवि बलेणं ॥ ६ ॥

एवं च समगसंवाहगे जाए दवावियं रणा पयाणयं, चलिओ खंधावारो, गच्छंताण य सहसच्चिय समुच्छलियं
खरसमीरणंदोलणेणं, निवडियं छत्तं भग्गो दंडो गयणंगणाओ फारफुल्लिगदारुणा पडिया उक्का, दिवसेच्चिय उल्लसिया
तारया, जायं रुहिरवरिसं, निरब्भमि चैव अंबरे फुरिया सोयामणी, अविण्णायसरूयो तडत्ति विहडिओ जयकुंजरो, नि-
न्निमित्तं चिय जलणजालाकलवेण कवलियाइं जचतुरंगमपुच्छाइं, परिगलिया सयमेव भग्गदंडा जयपडाया, जाया थ
पलीणमयजला हत्थिमंडली, अणवरयेणुवरिसदुरालोयं विच्छाइभूयं दिसाचक्कं, अंमुप्पवाहो मुक्को देवयापडिआहिं,
परोप्परं हसियाइं चित्तकम्मरूवाइं, उट्टुमुहेहिं दीणस्सरं परुन्नं सारमेएहिं, एवमाईणि उप्पन्नाणि बहूणि असिवाइंति ।
ताहे असिवनिरिक्खणंसंजायमहाभया कुसलमइणो । आसग्गीवणरिंदं भणन्ति विणओणया सच्चिया ॥ १ ॥
देव ! हिमं व विलिज्जइ पयावमेत्तेण तुमह पडिवक्खो । किमकंडविट्ठुरको पारद्धो समरसंवाहो ? ॥ २ ॥
तुह तुरयखरखुरुधुरयपडलेणं पणट्ठकरपसरो । सूरौवि अंतरिज्जइ को अन्नो जो परिण्णुरइ ? ॥ ३ ॥

ता मुयह विजयजत्तं नयराभिमुहं लहुं नियत्तेह । असिबोवसमनिमित्तं कीरंतु य होमजागाई ॥ ४ ॥
नहु एरिस असिबेहिं कोसल्लं किंपि देव ! पेच्छामो । पूरिजंति किमेवं सत्तूण मणोरहा धणियं ? ॥ ५ ॥
एवमाइन्निज्जण भणियं रत्ता—भो भो किमेव वाउलत्तणं तुब्भे निन्निमित्तं पडिवन्ना ? किं न मुणह मम भुय-
दंडपरक्कमं ? न वा सुमरह चिरपभूयसमारसम्महविदवियपडिवक्खसंपत्तविजयं ? न वा पेच्छह अपरिकलियसखं भरिय-
निणुन्नयमहि विभागं महोदहिसलिलपि व चाउहिंसिं पसरियं चाउरंगं बलं ? किमिव अट्ठणो चिय भायह, किं वा
सनयराभिमुहं मं नियत्तावेह ? न हि पारद्धवत्थुपरिचाइणो सलहिजंति पुरिसा, न य तहाविहसंदिद्धकइवयअमं-
गलभेत्तणवि खुब्भंति वीरा, जओ—

गहगणचरियं सुमिणाण दंसणं देवयाण माहण्यं । सुणखररसियणमुहा सउणा य तहा जणपसिद्धा ॥ १ ॥
उक्कानिवडणरुहिराइवरिसपमुहाइं दुन्निमित्ताइं । सव्वाइं घुणक्खरसंनिमाइं को तेसि भाएज्जा ? ॥ २ ॥
ता धीरा होह, निवाडेमि नीसेसदुन्निमित्तसत्थं मत्थए पयावइस्स, इति भणिज्जण विमुमारियनिमित्तिगवयणो
अवस्संभविषव्वयाए विणासस्स पडिक्कूलाए देवविलसियस्स बारिज्जमाणोऽवि पुराणपुरिसेहिं पडिखल्लिज्जमाणोऽवि
कुसउणेहिं सोवरोहं नियत्तिज्जमाणोऽवि अंतउरज्जेण छत्तभंगं सुणाविज्जमाणोऽवि निमित्तपाढगेहिं सयलवलसमेओ
गंतुं पयट्ठो, कमेण य पत्तो सदेससीमासंवत्तिणं रहावत्तपव्वथदेसं, तहिं च खंधावारनिवेसं कारावेज्ज वाहराविओ

दूओ, भणिओ य-अरे गच्छसु पयावइस्स सगासे, भणसु य तं-एस आगओ आसग्गीवो राया जुज्झसज्जो वट्ठइ, सिग्घं संसुहो एहि, कुमारपेसणेण संमाणं वा करेहि, मा अकालेच्चिय कुलक्खयं जणेसुत्ति, जं देवो आणवेइत्ति पडिच्छिऊण से सासनं नीहरिओ दूओ, कमेण य गओ पयावइस्स मूलं, कहिओ णरिंदाएसो, रुद्धो तिविट्ठुकुमारो, भणिउमाढत्तो य—

रे दूय ! तुममवज्झो निब्भयचित्तो ममोवरोहेण । घोडयगीवं गंतुं फुडक्खरं भणसु वयणमिमं ॥ १ ॥

मा होहिसि विगयमओ बहुपरिवारोत्ति चिंतिउं अचिरा । सीहोच्च महिसिलिंबं एस तिविट्ठु तुमं हणिही ॥ २ ॥

अज्जवि पयावइनिवो नियनामत्थं फुडं सुमरमाणो । रक्खइ तं जइ परिहरसि निट्ठुरत्तं वहसि पणयं ॥ ३ ॥

अहउभिणिचिट्ठमईणं सुट्ठु भणियंपि दोसमावहइ । ता किं निरत्थएणं सिक्खादाणेण एएण ? ॥ ४ ॥

दूएण तओ भणियं अज्जवि दुस्सिक्खया दढं तुम्हे । न सुणह देवस्स बलं तेणेवमसंकमुल्लवह ॥ ५ ॥

अह पयावइणा भणियं-भइ ! वच्च नियनरिंदसगासं, साहेसु य जहान-एस आगओ पयावइत्ति, एवमाइन्निऊण निग्गओ दूओ, राइणावि काराविओ सेन्नसंवाहो, तओ पक्खरिज्जंतदप्पियवगंततुरंगमं गुडिजंतगयच्चडं समरपरि-हत्थुच्छंहत्तफारफारक्कचक्कं चंडगंडीवगुणज्झणकारसुहलुच्छलंतयणुद्धरं रहारुद्धपवरीरं नाणाउहहत्थसमुत्थंतसुहड-सत्थं चलियं चाउरंगं बलं, तेण य परिवुडो पयंडगुडाडोवभासुरकुंजरकंधराधिरुद्धो नीहरिओ पुराओ पयावइ, एत्थ-

तरे नीलचलंतमहं तालज्झयाणुसारमिलियसामंतपरियएण एवलनीलीनीलयदुल्लनियंसेणेण करयलफुरंतहलमुसल-
पहरणेण संगामसंगमुक्कखिरेण अयलकुमारोण अणुगम्ममाणमगो आमलगथूलमुत्ताहलहारेण गयणाभोगोव नहसुरस-
रिपवाहेण सोहंतवियडवच्छत्थलो तरुणतरणिकिरणसन्निगास सिचयजुयलेण वडवानलजालाकलवेण जलरासिद्व
रेहंतदेहो सवणकयकणयकुंडलकंतिपसरेण तक्कालसंगमूयरायसिरिसरागतिरिच्छिच्छिविच्छोहेहिं व भासमाणवयणो
पुरो पइट्टियरणलट्टिनिविट्ठकणयकविलारुलकंतिपडलच्छलेण कोवं व उगिरंतो तिविट्ठकुमारो, सिग्धं गंतूण मि-
लिओ पयावइनरिंस्स, भणिउमाढत्तो य-ताय ! नियत्तह तुम्हे, देह ममाएसं, किञ्चित्तिमेत्तो एसो घोडयगीवो ?
अवणेमि तुम्ह पसाएण एयस्स धिट्ठसौंडीरयं, न य बहुसहाओत्ति संकणिज्जं, जओ भोयणमेत्तसहायिणो इमे,
परमत्थेण एगागी चेव एसो, रायणा भणियं-पुत्त ! लीलाविहाडियसमुक्कडेसरिकिसोरस्स अविगणियपडिवक्ख-
लक्खस्स किं असज्झं तुह परक्कमस्स ? , केवलं दूरट्टिया कोजहलेपेच्छगा एत्थ अम्हे, कुमारोण वुत्त-एवं होउ,
अह विसिट्ठसउणोवलंभवहुंतपरितोसाणं अणवरयपयाणगेहिं वच्चंताणं तेसिं तस्स रहावत्तपव्वयस्स समीवे संप-
त्ताणं अवरोप्परासन्नदंसणवसेण जाए हलबोले परिकण्णियपक्खरंगुंडाडोवाइं उट्टियाइं तुरङ्गहत्थिसाहणाइं उडुयध-
यचिंधाइं, संपलग्गाइं उभयबलाइं, तओ-ताडियसरतूरुट्टजणं भयथरहरंतकायरगणं, उदामबंदिसदृढणुच्छहतसु-
हडं वरधूलिधूसारियरहधयवडं ॥ १ ॥ खरखुरूपकप्परियतुरयपक्खरियनिग्रयतुरयधट्टोद्दामवियंकुत्तरं । आसवारकर-

कखयतिक्खकरवालविदारियसूरसिरं गुंडियगुरुकरडिघडफोडिग्रतुरयघट्टं अन्नोन्नमिलणजायनिविडसंघट्टं ॥ २ ॥
 सरलसेछकछोलकीलिज्जंतकुंमपलायंतगयं सुन्नपुन्नहिंडंतचंडचंडुलहयं । तिसूलमल्लिसेल्लभिन्नवेळंतनरं, उत्तालनिचडियल-
 त्तछत्तधरं ॥ ३ ॥ दंतिदंतसंघट्टयट्टानलकणं, उद्धबाहुनचंतकवधपवन्धघणं । विण्णुरंतकुंतगघाययुम्मियरहियं, सारि-
 मज्झजुज्झंतजोहघायदुविसहं ॥ ४ ॥ कुंभिकुंमवायसमुच्छलियरुहिरण्यवहं भूमिवट्टनिचेट्टपडियसमुत्तुंगमायंगरुद्धपहं ।
 महल्लच्छमल्लमल्लुकमुक्कफकारभीसणं, संगामरसियसुहडलोयतोसणं ॥ ५ ॥ काऊण(दंडपडण)विचित्तसमरवावारं ॥
 धाणुकडुकधाणुकयाहं, फारकियमडफारकियाहं । कुंतयरभिडियसमवग्गियाहं, खग्गाउहउक्खयखग्गियाहं ॥ १ ॥
 पडिखलियतुरंगतुरंगमेहिं, मेळंतसेल्लमडुगमेहिं । मयगलगिलंतमयगिणणगंड, अब्भिडुपरोप्परवद्धमुंड ॥ २ ॥

पाउब्भवंतअइघोरोस खणि विमुक्कभीसणनिघोस ।
 चाउदिसि सुहड समोत्थरेवि पहरंति समरि नियपाण देवि ॥ ३ ॥
 नाणाउहहत्यनरिंदवग्ग अवरोप्परजुज्झितसंपलग ।
 गयजीविय निवडहिं दंडनाह, पवंहतरुहिरपहजुय अगाह ॥ ४ ॥
 सेसारुणच्छुरणवद्धकच्छु, मह दंसह आसग्गीतु हत्थु ।
 इय जंपिरु रिउ पडिसत्तुराओ, एत्थंतरि पडिपहरंतु आउ ॥ ५ ॥
 तो वंगकलिंगनगराहिवेहिं, जुगवं चिय मुक्कमहाउहेहिं ।

पडिखलियउ पयावइ जुल्लमाणु, साहुव जाओ परिचनुमाणु ॥ ६ ॥
आसग्गीवह सेव्वाण अइबहुसंखेण हरिकरिसंदणहुद्वरेण ।
निम्महिण परक्कसु पहणिण उज्जसु कयउ पयावइ तक्खणेण ॥ ७ ॥
मुणिवि तं निज्जियं जायकोवुग्गमो, भिउडिभीमाणो पायडो नं जमो ।
अयलु पयलंतहलुसलदिवाउहो, सिग्घवेगेण सत्तूण ठिओ संसुहो ॥ ८ ॥
तयणु चिरलद्धजयवायगव्वुद्धुरा, ते नरिंदा समुवूढढमच्छरा ।
सेल्लनारायसरनिरयमेलंतया, अयलपासंमि वंचति वगंतया ॥ ९ ॥
हरिसभरतडयडुट्टकंडगुणो, सोयते पेच्छिउं बाढमबुभियमणो ।
जंपए रे लुहुं चयह चक्खुण्हं, कीस वच्चह विणा कारणं जमणिं ? ॥ १० ॥
किं न भो नियह मह लंगलं सियसिंहं, कुवियकीणासजीवं व अइदुस्सहं ।
वइरिवच्छत्थलीविलिहणुड्डामरं, जस्स कंतीहिं अरुणिज्जए अंबरं ॥ ११ ॥
किं न वा सुसलमलिवलयकसिणण्हं, धरणिमिसारपरमाणुनिम्मियमुहं ।
जयह तुब्भे जमेवं रणे उज्जया, तेहि वुत्तं अरे तुज्ज का चंगया ? ॥ १२ ॥

जेण दीसंति तुह सन्निहा हालिया, धरइ लीलाएँ मुसलं पि किल महिलिया ।
 एवमुछाचिरं वइरिसत्थं बलो, सरइ वेगेण करकलियसियलंगलो ॥ १३ ॥
 केऽवि मुट्ठिप्पहारेण ताडइ भडे, अवरि मुसलेण चूरइ सहावुब्भडे ।
 हलसिहगेण केसिंपि उरु दारए, अन्नि चलणप्पहारेण मुसुमूरए ॥ १४ ॥
 एक्कघाएण पाडइ महाकुंजरे, तणयपूलं व गयणे खिवइ रहवरे ।
 सुयइ करुणाय परिचत्तसयलाउहे, ठाइ निग्गयपयावोऽवि नो से मुहे ॥ १५ ॥
 इय निट्ठुरगत्तेण निरुवमसत्तेण निट्ठुरेण बलदेवेण बलु वलु विरियहं ।
 तक्खणि विद्धिसिओ भडमउ नासिउ सयलदिसामुह पसरियहं ॥ १६ ॥

एवं चिय पइदिवसं दोणहवि सेन्नाण जुद्धमाणाणं । विविहप्पयारभीमं एयं जायं समरठाणं ॥ १७ ॥
 एगत्थ पडियनरवइ पियंगणा करुणरुन्नरवभीमं । अन्नत्थ बंदितज्जणसवडुहचलियपडिमुहडं ॥ १८ ॥
 एगत्थ दंतिदसणग्गभिन्नसूरासिलेहहयरहियं । अणत्थ भीयकायरनियमुहखित्तंगुलीवल्यं ॥ १९ ॥
 एगत्तो ऊसियकरमाहूयऽण्णोण्णवीरवरपुरिसं, अब्बत्थोमिंठविणट्ठमिंठपरिभमियगयनिवहं ॥ २० ॥
 एगत्थुत्तालिमिलंतघोरवेयालविहियहलबोलं, अन्नत्थ सिवागणखज्जमाणगयजीवनरनिवहं ॥ २१ ॥

एगत्तो दंसणतिक्खचक्खिज्जंतमहिगयज्जणोहं, अन्नत्तो भडतोसियमागहगिज्जंतवरचारियं ॥ २२ ॥

इय चिहियविविहभीसणकिरिएहिं उभयसेन्नसुहडेहिं । समरंगणं सुराणवि जायं अचंतभयजणगं ॥ २३ ॥

किं च-रणट्टाणनिवडियकणसीसकरचरणजंवतणुखंडं । विहिणो घरं व नज्जइ जयजणघट्टणुज्जयमइस्स ॥ २४ ॥

एवं च बहूहं वासराहं महासम्मद्वेण निवाडियाणेगसुहत्थिसु तिक्खनारायनिब्बिन्नकुंभिकुंभत्थलेसु, चुरियचारु-
तुंगसिंजरहवरेसु सुसुमूरियनरवइसहस्सेसु जायंतेसु आओहणेसु पोच्छऊण बहुजणक्खयं तिविट्ठणा भणाविओ
द्वयवयेण आसग्गीवो, जहा—किमणेण निरत्थएणं निदोसपरियणक्खएणं?, तुमं च अहं च परोपरवद्धवेरा, ता
अंगीकरेह नियमुयवलं, सम्मं ठवेहि चित्तावट्ठभं विमुच कायरत्तं परिचय परपुरिसाथारं दावेहि सहत्थकोसहं मेछेहि
सरीरसोकुमलं पगुणो भवाहि असहाओ मए एगागिणा सह जुज्झिउंति, सम्ममवधारिऊण गओ दूओ, निवेइओ
आसग्गीवस्स कुमारसंदेसगो, पडिवन्नो य राइणा, जाए बीयदिवसे विचित्तपहरणपडिहत्थं जोत्तियपवरतुरयं
सारहेमेत्तपरियत्तपरिथरं संदणमारुहिऊण ओइण्णा रणभूमीए आसग्गीवतिविट्ठणो, ठियाइ उभयपासेसु सपहुपरक्क-
मावलोयणकोऊहलाइ दोन्निवि बलाइ, संदखंदचंडिकोहडिपमुहदेवउवजाइयसयदाणपरायणाइं निलीणाइं उच्चपएसेसु
अंतेउराइं, पेक्खणुक्खिरा य गयणंगणमोगाढा सुरकिंनरकिंपुरिसिविजाहरा, लवंतमुक्कजडाडोवो पाणिपरिगहिय-
छत्तगो संगामदंसणव्वूढगाढहरिसो पइखणअट्टट्टहासे सुयमाणो देवसमूहं च सोवओगं कुणमाणो विंथंभिओ अंतरे

नारयमुणी । एत्थंतरे आसग्गीवेण भणिओ त्तिविट्ठु—

गिरिगुहनिवाससि(खि)न्ने रोगजराज्जरंगए सीहे । निहए करुणाठाणे अहो तुमं बलमयं वहसि ॥ १ ॥
किमहं तं न समत्थो चिणासिउं पढममेव लीलाए । किं तु मयमारणे अवयसो सिया तेण नो हणिओ ॥ २ ॥
जइ कहवि दुद्धवयणोत्ति कलिय नो सिक्खविंति तं कुसला । किं एत्तिएणऽवि मुहा परंमुहो सुंदर ! नयस्स ॥ ३ ॥
सच्चं चिय न कयंतो कुद्धो विहवइ करचवेडाए । किं तु दुबुद्धी दाउं परस्स हत्थेण मोरइ ॥ ४ ॥
जं चिय किंचि पखुं बाहुबलं तुज्झ नरजणब्भहिंयं । पक्खुब्भेओव पिवीलियाण तंपि हु वहट्टाए ॥ ५ ॥
थेरस्स पयावइपत्थिवस्स पुत्तच्छलेण तं भद्द ! । नूणं विणासपिसुणो समुग्गओ धूमकेउव ॥ ६ ॥
तोहे त्तिविट्ठुणा सो भणिओ वुहुत्तणस्स तुह पढमो । पाओ पाउब्भूओ दुव्वयणुल्लावरूवो किं ? ॥ ७ ॥
किं वा सन्निहियकयंतसंगसंजायनिट्ठुरसहावो । निम्मरं थेर ! समुल्लेवसि वन्नसि समाहण्यं ॥ १ ॥
रणकसवट्ठयनिवडियपवरसोडीरिमासुवणस्स । अचुक्करिसो सोहइ नरस्स वन्निज्जमाणोऽवि ॥ ९ ॥
ता संवरेसु वयणं खणमेकं अंतरे परिभमंतु । तुज्झ महच्चिय चाणाऽरिपक्खमहणा महावेणा ॥ १० ॥
आसग्गीवेण पुणो भणिओ डिंभोत्ति मज्झ नो घायं । दाउं खगंति हत्था तोहे पहरसु तुमं पढमं ॥ ११ ॥
त्तिविट्ठुणा भणिंयं—भो घोडयग्गीव ! पुरा मम तायस्स तुमं सामिसदमुवहंतो ता तयणुवित्तीए चेव अणइयमं

एगत्तो दंसणत्तिकखचक्खिज्जंतमहिगयजणोहं, अन्नत्तो भडत्तोसियमागहगिज्जंतवरचरियं ॥ २२ ॥

इय विहियविविहभीसणकिरिएहिं उभयसेन्नसुहेडेहिं । समरंगणं सुराणवि जायं अचंतपयजणगं ॥ २३ ॥

किं च-रणट्टाणनिवडियकणसीसकरचरणजंघतणुखंडं । विहिणो घरं व नज्जइ जयजणयडुज्जयमइस्स ॥ २४ ॥

एवं च बहूदं वासराहं महासम्मदेण निवाडियाणेगसुहत्थिसु तिकखनारायनिज्जिन्नकुंभिकुभत्थलेसु, तुरियचारु-
तुंगसिगरहवरेसु सुसुमूरियनरवइसहस्ससु जायंतेसु आओहणेसु पेच्छिऊण बहुजणकखं तिविदुणा भणाविओ
दूययणेण आसग्गीवो, जहा—किमणेण निरत्थएणं निहोसपरियणक्खएणं?, तुमं च अहं च परोप्परवद्धेवरा, ता
अंगीकरेह नियमुयबलं, सम्मं ठवेहि चित्तावट्टुभं विमुचं कायरत्तं परिचय परपुरिसायां दावेहि सहत्थकोसल्लं मेछेहि
सरीरसोक्कुमल्लं पगुणो भवाहि असहाओ मए एगागिणा सह जुज्झिउंति, सम्ममवधारिऊण गओ दओ, निवेइओ
आसग्गीवस्स कुमारसंदेसगो, पडिवन्नो य राइणा, जाए बीयदिवसे विचित्तपहरणपडिहत्थं जोत्तियपवरतुरयं
सारहेमत्तपरियत्तपरियरं संदणमारुहिऊण ओइण्णा रणभूमीए आसग्गीवतिविट्ठणो, ठियाहं उभयपासेसु सपहुपरक्क-
मावलोयणकोऊहलाहं दोन्निवि बलाहं, रुंदसंदचंडिकोहंडिपमुहेदवउवजाइयसयदाणपरायणाहं निलीणाहं उच्चपएसेसु
अंतोउराहं, पेक्खणुक्खिरा य गयणंगणमोगाढा सुरकिंनरकिंपुरिसविजाहरा, लंभंतमुक्कजडाडेवो पाणिपरिगहिय-
छत्तगो संगामदंसणुव्वूढगाढहरिसो पइखणअट्टहासे सुयमाणो देवसमूहं च सोवओगं कुणमाणो विथंभिओ अंतरे

नारयमुणी । एत्थंतरे आसग्गीवेण भणिओ तिविदु—

गिरिगुहनिवाससि(खि)न्ने रोगजरज्जरंगए सीहे । निहए करुणाठाणे अहो तुमं बलमयं वहसि ॥ १ ॥
किमहं तं न समत्थो विणासिउं पढममेव लीलाए । किं तु मयमारणे अवयसो सिया तेण नो हणिओ ॥ २ ॥
जइ कहवि दुद्धवयणोत्ति कलिय नो सिक्खविंति तं कुसला । किं एत्तिएणऽवि मुहा परंमुहो सुंदर ! नयस्स ॥ ३ ॥
सच्चं चिय न कयंतो कुद्धो विद्वइ करचवेडाए । किं तु दुबुद्धी दाउं परस्स हत्थेण मोरइ ॥ ४ ॥
जं चिय किंचि परूढं बाहुबलं तुज्झ नरजणब्भहिंयं । पक्खुब्भेओव पिवीलियाण तंपि हु वहट्ठाए ॥ ५ ॥
थेरस्स पयावइपत्थिवस्स पुत्तच्छलेण तं भइ ! । नूनं विणासपिसुणो समुग्गओ धूमकेउव्व ॥ ६ ॥
तोहे तिविदुणा सो भणिओ बुहुत्तणस्स तुह पढमो । पाओ पाउब्भूओ दुव्वयणुल्लावरूवो किं ? ॥ ७ ॥
किं वा सन्निहिक्कयंतसंगसंजायनिट्ठुरसहावो । निम्मेरं थेर ! समुल्लवेसि वन्नसि समाहणं ॥ १ ॥
रणकसवट्ठयनिवडियपवरसोडीरिमासुवणस्स । अत्तुक्करिसो सोहइ नरस्स वन्निज्जमाणोऽवि ॥ ९ ॥
ता संवरेसु वयणं खणमेक्कं अंतरे परिभमतु । तुज्झ महच्चिय वाणाऽरिपक्खमहणा महावेणा ॥ १० ॥
आसग्गीवेण पुणो भणिओ डिंभोत्ति मज्झ नो घायं । दाउं खमंति हत्था तोहे पहरसु तुमं पढमं ॥ ११ ॥
तिविदुणा भणिंयं—भो घोडयग्गीव ! पुरा मम तायस्स तुमं सामिसइमुव्वहंतो ता तयणुवित्तीए चैव अणइहमं

णिज्जवणोऽसि अओ अवहिओ होहि एसा निवडइ कयंतदिट्ठिव दुविसहा विसिहपररत्ति भणिऊण आयन्नमा-
कडिय कोयंडं रणज्झणाविद्या पंडचा, मुक्का सलोहा मम्मावेहिगा खलालिव्व निट्ठरा सरघोरणी, तओ आसग्गीवेण
घणुवेयकुसलयाए अद्धमगमपत्तेच्चिय खंडिया तिव्वखलुरुणेहिं, पुणरवि कुमारेण भिचोव्व सपक्खो निरवेक्खगामी
खित्तो नारायनिवहो, सोऽवि निष्पुण्णजमणोरहोव्व पडिखलियो आसग्गीवेण, किं बहुणा ?—

जं जं सत्थं किंपिवि खिवइ नरिंदस्स संसुहं कुमरो । तं तं आसग्गीओ दक्खत्तणओ पडिक्खलइ ॥ १ ॥

आसग्गीवोऽवि पयंडकोवओ सुयइ पहरणं जमिह । वेज्जोव्व रोगजायं कुमरोऽवि तयं पडिहणेइ ॥ २ ॥

अह भरहबाहुबलियोव्व गाढममरिसभरेण पहरंता । खयसमए राहुसणिच्छरव्व रेहंति ते दोऽन्नि ॥ ३ ॥

एवं परोप्परं जुज्झिराण तेसिं पणिट्ठदप्पाणं । सचराचरावि धरणी धरहरिया पयभक्कंता ॥ ४ ॥

एत्थंतरंमि अणवरयखिवणओ पहरणुच्चओ सव्वो । आसग्गीवनरिंदस्स निट्ठिओ सुकयरासिच्च ॥ ५ ॥

ताहे किंकायव्ववाउलचित्तेण खेयविहुरेण । अविभगपसरिउदप्पदंसणुव्वहकोवेणं ॥ ६ ॥

आवयधणं व दढपणयचित्तमित्तं व पियकलत्तं व । विसमावडिएणं नरवरेण संसुमरियं चक्कं ॥ ७ ॥

अह जलणुब्भडपसरंतकिरणमालासहसपल्लविधं । जुगविगमुगयमायंडचंडमंडलयदुप्पेच्छं ॥ ८ ॥

रुद्धमारुणनयणं व मिलियनीससविज्जुपडलं व । आसग्गीवस्स झडत्ति चक्करयणं करे चडियं ॥ ९ ॥

तयणंतरं च पहरिसतडत्तितुदंतवम्मबंधेण । तेण विमुक्कं वहणट्टयाए सिग्घं तिविट्ठस्स ॥ १० ॥

गंतुं क्वाडवियेडे वच्छयेले तं जेवेण कुमरस्स । चिरदंसणुस्सुयं वड्हं व तुंवेण संलग्गं ॥ ११ ॥

एत्थंतरंमि दढचक्कंतुंबसंघट्टघायवियलंगो । मुच्छानिम्मिलियच्छो पडिओ धरणीयले कुमरो ॥ १२ ॥

आसग्गीवबलेणं ताहे संपन्नबहुपमोएणं । जयजयसहुम्मिस्सो पकओ कोलाहलो सहसा ॥ १३ ॥

तथा-जाव य उग्गीरियविविहपहरणा नावडंति सत्तुभडा । ताव तिविट्ठुकुमारेण तक्खणं विगयमुच्छेणं ॥ १४ ॥

ओ धोडयगीव ! गओऽसि नासमहुणत्ति संलवंतेणं । तं चिय तस्साभिमुहं मुक्कं चक्कं झलहलंतं ॥ १५ ॥

तो तं तालफलंपिब तडत्ति छेत्तूण तिकखधाराए । आसग्गीवस्स सिरं करे ठियं पुण तिविट्ठस्स ॥ १६ ॥

अह निहयंमि आसग्गीवे हरिसवसविसप्पमाणसमुच्चरोमंचेहिं सहसच्चिय जयजयवं करंतेहिं सुरासुराहे सरसपा-
रियायतरुमंजरीनियरसंवलिआ सोरभभरंगंधलुद्धमिलंतभसलजालमुहला अणवरयविणिंतामंदमयरंदविंदुसंदोहविच्छु-
रियसयलदिआ कमलकुवलयमालइपमुहा मुक्का पंचवन्नकुसुमुट्टी, उग्घोसियं च महया सहेण जहा—ओ भो पत्थिवा !
परिचयह कोवकंडुं मुयह दुव्वहदुविणयपणयं परिहरह आसग्गीवपक्खवायं उज्झह असज्झावावरं पणमह सवायरेण
त्तिविट्ठुं, एसो खु एत्थ भरहखेत्ते समग्गबलवंतपुरिसप्पहाणो पुव्वभवसमुवज्जियमुक्कयंसंभारवसविसप्पमाणमहल्लक-
ल्लाणनिहाणो उप्पन्नो पढमो वायुदेवोत्ति । एवं च आयन्निरुण संभंतविलोयणेहिं दूरपरिमुक्कपहरणपबंधेहिं अहमह-

मिगाए पडिक्खलंतमणिकिरीडकोडिसिगियक्कमनहनिवहेहिं भालयलवडियकरसंपुडेहिं पंचगपणिवायपुरस्सरं
पणमिओ पत्थिवसहस्सेहिं तिविद्धुं । विन्नत्तो य—

देव ! परायत्तेहिं जुत्ताजुत्तं अयाणमाणेहिं । अम्हेहिं जमवरद्धं तमियाणिं खमह नीसेसं ॥ १ ॥
कुणह पसायं नियचरणनल्लिणसेवापयाणओ अम्हं । मोत्तण तुमं एकं अन्नो नो विज्जए नाहो ? ॥ २ ॥
एयमायन्निज्जण तिविट्ठणा भणियं—भो भो नरेसरा ! किमेवं जंपह ? को तुम्ह दोसो ? परायत्तचित्ताणं एस-
च्चिय गई, ता मुयह पडिभयं, पसंतडिबडमराइं मुंजह नियनियरज्जाइं, मम छत्तच्छायापरिगहिद्याण पुरंदरोडवि न
पहवेइ तुम्हाणंति । एत्थंतरे तिविट्ठुसेवोवगयनरवइवगावलोयणसंपन्नासग्गीवविणासनिच्छयं समागयं तं पएसम-
तेउरं, दिट्ठो छिन्नगलनाडिनिस्सरंतरुहरिंपकविलुत्तगत्तो रत्तचंदणकयंगराओव्व उवरि परिब्भगंतपिसियासिपक्खि-
निवारियरविकरपसरो धरियमहप्पमाणछत्तोवमं व सन्निहिनिवडियपहाणपुरिसवगो अत्थाणगओव्व आसग्गीवनरिंदो ।
अह अदिट्ठुण्वं अचंततिकवदुक्खावहं तारिसमवत्थंतरं से पासिज्जण अक्कंदिउमारद्धमेवमतेउरं—

हा हा कयंत ! निक्करुण ! किं तए पाव एवमायसियं ? । जं एवंविहपुहुइपहूडवि एसो हयास हओ ॥ १ ॥
किं एत्तियाहिं निहयाहिं तुज्झ तित्ती न सुहडकोडीहिं । उप्पन्ना निप्पुन्नय ! जमेस रायावि संहरिओ ॥ २ ॥
हे चक्क ! निक्खि ! कहं सपहुविणासाजसो तए विहिओ ? । तुम्भेहिडवि किं जक्खा ! उवेक्खियं निग्घिणा एयं ? ॥ ३ ॥

हे काल ! बद्धवरवंसजाय तुज्झवि गुणेण किं तेण ? । हा हा रक्खामणिणो वीसत्थविणासगा तुब्भे ॥ ४ ॥
 धी धी पुरोहियाहम ! चिरकालं तप्पियं तए जलणं । निछज्ज ! कहसु संपइ असिवं किं जं पडिक्खलियं ? ॥ ५ ॥
 हे अंगरक्खवग्मा ! तुब्भेऽविहु कीस संपइ पलाणा ? । हा हा एगएए चिय सव्वपि परंमुहं जायं ॥ ६ ॥
 हा पाणनाह ! संपइ पडिहयपडिवक्खसुहडलक्खंमि । तुमए सग्गोवगए तडक्किही कस्स जयढक्का ? ॥ ७ ॥
 हा रायलच्छि ! वेहव्वदूसिए कीस जीवसि इयाणिं ? । इहराणुहवसि दुक्खं दूमिज्जंती कुनाहेहिं ॥ ८ ॥
 इय विलचिरीहिं निदयताडियथणवट्टुट्टुहराहिं । वेहव्वदुक्खभरभज्जिरीहिं पल्लहत्थवलयहिं ॥ ९ ॥
 अणवरयघोरगल्लियंसुवाहं रुन्नं तहा मयच्छीहिं । जह तद्देसगएणं रुन्नं पक्खीणवि गणेणं ॥ १० ॥
 तोहेऽणुजीविणा परियणेण पम्मुक्कपोक्करुत्तेण । आसग्गीवसरीरं खित्तं जालाउले जलणे ॥ ११ ॥
 एत्थंतरे अंतोउरीजणवेहव्वदुक्खमसहमाणोव्व पयंडरणकम्मदंसणभयभीओव्व तिकखासिखंडियहयरुंडावलयणु-
 त्तरहत्तरंगोव्व समीरणुद्धुररुहिरसीयरासारसंसित्तोव्व आलोहियमंडलो झडत्ति चक्खुगोयरमइकंतो सहस्स-
 किरणो, गवलगुलियालिवलयकज्जलतिमिरपडलपडकयावगुठणा फुरंततारनयणा अणवरयनिवडंतउक्काफुलिं-
 गुरगारच्छलेण मणोहरित्तपरिपीयसुहडजणरुहिरंगडूसं व सुयंती महारक्खसिक्ख भयजणणी पसरिया रयणी, ठिओ
 नियनियट्ठाणेषु जणो, कमेण य जाए पहायसमए भणिया तिविट्ठुणा नियपुरिसा-भो भो गच्छह संगमभूमिं,

निरुध्वह पहारपरव्वसे जोहनिवहे करेह ओसहघायवंधाइणा परिताणं परिमगह दुट्ठुरंगमपल्हत्थिए पत्थिवेत्ति-
सम्मं निउज्जिऊण(अंतोउरेण)समं समगनरवइवगपरियरिओ समओ पोयणपुरं, तओ नयरलोएण कयं वेजयती,
सहस्साभिरासं ठाणठाणनिवद्धमंचारूढविलासिणीनट्टरमणिज्जं पमुक्कमुरभिपुण्णहुओवयारकलियरायमग्गं पइयपड्डु-
पडहपमुहजयतूरनियरं नयरं पविट्ठो महया विभूहए तिविट्ठू, जहोचियठाणेषु ठिओ सेसो परिवारो । तओ कइयय
वासराइं तत्थ ठाऊण पुणोऽवि समगवलकलओ चक्कछत्तधणुमणिमालागयांसंखयणपरिगओ निगओ दिसि-
विजयनिमित्तं तिविट्ठू, कमेण पसाहिंयं भारहद्धखेत्तं, अपणयपुव्वा नामिया पत्थिवा, गाहिया सेवावित्तिं, गहियाइं
तेहिंतो करितुरययणपमुहाइं पहाणपाहुडाइं, एवं च नीसेसमंडलाहिइयसहस्साणुगम्ममाणमग्गो पेच्छंतो अपुव्वा-
पुव्वनयराइं ठाविंतो अंगवंगकलिंगाइसु अन्नन्ननरिंदे पत्तो मगहाविसए, तहिं च दिट्ठा कोडिपुरिसवोज्झा महा-
सिला, सा य मुयवलावलेवओ लीलाए वाममुयदंडेण उक्खिविऊण छत्तंगं व धरिया सीसोवरिं, अतुलियवलावलोय-
णहरिसुप्फुल्लोयणेहिं य कओ नरवइहिं जयजयारवो, पडियं च मागहगणेहिं, कंहं ?—

देव ! मणालागारो तुज्झ करो कलियरुंदकोडिसिलो । सिरिधरियधरणिवट्टस्स वइह सेसस्स समसीसिं ॥ १ ॥
तुह एवंविहलीलाइएण चित्तं न कंपए कस्स । जइ सव्वहावि पत्थरविणिम्मिओ होज्ज सो न जणो ? ॥ २ ॥
इय मागेहिं णेगप्पयारवयणेहिं सथुणिज्जंतो । मोत्तुणं कोडिसिलं चलिओ राया सपुरहुत्तं ॥ ३ ॥

गच्छन्तो य पत्तो दंडगारन्नपरिसरं, तर्हि च खंधावारनिवेशं काऊण ठिओ कइवय वासराइं, एगथा य रयणी-
 मञ्जनिब्भरपसुत्ते सेवगजणे अणुरत्तविरत्तपरिवारचारमुवलंभिउं करकलियचक्को कयवेसपरियत्तो अणुवलक्खिज्जमाणो
 जामकरिघडारूढेहिं अंगरक्खेहिं नीहरिओ एगगी वासुदेवो निययगुड्डराओ, अमुणियपयप्पयारो य इओ तओ
 परिब्भमंतो जाव खंधावारनिवेशमइक्कमिऊण गच्छइ ताव निसामेइ थेवदेसतरियं मंदं मंदं कोलाहलं, तं
 च निसामिऊणुप्पन्नकोऊहलो पधाविओ तयभिसुहं, कमेण पत्तो एगं बहलतरुवरसंछन्नं काणणं, तर्हि च पत्तस्स
 उवसंतो सो कोलाहलो, तओ किं विभीसिया एसा ? महविब्भमो वा ममेत्ति जाव चित्तेइ ताव काणणब्भंतराओ
 समुट्ठिओ सदुक्खनरघणियसहो, तदणुमाणेण य पुणो पट्ठिओ तिविट्ठु, अह वच्छत्थलविप्फुरंतकोत्थुभमणिमऊहवि-
 ङ्गसियंघयारे जाए तत्थ पएसे थेवंतरगएण हरिणा दिट्ठो रुक्खेण समं चिविहबंधणबद्धो पुरिसो, (पुच्छिओ सो
 उचिचारयेण) भो को तुमं ? केण वा इममवत्थंतरं पाविओसिन्ति ? तेण जंपियं-महाणुभाग ! निविडबंधणत्तणओ
 न सक्कमि परिकहिउं, ता अवणेहि बंधे जेण साहेमिन्ति कहिए तिविट्ठुणा चक्केण निकंतिया बंधा, जाओ वीसत्थो,
 भणिउं पवत्तो य-अहो निक्कारणपरमबंधुव्व निसामेहि मम वित्तंतं, अहं रयणसेहरो नाम विज्जाहरो रुवलवन्नसुं-
 दराइमुणावहिभूयाए सिंहलरायधूयाए विजयवईनामाए पुब्बं चिय बहुप्पयारपत्थणाहिं दिन्नाए परिणयणत्थं
 संपयं समगसामग्गीसणाहो जाव तत्थ पट्ठिओ ताव एत्थप्पएसे संपत्तो समाणो वाउवेगाभिहाणेण बेरिणा वि-

ज्जाहरेण सव्वस्समवहरिऊण दुक्खेण मरउत्ति विभावितेण एवं गाढं बंधिऊण चत्तोऽहि, तिविट्ठुणा भणियं-तुमं विज्जाहरो होऊण केण कारणेण भूमिगोयरधूयं उव्वोढुमिच्छसि?, तेण जंपियं-महाभाग! अपुब्बं किंपि से खवं असरिसं च लायन्नंति, तिविट्ठुणा चित्तियं-जइ सच्चं चिय एवंविहगुणोववेया सा ता मम जोगा परिणंउति विभाविऊण भणियो एसो-अहो तुमए उव्वूढावि एसा तेण वेरिणा हीरिही, ता किं निरत्थएण तदुवल्लभेण?, विज्जाहरेण जंपियं-सच्चमेयं जइ तुम्ह सत्ती अत्थि ता तुब्भे परिणह, परिचत्ता मए इयाणि, पडिक्खं तिविट्ठुणा, कयप्पणाभोगो सट्ठाणं विज्जाहरो, हरिणावि सिंहलेसरं अणेगप्पयारोहं पत्थिऊण परिणीया सा विजयवई धूया, आगओ य निययपुरं, पडिच्छिओ महारायाभिसेओ, जाया वत्तीसं सहस्सा जुवईणं-

अहं निचपयद्विविसट्ठगीयझंकारमिस्समुखवे । नडचेडचाडुकारयकिंकरनरनियपरियरिण ॥ १ ॥
गुविभत्तचित्तिविच्छित्तिमुदरे मंदिरे निवसमाणो । अइपडिहयपडिक्खं तिखंडभरहं च रक्खतो ॥ २ ॥
भयवसनमतसामंतमंडलो तरुणिसत्थमज्झगओ । आखंडलेव्व भुंजइ विसए पंचणयारोऽवि ॥ ३ ॥
नवरं विजयवईए नामंपिहु नेव गिणहइ तिविद्धू । ईसाविसायवसओ सा य पओसं समुव्वहइ ॥ ४ ॥
एवं वोळंतंमि काले अन्नया नियमाहणनिहयदुब्बिक्खइदुक्खनिवहो समागओ भयवं सेयसत्तिथयरो, विरइयं देवेहिं विसालसालवल्लयपरिविखत्तं विचित्तमणिमयसिंहासणाभिरामं भवभयत्तसत्तंताणेक्कसरणं समोसरणं, तओ

सायर्मिलंतसुरिंदसदेहथुणिज्जमाणो उवविट्ठो सिंहासणे जिणो, एत्थंतरे जिणागमणनिउत्तपुरिसेहिं वद्दाविओ तिविहु,
 कहिओ जिणागमणवइयरो, तओ हरिसभरसमुल्लसंतरोमंचेण य दवाविं पीइदाणं सट्ठुवालसकलहोयकोडीओ तैसिं
 पुरिसाणं, समगबलवाहणो अचलेण समेओ य गओ वासुदेवो वंदणवडियाए, छत्ताइच्छत्तपसुहं जिणाइसयपवलोइऊण
 परिचत्तसयलरायचिंधो दूराओ चिय पयचारेण गंतूण तिपयाहिणापयाणपुब्बयं जयगुरुं नमंसिऊण एवं थोउं पवसो-

जय संसारमहोयहिपडंतजणजाणवत्त ! जयनाह ! । परमसिवमोक्खकारण ! रणवजिय ! विजियमयमाण ! ॥ १ ॥

निम्महिमोहमाहण ! दुट्ठकंदप्पदप्पनिहलण ! । मायाविसवड्ढिविणासपरसु जय जय जयप्पवर ! ॥ २ ॥

जय संजमसिरिवल्लह कोहमहाजलणसजलजवाह ! । जय निम्मलकेवलकलियसयलजीवाइयपयत्थ ! ॥ ३ ॥

जय विणहुकुलंबरपुण्णचंद ! सुररायनमियपयकमल ! । निष्पडिमपसमवरपुरपायार ! गुणोहसाहार ! ॥ ४ ॥

जय करुणामयसारणिसरिच्छ ! निच्छन्नकम्मदुममूल ! । दुहेसेलदलणदंभोलिसरिसनामगहण ! देव ! ॥ ५ ॥

नाह ! तुह पायंपकयमंदमयनिवहकंतिमयरंदं । फुल्लंधयं व वण्णो सयाऽवित्तहो समल्लियइ ॥ ६ ॥

को तुह जिणवर ! वयणं अमयं व समत्थदोसहरणखमं । पाऊण कुतित्थियवककलुससलीलं समीहइ ॥ ७ ॥

जइविहु दूरमसारो संसारो तहवि देव ! तुम्हेहिं । चिहंतेहिं सुणिज्जइ सारो निब्बुइपुरीओऽवि ॥ ८ ॥

आसग्गीवाइनरिंदविजयलाभाइ(भेऽवि)नेरिसो नाह ! । जाओ ममण्णमोओ जह दंसणमेत्तओ तुज्झ ॥ ९ ॥

ता पसिय भुवणबंधव ! जइवि तुमं सव्वा विगयरगो । नियचरणंदसणगुगहेण मम तहवि सेयंस ! ॥ १० ॥
एवं च सुचिरं शोऊण सो त्तिविट्ठनरिंदो निविट्ठो समुच्चियट्ठणे, भगवयावि आजोयणमित्तानुसारिणीए वाणीए
समारद्धा धम्मदेसणा, जहा—भो भो देवाणुप्पिया ! कहकहवि चिरं संसारकंतामणुपरियट्ठमाणेहिं तुम्हेहिं पा-
विओ एस मणुयजम्मो, जायं अविकलपंचिदिअत्तणं, संपत्ता निक्कलंकुलारोगाइया सामगगी, समुल्लसिया सद्धम्म-
बुद्धी, ता दुगुञ्जह मिञ्जत्ताविरइसंगं समीहह संसत्तनाणचरित्तवित्तं पेञ्जह पमायपरपाणिगणदुहविवाणं अणुचिं-
तह खणदिट्ठनट्ठसरूवयं सव्वभावाणं विमंसह पुणो दुल्लहत्तणं आरियखेत्ताइलाभस्स, अन्नं च—

तुच्छेहियसुहलवमेत्तललसा कीस वसह निस्संका ? । किं तुम्ह कयंतेणं निब्भयपत्तं सयं लिहियं ? ॥ १ ॥

किं वा केणवि अजरामरत्तणं तुम्ह दावियं ? अहवा । मरणाइदुक्खरहिंयं ठाणं वा कथयिय दिट्ठुं ? ॥ २ ॥

अहवा सासयभावत्तकारणं किं रसायणं लद्धं ? । जेणसुगत्तठाणेऽवि गाढमंदायरा होह ॥ ३ ॥

भो भो देवाणुप्पिया ! सद्धम्मोवज्जणे समुज्जमह । परिहरह पावमित्तेहिं संगतिं दुक्खसयजजणिं ॥ ४ ॥

पडिवज्जह निरवज्जं पवज्जं देसविरइमहवावि । निमुणह पसिद्धसिद्धतदेसणं मोहनिग्गमहणिं ॥ ५ ॥

अत्तसमं पाणिगणं रक्खह पालेह सीलमकलंकं । साहम्मिएसु रज्जह वज्जह विसिएसु य पविस्से ॥ ६ ॥

निग्गुणजणं उवेक्खह अचुक्करिसं सयावि परिहरह । अणत्तपुव्वगुणगमब्भस्सह नासह कसाए ॥ ७ ॥

संतोसं च निसेवह परपरिवायं कयावि माऽऽयह । ईसरिए मा म(जह मा र)जह पावकजेसुं ॥ ८ ॥

दाणाईसु पयट्टह सेवह सुविसुद्धबुद्धिणा गुरुणो । परउवयारे गिज्झह मा मुज्झह बुज्झह सतत्तं ॥ ९ ॥

एवं च भगवओ धम्मकहमायन्निज्जण हरिसुण्णुल्लोयेणेहिं केहिंवि परिचत्तपुत्तकलत्तोहिं पडिवन्ना सबविई, के-
हिंवि परिगहिंयं सम्महंसणं, अन्नेहिं अंगीकया देसविई, अन्ने य छिन्नसंसया जाया बहवे पाणिणो, हलहरनारा-
येणेहिंवि अणाचक्खणिजं पमोयभरमुवहतेहिं पडिवन्नं सम्मत्तरयणं । अह समइक्कताए पोरिसीए वंदिऊण जयगुरुं
गया निययावासं । भयवांपि अन्नत्थ विहरिओ । एवं च वच्चंतमि काले अचं सुहसागरावगाढस्स तिविहुयाइणो
एगया समागया परिभूयकिन्नरकंठा गायणा, तेहि य पदंसियं गीयकोसलं, हरियं हियं तिविहुस्स,
अन्नं च-गीउगगारो तेसिं जरस्स मणांगपि विसइ सवणमि । उज्झयनियवावारो चित्तलिहिउव सो सुणइ ॥ १ ॥

अच्छउ दूरे एवं तिरियाविहु तेसि गेयवसणेणं । निम्मीलियच्छिगो उच्छहंति नो भोयणाईसु ॥ २ ॥
एवंविहुस्सरायागुणेण हरिस्स ते सयावि पासवत्तिणो परमप्पसायठाणं जाया ।

अन्नाया य सुसेज्जानिसन्नस्स वासुदेवस्स रयणीसमए समारद्धंतेहिं गेयं, जणिओ बाढं चित्तस्स अक्खेवो, निहाणभो-
णकाले य निरूविओ वासुदेवेण सेज्जावालो, जहा-भइ ! जया मम निदा एइ तथा इमेगायणा तुमं विसजेज्जसि, जं
देवो आणेवइ तं करिस्सामित्ति पडिवज्जिथं सेज्जावालेणं, खणंतरेण य आगया राइणो निदा, तेऽपि अनित्तज्जियत्ति तदेव

गाइउमारद्धा, नवरं पच्छिमरयणिसमए पबुद्धेण राइणा ते तथा गायंते निसामिऊण, पुच्छिओ सिज्जावालो-अरे ! कीस एए न विसज्जिया ?, तेण भणियं-देव ! अइसवणसुहत्तेणं मए खणंतरं पडिवालिया, एयमायन्निऊण जायगाढकरोवो आणारसंवरं काऊण तुण्हक्को ठिओ तिविहु, उग्गए य कमलसंडपडिबोहेण मायंडमंडले उट्टिऊण सयणीयाओ कयपा-भाइयकायवो निसण्णो अत्थाणमंडवे राया, ठिया य नियनियट्ठाणसु सामंतमित्सुहडाइणो, एत्थंतरंमि सुमरिओ रा-इणा रयणिवइयरो, आहूओ सेज्जावालो, भणिया य नियपुरिसा-अरे गीयस्स (रत्तत्तेणेण ममाणाभंगस्सेयस्स) तत्त-उयतंवरसं खिवेह सवणेसुत्ति, एयमायन्निऊण नीओ सो तेहिं एगंतदेसे, कढियतउयतंबयरसेण भरिया कन्ना, महावेयणा-भिमूओ गओ य सो झत्ति पंचत्तं । तिविट्ठणावि गाढामरिसवसेण निबद्धं निविडं दुहविवाग्गेयणिज्जं कम्मं । सावि सिंह-लेसरसुया ठाणे अत्तणो पराभवं पेच्छंती हरिणा वयणमेत्तेणवि अविगणिज्जंती सुचिरमप्पाणं झूरिऊण मया तिरिएसु य उववन्ना, सेसं उवरि भन्निही । तिविट्ठवि कालंतरेण विविहसोक्खमणुंजमाणो रजे रट्ठे (य) मुच्छणु-बंधमुच्चंतो नियमुयबलेण सेसपुरिसवग्गमवमन्नंतो विविहपाणाइयायकिरियाए महारभमहापरिग्गेहिं अइकूरल्लवसा-णेण य परिगलियसम्मत्तरयणो नारगाउयं (निकाइऊण) तुलसीईवाससयसहस्साइं सवाउयं पालिऊण कालमासे कालं किंचा उववन्नो सत्तममहीए तमतमाभिहाणाए अप्पइट्ठाणंमि नरयावासे लभखपमाणे पंचधणूसियसरीरो नारगो । अइगाढपावकम्माहिं पुव्वभवसंचिएहिं गरुएहिं निहओ विसहतो दुक्खाइं परमतिकखाइं चाउदिसिनिदुर-

वज्रसूलतिक्खखगभिज्जमाणंगो अइदीणकरुणसहं पइक्खणं विलवमाणो य ।

किं पुब्बभवमि मए कयंति जेणेरिसमि ठाणंसि । निच्चंधयारतमसे उववन्नो कुच्छणिज्जमि ? ॥ १ ॥

एवं विचिंतयंतो खणे खणे घोरेयणाभिहओ । पज्जलियगेहभज्झप्पविट्ठपुग्घ विलवेइ ॥ २ ॥

अयलोऽवि कयत्तप्पारलोइयकायवो गाढसोगाभिभूओ सुसाणं व भवणं मन्नमाणो अदिट्ठपुव्वयं पिव पियज्जं च अवगणितो विसं विसयं मन्नमाणो बंधुणो बंधणं परिकप्पेमाणो पवरतरुसंडमंडिए नंदणवणे कमलकुवलयकरुओ रबंधुरासु सरसीसु सिंगारागारचारुवेसासु अंतोउरीसु खणंपि चक्खुमक्खिवंतो कत्थवि रइं अलभमाणो अचंतं संभा रासारयं भावेंतो सेयंसतित्थयरुवइट्ठधम्मवयणाइं चितितो वइरिभवणं व गिहावासं परिचइउकामो सयणोवरोहेण कइवयवासराइं ठाऊण गओ धम्मवोसायरियसमीवे, वंदिओ परमाए भत्तीए, सूरिणाऽवि दिव्वणाणेण जाऊण तइसा भिण्यायं समारद्धा धम्मदेसणा, जहा—

खणसंजोगविओगं खणपरियंदतविविहसुहुदुक्खं । नडनच्चियव्व संसारविलसियं चित्तरुवधरं ॥ १ ॥

दट्ठण को पमायइ जिणिंदधम्ममि सोक्खहेउम्मि ? । अचंतवल्लहे वा मयमि को सोयमुव्वइ ? ॥ २ ॥

जइ एगस्सेव भवेज्ज एत्थ वल्लहज्जणेण सह विगमो । ता परिभवोत्ति काउं सोगोऽवि जणेण कीरेज्जा ॥ ३ ॥

जाव य समग्गमरहाहियावि भरहाइणो कयंतेणं । विज्झविया दीचा इव पवणेण पयंडवेणेण ॥ ४ ॥

ता कीस कुसलमइणो अट्टाणे चिय कुणंति संतावं ? नाए वत्थुसरूवे खिज्जंति न जेण सण्णुरिसा ॥५॥ तीहिं विसेसयं ।
नियजीवियस्सचि जया धरणोवाओ न तीए काउं । तत्थऽण्णजीविधवे चलंमि कह कीरइ थिरत्तं ? ॥ ६ ॥

इयरजणस्स व सोगो काउं न उ जुज्जए तुह कहंपि ।

किं गिरितरूणि(ण) मंतरमणिलेण चलंति जइ दोवि (अणिलेण गिरितरूणि चलज्ज नवि मंदरो उ गिरी) ॥७॥

एसो खु सुद्धबुद्धिस्स विब्भमो जं पियस्स मरणंमि । अक्कदणेण सिरकुट्टणेण अवणिज्जइ सोगो ॥ ८ ॥

उत्तममइण पुण भवविरूवयाऽऽलोयेणेण निवेओ । उण्णजइ तत्तो चिय विसेसधम्मज्जमो होइ ॥ ९ ॥

इय चयसु सोगपसरं सरेसु संसारदारुकरवत्तं । पव्वज्जं निरवज्जं चिचा रज्जं च रट्ठं च ॥ १० ॥

एयं च समायन्निज्जण ववगयसमगसोगसंतावो हलहरो भणिउमाढत्तो-भयवं ! सयं तुमहेहिं करुणापरहि-
यएहिं भमोवइट्ठं, ता पसिय इयाणिं देह पव्वज्जं निरवज्जंति वुत्ते पवाविओ सो गुरुणा, सिक्खविओ समणधम्मं,
देसिया दसविहचक्कवालसामायारी, अब्भुवगया य तेण सम्मं । अह गामांगरेसु अप्पडिवद्धो विहरिज्ज किंपि कालं
दुक्करतवचरणेहिं सोसिज्जण सरीरं कम्मनिवहं च पत्तो सो सासयसोक्खं मोक्खंति ॥

तिविट्ठूवि तेत्तीसं सागरोवमाइं अप्पइट्ठाणे अणुहविज्जण दुक्खं चुओ समणो उववन्नो सीहत्ताए एगंमि गिरिकंदरे,
तओ—उम्मुक्कवालभावो विगयासंको समगरणंमि । परिभवइ कूचिचत्तो जमोव अनिवारिण्णसरो ॥ १ ॥

दारइ गइदकुंभत्थलाइं अइतिकखनकखनिवहेण । सारंगकुलं अचलं तासइ गलगज्जिमेत्तेण ॥ २ ॥

हिंसइ विविहजीवे इय एवं जीविऊण चिरकालं । मरिऊण पुणो जाओ नेरइओ नरयपुढवीए ॥ ३ ॥

छिंदणंभिंदणसामलिसूलारोवणपराइं दुक्खाइं । रोमुद्धोसकराइं सुमरणमेत्तेणवि जणणं ॥ ४ ॥

आमरणंतं सोढुं भमिओ विविहासु तिरियजोणीसु । अह एगत्य भवंमी कम्मखओवसमभावेणं ॥ ५ ॥

लद्धूण माणुस्सत्तं काउं छट्ठट्टमाइ तवचरणं । भोगफलमज्जिऊणं उववन्नो देवलोगंमि ॥ ६ ॥

तओ आउक्खएणं नुओ समाणो रिद्धित्थिमियसमिद्धे निरंतरमुण्यज्जमाणजिणचक्कवट्ठिवलेदेववासुदेवपहाणपुरि-
ससरिए हिए एगवीस(परियरिए एगस)रूवकालपरिकलिए अवरविदेहे खेत्ते मूयाए रायहाणीए धणंजयस्स रा-
इणो सयलंतेउरपहाणाए धारिणीए देवीए चउइसमहासुमिणसूइओ सो तिविहुजीवो कुञ्छिसि पुत्तत्तेण उवव-
न्नोत्ति । समुचियसमए य कयं से पियमित्तोत्ति नामं । वहिओ य देहोवचएणं विण्णाणयगरिसेण य, अणण्या य
सो धणंजयराया सरयनिसायसरिसवयणं तरुणतरणिपडिबुद्धुपुंडरियलयणं मणिबडमंडियकुंडलुल्लिहियपीणगंड-
मंडलं अकुडिउंगुंगनासावंसं बालप्पवालपाडोदुसपुडं कुंदमउलमालासिणिद्धसुसिलिद्धदंतपंतिं पसत्थरेहावलयरेहं-
तंकंठकंदलं मंसलसुविसालवच्छत्थलं महानयरगोपुरपयंडवाहुदंडं संगयपासोवसोहियसुण्यमाणमज्झभागं वियरिय-
सयवत्तसरिच्छातुच्छनाभिं जच्चतुरयवट्ठियकडिभागं सुरिंदवारणकरकरणिजंघाजुयलं सुपइइयलट्टसुकुमालरत्तलं

चलंतं कुमारं पेच्छिऊण जायपरमसंतोसो पवररायकुलपसूयाओ कण्णगाओ परिणाविऊण पसत्थवासरे रज्जे अभिसिंचिउं तओ तहाविहाण य सूरीणं पासे पवज्जं पडिवज्जइ । पियमित्तस्सवि अप्पडिहयसासणं रज्जं करित्तस्स कालकमेण समुप्पन्नाइं चउइस रयणाइं, ताणि य इमाणि—

सेणावइ गाहावइ पुरोहि य तुरय वहुइ गयित्थी । चक्कं छत्तं चम्मं मणि कागणि खग दंडो य ॥ १ ॥

एवं सो पियमित्तो समुप्पन्नचक्काइरयणो अणेगनरनाहनिवहपरियरिओ चक्करयणंदसिज्जमाणमगो विजयज-
त्ताए मागहतित्थ्याभिमुहं संपत्थिओ, कमेण य तस्सादूरदेसं पत्तो समाणो खंधावारनिवसं काऊण मागहतित्थाहि-
वस्स देवस्स साहणत्थं अट्टमभत्तं तवोकम्मं पडिवज्जइ, तस्स पज्जेते य हयरहजोहुरिखुडो जोत्तियपवरतुरंगं चाउ-
रघंटं रहमारूढो चक्काणुमगेण केत्तिथंपि भूमिभागं गंतूण कुवियकयंतभूविब्भमं अणेगरयणकिण्णजालकब्बुरियदि-
सावल्यं वामपाणिणा सज्जीकयजीवं कोदंडं गिण्हऊण तहा वज्जसारतुंडं विविहरयणविरहयखंदेसं मणिविणि-
म्मियचक्कवट्टिनामचिंधं दाहिणकरेण सरं आयन्नमाकडिऊण मागहतित्थाहिवस्स सम्मुहं सुयइ, सोऽवि सरो दुवा-
लस जोयणाइं गंतूण मागहदेवस्स सहाए निसन्नस्स तस्स पुरओ निवडिओ, तं च सो दद्वण निट्ठुरनिडालवट्टनि-
विट्ठुभिउडिभीसणवयणो गाढकोवभरारुणनयणो भणिउमाहत्तो—

रे रे कस्स कयंतेण सुमरियं ? कस्स वल्लहं न जियं ? । को मज्झ कोवदीवयसिंहं व वंछइ पयंगोव ? ॥ १ ॥

किं केणइ भुयबलदप्पिण देवेण अहव मणुएणं । जक्खेण रक्खसेण व एसो खित्तो सरो होही ? ॥ २ ॥

इयं खणमेगं परिचिंतिऊण गिण्हइ सरं सहत्थेणं । पेच्छइ य चक्कवट्टिस्स नामयं मणिविणिम्मविंयं ॥ ३ ॥

एवं च ववगयसंसओ उवसमियकोवविगारो विविहमहामोलुचित्तमणिरयणाभरणनामं कियसरसणाहो पियमित्त-
चक्कवट्टिणो सगासमुवंगंतूण मत्थए अंजलिं काऊण य विजएणं वद्धावेइ, भणइ थ-जहाऽहं इयाणिं तुम्ह आणा-
निइसवत्ती किंकरनिव्विसेसो, ता पडिच्छह इमं पीइदाणंति भणिऊण आभरणाइं सरं च समण्णेइ, चक्कवट्टीवि तं
सक्कारिऊण सम्मानिऊण य सट्ठणे विसज्जेइ, रहं पि परावत्तिऊण खंधावारमुवागच्छइ, भोयणाइ काऊण य किंकर-
पुरिसेहिं मागहदेवस्स अट्ठाहियामहिमं कारावेइ । तस्स य पज्जंते चक्काणुमगेण खगचावनारायकणकप्पणिसु-
ललडलिभिं डिमालपमुहपहरणहत्थसुहडसत्थाणुजायमगो हत्थिरयणमारूढो नरिंदो कालपीयरत्तपंडुरवण्णणेगचिंध-
सहस्सेहिं छायमाणोच्च अंबरतलं हयहेसियगयगुलगुलाइयरहघणधणाइयरवेहिं बहिरयंतोच्च जीवलोयं वरदामति-
त्थाभिमुहं वच्चइ । कमेण य तहिं पत्तो समाणो पुब्बविहीए वरदामदेवस्स अट्टमभत्तं रयणपहरणं अट्ठाहियामहिमं च
करेइ । एवं पढासतित्थाहिवस्सऽवि, नवरं पभासतित्थदेवो मालं मउडं मुत्ताजालं कडगुत्तुडियाणि य चक्कवट्टिस्स
पीइदाणं पयच्छइत्ति । तओ पुणोऽत्रि जक्ख सहस्सपरिवुडेण अंतरिक्खगएण चक्करयेणेण दंसिज्जमाणमगो चक्कवट्टी
सिंधुमहानईए दाहिणिछेणं कूलेणं सिंधूदेविभवणाभिमुहं गओ, तत्थवि अट्टमभत्तं पगिण्हइ तस्स पज्जंते य सिंधु-

देवीए सुहासणत्थाए चलयं सीहासणं, ओहिनाणमुणियचक्कवट्टिसमागमा य नाणामणिक्कणगरयणभत्तिचित्ताणि
दोन्नि भद्दासणाइं कडगाणि तुडिगाणि वत्थाणि पगहिऊण चक्कवट्टिसगासमागया पंजलिउडा विणएण सम-
प्पेइ, रायाऽवि तं सककारिय सम्माणिय सट्ठाणे विसज्जेइ । तओ पुणरवि चक्करयणं वेयट्ठपव्वयाभिमुहं गंतुमारद्धं,
रायाऽवि सबलवाहणो तदणुसारेण य(गच्छइ)कमेण य पत्तो वेयट्ठपव्वयस्स नियंवेदसं, तत्थ य खंधावारं निवे-
सावेइ, वेयट्ठुगिरिक्कुमारदेवोऽवि पुव्वनाएण चलियासणो विविहालंकारहत्थो सेवं पडिच्छइ । कइवयदिगाणंतरं च
तिमिसगुहासमीवमुवागयस्स चक्किणो अट्टमभत्ततवचलियासणो कयमालयदेवो भालयलविठुलंतकरकमलो झडत्ति
चक्खुगोयरमागओ, थीरयणजोगं रयणालंकारं अन्नाणि य विविहाणि भूसणाइं पणांमेइ, आणानिहेसं च बहुम-
न्निऊण गए तंमि राया विजयसेणं सेणावइं रयणभूयं सहाविऊण एवं वागेइ-भो विजयसेण ! गच्छाहि तुमं
सिंधुमहानईए पच्चत्थिमिल्लेदसं नगनगरागइपरिक्खित्तं सिग्घं साहिऊण एहित्ति, जं देवो आणवेइत्ति विणएण
सासणं पडिच्छिऊण सेणाहिवो विहियतक्कालोचियमज्जणाइवावारो महापरक्कमो तेयंसी मेच्छभासाविसारओ
विस्सुयजसो पवरकुंजरखंधाधिरूढो सन्नद्धबद्धकवओ उप्पीलियसरासणधणुपट्ठो अणेगगणनायगदंडनायगपरिवुडो
धरियधवलायवत्तो चलंतविमलचामरो पहयतूरववहिरियदियंतरो सिंधुमहानईतीरमुवागच्छइ ।

ताहे स चम्मरयणं सिंधुमहानइजलंमि वित्थइ । बारसजोयणमेत्तं नावारूवेण तरणट्ठा ॥ १ ॥

तो तंमि समारूढो हरिकरिपाइक्कचक्करियरिओ । वीसत्थो पवणवसुद्धसंतसुमहल्लकखोलं ॥ २ ॥
 गोपयमिव सिंदधुनइं लंघित्ता मेच्छजाइए सब्बे । आणान्निदसे संठवेइ रयणाइं गिण्हेइ ॥ ३ ॥
 सामी ! तुम्हे सरणं गई य एमाइ जंपमाणे ते । ठविउं सट्ठाणेसुं विणियत्तइ विजयसेणो तो ॥ ४ ॥
 पियमित्तचक्कवट्टिस्स पायपंकयजुयं पणमिऊण । रयणाइं समप्पइ सो मिलक्खुविजयं च वज्जरइ ॥ ५ ॥
 पुणरवि रण्णा भणिओ सेणाहिर्वई जहा तुमं भद्द ! । गच्छसु तिमिसगुहाए कवाडउग्घाडणत्थाए ॥ ६ ॥
 ताहे तहत्ति सम्मं पडिसुणिऊणं समग्गवल्लकलिओ । गंतुं गुहासमीवे अट्टमभत्तं तवो कुणइ ॥ ७ ॥
 अह तिवसुत्तो पहणइ निविडेणं तिद्वदंडरयणेणं । ते तिमिसगुहाकवाडे महप्पमाणे वइरघडिइ ॥ ८ ॥
 दंडाभिधायपरिपेड्डियाइं कुंचारवं करेत्ताइं । कुकलत्तकहियगुज्झं व ताइं विहडंति वेगेण ॥ ९ ॥
 तयणंतरं च वलिउं साहइ सो चक्कवट्टिणो वत्तं । सोऽवि य गयमारूढो समग्गसेणाए संजुत्तो ॥ १० ॥
 चउरंगुलप्पमाणं रोगासिवनासणं मणिं घेत्तुं । चक्काणुमगल्लगो तिमिसगुहं विसइ भयराइओ (महराया) ॥ ११ ॥
 तत्तो तिमिसगुहंतं धयरविंद्रसणट्टमइगरुए । मंडलगे सो विलिहइ कागिरियणेण भित्तीसु ॥ १२ ॥
 ताहे मंडलगमज्जालउज्जोयहणियतिमिराओ । नीहरइ सुहेण समं सेणाए सो गुहाहिंतो ॥ १३ ॥
 इओ य वेयड्डपरभागवत्तिणो विलाया महापरक्कमा अपरिभूयसामत्था कणगरययधणधन्नसमिद्धा विगणिभूणो

निवसन्ता बहूनि गंधर्वनगराहरिवरिसमूहिकंपपमुहाइं उपपाइयसायाइं पेच्छंति, तते णं ते ताणि पेच्छिऊण उच्चि-
ग्गा निराणंदा ओहयमणसंक्रप्पा विणि(दीण)यं पिव अप्पणं मन्नंता जाव चिट्ठंति ताव सहसच्चिय उक्किट्ठसी-
हनायकलयवेण समुहमहणसकं समुण्णायमाणो निसियकरवालसेल्लुभल्लिकुंतपहरणकरेहिं सूरहिं अणुगम्ममाणो
पत्तो तेहिं देसं पियमित्तनरवइ, तं च आगयं निसामिऊण ते मिलेच्छा पयंडकोवारुणच्छा परोप्परं मंतंति-भो भो
एस कोइ कयंतचोइओ अम्ह विसयं उवहविडकामो वट्टइ, ता तहा करसो जहा एस अंतरा चव विणस्सइत्ति,
एवं संपहारित्ता पीडियदुब्भेयकवया विचित्तपहरणहत्था समुद्धुयमगरनरवसहसहूलगरुलाइचिंथा पोरुसाभिमाण-
मुव्वहता अहमहमिगाए गंतूण चक्किणो अगसेन्नेण संपलग्गा जुज्झिउं, तओ य अगसेणं हयपरक्कमं निवडियसु-
हंडं पडिभगरहवरं खंडियजच्चतुरंगवगं पडिखलियनरवइजणं तेहिं कयं पेच्छिऊण विजयसेणो सेणाहिचइ जाय-
कोवो कमलामेलगनामं आसरयणं आरुहिऊण कुवलयदलसामलं सवत्थ अप्पडिहयं नरवइहत्थाओ खगगरयणं
च गहिऊण ते विलाए चाउदिसिंपि पसरिए पडिखलइ । किं बहुणा ?—

तिसिमिंय दिणयेरेणं मुयगसमूहोव पक्खिराएणं । सेणाहिवेण निहया भीया ते अइगया सगिहं ॥ १ ॥

धेत्तणं धरसारं पुत्तकलत्ताइयं च मरणभया । अइदूरमवक्कता सिग्घं विसमेसु ठाणेषु ॥ २ ॥

ताहे सिंधुनइए कूले परिचत्तसव्वावारा । उत्ताणा निव्वसणा अट्ठमभत्तं पगिणहंति ॥ ३ ॥

सत्तुबलहणणेहं पुर्विपिय पाडिहैरणपरे । सुमरंति एगचित्ता कुलदेवे मेहसुहनामे ॥ ४ ॥
अट्टमभत्तस्संते तत्तो चल्यासणा सुरा एंति । गयणंगमोइन्ना भणंति किं सुमरिया अम्हे ? ॥ ५ ॥
सिद्धं च चिलाएहिं जह अम्हे रिउबलेण पडिहणिया । ता तुम्हे सुसुमूह रिउपक्खं अम्ह रक्खट्ठा ॥ ६ ॥
देवेहिं तओ भणियं एसो पियमित्तनाम वरचक्की । काउमिमस्स विणासं अहो न सक्कोऽवि सक्केइ ॥ ७ ॥
ता भो अणभिमवणिज्जो एस, केवलं तुम्ह पक्खवायमणुसरंता किंपि उवसगमोत्ति निवेइऊण तेसिं अंति-
याओ ते मेहसुहा अवक्कमंति, नरवइखंधावारस्स उवारिं मेहनिवहं विउवंति, तथो जुगसुसलसुट्ठिप्पमाणधाराहिं
निरंतरं वारिनिवहं सत्तरत्तं जाव मुयंति । पियमित्तचक्कवट्ठीऽवि तं तहाविहं पिच्छिऊण दिवचम्मरयणं परासुसइ,
तंपिय खिप्पमेव दुवालस जोयणाइं तिरियं पवित्थरइ, तत्थ सो समत्थोऽवि खंधावारो समारुहइ, पुणोऽवि नरिंदो
नवनवइसइस्सकंचणसलागपरिमंडियं महरिहं विविहभत्तिचित्तं डिंडीरपिट्ठपंडुरं छत्तरयणं खंधावारस्स उवारिं वारस
जोयणाइं समहियाइं वित्थारेइ, मणिरयणं च किरणजालं मुयंतं सरयरविसरिच्छं छत्तमज्झभागं ठवेइ, गाहावइवि
चम्मरयणेगेइसंमि तदिवसपइन्ननिष्फणपूयाणं सबधण्णाणं अणेगकुंभसहस्साइं उवट्ठवेइ, एवं च सो राया सव-
प्पयमेहिं अणुविग्गो चम्मरयणमारूढो छत्तरयणच्छन्नोवारिमविभागो मणिरयणकओज्जोओ गाहावइउवट्ठावियवन्न-
निचओ नियमवणगओव सुहेण अच्छेइ । किं बहुणा ?

नवि से छुहा न वाही नैव भयं नैव विज्जए दुक्खं । विजयाहियस्स रण्णो खंधावारस्सवि तेहव ॥ १ ॥
अह पियमित्तनरिंदो संपत्ते सत्तरत्तपज्जते । चित्तेइ को णु एसो जो मं विइवइ सलिलेणं ? ॥ २ ॥
एत्थंतरंमि आवद्धपरियरा विविहपहरणसमेया । सोलस जक्खसहस्सा मेहमुहाणं गया पासे ॥ ३ ॥
भणिग्या य तेहिं रे रे अप्पत्थियपत्थिया धुवं तुम्हे । जं चक्खवट्ठिणोऽविहु उवसगं एवमायरह ॥ ४ ॥
ता मुंचह चक्खुपहं अहवा जुद्धत्थमभिमुहा होह । इइ भणिए मेहमुहा गया चिलायाण पासंमि ॥ ५ ॥
साहंति सव्ववइयरमसमत्थत्तं च अत्तसत्तीए । नरवइसेवाकज्जे पेसंति य ते चिलाएऽवि ॥ ६ ॥
अह मुक्ककेसहत्था पहरणरहिया नियंसिओल्लपडा । भयवसविंसंतुलंगा गंतूण नमंति ते मेच्छा ॥ ७ ॥
कणगं विचित्तरयणे अन्नपि विसिट्ठवत्थुमण्णिंति । पडिवज्जिय तस्सेवं नियावराहं च खासंति ॥ ८ ॥
एवं च पवज्जियसेवा मिलेच्छा सम्माणिऊण चक्किणा विसज्जिया सट्ठणेषु, सेणावईवि सिंधुमहानईए वीअखंड-
साहणत्थं पेसिओ पुव्वविहीए, तं च साहिऊण पच्छाऽऽगए तंमि पियमित्तो राया चक्काणुमगणेण पट्ठिओ वेयड्ढा-
भिमुहं, कमेण य पत्तो पव्वयनियवदेसं । तओ मणसीकरेइ उत्तरदाहिणसेठिविजाहरे, तेऽव्विय भयखुभियचित्ता
नाणाविहकणगरयणपमुहपहाणवत्थुसमण्यणपुव्वयं नरवइणो सिरसा सासनं पडिच्छंति । सेणावईऽवि पुव्वकमेण गंगा-
महानईपुव्वखंडं साहिऊण पासमल्लियइ ॥

पुव्वक्कमेण पुणरवि खंडुगुहं लंघिऊण नरनाहो । चउरंगंबलसमेओ गंगापच्चत्थिमे कूले ॥ १ ॥
 खंधावारनिसेसं काऊणं पवरयणपडिपुण्णो । अट्टमभत्तपुरस्सरमह गिण्हइ नव महानिहिणो ॥ २ ॥
 मणवंछियत्थकरणेक्कपच्चला वइरनिम्मियकवाडा । बहुपुन्नपावणिज्जा इमेहिं नांमेहिं ते नेया ॥ ३ ॥
 नेसण्ण पंडुए पिंगले य तह सव्वरण महपउमे । काले य महाकाले माणवग महानिही संखे ॥ ४ ॥
 एएसिं चिय चक्की निहीणमनिहीणपोरिसारंभो । सक्कारपुव्वयं कारवेइ अट्टाहियामहिमं ॥ ५ ॥
 गंगापुरत्थिमिळुं सेणावइणा दुइज्जमवि खंडं । गाहावइ तत्थ ठिओ भुंजंतो विविहविसयसुहं ॥ ६ ॥
 एवं च सो पियमित्तचक्कवट्ठी पसाहियछवखंडो निज्जियपडिवक्खचक्को अप्पणो आणाए ठवेंतो नराहिवे दंसंतो
 नियपरक्कमं सम्माणंतो सेवगज्जं विरयंतो दीणाणाहाण अणवरयदाणं वत्तीसनरवइसहस्साणुगम्भमाणो पडिनियत्तो
 मूयानयरीए, पडिच्छिओ दुवालसवारिसिओ महारायाभिसेओ । एवं च कयकायवो वत्तीसाए वत्तीसवद्धनाडयस-
 हस्साणं सोलसण्हं जवखसहस्साणं तिण्हं तिसट्ठीणं सूयसयाणं अट्टारसण्हं खेणिप्पसेणीणं चउरासीए तुरगसयस-
 हस्साणं चउरासीए पवरकुंजरसयसहस्साणं छणउइए मणुसकोडीए वावत्तरीए पुरवरसहस्साणं वत्तीसाए जण-
 वयसहस्साणं छन्नउइए गामकोडीणं नवणउइए दोणमुहसहस्साणं चउवीसाए कव्वडसहस्साणं अडयालीसाए
 पट्टणसहस्साणं चउवीसाए मंडवसहस्साणं वीसाए आगरसहस्साणं सोलसण्हं खेडसयाणं चउदसण्हं संवाहसह-

स्साणं अन्नेसिं च राईसरसेट्टिसेणावइपमुहाणं जणाणं आणिससरियसारं सामित्तमणुपालितो दिव्वं विसयसुहमणु-
भुजंतो य कालं बोलेइ ।

एगया य पसंतचित्तो भवणोवरिभूमिगाए ओलोयणगओ जाव दिसावलयभवलोएइ ताव सहसच्चिय पेच्छइ
गयणं गणे समुत्थियं थेववित्थारं मेहखंडं, तं च-कज्जलभसलगवलकोइलकालिंदीजलसामलं फुरंतविज्जुदंडुडामरं
धंतकलहोयधवलगोपंतिमणहरं समुल्लसंताखंडलगंडीवाडंवरमणिज्जं मंदमंदमुक्काविंदुसंदोहसुंदरं गंभीरगज्जिरवतं-
डवियसिंहडिगणं खणमगं दिसामुहेसु पसरिऊण सहसच्चिय समुच्छलियपवलपवणप्पणोलिज्जमाणं सव्वहा पणट्ट-
मवलोइऊण वित्तेइ-अहो केरिसी वत्थुपरिणइ? जं तारिसं घणपडलमचंतनयणाभिरामं खणभेत्तमुन्नइ पाविऊण संपयं
सव्वुच्छेयमावन्नं, एयाणुमाणेणं चिय सव्ववत्थूणं एसा गइ, खणविगमयम्मो य एत्थ किं पडिबंधाणं?, का वा रइ?
को वा उत्तरोत्तरकायव्वविहाणुज्जमो? कहं वा खणभेत्तं पि वज्जवत्थूसु विस्सासो, अच्छंतु वा वज्जवत्थुणो, जं
इमं सयलमणोरहमंदिरं सरिं जस्स किर निमित्तं कीरइ कर्तुरयरहजोहजुवइपुरागरपमुहरज्जंगोवज्जणसमुज्जमो
तं पि उप्पायधम्मत्तणेण पच्चक्खदिट्ठविणट्ठमेहमालं व धुवं विणस्सरसीलं, अओ कुसला कहमेयस्स निस्सार-
पोगलचओवचयरूवस्स अट्ठिमिजवसाकहरिमंसमुक्काइविलीणकारणसमुब्भवस्स विविहरोगनिवहरिगहियस्स पइ-
दिवसणहणविलेवणभोयणपमुहोवयारपरिपालणिज्जस्स सीयतावायंकाइदोसरक्खणिज्जस्स परमदुगुच्छणिज्जगंधस्स

असुइपडिपुण्णकलसस्सेव बाहिरमेत्तरमणीयस्स दुज्जणचेट्ठियस्सेव अविथारयुंदरस्स महानरिंदस्सेव विसिट्ठविस-
याणुरागिस्स दुद्धपाणपरव्वसमज्जारस्सेव अणवेक्खियपयंजमदंडाभिघायस्स विविहप्पयोरहिं उवलालणत्थं गि-
ण्हंति रत्नं करेति निरेक्खचित्ता पाववावारं सथावि रक्खणत्थं विविहपहरणहत्थं धरेति सुहडसत्थं अणवरयसं-
तावकरं कोहलोहाइवेरिनियरं निचं पचासन्नाट्ठियं अणवेक्खिऊण जोयणसहस्संतरियं संकंति सत्तुनिवहं सक-
ज्जमत्ताणुरागिणं पि निक्खवडपेम्मं मण्णंति परियणं अवस्संभावनिहणं पि धुवं लक्खंति धणं, ता अहो तेसिं पस-
सच्चित्तया अहो निव्वियया अहो महामोहमहिमया अहो इहलौघपडिबंघपरघसया अहो आगामिदुक्खनिरेव-
क्खया अहो दुहविवागावलोयणपडिक्कूला, इइ चिंतयंतस्स पढियमेगेण कालनिवेयएण वेयालिएण—

विच्छायं पच्छिमासागयमिममहुणा सूरविबं मिलता, रोवंति द्वाडलिजालुब्भडरवमिसओ पुंडरीयाण संडा । कंदंते
चक्कवाया गुरुविरहमहादुक्खसंतत्तगत्ता, धी संसारो (संसारो धी) असारो जमिह फुडमहो सासयं नत्थि किंपि ॥१॥

राइणाडवि एवमायान्निऊण चिंतियं अहो अणिचयाए संबद्धं साहु पढियं एएण, जुत्तो संपयं मम धम्मज्जमो काउंति
निच्छिऊण पसुत्तो रयणीए । ततो खणे खणे भवनिग्गुणत्तं पेहमाणस्स पाणिवहपमुहाइ दुक्कियाइ गरिहतस्स संसारुब्बयं
वहमाणस्स सुहिसंबद्धं बंधणं व गणेंतस्स भोगे भुयंगेव परिकप्पितस्स मायंदजालं व जीवलोयविलसियमवलोयंतस्स
विसालसेज्जाएवि तल्लुवेळिं करेंतस्स कहकहवि बोलीणा रयणी, समुग्गओ दिवायरो । एत्थंतरे पढियं भागहेण—

पडिहयपडिवक्खं चक्कादिनेक्कसोक्खं, मिउकरमणिज्जं सज्जणांससणिज्जं ।

तुममिव रविबिंबं पुच्चसेलावलंबं, उदयमिममियाणिं जाइ दोसेक्कहाणिं ॥ १ ॥

इमं च उदयसहसुंदरं सिलोगमायन्निऊण संभावियापुव्वलाभो नरवई समुट्टिऊण सयणिज्जाओ कयपाभाइयकायवो निसन्नो सीहासणे । एत्थंतरे समागया उज्जाणवाल्या, कयप्पणामा विन्नविउमाढत्ता य—देव ! वद्धाविज्जह तुब्भे जेण समागया भगवंतो बहुसीसगणसमेया पोट्टिलाभिहाणसूरिणो, समोसरिया य तुम्ह उज्जाणेत्ति । एवमायन्निऊण निब्भरं पमोयभरमुच्चहतो दाविऊण तेसिं चिंताइरित्तं पारिओसियं पवरवरणखंधाधिरूढो सब्वपरियणस-हिओ महाविमूईए गओ चक्की उज्जाणे, वंदिया सब्वायेणं सूरिणो, उवविट्ठो य जहासन्निहियघरणीए, जोडियकरसंपुडेण साहिओ गुरुणो मेहविगमदंसणुब्भूओ सद्धम्मससुज्जमसंमुहो नियचित्तपरिणामोत्ति, गुरुणा भणियं-भो महाराय ! कुसलाणुसारिणी तुज्झ बुद्धी, संपन्नो कम्मविवरो करकमलं निलीणा मोक्खलच्छी, जस्स तुह एवं-विहा वासणा, ता महाराय ! तिविहा पुरिसा भवंति, तंजहा—उत्तिमा मज्झिमा जहन्ना य । तत्थ—

उत्तमपुरिसा भवभंगुरत्तणं जाणिऊण णियमईए । परिचत्तगिहकलत्ता परलोयहिंयं पवज्जंति ॥ १ ॥

गरुयं रोगायकं तहाविहंपि अ विओगदुक्खं च । दट्ठूण मज्झिमा पुण कहमवि लगंति जिणधम्मो ॥ २ ॥

जे उ जहन्ना ते सव्वहावि त्रिविहावईनिमग्गावि । दुक्खसयपीडियाविहु न मुत्तिमग्गंमि लगंति ॥ ३ ॥

करुणोयहिणा गुरुणा भणिज्जमाणावि विविहवयणेहिं । अच्छउ काउं धम्मं सहहिउं पि धि न सक्कति ॥ ४ ॥
 इय मज्झिमा जहन्ना य हुंति धम्माहिगारिणो न तथा । जह सुणियभवसरूवा सभावओ उत्तिमा पुरिसा ॥ ५ ॥
 ता भो महायस ! तुमं जोगो सव्वणुभणियधम्मस्स । संपइ करेसु सहलं एयायरणेण नियजीयं ॥ ६ ॥
 नहि विन्नायसरूवे चिंतामणिपमुहदिव्वरणंमि । अगहणिच्छा जायइ क(इ)यावि (वि)सुद्धिबुद्धीण ॥ ७ ॥
 अन्नं च-जलवतरलं जीयं सुरिंदकोदंडविब्भमं पेमं । गयकणतालचवलं पुण्णं पि सरीरलायणं ॥ ८ ॥

मारुयपणुणणपण्णं व भंगुरं सुंदरं पि तारुणं । आवयलक्खनिमित्तं वित्तं पि कहं पि पविट्ठं ॥ ९ ॥
 एएसिं ऐक्केकं पि नूण वेरग्गकारणं गरुयं । सुहबुद्धीणं जायइ किं पुण सव्वेसि समवाओ ? ॥ १० ॥

अच्छरियमिमं जे एरिसेहिं संवेगभावहेऊहिं । निच्चं विज्जेतेहिवि न भोक्खमग्गे पयट्ठति ॥ ११ ॥

किं बहुणा कुणसु तुमं संपइ सद्धम्मकम्मपडिवत्तिं । बहुविग्घो सेयत्थो कालविलंबो न ता जुत्तो ॥ १२ ॥

एवं सोच्चा चक्खवट्ठिणा भावसारं चलणेसु निवडिऊण भणिओ गुरु-अवितहमेयं, इयाणिं समीहामि अगाराओ
 अणगारियं पडिवज्जिउं, गुरुणा भणियं-भइ ! मा पडिबधं करेसु, जुत्तमेयं तुम्हारिसाणं मुणियपरमत्थाणंति मुत्ते
 वंदिऊण गुरुं गओ नयरीए चक्खवट्ठी । समाहूया नायरयमंति सामंतसेणावइपमुहपहाणपुरिसा, भणिया य-भो भो
 इयाणिं जाया अह गिहपरिचायबुद्धी, काउं वंछामो निग्गंथपावयणपडिवत्तिं, ता खमियवं तुब्भेहिं जं मए गुरा

निथोइया आणानिहसे, काराविद्या सेवाविहिं, पीडिया समहिगकरहणेणत्ति, तेहिं भणियं-देव !
वज्जोवलेहिं घडियं हिययं अम्हारिसाण निब्भंतं । जं एरिसाइं वयणाइं तुम्ह सोउं न बिहडेइ ॥ १ ॥
जणणीजणगा जेणं पढमं उवगारिणो परं जाया । परमुत्तरुत्तरुणेषु नूनं अम्हे तए ठविया ॥ २ ॥
ता कह इयाणिं तुह चरणकमलसेवाविवज्जिया गेहे । निग्घणचित्ता अम्हे निवसंता नेव लज्जामो ॥ ३ ॥
जह तुम्हे तह को वा अवराहपयं तित्तिविखही अम्ह । जह इहलोए तह परभवेऽवि ता नाह ! तं सरणं ॥ ४ ॥
एवं भणिए राइणा वुत्तं-जइ एवं ता निययगेहेसु गंतूण सट्टाणे पुत्ते ठविऊण य कयसयलकायद्या पवरसिविगा-
धिरूढा ममंतियं पाउब्भवह, तहत्ति पडिवज्जिऊण गया ते सगिहेसु, कयं तक्कालोचियं किच्चं, राइणावि
अभिसित्तो नियज्जे पुत्तो, समप्पिया करितुरगाइणो, कयमज्जणालंकारपरिगहो य चारुसिविगाधिरूढो तेहिं सवेहिं-
वि पवज्जागहणाभिलासीहिं परिवुडो दिज्जंतेसु अणिवारियप्पसरं कणगाइदाणेसु वज्जंतेसु चउविहत्तरेसु नचंतेसु तरुणि-
सत्थेसु थुणंतेसु मागहनिवहेसु गओ उज्जाणं, ओयरिओ सिविगाओ, तिपयाहिणीकाऊण चंदिओ सूरी परिचत्ता-
भरणस्स य दिन्ना से गुरूहिं पवज्जा, अंगीकया य तेण भावसारं । अह पटियजिणिंदुहिदुसिद्धंतसत्थो गुरुजणपय-
आराहणुज्जुत्तचित्तो परिहरियपमायुम्मायमायापवंचो बहुविहतवकम्मासेवक्खीणदेहो ॥

विमलगुणकलावं अज्जिणंतो जिणंतो, कुसुमसरपमोक्खं वेरिवग्गं समग्गं ।

नियजियमिव सन्वे पाणिणो रक्खमाणो, खणमिव अचयंतो सुत्ततत्तत्थच्चित्तं ॥ १ ॥
 सुहदुहमणिलेद्धूसत्तुमिन्ताइएसुं, तुलमिव समरूवं चित्तवित्तिं धरितो ।
 तिणमिव पडलगं छंडितं सव्वसंगं, विहरइ वसुहाए निष्पकंपो महप्पा ॥ २ ॥
 तो वासकोडिमंगं पव्वज्जं पालिऊण कयमरणो । सुक्कमि देवलोए जाओ देवो महिद्धीओ ॥ ३ ॥
 इय वीरनाहचरिए सुपवित्ते दुक्खदारुकरवत्ते । सिवपुरंसमुहपत्थियमंगलकलसेक्कवरसउणे ॥ ४ ॥
 उसभजिणकहियहरिचक्कवट्टिपयपवरलामपडिबद्धो । जणमणविम्हयजणणो संमत्तो तइयपत्थावो ॥ ५ ॥ जुम्मं ॥

(इति तहओ पत्थावो)

चतुर्थः प्रस्तावः

हरिचक्कवईण इमा भणिया वत्तवया पयत्तेणं । एत्तो नंदणनरवइवित्तंतं भे परिकहासि ॥ १ ॥
 अत्थि सयलवसुंधारामणीरयणकन्नपूरोवमा वेसमणरायहाणिविब्भमा छत्ता नाम नयरी, तत्थ धम्मराओ
 नयमग्गपव्वत्तेण कयंतो कोवेण अज्जुणो कित्तीए बलमहो भुयबलेण मयलच्छणो सोमयाए दिणयरो पयावेण पव्वणो
 सरीरसामत्थेण गुरू गुरुबुद्धिविभवेण महुमहो बलिसत्तुदमणेण वम्महो रूवेण सयलजयपायडजसो जियसत्तू नारा
 राया, तस्स य मयरद्धयपणइणीसमइरेगरूवविभवेडवि विगयदप्पा इत्थिभावेडवि दूरपरिचत्तमाया जहत्याभिहाणा

भद्रा नाम देवी, तीए सद्धिं अणुरुक्खविसयसोक्खमणुहवतस्स राइणो वच्चंति वासरा, अन्नया य सो पियमिच्चो
आउयक्खएणं देवलोगाउ चइऊण समुपण्णो तीसे पुत्तत्तणेण, कयं च समुचियसमए नंदणोत्ति नासं, धवल-
पक्खससहरव्व वड्डिओ सरीरेणं कलाकलावेण य । अन्नया पिउणा जोगोत्ति कलिऊण निवसिओ नियपए, जाओ
सो नंदणो राया, पुव्वप्पवाहेण पालेइ मेइणीं । एवं च तस्स निज्जिणंतस्स सत्तुनिवहं इंदियगणं च वित्थारंतस्स
दितामुहेसु निम्मलं जसप्पसारं गुणनिवहं च पणासंतस्स दोससमूहं पिसुणवगं च नितस्स समुन्नइं कोसं वंधुजणं
च परिपालितस्स साहुलोयं गुरुजणोवएसं च समइक्कताइं चउवीसवाससयसहस्साइं । अन्नया य बाहिरुज्जाणे समोसढा
भवंतो भीमभवजलहितरणतरंडा विमुद्धसन्नाणाइगुणरयणकरंडा मोहमहामलपेळणपयंडा कुमयतमोसुसुमूरण-
चंडमायंडा मिच्छत्तंधजगज्जलंबणेक्कदंडा पडिबोहियभवियकमलखंडा सुगहियनामधेया पोट्टिलाभिहाणा थेरा,
तओ सो राया विण्णायतदागमणो वियसियवयणो समुल्लसियकवोलो वियंभियसवंगरोभंचकुओ समागओ वंद-
णत्थं । तओ तिपयाहिणीकाऊण पढमदंसणुच्छलियहरिसपगरिसविप्फारियाणं धवलदिट्ठिवायाणं छलेण विल-
सियसभमरसियकुसुमोहिं पूयापब्भारंपिव सब्वगियं गुरुणो करेमाणो पयलंतनयणाणंदजलेण पक्खालेउसुवट्ठिओव्व
चरणे चरणेक्करसियमाणसो माणसोयरहिओ हिओवएसोवलभकामो कामोवघायसूरस्स सूरिणो निवडिऊण चलणेसु
परमपमोयमुव्वहंतो भणिउमाढत्तो—

वज्रिहरहरिसुराणं पि अज्ज मन्नामि अप्पयं अहिंयं । जं तुम्ह पायपउमं दुल्लहलंभं मए पत्तं ॥ १ ॥
 ते दूरनिरंतरवित्थरंतमुहनिवहभाइणो मणुया । जे तुम्ह चलणकमले कुणंति भसलत्तणं धन्ना ॥ २ ॥
 जीविज्जइ कज्जि एत्तियस्स तुच्छेऽवि जीवलौयंमि । जेण किर कहवि तुम्हारिसेत्थ दीसंति तित्थसमा ॥ ३ ॥
 उव्वहउ मही भुवणत्तएवि पयडं वसुंधरा नामं । जा अज्जवि तुम्ह सरिच्छपुरिसरयणाइं धारेइ ॥ ४ ॥
 इय थुणिऊणं विरए भत्तीए नंदणे नरिंदंमि । जोगोत्ति कलिय कहिउं पारद्धो सूरिणा धम्मो ॥ ५ ॥
 भो नरवइ ! संसारे सुचिरं परिभमिय दुक्खसंतत्ता । नरयाइगईसु केऽवि पाणिणोऽणंतकालेणं ॥ ६ ॥
 बालतवायराणाओ अहवावि अकामनिज्जरवसेण । पावंति माणुसत्तं कहकहवि हु रिद्धिसंजुत्तं ॥ ७ ॥ जुम्मं ॥
 पत्ते य तंमि अविगणियभवभया चत्तधम्मपडिबंधा । हीलियधम्मायरिया उव्वहसियविसिद्धज्जणचेट्ठा ॥ ८ ॥
 विसएसु पसज्जंती पाणिवहाईसु संपयदंति । भंगुरमवि ससरीरं मन्नंता सासयं मूढा ॥ ९ ॥ जुम्मं ॥
 अन्ने पुण मणवंछियभोगुवभोगोवलंभभावेऽवि । आणिस्सरियपहाणे विस्संभरनायगत्तेऽवि ॥ १० ॥
 विसयघामूढाविहु धम्मगिरं सुणिय धम्मगुरुमूले । नरवइ ! नरसिंहो इव पव्वज्जं संपवज्जंति ॥ ११ ॥ जुम्मं ॥
 अहवा पुण्णवसज्जियरज्जदुग्धापलच्छिच्छिहो । नरविक्रमनरनाहो तस्सेव सुओ महासत्तो ॥ १२ ॥
 एए चिय महणिज्जा पवरं एयाण चव पुरिसत्तं । जेसिं जणविम्हयकरं चरियं सलहिज्जइ जयंमि ॥ १३ ॥

इमं च सोच्चा नंदणनराहिबेण जंपियं-भयवं ! को एस नरसीहो ? को वा तस्स सुओ नरविक्रमो ? कंहं वा एसो रज्जदुगं लद्धूणवि पव्वजं पयन्नोत्ति सवित्थरं साहेह, संहंतं मे कोउगं, सुुरिणा जंपियं-निसामेहि ।

अत्थि कुरुविसयतिलयभूया अदिट्ठुपरचकभया जणनिवहाणुगया जयंती नाम नयरी,
पालेइ तं च ससहरसरिच्छपसरंतकित्तिपञ्चारो । निष्पाडिमपयावक्कतत्तत्तुपणिवइयकमकमलो ॥ १ ॥

उत्तुंगतुरयसिंघुरपकलपाइकचकवलकलिओ । सक्कोव्व सुरपुरिं परमविक्रमो राय नरसिंघो ॥ २ ॥
विसमच्छो इत्थीलोलुओ य दुग्गाववद्धनिचरई । जस्स हरोऽवि न सरिसो तस्स समं कं जणं भणिमो ? ॥ ३ ॥

तस्स य नीसेसअंतैउरप्पहाणा वयणलायणवागणियपडिपुण्णचंदमंडला सल्लियेव्वहलगइविजियराय-
हंसा कुम्मुण्णयकमलकोमलपाडलचलणजुयला रायहाणिव्व मयरद्धयनरनाहस्स विसालसालव्व विमलसीलसाली-
णयामहामोछमंडस्स मंजूसव्व सव्वरइसोक्खमणिखंडभंडारस्स चंपयमाला नाम भारिया अहेसि, जीसे भंगुरत्तणं
तिरिच्छिच्छिविच्छोहेसु न धम्मकम्मच्छाहेसु तरलया विमलमणिमुत्ताहारे न विसिट्ठलोयववहारे तणुत्तमुदरस्स न
सरस्स कुडिलत्तं केसकलावस्स न सप्पणयालावस्स, अवि य—

नियरूवविजियसुरवहुजोव्वणगव्वाए कुवलयच्छीए । उब्भडसिंगारमहासमुहदुद्धरिसेवलाए ॥ १ ॥
को तीए भणियविब्भमनेवत्थच्छेययागुणसमूहं । वण्णेउ तरइ तूरंतओऽवि जीहासएणंपि ? ॥ २ ॥

तथा—नियचक्रसंधिरक्खणवियक्खणो पयइपालणाभिरओ । अन्नोऽन्नवद्धपणओ दूरं संतोससारो य ॥ ३ ॥

सुप्पणिहियपणिहियओ पसुणिथरिउचक्कगुविलवाचारो । पडुभत्तो गुणरागी निव्वुढभरो महारंभो ॥ ४ ॥

एक्केक्कपहाणगुणो मंतिजणो बुद्धिसारपमुहो से । अत्थी समत्थनयसत्थ(नि)समणवित्थरियमइप्पसरो ॥ ५ ॥

अणवरयमसुरकीरंतडमरभयविडुसुरवहूसुहडं । हीरंतपवरयणं जो सोच्चा तियसरायपुरिं ॥ ६ ॥

उवहसइ सुरगुरंणिव सबुद्धिमाहप्पपडिहयविपक्खो । तस्स किर मंतिवगस्स भणसु केणोवमं कुणिमो ? ॥ ७ ॥ जुम्मं ।

एवंविहगुणे मंतिजणे समारोवियरज्जचित्तमहाभरस्स लीलाए चिय धरं धरंतस्स गामागरनगराउलं धरणिमंडलं

वससुवणिंतस्स जायमरणभयवामोहं दुइंतसामंतसमूहं पवत्तयंतस्स दीणाणाहज्जमणोवच्छियपूरणेक्कपच्चलाओ महा-

दाणसालाओ कारिंतस्स तुंगसिं गोवहसियहिमसेलसिहरसिं गाइं मयणाइमंदिराइं निसामितस्स धम्मत्थपयासणं

समत्थाइं समयसत्थाइं आराहितस्स दुक्करतवचरणसलिलपक्खालियपावमलाइं गुरुचरणकमलाइं निवारितस्स ज-

णियज्जणवामोहं धम्मविरोहं सम्माणितस्स गुणगणोदगं पणइसयणवगं पुव्वज्जियसुकयसमुब्भवंतचित्ताइरित्तो-

क्खस्स पुरिसत्थसेवणभुज्जयस्स नयविणयवंतस्स दाणाणंदियवंदिज्जणसंदोहघुट्टुलट्टुचरियस्स वोळित्ति वासरा तस्स

राइणो भुयणपयडस्स । अन्नया य विचित्तिचित्तमणहरंमि मंदिरंमि पच्छिमरयणीसमए सुहसेज्जाए सुत्तस्स तस्स

मंदीभूरंमि निहापसरे वियक्खणेण पढियमेक्केण जामरक्खगपुरिसेण—

जे पुवपुरिसवंसप्परोहगाढप्परुढमूलसमं । बेरिक्कलकमलनिहलणकुंजरं सयलगुणनिलयं ॥ १ ॥
पुत्तं ठविउं नियए पयंमि पडिवन्नसंजसुजोगा । इह परमेये य कह ते पावित्ति न निव्वुइं पुरिसा ? ॥ २ ॥ (जुम्मं)
एवं च सोच्चा चिंतियं रत्ना-अहो दुल्लभमेयं, जओ मम एत्तियकालेडवि पउरासुवि पणइणीसु न एकस्सवि कुलालं-
वणस्स पुत्तस्स लामो जाओ, अच्छउ सेसं, एवं ठिए य किं करेमि ? किं समाराहेमि ? कत्थ वच्चामि ? कस्स
साहेमि ? को उवाओ ? के वा एरिसकजे सहाया ? को य मे पुरिसयारो ? का वा पुव्वकस्मपरिणइत्ति खणं किं-
कायव्वयमूढयं अणुभविय तवेलं चेव अंगीकयसत्तभावो एवं समं परिभाविउं पवत्तो-

परलोयपवत्ताणं जइवि सुएहिं न होइ साहारो । जं सव्वंसय उवारिं गओवि नगओ दुहं कुणइ ॥ १ ॥
तहविय पुव्वनराहिवसंतइवुच्छेय दुक्खमक्खिवइ । मज्झ मणो पुव्वनरिंदरक्खिओ कुरुजणवओ य ॥ २ ॥ (जुम्मं)
एत्थंतरे जायाइं समुड्डियमारुंडकारंडवंसचक्कवायकुलकोलाहलाउलियाइं दिसिसुहाइं वियलंतपभापसरो वि-
च्छाईभूओ तारायानियरो पसरिया सिंदुरेणुंजपिंजरा सूरसारहिपभा ताडियाइं पडहसुरवझल्लरिंभभाभेरीभंकार-
भासुराइं पभायमंगलतूराइं समुग्गओ कमलसंडपयंडजइ विच्छइखंडणुहुआमरकरपसरो दिणयरो, तओ उट्टिऊण स-
यणिज्जाओ निस्सरिओ वासभवणाओ कयपाभाइयकिओ अंगरक्खपीढमइप्पमुहपहाणपरिणणुणओ अत्थाणीमंडवे
गंतूण राया अणेगमणिकिरणविच्छुरियंमि सूराव पुव्वपव्वयसिहरंमि कणयसिहासणंमि निविट्ठो, तयणंतरं च ठियाओ

उभयपासेसु चामरगाहिणीओ निविट्ठा य नियनिट्ठाणे मंतिसामंतसुहडखंडरक्खपामोक्खा पहाणपुरिसा पडि-
 च्छियाइं पच्चतरायपेसियमहरिहपाहुडाइं चित्तिथाइं रज्जकजाइं, खणंतरे य पेसियनीसेससामंतपभिइज्जो कइव-
 यपहाणजणपरियरिओ एंगंतट्ठिओ रयणिवइयरं बुद्धिसारपमुहाण मंतीणं संसिऊण पुच्छिउमेवं समारद्धो-भो
 मंतिणो ! सुणह तुब्भे समयसत्थाइं बुज्झह तंतमंतपडलाइं पज्जुवासह विज्जासिद्धे सयंपि सद्दोवहासुद्धबुद्धिणो विवे-
 यह गुविलंपि कज्जजायं, ता साहह कहभिमस्स सुयलाभंचितासायरस्स पारं वच्चिस्सामोत्ति ? खणंतरं च चित्तिथ
 जुत्ताजुत्तं भणियं मंतिवग्गं-देव ! सुट्ठु सट्ठाणे समुज्जमो, अम्हे पुरावि देवस्स एयमट्ठं विद्वविउकामा आसि,
 संपयं पुण सयमेव देवेण सिट्ठे लट्ठं जायं, किं तु देवो अम्हे उवायं पुच्छइ, तत्थ य किं साहेमो ?

अइदिद्वनाणनयणोवलब्भरूवंमि एत्थ वत्थुमि । कमुवायविहिं भणिमो ? किं वा पच्चुत्तरं देमो ? ॥ १ ॥

आगारिगियगइभणिइगोयरं मिणइ मारिसो अत्थं । एवंविहे य कज्जे अम्हं को बुद्धिवाचारो ? ॥ २ ॥

एयं पुण जाणेमो नियनियकम्माणुरूवठाणेसु । जीवा उवायविरहेवि होति पुत्ताइभावेण ॥ ३ ॥

हसिऊण भणइ राधा जइ एवं जणणिजणगविरहेऽवि । गयणंगणे पइक्खणमुववज्जंतीह किमजुत्तं ? ॥ ४ ॥

कम्मपहाणत्तणओ ता मा एगंतपक्खमणुसरह । जं दव्वसेत्तकालावि कारणं कज्जसिद्धिमि ॥ ५ ॥

अह भालयलमिलंतकरकमलं जं देवो आपवेइ अवितहमेयति मन्निऊण बुद्धिसारपमुहो मंतिवग्गो भणिउमा-

दत्तो—देव ! जइ एवं ता निसामेहि, अत्थि इहेव साहियपयंडचंडियाविजो मुंडमालालंकियविगहो निउणो पि-
सायसाहणेसु साहसिओ साइणीनिगहे कयकरणो खेत्तवालावयारेसु खोदक्खमो कन्नविज्जासु ओसहीसहस्ससंपि-
ट्टरसायणपाणपाणसियजराविहुरो विवरपवेसपरितोसियजक्खणीलक्खपरिभोगण्यारपरूवणपंडिओ महच्चइयवे-
सधारी घोरसिवो नाम तवस्सी ।

अवि य—आगिट्ठमि पगिट्ठो खुन्नो पन्नगमहाविसुद्धरणे । विक्खेवकरणदक्खो अमूढलक्खो वसीकरणे ॥ १ ॥

जं सत्थेसु न सिट्ठं बंधुरबुद्धीहिं पुव्वपरिसेहिं । जं नो पुव्वकईणवि कहीपि मइगोथरमि गयं ॥ २ ॥

जुत्तीहिवि जं विहडइ सुयंपि जं सदहंति नो कुसला । जं सुइरंपि हु विट्ठं संदिज्जइ तंपि दंसेइ ॥ ३ ॥ (जुम्मं)
भणइ य अत्थि असज्झं मज्झं भुवणत्तएवि नो किंपि । जइ सो एयसमत्थो एत्थवि देवो पमाणंति ॥ ४ ॥

एवं सोच्चा रत्ना कोउहलेण भणिया पहाणपुरिसा—अरे आणेह तं सिग्घमेव, जं देवो आणवेइत्ति भणिऊण
निक्खंता ते य रायभवणाओ, गया तस्सासमपयं, पणमिऊण निवेइयं से आगमणप्यओयणं, तओ हरिसुफ्फुल्लो-
यणो कयकिच्चमप्याणं मन्नतो तो चलिओ घोरसिवो रायपुरिसेहिं समं, पत्तो य रायभवणं, दुवारपालनिवेइओ गओ
रायसमीवं, दिन्नासणो उवविट्ठो, सम्माणिओ उचियपडिवत्तीए नरवइणा, खणंतरे य पुच्छिओ एसो—भवयं ! कयरीओ
दिसाओ आगमणं ? कत्थ वा गंतंत्वं ? किं वा एत्थावत्थाणप्यओयणंति ? घोरसिवेण भणियं—महाराय ! सिरिपट्ठयाओ

आगओऽम्हि, संपयं पुण उत्तरदिसिमुंदरीसवणकन्नपुरे जालंधरे गन्तुमिच्छामि, जं पुण पुच्छह अवत्थाणपओयणं तत्थ
 य तुम्ह दंसणमेव, संपयं एयंपि सिद्धंति, नरवइणा भणियं—भयवं! निरवगगहा सुणिज्जइ तुम्ह सत्ती मंततंतसु ता
 दंसेसु किंपि कोउगं, तओ जं महाराओ निवेयइत्ति पडियज्जिय तेहिं तेहिं दिट्ठिवंचणदेवयावयारणनरवेहपुणफयेहनहु-
 मुट्ठिसुहदुक्खपरिजाणणप्पमुहकोऊहलेहिं वसीकयं घोरसिवेणं नरिंदीचित्तं, अह अवसरं लहिऊण भणियं राइणा-
 भयवं! किं एएसु चेव कोऊहलेसु तुह विन्नाणपगरिसो उआहु अन्नत्थवि अत्थि?, मुणिणा भणियं—किमेवमसं-
 भावणागम्भमम्हारिसज्जणानुचियं वाहरसि?, एगसहेणेव साहेसु जं दुक्करपि कीरइ, तओ राइणा निवेइओ पुत्त-
 जम्मलाभविसओ वुत्तंतो, घोरसिवेण भणियं—किमेत्तियमेत्तेण किलिस्ससि?, अहमेयमट्ठं अकालेवि अविलंबं पसा-
 हेमि, राइणा भणियं—जइ एवं ता परमोऽणुगगहो, केवलं को एत्थ उवाओ?, घोरसिवेण भणियं—एयंतो निवे-
 यइस्सं, तओ उक्खित्ता कुवलथदलसच्छाहा मंतीसु राइणा दिट्ठी, उट्ठिया य इंगियागारकुसला सणियं सणियं नरिं-
 दपासाओ मंतिणो, जायं विजणं, घोरसिवेण जंपियं—महाराय! कसिणचउहसीनिसिए मए बहुपुण्णफलधूवक्ख-
 यबलिभक्खपरियरेण तुमए सह भयवं महामसाणहुयासणो तप्पणिज्जो, राइणा चितियं—कहं नु मए पुण्णाइपरि-
 यरेण सह हुयासणो तप्पणिज्जोत्ति?, अवसहेत्ति, अहवा अभिप्पायसाराइं इसियणाइं, नो विसंबंधलक्खणहुसणं-
 मावहंति, मुणिणा भणियं—महाराय! सुणणचक्खुक्खेवो इव लक्खीयसि, राइणा भणियं—मा एवमांसकह, निवेयह

जहा पारं, सुणिणा भणियं—तओ सो भयवं हुयासणो—उब्भडपयडियरूवो पयंडजालाकलावभरियनहो । दाही तुज्झं वंछियफलनियरं कप्परुक्खोव्व ॥ १ ॥ राइणा भणियं—जइ एवं ता सब्बहा आगमिस्सं चउइसीनिसाए, एस अत्थो साहियवोत्ति, पडिचन्नं च तेण, अह कयकुसुमतंबोलदाणसम्माणे सट्ठाणमि गए घोरासिवे राया निव्वत्तियदेव-याचरणकमलपूयापडिवत्तीहिं तेहिं तेहिं अस्सदमणाइएहिं विचित्तविणोएहिं अप्पाणं विणोएंतो पइक्खणं दिणाइं गणमाणो य कालं गमेइत्ति, कमेण य पत्ताए कसिणचउइसीए आहूयं मंतिमंडलं, निवेइयं रहस्सं, पुच्छियं च-संपयं किं कायव्वंति?, मंतीहिं पभणियं—देव ! किंपागफलाइपिव मुहंमि महुराइं परिणइहुहाइं अन्नाइं तदियराइं दुहावि दीसंति कज्जाइं, अत्थस्स संसओऽविहु पवित्तिहेउत्ति किं तु निहिट्ठो, अविमुक्काविस्सासेहिं सब्बहा उज्जमेयव्वं, एवं भणिए राइणा कुसुमतंबोलाइदाणपुव्वं सम्माणिऊण मंतिवगो पेसिओ सगिहे, जाए य रयणिसमए सयं कयवे-सपरियत्तो नियत्तियपीढमहाइपरियणो समगबल्लिफलफुल्लपमुहसाहणपडलसमेओ करकलियत्तिक्खगखगमंडलो घोरासिवसमेओ अलक्खिज्जंतो अंगरुक्खेहिं अमुणिज्जंतो दासचेडयाडुकारनियरोहिं वारिज्जमाणो पवत्तिज्जमाणो य पडिक्खेहिं अणुक्खेहिं य अणेगेहिं सउणेहिं सवंगनिविट्ठविट्ठरक्खामंतक्खरो संपत्तो महीवइं महाससाणदेसं । जं च केरिसं ?—

निलीणविज्जसाहंगं पवूढपूयवाहंगं, करोडिकोडिसंकडं, रडंतधूयककडं ।

सिवासहस्ससंकुलं मिलंतजोगिणीकुलं, पभूयभूयभीसणं कुसत्तसत्तनासणं ॥

पधुट्टुट्टसावयं जलंततिवपावयं, भमंतडाइणीगणं पवित्तमंसमगणं ॥ १ ॥

कहकहकहट्टहासोवलकखगुरुरकुलकुलपेच्छं । अइरुक्खरुक्खसंबद्धिगिद्धपारद्धवोररवं ॥ २ ॥

उत्तालतालसहुम्मिलंतवेयालविहियहलबोलं । कीलावणं व विहिणा विणिम्मियं जमनरिंदस्स ॥ ३ ॥

तथ य निरुविओ सल्लक्खणभूमिभागो घोरसिवेण, खित्तं च बलिविहाणं कया खेतवालपडिवत्ती खणिया वेइया भरिया खाइंगाराणं मसाणसमुत्थाणं, भणिओ य राया-अहो सो एस अवसरो ता दढमण्यमत्तो ईसाणक्कोणे हत्थसयदेससंनिविट्ठो उत्तरसाहगत्तणं कुणमाणो चिट्ठसु, अणाहूओ य मा पयमवि चलेज्जासित्ति पुणो पुणो निवारिय पेसिओ नरिंदो, गओ य एसो, घोरसिवेणावि आलिहियं मंडलं, निसन्नो तहिं, निबद्धं तहिं पउमासणं, कयं सकलीकरणं, निवेसिआ नासावंसग्गे दिट्ठी, कओ पाणायामो, नायविंदुलवोववेयं आढत्तं मंतसुमरणं, समारूढो ज्ञाणपगरिसंमि । इओ य चित्तिं राइणा-अहं किर पुवं सिक्खं गाहिओ मंतीहिं, जहा-अविस्ससो सव्वत्थ काय-च्चोत्ति, निवारिओ य सव्वायरं पुणो पुणो एएण जहा अणाहूएण तए नागंतव्वंति, ता समहियायरो य जणइ संकं, न एवंविहा कावालियमुणिणो पाएण कुसलासया हवंति, अओ गच्छामि सणियं सणियमेयस्स समीवं, उवलक्खेमि से किरियाकलवंति विगप्पिउं जाव पट्ठिओ ताव विप्फुरियं से दक्खिणल्लोयणं, तओ निच्छियं वच्छियत्थलाभो करकलिय-

करवालौ कसिणपडकयावगुणो मंदं मंदं भूमिविमुक्चरणो गंतूण पुट्टिदेसे ठिओ घोरसिवस्स, सुणिउमाढत्तो य,
सो य ज्ञाणपगरिसत्तणेण अणावेविक्षय अवायं अविभाविय पडिकूलत्तं विहिणो अविज्ञायतदागमणो नरवइथोभक-
रणदक्खाइं मंतक्खराइं पुव्वपचित्तविहिणा समुचारित्तो निमुणिओ रत्ता, परिभावियं चउणेण-अहो एस दुट्टतवस्सी
मं थोभविहिणा विबलं काऊण सन्नहितनिहित्तकत्तियाए परिकुवियकथंतभमुहकोणकुडिलाए विणासिऊण हुयवहं
तप्पिउं वंछति, पहाणनरोवहारविहिणा हि सिज्झंति दुट्टदेवयाओ, ता किमेत्थ जुत्तं?, अवि य—

एतस्स किं इयाणिं वावडचित्तस्स तिव्वल्लखगेण । कदलीदलं व सीसं लुणामि पासंडिचंडस्स ॥ १ ॥

अहया दुद्धरिउगंधिसंधुराघायदंतुरग्गेण । खग्गेण मज्झ लज्जिज्जइह घायं करंतेण ॥ २ ॥

केवलमुवेहणिज्जो नयेस एयंमि होइ पत्थावे । जं थोभकरणविहिणा मरणं मह वंछइ काउं ॥ ३ ॥

तथापि—ज्ञाणावरोहवक्खित्तचित्तपसरंमि हणिउकामस्स । सगं गयावि गुरुणो होहिंति परंमुहा मज्झ ॥ ४ ॥

ता जुत्तमिणं ठाऊण दूरदेसंमि बोहिउं एयं । पढमं दिन्नपहारे पडिपहरेउं ममेयंमि ॥ ५ ॥

इय चित्तिऊण रण्णा ठाउं दूरे पयंपियं एयं । गिणहसु करेण सत्थं रे रे पासंडिचंडाल ! ॥ ६ ॥

इइ सोच्चा ज्ञाणेगगभंगरोसोवरत्तनयणजुओ । भालयलघडियभडभिउडिभीसणो उट्ठिओ सोऽवि ॥ ७ ॥

करकलियनिसियकत्तिथनियंतकसिणप्पमोल्लिजडिसंगो । अह तिव्वगव्वघोरं घोरसिवो भणिउमाढत्तो ॥ ८ ॥

रे रे दुहुनराहिव ! विलज्ज निस्सत्त मा पलाइहिसि । सुयविसयतिक्खदुक्खाओ जेण मोएमि तं झत्ति ॥ ९ ॥
 रण्णा पढियं मा गज्ज निष्फलं पहर रे तुमं पढमं । न कयाइवि अम्ह कुले पढमपहारो कओ रिउणो ॥ १० ॥
 तत्तो विचिच्च वग्गणसुनिउणकरणप्पयारकुसलेण । घोरसिवेणं रत्नो पवाहिथा कत्तिथा कंठे ॥ ११ ॥
 रत्नावि तक्खणं चिय दक्खत्तणओ इमस्स सत्थजुओ । हत्थो पहारसमए बद्धो नियवाहुबंधेण ॥ १२ ॥
 भुयदंडनिविडपीडणविहडियदढपहरणंमि हत्थंमि । मुट्ठिप्पहारपहओ निवाडिओ सो धरणिवेट्ठे ॥ १३ ॥
 दढमंततंसिद्धीवि विहडिथा तस्स तंमि समयंमि । विवरंमुहंमि दइवे अहवा सव्वं विसंवयइ ॥ १४ ॥
 अह वीसमिऊण खणं घोरसिवो फुरियवीरिओ सहसा । पारद्धो रत्ना सह जुज्जेउं वाहुजुज्जेणं ॥ १५ ॥
 मल्लाण व खणमुट्ठीण पडणपरिवत्तणुच्चलणभीमो । सरहसहसंतभूओ अह जाओ समरसरंभो ॥ १६ ॥
 निविडभुयदंडचंडिमसंपीडणविहडियंगवावारो । मुच्छानिमीलियच्छो अह निहओ सो महीवइणा ॥ १७ ॥
 एत्थंतरंमि तियसंगणाहिं वियसंतसुरहिक्कुसुमभरो । जयजयसहुम्मीसो पम्मुको नरवइसिरंमि ॥ १८ ॥
 हारद्धहारकंचीकलावमणिमउडमंडियसरीरा । रणज्झणिमहुरनेउरखपूरियदसदिसाभागा ॥ १९ ॥
 नवपायियमंजरिसोरभरहसुम्मिलंतभसलकुला । धारियधवलायवत्ता तहागया देवया एका ॥ २० ॥ जुम्मं ।
 तीए भणियं नरसिंघ ! निच्छियं तंसि चैव नरसिंघो । जेणस महापावो खत्तियखयकारओ निहओ ॥ २१ ॥

रणणा भणियं कह देवि ! कहसु खत्तियखयंकरो एस ? । मइ जीवते संपइ, पडिभणइ निव तओ देवी ॥ २२ ॥
एएण किंपि सिद्धि समीहमाणेण पावसमणेण । हणिआ कलिंगवंगहूणपंचालपसुहनिवा ॥ २३ ॥
दिट्ठिण्वंचमाइदजालपमुहेहिं कूडकवडेहिं । अच्छरियाइं दावितएण को को न वा नडिओ ? ॥ २४ ॥
न य केणवि एस जिओ न यावि एयस्स लक्खियं सीलं । तुमए उभयंपि कयं अहह मइ निम्मला तुज्झ ॥ २५ ॥
इय तुह असरिससाहससुंदरचरिएण हरियहियाए । मम साहसु किंपि वरं जेणाहं तुज्झ पूरेमि ॥ २६ ॥
ताहे मउल्लियकरकमलसेहरं नामिउं सिरं राया । भणइ तुह दंसणाओऽवि देवि ! अन्नो वरो पवरो ? ॥ २७ ॥
भणियं सुरीए नरवर ! इयरजणोव्व न जइवि पणेसि । तहवि तुह वंछियत्थो होही मज्झाणुभावेण ॥ २८ ॥
इय भणिए नरवइणा पराए भत्तीए पणमिया देवी । लच्छिच्च एण्णरहियाण झत्ति अहंसणं पत्ता ॥ २९ ॥
नरिंदोऽवि तारिसमच्चम्भुयं देवीस्सुवं सहसच्चिय नयणगोथरमइकंतमुवलब्भ चिंताकलोलमालाउलो एवं परि-
भावेइ—किमेयं सुमिणं उआहु विभीसिया अहवा एयस्स चैव दुट्ठकावालियस्स मायापवंचो किं वा मम मइ-
विब्भमो उआहु अवितहमेयंति ? ,

इय जात्र निचो संदेहदोलमालंबिउं विकप्पेइ । मा कुणसु संसयं ताव वारिओ गयणवाणीए ॥ १ ॥
घोरसिचोवि मत्तो इव मुच्छिओ इव दढदुघणताडिओ इव महापिसायनिफंदीकओ इव सुसियसारवक्खरो इव

पियविरहमहागहगहिओ इव दुट्टोसहपाणण्णट्टचित्तचेयणो इव खणंतरं चिट्ठिय सिसिरमारुण समासासियसरीरो
 थोवोवलद्धचेयणो मंदमंदमुम्मीलियलोयणजुयलो लजावसविसंतुलसव्वंगोवंगो अइदीणवयणो दीहमुस्ससिय राया-
 णमवल्लोइउं पवत्तो, नरवइणावि दढसंजायकरुणभावेण अइदुक्खिओ एसोत्ति उवलक्खिय भणिओ घोरासिवो-
 भो किमवल्लोएसि?, घोरासिवेण सगगयं भणियं-महाराय! अवलोएमि नियक्कम्मपरिणइविलसियं, राइणा
 भणियं-किमेवं सविसायं जंपसि?, सव्वहा धीरो भव परिहर दुरज्झवसायं परिचय कोवकंडुं विमुंच विजयाभिलासं
 अणुसर पसमाभिरइं पियसु करुणारसं परिचित्तसु जुत्ताजुत्तं समुज्झसु खुद्वज्जोचियं वावारंति, अह समीहियत्थ-
 सिद्धी न जायत्ति सम्मसि ता गिण्हसु इमं परिकुब्बियकयंतजीहाकरालं नीलपहापडलसामलियसयलदिसिचक्खवालं
 मम करवालं, करेसु मम सरीरविणासणेण नियसमीहियसिद्धिं, जओ मुक्को मए संपयं पोरिसाभिमाणो तुह कज्जसाह-
 णट्ठाएत्ति । अबि य—

अच्छउ तरंगभंगुरमसारंगं नियसरीरयं दूरे । जीयंपि हु पराहियकारणेण धारंति सप्पूरिसा ॥ १ ॥

जं पुण पढमं चिय तुज्झ कारणे नो समप्पिओ अप्पा । विहिओ य ज्ञाणविग्घो एयं नणु कारणं तत्थ ॥ २ ॥

मम विरहे एस जणो एसो नीसेससाहुवगो य । धम्मब्भंसमवस्सं पाविस्सइ पावल्लोयाओ ॥ ३ ॥

इण्हिं तुह गुरु दुक्खं उवलक्खिय वद्धकक्खडसहावं । निरेवक्खं मज्झ मणो जायं सेसेसु कज्जेसु ॥ ४ ॥

घोरसिवेण भणियं—महाभाग ! मा एवमुल्लवेसु, जीवसु तुमं मज्जीविण्णावि जाव जलहिकुलसेलससितारयदिवायरे,
पसीयसु मे, वियरसु एकं पसायंति, राइणा भणियं—किमेवं वाहरसि !, जीविद्यदाणाओऽवि किमवरमदेयं ? ता अस-
मंतो पत्थेसु, घोरसिवेण भणियं—जइ एवं ता अणुजाणसु मम एयंमि पज्जलंतजालासहस्सकवलियसलभकुलसंकुले
मिसिमिसंतद्धदद्धकलेवरुल्लंतविस्सगंधुद्धुरे मसाणहुयासणे पवेसुज्जमं, हवसु धम्मबंधवो, नन्नहा मे पुव्वविहिय-
महापावपव्वयंकंतस्स अवस्सं विस्सामो भविस्सइत्ति, रण्णा भणियं—कुओ तुह पुवं पावसंभवो ?, जओ कयाइं
तुमए विविहाइं तवचरणाइं आपूरियाइं पावभक्खणदक्खाइं मंतज्झाणाइं पूइयाइं देवकमकमलाइं निव्वत्तियाइं
वेयरहस्सज्झयणाइं उवासिओ गुरुज्जो पवट्ठिया धम्ममग्गोसु पाणिजो, ता न सब्बहा वोत्तुमवि जुत्तमेयं भवारिसाणं,
घोरसिवेण भणियं—महाराय ! अलमलं मम पासंडिचंडालस्स वीसत्थघाइणो पयडियविचित्तकूडकवडस्स दविलन्नर-
हियस्स निसायरस्सेव निक्करुणस्स, किंपागतएलस्सेव बाहिरमेत्तरमणीयस्स वगस्सेव सुसंजमियपाणिप्पायप्पया-
रस्स भुयंगमस्सेव परच्छिदावलोयणनिरयस्स दुज्जणस्सेव सुहमहुभसिणो संकित्तणेणं, एवं च सब्बहा विरत्तोऽम्हि
पावंपकपडिहत्थाओ नियकडेवराओ, नेव य अन्नो पावविसोहणोवाओ, राइणा भणियं—ओ भो किमेवं पुणो पुणो
अत्ताणं अत्ताणं व पुरिसं दूसेसि !, पयडक्खरं निवेएसु नियपुव्वचित्तं, घोरसिवेण भणियं—महाराय ! गरुओ एस
वुत्तंतो, राइणा भणियं—किमजुत्तं ?, साहेसु, घोरसिवेण भणियं—जइ एवं ता निसामेहि—

अथि सुरसरितुसारपचित्तरुहेसं विविहावणभवनमालाविभूसियं समूसियसियवेजयंतीरेहतसुरमंदिरसिहरं
 सिरिभवणं नाम नयरं, तत्थ य पयंडमायंडमंडलुदामपयावपरिसोसियविपक्खजलासओ अणेगसमरवावारविट्ठत्तजसो
 अवंतिसेणो नाम राया अहेसि, जस्स विजयजत्तापत्थियस्स पत्थिवसहस्साणुगम्ममाणमगस्स उडंडुडरीयपंडुरच्छत्त-
 च्छाइयगयणाभोगा नट्टदिवसावगासव्व सोहंति दस दिसाभागा, जस्स य गजंतमत्तकुंजरगंडत्थलगलंतनिरंतरमयजला-
 सारजायदुद्दिणंधयारभीयाभिसारियव्व अणुसरइ कवाडवियडं वच्छत्थलं रायलच्छी, जस्स चउव्विहाउज्जघोरघोसं मे-
 होहरसियंपिव सोऊण दूरं पलायंति रायहंसा, जस्स समरंगणेषु रोसारुणाओ पडिसुहडेषु पडिबिंबियाओ पण्डु-
 ल्लसुकुमारकरवीरकुसुममालाउव्व रेहंति दिट्ठीओ, तस्स य नियरुवलावन्नजोव्वणगुणावगणियरइप्पवायाओ नीसे-
 सपणइणीपहाणाओ दुवे भारियाओ अहेसि, पत्तलेहा मणोरमा य, पढमाए जाओ अहमेक्को पुत्तो वीरसेणो नाम,
 बियाए पुण विजयसेणोत्ति, गाहिया दोउवि अहे धणुवेयपरमत्थं कुसलीकया चित्तपत्तच्छेयविणोणसु सिक्ख-
 विया य खेडयखग्गगुणवणिं जाणाविया महल्लजुद्धं, किं बहुणा?, सुणाविया सव्वकलाकलावं, अन्नया य उचिओत्ति
 परिचिंतिय ठाविओऽहं ताएण जुवरायपए, दिन्ना य मज्झ लाडचोडमरहट्टसोरट्टपमुहा देसा कुमारमुत्तीए, परिपालेमि
 जुवरायत्तणं, ममंपि अणुमग्गमणुसरइ सुहडाडोवसंकुडा पगलंतगंडत्थला दण्डुरसिंधुरयडा, ममावि मग्गओ धावंति
 तरलतरतुरंगपहकरा, मज्झंपि परसुसेल्लचंडगंडीवसरविसांकुंतगयापहरणहत्थाइं वित्थरंति चउदिसिंवि पुरिसबलाइति,

दुइयस्सवि मज्झ सवत्तभाउणो दिन्नाइं ताएण कहवय गामसयाइं, एवं च विसयसुहमणुहवंताणं वच्चंति वासरा ।
अणया खणविपरिणामधम्मयाए जीवलोकविलसियाणं पइसमयविणाससील्याए आउयकम्मदलियाणं अण-
डिहयसासणत्तणओ जममहारायस्स सुरिंदचावचवल्याए पियजणसंपओगसम्भवसुहस्स पाविओ अवंतिसेणराया
पंचत्तंति, कयंमि य तम्मयकिच्चे मंतितामंतसरीररक्खप्पामोक्खपहाणलोएण निवेसिओऽहं रायपए, पयद्वियाइं
मए तायस्स संगंगयस्स कएण तडियकप्पडियदीणाणाहाणिस्सियविदेसियजणण महादाणाइं कारावियाइं उचुं-
गसिंसुंदराइं देवमंदिराइं निरुवियाइं अवारियसत्ताइं, कालक्कमेण य विगओ मम सोगो, वसीकयं सामंतचक्कं, नि-
व्वासिया नियमंडलविलुपगा पयट्ठिओ पुव्वपुरिसमग्गो । अन्नया य—

सियसिंधुरखंधगओ विलयाजणधुव्वमाणसियचमरो । धरियधवलायवत्तो किंकरनियरपरियरिओ ॥ १ ॥

उम्मग्गपयट्ठुदामतुरयट्ठुक्खउद्धयओहो । नयराओ निग्गओऽहं वणलच्छीपेच्छणट्ठाए ॥ २ ॥

जाव य तत्थ पेच्छामि पुप्फफलसमिद्धवंधुरं तरुणतरुणं परिब्भमामि माहवील्याहरेसु अवलोएमि कयली-
दलणं रुंदत्तणं निरिक्खामि संपिडियससिखंडपंधुरं केयइपत्तसंचयं अग्घाएमि अणग्घवउलमालियासुरहिपरिमलं
करोमि करतलेण सोरभभरलोभमितरणज्झणंतफुल्लधयरिंछोलिलिहजमाणमयरंदं नवसहयारीमंजरीपुंजं ताव सह-
सच्चिय सुणोमि नियपरियणकलयलं । कहं ?—

सामी ! पेच्छह गयणंगणंमि कह वट्टए महाजुज्झं ? । सज्झसकरमइभीमं सुराण विज्जाहराणं वा ॥ १ ॥
 एवं सोचा मएवि उत्तानीकयानिमेसलोयणेण उट्टमवलोकयमाणेण दिट्ठा विविहण्यथारोहिं जुज्झमाणा गयणंमि
 विज्जाहरा, ते य एवं जुज्झंति—

सियमल्लयसच्चलसिद्धसूल अवरोण्णरु मेळ्हाहिं भिडिमाल । वंचावहि तकखणि लद्धरक्ख पुण पहरह जय जस सव्वपक्ख १
 खणु निट्ठरमुट्ठिहिं उट्ठियंति, खणु पच्छिमभागमणुव्वयंति ।

खणु जणगजणणि गालीउ देंति, खणु नियसोंडीरिम कित्तयंति ॥ २ ॥

अच्छी निमीलियसुय रहिं चिर साहिय विजयविज्ज, उणु खणे खणे जायहिं जुज्झसज्ज ।

अविगणिय मरण रणरसियचित्त, भुयदंडमहावलमयविलित्त ॥ ३ ॥

इय तेसिं खयराणं परोप्परं जुज्झिराणमेक्केणं । लद्धूण छलं अन्नो पहओ गुरुमोगरेण सिरे ॥ ४ ॥

पडिओ धरणीवट्ठे ममंतिए विगयचेयणो सो य । मुच्छानिमीलियच्छो विच्छाओ छिन्नरुक्खोव्व ॥ ५ ॥

एत्थंतरे तयणुमग्गेण चेव कड्डियनिसियखगो पधाविओ इयरो विज्जाहरो तस्स वहनिमित्तं, मुणियो य मए
 जहा एसो एयस्स विणासणकए एतित्ति, तओ मए भणिया सदेवेहिणो धाणुहिया अंगरक्खा य, जहा—
 रे रे रक्खह एवं भूमीतलनिवडियं महाभागं । एवं विणासणुज्जयमित्तं खयरं पडिक्खलह ॥ १ ॥

असिखेडयहत्थेहिं तस्संगं छाहयं वरभडेहिं । ओगासगलभमाणो रुद्धो खयरो तओ भणइ ॥ २ ॥
हे भो नरिंद ! मुंचसु एयं खयराहमं मम वहट्ठा । एसो खु मज्झ वहरी विणासियवो मएऽवस्सं ॥ ३ ॥
भणिओ य मए खयरो किं पलवसि तं पिसायगहिओव । किं एस खत्तयम्मो ? जेणेवमहं करेभिन्ति ॥ ४ ॥
किं चावरद्धमिणिणा जेणयं मारिउं समीहेसि । सो भणइ एस मम दारभोगरसिओत्ति ता हणिमो ॥ ५ ॥
ताहे मए स भणिओ साहू इयरो व होउ नऽप्येमि । सरणागयरक्खणलक्खणं च राईण खत्तययं ॥ ६ ॥
उब्बद्धभिउडिभंगो रोसारुणनयणजुयलदुप्पेच्छो । फरुसक्खरेहिं खयरो ताहे मं भणिउमाटत्तो ॥ ७ ॥
रे रे दुट्टनराहिव ! मा बोहसु केसरिं सुहपसुत्तं । दिट्ठीविसाहितुंडं कंइयसु मा करग्गेण ॥ ८ ॥
जालालिभीममग्गि अवक्कमसु य मा तुमं पयंगोव । जइ वंछसि चिरकालं रज्जं काउं महियलंमि ॥ ९ ॥
भणिओ य मए एसो किं रे वाहरसि मुक्कमज्जाय ! । सण्णुरिसमगलमगस्स मज्झ जं होइ तं होउ ॥ १० ॥
चिरकालजीविणवि पेरंतेऽवस्समेव मरियवं । ता अवसर दिट्ठिपहाओ कुणसु जं तुज्झ पडिहाइ ॥ ११ ॥
जइ एवं ता विहिणो मा दाहिसि दूंसणं तुमं राय ! । इय भणिऊण सरसो खयरो सो गयणमुण्डओ ॥ १२ ॥
तयणंतरं मए निरूविओ सो भूमितलनिवडिओ विज्जाहरो जाव अज्जावि सजीवो ताहे काराविया
चंदणरसच्छडापहाणा सिसिरोवयारा संवाहियाइं सरीरसंवाहनिउणेहिं पुरिसेहिं संबगाइं, खणंतरेण लद्धा तेण

चेयणा उम्मीलियं नयननलिंगं अवलोइयं दिसिमंडलं आलविओ पासवत्ती परियणो-भो भो महायस ! कहगहगिह
 महीवट्टे निचडिओ ? , कथ वा वेरिविजाहरो ? , को वा एस देसो ? , किंणमं इमं नयरं ? को वा एसो छत्तच्छायनि-
 वारियरविकरपसरो परिचलंतधवलचामरजुयलो मज्झकए नरनियरं वाचारितो पुरो संठिओ चिट्ठइ महायसो नराहिज-
 इत्ति ? , इमं च सोच्चा निवेइयं से परियणेण गयणपडणाओ आरब्भ संबं जहाविंत्तंति । तओ सो खयरो दीहं नीससिय
 मम पचासन्ने ठाऊण जोडिय करसंपुंडं विन्नविउमाढत्तो-महाभाग ! धन्ना सा महिमहिला जीसे तं पई कयलकखणा
 इमे भिच्चा सेवंति जे तुह चरणकमलं धन्ना ते सुहडा जे तुह कजे तणं व नवि गणंति नियजीवियं, अहो ते परो-
 वयारित्तणं अहो सप्पुरिसकम्माणुवत्तित्तणं अहो नियकज्जनिरवेकखया अहो सरणागयच्छलत्तणं, न सवहा मस
 मणांगं पिडमुप्याएइ सत्तुपराभवो जं तुमं सयमेव पुरिसरयणभूओ दिट्ठोसि, मए भणियं-महाभाग ! अणवेक्सिय-
 जुत्ताजुत्तविचारो हयविही जं तुम्हारिसाणवि निवडंति एरिसीओ आवयाओ, अणुभूयपुवमवि पावंति विसगं
 दसाविवांगं, सवहा असरिसमिमं जेण न कयाइं रंभाथंभो सहइ मत्तमायंगंडयलकंहुवुच्छेयं, (न रेहइ जुज्जमाणो
 मुणालंतू) पासंमि, को पुण साहेसु एत्थ वइयरो ? , खयरेण भणियं-किमेत्थ कहियच्चं ? , पचकसमेव दिट्ठं महा-
 णुभागेणं, मए भणियं-सम्मं निवेएसु, खयरेण भणियं-जइ कोऊहलं ता निसामेसु-

कलहोयकूलकोडीविराइओ रयणकोडिचिच्छुरिओ । वेयट्ठगिरी तुमएवि निसुणिओ भरहखेतंमि ॥ १ ॥

सुरसिद्धजक्खरक्खसकिंनरकिंपुरिसभिहुणरमणिज्जो । सुराहिवरकुसुमतसुसंडमंडिउद्दामदिसिनिवहो ॥ २ ॥
विज्जाहरमणीजरमणीयं विजियसच्चपुरसोहं । तत्थउत्थि गयणवल्लभनयरं नामेण सुपसिद्धं ॥ ३ ॥
तत्थ य राया निवसइ समग्गविज्जासहस्सवलकलिओ । पणमंतखयरमणिमउडकिरीडटिविडिक्खियग्गकमो ॥ ४ ॥
नियवलतुलियाखंडलपरक्कमो गुरुपयावहयसत्तू । तिहुयणविकखायजसो नामेणं विजयराओत्ति ॥ ५ ॥
रूवाइगुणसमिद्धाए तस्स भज्जाए हिययदइयाए । कंतिमईए पुत्तत्तणेण जाओ अहं एक्को ॥ ६ ॥
पक्कओ पुरे पमोओ मह जम्मे तत्थ खयरराएणं । करिणो मोत्तूण परे विमोइया बंधणेहिंतो ॥ ७ ॥
अह सुपसत्थमि दिणे सम्माणिय पणइसयणगुरुवग्गं । जयसेहरोत्ति नामं ठवियं मम गुरुजणेणंति ॥ ८ ॥
गयणंगणपरिसक्कणपमोक्खविज्जाओ ग्राहिओ अहयं । अह तरुणभावपत्तो गुरुहिं परिणाविओ भज्जं ॥ ९ ॥
पउमावइत्ति नामेण पवरविज्जाहरिंदकुलजायं । रूवाइगुणगेणं विजयपडायंव कामस्स ॥ १० ॥ जुम्मं ।
एस पुण वइरिखयो रहनेउरचक्कवालपुरपहुणो । सिरिसमरसिंहेनामस्स अत्तओ अमरतेओत्ति ॥ ११ ॥
बालवयस्सो मम गाढरूढपेमाणुबंधसव्वस्सो । विस्सासपयं सवेसु पुच्छणिज्जो य कज्जेसु ॥ १२ ॥
सहसयणपाणभोयणचंक्रमणट्टाणकराणनिरयाणं । अस्सं दोणहवि कालो बोलइ दढमेक्कचित्ताणं ॥ १३ ॥
अह परियणेण मज्झं निवेइयं एगया रहट्टाणे । जह एस तुज्झ मित्तो विरूवचारी कलत्तंमि ॥ १४ ॥

असहृहणाओँ मए स परियणो वारिओ खरगिराहिं । अघडंतमेवमन्नं न भासियव्वं मह पुरोत्ति ॥ १५ ॥
 समयमवि दिट्ठं जं जुत्तिसंगयं तं वयंति सप्पुरिसा । सहसत्ति भासियाइं पच्छाऽपत्थं वारिंति ॥ १६ ॥
 रविकरपसरोच्च जणे घणपडलच्छाइओऽवि विप्फुरिओ । अह एस वइयरो गोविओऽवि पणयाणुरोहेण ॥ १७ ॥
 रायभवणाओँ सगिहंमि एगया आगओऽम्हि पच्छामि । समयमेव तं कुमिंतं अणज्जकज्जंमि आसत्तं ॥ १८ ॥
 दट्ठूण तं तहट्ठियमेगंते जाव चिंतिउं लग्गो । नियपरियणपरियरिओ तावेस पलाइओ झत्ति ॥ १९ ॥
 अहमवि पहरणसहिओ नियथोवपहाणपुरिसपरियरिओ । तस्साणुपहे लग्गो सोऽवि य अहंसणं पत्तो ॥ २० ॥
 मणपवणजइणवेगेण जाव पत्तोऽम्हि एत्थ ठाणंमि । ता एस महापावो मम पडिओ चक्खुमग्गंमि ॥ २१ ॥
 परियणपुरिसावि मए समयलासु दिसासु पेसिया पुवं । एयस्स विणासकए अहमेक्को एत्थ संपत्तो ॥ २२ ॥
 असहायं मं दट्ठु एसो सहसत्ति जुज्झिउं लग्गो । एत्तो अन्नं सव्वं जायं तुम्हंमि पच्चक्खं ॥ २३ ॥
 एत्थंतरंमि सन्नाहकरणदट्ठूदकायदुद्धरिसा । भूमियलं पेक्खंता खयरा तत्थागया तुरियं ॥ २४ ॥
 पुट्ठा य मए साहह किं भो तुज्झं समागमणकज्जं ? तेहिं कहियं सामी इह सुव्वइ निवडिओ अम्हं ॥ २५ ॥
 सो दंसिओ य तेसिं तो ते दट्ठूण तस्स पडियरणं । अच्चंतहरिसियमणा मं पइ भणिउं समाट्ठत्ता ॥ २६ ॥
 संमं कयं नराहिव ! जमेवमेयस्स पालणा विहिया । जं एयकए बाढं परितण्णइ खयरनरनाहो ॥ २७ ॥

एयस्स मगगणकए सत्तथवि पेसिया खयरसुहडा । जं एक्को चिय पुत्तो एसो सिरिखयरनाहस्स ॥ २८ ॥
 ता जयसेहरकुमारं पेसह एयं जहा समण्येसो । सुहिसयणजणजिजणयाण दंसणुक्कंठियमणणं ॥ २९ ॥
 भणिओ मए स खयरो कुमार ! तुह परियणो भणइ किंपि । ता साह तुमं चिय किं पुणेसि पच्चुत्तरं देसो ॥ ३० ॥
 कुमरेण तओ भणियं एगत्तो तुज्झ असरिसो पणओ । एगत्तो गुरुविरहो दोन्निडवि दोलंति मह हिययं ॥ ३१ ॥
 तोहे विसिद्धभोगणदिब्बंसुयरयणभायणाईहिं । सम्माणिऊण कुमरो सट्ठाणं पेसिओ स मए ॥ ३२ ॥
 तेणावि भणियमेयं नरिंद ! काएण एस वचिस्सं । हिययं तु निगडजडियं व तुम्ह पासे परिव्वसिही ॥ ३३ ॥
 वरमत्थखओ वरमन्नदेसगमणं वरं मरणदुक्खं । सज्जनविरहो पुण तिव्वसुदुक्खलक्खंपि अक्खिवइ ॥ ३४ ॥
 इय भणिउं सोगगलंतनयणजलविंदुधोगंडयलो । काऊण मम पणामं सपरियणो अइयओ गयणं ॥ ३५ ॥
 अहंपि तेसिं गयणुप्पयणसामत्थमवलोइंतो पुव्वदिट्ठसमवाचारसंभमणुचितयंतो चितयंतो केत्तियंपि वेलं विलंबि
 नियरज्जकज्जाइं अणुचितिउं पवत्तो, विसुमारियं च मम भोगपमुहकज्जकोडिकरणपसत्तस्स तं गयणनिवडियविज्जाहरमार-
 णउज्जयट्ठुखयरस्स सामरिसं वयणं । एगया य रयणीए जाव कइवयपहाणजणपरियरिओ नियदेससुत्थासुत्थपरिभाव-
 भावणेण य रायंतररहस्सायन्नणेण य गयतुरयगुणवन्नणेण य किन्नराणुकारिगायणजणपारद्धकागलीगीयसवणेण य
 सायरपणच्चिरवारविलासिणीचित्तपयक्खेवनिरिक्खणेण य नम्मालावकरणेण य विंदुचुगपहेलियापणहुत्तरजाणेण य

विणोयंतो चिट्ठामि ताव अयं डविहडियवंभंडभंडुडामरो जुगंतपणचिरभेरवपहयडमडमेंतडमरुयनिनायनिहुरो खरनहर-
 निहारियमयगलगलज्जियदारुणो पासपरिवत्तिभवणभित्तिपरिफालणसमुच्छलंतपडिसइयसहस्सदुधिसहो सपुडिओ
 हलबोलोत्ति, तं च सोऊण विष्फारिनयणजुयलो सयलदिसिमंडलमहप्रवलोयमाणो पेच्छामि तडिडंपयंडकरवाल-
 वावडकरे भवणंगणमभिसरंते हणहणहणत्ति भणंते विज्जाहरे, ते य दट्टणमम परिणो भयभरथरहरंतसरीरो करुणाइं
 दीणाइं वयणाइं समुल्लवित्तो सयलदिसासु सिग्धं पलाओत्ति, ताहे पहरणरहिओ एगागीवि ठाऊणाहं तेसिं संगुह
 जंपिउमेवं पवत्तो य-रेरे किं गलगहियव्व निरत्थयं विरसमारसह? के तुब्भे? केण पेसिया? किं वा आगमणकज्जं?
 तेहिं भणियं-रेरे नरिंदाहम! तइया अमह पडुणो सत्तुरक्खणेण वयणमवगणिय संपयं धिट्ठयाए अयाणमाणो इव के
 तुब्भे केण पेसिया किं वा आगमणकज्जंति पुच्छसि, जइ पुण विसेसकहणेण तूससि ता निसामेहि, अमहे विज्जा-
 हरा रहनेउरचक्कवालपुरविज्जाहरनरिंदिसिरिसमरसिंघनंदणेण वेरिखयरासमप्पणपरूढगाढकोवानेलेन सिरिअगरंते-
 यकुमरेण तुह दुघिणयतरुफलदंसणत्थं पेसियत्ति, मए भणियं-जइ एवं ता जहाइंठु उवचिट्ठहत्ति, तओ असयसरीरं
 चेव मं गहिऊण उप्पइया ते गयणमगेण, गया य दूरदेसं, सुक्को य अहं एगत्य भुयंगभीमे गिरिनिगुंजे, भणियं च
 मए-किं रे! एवं मुंचह? जं नेव पहरह, तेहिं भणियं-एत्तिया चेव पडुणो आणा, पडुचित्ताणुवत्तणं हि सेवभरस
 धम्मो, एवं भणिय उप्पइया ते तओ ठाणाओ। अहं पि कोइलकुलगवलगुलियसामलासु सयलदिसासु केसरिकि-

सोरनिहयनिहारियसारांगपमुक्कविरसारावभीसणेसु काणणेसु वणमहिसावगाहिज्जंतपल्लसमुच्छलंतपंकडलुगुसु म-
गेसु तरुवरसाहासंहरिसयसनिवडंतदहणनिदज्झमाणेसु वेणुगहणेसु पज्जलंतपईवसिहाभीसणविप्फुरंतरत्तलोयेणेसु
इओ तओ वियरंतसु निसायरणेसु वराहत्तिकलदादुक्किणलेट्टुनियरुचावचासु वणत्थलीसु असुणिममग्गुम्मग्गो
विमूढदिसाभागो असोढपयण्यारो एक्कंमि गुरुतरुवर समारुहिउं साहाए पसुत्तोम्हि, दुट्टमहिलव्व कट्टेण समा-
गया निहा, पच्छिमरयणिसमए य जामकरिघडव्व पासमल्लीणा चित्ता पवोहमंगलतूरेहिं पिव रसियं पुराणसि-
यालेहिं मागहेहिं व पढियं सुयगणेहिं, अह उइयंमि सयलतिहुयणभुवणण्णइवंमि दिवायरंमि उट्टिऊण कयपाभाइ-
यकिचो ओयरिऊण तरुवराओ एक्कदिसाए पयट्ठो गंतुं, खणंतरेण य तरुणतरुचक्कलववद्वपरियरो कोदंडकडवाड-
करो नियपणइणीए अणुगम्ममाणो गुंजाफलमालियामेत्तकयाभरणो भुयगंकचुयनिव्वत्तियेकसकलावसंजमणो त-
क्खणविणिवाइयसिहडिससिहमुहविरइयकन्नपूरो दिट्ठो एक्को पुल्लदो, सो य पुच्छिओ मए-भो महाणुभाग ! का एसा
अडवी ? को वा नियसिहरग्गभगरविरहहुरयमग्गो एस गिरिवरो ? का वा नयरगामिणी वत्तिणित्ति ? , पुल्लेदण भ-
णियं-अणामिया नाम एसा अडवी, सज्झाभिहाणो य एस गिरिवरो, एसावि वित्तिणी कंचणपुरनयरमणुसरएत्ति ।
तओ लग्गोऽहं तीए वत्तणीए तावसतवस्सीव कंदमूलफलेहिं पाणवित्तिं करितो पत्तो कइयववासरेहिं कंचणपुरं,
तत्थ य सुणिवरो इव निष्पडिबद्धो वीयरगो इव सब्वसंगरहिओ ठाऊण कइय दिहाणि पेच्छंतो पुव्वट्ठाणाइ अव-

लेण्तो गामागरे निरुर्वितो धम्मियजणकारावियाइं समुत्तुंगसुंदरागाराइं सुरमंदिराइं कप्पडिओ इव दाणसालासु पा-
णविंत्तिं कुणमाणो अणवरयपयाणएहिं पत्तो सरज्जसीमासन्निवेसं, तत्थ य कइवयदिणाणि वीसमिय पुणरवि चलिओ
नियनयराभिमुहं । इतेण य सुणिऊण नियलहुभाउणो विजयसेणस्स संपत्तरज्जस्स विभववित्थरं चितियं मए—नूणं
विजयसेणेणाहिद्वियंमि रज्जे न जुत्तं तत्थ मे गमणं । जेण—

पुव्वकयधम्मकम्माणुभावओ पाविऊण रज्जसिरिं । चिंतामणिव्व दाउं को वंछइ वल्लहस्सावि ? ॥ १ ॥

पिच्छामि तहाविय मित्तमंतिसामंतवयणविन्नासं । जं नहुं नणु रज्जं तं दिट्ठं हरणकालेऽवि ॥ २ ॥

इह चिंतयंतो पत्तो कमेण सिरिभवणनयरं, अलक्खिज्जमाणो पुरजणेण पविट्ठो सहंपसुकीलियस्स सोमदत्ता-
भिहाणस्स वयंसस्स गिहे, सो य ममं दट्ठुण झडत्ति जायपच्चभिन्नाणो सहरिसं पाएसु निवडिय गाढं परुव्वो,
भणिउमाढत्तो—

तुह विरहे मम नरवर ! वरिसं व दिणं न जाइ पज्जंतं । हिमहारचंदचंदणरसावि दूरं तविति तणुं ॥ १ ॥

भवणं पेयवणं पिव पणइणिवग्गो य डाइणिगणोव्व । सयणावि भुयंगा इव न मणंपि मणा सुहाविति ॥ २ ॥

एत्तियदिणाइं लोएण धारिओ कहवि गुरुनरोहेण । जंतो इण्हिं विदेसे जइ नाह ! तुमं न इंतोऽसि ॥ ३ ॥

तो एयं वरभवणं एसो धणवित्थरो इमे तुरया । एसो किंकरवग्गो पडिवज्जसु तं महीनाह ! ॥ ४ ॥

एसाई पणयसाराई वयणाई भासतो भणिओ मए सोमदत्तो-पियवयंस ! किं सोयविहुरो हवसि ? किं वा निय-
भवणधणाइयं समप्पेसि ? किमेवं तुह पणयसारो पयडीभवस्सइ ? को वा अन्नो ममाओवि तुह पाणप्पिओ ? किं
वा तुह दंसणाओऽवि अन्नं ममेहागमणव्यओयणं ? ता धीरो भव, अच्छउ सव्वस्ससमप्पणं, तुह जीवियंपि ममायत्तं
चेव, तओ काराविओऽहं ण्हाणविलेवणभोयणपमुहं कायच्चं, खणंतरेण पुच्छिओ मए-पियवयंस ! साहेसु किमि-
याणिं कायच्चं ? सोमदत्तेण भणियं-देव ! किं निवेदेमि ? मं एकं पमोत्तणं अन्नं सव्वेऽवि मंतिसामंता दढपक्खवाया
विजयसेणे, नेच्छंति नाममवि तुह संतियं भणिउं, जइ सो कहवि आगमिस्सइ तहावि एयस्स चेव रज्जं, जओ एयस्स
मुद्धा मती अम्ह दढं वसवत्ती थेवंपि वयणं न विलेधेइत्ति, विजयसेणो पुण नियसरीरमेत्तेण तुम्ह विरहे वाढं परि-
तम्मइ, भणइ य-जइ एइ जेट्टभाया ता धुवं समप्पेमि रज्जधुरं, जहाजेट्टरज्जपालणमेव अम्ह कुलघम्मोत्ति, एवं ठिए
किंपि न जाणिज्जइ जुत्ताजुत्तं, ता एत्थेव अलक्खिज्जमाणो तुमं चिट्ठसु कहवयदिणाणि जाव उवलक्खेमि नरिदाइण
चित्तं, मए भणियं-एवं हवउत्ति, तओ सोमदत्तेण सामेण य दंडेण य भेएण य उवप्पयाणेण य आढत्ता मंतिसामं-
तादओ भेइउं, निट्ठुरवज्जगंठिपिव न य केणवि भिज्जंति उवाएणं, नाओ य तेहिं समागमणयइयरो, निवारिया य
रायदुवारपाला जहा न सोमदत्तस्स रायभवणे पवेसो दायवोत्ति, विजयसेणस्सवि सिट्ठं जहा तुम्ह जेट्टभाया
पंचत्तं गओत्ति निसामिज्जइत्ति, तेणावि एवं निसामिय कओ महासोगो; पयट्ठियाइं मयक्किचाइत्ति, एवंति मह

रज्जकज्जविसयं जं जमुवायं घडेइ सो निउणो । दइवो पडिक्खलो इव तं तं विहेडेइ निक्खरुणो ॥१॥ अन्नया य गातिसि-
सायवसविसंदुलेण सुणियपरमत्थेण भणियं सोमदत्तेण-देव ! निम्मज्जाएहिं भंतिसामंताइहिं तुमह पंचत्तगमणयत्ता
निवत्तिया राइणो पुरो, ता जइ कंहपि रायवाडियाए निगयस्स विजयसेणस्स दंसणपहे ठाऊण नियदराण
ठावेसि ता जुत्तं होइत्ति, जओ तुमह दंसणं बाढमभिकखइ एसो, पडिवन्नं च मए एयं तदपुरोहेण, अन्नया अ
पवरकरेणुगाखंधगओ निगओ विहारजत्ताए विजयसेणो, पासायसिहरमारुहिऊण य ठिओ अहं से चयसुगोथरे,
इडत्ति दिट्ठोऽहमणेण, सागयं २ चिरागयबंधवस्सत्ति हरिसुफुल्लोयणो य जाव सो वाहरिउं पवत्तो ताव तद्वखाणा
चेव भंतिसामंतपमुहेहिं रइया अंबरे अंतरवडा, कओ हलवोलो, नियत्तिओ विहारजत्ताओ राया । भणियं च-

असिवं तुह किंपि इमं जं देव ! पिसायदंसणं जायं । किं पंचत्तगयजणो दीसइ य कयावि पच्चक्खो ? ॥ १ ॥

ता लहु गच्छह भवणं संतिं कारेह देह भूयवल्लिं । पारंमह होमविहिं सुमरह मच्चुजयं मंतं ॥ २ ॥

वियरसु सुवणदाणं माहणसमणाण तक्कयजणाणं । एवं कहिए सिग्वं मिंठेणं चोइया करिणी ॥ ३ ॥

भवणंमि तओ गंतुं जं जह भणियं तहेव नीसेसं । अइमुद्वुद्धिभावा करावियं विजयसेणेण ॥ ४ ॥

अहं पुण निरुच्छाहो निराणंदो ववगयधीरिमभावो अवयरिय तओ ठाणाओ सोमदत्तस्स अकहेभणो
पच्छन्नदेसे ठाऊण चित्तिउमाढत्तो, कहं ?—

अणवरयकणयविद्यरणपरितोसियमाणसावि कह पावा । सांमंता मत्ता इव पुरट्टियपिहु मुणंति न मं ? ॥ १ ॥
कह वाऽवराहमणेण (सहणेण) भूरिसोगु(मह) सपयंमि ठवियावि । न गणंति मंतिणो मं तणं व पम्मुक्कमज्जाया ? ॥ २ ॥
कह नयरमहत्तरया उवयरिया णेगसोऽवि कजेसु । माणंति न मं सप्पणयवयणमेत्तेण विहयासा ? ॥ ३ ॥
जयसेहरकुमरो सो विज्जाहरायसुकुलजाओऽवि । तह उवयरिओऽवि कहं उवेहए मं तदियरोच्च ? ॥ ४ ॥
होउ वा, किं एएण विगप्पिएण?, अत्तहियमियाणिं कीरइ मुच्चइ इमं नयरं गम्मइ अन्नत्थ देसे ओलगिगजइ
अन्नो गरुओ नरवइत्ति, अहवा सयलजयपयडपरक्कमस्स सिरिअवंतिसेणमहानराहिवस्स सुओ होऊण कइवय दिणाइ
रज्जरिद्धिसुद्धुरमणुभविय कहमियाणिं अन्नस्स हेट्ठा ठाइस्सामित्ति सब्बहा न जुत्तं परिचिंतिउं, भेरवपडणेण अत्त-
परिचाओ चेव संपयं मे सब्बोवाहिविसुद्धोत्ति निच्छिऊण निग्गओ नयराओ लग्गो भेरवपडणाभिमुहं, वत्तिणीए
अखंडपयाणेहिं पवचंतो संपत्तो तरुणतरुसंडमंडियं उब्भडसिंहंडितंडयाडंबरमणिज्जं हंससारसकर्पिजलकोकिलकु-
लकलकलरवमुहलं पुंनागनागजंबुजविरनिंबवंपयासोयसोहियपरिसरुहंसं भेरवपडणपचासन्नं एक्कमुवचणं, दिट्ठो
य तत्थ अणेगजनमंसिजमाणचरणो सल्लक्खणनरसिरकवालमेत्तपरियरो मंतज्झाणपरायणो करकमलकलियजो-
गदंडो समत्थनाणविन्नाणपरमपरिसपत्तो ससाहसपरितोसियवेयालो महाकालो नाम जोगायरिओ, पणमिओ य मए
सद्वायरेणं दिन्नासीसो य निविट्ठो संनिहियधरणिवट्ठे, अवलोइओऽहं तेण सिणिद्धाए दिट्ठिए, खणंतरे संभासिओ य-

भइ ! उद्विग्नचित्तो इव लक्ष्मीयसि, ता किं भट्टलच्छीविच्छड्ढोत्ति उयाहु विदेसागओत्ति, अन्नं वा किंपि कारणं ?,
मए भणियं-भयवं ! अम्हारिसा पुन्नरहिया पाणिणो पए पए उद्विग्नचित्ता चेव, कित्तियाइं कारणाइं साहिज्जंति ?,
तेण जंपियं-तहावि विसेसयरं सोउमिच्छामि, मए भणियं-भयवं ! किं एएण ज्ञाणविघकारएण नियवइयरसाह-
णेण ?, महाकालेण भणियं-किं तुज्झ ज्ञाणचिंताए ?, जहाइट्टं कुणसु, तथो मए विज्जाहरावलोयणं च जुज्झनिवडि-
यखयररक्खणं च महाडविनिवाडणं च नियनगरागमणं च मंतिसामंतपमुहजणावमाणणं च रज्जावहारदुक्खं च
उवयरियविज्जाहरोवेक्खणं च नयरनिगमणं च भेरवपडणं पडुच समागमणं च सिट्ठमेयस्स, अह महाकालेण
भणियं-अहो विरुद्धकारित्तणं हयविहिणो जमेरिसे असमसाहसधणे जणे विणिम्मिय एरिसत्तिकखुदुक्खभायणं
करेइ, अहवा—

साहसधणाण हिययं दुक्खं गरुयंपि सहइ निवडंतं । इयराण दुहलवेणवि विहडइ जरसिप्पिणिपुडं व ॥ १ ॥
जह निवडइ गुरुदुक्खं तहेव सोवखंपि संभवइ तेसिं । इयराण तुल्लसुहदुक्खसंभवो निचकालंपि ॥ २ ॥
कस्स व निरंतरायं सोक्खं ? कस्सेव नावया इति ? । को दूसिओ खलेहिं नो ? कस्स व संठिया लच्छी ? ॥ ३ ॥
इय नाउं चय सोयं पुणोऽवि तुह वंछियाइं होहिंति । सूरुोऽवि रयणितमनियरविगमओ पावए उदयं ॥ ४ ॥
जं पुण तुमए भणियं भेरवपडणं कोरमि मरणट्टं । तं बुहजणपडिसिद्धं खत्तिथयम्मो विरुद्धं च ॥ ५ ॥

जेण-बंभणसमणच्चिय मरणकज्जमब्भुज्जमंति नो धीरा । विहिविहडियंपि कज्जं घडंति ते बुद्धिविहयेण ॥ ६ ॥
तहा-चत्तविसायपिसायं अणलसमविमुक्कविक्रमेक्कसं । अणुसरइ सिरी दूरं गयावि पुरिसं हरिसियव ॥ ७ ॥
तओ मए भणियं-भयवं ! विमूढचित्तलक्खो म्हि संपयं, न जाणामि जुत्ताजुत्तं न सुणामि उवायं न समीहेमि
खत्तघम्मं न वियारेमि जणनिंदं न लक्खेमि सुहदुक्खं, सवहा कुललददडंचालियचक्काधिरूढं व मम मणो न
मणांगंपि कत्थवि अवत्थाणं पावइ, तो भयवं ! तुमं चेव सोहेहि, किं कायवं ? को वा उवाओ समीहियत्थसि-
द्धीए?, महाकालेण भणियं-वच्छ ! पवज्जसु मम पवज्जं, आराहेसु चरणकमलं, अब्भस्सेसु जोगमगं, होहिति
गुरुभत्तीए मणोरहसिद्धीओ, तओ भयसंभंतो इव सरणागयवच्छलं दालिहाभिभूओ इव कण्णपायवं सहारोगपी-
डिओ इव परमवज्जं पहीणचकुबलो इव पददेसगं सव्वायेण तमाराहिउं पवत्तो, दूरमागरिसियं च विणएण मए
तस्स चित्तं, निउत्तोऽहमेक्को तेण नियरहस्सठाणेसु सिक्खविओ निस्सेसाइं आगिट्ठिपमुहाइं कोऊहलाइं, अन्नया
य पसत्थेसु तिहिनक्खत्तमुहत्तेसु परमपमोयमुव्वहत्तेण तेण एगंते उवइट्ठो मम तइल्लेक्कविजओ मंतो, कहिओ साहज-
विही जहा-अट्टोत्तरसयपहाणखत्तिएहिं मसाणहुयासणो तप्पणिज्जो, कायवं दिसिदेवयावलिवियरणं, पवहियव्वं
अणवरयमंतसुमरणं, तओ एस सिज्झिहिइ, काही य एगच्छत्तधरणिथलज्जदाणं, पडिवन्नो य मए विणयपणएण,
समाढत्तो य साहिउं, गओ कलिंगपमुहेसु देसेसु, आरद्धो य जहालाभं खत्तियनरत्तमेहिं होयो जाय एत्तिं कालंति ।

ता नरसेहर ! नरसिंघ जं तए पुच्छियं पुरा आसि । किं अप्पाणं निंदसि इणमो नणु कारणं तत्थ ॥ १ ॥

भयवसविसंदुलगा सारंगा इव विचित्तकूडेहिं । जं सत्ता विद्विया तमियाणिं दहइ मह हियं ॥ २ ॥

दुज्झाणकलुसबुद्धित्तणेण पुवं न याणियं एयं । तुह दंसणेण इण्ह विवेयरयणं समुल्लसियं ॥ ३ ॥

नरसिंहेणं भणियं सचं पावं कयं तए भूरि । जं कीडियाणवि वेहे पावं गुरु किमु नरिंदाणं ? ॥ ४ ॥

तेसिं विणासे जम्हा धम्मब्भंसो य सीमविगमो य । अवरोप्परं च जुज्झं विलयाजणसीलविलओ य ॥ ५ ॥

ता ठाणे तुह दुच्चरियगरिहणं धम्मगोयरा बुद्धी । एवं ठिएऽवि जलणप्पवेसणं तुज्झ नो जुत्तं ॥ ६ ॥

तित्थेसु वच कुरु देवपूयणं मुंच निंदियं भावं । पायच्छित्तं पडिवज्ज सुगुरुसयासे पयत्तेण ॥ ७ ॥

निंदसु पइक्खणं दुक्कयाइं निसुणेसु धम्मसत्थाइं । उत्तमसंसंगिं कुणसु चयसु तिवं कसायं च ॥ ८ ॥

ईसाविसायमुच्छिद भिंद विसमविसयतरुनियरं । नियजीयनिद्विसेसं नीसेसं पेच्छ पाणिगणं ॥ ९ ॥

पसमरसं पिवसु सया दूरं परिहरसु खुद्वचरियाइं । जुत्ताजुत्त विधारसु सबक्खेसु जत्तेणं ॥ १० ॥

खणपरिणइधम्मत्तं चित्तसु भवंमि सबवत्थूणं । नियसुकयदुकयसच्चित्तणं च लक्खेसु परजम्मे ॥ ११ ॥

इय जयमाणस्स सया सुद्धी तुज्झं भविस्सइ अवस्सं । जलणप्पवेसं सलभा कुणंति कुसला उ न कयाचि ॥ १२ ॥

एवं संठविज्जण मरणदुरज्झवसायाओ धोरसिवं जाव विरओ नरिंदो ताव पहयपडहसुरवपुहुतूरनिनाथवहि-

रियदियंतरा विचित्तमणिभूसणकिरणकब्बुरियमसाणगणा गयणाओ ओयरिया विज्जाहरा, परमपमोयमुच्चहंता निव-
डिया घोरसिवचरणेसु, भणिउमाढत्ता य-देव ! अम्हे गयणवल्लहपुराहिवविजयरायविज्जाहरिंदसुएण सिरिजयसे-
हरायकुमारेण पेसिया तुम्ह आणयणनिमित्तं, ता कुणह पसायं, आरुहह इमं समुद्धुयविजयवेजयंतीसहस्साभि-
रामं उज्झंतकसिणागरुकण्णूरूपूरसुरहिधूवधूमंधारियदिसाभोगं मणिकणगयणरइयविचित्तविच्छित्तिभित्तिभागं कुसु-
मावयंसाभिहाणं वरविमाणं, घोरसिवेण भणियं-भो विज्जाहरा ! मुयह मम विसए पडिवंधं, अन्नोऽहमियाणि विगय-
भोगपिवासो, विजणविहारेसु रणणेसु जाया निवासबुद्धी वद्धा भिगकुलेसु सयणसंवंधसद्धा पलीणो मायामोहो
जलणजालाकलावकवलयिभिव पेच्छामि जीवलयं, ता जहाणयं गच्छह तुब्भे, जहादिट्ठं च से निवेएज्जहत्ति, विज्जा-
हरेहिं भणियं-मा भणह एयं, जओ जहिणाओ तुम्ह पासाओ गओ जयसेहरकुमारो तदिणादारब्भ जाओ रहने-
उरचक्कवालपुरनाहेण सिरिसमरसिंधेखयराहिवइणा सह महासमरसरंभो निवडिया अणेगसुहडा, कहमवि महाक-
ट्टेण निष्पिट्ठो सो अमरतेयाभिहाणो दुट्ठमित्तो, घडिया इयाणि परोप्परं संघी, कयाइं अन्नोऽन्नघरोसु भोयणवत्थ-
दाणाइं, अओ एत्तियकालं नियकज्जकोडिवावडत्तणेण संपयमेव नाओ तुम्ह अडविनिवाडणपामोक्खो वइयरो,
कुमारेण तओ अंचंतजायतिघसोगसंदब्भेण विसज्जिया अम्हे सव्वासु दिसासु तुम्हवलोयणत्थं, भणिया य-अरे
सिग्घं जत्थ पेच्छह तं महाणुभावं तत्तो सव्वहा आणेज्जह, नन्नहा भोयणमहं करिस्सामि, तओ सव्वत्थ निउणं निउणं

निरुवंता पत्ता एत्तियं भूमिभागं, एत्थ आगएहि य निसामिओ तुम्ह सद्दो, को पुण भीसणे मसाणे एत्तियेवेलं होहित्ति कोज्जहलेण सुणंतेहिं कुमारपचाणयणकालागएहिं पुरा तुम्ह निसुयसद्दणुमाणेण पच्चभिन्नायत्ति, ता कुणह पसायं जयसेहरकुमारजीवियदाणेण, एत्थंतरे विण्णायपरमत्थेण भणियं पत्थिवेण-ओ महासत्त ! परिचय करुम-भावं, पणयभंगमीरुणि भवंति सप्पुरिसहिइयाणि ता अंगीकरेसु एएसि पत्थणं, धोरसिवेण भणियं-महाराय ! बाढं विरत्तं मम रज्जादीहिंतो चित्तं, गाढपावनिबंधणं खु एयं, रण्णा भणियं-मा मेवं जेपेसु, जओ-

सन्नायं दिसओ विसिट्ठमुणिणो पालितथस्साणिसं, सासितस्स विसिट्ठनीइ मणुए दाणाइं दितस्स य । धम्मो होइ निवस्स वस्समइणो रज्जेऽवि संचिट्ठओ, नो साहुस्स स सत्थवज्जियविहीजुत्तस्स गुत्तस्सवि ॥ १ ॥ धोरसिवेण भणियं-महाराय ! एवमेवं, राइणा भणियं-जइ एवं ता गच्छह तुब्भे, पडिच्छह [वि]जयसेहरकुमार-पूयापडिवत्तिं, धोरसिवेण भणियं-महाराओ निवेयइ तं कीरइत्ति, तओ पहरिसिया विज्जाहरा, सायरं पणसिउं तेहिं राया विन्नत्तो-अहो महायस ! परमत्थेण तुब्भेहिं दिन्नं अहं पडुणो जीवियं, अहं पसुक्कवालयसुहकुलिंगो-वगरणो विओगेवेयणावसविसप्पमाणनयणंसुधाराधोयवयणो धोरसिवो गाढमालिंगिय नरवइं सगगयगिरं भणिउमाढत्तो-

कुब्भमत्तिमिरुब्भामियलोयणपसरेण तुज्झ अवरद्धं । जं किंपि पावमइणा तमियाणिं खमसु मम सधं ॥ १ ॥

सीसो इव दासो इव रिणिओ इव किंकरो इव तुहाहं । ता साहसु किं करणीयमुत्तरं राय नरसिंह ! ॥ २ ॥
रत्ना भणियं जइया निरज्जसिरिं समगमणुहवसि । मम संतोसनिमित्तं तइया साहिज्जसु सवत्तं ॥ ३ ॥
एवं काहंति पयंपिऊण विज्जाहरोहिं परिरिओ । दिव्विमाणारूढो सो झत्ति गओ जहाभिभयं ॥ ४ ॥
रायावि पत्ततिहुयणरायसिरिवित्थरं पिव सयलसुकयसंचयपत्तोवचयंपिव समत्थपसत्थित्थदंसणपूर्यं पिव अट्ठपाणं
मन्नतो पाणिपइट्ठियखगरयणो गओ नियभवणं, निसण्णो सेज्जाए सुत्तो खणंतरं समागआ निदा, निसावसाणे य
रणज्झणंतमणिनेउरराणुमगलंगचक्कगखलियचंकमणा अणायरसट्ठ्ठाणिउत्तलट्टकंचीकलावण्णमुहाभरणा सहरिस-
पधाविथलुज्जिवामणिपुल्लिदिपमोक्खचेडीयाचक्कवालपरिखुडा पविट्ठा चंपयमाला देवी, दिट्ठो राया निदावसनिस्स-
हेसेज्जाविमुक्कसवंगोवंगो, भणियं चउणाए-परिणीयपुत्तिओ इव हयसत्तू इव विट्ठत्तदविणोव परिपट्ठियसव्वसत्थोव
निब्भयं सुयइ नरनाहो, अह खणंतरं पवज्जियाइ पाभाइयमंगलतूराइ पयडीहूयाइ दिसिसुहाइ, पट्ठियं मागहेण-
लंघेउं विसमंपि दोसजलहिं गंजिउ दोसायरं, गोत्तं पायडिउं सवीरियवसा चंकमिउं भीसणे ।
आसाअंगसमुब्भवेण महसा सोरण संपूरिउं, सूरु देव ! तुमं पिवोदयसिरिं पावेइ सोहावहं ॥ १ ॥

एवं च निसामित्ता पबुद्धो राया, चित्तिउमाढत्तो य-अहो सारस्सयंपिव वयणं जहावित्तवत्थुगन्धं कंहं पट्ठियं
मागहेण ?, एवमेव पुणो पुणो परिभावेमाणो उट्ठिओ सयणाओ, अवलोइया य हरिसवसवियसंतनयणसहस्सपत्ता

देवी चंपयमाला, पुट्टा य सा आगमणपओयणं, भणियं च तीए-देव ! अज्ज पच्छिमद्वज्जो मे सेसरणीए सुहपसु-
 त्ताए सुमिणयंमि सहसच्चिय वयणंमि पविसमाणो मए अनणुप्पमाणो मणिरयणमालालंकिओ पवणसमुदुयंवल-
 भिरामो फलिहमयडिंडिरपंडुरडंडोवसोहिओ महज्झओ दिट्ठो, एवंविहं च अदिट्ठपुवं सुमिणं पासिज्जण पडिबुद्धा
 समाणी समागया तुम्ह पासंसि सुमिणसुभासुभफलजाणत्थं, ता साहिउमरिहइ देवो एयस्स फलति, रक्षा
 भणियं-देवि ! विसिट्ठो तए सुमिणो दिट्ठो, ता निच्छियं होही तुह चउससुहमेहलावलयमहिमहिलापइस्स कुल-
 केउस्स पुत्तस्स लाभो, जं तुब्भे वयह अवितहमेयंति पडिवज्जिय निबद्धा देवीए उत्तरीयंमि निट्ठुरा सउणगंठी,
 खणंतरं च मिहोकहाहिं विगमिय गया देवी निययभवणं, रायावि कयपाभाइयकायवो निसणो सभासंडवंसि
 अह पढममेव गाढकोउहलाउलिज्जमाणमाणासा समागया बुद्धिसागरपमुहा मंतिणो, भूमितलविलुलियमउलिमंडला
 निवडिया चरणेसु, दिन्नासणा निविट्ठा सद्वानेसु, विन्नविउमाढत्ता य-देव ! अज्ज चउजामावि सहस्सजामव कहमयि
 पभाया अम्ह रयणी घोरसिवसुणिवइयरोवलंभसमसूगत्तणेणं, जइवि किंपि पसंतवयणावलोयणाइलिं गोवगया कज्जसिद्धी
 वट्ठइ तहावि विसेसेण तुब्भेहिं साहिज्जमाणिं सोउमिच्छामो, ता पासियउ देवो रयणिवइयरनिवेयणेणंति, ताहे तेसिं
 वयणाणुरोहओ ईसिं विहसियं काउं जहा घोरसिवेण समं मसाणदेसंमि संपत्तो जह विन्नाओ लोभभायरभाणो
 जहा य सो भणिओ गिणहसु सत्थं जह तेण कत्तिथा वाहिया कंठे जह पडिरुद्धो बाहू सकत्तिओ जह महीयले

निहओ जह उट्टिओ पुणोऽविहु निफंदो जह हओ पच्छा सुरसुंदरीहिं खित्तो जह कुसुमभरो समागया देवी जह दिन्नो तीए वरो जह सा अहंसणं पत्ता जहा घोरसिवो निवेद्यमुणओ पट्टिओ य मरणत्थं जह पुव्वइयरो तेण संठिओ (निवेइओ) जह व संठविओ जह परिचियविज्जाहरविमाणमारुहिय सो गओ नमिउं संखेवणं तह नरवरेण सिट्ठं समत्थं, सोच्चमं हरिसिओ मंतिवग्गो, पयट्ठिओ य नयरीए महंतूसवोत्ति ।

अह अन्नया कयाई चंपयमालाए रायमहिलाए । दुहिसत्तरक्खणंमी दीणाणाहाण दाणे य ॥ १ ॥ देवगुरुपूयणंमी पणईणं चित्तियत्थदाणे य । उप्पण्णो दोहलओ विसिट्ठगब्भाणुभावेण ॥ २ ॥ जुम्मं । चित्तेइ य सा एवं ताओ धन्नाओ अम्मयाउ इहं । इय पुन्नदोहलओ जाओ गब्भं वहति सुहं ॥ ३ ॥ एवं च अपुज्जंतदोहलयसंक्कप्पवसेण कसिणपक्खमयलंछणमुत्तिव्व कसित्तणमणुभविउं पवत्ता देवी । अन्नया य

पुट्ठा नरवइणा-देवि ! किमेवं पइदिणं किसत्तणं पावेसि ? साहेसु एयकारणं, गाढनिबंघे सिट्ठं तीए नियमणवच्छियं, ताहे परं पमोयमुव्वहतेण विसेसयरं पुरियं नरिंदेण, माणियडोहला य धरणिव्व निहाणसंचयं दिसव्व नलिणीनाहं सुहंसुहेणं गब्भं वहमाणी देवी कालं गमेइ, अण्णया य पडिपुण्णेसु नवसु मासेसु अट्ठमराइदिएसु सुभेसु तिहि-करणनक्खत्तमुहुत्तेसु पुरंदरदिसिद्व दिणयरं कोमलपाडलकरपडिपुण्णसंघंगोवंगसुंदरं पुत्तं पसूया । तओ सहरिसं गयाओ नरिंदभवणंमि चेडीयाओ, दिट्ठो राया, भणिओ य-देव ! वद्धाविज्जसि जएण विजएण य तुमं, जओ

इयाणिं चैव पसूया देवी चंपयमाला, जाओ य समुज्जोतियसयलदिसामंडलो तेयरसिध पुत्तोत्ति, इमं च सोचा नरि-
देण दिन्नं तासिं भूरि पारिओसियं, कओ दासित्तविगमो, आहूया पहाणपुरिसा, समादिट्ठा य जहा पयट्ठेह नीसेस-
नयरीए तियचउक्कचचरेसु खंदमुगुंदसूरिंदगयमुहमंदिरेसु य परममहूसवं, वियरह अणिवारियपसरं कणयदाणं मुयह
चारगाहितो जणंति बुत्ते जं देवो आणवेइत्ति भणिऊण पुरीए पारद्धं तेहिं वद्धावणयं ।

कहं चिय?, -पंचण्यारवन्नयविरइयसुपसत्थसत्थियसमूहं । विक्खित्तक्खयदोवापचालसोहंतमहिवीढं ॥ १ ॥

रहसपणचिरतरुणिगणवच्छत्थलुट्टुहारसिरिनियरं । अन्नोन्नावहरियपुण्णपत्तवट्टंतहलबोलं ॥ २ ॥

पडिभवणदारविरइयवंदणमालासहस्सरभणिज्जं । कमलपिहाणामलपुन्नकलसेरंहंतगेहमुहं ॥ ३ ॥

वज्जंताउज्जसमुच्छलंतघणघोरघोसभरियदिसं । चिन्ताइरित्तिदिज्जंतदविणसंतोसियत्थिगणं ॥ ४ ॥

पसुइयनीसेसजणं कुलथेरीकीरमाणमंगलं । इय नरवइकयतोसं वद्धावणयं कयं तत्थ ॥ ५ ॥

एत्थंतरे मंतिसामंतसेणावइसत्थवाहपमुहा पहाणलोया गहियविचिविहतुरयरयणसंदणपमोक्खविसिट्ठवत्थुवित्थरा
गंचूण नरवइं वद्धाविंसु ?

इओ य सो घोरसिवो विज्जाहरेहिं नेऊण समण्णिओ जयसेहरस्स कुमारस्स, तेणावि पिउणोव गुरुणोव तदागमणे
कओ परममहूसवो, पुट्ठो य एसो पढमंदसणाओ आरब्भ सव्ववुत्तंतं, धरिओ ण्हाणविलेवणभोगयणदिंस्सुयदाणपुरस्सरं

कइयवि वासराइ, अन्नदियहे चाउरंगसेणासण्णाहेण जयसेहरकुमारेण गंतूण सिरिभवर्णमि नगरे विजयसेणरणो
दंसिज्जं जहावित्तं संसिज्जण यदुइत्तंमत्तिसामंतुस्सिखलदलणपुवं सो घोरसिवो सहत्थेण निवेसिओ रायपए, विजय-
सेणोऽवि ठविओ जुवरायत्ते, एवं कयकायव्वो जहागयं पडिगओ जयसेहरो, घोरसिवोऽवि पुवंपिब मुंजिउं पवत्तो
नियरज्जंति । अन्नया तेण सुमरिज्जण नरसिंहनरवइणो रज्जसंपत्तिवुत्तन्तनिवेयणं पुव्वकालपडिवन्नं तक्खणंचिय विसज्जिया
पहाणपुरिसा विसिट्ठपाहुडसमेया नरसिंधनरवइणो समीवे नियवइयनरनिवेयणत्थं, पत्ता य ते अणवरयपयाणएहि
जयतीनयरियारिसरूइसं, निसुणिया य रत्ता, पवेसिया य महाविभूईए, समणियाइं रत्तो तेहिं पाहुडाइं, साहिओ
घोरसिवनरवइसमाइठुत्तंतो, हरिसिओ राया, सम्माणिया उचियपडिवचीए, पेसिया य सट्ठुणंसि ।

अन्नदिवसे य समारद्धो कुमारस्स नामकरणमहूसवो, समाहूओ कुलथेरीजणो, तओ वज्जंतसु चउव्विहाउज्जेसु
नच्चंतसु तरुणीसत्थेसु मंगलमुहलेसु वारविलयाजणेसु पढंतसु मागहेसु पइद्वियं कुमारस्स पुव्वपुरिसक्कमागयं नरवि-
क्कमोत्ति नामं, कालक्रमेण य विइक्कंतबालभावो नीसेसविज्जापायस्स लेहायरियस्स चेडयच्चक्यालपरिसुडो महा-
विभूईए पढणत्थमुवणीओ, अकालक्खेवेण य बुद्धिपगरिसेण जाओ एसो कलसु कुसलो, कहं चिय?—

पत्तट्ठो धणुवेए कुसलो नीसेसमल्लविज्जासु । कयकिच्चो करणेसु विचित्तचित्तेसु निउणमई ॥ १ ॥

परभावलक्खणम्मी वियक्खणो जाणओ समयसत्थे । पत्तच्छेये छेओ निम्माओ सहमगेसु ॥ २ ॥

निउणो मंतविथारे तंतपओगेसु कुसलबुद्धी य । पुरिसकरितुरयनारीगिहलखणवोहनिउणो थ ॥ ३ ॥

आउज्जनट्टजूयप्पओगबहुभेयगेयचउरो य । किं बहुणा?, सबत्थवि गुरुच्च सो पगरिसं पत्तो ॥ ४ ॥

एवं च गहियकलाकलावंकुमरं घेतून गओ कलयरिओ नरवइसमीवं, अब्भुट्ठिओ परमाथेणं नरवइणा, देवाविधारा-
णो उवविट्ठो पुट्ठो य-किमागमणकारणति, कलयरिएण भणियं-देव ! एस तुम्ह कुमारो गाहिओ नीसेसकलाओ भुरए-
रुव पत्तो परमपगरिसं, न एत्तो उत्तरेण गाहियव्वमत्थि, ता अणुजाणेउ देवो अम्हे सट्ठाणगमणायत्ति, अह अकालनये-
वसिक्खियकुमारकलाकोसलसवणपवहुमाणहरिसभरनिम्भरेण नरवइणा आचंदकालियसासणनिबद्धदत्तगहाहा-
णेण पवरचाभीयरयणरासिवियरेण विसिट्ठवत्थफुल्लंतवोलसहत्थसम्पणेण य सम्माणिऊण परमाथेणं पेरिओ
कलयरिओ सट्ठाणं, कुमारोऽवि निउत्तो गयतुरयवाहीयालीसु समकरणत्थं, सो य दढासणबंधधीरयाए महात्थेण
य जाममेत्तेणवि समसुवणेइ सत्त मत्तसिंधुरे पवणजवणवेगे परमजचे चउद्दस तुरंगमे अट्ट महामल्ले य, एवं वे दया
असमबाहुबलेण य मइपगरिसेण य कलाकोसल्लेण य नयपालेण य विणयपवत्तणेण य समओचियजाणणेण य
असरिससाहसत्तणेण य मयणाइरेयरुवविभवेण य जणवच्छलत्तणेण य वाढमक्खित्तचित्तो कुमारभेक्कमेव धढावेइ
मंगलपाढेसु लेहेइ चित्तमिचित्सु निसामेइ कित्तीसु गायावेइ गीएसु अभिणच्चावेइ नट्टेसु, अविय-
रुद्वेवि दुट्ठसीलेऽवि रूवरहिएऽवि गुणविहीणेऽवि । लोओ पुत्ते पणयं किंपि अपुत्तं पयासेइ ॥ १ ॥

किं पुन चिरकालसमुन्भवमि नीसेसगुणमणिनिहिमि । सकुलमुद्धरणखमे न होज्ज नेहो नरवइस्स? ॥ २ ॥
एगया य अत्थाणमंडवनिस्सन्नमि नरवइमि पायपीढासीणे कुमारे नियनियट्ठाणनिविट्ठसु मंतिसामंतसु समारद्धमि
गायणजणे मणोहारिसरेण गेए पणच्चिरमि चित्तपयक्खेवनट्टविहिविथक्खणे चारविलासिणीजणे पच्चासन्नमागतूण
विन्नविथं पडिहारेण-देव ! हरिसपुरनयराहिवइस्स देवसेणभूवइस्स दूओ दुवारे देवदरिस्सणं समीहेइ, राइणा
भणियं-भइ ! सिग्घं पवेसेहि, जं देवो आणवेइत्ति भणिऊण पवेसिओ अण्ण, कया से उचियपडिवत्ती, पुट्ठो य
आगमणप्पओयणं, दूएण जंपियं-देव ! हरिसपुरपहुणा देवसेणनरिदेण रूवजोद्धणगुणोवहसियनागकन्नगाए निय-
सुयाए सीलवइनामाए वरनिरूवणत्थं पेसिओऽम्हि तुम्ह पासे, रण्णा जंपियं-भइ ! पेच्छसु पायपीढासीणं कुमारं,
परिभावेसु य किमणुरूवो वरो न वत्ति, दूएण भणियं-देव ! विन्नवणीयं अत्थि किंची, रत्ता भणियं-विन्नवेसु, दूएण
जंपियं-जइ एवं ता निसामेसु, अत्थि अम्ह नराहिवस्स देवसेणस्स समगवीरवग्गपहाणो कालमेहो नाम
महामल्लो, तस्स य किं वन्निज्जइ बलपगरिंसमि?, तथाहि-

दढकाटिणकायवणमाहिसजूहूनाहेण सह सरोसेणं । सीसेण संपलगइ जुज्जेउं सो बलमएणं ॥ १ ॥

मुंडादंडे घेत्तण पाणिणा मत्तदतिनाहंपि । तदिणपसूयसुरहीसुयं व कइइ लीलाए ॥ २ ॥

भारसथसंकलपि हु तोडइ हेलाए जुण्णरज्जुं व । निथमुट्ठिपहारेण य सिलंपि सो जजरं कुणइ ॥ ३ ॥

मंसस्स विरुद्धं किर लोहं एयंपि तत्थ विवरीयं । जं नाराया खित्तावि तस्स वार्हिपि न छिबंति ॥ ४ ॥

इय सो नियगाढवलवलेवओ तिहुयणं जरतणं व । मन्नतो भमइ पुरे निरंकुसो मत्तहत्थिव्व ॥ ५ ॥

अन्नया य तस्स पसिद्धिमसहमाणा समागया देसंतराओ मल्ला, दिट्ठो तेहिं राया, साहिंयं आगमणपओयणं, समाहूओ य रण्णा कालमेहसल्लो, निवेइओ से तव्वइयरो, अबुवगयं तेण तेहिं समं जुज्झं, सज्जीहूया दोवि पक्खा, कओ अक्खाडओ, विरइया उअयपासेसु मंचा, निविट्ठो अवलोयणकोऊहलेण नीसेसअंतरसमेओ नरवइ पुरपहा-
णपुरिसवग्गो य, समाढत्तं च भुयाहि य अडुपायइयाहिं च बंधेहि य विसमकरणपओगेहिं मल्लेहिं सह तेण जुज्झिउं, खणंतरेण य दढमुट्ठिण्हारेहिं निहया कालमेहेण देसंतरागया मल्ला, कओ लोणेण जयजयसदो, दिन्नं से नरिंदेण विजयपत्तं, सम्माणिओ विचित्तवत्थाभरणेहिं, गओ नियनियट्ठणेसु नयरज्जो, रायावि अंतरपरियरिओ संपत्तो नियमंदिरं, बीयदिवसे य सव्वालंकारविभूसिया काऊण देवीए पडमावईए पेसिया सीलवई कण्णया पिउणो पायवडणत्थं, चेडीचक्कवालपरिवुडा य सा पत्ता नरिंदसगासे, निवडिया चरणेसु, निवेसिया रण्णा उज्जे, पुच्छिया य-पुत्ति ! केण कारणेण आगयांसि ? , तीए भणियं-ताय ! तुम्ह पायपडणनिमित्तं अम्मगाय पेसियमिह, राइणा चित्तियं-अहो वरजोगत्ति कलिऊणं नूणं देवीए पेसिया, ता किमियाणिं कायव्वं ? -

एकं चिय मह तणया परुढणयाए अम्ममहिंसीए । एसा वरस्स जोगा को पुण एयाए होल्ल वरो ? ॥ १ ॥

एयाए चित्तवित्तिं अवियाणिय जइ वरेज निवपुत्तो । जो वा सो वा आजम्म दुक्खया होज्ज ता एसा ॥ २ ॥

इति परिभाषिज्जण पुच्छिया सा नरवइणा-पुत्ति ! को तुज्ज वरो दिज्जइ ? किं सुरुवो उयाहु समरगणसवडमुह-
सुहडपडिक्खलणपयंडपरक्कमो किं वा समरभीरुओत्ति, तओ ईसिं विहासिज्जण भणियं तीए-ताओ जाणइ, राइणा
भणियं-पुत्ति ! अवरोहकयकजाइं न सुहावहाइं होति ता सम्मसणुचितिय भणसु, तीए भणियं-ताय ! जइ एवं
ता जो एवं कालमेहमल्लं नियभुयवलेण महियपरक्कमं करेज्जा सो अम वरो होज्जत्ति, राइणा चित्तियं-अहो वलाणु-
रागिणी मम तणया, को पुण समत्थो एयस्स वइयरस्स ? , भणिया थ सा-पुत्ति ! मा कुणसु एवं, अतुलमल्लो खु
एसो, ता अन्नं वरं पत्थेसु, तीए भणियं-ताय ! जइ परं हुयासणो अन्नोत्ति, इय तीए निच्छयमुवलब्भ रत्ता पेसिया
सवनरवइणं दूया, निवेयाविओ एस वुत्तंतो, एवं च अणभुवगच्छमाणा नरवइकुमारा एवं थयंपति-

को बोहेज्ज कयंतं ? को वा हालाहलं विसं भक्खे ? । को कालमेहमल्लेण जुज्झिउं सह पवजेज्जा ? ॥ १ ॥

तेण न कज्जं रज्जेण किंपि न कज्जं च तीए भज्जाए । जा लब्भइ खित्तसंसयजीवियघोहिं कट्टेण ॥ २ ॥

एवं च निवभगजणमणोरहेहिं असिद्धकज्जेहिं चव पडिनिधत्तिज्जण दूएहिं रणो कहिओ मल्लजुज्झाणभुवग-
मगब्भो नीसेसनरेसरकुमारवुत्तंतो, तं च सोऊण गाढसोगाउलो जाओ देवसेणनरवइ, एत्थंतरे विन्नत्तो भंतिसामं-
तेहिं-देव ! किमेवं उच्छन्नच्छाहा होह, अज्जवि देवेण अनिरुविओ चिट्ठइ कुरुदेसाहिवनरवइसुओ नरविक्रमकुमारो,

राइणा भणियं-सोडवि एवं चैव परं सुहो हविस्सइ, मंतिसामंतेहिं वुत्तं-देव ! मा एवं जंपह, जओ अपोरिसे(परिसे)ओ
 तस्स बलपणरिसो असंभावणिज्जो निजुद्धपरिस्समो अणाइक्खणिज्जा मल्लविज्जाए कोसल्लथा, किं बहुणा !, नरसिंहनरसइ-
 साहसतोसियाए भगवईए जो दिण्णो तस्स किं वन्नियधं ?, सरीरमेत्तेण चैव सो नररूवो सेसगुणेहिं निच्छियं देवोत्ति,
 एयं च समायणिऊण संजायहरिसेण देवेण पेसिओऽहं तुम्ह समीचे, ता देव ! एयं तं विण्णवणिज्जंति, राइणा भणियं-
 भइ ! वरयणपुन्नकेसरिगुहव सेसाहिमत्थयमणिव्व समगं चिय भयहरिसे जणेइ विण्णत्तिया तुज्झ, दूएण कहियं-
 देव ! एवंमेयं, तओ राइणा अद्धच्छीए पेच्छियं कुमारवयणं, कुमारोऽवि तक्खणं चिय उट्ठिओ निवडिओ रूणो
 चरणेसु, भणिउमाट्तो य-ताय ! समाइसह किं कीरउत्ति ?, राइणा भणियं-कुमार ! निमुणियं तए दूधवयणं ?,
 केरिसो वा तुह भुयदंडपरक्कमो ?, कुमारेण भणियं-ताओ जाणइ, तओ राइणा जोगयमुवलब्भ अब्भुवयणं रूहं-
 जुज्झं, सम्माणिऊण सट्ठानं पेसिओ दूओ, गओ जहागयं, निवेइयं च तेण जहावित्तं देवसेरण्णो, जाओ सो परसो
 पमोओ, निरूवियं परिणयणजोगं लग्गं, पेसिया य वरागरिसगा पहाणपुरिसा, अणवरयपयाणएहिं पत्ता जयंति-
 नयरिं, विरइओ आवासो, अणुरूवसमए दिट्ठो राया, सिट्ठं नियक्कं, तओ पउरकरितुरगसुहडकोडिपरिबुओ पेसिओ
 तेहिं समं कुमारो, पत्तो कालक्कमेण हरिसपुरनगरसमीचे,

तो तं इतं नाउं, रत्ता काराविओ पयत्तेणं । वंसग्गवद्धयचिंधवंधुरो झत्ति नयरसहो ॥ १ ॥

विहिया नरोहिं कुसलेहि कुसुमछाडोवमुंदरा मग्गा । खित्ता य कुसुमपयरा रणज्झणिरभमंतभमरउला ॥ २ ॥
नच्चतनाडइज्जा तालायरकहगपवरमणिज्जा । जाया चउक्कचचउम्भुहणमुहदेसावि ॥ ३ ॥
ठाणे ठाणे रइया दसद्ववणेहिं सुरभिक्षुसुमेहिं । विच्छित्तिविचिताओ लंबतुद्दामदामाओ ॥ ४ ॥
भवणंपि तस्स जोग्गं निरुवियं सत्तभूमियं रम्मं । चंदणरसलिहियपसत्थसत्थियं श्रंभसयकलियं ॥ ५ ॥
तं नत्थि जं न विहियं कुमारगमणे पुरंमि नरवइणा । अहवा हरिसुक्करिसा पुरिसा किं किं न कुंवति ? ॥ ६ ॥
एत्थंतरे समागया पहानपुरिसा, पणमिऊण भणियं तोहिं-देव ! वद्धाविज्जह तुब्भे पुरसमीवसमागयकुमारकु-
सलोदंतसवणेण, तओ समुद्धयविजयेजयंतीसहस्साभिरामाए चाउरंगिणीए सेणाए समेओ सियसिंधुरखंधाधि-
रूढो पडिपुण्णचंदमंडलाणुकारिणा छत्तेण धरिज्जमाणेण निग्गओ राया कुमारभिमुहं, खणंतरेण दिट्ठो कुमारो
समालिंगिओ गाढपणयं पुट्ठो य सरीरारोगयं, दट्ठण कुमारसरीरसंठाणसिरिं चित्थियं रण्णा-निच्छियं इयाणिं विण-
स्सइ कालमेहमल्लस्स बाहुबलमडण्णोत्ति, अह सुहुत्तमेत्तमणुगच्छिय पुव्वनिउत्तनियनियट्ठाणेषु पेसिओ कुमारप-
रियरो, कुमारोऽवि विमुक्को तंमि चेव पासाए, दवाविथाइं करितुरयाइं जोग्गसणाइं, कुमारस्सवि कए पेसिया
पउरवंजणभक्खभोगणसमिद्धा रसवइ, कयं च अन्नपि तक्कालोचियं करणिज्जं, आहूया य अवरणहसमए पहानपुरिसा,
भणिया य-ओ गंतूण निवेयह कुमारस्स जहा एसा अम्ह सुया बलाणुराणिणी, ता दसेह कालमेहमल्लस्स विजण्ण

नियसामत्थंति, जं देवो आणवेइत्ति भणिऊण ते गया कुमारसमीवे, निवेइओ तस्स नीसेसवइथरो, अब्बुवणओ
 कुमारेण, ततो बीयदिवसे आढत्तो अक्खाडयपरिक्खेवो निवद्धा मंचा परमकोऊहलाउलिजमाणमाणसो मिलिओ
 नयरजणो, ठिओ मंचंमि संतेउरो नरवई, आरुढा य एकदेसंमि चेडीचक्कवालपरिवुडा पाणिपइट्टियलट्टपफुलफुल्ल-
 माला सीलमई रायसुया, पडिक्खलिओ सव्वत्थ जणसंचारो, कओ अंगरक्खेहिं परिक्खेवो, वज्जियं पलयकालगज्जं-
 तपक्खुहियपुक्खलवत्तपगजिरवगंभीरं चउव्विहमाउज्जं, जाओ अवसरो, मंचाओ तओ कुमारो गाढुणीडियनियं-
 सियकडिहो दढवद्धकेसपासो पमुक्काभरणसंभारो कुलधेरीकरक्खो जलणुब्भडगुरुपयावदुण्णक्खो संनिहियपाडिहं-
 रोव भासुरो झत्ति अवयरिओ, तहा—

कंठतडुब्भडपरिहियपयतलविलुलंतविमलवणमालो । आवद्धमल्लत्रलओ गजंतो पलयमेहोव ॥ १ ॥

मयभिमलरत्तच्छो गव्वुद्धरकंधरो तुरियचवलं । पेच्छयजणपरियरिओ संपत्तो कालमेहोवि ॥ २ ॥

रे मल्ल ! मेल्लसु लहुं पुव्वज्जियविजयगद्वमेत्ताहे । अणुसरसु ममं सिगवं अह भणिओ सो कुमारणे ॥ ३ ॥

सोउं कुमारवयणं जरोव्व गव्वो झडत्ति तस्स गओ । अणुचिंतिउं च लग्गो जुत्ताजुत्तं सबुद्धीए ॥ ४ ॥

कहं ?—जइ एस मए विजिओ एयजणाओ तहावि नो कुसलं । अह एएण जिओऽहं वित्तिच्छेओ तओऽवस्सं ॥ ५ ॥

अतुलवलविक्रमस्स उ इमस्स विजएऽवि मज्झ संदेहो । ता उभयपासरज्जुव्व संकडं एयमावडियं ॥ ६ ॥

इय बहुभेद्यविकल्पणवसाउल्लिखतचित्तवित्तस्स । फुट्टं तडत्ति हिययं तस्स कुमित्तस्स व रहस्सं ॥ ७ ॥

तओ जाओ कलयलो, उरघोसियं च जणेण-अहो महप्पमावं दंसणं कुमारस्स, जेणावलोयणमेत्तेणवि वज्जगंठिव निट्ठुरं फुट्टं तडत्ति हिययेयस्स, ता जयइ सवहा कुमारो, एत्थंतरे ओयरिऊण मंचाओ चेडीजणपरिवुडाए सील-मईए खित्ता कुमारकंठदसे समं नियचित्तचित्तीए वरमाला, पवज्जियाइ असंखघोससंखोभियभवणाइ मंगलतूराइ, जाओ णयरे पमोओ, तुट्ठो राया सह मंतिसामंतोहिं, पारद्धो विवाहो महाविभूईए उभयपक्खपरितोसणं, निव्वत्तिए य तंमि-पगलंतमयजलुब्भडकरडतडुद्दामभमिरभसराणं । सुहलक्खणंकियाणं पंचसयाइ गइंदाणं ॥ १ ॥

मणपवणजविणवेगाण जच्चतुरंगाण वंकगीद्याणं । वारस चेव सहस्सा रहाण दो तुंगसिगाणं ॥ २ ॥

कणगस्स तीस कोडी चीणंसुयपसुहवत्थरासीओ । दिन्नाओ कुमारस्सा पाणिस्स विमोयणे रत्ता ॥ ३ ॥

कयमन्नापि सविसेसं कायध्वं, जाओ अवरोध्वरं पणयभावो । अवरवासरे य पेसिया कुभारेण पहाणपुरिसा देवसेण-नरवइस्स पासे नियट्ठाणगमणाणुन्नागहणनिमित्तं, गंतूण निवेइयं तोहिं नरवइस्स, तओ देवसेणेण पुणरवि सम्माणिओ पहाणवत्थुसमप्पणेण कुमारो, निरूवियं गमणजोगं दिणं, निउत्ता दंडनायगा अणुगमणत्थं, अह पसत्थवासरे समुरप्पभिइण कयसुचियकायध्वो पत्थिओ कुमारो हरिकरिनरनियरसमेओ सनयराभिसुहं । एत्थंतरे-सच्चांलंकारधरिं सीलवइं चेडियाजणसमेयं । लच्छिव कुमारपुरो काउं रत्ता भणियमेयं ॥ १ ॥

पुत्ति ! पवित्रं सीलं पालेज्जसु मा कोरज्जसु कुसंगं । अणुवत्तिज्जसु गुरुजणमवणिज्जसु दुव्विणयभावं ॥ ३ ॥
 सेविज्जसु नयमगं भियमहुरक्खरगिरं वएज्जासि । आराहेज्जसु सपियं देवो भत्ता कुलवहूणं ॥ ३ ॥
 कुमरोऽवि इमं वुत्तो एसा एक्का लुया ममं इट्ठा । छावव सहयरी जह हवइ सया तह तए किच्चं ॥ ४ ॥
 इय सिक्खविउं राया धूपं विरहग्गिदूमियसरीरो । अणुगमिऊण कुमारं नियनयराभिमुहमह चलिओ ॥ ५ ॥
 कुमरोऽवि पेच्छतो नगनगरागरासकाणरमणिज्जं मेइणिं साहितो विसमपल्लीनिलीणे भिल्लाहिवइणो
 पयट्ठतो पुव्वनीईओ अवलोयंतो तावसजणनिसेविए अणवरयज्जंतघयमहुसमिहमहोसहिसमुच्छलंतवहलधूमपडल-
 कयमेहंसकसिहडितंडवाडंबरमणिजे आसमपए, पइदिणपयाणएहिं संपत्तो जयंतीए नयरीए वाहिरुज्जाणे, वद्धाविओ
 नरसिंघनरवई, काराविया नयरसोहा, जाया समुदुयविचित्तचीणंसुयचिंधंबंधुरा रायमग्गा, अह पसत्थंमि सुहुत्ते
 अंतउरपुरप्पहाणजणपरियरिएण नरिंदेण अणुगम्ममाणो नरविक्रमो नयरिं पविसिउमारद्धो, ठिया य रायमग्गोभव-
 पासपासायमालासु तदवलोयणकोऊहलाउला कुसुमुम्मिस्सक्खयहतथा लोयसत्था, जाया य कुमाररूवपलौयणपा-
 उब्भवंतविविहवियाराण जुवईजणाण विब्भमा । कंहं चिय ?—

दट्ठूण कावि पडिजुवईकंतंगडत्थलंतसंकंतं । कुसुमक्खएहिं ताडइ ईसाइतिव्व रायसुयं ॥ १ ॥
 पविथंभियकुमुमाउहवसवियसियलोयणा पलोयंती । न मुणइ सकडिल्लिपिहु पवणेणायट्ठियं अवरा ॥ २ ॥

कुमरपल्लेयणवामूढमाणसा निचला गिहगगया । अनिलचलंचलचूडा काविहु रेहइ पडायव ॥ ३ ॥
अम्मे ! जामि पलोइहुं दसदिसं कोलाहला सुवए, सा मा गच्छ मयच्छि ! निच्छियमिमो सो एइ रणो सुओ ।
दिट्ठे जम्मि पणट्ठनिव्वुइमणा सुद्धावरा मग्ग(ङ्क)णा, वट्ठती विव सासुयाए पुरओ अन्ना इमं जपइ ॥ ४ ॥
इय एवं सविलासाहिं नयरनारीहिं सबविज्जंतो । कुमरो वहूसमेओ संपत्तो निययभवणंमि ॥ ५ ॥
तहिं गएण य कया सविसेसं गुरुजणाण पणामाइपडिवत्ती, समण्णिओ य रणा अंवरतलमणुलिहंतो निययभव-
णनिव्विसेसो पासाओ कुमारस्स, तत्थ ट्ठिओ य सो सक्को इव देवलोए धरणो इव पायाले विसयसुहं भुंजंतो
कालं गमेइ, अन्तरंतरा य तुरगवाहियालिं च मत्तसिंधुरदमणं च मल्लजुज्झम्भसणं च राहाविहकोऊहलं च धम्मसत्थ-
सवणं च देसंतरनयरवत्तानिसामणं च गुरुचरणनिसेवणं च मग्गजणमणोरहपूरणं च करेइत्ति । अह कुमारस्स का-
लक्कमेण सीलमईए सह विसयसुहं भुंजमाणस्स कुसुमसेहरविजयसेहरनामाणो जाया दोन्नि पुत्ता, ते य वल्लहा पिया-
महस्स, विविहप्पयारोहिं उवलालिज्जमाणा वट्ठति । अन्नया राइणो समीवे निसन्नंमि नरविक्रमे जहेचियठाणनिवि-
ट्ठमि सेवगजणे मयभरसंभरियसच्छंदजमुणावणविहारो तडयडारावतोडियनिविडवडुत्तरतारसयणमाणलोहनिगडो
सयखंडचुन्नियमहालाणखंभो निहयकरप्पहाराहयारोहगवग्गो पहाविओ नयरमज्जेण जयकुंजरो उम्मूलियगरुधुमभो-
डियगुरुविडवंकडयडरउदो कुंभत्थलपणोल्लणपाडियसुरभवणसिहरग्गो अइकट्ठिणकरप्फालणविहाडिउदाभंतुंगपागारो

अइवेगुच्वालियकन्नतालविहवियमसलउलो अइरभसभरपहावणसपक्खुकुलसेलचल्लिकयसंको दढदंतदंढताडणढलह-
 लियट्टालयसमूहो करघायदंतवेहणचरणुणीडणनिवाडियजणोहो सव्वत्थ भमइ भीमो जमोव्व जुगविगमसमयंमि, अह
 मंदरमहिजमाणमहोयहिधोसघोरे समुच्छलिए तियचउक्कचचोरेसु जणाणं अक्कदियरेवे पुच्छियं नरवइणा-भो भो
 किमेवं नयरे कोलाहलो सुम्मइत्ति ? जणेण भणियं-देव ! एस तुह जयकुंजरो भग्गालाणखंभो नयरं विहवह,
 एवं सोच्चा विसजिया कुमारपमुहा पहाणलोया जयकुंजरगहणनिमित्तं, भणिया य-अरे ! सव्वहा सत्थघायं परिहरं-
 तेहिं एयस्स वट्टियव्वं, एवं च पडिवजिय गया ते तदभिमुहं, न य पेच्छंति कमवि उवायं जेण हत्थी वससुव्वग-
 च्छइत्ति, एत्थंतरे वेलामासवत्तिणी गुरुगम्भभारवसविसंदुलनिवडंतचरणा गाढपाणभयकंपंतसरीरजड्डी इओ तओ
 य धावंती एगा कुलंगणा दिट्ठा जयकुंजरेण, तओ उल्लालियकरगो पवणवेगेण धाविओ तीसे अभिसुहो, सवि
 कुंजरं तहा सिग्घमागच्छंतं पेच्छिऊण सज्झसभरनिरुद्धपयप्पयारा कलुणाइं दीणाइं विलविउं पयत्ता, कंहं चिय ?-
 हे माइ भाय ताया तायह मं मा उवेक्खह इयाणिं । एसो मम वहणट्ठा दुट्ठकरी पासमल्लियइ ॥ १ ॥
 हं हो पेच्छगलोया ! निक्करुणा करिवरं पडिक्खलह । गुरुगम्भभरक्कंता एसा संपइ विवज्जामि ॥ २ ॥
 अहह कंहं पावकरी एसो सो आगओ मम समीवे । निस्सरणा नित्ताणा कमुवायं संपइ सरामि ? ॥ ३ ॥
 किं कोऽवि महापुरिसो परोवयारत्थधरियनियपाणो । एत्थ न पेच्छइ सहसा मं दुक्खत्तं विणस्संति ॥ ४ ॥

इय दीणकलुणवयणाइं णेगसो भासिऊण खणमेक्कं । मुच्छानिमीलियच्छी पसत्ति सा महियेले पडिया ॥ ५ ॥
सोवि करिवरो दढरोसभरत्तणेत्तो संपत्तो तीसे थेवंतरेण, दिट्ठा य सा कुमारेण भयवसभूमिनिस्सहनिवडियंगी,
चित्तिंयं च-अजुत्तमजुत्तमियाणिं उवेहणं एयाए, जओ—

एक्कं अबला एसा अन्नं गुरुगन्धभारविवसंगी । अन्नं पुण मुच्छाए निमीलियच्छी धरणिपडिया ॥ १ ॥
अन्नं च पुणो ताथस्स एस जयकुंजरो अतीव पिओ । सत्थेण न हंतव्वो विसममिमं निवडियं कज्जं ॥ २ ॥
अहवा रूसउ ताओ जं भवइ तं करउ मम इण्ह । हंतव्वो एस करी दुव्वलजणपालणं धम्मो ॥ ३ ॥

इय निच्छिऊण निविडबद्धुगुलंचलो तुरंगाओ अवयरिऊण अवलोइज्जंतो नरनारीजणेण निवारिजंतो पासव-
त्तिपरियणेण पडिखलिज्जमाणो अंगरक्खेहिं निरवेक्खो नियजीविद्यस्स सिग्घं पधाविऊण मेहस्स व भयजलासार-
पसमियरयनियरस्स कयंगंभीरगलगज्जियस्स सहस्सनयणोव थेवंतरेणासंपत्तस्स जयकुंजरस्स करणप्पओ-
गवसेण आरूढो पट्टिदेसंमि कुमारो, ताडिओ य कुलिसनिट्ठरेण छुट्ठिपहारेण करी कुंभत्थलसि, अह खयरं रोस-
मुवागओ मणांगि अनियत्तंतो नारीवहाओ सो कुमारोण जमजीहादुव्विसहाए खगधेणूए आहओ सव्वसत्तीए
कुंभजुयलंतराले, तओ पढसुगमंतरविमंडलाओव करपसरो खरपवणपणुन्नकमलसंडाओव मयंदनीसंदो महागिरि-
गेरुयागराओव निव्वभरसलिलुप्पीलो कुंभत्थलाओ से वूढो महारुहिरप्पवाहो, सहसच्चिय विगयनयणोवलंभो विहलं-

घलीभूओ मओ इव मुच्छिओ इव दढपाससहस्ससजमिओ इव निच्चलो ठिओ करी, तओ अवयरिऊण कुमारेंण संठविया सा भूमिगया इत्थिया, विमुक्का य समीहिथपएसंमि, सथंपि गओ नियमंदिं, सोऽवि करिवरो गहिओ आरोहेहि, पारद्धो अणवरयजलघडसहस्सखेण सिसिरोवयारो, पयट्ठाविद्याइं घायविसोहणाइं, महाविमहेण नीओ निययवास, निवेइयं नरवइणो जहावित्तं, रुद्धो राया, परं सोयमुवागओ, भणिउमाढत्तो य—

रे रे वच्चह पुरिसा ! निस्सारह तं सुयं दुरायारं । जयकुंजरंऽवि निहए अज्जवि इह वसइ जोऽलज्जो ॥ १ ॥

अवो साहसतुट्ठाए तीए देवीए सुंदरो दिन्नो । पुत्तो अमित्तरूयो देवाविहु विण्ययारंति ॥ २ ॥

नूणं मूढो लोओ तम्मइ पुत्तस्स जो निमित्तमि । न मुणइ एवंविहदोससाहणे पयडसत्तुत्तं ॥ ३ ॥

अन्नाणविलसियमिणं गइं अपुत्तस्स जं निवारंति । इहलोयप्पडिणीओ परलोयसुहो कं होज्जा ? ॥ ४ ॥

नीसेसरज्जसारं एयं जयकुंजरं हणंतेण । कह म्हा सोवेक्खत्तं पुत्तेण पयासियं भणसु ? ॥ ५ ॥

ता जह पुवं एक्केण रक्खियं खोणिवलयमक्खंडं । रक्खिस्सामि तहेण्ह निस्सारह वेरियं एयं ॥ ६ ॥

जो एरिसं अणत्थं वीसत्थो कुणइ वसइ निस्सको । सो नूण ममंपि विणासिऊण रज्जपिहु हरेज्जा ॥ ७ ॥

इय पुणरुत्तं नरवइस्स निच्छयमुवलब्भ विमणदुम्मणा गया कुमारसमीवं रायपुरिसा, तं च पणमिऊण समनं वणा निविट्ठा एगदेसे, पलोइऊण य तेसिं सुहसोहं भणियं कुमारेंण—किं भो ! गाढमुविग्गा दीसह ?, साहह किमेत्थ

कारणं? खण्तरं निरुद्धकंठं चिद्विय दीदुण्डुणहुमुक्कनीसासपुरस्सरं दुस्सहविरहविरहनिस्सरंतवाहणवाहं परासुसियलो-
यणजुयलं भणियं पुरिसेहि-कुमार! निम्भगगसिरसेहरा किं साहेमो? कुमारेण भणियं-कहं चिय? पुरिसेहिं भणियं-
जेण तुमेहिं सह दुस्सहो दीहविरहो भविस्सइत्ति, इंगियाकारकुसलत्तणओ परियाणिज्ज तेसिभभिप्पायं भणियं
कुमारेण-किं कुविओ ताओ निविसयमाणवेइ? रायपुरिसेहिं भणियं-कहमेयं परुसक्खरं देवदुल्लहाणं तुह भणि-
ज्जइ? सयमेव जाणह तुब्भे जमेत्थ पत्तकालं, तओ वत्थतंबोलाइणा पूइज्ज रायपुरिसा सट्टाणे पेसिया कुमारेण,
वाहराविया य निययसेवगा, भणिया य-भो महाणुभावा! वारणसिरवियारणकुविएण ताएण निविसओ आणत्तोहि,
ता गच्छह नियट्ठाणेषु तुब्भे, अवसरे पुणरवि एज्जहत्ति, सम्माणिज्ज सप्पणयं पेसिया, देवी य सीलमई भणिया,
जहा-गच्छसु पिए! तुमं पि पियहरं, पत्थावे पुणरवि एज्जाहि, सा य खणमवि वियोगदुक्खमसहमाणी जमुणाजलस-
च्छहं सकज्जलं नयणवाहप्पवाहं मुंचती रोविउं पयत्ता, संठविया कुमारेण तेहिं तेहिं भदुरवयणेहिं, नेच्छइ य सा खण-
मवि वियोगं, तओ भणिया कुमारेण-पिए! दुग्गा मग्गा आजम्ममुहलालियाणं दढमजोगा य, असंजायसरीरवला
बालजुयलपरिवुडा य तंसि, ता विरम सव्वहा ममणुग्गहं कुणमाणी इमाओ असगहाओत्ति, सीलमईए गणियं-
अज्जपुत्त! तइया ताएण तुह किमुवइहं? कुमारेण भणियं-न सरामि, सीलमईए जंपियं-मम एकचिय धूया एसा
अचंतं निवुइठाणं छायव सहचरी जह हवइ सया तह तए किंचति, कुमारेण भणियं-पिए! सुमारियसियभियाणि,

तीए जंयिं-ता कीस नियत्तेसि सं ? कुमारेण भणियं-मग्गगाढपरिस्समकारेण नियत्तेमि, जइ पुण अवस्समेवागतं व
मए समं ता पडणा भवसु, विमुंचसु भवणनिवासभिइं परिचय सुकुमारत्तगंति, सीलमईए भणियं-एसा समसुह-
दुक्खसहा जाया पगुणहि, तओ करकलियसरासणो पिट्ठिप्पएसवद्धतोणीरो सुयजुयलसमेवाए सीलमईए सहिओ
सुहपसुत्तेसु नयरलोएसु पसंतेसु गीयरवसु सट्ठाणनिविट्ठसु अंगरक्खेसु पमत्तेसु जामकरिघडाधिरुट्ठसु सुहडंसु इओ
तओ पेसिएसु नियचेडगेसु नीहरिओ नयराओ कुमरो, अविच्छिन्नपयाणएहिं परं रजंतरं गंचुं पवत्तो य ।

इओ य आयन्निऊण कुमारस्स विदेसगमणं सयलोऽवि नयरीजणो सुक्ककंठं विलविउसारद्धो, मंतिणोऽवि परिच-
त्तनीसेसरज्जवाधारा हरियसव्वस्ससारा इव विमणदुब्भणा गंतूण नरनाहं उवलंभिउं पवत्ता, कंहं विद्य ?

तिलतुसमित्तंपिहु नियपओयणं अम्ह साहिउं देवो । पुर्विं करिंसु इण्ह पव्वयमेत्तेऽवि नो पुट्ठा ॥ १ ॥
ता देव ! जुत्तमेयं काउं किं तुम्ह थेवकजेऽवि ? । रज्जभरधरणधीरो जमेस निवासिओ कुमरो ॥ २ ॥
किं एगदुट्ठकुंजरकएण नियजीयनिव्विसेसस्स । पुत्तस्स एरिसगई विहिया केणावि नरवइणा ? ॥ ३ ॥
किं वा विंझमहागिरिपरिसरधणीए कुंजरकुलाइं । हरियाइं तक्करहिं जं देवो ववसिओ एवं ॥ ४ ॥
इत्थीए रक्खणओ किमजुत्तं नणु कयं कुमारेण ? । नियडिंभदुट्ठचेट्ठावि जणेइ जणयस्स संतोसं ॥ ५ ॥
पररजेसु य अजसो अम्हाण पयासिओ तए नूनं । जह नरसिंघनराहिवरज्जमुवेक्खंति गुरुणो य ॥ ६ ॥

ता गिणहह नियमुहं सह भयणधणेहिं मोक्कलह अम्हे । न सहिस्सामो एत्तियमवजसरयंफंसणं देव ! ७ ॥
इय मंतीहिं भणिए राया संजायचित्तसंतावो । अब्भुवगयनियदोसो ताहे ते भणिउमाढत्तो ॥ ८ ॥
सरिसह मम अवराहं जमपुच्छिय एरिसं कयं कज्जं । नो कोवभराओ जओ जुत्ताजुत्तं मए नायं ॥ ९ ॥
जह तुब्भे भणह तहा न कोऽवि दोसेऽवि चयह नियपुत्तं । इय वइयरछउमेणं मन्ने लच्छीए छलिओऽहं ॥ १० ॥
जं पुण इय दोसाओ मंतित्तविमोयणं कुणह तुब्भे । एसेव निरंजणसामिभत्तिजुत्ताण होइ मई ॥ ११ ॥
केवलमेक्को पुत्तो रज्जसमत्थो गओ विदेसंमि । तुम्हेवि उवेक्खह मं उभयं सोढुं न सकोऽहं ॥ १२ ॥
ता संपयं पसीयह रज्जं चित्तेह लहह कुमरस्स । सव्वथावि पउत्तिं एत्तो रोसेण पज्जत्तं ॥ १३ ॥
एवं गाढनिबंधेण पडिवन्नं मंतिजणेणमेयं, पेसिया य सयलदिसासु वरतुरयाधिरूढा पुरिसनियरा कुमारस्नेसण-
निमित्तं, गया य सव्वत्थ, निरुविओ सव्वजत्तेण, न केणवि दिसाभागमेत्तपि वियाणियं, तओ कहवयवासराइ
वियरिय तेसु तेसु ठाणेषु अकयकज्जेहिं चेव नियत्तिज्जण तेहिं सिट्ठो सभानिवट्ठस्स मंतिजणसमेयस्स नरिंदस्स
कुमाराणुवलंभवुत्तंतो, तं च सोचा अचंतं सोगं कुणंतो राया वागरिओ मंतीहिं-देव ! अलं परिदेविण, न
कयाइ करतलाओ विगलिओ पुणोवि पाविज्जइ चिंतामणी, न य दढकुनयदंडताडिया पुणोऽवि मंदिरे निवसइ
रायलच्छी, न गाढमक्कारणावमाणिओ नियत्तइ सण्णुरिसजणो, राइणा भणियं-जइ पढममेव सो तुम्हेहिं नियत्तिओ

होंतो ता जुत्तं हुत्तं, मंतीहिं भणियं—जइ मूलेऽवि से न रोसुण्पायणं देवो करोंतो ता जुतत्तरं हुत्तं । अवि य—
 कज्जविणासे जाए जह बुद्धी बंधुरा पवित्थइ । तह जइ पढमं चिय होज्ज देव ! ता किं न पज्जत्तं ? ॥ १ ॥
 धन्ना सबुद्धिविभवेण जाणिउं वत्थु तस्स य सरूवं । पढमं चिय सुग्गहिंयं कुणंति सप्पस्स वयणं व ॥ २ ॥
 रत्ता बुत्तं सच्चं एयमहो केवलं बहुसणाहो । जाणेण विणा कह सो दूरपहं पाविओ होही ? ॥ ३ ॥
 मंतीहिं तओ भणियं जेणेसा विहडणा कया देव ! । सो दूरेऽवि नएज्जा नूण कुमारं लहुं दइवो ॥ ४ ॥
 एवं चिरं परितप्पिय पुणोवि चारपुरिसे[हिं] कुमारवत्ताजाणत्थं पेसिय नियनियठाणेसु गया मंतिणो, रायवि
 सुयचिरहवेयणाविहुराए चंपयमालाए देवीए संठवणनिमित्तमेउरं गओत्ति ॥

इओ य सो कुमारो कमंक्रमेण गच्छंतो चिरकमलवणविहारुद्धिगाए लच्छिदेवीए तुट्ठेण पयावइणा निवासनिमित्तं
 व विरइए नाणाविहतरुणतरुसामालियसयलरविकरपसरे अणेगकोडीसरीयजणसंकुले संदणपुरवेलाउले संपत्तो, अवि-
 याणमाणो य तहाविहं गेहंतरं गोपुरपचासन्नस्स पाडलाभिहाणमालागारस्स मंदिरंमि पविट्ठो, दिट्ठो य सो पाड-
 लेण विन्नाओ य विसिट्ठागिईए जहा नूणं कोई एस महापुरिसोत्ति, तओ अब्भुट्ठिऊण सपणयं कया उचियपडिच्चती,
 दंसिओ गिहस्स एगदेसो, निक्कारणवच्छलयाए य भायरं व तं उवयरिउमाढत्तो, कुमारोऽवि तत्थट्ठिओ सजूहस-
 ड्ठोवपवंगमो दिणगभणियं कुणंतो अच्छइ । अन्नया य पुव्वसमाणियंमि निट्ठियंमि दविणजाए पाडलेण भणियं—कुमार !

महायस निव्ववसायाणं केरिसो निव्वाहो ? ता परिचयसु आलस्सं, गिणहसु ममारामस्स एगदेसं, समुच्चिणसु कुसुमाइं, गुंथिऊण य विविहमालाओ विक्किणसु रायमग्गमि जहा सुहेण चेष निव्वहइ तुह परिगगहोत्ति ।

तओ-जह जह वाएइ विही विसरिसकरणेहिं निट्ठरं पडहं । धीरा पहसितवयणा नञ्जति तहा तह चेष ॥ १ ॥
इय चित्तिऊण खत्तधम्ममाणुरुवपि तयणुरोहेण पडिवन्नमेयं कुमारेण, पइदियहं च सह सीलमईए मालागारो-
वदंसियकाणगेगदेसतरुसुमाइं उच्चिणिय नियगेहमांगतूण मालाओ विरएइ, पाडलगभजाए य समं सीलमइं तविक्रय-
निमित्तं रायमग्गे पेसइ, उण्यज्जइ बहू अत्थो, एवं च पइदिणं पुण्णविक्रयकरणेण सुहेण संपज्जइ निव्वाहो, अन्नया
पण्डुलविइलमालाओ गहाय सीलवई गया रायमग्गे, अह तीसे रूवेण जोवणेण य लायणेण य सोहगणेण य अविख-
त्तचित्तो समागओ एगो कोडीसरीओ देहिलो नाम नावावणिओ, भणिथा य तेण-भइ ! केत्तिएण इमाओ मालाओ
लभंति ? तीए भणियं-पंचहिं सुवण्णधरणेहिं, तओ

दानेन वैराण्युपयान्ति नाशं, दानेन भूतानि वशीभवन्ति । दानेन कीर्तिर्भवतीदुशुभ्रा, दानात्परं नो वरमस्ति वस्तु ॥ १ ॥

इय चित्तितेण तीसे चित्तावहरणत्थं समप्पिया तेण तिणिण दीणारा, सहरिसाए तीए गहिऊण समप्पियाओ
फुल्लमालाओ, विणएण भणिथा य सा-भइ ! इओ दिणाओ आरब्भ मा अन्नस्स दाहिंसि, समहिगतसुहेणवि अहमेव
गहिस्सामि, पडिवन्नं च तीए, गयाइं दोन्निवि नियनियगेहेसु, एवं पइदिणं सो तीए सगासाओ पुण्णमालाओ पि-

एहइ, साऽवि समहिगदविणलोभेण तस्स चेवं दलयइ । अन्नया परतीरगमणनिमित्तं नाणाविहअमुल्लभंडभरियं जाणवत्तं
 ठावियं अणेण समुहतीरे, सावि भणिया, जहा-कल्लेऽहं परतीरे गमिस्सामि, तम्हा तुमे समुहतीरे अमुगंभि पएस्से
 आगंतूण नीसेसाइं कुंदवेइल्लनवमालइपाडलाइमुत्तयचंपयपमुहाइं कुसुमाइं समण्येज्जासि, अहं ते चउग्गुणं मोल्लं
 दवाविस्सामि, पडिवन्नं च तीए हट्ठहियाए, न सुणिओ कोऽवि परमत्थो, बीयदिवसे गया समगकुसुममालाओ
 गहिऊण निहिट्टट्टाणे, दिट्ठो सो वणिओ जाणवत्ताधिरूढो, पणामियाइं तीए कुसुमाइं, पसारिओ तेण हत्थो, तीएवि
 समप्पणं(णत्थं)पलंबिया मुणालकोमला नियमुयलया, तेणवि हरिसभरनिब्भरगेण सकुसुममाला चेव गहिऊण आरो-
 विया सीलवई जाणवत्ते, उविखत्ता उवरिगाए, एत्थंतरे वज्जावियाइं मंगलदूराइं पयट्ठियं पवहणं विमुक्का सिधवज्जा
 वाहियाइं आवल्लयाइं चंडगंडीवविमुक्ककंडव वेगेण गंतुं पवत्तं जाणवत्तं । इओ य सो नरविक्कमकुमारो अचंतं तदजाग-
 मणकालविलंबुद्विगगचित्तो इओ तओ सीलमइं पलोइउं पवत्तो, तं अपेच्छमाणेण य तेण पुट्ठा पाडिवेसिया, अवलो-
 इओ रायमग्गो, सम्मं निरिक्खिया तियचउक्कचच्चा, अवलोइयाइं सयलेदवउलभवणकाणणाइं, निवेइया वत्ता पाड-
 लयमालागारस्स, तेणावि सद्वायेरेण गवेसिया सीलमइं सद्धाणेसु, कत्थविय पउत्तिमपावभाणेण सिग्घमेव नियत्तिय
 भणिओ कुमारो-महायस ! धीरो भव, परिचयसु कायरत्तं, कुमारेण भणियं-भइ ! न किंपि मम कायरत्तं, केवलं एए बालए
 जणणीविओगवसविसंढुलं रोयमाणे न सक्केमि पेच्छिउं, पाडलेण भणियं-एवं ठिएवि पुरिसाय(सयार)त्तं कायच्च, ता

पुत्रादिसिविभागे तीसे अन्नसणनिमित्तं अहं गच्छामि, तुमं पुण पुत्तसमेओ चिय उत्तरादिसिहुत्तं इमाए नईए उभयकूलसु
उज्झरेसु य दरीसु य दुत्तडीसु य विसमणवेससु य अवलोइजासित्ति, एवं करेमिच्चि पडिबज्जिय पुत्तजुयलसमेओ चैव
गओ नरविक्रमो नईए पासदेसंमि, ते य पुत्तए मणागं पि सन्निहिमसुंचमाणे संठविय चित्तिउमारद्धो । कहं चिय?—
किं होज्ज केणवि हडा? वसीकया वावि केणवि नरेण? । किं वा सरीरपीडाए होज्ज कत्थवि निसन्ना सा ॥ १ ॥
किं वा ममावमाणं किंपि हु दहुण विलयमावन्ना । पुरिसंतरंमि अहवा जाओ तीसे पणयभावो ॥ २ ॥
सुमरासि न तावडवमाणकारणं होउ वाडवमाणेऽवि । नो सा चएज्ज पुत्तं अवच्चनेहो जओ गरुओ ॥ ३ ॥
संभवइ न एयंपिहु जमन्नपुरिसं मणेऽवि चित्तेज्जा । कह तासिस्कुलजाया सीलं मइलेज्ज ससिधवलं? ॥ ४ ॥
अहवा जुवईण मणं कुंडगगुविलं क एव जाणेज्जा? । बाहिंदसियपणयाण कवडभरियाण मज्झमि? ॥ ५ ॥
अन्नं वयंति पुवं पच्छा पुण वाहरंति गिरमन्नं । अन्नं धरंति हियए साभिण्यं करंति पुणो ॥ ६ ॥
गयणे गणंति गहगणमुयाहिंमि जलंपि जे परिमिणंति । पेच्छंति भावि कज्जं न तेऽवि जाणंति जुवइयणं ॥ ७ ॥
सच्चं चिय जुवईओ एरिसियाओ न एत्थ संदेहो । केवलमेयाए मए दिट्ठं लहुयंपि नो विलियं ॥ ८ ॥
ता सब्बा न उवेहणिज्जा होइ एसत्ति निच्छिऊण पुत्ते य नईकूले संठविय परकूलन्नसणट्ठाए पविट्ठो नईए, पत्तो
य मज्झयारे, एत्थंतेर अचंचंतपडिणियत्तणओ हयविहिस्स अघडंतवत्थुसंघडणसीलयाए भवियवयानिओगस्स बलवत्त-

णओ वेयणीयकम्मस्स गिरिसिखरिसणवसविसप्पमाणसलिलप्पवाहेण पूरिया तक्खणेण नई, जाया अगाहा, खलिओ पयप्पयारो पवाहिओ तरुपल्लववारिपूरेण नरक्किमकुमारो नीओ दूरप्पएसं, अह कहवि कुसलकम्मवसओ पाविथ-मणेण फलगं, तंनिस्साए अवयरिओ तीरे तीए, नुवन्नो तरुवरच्छायाए, चिंतिउं पवत्तो—

कह नियनयरचाओ ? कहेत्थ वासो ? कहिं गया भज्जा ? । कह पुत्तेहि विओगो ? कह वा नइवेगवहणं च ? ॥ १ ॥
खरपवणाहयजरतिणनियरो विव देवया दिसिबलिव । एक्कपए चिय कह मज्झ परियरो विसरिओ झत्ति ? ॥ २ ॥
हे दइव ! तुज्झ पणओ एसोऽहं खिवसु सव्वदुक्खाइं । मज्झं सयणजणाओ जेणऽन्नजणो सुहं वसइ ॥ ३ ॥

एत्थंतरे पच्चासन्नजयवद्धणनयराहिवई कित्तिवम्मनामो नरवई अनिवत्तगसूलवेयणाए अपुत्तो सहसा पंचत्तमुवगओ, तओ मिलिआ मंतिसामंताइणो लोथा, कओ पंचदिवाभिसेओ, रज्जारिहं च पुरिसं सव्वत्थ मग्गिउं पवत्ता, खणं-तरेण नयरब्भंतरे रज्जारिहमपेच्छंताणि बाहिं अवलोयणट्ठा निगयाणि पंच दिवाणि, गंतुं पयट्ठाणि य तमुद्देसं जत्थ सो चिंताउरो नरक्किमकुमारो निवसइ, अह तदग्गगामिणं पयंडमुंडादंडुडामरं वेगेण पवरकुंजरमिन्तं दट्ठुण विग-प्पियं एवं कुमारेण—

मन्ने पुव्वब्भत्थं इयाणि दइवो समीहए काउं । कहमन्नहेह हत्थी दूरुल्लालियकरो एज्जा ? ॥ १ ॥

अहवा एउ इमो लहु कुणउ य मणवंछियं जहा मज्झं । ससुयदइयविरहपमोक्खदुक्खवोच्छेयणं होइ ॥ २ ॥

अहं गलगर्जं घणघोसविष्मं कुंजरेण काञ्चन । नियपट्टीए ठविओ झत्ति कुमारो करगणेण ॥ ३ ॥
हयहेसियं च जायं जयतूरवो विधंभिओ सहसा । सामंतसंतिलोएण परिवुडो तो गओ नयरं ॥ ४ ॥
जाओ पुरे पमोओ अपणयपुद्वावि पत्थिवा पणया । नरविक्रमेण रज्जं अत्तायत्तं कयं सच्चं ॥ ५ ॥
नरसिंघनिधिसेसा जाया करितुरयरणमंडारा । सक्कोव देवलोए विलसइ सो विविहकीलहिं ॥ ६ ॥
केवलमेक्को चिय फुरइ तस्स हिययमि नट्टसल्लं व । दइयासुयदीहरविरहवइयरो दुस्सहो अणिसं ॥ ७ ॥

अन्नया जयवद्धणनयरसन्नुज्जाणे अणेगसीसपरिवुडो सीहोव दुद्धरिसो सूरुव निहियतमपसरो चंदोव सोम-
सरीरो मंदरो इव थिरो जच्चकणगंव परिकखखमो दूरविवज्जियराओवि अणंतराओ धरियपयडजमच्चओवि नीसे-
ससत्तरक्खणवद्धलक्खो समिइवावारियमणपसरोऽवि सया पसंतचित्तो छत्तीसगुणमहासिणिरोहणभूमिच्च धीनि-
हाणं व पच्चक्खधम्मरासिच्च भुवणभवणेक्कदीवोव सिवपंथसत्थयाहोव कम्मतरुनियरहववाहोव दढजा-
यदप्पकंदप्पसप्पसन्नागदमणिच्च ससमयपरसमयजलण्यवाहसिंधुव लोयचक्खुव नियनियविसंतुलकराणकुरंगे-
क्कापासोव मिच्छत्तजलालभवसमुद्दनिवडंतजंतुबोहित्थो पंचविहायारमहाभरेक्कनित्यारणसमत्थो जइधम्मो असमत्थे
सावयधम्ममि संठवमाणो इयरे पुण जइधम्मो सिद्धंतपसिद्धनाएणं अपुद्वापुद्वाजिणभवणाइं वंदमाणो गायापुग्गामं
विहरंतो आगंतूण समंतमहाभिहाणो सूरु समोसरिओत्ति, जाया नयरं पसिद्धी, जहा असेसगुणगणावासी सूरु

आगओ, तओ कोऊहलेण य भवनिव्वेएणत्ति य संदेहपुच्छणेण य बहुमाणेण य धम्मसवणनिमित्तेण य नियनियद-
रिसणाभिप्पायचिमरिसेण य समागया बहवे मंतिसामंतसेट्ठिसेणावइसत्थवाहंदनाहण्णमुहा नयरलोया, निवडिया
चरणेसु, निविट्ठा जहासंनिहिया धरणिपट्ठे, सूरीवि पुवभवज्जियगुरुकम्मजलणजालालितत्तगत्तेसु करुणाभयदुट्ठिपिब
दिट्ठि सत्तेसु पेसंतो मंदरगिरिमंथमहिज्जमाणखीरोयवगंभीरेण सहेण सद्धम्मदेसणं काउमारओ, कंहं?—

खरपवणपणुन्नकुसगलगजलविंदुचंचलं जीयं । सुरायचावचवलं खणेणवि गलइ सरीरवलं ॥ १ ॥

पेम्मंप्पि तुंगगिरिसिरसरंतसरियातरंगमिव तरलं । लच्छीवि छड्डणुडुमरवंछिरी पेच्छइ छलाइं ॥ २ ॥

पयडपयट्ठियदारुणविविहवियारा महासमुद्दे व । निवडंति आवया आवयव्व निचं सरीरंमि ॥ ३ ॥

मणिमंततंदिद्वोसहीण वाचारणेवि अविणासं । भुंजंता दंति दुहं विसया विसवल्लीउव्व ॥ ४ ॥

मिच्छत्तमोहमोहियमईहिं कीरंति जाइ पावाइ । भवसयपरंपरासुवि वेरिव्व सुयंति नो ताइं ॥ ५ ॥

पियपुत्तकलत्ताईण जाण कजेसु वट्ठियं बहुसो । परलोयपयट्ठाणं ताणिवि नो हुंति ताणाय ॥ ६ ॥

इय भो नाउं जिणधम्ममणुदिणं सरह सरहसं कुसला ! । जावज्जिवि वज्जमहासणिव्व निवडइ न तुम्ह जरा ॥ ७ ॥

तीसे पडणे पुण छिन्नपक्खपुड्या विहंगवग्गव्व । उट्ठियदाढासुयगव्व हरियरजा णरिंदव्व ॥ ८ ॥

सच्छंदगमणपरभीइज्जणसञ्चयसाहणविहीणा । विररिद्धिं सुमरंता सुचिरं तुम्भे किलिस्मिहि ॥ ९ ॥

यज्जंतं एत्तो जंपिण्ण जह कामियाइं सोक्खाइं । भोत्तुं वंछह ता वीयरायवयणे समुज्जमह ॥ १० ॥

इय संसारनिस्सारत्तणपरिकहेण पडिबुद्धा बहवे पाणिणो । वीयदिवसे य समायन्नियसूरिसमागमणवुत्ततो सम-
गगयतुरयतरनिधरपरियरिओ भारियासुयसंपओगपुच्छणकए समागओ नरविक्रमनराहिवो, तओ वंदिऊण सूरि-
चिंतिउमाढत्तो-अहो एयस्स भुवणच्छरियभूयं रूवं विमुक्कागयवुट्ठी दिट्ठी सजलघणघोसमुंदरो सरो नीसेसपसत्थल-
क्खणजुत्तं गत्तं पाणिगणकयरई भारई, तहा—

तमनिग्गहिओ चंदो तवंमि मंदा रुई दिणयरस्स । गिरिविहियाभिभवो सायरोऽवि को हुज्ज एयसमो ? ॥ १ ॥
तं नत्थि जं न जाणइ भूयं भवं भविस्समवि वत्थुं । ता होइ पुच्छणिज्जो नियदइयापुत्तवुत्तं ॥ २ ॥

इय निच्छिऊण उवविट्ठो उचियासणे राया, गुरुणावि पारद्धा धम्मकहा, पुणरवि पडिबुद्धा पभूयपाणिणो,
राइणावि पत्थावमुवलब्भ पुच्छिओ सूरि-भयवं ! निच्छियं मए, जहा-तं नत्थि जं न जाणह तुब्भे, ता काऊणाणुकंपं-
साहह कइया भारियाए सुएहि य सह मम समागमो भविस्सइत्ति, गुरुणा भणियं-महाराय ! धम्मज्जेमण तदंतरा-
इयकम्मक्खओवसमो जया होहिइ, राइणा भणियं-भयवं ! जानामि एयं, केवलं दुस्सहविओगविहुरो न संकेमि
धम्मज्जमं काउं, चित्तिनरोहसव्वपेक्खो हि धम्मलक्खो कहम्महारिसेहिं साहिउं तीरइ?, ता सव्वाहा ऊणह पसायं,
निवेयह अवरसुवायंति, गुरुणा भणियं-जइ एवं ता पज्जवासेसु पइदिणं मुणिजणं, एयं खु परमोवाओ वंछियकज्ज-

सिद्धीए, जओ-विहडइ निविडकम्मनिगडं पि दु भिंदइ दुगइ, लहु कछाणवछिमुछासइ नासइ दुक्खसंगइ ।
 वंछइ लच्छि पास परिसय्यणु दपणु जिम पभासए, सुणिजणसंगेवि किं किं जणु जं नवि सोक्खु पासए ? ॥१॥
 तओ रोगिणव वेज्जोवइट्ठोसहं पंथपरिब्भट्ठेण व सुमगदेसणं तण्हाभिभूएण व विमलसलिलपडिपुणमसहार-
 रोवरनिवेयणं राइणा संमम्भुवगयमिमं गुरुवयणं, गओ य पणमिऊण सट्ठानं ।

इओ य ते दोवि तस्स सुया नदीए कूलंमि निलीणा तण्हाछुहाभिभूया जाव खणंतरं चिट्ठति ताव एगो गोउलिओ
 दहिमहियाणि गयरे विक्किणिऊण समागओ तत्थ पएसे, पेच्छइ देवकुमारनिविसेसरूवे करुणसरं रुयमाणे ते दोऽवि
 दारगे, तओ पुच्छिया तेण-रे पुत्तगा ! कीस रोयह ? केण तुब्भे एत्थ ठविया ? को वा तुम्ह एत्थ सयणजयोत्ति ?
 जेट्ठेण साहिओ सबो पुव्वुत्ततो, अह अणाहत्ति परिकलिऊण तेण जहासंनिहियअसणपाणदाणेणमहिन्नंदिऊण तेहिं
 तेहिं पयरोहिं उवल्लोमिऊण य नीया ते नियगोउलंमि, समप्पिया य गोउलाहिवस्स, तेणावि पुत्तविरहियाए समप्पिया
 नियदइयाए, सावि उदरुब्भवे इव परिपालेइ सव्वजत्तेण, उवयरइ खंडखज्जाइपमुहविसिट्ठवत्थुप्पयाणेण अणवरयं,
 सोऽवि गोउलाहिवई किल जयवद्धणनयरहिवस्स संबद्धोत्ति अन्नया कयाइ तेहिं दोहिवि पुत्तेहिं समेओ महासुल
 पाहुडमादाय नरविक्कमनरिंदसणत्थं समागओ जयवद्धणनयरं, दिट्ठो य नरवई, पणमिओ सव्वायेणेणं, समप्पियं पाहुडं,
 दिन्तो राइणा सहत्थेण तंबोलो, पुट्ठो य सयलसुत्थासुत्थवत्ताओ, एत्थंतरे निवडिया दोसु तेसु पुत्तेसु राइणो दिट्ठो,

जाओ गाढ पसोओ, परिभावियं च जहा धुवं एए मम तणयत्ति, तहावि पुच्छामि एयं-को पुण एत्थ वइयरोत्ति परिभाविय पुट्ठो गोउलाहिबई, कस्स भो एए पुत्तगत्ति?, तेण भणियं-देव! मम संबंघिणो, गेहिणीए आबालका-लओ उ वड्डियत्ति, राइणा भणियं-समं साहेसु, जायसखोभेण तेण सिट्ठो नईकूलाओ आरब्भ सयलो वुत्तंतो, एयमाय-न्निऊण राइणा परमहरिसपगरिसमुव्वहेतेण ते दोउवि दारगा गाढमालिगिय उच्छंगे निवेसिया, गोउलनायगेण भणियं-देव! पुरावि मए विविहचेठ्ठाहिं नाया एए जहा कस्सइ सांमत्तस्स वा सेणावइस्स वा नरवइस्स वा मग्गे गच्छंतस्स केणावि विसमपओगेण पब्भट्ठा होहिंति, कहमन्नहा एएसिं पइदिणंपि मट्ठियावडियदोघट्टघड्डभेड्डणेण य कित्तिम-तुरयघट्टपट्टणेण य संपिडियसरिडियपरिकप्पियसंदणवाहणेण य बुद्धिपइट्टियकट्टलट्टिसुगुव्वहणेण य चाउरंगसेणा-समहुद्दामसंगामपरिकप्पणेण य डिंमाण गामागरनगरपसायदाणेण य विविहा कीला अहेसि?, न य एवंविहा चेट्ठा पागयसुयाण होइ, तहा सव्ववेलासु मम तुम्ह दंसणत्थंमेतस्स एयाणवि नरिदभवणदंसणकए गाढनिव्वंधो आसि, केवलमहं वावत्तिऊण विसिठवत्थदाणेण दिट्ठिवंचणेण य पुरा एंतो, इण्हिं पुण गाढनिव्वंधं काऊण मम खणंपि पुट्ठिं अमुंचमाणा समागयत्ति, अहो महाणुभावणेण कहं ममोवयरियंति चिंततेण रत्ता परमपमोयभरनिव्वभरणेण दिन्नं तस्स तं चेव गोउलं गामसयं च आंचंदकालियं सासणनिवद्धं भुत्तीए, पभूयवत्थंतबोलाइणा य पूइऊण पेसिओ सट्ठाणंति । संयपि पुत्तजुयलपरियरिओ गओ सूरिसमीवं, वंदित्ता परमायेरणं निवेइओ पुत्तसमागमयुत्तंतो, सूरिणा भणियं-महा-

राय ! सुमरिसि पुव्वभणियं अम्ह वयणं ? राइणा भणियं-भयवं ! नियनामपिव सुमरामि, सूरिणा भणियं-महाभाग ! केत्तियमेत्तमेयं ? गुरुजणपज्जुवासणेण तं नत्थि जं न सिज्झइत्ति, रत्ता भणियं-अवितहमेयं, किं पच्चक्खेवि अपुव्वन्नं भणिज्झइ ? पसीयसु इयाणि एक्केण दइयवियोगदुक्खवोच्छेयणेणं, गुरुणा भणियं-मा ऊसुगो होसु, एवंति पडिव-ज्जिय पणमिऊण य सव्वायेरेण गओ राया सट्ठाण ।

इओ य सो देहिलो नावावणिओ अणुक्कलपवणपणोलिज्जमाणसियवडवसवेगपयट्ठियजाणवत्तो गंतुं पवत्तो ससु-दंमि, सीलमईवि तहाविहं अदिट्ठुपुव्वं वइयरं अवलोइऊण हा पिय ! पाणनाह ! किमेवंविहं वसणं विसमभावडियंति जंपिऊण य अकंडनिवडियवज्जदंडताडियव्व सुच्छानिभीलियच्छी परसुच्छिन्नव्व चंपगलया निवडिया जाणवत्तभूमितले, समासासिया पासवत्तिणा परियणेण सिसिरोवयारोहिं, खणंतरेण लद्धचेयणा गाढमुयपिययमवियोगवसविसंहुला गलंतनयणजलप्पयाहा विलविउमेवं पवत्ता—

हा भुवणपयडपोरिस ताय ! सजीयस्स संनिहं दट्ठुं । किमुवेहसि अइडुहिं नियडुहिं संपयं एयं ? ॥ १ ॥

नरसिंहनराहिव ! नियवहुंपि किमुवेहसे अणज्जेण । एवंपि हीरमाणिं ? हा हा विपरंमुहो दइवो ॥ २ ॥

हा पाणनाह ! हा गोत्तेदवया हा समत्थदिसिनाहा । रक्खह रक्खह एयं हीरंती पावमिच्छेणं ॥ ३ ॥

एवमईणि करुणाइं जंपंती सा संभासिया नावावणिएण-भइ ! कीस एवं विलवसि ? धीरा भव, नाहं सुमि-

णेवि तुह पडिक्कलकारी, जओ एसा समुद्रुरा रिद्धी तुहायत्ता, एसोउहं दासननिव्विसेसो, ता पडियज्जसु सामिणीसदं,
वावारेसु निथबुद्धीए गेहकज्जेसु एयं परियणंति, सीलमईए भणियं—

अवसर दिट्ठिपहाओ निट्ठुर! पाविट्ठु! धिट्ठु! दुचेट्ठु! । अहवा सासनिरोगेण जीवियं लहु चइस्सामि ॥ १ ॥

रे रे स्वत्तिथकुलसंभवपि आजम्मसुद्धसीलंपि । मं एवमुल्लवंतो नियजीयस्सवि न लज्जेसि? ॥ २ ॥

किंच-खिज्जउ देहं निहरउ जीवियं पडउ दुक्खरिंछोली । नियतायदिमनामत्थविहणं नेव काहामि ॥ ३ ॥

इय तीए निच्छयमुवलब्भ निवारियं तेण भत्तपाणं, छुहापिवासाभिभूयाएवि न परिचत्तो तीए नियनिच्छओ,
एत्थंतरे तीए विमुद्धसीलपरिपालणतुट्ठाए सणिणहियसमुद्देवयाए खित्तं महावत्ते तस्स जाणवत्तं, कओ जुगंतसम-
यदारुणो समीरणो, समुल्लासिया कुलसिहरविब्भमा जलकल्लोला, विउद्वियाइं गयणे घोरायाराइं गंधघनगराइं,
दंसिया गहिरगज्जिरवभीसणा फुरंतफारविज्जुपुंजपिंजरा जलहरा, तओ वाउलीहूओ कन्नधारो, जाया विहत्था
सुहडसत्था, ठिया विमणदुम्भणा अवल्लवाहगजणा, बाढं वाउलीभूओ नावावणिओ, एत्थंतरे गयणट्ठियाए
जंपियं देवीए—

रे रे जइ दुट्ठवणियत्तणय! गयविरहिय हियकाम कामगइह दहणसारिच्छ रिंछोव तुच्छपेच्छय छयलगलथणसमाण
माणवजणगरहणिज्जसील! सीलमइं धरिसिहसि एवं ता याव! पावेसि इयाणिं विणासंति सोचा पंडुरपडपाउ-

रणो कथयूयादित्थरो विणयपणओ करकलियधूवदहणो सो विन्नविउं समाढत्तो-देवि ! ममेकं दोसं दासस्स व
 खमसु परिहरसु कोवं न पुणो काहामीमं, पणए न परंमुहा देवा, ताहे भणियं देवीए-रे तुमं जइ गुहेण पालि-
 हिसि नियजणणिनिव्विसेसं एयं ता जीवसि हयास !, तेण तहत्ति सवं पडिवन्नं गाढभयवसट्टेण, उवसंहरियं देवीए
 डमरं अहंसणं च गया । अह जाओ अणुकूलो पवणो, मग्गेण लगं जाणवत्तं, हरिसिया कन्नधाराइणो जणा, परि-
 तुट्ठो सो वणिओ, पडिओ सद्वाथरेण चलणेसु सीलमईए, खामिया नियदुच्चरियं, भणिया य सा-सुयणु ! मा काहिसि
 सद्वाहा सोगं, अचिरेण तहा काहामि जहा मिलसि नियपिययमस्स, काराविथा य पाणवित्तिं, समप्पिया निरुवहर-
 निवासनिमित्तमेक्का उच्चरिगा, तओ पइदिणं मायरं व भयणिं व देवयं व गुरुं व सामिं व वत्थेण य भोगेण य भेसहेण
 य तंबोलेण य संमं पडियरमाणो पत्तो परतीरं, विक्किणियाइं निययभंडाइं पाविओ भूरिअत्थसंचओ निवत्तिथासे-
 सकज्जो वलिओ सनयराभिमुहं, अंतरे आगच्छंतस्स अणणुकूलपवणपणो छियं लगं जयवद्धणनयरपरिसरंमि वोहितं,
 तओ विमुक्का नंगरा पाडिओ सिववडो उत्तरिओ बहुकिंकरनपरियिओ सो वाणिओ, गओ विचित्ताइं सहरिहाहं
 परतीरभवइं पाहुडाइं गहाय नरविक्कमनराहिवस्स दंसणत्थं, पडिहारनिवेइओ य पविट्ठो रायभवणं, दिट्ठो राया, सम-
 प्पियाइं पाहुडाइं, कओ राइणा सम्माणो, तओ समुदलंघणवइयरनिवियेण परतीरनयररायसरूववत्ताकहणेण नियक-
 थाणगुणदोसपडणेण य ठिओ नरवइस्स समीवे पहरमेकं, एत्थंतरे पणमिऊण विन्नत्तं तेण-देव ! सुन्नं पवहणं समगच्छइं

रयणी ता अणुजाणह मं गमणायत्ति, राइणावि पिययमाविओगविहुरेण एस चैव अज्ज दीहरनिसाए विणोयकारी हवउत्ति परिचिंतयेतेण भणिओ सो-भइ ! वीसत्थो इहेव चिट्ठसु, नियपहाणपुरिसेहिं रक्खावइस्सामि तुह जाण-वत्तं, जं देवो आणवेइत्ति भणिऊण पडिबन्नं तेण, विसज्जिया य राइणा नियपहाणपुरिसा पवहणरक्खणत्थं, एत्थंतरे उट्ठिया दोवि कुमार, विन्नत्तं च तेहिं, जहा-ताय ! अदिट्ठपुवं अमह पवहणं, गाढं च कोउयं तइसणे, ता अणु-जाणउ ताओ जेण गच्छामोत्ति, तन्निच्छयसुवलब्भ अणुन्नाया य नरिंदेण, गया य अंगरक्खनपरिक्खित्ता ते जाण-वत्ते, तं च इओ तओ निरिक्खऊण पसुत्ता तत्थेव । अह पच्छिमरयणिसमए पडिबुद्धा परोणरं वत्ता काउमारद्धा, खणंतरेण लहुएण भाउणा पुट्ठो जेट्ठो भाया-अहो भाय ! कहसु किंपि अपुवं अक्खाणयं, इह द्वियाण न द्विजइ कहमवि विभावरी, जेट्ठभाउणा भणियं-भइ ! किमन्नेण अक्खाणयसवणेण ?, एवं चिय अप्पणोतणयं अक्खाण-यमपुवं निसुणेहि, तेण जंपियं-एयमवि साहेहि, तओ

करकालियकुसुममाला जह जणणी रायमगमणपत्ता । जह वलिया नो पुणरवि जह नयरे मगिया बहुसो ॥ १ ॥

जह ताओवि दुहत्तो अम्हेहिं समं गओ नईकूले । जह परतीरनिरुवणकएण सलिलंमि ओगाढो ॥ २ ॥

जह सरियनीरपूरणवाहिओ दूरदेसमणुपत्तो । जह अम्हे गोउलिएण गोउलं पाविया विवसा ॥ ३ ॥

जह बुट्ठिं संपत्ता रायउले जह गया तओ अम्हे । रायावलोयणत्थं जह विन्नाया य ताएणं ॥ ४ ॥

जह वा महलकोजहलेण एत्थागया तहा सबं । अक्खाणयमप्पणं उवइइं लहुगभाउस्स ॥ ५ ॥

एयं च कहिज्जमाणमामूलाओ निमुणियं समग्गमवि समीवेदससंठियाए सीलमईए, तओ अपुवं अणाइक्खणिज्जं केवलमणुभवगम्मं नियसुयसाहियवइयरपरिन्नायससुत्थहरिसपगरिसमुच्चंती समुचरोमंचुचाइयकंचुया सुयसिगेहव-सपगलंतथणमुहसुद्धुद्धधारा एह चिरकालपत्तगा पुत्तगा ! नियजणणिं गाढमालिंगहत्ति भणंती गया तेसिं पच्चा-सन्नं, निवेइओ पुच्चवित्तंतो, विन्नाया जेठुत्तेण, तओ गाढं कंठमवलंबिय चिरविरहुहावेगसूयगविसंदुलवयणगब्भं निब्भरं सपुत्तावि रोविउं पवत्ता, विन्नायपरमत्थेण मुहुत्तमेत्तं विलंबिय समासासिया कुमारपरियेण, अह उग्ग-यंमि दिणयेरे परियणमज्झाओ एगेण पुरिसेण तुरियं गंतूण भणिओ नरविक्रमो-देव ! तुम्ह दइया कुमारोहिं एयस्स चेव नावावाणियस्स जाणवत्ते पत्तत्ति, तओ हरिसमरनिब्भरहियएण सविम्हयं पुच्छिओ राइणा एसो-भइ ! को एस बुत्तंचोत्ति ? तेणवि संजायभएण भणियं-देव ! वियरसु मे अभयदाणेणप्पसायं जेण जहा वित्तं निवेएमि, पडिक्खं नरिंदेण, तओ पढमाणुरागाओ आरब्भ जाणवत्तारोवणक्कंदणोवलोभणेदेवयाभेसणप्पमुहो साहिओ नीससो बुत्तंतो, एयमायन्निऊण य नरवइणा समग्गधणजाणवत्तसहिओ निविसओ आणत्तो सो चाणियगो, सीलमईवि देवी करेणुगाखंधगया धरियसियलत्ता चामरोहिं वीइज्जमाणी पए पए पडिच्छंती नयरजणकयं पूयासक्कारं ठाणे ठाणे वियर-माणा दीणाणाहाण कणगदाणं पवेसिया परमविभूईए निययमंदिरं, काराविओ पुरे अट्टदिवसिओ महुसवो, अह

पहविषयविलिप्ताए नित्यंसियामलमहगधवत्थाए सुयजुयलपरिवुडाए पमोयभरनिभरंगीए सीलमईए पुरओ पुवणु-
भूयं कहं कहतेण तीसे य हरणपमुहं वित्तंतं निसुणमाणेण रण्णा मालागारस्स तस्स पाडलयनामधेयस्स सचरिय-
मणुवचारं तहाविहं सुमरियं झत्ति, तो भणिया सीलमई-पिण्णं ! पियाविहु न एरिसो होइ जारिसओ स महप्पा
मालागारो सिणेहपरो, भणियं सीलमईए-सच्चमिणं नाह !, ता कुण पसायं सुसमिद्धिवियरणेणं महाणुभावस्स
तस्स तुमं, फलमेयं चिय लच्छीए नाह ! संझंभरागववलाए जं पूरिज्जति मणोरहाओ उवयारिलोगस्स ।

इय सोचा से वयणं रण्णा संदणपुराउ सो सिगं । आणाविऊण ठविओ चोडयविसए महाराओ ॥ १ ॥
दिद्वो से भंडारो समणिया करितुरंगरहजोहा । किं बहुणा ? अत्तसमो सोऽवि कओ तेण नरवइणा ॥ २ ॥

अन्नदिवसे य भज्जासु यसमेओ नरविक्रमो महया रिद्धिसमुदणं गओ उज्जाणे, दिद्वो सूरी, सवायरेण पणमिऊण
पसाहिओ समीहियसंपत्तिवइयरो, गुरुणा भणियं-महाराय ! एरिसक्खणवल्लिनिबंधणाणि सुणिज्जचरणसेवणाणि,
राइणा चित्तियं-अहो अमोहं गुरुवयणं, अहो जिणधम्मस्स माहण्यं, सवहा वन्नोऽहं जस्स मे एवंविहेण सुणि-
णाहेण समं संगमो जाओ, एवं च चित्तयेतेण रत्ता उवज्जियं सुगइक्कप्पतरुस्स सम्मत्तस्स वीयति, गुरुणा भणियं-
महाराय ! पडिवज्जसु निच्छइयं संपइ जिणधम्मं, राइणा भणियं-अयवं ! द्ढमप्पमसुत्तमत्तज्जजोगो जिणधम्मो,
कहममहारिसज्जणा सक्कंति अनुपालिउं ? , गुरुणा नायं-अज्जवि निद्वुरो मोहंगी द्ढनिबंधणा मिच्छत्तवासणा

तिद्याणुबंधो विसयपडिबंधो सवणमेत्ता विसेसधम्मवत्ता, तम्हा जहाभद्गत्तमेव एयस्स इण्हमुचियंति भित्तिऊण
बुत्तो सो-महाराय ! जइ एवं ता पज्जुवासेज्ज सुसाहुणो पसंसेज्जसु जिणधम्मं अणुमोएज्जसु तप्पडिवन्ने भवज्जणे,
एत्तिथमेत्तेणवि होही दढकम्मविगमो, एवंति पडिवज्जिऊण गओ राया सट्ठाणंमि ।

निप्पच्चवायमउले भोगे भुंजेति पंचरुवेवि । सव्वत्थ जायकित्ती नरविक्रमनरवई ताहे ॥ १ ॥

सूरीवि धम्ममग्गे आरोविथ भूरि भवपाणिगणे । सीसगणसंपरिवुडो नयराउ विहरिओ बाहिं ॥ २ ॥

पडिबोहंतो सूरोव भवकमलाइ वयणकिरणेहिं । कालक्कमेण पत्तो जयंतिनयारिं विहारेण ॥ ३ ॥

उग्गहमणुजाणाविय नयरीए बाहिं चंपगुज्जाणे । सद्धम्मकम्मउज्जुयज्जणसहिओ ठिओ भयवं ॥ ४ ॥

जाया पुरे पसिद्धी सिद्धंतविसारओ जहा सूरी । इह आगउत्ति ताहे वंदणवडियाए नयरिजणो ॥ ५ ॥

अंतेउरेण सहिओ हरिकरिरहजोहवूहपरिकिण्णो । नरसिंहभूमिनाहोवि आगओ सूरिपासंमि ॥ ६ ॥

सांथरमह विणमंतुत्तिमंगमणिमउडलीढपयपीढं । पणमिय मुणिजणसहिंयं गुरुमुवविट्ठो धरणिवट्ठे ॥ ७ ॥

संसारासायागब्भा, तओ सद्धम्मदेसणा । गुरुणा काउमाढत्ता, मोहविद्धंसकारिणी ॥ ८ ॥

जहा—वलयासिंधुनिम्मगवडवीयं व दुल्लहं । को माणुसत्तं संपप्प, पमाएज्ज वियक्खणो ? ॥ ९ ॥

खणोऽवि नाउकम्मस्स, जाइ जेणाविणस्सरो । तेणेस मुच्छिओ लोओ, निरुद्धिग्गो कंहं भवे ? ॥ १० ॥

भवेज्ज कोऽपि किं धीमं, निदाकरणलालसो । मंदिरे हववाहुगजालमालापलीविण् ॥ ११ ॥
 विण्से सुहगम्मोवि, सण्याहेओ पयट्ठइ । दुग्गेऽणंते भवट्ठाने, जे न किंपि समीहण् ॥ १२ ॥
 हए से नियबुद्धीए, ठाणे ठाणे विसीयइ । अन्ने सोक्खे न पावेइ, सिद्धिसद्धम्मसंबले ॥ १३ ॥
 बलेण तेण किं कज्जं, किं वा तेण धणेणवि ? । न जं सद्धम्ममग्गस्स, उवयारे निजुज्जइ ? ॥ १४ ॥
 जएज्ज सब्बहा धम्मो, पमायपरिहारओ । जीवघायनिवित्तिमि, पवित्तिमि सुहेसु य ॥ १५ ॥
 सुयाइमोहसंबद्धा, पावं कुव्वंति पाणिणो । तेण पावेण संतत्ता, निवडंति अहो गइं ॥ १६ ॥
 गइंदा इव बज्झंति, जोणिलक्खेसु णेगसो । किं किं दुक्खं न पेक्खंति, ते तिक्खमवियक्खणा ? ॥ १७ ॥
 तम्हा एवं नाउं जइधम्मं सब्बहा समायरह । एसो खु तिवहुजलणसमणघणवरिसणसमो जं ॥ १८ ॥
 सग्गापवग्गमंदिररोहणनिस्सेणिदंडसारिच्छो । कम्मब्भडविडविहाडणेक्कधारुक्कडुकुहाडो ॥ १९ ॥
 अचिरेण दिन्ननिस्सेससारनिस्सेयसो सुहत्थीहिं । अणुसरियवो सम्मं सुसत्तिजुत्तेहिं सत्तेहिं ॥ २० ॥
 रत्ता भणियं भयवं ! जं तुब्भे वयह तं पवज्जामि । जाव नियरज्जभारप्पणेण सुत्थं करेमि जणं ॥ २१ ॥
 गुरुणा भणियं जुत्तं एयं तुम्हं भवेक्कभीयाणं । निद्विगं कुणह लहुं चयह पमायं पयत्तेण ॥ २२ ॥
 अहं गुरुं पणमिज्जण गओ राया समवणं कयमणंतरकरणिज्जं आहूया मंतिणो कहिओ निययाभिण्णओ अवगओ

मंतीहिं, एत्थंतरे समागया कुमारचारोवलभनिमित्तं पुव्वपेसिया गूढपुरिसा, पणमिओ तेहिं राया, निवेइओ नयरनि-
ग्गमाओ आरब्भ जयवद्धणपुररज्जलाभपज्जंतो सबो कुमारवुत्तंतो, पुटो राया, दिन्नं च चिंतियाइरित्तं तेसिं वित्तं, पेसिया
य कुमारणयणनिमित्तं बुद्धिसागरपमुहा मंतिणो, अणवरयप्पयाणएहिं पत्ता य ते जयवद्धणपुरं, नरविक्रमोवि नाऊण
तेसिमागमणं सपरियणो निग्गओ अभिमुहो, पविसिया वड्डविच्छइणं, कया जणगनिव्विसेसा पडिवत्ती, पुट्टा य उच्चि-
यसमए आगमणप्पओजणं, निवेइयं तेहिं जहा—पव्वज्जापडिवज्जणाभिलासो राया, तुममि नियरज्जभरारोवणमणोरहो
य देवस्स, अओ तुम्हाणयणनिमित्तं पेसियम्हि, इमं सोच्चा तक्खणमेव तत्थ रज्जे जेट्टपुत्तं ठविऊण समग्गनियखंधा-
वारसमेओ चलिओ नरविक्रमो समं मंतीहिं, कालक्कमेण पत्तो जयंतिनयरिपरिसरं, विन्नायतदागमणो दूरं संसुहमागओ
नरसिंहनरवई समं चंपगमालाए देवीए, तओ दूराओ चेव नरविक्रमो जणगमागच्छंतं पेच्छिऊण हरिसुप्फुल्ललयणो
उयरिऊण करिवराओ मंतिजणसमेओ गंतूण निवडिओ चलणेसु जणयस्स जणणीएय, तेहिंवि चिरदंसणुप्पन्नाणं-
दंसंदिरेच्छेहिं गाढमालिंजिऊण निवेसिओ नियउच्छंगे, पुटो य सरिरारोगयं, खणंतरे य पविट्टाई नियमंदिंरं,
पत्थावे पुटो नरवइणा नरविक्रमो पुरीगमणकालाओ आरब्भ पुव्ववइयरं, साहिओ नरविक्रमेण समत्थोऽवि, एवं
च चिरकालदंसणसुब्भवसुहसंदोहमणुहवंताण गया कइवि वासरा, अन्नदियेहे य भणिओ राइणा नरविक्रमो—पुत्त !
पुव्वपुरिसपवित्तिवत्तिणीपरिपालणेण उस्सिसखलजणताडणेण य एत्तिंयं कालं जाव मए पालियं रज्जं, इयाणि पुण

ममाहिं तो सरीरबलेण य पुन्नपगारसेण य विक्रमेण य समत्थो तुमं ता अंगीकरोसु रज्जमहाभरं, परिवाल्लेसु पुव्वप-
वाहेण जणवयं, अहं पुण पुव्वपुरिसायरियं धम्ममग्गं अणुचरिस्सामि, कुमारेण भणियं-ताय ! विरमह इमाओ
अज्झवसायाओ, तुम्ह दंसणुस्सुओ चिरकालेण अहमिहमागओ, नवि य अज्जवि एस पत्थावो पत्थुयवत्थुस्स, निव-
सह ताव सगेहे चिय कहवय वरिसाहं, राइणा भणियं-यच्छ ! किं न पेच्छसि जायविमलपलियसंगमुत्तिमंगं ? न
वा निरुवेसि विसंदुलसयल्लहिं सरीरल्लहिं ? न निरिक्खसि थेवपयासेवि चलंतिं दंतपंतिं ? न विभावसि वत्थुवि-
लोयणावलियं लोयणजुयलं ? न कलयसि वलिपडलसंतयं सरीरत्तयं ? न वा सुणसि समत्थकज्जासाहणजायसदेहं
देहं ? एवं च पच्छिमदिसावलंबि विंबं व रविणो रयणीविराममलिणं मंडलं व ससिणो गाढजरत्तणपत्तं पत्तं व तरुणो
जायसूरत्थमणसंभावणं वणं व कमलाण पब्भट्टलट्ठपुव्वसोहं अप्पाणप्पाणमवलोइऊण कहं खणमवि गेहे वसामि ? ,
ता सुयसु पडिवंधं पडिवज्जसु मम वयणं भवसु धम्मसहाओ, तओ तायनिच्छयसुवलब्ध नरविक्रमो अणणुभूयपुव्व-
दुक्खकंतो वज्जताडिओ इव लेप्पघडिओ इव पत्थरुक्कीरिओ इव चित्तलिहिओ इव खणं ठाऊण वाढं रोविडं पवत्तो,
समासासिओ य रत्ता कोमलवयणेहिं, पडिवन्नो य तेण महाकट्टेण रज्जाभिसओ, समागए य पसत्थवासरं सब्बसा-
मग्गीए संतिसामंतमित्तयप्पसुहमहाजणसमक्खं निवेसिओ नरविक्रमो निययसीहासणंमि, कओ अट्ठोत्तरकलस-
सएणं महाविभूइए रायाभिसओ, पणमिओ य रत्ता मंडलाहिवपुरपहाणलेयपरियरिएण, भणिओ य सब्बायेरेण

वच्छ ! जहवि नयविणयसचाइगुणगणमणिमहोयही तुमं तहवि किंवि भणेज्जसि, एसा हि रायलच्छी अपडमंथ-
 त्त णं अमज्जपाणं मयजणं सूरससहरकरप्पसरासज्झमंधयारं, ता तहाकहंपि वट्टिज्जसि जहा न महलिज्जइ ससहर-
 धवलं नियकुलं, जहा न खंडिज्जइ दूरप्परूढो पयावपायवो, जहा न पमिलायइ नोइकमल्लिणी, जहा न उस्सिखली-
 हवंति खला, जहा न विरच्चति पयइणो, जहा करभरोहिं न पीडिज्जइ जणवउत्ति, एवं च वट्टमाणस्स पुत्त ! इहलोए
 इच्छिया होहिंति सयलवंछियत्थसिद्धीओ, किमंग पुण परलोएत्ति ? , एवं सिक्खविऊण नरसिंघनरवइ पट्ठिओ ससंत-
 भइसूरिससीवंमि, तओ पउणाविया नरविक्रमनरवइणा सहस्सवाहिणी सिबिगा से निक्खमणनिमित्तं, कयमज्जणी-
 वयारो सव्वालंकारविभूसिओ समारूढो तत्थ नरसिंहनरवइ, उक्खित्ता पवराभरणविभूसियसरीरोहिं सुइनेवत्थोहिं
 पवरपुरिसेहिं सिबिगा, तओ दिज्जंतेहिं महादाणेहिं वज्जंतेहिं चउव्विहाउज्जेहिं पढंतेहिं मागहसत्थोहिं गायंतेहिं
 गायणेहिं मंगलमुहरमुहीहिं नयरनारीहिं णाच्चिराहिं वारविलियाहिं महाचिभूइए निगओ नयरीओ, पत्तो सूरि-
 सगासं, ओयरिऊण सिबिगाओ तिपयाहिणपुन्वं पडिओ गुरुचरणेसु—

भालयलघडियकरसंपुडेण भणिओ गुरू तओ रण्णा । भयवं ! तायसु इण्ह जिणिंदिक्खापयणेण ॥ १ ॥

पडिवन्नंमि य गुरुणा पुव्वुत्तरदिसिसमुज्झियाहरणो । एगनियंसियवत्थो पसंतवहुंतसुहलेसो ॥ २ ॥

सिद्धंतभणियजुत्तीए तत्थ सूरिहिं गाहिओ सम्मं । पव्वज्जं निरवज्जं कम्ममहासेलवज्जसमं ॥ ३ ॥

भणिओ य जहा भइय ! एसा संसारसिंयुनावव । तुमए गहिया दिक्खा ता सम्मं उज्जमिज्जासु ॥ ४ ॥
मा काहिसि खणमेक्कपि पावमित्तेहिं दुहनिमित्तेहिं । संसग्गिं दुक्खेहिं विसयकसाएहिं सह भइ ! ॥ ५ ॥
एवं चंक्रमियवं भोत्तवं एवमेवं सइयवं । एवं भासेयवं इचाइ निवेइयं गुरुणा ॥ ६ ॥
संमं संपडिवज्जिय छट्टट्टमखमणकरणखीणगो । अप्पडिवद्विहारं विहारिय गामागराईसु ॥ ७ ॥
अहिगयजइधम्मविही विहियाणुट्ठाणनिच्चतल्लिच्छो । लच्छिव संजमं रक्खिऊण निम्महियकम्मंसो ॥ ८ ॥
सो भोक्खपयं पत्तो नरविक्रमनरवईवि तस्स सुओ । उवमुंजिय रज्जुगं निययपए ठविय पुत्तं च ॥ ९ ॥
पावियसम्मत्तगुणो पज्जते पालिऊण पव्वज्जं । कयदुक्करतवचरणो महिंदकप्पे सुरो जाओ ॥ १० ॥
इय नंदण ! नरपुंगव ! चरियं एएसिं पुरिससीहाण । तुज्झ मए परिकहिंयं जं तुमए पुच्छिअं आसि ॥ ११ ॥
सोऊण इमं तुममवि नरिंद ! धम्मो तहुज्जमं कुणसु । जह उत्तिमपुरिसाणं अचिरेण निंदसणं होसि ॥ १२ ॥
इमं च सोचा राया जायपव्वजापरिणामो गुरुं विन्नविउं पवत्तो-भयवं ! तुमं महातावतवियस्स व अणयधारा-
वरिसो छुहाभिभूयस्स व सुन्नखज्जागवणो दोगचचक्ककंतस्स व चिंतामणी दुरालोयंघयारगिरिगुहागयस्स व पयास-
दीवो नीरनिहिनिहित्तस्स व समासासदीवो वियडाडवीपडियस्स व पसत्थसत्थनाहो मह कहकहवि चक्खुगोयरं
गओ, ता इयाणिं परमपहु ! करुणाकुलभवण ! एयं पवाहओ अणाइयं अणवदग्गं अपरिच्छेयमिच्छाजलुणीलपडि-

हत्थं मोहमहावत्तदुत्तरिच्छं निरंतरुभवंतजम्भमरणकछोलमालाउलं कसायकलुसपंकसंकुलं वियरंतविविहायंकनक्क-
चक्काउलं वियारगोअरुत्तिणऽण्णाणतिमिरभरगुविलं पयइदुगगेज्झमज्झं पयइभीसणं पयइविवागदारुणं पयइ-
निगुणं पयइकिलेसायासाइदुक्खसंखोहकारणं रणं व कायरणं सव्वहा चित्तिज्जमाणमवि परमरोमुद्धोसजणं भव-
समुदं निरवज्जपव्वज्जाजाणवत्तेण सुवद्धेण नाणंदसणविहिसंछाइयछिड्डेणं संवरवज्जलेवेणं संमभाविद्धेण तवपवणज-
वेणं अणुलग्गेणं वेरगमग्गमि अक्खोभेण विसुत्तियावीईहिं पडिपुण्णेण अणेगसीलंगरयणसहस्सेहिं तुम्हेहिं कन्न-
धारेहिं झत्ति समुत्तरिउं समीहामित्ति, स्सरिणा भणियं—महाराय ! आ पडिवंधं करेहि, तओ नंदणनरिंदो पुत्तारो-
वियरज्जभारो वाहिं व मोत्तूण रायलळिं विहगोव्व पंजरओ घरवासाओ निक्खंतो, जाओ व तिगुत्तिगुत्तो पंचससि-
इजुत्तो जियपरीसहो निहयंपंचिदियपसरो समणो समियपावोत्ति । तओ कमेण अहिगयएक्कारसंगो कडाणं कम्माणं
पुन्विं दुप्पडिक्कंताणं खवणत्थं मांसमासेण अणिकिखत्तेणं कायरदुरणुचरेणं घोरं तवोकम्ममेणं अप्पाणं सोसितो
अप्पडिबद्धविहारेणं विहरइ । तित्थयरत्तलाभवीयभूयाइं वीसइ ठाणाइं सम्मं फासेइ थ, कंहं?—

सव्वजगजीवबंधधुवंधवमूए जिणे जियकसाए । सिवपंथसत्थवाहे तत्थाहिं गिराहिं थुणमाणो ॥ १ ॥

ववगयजरमरणभए सिन्नमयलमणंतमवखयं पत्ते । परमसरे थ सिद्धे समिद्धसोक्खे नमंसंतो ॥ २ ॥

सन्नाणचरणंदसणमहाभरुद्धरणपच्चलसहावं । चाउव्वन्नं संघं एक्कं सरणंति मन्नंतो ॥ ३ ॥

करुणोयहिणो गुरुणो पंचविहायारधरणधीरस्स । अणुवकयजणानुगहभावं समं पसंसतो ॥ ४ ॥
सद्धम्मसिद्धिलचित्ते सत्ते धम्मे धिरीकरमाणे । परियायपमुहधरे उववूहंतो य भयवन्ते ॥ ५ ॥
ससमयपरसमयपरूढगाढससयसहस्सनिम्महणे । सुस्ससंतो निचं बहुस्सुए साहुणो पवरे ॥ ६ ॥
मासदुमासतिमासाइविविहवतवकम्मकरणपडिबद्धे । विस्सामणाइणा तह तवस्सिणो पडिचरेमाणो ॥ ७ ॥
अंगाणंगसरूवे सुयंमि सन्वन्नुनिच्छित्थंमि । अणवरयं गयचित्तो तथत्थपरिभावणुज्जुत्तो ॥ ८ ॥
तत्तत्थसहहाणप्पहाणसम्मत्तपवरत्थुंमि । संकाइदोसजालं परिहरमाणो पयत्तेण ॥ ९ ॥
नाणार्हणं उवयारपमुहविणयंमि बहुविगप्पंमि । अइयारपरंपरयं वज्जंतो निउणबुद्धाए ॥ १० ॥
पडिलेहणापमज्जणपमुहावस्तयविहीसु विविहासु । सद्धम्मवद्धलक्खो खलियं निचंपि रक्खंतो ॥ ११ ॥
सीले पिंडुग्गमपभिइदोसविरहा वएसु पंचसुवि । पाणवहाइएसु य विसोहयंतो य मालिन्नं ॥ १२ ॥
पइसमयं संवेगाइभावणाजालभावणुज्जुत्तो । ससरीरेऽविहु निचं ममत्तबुद्धिं अरुणमाणो ॥ १३ ॥
वज्जन्मंतररूवं वारसभेयंपि धोरतवकम्मं । अनिगूहियनियसत्तो आयरमाणो य पइदिवसं ॥ १४ ॥
धम्मोवगारिसाहूण वत्थकंबलपमोवस्सुवगरणं । देंतो कोहाईणं निचं चायं कुणंतो य ॥ १५ ॥
आयरिओज्जायतवस्सिथेसहाहम्मियाण सेहां । कुलगणगिलाणसंघे वेयावच्चंमि वट्ठंतो ॥ १६ ॥

एएंसिपि तहाविहआवयवसजायदुत्थचित्ताणं । ओसहदाणाईहिं समाहिभावं च जणमाणो ॥ १७ ॥
 अक्खरपयगाहसिलोगेमेत्तयं सवया अपुव्वसुयं । अहिगयसुत्तथोऽविट्ठु सुयाणुराणेण पढमाणो ॥ १८ ॥
 भत्तिं तह बहुमाणं तदिट्ठुत्थाण सम्मभावणयं । विहिगहणं चिय निच्चं सुयस्स सम्मं पयासितो ॥ १९ ॥
 भव्वाण धम्मकहणेण पइदिणं पवयणुन्नइं परमं । सियवायसाहणेण य कुणमाणो सुद्धचित्तेण ॥ २० ॥
 सो नंदणसुणिवसहो इय वीसइठाणगाइं फासित्ता । तित्थथरनामगोत्तं कम्मं बंधइ परमप्पा ॥ २१ ॥
 अह पमायपरिहारपरायणो एगं वाससयसहस्सं समणपरियागं पाउणित्ता पज्जंतसमए य सम्ममालोइयनिथ-
 दुच्चरियवग्गो समुचारियपंचमहव्वओ खामियसव्वसत्तसंताणो मासियसंलेहणासंलिहियसरारो पंचनमोकारपरायणो
 मरिऊण समाहीए समुप्पन्नो पाणयकप्पे पुप्फुत्तरवडिंसए विमाणे देवोत्ति ॥

ताहे सो सरभसभावियेण नियपरियणेण परियरिओ । विलसइ तत्थ विमाणे अयराइं वीसइं जाव ॥ १ ॥

आउयकम्मविगमे य तत्तो चविऊण इहेव जंबुदीवेदीवे भारहे खेत्ते माहणकुंडगामे सन्निवेसे सयलवेयविज्जाविक्ख-
 णस्स उसभदत्तस्स माहणस्स देवाणंदाए भारियाए गब्भे सो नंदणदेवजीवो मिरियभवकयकुलप्पसंनदोससमुवज्जि-
 यनीयगोयकम्मसामत्थेणं आसाढसुद्धछट्ठीए हत्थुत्तरे नक्खत्ते पाउब्भूओ पुत्तत्तणेणति, दिट्ठा य तीए रयणीए सुहप-
 सुत्ताए गयवसहाइणो चउइस महासुमिणा, तओ अदिट्ठुपुव्वतहाविहसुविणोवलंभजायहरिसा गया उसहदत्तस्स

माहणस्स सगासे, सिट्ठा चउहसवि सुमिणा, उसहदत्तेणवि ते सम्ममणुचितिज्ज भणियं—

तुज्झ पिए ! धणलाभो पंचविहविसिट्ठभोगलाभो य । होही नीरोगत्तं नूणं एयाणुभावेण ॥ १ ॥

रिउजउसामाथव्वणचउवेयवियक्खणं जणपसिद्धं । जणिहिसि पुत्तं च तुमं समहिगनवसासपज्जत्ते ॥ २ ॥

इय सा निसामिज्जणं पहिट्ठचित्ता विमुक्कुविगप्पा । निययावाससुवगया सम्मं गब्भं समुव्वहइ ॥ ३ ॥

जद्विक्सं चिय चिंतामणिव्व गब्भे जिणो समोइन्नो । करितुरगरयणनिवहो तद्विक्सं चिय न माइ गिहे ॥ ४ ॥

अणवरयहोमकरणच्छलंतधूमोलिसामलं गयणं । उन्नयमेहासकं कुणइ अकालेऽवि हंसाणं ॥ ५ ॥

अह भयवओ गब्भगयस्स विइक्कतेसु बायासीदिवसेसु वट्टतेय तियासीतमदिणमि सोहम्मकणवासी देविंदो सोहम्माए
समाए निसन्नो वत्तीसाए विमाणसयसहस्साणं चउरासीए सामाणियसाहस्सीणं तायत्तीसाए तायत्तीसाणं चउण्हं
लोगपालाणं अट्ठण्हं अगमहिसीणं तिण्हं परिसाणं सत्तण्हं अणियाणं सत्तण्हं अणियाहिवइणं चउण्हं चउरासीणं
आयरक्खदेवसाहस्सीणं अन्नोसिंपि देवाणं देवीणं य सामित्तमणुपालेमाणो इमं च जंबुद्वीवं दीवं विउल्लेणं अक्खलिय-
पसरेण ओहिनाणेण करकमलनिलीणमुत्ताहलं व अवलोएमाणो भयवंतं चरिमित्थयरं माहणपणइणीकुच्छीमयं
पेच्छइ, तओ आणंदवियसियनयणकमलो हरिसवससमुच्छलियरोमंचचियसरीरो संभमसट्ठणचलियकडतुडियके-
ज्जाकिरीडकुंडलाइभूसणो तक्खणविमुक्कसीहासणो पायपीढाओ पच्चोरुहइ, वेरुलियवरिट्ठिरट्ठिरत्तरयणखंडमंडियाओ

पाउयाथो विमुंचइ, एगसाडियं उत्तरासंगं करेइ, निहालतडघडियकरसंपुडो सत्तट्ट पयाइ तित्थयराभिमुहं अणुगच्छइ,
तथो वामजाणुं अंचित्ता दाहिणजाणुं धरणियले निहट्टु तिकखुत्तो सुद्धाणं धरणियले निवाडेइ, तहा मत्थए अंजलिं
काऊण सुचिरं पराए भत्तीए संथुणइ, कहं ?—

तुम्ह नसो जिण ! निहयारिवग्ग ! भयवंतं णाह ! आइगर ! तित्थयर सयं चिय जायबोध ! पुरिसोत्तम ! पसिद्ध ! ॥ १ ॥

भवभीममहाडविपडियपाणिगणसत्थवाह गयवाह । सिव मयलमणंतमुहं संपावियकाम गयकाम ! ॥ २ ॥

परमेसर तत्थ गथोवि ताव अक्खलियनाणनयणेण । एत्थ गथंपिट्ठु पणयं मं पेच्छसु किंकरसरिच्छं ॥ ३ ॥

एवं च थुणिऊण पुवाभिमुहसीहासणनिसन्नस्स देविंदस्स एवंरूवो संकण्णो समुप्पन्नो—अहो तित्थयरा भयवंतो न
कयाइ तुच्छकुलेसु दरिद्रकुलेसु किवणकुलेसु भिक्खागकुलेसु उप्पज्जिंस्सु वा उप्पज्जंति वा उप्पज्जिंस्संति वा, किं तु उग्ग-
भोगराइन्नखत्तिथइक्खागहरिवंसाइएसु सयलभुवणसलाहणिज्जेसु, केवलं कहवि कम्मवसेण हीणकुलेसु अवयरियाविय
भयवंतो अजोणीनिकखंता चेव सक्केहिं उत्तमकुलेसु संहरिज्जंति, जथो तीयपच्चुप्पन्नाणागयाणं सुरिंदाणं जीययेयं,
एवं च जुत्तं ममावि इमं चरिमत्तिथयरं इमाउ माहणकुलाओ कामवगोत्तस्स सिद्धत्थनरिंदस्स वसिट्ठगोत्ताए तिस-
लाए कुच्छिसि संकामिउं, तिसलागब्भंपि देवाणंदाए कुच्छिसिन्ति, एवं संपेहिन्ता पायत्ताणीयाहिवइं हरिणगमेसिं
तिसलाकुच्छिसि गब्भोवसंहरणत्थं निरुवेइ, सो य हरिणगमेसी सक्काएसेण उत्तरवेउवियरुवधरो मणपवणजइणीए

गईए संपत्तो देवाणंदाए माहणीए समीवं, ओसोयणीदाणपुव्वणं च तीसे अवहरइ भयवं गब्भाओ, माहणीवि
तक्खणं चिय वयणकमलेण ते चउइसवि महासुमिणे पडिनियत्तमाणे पेच्छऊण ववगयनिदा निइयताडियउरपंजरा
जरावेगविडुरियव नित्थामसरीरा अवहरिओ मम गब्भोत्ति सुचिरं अय्पाणं निंदती करयलनिवेसियक्खेला परमसो-
गंसंभारं काउमारद्धा ॥

इओ य इहेव जंबुदीवे भारहवासित्लयभूयं समुत्तुंगपायारपडिहयविकखपक्खुक्खेवं विचित्तासायसहस्ससिहर-
रद्धादिसावगासं खत्तिथकुंडगामं नाम नगरं, तत्थ य कसिणत्तणं कलथठिकेठेसु सवावहारलोवो सहसत्थेसु कंटगु-
प्पत्ती कमलनालेसु कुडिलत्तं कोदंडडेसु निट्ठत्तं तरुणीपओहरेसु भित्तविरोहो रयणियरस्स बंधो य सारणिसलि-
लेसु । जहिं च पढमाभासी पियंवओ करुणापरो वेसमणेव्व अणवरयदाणरसिओ महातरुव्व सउणजणकयक्ख-
वाओ पारद्धिलुद्धव्व कयसारमेयसंगहो गेवेज्जयसुरजणोव्व अणिंदो सारयसलिलं अकलुसो निवसइ लोओ । जत्थ
य चउहिंसिं पि अणवरयवहंतउरहट्ठघडिसुहमुक्कसलिलसिच्चमाणाइं सव्वोउयफुल्लफलमणहराइं जंबूजंबीरखज्जूत्ता-
लतमालपमुहतलसंडमडिधाइं परिभूयनंदणवणाइं सोहंति काणाइं, जं च संकेयठाणं व तिहुयणलच्छीए समुप्यत्तिभू-
मिव्व विविहच्छेराणां लीलाभवणं व सिंगारस्स आवासोव्व धम्मस्स मुहमंडणं व वसुंधारामणीए । तत्थ य पुरंदरोव्व
छिन्नभूधरपक्खो सुणिव्व समरसोवओगो सुरवारणोव्व दाणसित्तकरो जलनिहिंव्व समज्जायाणुवती अणेगनरिंदमउ-

लिमालानमंसियकमकमलो भुवणपसिद्धो सिद्धथो नाम नरिंदो ।

हरिपीलुपरिक्खित्तं भमंतविहगमहिसिपरिकलियं । सुन्नपि वसंतंपित्र नज्जइ जस्सारिजभवणं ॥ १ ॥

एगेसु पलाणेसुं जयत्तरवेण सत्तुसु परेसुं । पणमत्तेसुं जेणं समरसुहं नेव संपत्तं ॥ २ ॥

तस्स य वम्महस्स व रई महमहणस्सेव लच्छी सव्वतेउरपहाणा रूवाइगुणगणाभिरामा तिसला नाम देवी,
जहत्थाभिहाणो य नंदिवद्धणो नाम पुत्तो सुदंसणा य धूया, अह आसोयबहुलेतरसीए अद्धरत्तसमए हत्थुत्तर-
नक्खत्ते सुकुमालहंसत्तलीपडलसुदरंमि दहिंपिंडपंडुरपडपच्छाइयमि गंगापुलिणविसाले सयणिजे सुहपसुत्ताए तिस-
लादेवीए पुव्वगम्भं देवाणंदाकुञ्छिमि संकामिऊण दिव्वसत्तीए सो पुव्वभणिओ हरिणेगेमेसिदेवो असुभपोगलाव-
णयणपुव्वयं जिणं कुञ्छीए मोत्तूण पणमिऊण य जहागयं पडिगओ, गम्भाणुभावेण य सा तिसलादेवी पच्छिमय-
णीसमयंमि चउद्दस सुमिणाणि पासइ, कहं चिय ?—

करडतडगलियमयसलिलगंधुद्धुरं, गुलुगुलंतं सुदंतं महासिंधुरं ।

वसहसुछासिसुइलंबपुच्छच्छडं, चारुसिं ग सुतुंगं रवेणुब्भडं ॥ १ ॥

धुसिणरसरागेकसरसडाडंबरं, केसरिं कंठरवभरियगयणंतरं ।

कुंभिकरकलियकलसेहि कयमज्जणं, लच्छिसुहामकामतिथयसासणं ॥ २ ॥

मालईमल्लिकाकमलरेहतयं, मालममिलाणमलिवलयलीढंतयं ।
किरणजालं सुयंतं ससिं सुंदरं, निहयतमपसरमइरुगयं दिणयरं ॥ ३ ॥
फालिहडंगलोलंतसियधयवडं, पुन्नकलसं च सुहकमलगंधुब्भडं ।
कुसुयकल्हाररम्मं महंतं सरं, बहुलकल्लोलमालाउरं सायरं ॥ ४ ॥
चिविवहमणिथंभसालं विमाणं वरं, कंतिकब्बुरियगयणं च स्यणुक्करं ।
धूमरहियं तहा हुयवहं सुमिणए, देवि वयणंमि पविसंतयं पेच्छए ॥ ५ ॥

पेच्छिऊण य इमे सुमिणे हरिसुद्धुसियरोमकूवा परमाणंदमुव्वहंती गया सिद्धत्थपत्थिवसमीवं, कहिओ चउइस-
महासुमिणोवलंभवइयरो, तेणावि नियमइविभवाणुसारेण संमं चित्तिऊण भणियं-सुंदरि ! सयलनरिंदसंदोहवदणिज्जो
निरुवक्कमविक्रमकंतसत्तुचक्को निप्पडिमयावपरिभूयरविमंडलो निरुवमसत्तो पुत्तो ते भविस्सइ, सायरं पडिच्छिऊण
य इमं अणाइक्खणिज्जभूरिहरिसपब्भारमंथरगइ गया नियभवणं, तहिं च देवगुरुसंबद्धाहिं मंगल्लाहिं असिबोवघाय-
दक्खाहिं सुहावहाहिं कहाहिं रयणिसेमइवाहिं पउत्तत्ति, राइणावि जाए पभायसमए समाहूया अट्टगनिमित्तस-
त्थपरमत्थविधवखणा नेमित्तिगा, आसणदाणपुव्वयं सक्कारिऊण पवरवत्थाइणा निवेइओ देवीदिट्ठचउइससुमिणवुत्ततो,
तओ ते सम्मं निच्छिऊण परोप्परं जहावट्ठियमत्यं भणिउमारद्धा-देव ! एयारिससुमिणाणुभावेण नूणमुण्यज्जिहो

धम्मवरचक्कवट्ठी तिहुयणपूयणिज्जपायवीढो नियकुलनहयलभियंको अणुवमचरिओ तित्थयरो तुम्ह पुत्तोत्ति, एवमाय-
 न्निऊण परमहरिसुव्वहतेण राइणा दवाविद्यं तेसिं आसत्तपुरिससंतइदालिद्विद्वक्करं मणोरहपहाइकंतं दविणजायं,
 विसज्जिया य नियनियठाणेसु, निवेइओ य एस वइयरो देवीए, जाओ य परमो पमोओ तीसे। एवं च पइदिणपुज्जं-
 तमणोरहाए जिणाणुभावेण दूरपलीणरोगाए सुरमणीसरिच्छवट्तं विलासाए वट्ठिउमारद्धो गब्भो, तयणुभावेण य
 एवं सा सोहिउं पउत्ता—

अंतरनिहित्तवररणसंचया फलिहमयधरित्तिव । संकतफारदिणनाहमंडला मेरुभित्तिव ॥ १ ॥

अंतद्वियमुत्ताहलरेहंतुदामजलहिचेलव । पढमुगमंतससहरपसाहिया गयणलच्छिव ॥ २ ॥

अंतोविफुरणसमुल्लसंतसोयामणीनिवहकिन्ना । उच्चमडवणंतघणपडलपुन्ननवपाउससिरिव ॥ ३ ॥

इय गब्भगयजिणिंदाणुभावसोहंतकतसंघगा । नवकप्पहुमलइयव्व मणहरा रेहए देवी ॥ ४ ॥

अद्विवसं च भययं भुवणमहासरेक्करायहंसो तिसलादेवीए उदरकमलमइगओ तद्विसाओवि सुरवइवयणेण तिरिसिद्धं-
 मगा देवा विविहाइं महानिहाणइं सिद्धत्थनरिंदभुवणंमि भुज्जो परिक्खिचंति, तं पि नायकुलं धणेणं धन्नेणं रत्तेणं
 रत्तेणं वलेणं वाहणेणं कोट्टागारेणं पीइसक्कारेणं वाढमभिवहइ, सिद्धत्थनराहिन्नस्सन्नि अचंतवाहुवलदपिणो तद्विनिर्द्धं-
 विसमपण्णु संठिया अपणयपुव्वावि वसमुवगया पचंतट्ठियावि नराहिवा । अन्नवासरे भगवओ अस्मापिऊणं सुभं

रूढो वियप्पो समुत्पण्णो, जहा-जप्पमिइ एस गम्भो संभूओ तप्पमिइ धणकणगाइज्जविभवेणं अम्हे वड्ढामो, ता जइया एस जाओ भविस्सइ तइया एयस्स इमं गुणनिप्फणं वड्ढमाणोत्ति नामधेयं वयं करिस्सामोत्ति, एवरूवाइ मणोरहसयाइ परिकप्पयंति ॥

अह भगवं भुवणपहू नाणत्तयपरिगओ महाभागो । करुणापरेक्कचित्तो समुहविरत्तो महासत्तो ॥ १ ॥
चलणप्फंदणरूवं संहरिउं सब्वमंगवावारं । सेलेसिपवन्नो इव अणुकंपट्टा सजजणीए ॥ २ ॥
तह कहवि वसइ गम्भे जह नियजजणीवि नो मुणइ सम्भं । तइलोकविम्हयकरो गरुयाणं कोऽवि वाचारो ॥ ३ ॥
नवरं तिसलदेवी तहट्टिए जिणवरे विचित्तेइ । किं गलिओ मम गम्भो ? उयाहु देवेहिं अवहरिओ ? ॥ ४ ॥
किं मज्जेवि विणट्टो ? किं वा केणावि थंभिओ होज्जा ? । अहवा निप्पुन्नाणं रयणं किं करयले वसइ ? ॥ ५ ॥
जइ सच्चं चिय विगओ एसो ता निच्छयं निए पाणे । नीसेसदुक्खलक्खेक्कभायणेऽविहु परिचयामि ॥ ६ ॥
अट्टज्झाणोवगया करयलपल्हत्थिएण वयणेण । अच्चंतदुक्खवसया दूरज्झियमंडणाभरणा ॥ ७ ॥
परिचत्तसमुल्लावा महियलक्खरुक्खचक्खुविक्खेवा । दीहुस्सासनिवारियमुहसोरभमिलियभसलकुला ॥ ८ ॥
इय भूरिसोगसंभाररलिया गलियकेसपासा य । हिययंतो रोवंती देवी जावऽच्छए ताव ॥ ९ ॥
सिद्धत्थारायभवर्णपि तक्खणं विमणदुम्मणं जायं । उयसंतमुंगरवं उवरयवरगीयनिग्घोसं ॥ १० ॥

अह भयवं एवंविहवइयरसुवलक्खिऊण नाणेण । अंगं अंगावयवं चालइ जणणीसुहट्टाए ॥ ११ ॥
 ताहे तुट्ठा देवी हरिसवसुल्लसिरलोयणकवोला । जायं झडत्ति भवणंपि राइणो पमुइयजणेहं ॥ १२ ॥
 तत्तो भयवं चितइ गम्भुभवमेत्तओऽवि कह जाओ । जणणीजणगणमहो पडिबंयो कोऽवि अइयरथो ? ॥ १३ ॥
 जं गम्भनिष्पकंपमेत्तेणवि एरिसा विसमरूवा । नियसंवेयणगम्मा एएसि दसा समावडिया ॥ १४ ॥
 जइ पुण जीवतेसुवि समणत्तणमहमहो पवज्जिस्सं । तो मम विरहेण धुवं एए जीयं चइस्संति ॥ १५ ॥
 इय चित्तिऊण भयवं संतोसंठं सज्जणिजणगणं । इयरजणाणवि एवं ठिइं व लट्ठं पइट्ठतो ॥ १६ ॥
 जीवतेसुं अम्मापिइसु नाहं मुणी भविस्सामि । इय गम्भजओऽवि जिणो पडिबजइ नियमभइयरुयं ॥ १७ ॥
 अह सा तिसलादेवी गम्भफुरणसंपत्तपरमपमोया पहाया नियंसियमहग्घचीणंसुया सरसंयदणकंयंराया आवि-
 द्धपररयणा तं गम्भं नाइउणेहिं नाइसीएहिं नाइतित्तेहिं नाइकडुएहिं नाइकसाएहिं नाइअंबिलेहिं नाइभइुरेहिं
 सबोउयसुहावहेहिं भोयणेहिं परिवालंयती पूरियडोहला निब्भया पसंता सुहेण भयणतलसमारूढा कयाइ पवर-
 नाड्यपेच्छणेण कयाइ पुराणपुरिसचरियायन्नणेण कयाइ विचित्तकोऊहलावलोयणेण कयाइ सहीजणपरिहासकर-
 णेण कयाइ उज्जाणविहारविणोएण कयाइ दुक्खियजणतवणिज्जपुंजविशरणेण कयाइ नयरसोहानिरिक्खणेण कयाइ
 बंधुज्जणसम्माणेणं कयाइ धम्मसंवद्धकहाविशारेण दिणाइं गमेइत्ति ।

अन्नया य निष्फणसस्सोवसोहि ए पणट्टरोगमारिपमुहाणिट्ठे जणवए नियनियधम्मकरणुजएसु समणलोएसु
उवसंतपयंहुड्डमरेसु परोणरं नराहिदेसु पसुकुचाडभडचोरभयासु विलसंतीसु पयासु रेणुपडलविगमरमणिजासु
जणमणाणंददाइणीसु सयलदिसासु उज्जाणतरुकुसुमसंबंधगंधुड्डरेसु पयाहिणावत्तपरिभयणरमणिजेसु मंदं मंदं वायतेसु
समीरणेसु परमविजयसाहगेसु सबसउणेसु गंभीरघोसासु सयं चियवजंतीसु विजयंहुड्डीसु चेत्तसुद्धतेरसीए सुरभव-
चवणकालाओ आरब्भ नवणं मासाणं अट्टमाणा य राइंदियाणं विइक्कताणं उच्चट्टाणं गएसु महागहेसु अट्टरत्त-
समए हत्थुत्तराजोगमुवागए चंदे तिसलदेवी पुव्वदिसिक्ख पयासियसयलजीवलोयं भयवत्तं दिणयरं व भवियजणरहं-
गमिहुणकयपरमसंतोसं पसूयत्ति ।

तयणंतरं च पवरपंचवणरयणविणिम्भयविविहविमाणमारुढेहिं पहयपडुपडहपमुहजयतूरहिं उल्लुट्ठिसीहना-
यकलयलमुहलेहिं पवराभरणमणिविच्छुरियगयणंगणेहिं पहरिससमुल्लसंतसरीरेहिं अणेगेहिं देवेहिं देवीहिं य इतेहिं
पडिनियत्तमाणेहिं य देवलोयपुरिपिव रमणिज्जं अमंदाणंदसंदोहजणंगं च कुंडग्गामनयरं जायंति । सिद्धत्थरायभवणे
य वेसमणवयणाणुवत्तिणो जंभगा सुरा रयणकणगवत्थाहरणवासं वरिसंति, पत्तपुण्णफलंगंधचुण्णवासं च सुयंति ।

अह जाए सुइक्कम्मपत्थावे अहोलोगवत्थवा चउसामाणियसहस्सपरिवुडा सत्तहिं अणिएहिं सत्तहिं अणियाहिं-
वईहिं परियारिया-भोगंकरा भोगवई, सुभोगा भोगमालिणी । तोयधारा विचित्ता य, पुण्णमाला अणिंदिया ॥ १ ॥

एआओ अट्ट दिसाकुमारीओ जिणाणुभावचलियासणाओ ओहिन्नाणेण जिणजम्मवइयरं नाऊण दिव्विमाणाऱू-
दाओ सव्विह्दीए जिणजणिसमीवमागच्छति, तिपयाहिणीकाऊण य जिणमायरं पराए भत्तीए थुणंति, कइं चिय ?-

तुम्ह महायसि ! रामाजणेक्कसिरयणविब्भमे नमिमो । पयकमलं निम्मलकोमलगुलीपवरदलकलियं ॥ १ ॥

इत्थीणं मज्झे चंगिमाए लद्धा तए पढमेरहा । तुमए चिय निम्माहिओ महिलालुहुयत्तणकलंको ॥ २ ॥

पुत्तवईणं मज्झे तुमए चिय पाविद्यं विज्जयपत्तं । मिच्छत्तं धजणस्सालंबणहेऊ तुमं जाया ॥ ३ ॥

सरयनिसाथरकरनियरहारगोरो जसो तुमाहितो । आसंसारं परिभमउ निब्भरं दससुवि दिसासु ॥ ४ ॥

मूढोचिय सुयपसवे परमाणंदं जणो समुव्वहइ । तुज्झ सरित्था धूयावि पुत्तकोडिपि परिभवइ ॥ ५ ॥

तिहुयणपणमियचलणो जीए कुच्छिमि बाढसुव्वूढो । कलणाइक्कंतबलो चरिमजिणिंदो जयाणंदो ॥ ६ ॥

इय सुइरं जिणजणिं पणमिय परमायेण जंपंति । देवि ! नहु भाइयव्वं अम्हे जं दिसिकुमारीओ ॥ ७ ॥

परमेसरस्स भुवणेक्कचकुणो जिणवरस्स एयस्स । निययहिगारऽणुरूवं जम्मणमहिमं करिस्सामो ॥ ८ ॥

एवं भणिऊण तित्थयरजम्मणभन्नस्स समंतओ जोयणपरिमंडलं भूभागं ववगयतणकट्टपत्तकयवरं दुस्ससारिया-
सुइदुरभिगंधयोगलं तवखणं विउव्विएणं मणहरेणं सव्वोलयकुसुमंगंधाणुवासिएणं संवट्टगपवणेणं काऊण भगवओ
तित्थयरस्स तिसलादेवीए य अदूरे गायंतीओ चिट्ठति ।

एवं चिय चलियासनपउत्तदिद्वोहिसुणियपरमत्था । उट्टुदिसावासाओ देवीओ इमा तओ इति ॥ १ ॥
मेहंकरा मेहवई, सुमेहा मेहमालिणी । सुवच्छा वच्छमिता य, वारिसेणा बलाहगा ॥ २ ॥
तो निहयरयं वेउविण्ण मेहेण सहियलं काउं । गंधधलुद्धुलंधाउलं पुण्णवरिसं च ॥ ३ ॥
जिणवरगुणगणमइकोमलेण सुइसोवखकरणदक्खेण । अइदूरंमि ठियाओ गायंति सेरेण मडुरेण ॥ ४ ॥
अह पोरत्थिमरुयगट्ठिइओ अट्टवि दिसाकुमारीओ । बहुपरियणपरियरियाओ एयओ आगया झत्ति ॥ ५ ॥
नंदुत्तरा य नंदा, आणंदा नंदिवद्धणा । विजया य वेजयंती, जयंती अपराजिया ॥ ६ ॥
रविमंडलसारिच्छं हत्थे धरिऊण दप्पणं ताहे । पुव्वदिसिमि ठियाओ किञ्चित्ति गुणे जिणवरस्स ॥ ७ ॥
अह दाहिणरुयगनिवासिणीओ अट्टवि दिसाकुमारीओ । नायजिणजम्मणाओ इति विभाणेहिं एयओ ॥ ८ ॥
समाहारा पइन्ना य, पुण्णबुद्धा जसोहरा । लच्छिमई सेसवई, चित्तगुत्ता वसुंधरा ॥ ९ ॥
करपल्लवेण कलि(गहि)उं भिगारं सुराहिवारिणिपुन्नं । दक्खिणपासे पडुणो गुणथवणपरा परिसंसति ॥ १० ॥
अह पच्छिमरुयगगया अट्टव पुणो दिसाकुमारीओ । भत्तिभरनिब्भराओ इमाओ पविसंसति जिणगेहे ॥ ११ ॥
इलादेवी सुरादेवी, पुहवी पउमावई । एगनासा नवमिया, भदा सीया य अट्टमी ॥ १२ ॥
करकलियतालियंटा विसट्टकंदोददहरच्छीओ । पच्छिमदिसिम्मि ठाउं थुणंति जिणनाहुगुणनिवहं ॥ १३ ॥

अह उत्तरिछरुयगाभिहाणगिरिवासिणीओ अद्वेव । आगच्छति इमाओ देवीओ दिसाकुमारीओ ॥ १३ ॥
 अलंबुसा मिससेसी, पुंडरीकी य वारुणी । हासा सवप्पभा चेव, हिरिदेवी सिरी तहा ॥ १५ ॥
 वेदिता जिणजणीं घेचुं सियचामरं करगेण । उत्तरदिसिम्मि गुरुणो पुव्वकमेणं परिवसंति ॥ १६ ॥
 अह विदिसिरुयगपव्वयवत्थवा चउ दिसाकुमारीओ । चित्ता य चित्तकणगा सतेय सोयामणीनाम ॥ १७ ॥
 नमिउं तिसलादेवीं जिणं च विदिसासु चउसुवि निलीणा । सुंदरपईवहत्था जिणगुणनिवहं पगायंति ॥ १८ ॥
 मज्झिमरुयगट्ठिओ पुणोवि चत्तारि दिसिकुमारीओ । देवी रुया रुयंसा सुरुया रुयगावई नामा ॥ १९ ॥
 आंगतूणं पुव्वकमेण नाभिं जिणस्स कप्पेति । चउरंगुलपरिवज्जं ताहे वियरं परिखणिंति ॥ २० ॥
 तं नाभिनालमह तत्थ ठाविउं पंचवणरयणेहिं । पूरिंति तं समगं तदुवरि पीढं च वंधंति ॥ २१ ॥
 पीढस्सोवरि हरियालिगं च वियरंति नीलमणिम्मं । लोयणआणंदयरिं दिवाए देवसत्तीए ॥ २२ ॥
 तयणंतरं तिन्नि कयलीहरां विउव्वंति, तेसिं च मज्झभागे पवरपंचप्पयारमणिविणिम्मियकोट्टिमतलां विच्छि-
 त्तिचित्तरंगावलीमणहरां दुवारदेसठवियपुणकणयकलसां दिव्वरुवरेहतसालभंजियाभिरामां दाहिणपुव्वुत्तरदिसासु
 तिणिण चउसालभवणां विसालां विरयंति, तेसिं च मज्झभागे महग्घमणिलंडमंडियां नियकिरणजालुत्तिय-
 सुरिंदकोदंडां कणगसेलसिलाविच्छिन्नां तिणिण सीहासणां ठवेंति, तओ तित्थयरं करयलपुडेणं तित्थयरज-

णार्णिं च बाहाहिं घेत्तूण परमाथरेण दाहिणदिसिचाउसालसीहासणे निसियावेति, तओ सयपागसहस्सपागतल्लोहिं पहाणंगंधुदुरोहिं तेसिं सरीरमब्भंगिति, गंधुवट्टणेणं उव्वट्टेति, तओ पुव्वट्टिइए जिणं जणार्णिं च पुव्वदिसिचाउसाल-सिंहासणंमि आरोविऊण गंधोदएण पुण्णोदएण सुद्धोदएण मज्जिऊण पवरमणिरयणाभरणसंभारेण विभूसियसरीराइ काऊण परमाथरेण पुव्वविहीए उत्तरदिसिचाउसालसिंहासणे निवेसिंति, नवरं नित्थकिंकोरहिं चोल्लहिमवंताओ गोसीसचंदणदारुणाणि आणाविऊण अरणिनिम्महणुट्टिएण जलणेण संतिनिमित्तं होमं च करोति, नियपभावपरि-विखयस्सवि भगवओ जीयंतिकाऊण रक्खापोट्टलियं वंधिऊण रयणपाहाणगे सवणमूले ताडिति, एवं भणंति य-

सत्तकुलपव्वयाऊ अप्पडिहयसासणो हवसु देव ! । गयरोगसोगदुक्खो पणइयणपूरियासो य ॥ १ ॥

इय भणिऊण पहिट्ठा जम्मणगेहे ठवित्तु जिणजणार्णिं । गायंति जिणिंदगुणे तिसलापासे समल्लीणा ॥ २ ॥

इय जम्मस्स य कायव्वित्थरो तित्थनाहभत्तीए । वेगेण समत्थिज्जइ छप्पन्नदिसाकुमारीहिं ॥ ३ ॥

एत्थंतरे सोहम्मकप्पाहिवइस्स सक्कस्स सीहासणं चलइ, तच्चलणेण ओहिनाणेण भगवओ तित्थयस्स जम्मं मुणिऊण संसंभमं सक्को सीहासणाओ उट्टइ, सत्तट्ठपाणुगमणपुव्वयं परमाए भत्तीए तत्थट्ठिओऽवि जिणं शुणिऊण पाइत्ताणी-याहिवइं हरिणेगेमेसिं देवं आणवेइ-अहो भइ ! गच्छसु सोहम्माए सभाए मेधोवघोरघोसं जोयणपरिमंडलं सुवो-सधं तिक्खुत्तो ताडित्तो महया सदेणं एवमुगघोसेहि-सक्को जंबुदीवभारहखेत्तसमुब्भवस्स जिणस्स जम्मणमहिंम

काळं पट्टिओ, ता भो देवा ! तुब्भे सव्वबलेणं सव्वविभूहं सव्वनाडएहिं सव्वालंकारविभूसाए दिवच्छरागणेणं परिवुडा पवरविमाणां आरूढा मम सयासं पाउब्भवहत्ति, एवं भणिए हरिणेमेसी देवे देवरणो वयणं विणएण पडिसुणिता तुरियगई सोहम्मसभाए गंतूण सुधोसं घंटं तिकखुत्तो ताडेइ, तीसे य पयंडनिग्घोसवसुच्छलंतपडिसइयपडिफलणवसेण अन्नाइ एगूणाइ बत्तीसं घंटासयसहस्साइं समकालं रणज्झणारवं काउमारद्दाइं, एवं च दिसि दिसि समुब्भवंतपडिनिग्घोसवहिरियदियंतरो सोहमकण्णो समुण्णन्नोत्ति । एत्थंतरे—

पंचविहविसयसेवापमत्तचित्ता समंतओ देवा । तं एगकालवज्जिरघंटागणगुरुसरं सोउं ॥ १ ॥
चिंतंति सव्वओ किंचि (च) कुट्टवंभंडरवसमो घोरो । फालिहविमाणमालापडिफलणचउग्गुणीभूओ ? ॥ २ ॥

आपूर्तिओ दिसावगासमखिलं चराचरं लोगं । सद्देगसरूवंपिव कुणमाणो निययमहिमाए ॥ ३ ॥
संखुद्धमुद्धतियसंगणाहिं भयवेगतरेलियच्छीहिं । हा नाह ! रक्ख रक्खत्ति जंपिरीहिं सुणिज्जंतो ॥ ४ ॥

दणुवइरणसुमरणतुट्ठतियसंवठोहकंठरवभीमो । अणिवारियं वियंभइ जघघंटारणणारावो ॥ ५ ॥

इय चिंतावससिद्धिलियदइयादढकंठबाहुपासंमि । सव्वत्तो सुरनिवहे जायम्मि विमूढहिययंमि ॥ ६ ॥

खणमेत्तस्सउवसाणे समत्थघंटाखंमि उवसंते । हरिणेमेसिदेवो भणइ सुरे अवहिए जाए ॥ ७ ॥

भो भो तियसा ! सक्को तुब्भे आणवइ जह लहुं एह । जेण जिणजम्ममज्जनमहूसवो कीरए इण्हि ॥ ८ ॥

इय आणत्तियमायन्निज्जण परिसुक्कसेसावावारा । मुणियजिणनाहमज्जणमहूसवा हरिसिया तियसा ॥ ९ ॥
तो मज्जणपोक्खरिणीए जंति, बहुविहज्जेण मज्जणु करंति । कप्पूरामिस्सचंदणरसेण, आलिपहि देहु सुबंधुरेण ॥ १ ॥
अइकोमलनिम्मलदूसुअल, परिहंति वियंभियकंतिपडल । अह कंठपइट्ठियलुहार, दूकल्लियकासुयजणवियार ॥ २ ॥
अइसुरहिक्कुसुमनिम्मविदास, नवपारियायमंजरिसणाम । बंधंति सुगंधसमिद्ध सीसि, तक्खणकयकुचिरचारुकेसि ॥ ३ ॥

मणिमउडकिरणविच्छुरियगयण, नियरूवमडण्फरहसियमयण ।

वरकडयतुडियभूसियसरीर, तणुकंतिपसरपरिभूयसूर ॥ ४ ॥

किवि मगरमरालयसन्निस्सन्न, किवि हरिणवसहसिहिण्वन्न ।

आरुहवि केवि कुंजरि महंति, केवि तुंगतुरए वेगे वयंति ॥ ५ ॥

चीणंसुयचिंधसहस्सरम्म, अवलोयणिमेत्तह दिन्नसम्म ।

आरुहवि चालिय किवि वरविमाणि, किंकिणिरवमुहरि महण्यमाणि ॥ ६ ॥

सहुलसरहरिपट्ठि चडिय, किवि पट्ठियवेगेऽन्नोन्न घडिय ।

इय सुरसमूहह सध्वे बलेण, सुरवइ समीवमाणय जवेण ॥ ७ ॥

एत्थंतरे खंसहस्ससंनिविट्ठं फालिहमणिघडियसालभंजियाभिरामदारदेसं अणेगलंबंतमुत्ताहलमालं पवरयइरवे-

इगापरिक्खित्तेपरंतविभाणं रणंतघंटावलीमहुरसरसुहयं पवणकंपमाणनिबिडजयपडागापयडं सिंहं व तिरियलो-
यमहामंदिरस्स फलं व पुव्वकयपुन्नमहापायवस्स तिहुयणसारपरमाणुविणिम्मियं व सयलविभूइविच्छहाखंडमंडा-
गारं सोलसभेयरणरासिघडियं व सुरवइवयणसंभंतपालकामरविउवियं जोयणसयसहस्सविच्छिण्णं पंचजोयण-
सयसमुवेहं वरविमाणमारूढो अणेगदेवदेविकोडिपरिबुडो पत्थिओ पुरंदरो, तओ पवणविजइणीए गईए तिरियम-
संखेज्जाणं दीवसमुद्दाणं मज्झमज्झेणं नंदीसराभिहाणदीवस्स दाहिणपुरत्थिमिल्ले रइकरपव्वए आगंतूण तं दिव्वं
देविहिं विमाणवित्थारं व पडिसंहरिऊण जेणेव जंबुदीवो जेणेव दाहिणडूरं जेणेव जम्मणभवणं तेणेव
उवागच्छइ, तयणंतरं च तेण दिव्वेण विमाणेण तिक्खुत्तो आयाहिणपयाहिणं भगवओ जम्मणभवणस्स काऊण विभाणं
उत्तरपुरच्छिमे दिसिभागे ठवेइ, तओ अट्टहिं अगमहिसीहिं चुलसीइए सामाणियसाहस्सीहिं समेओ जत्थ भयव
तित्थयरो तित्थयरजणणी य ताहिं आलोएइ, पणामं कोरमाणो पविसइ, सामिं समायरं तिपयाहिणपुव्वयं इंदइ,
वंदिता सविसेसं तिसलादेविं थुणइ, कइं?—

जयसि तुमं देवि ! सगेत्तगयणपडिपुन्नचंदनवजुण्हे ! । सुविमुद्धसीलसालीणयाइ गुणरयणवरधरणि ! ॥ १ ॥
तिहुयणचिंतामणिकुच्छिधारिण ! तं धुवं जगे धन्ना । तुज्झं चिय सुहफलओ पसंसणिज्जो मणुयजम्मो ॥ २ ॥
एत्तियमेत्तेणं चिय तुमए उल्लंघिउव भवजलही । परमासीसट्ठाणं जायासि मुणीसराणंपि ॥ ३ ॥

एवं च शुण्णिऊण ओसोयणिदाणपुव्वगं तक्खणविउव्वियजिणपडिरूवं च ठविऊण तिसलादेवीसमीवे सयं पंच सरारे विउव्वह, तओ एगेण परमसुइभूओ सरससुरभिगोसी सचंदणपकपंडुरोयेर करकमले कयण्णामो सबहुमाणं तित्थयरं संठवेइ, एगेण य तस्सेव य पिट्ठिदेसट्ठिओ हरट्ठहासकुसुमप्पगासं चामीयरचारुदंडं पुंडरीयं धेरइ, दोहि य रूवेहिं भगवओ उभयपासेसु सुरसरिवारिप्पवाहविब्भमे चामरे मंदं मंदं चालेइ, एगेण पुरओ ठिओ धारासहस्सभीसणं समुच्छलंतकिरणपडलं सरयसूरमंडलं व दिसिवलयमुज्जोवितं पयंडपडिवक्खविकखेवदारुणं कुलिसमुव्वहइ । एवं च पंचरूवेहिं समायरियनियनियकायवो अणेणदेवदेवीहिं परियरिओ-

संपत्तपावणिज्जं समत्थतित्थोहदंसणपविच्चं । अप्पाणं मन्नतो हरिसेणगे अमायतो ॥ १ ॥

मंदरसेलाभिमुहं कंठपलंबंतरयणवणमालो । पयलंतदिक्खकुंडजुयलो आखडलो चलिओ ॥ २ ॥

सिग्घाए दिव्वाए देवगईए कमेण गच्छतो । जोयणलक्खुच्चत्तं संपत्तो मंदरगिरिंदं ॥ ३ ॥

जस्सावट्ठियरूवा पडिर्विवियसिहरकाणणाभोगा । विमलपरिमंडला दप्पणव्व रेहति ससिसूरा ॥ ४ ॥

जस्स रमणीययारंजियाइं गंधव्वेवमिहुणाइं । उज्झियनियठाणाइं सिहरेसु सुहं परियसंति ॥ ५ ॥

नाणाविहफलभरंभंगुरगगसाहाइं जत्थ रेहति । सबोउयकुसुमसमिद्धिसुदराइं तरुवणाइं ॥ ६ ॥

किविणो व कणगपरिहाणिवज्जिओ सज्जणोव्व अइतुंगो । सुमुणिव्व एगरूवो जो निच्चं सिद्धिखेत्तं व ॥ ७ ॥

एगत्थुन्नयनवमेघज्जिपरिटुट्ठनीलकंठो जो । अन्नत्थ किन्नरारद्धगेयसुइनिच्चलकुरंगो ॥ ८ ॥
 एगत्तो मरगयनिस्समंतकिरणोलिसामलियगयणो । अन्नत्तो रवितावियफलिहोवलगलियजलणकणो ॥ ९ ॥
 तत्थ एवंविहे मंदरगिरिंमि नीहारगोक्खीरहारुज्जलाए अइपंडुकंबलसिलाए विचित्तरयणप्पभापडलपक्खा-
 लियंमि अभिसेयसिंहासणे पुद्वाभिमुहो सुरिंदो उच्छंगनिवेसियजिणो उवविसइ, एत्थंतरे जिणपुन्नमाहप्पचलियासणा
 ओहिनाणविन्नायजहट्ठियपरमट्ठा नियनियसेणाहिचइताडियधंटाखपडिबोहियसुरयपमत्ततियसगणा तक्कालविउच्चि-
 यपवरविमाणारूढा सच्चांलंकारेहंतसरीरा ईसाणप्पमुहा चंदसूरपज्जंता एगत्तीसंपि समागया सुरिंदा, कयपणामा
 य ट्टिया सट्ठाणेसु, एत्थ य पत्थावे अच्चयतियसाहिवेण भणिया नियदेवा-अहो सिग्घमुवणमेह महरिहं पसत्थं
 तित्थयरामिसेयं, तओ ते पहिट्टुचित्ता अट्टोत्तरसहस्सं सुवन्नकलसाण अट्टोत्तरसहस्सं कलहोयमयाणं एवं मणिमयाणं
 सुवन्नरूपमयाणं रूपमणिमयाणं सुवन्नरूपमणिमयाणं भोमेयगाणं अट्टसहस्सं रयणकलसाणं, एवं भिंगाराणं
 पत्तेयं पत्तेयमट्टसहस्सं विउवित्ता गया खीरोयसमुहं भरिया खीरसलिलेण सयलकलसा, गहियाइं उप्पलकुसुयसय-
 पत्तसहस्सपत्ताइं,

एवं पसत्थतित्थाण मागहाईण वरनईणं च । सलिलं महोसहीओ सुकुमारा मद्विया जा य ॥ १ ॥
 वक्खारसेल्लुकुलपद्मएसु सोमणसनंदणवणेसु । अंतरनइहरएसु य जाणि य कुसुमोसहिफलाइं ॥ २ ॥

आदाय तां खीरोयसलिलपाडिपुन्नपुन्नकलसा य । अच्युयसुराहिवङ्गो विणयप्पणया समप्पेति ॥ ३ ॥
अह सो अच्युदेविंदो ददूण अभिसयसमगसागग्गिं जायहरिसो सिग्घमासणाओ उट्टित्ता दसाहिं सामाणिय-
सहस्सेहिं तायत्तीसाए तायत्तीसेहिं चउहिं लोगपालेहिं तिहिं परिसाहिं सत्तहिं अणिएहिं सत्तहिं अणियावईहिं
चचालीसाए आयरक्खदेवसहस्सेहिं संपरिबुडो तेहिं विमलतित्थुत्थखीनीरपरिपुन्नेहिं विमलकमलपिहाणेहिं
गोसीसचंदणपमुहपहाणवत्थुगम्भिणेहिं सव्वोसहीरससणाहेहिं बहुसहस्ससंखेहिं महप्पमाणेहिं कलसेहिं विउब्बि-
एहिं साभाविएहि य परेणं पमोएणं भगवओ भुवणिक्कबंधवस्स चरमतित्थयरस्स जंमज्जणमहूसवं काउं समुवट्ठि-
ओत्ति । एत्थंतरे चित्तिं सुरिंदण, जहा—

लहुयसरीरत्तणओ कहेस तित्थेसरो जलुप्पीलं । सहिही सुरसत्थेणं समकालमहो खिविज्जंतं ? ॥ १ ॥

एत्तिचकुंभजलुप्पीलपेल्लिओ गरुयगंडसेलोऽवि । पल्लत्थिज्जइ नूणं किमेत्थ जुत्तं न याणेसो ? ॥ २ ॥

इय एवं कयसंकं सक्कं ओहीएँ जिणवरो नाउं । चालइ मेरुं चलणंगुलीए बलदंसणह्माए ॥ ३ ॥

तच्चालणे य—चंगतुंगिमरुद्धगयणगरिकंपिय, सिहरसयकडयंडंततडविउविहडिय ।

टलटलियटोलोवलविच्छिन्नटंकदोत्तडविनिवडिय ॥ १ ॥

कंदरगयकेसरिविहियगलगज्जियरवमीम । पविर्गंभियचाउहिसिहिं पडिसइय निस्सीम ॥ २ ॥

तथा-चलिरमंदरभारसभगसिरनमिरभुयगाहिवह दूरमुक्क दुद्धरु धरायलु, विडुलंतकुलसेलगणु तुद्वबधु डोलिओ विसंगुलु।
उस्सिखलभयभरविहुर उद्धयसुंडादंड अनिवारण दिसिवारणवि गमणि पयट्ट पयंड ॥ ४ ॥

खुभिद्यदारुणमच्छकच्छवयपुच्छच्छडाडणेण उच्छलंतकछोल-संकुलगयंगणविगयसिहमुक्कमेरवियरंतमहिजल ।
अइवेगप्पवणप्पहय हल्लियसयलसमुद्द । नज्जइ जगबोलण भणिय चाउदिसिहिं रउडु ॥ ५ ॥

सूरससहरताराणांपि विवरंसुहपट्टियहं तक्खणेण सव्वइं विमाणहं, भयभीएण सुरगणेण अइजवेण उज्झियसगणहं ।
विमणंमणुसुरवहुनिवहु जाउ विसंतुलचेट्टु, मरणासंकिउ खयरजणु गिरिकंदरिहिं पइट्टु ॥ ६ ॥

एवं वियंभमाणे तिहुयणसंखोहे पंचनमोक्कारसुमरणपरायणे चारणमुणिगणे विविहाउहनियहमणुसरंते अंगरक्ख-
सुरसमूहे पयंडकोवुडुमभीमो घडियनिडालभिउडिमासुरो करकलियकुलिसो सुराहिवो भणिउमाढत्तो-अहो सो
एस सेंटिकम्मसमारंभेऽवि वेयालसमुल्लासो भोयणपढमकवलकवलणेऽवि मच्छियासन्निवाओ पुत्तिमाचंदपढमुग्गमेवि
दाढाकडप्पदुप्पिच्छो विडप्पागमो जं सयलमंगलालयस्स अणप्पमाहप्पवलणिहाणस्स तित्थेसरस्सवि जम्मणमहूरव-
समए एरिसो विग्घो समुवट्ठिओ, केण पुण अकालकुवियकयंतसंगमूएण देवेण दाणवेण य जक्खेण रक्खसेण
नियभुयसामत्थवित्थारदंसणट्ठयाए वा जिणमहिमावलोयणमच्छरेण वा भुवणसंखोहदंसणकोऊहलेण वा कओ हवेज्जत्ति
ज्जायसंसओ ओहिन्नाणं पउजइ । तओ दिव्वनाणमुणियजिणचलणचंपणुक्कपियमेरुवइयरो तक्खणसंहारियकोलुगमो

निन्दियनियकुवियप्पो खासिऊण बहुप्पयारं भगवंतं जिणेसरं पाणिपरिगहियकलसे तियसे भणिउमाढत्तो-
भो भो विबुहा!—

जह सिरिरिसहजिणिदो ण्हविओ पुच्चिं इहेव तियसेहिं । तह चरिमत्तियनाहं पि न्हवह भोत्तूण कुवियण्यं ॥ १ ॥

एगसरूवबलच्चिय निब्भंतं जेण सव्वजिणनाहा । तणुगुरुलहुयत्तं पुण न कारणं वीरिउल्लासे ॥ २ ॥

एवं च सुरवइवयणाणंतरमेव समकालं निवडियं सयलकलसेहिंतो सारयससिमऊजालं व गयणसुरसरिजलपडलं
व तुसारहारधवलं जिणोवरि खीरोयहिजलं, एवं च पवट्टे जिणाभिसेगे—

दुंदुहीपडहं भंभाहुक्काउलं, वेणुवीणारवुम्मिस्सहयमदलं । झल्लरीकरडकंसालरवबंधुरं, घोरांभीरंभीरीनिनायुद्धुरं ॥ १ ॥

काहलारावसंबद्धखरमुहिसरं पूरियांसखसरवुत्तथरवनिब्भरं ।

पलयकाले व गज्जंतघणवंदयं, ताडियं सुरेहिं चाउविहाउज्जयं ॥ २ ॥

हरिसभरनिब्भरुब्भिन्नरोमंचया, केवि संथुणाहिं जिणु तियस नंचत्तया ।

अवरि वरसुराहिं मंदारकुसुमुक्करं, सुयहिं गंधवमसलावलीकब्बुरं ॥ ३ ॥

केवि फोडित्ति मल्लव तिवइ सुरा, सिंहनायं च मुंचंति हरिसुद्धुरा ।

कुणाहिं गलगज्जियं अवरि हयहेसियं, केवि य किर रासयं दित्ति करणंचियं ॥ ४ ॥

अन्नि हरिसेण विरइति गलदहरं, केवि सुट्टीहिं ताडिंति विस्संभरं ।
 केइ कलसे य खीरोयजलपूरिए, तक्खणं निंति तियसाण हत्थंतिए ॥ ५ ॥

इय जहिं सुरसंघेण निहणियविग्घेण वट्टिज्जइ सद्वायेरेण ।
 ताहिं जिणवरमज्जणि भवभयतज्जणि किं वन्निज्जइ मारिसिण ? ॥ ६ ॥

जिणाभिसेगे य वट्टमाणे सबे सुरिंदा छत्तचामरधूयकडुच्छूयपुष्पगंधहत्था पुरओ पमोयपुलइयंगा आणंदवियसि-
 यच्छा ठिया । अह अञ्जुयसुरेसरे जिणं ण्हविऊण विरए पाणयाइणो देविंदा नियनियपरिवारपरियरिया महाविभ-
 वेणं सोहम्माहिवइं मोत्तूण तीसंणि कमेण जिणं अभिसिंचंति । तयणंतरं च ईसाणिंदो भयवंतं उच्छंगे धरितो सिंहा-
 सणे निसीयइ, सोहम्माहिवइवि चउदिसिं तित्थयरस्स चत्तारि धवलवसहे संखदलुज्जले रमणिज्जसरीरे विउवइ,
 तेसिं च अट्टसिं गगेहिंतो अट्टखीरोयसलिलधाराओ उट्ठुं गयणंगणगामिणीओ पुणो अहोनिवडणेण एगीभूयाओ
 काऊण जिणुत्तमंगे संठवेइ, अन्नेहि य बहुएहिं खीरोयकलसहस्सेहिं अभिसिंचइ, एवं कमेण निवत्तिए मज्जण महुं-
 सबे परमपमोयभरपुलइयंगो सोहम्मसुरनाहो सुकुमालंगधकासाईए जिणदेहं लूहिऊण गोसीसचंदणुम्मीसधुसिणेणं
 अंगमालिंपइ, सियसुरभिंकुसुमेहिं पूयावित्थरं विरएइ, सवालंकारविभूसियं च करेइ, पुरओ य ससिकलाधवल्लहिं
 अक्खेहिं दप्पणभद्दासणवट्टमाणकलसमच्छसिरिवच्छसत्थियनंदावत्तलक्खणे अट्टमंगलके समालिहइ, बउलतिलयकण-

वीरकुंदमल्लियासोयचूयमंजरिपारियायपमुहं पंचवणकुसुमनियरमाजणुमेत्तं मुयइ, नाणाविहमणिभत्तिविचित्तदंडेण
वइरामयकुहुच्छुएणं पवरगंधाभिरामं धूवमुत्तिवइ, पज्जलंतदीविथाचक्कवालमणहरं आरत्तियमंगलपईवं च समुत्तरेइ,
एवं च कयंमि सवकायधे हरिसुक्करिसनभिरसिरनिवडियकुसुमच्चियमहीयलं कोमलमुयमुणालअंदोलणमणिकंकणरवा-
उलं उब्भडकरणेगरेस्सोलिसुत्तावलिकलावयं तयणु सुरासुरोहं सद्वायेरेण जिणपुरओ पणच्चियं, नच्चिऊण भत्तिभर-
निब्भरा भयवंतं थोउं एवमारद्धा—

जय भुवणत्तयवांदिय ! लीलाचलणमगघालियगिरिंद ! भवकूवमज्झनिवडंतजंतुनिथारणसमत्थ ॥ १ ॥

परमेसर सरणागयपरूढदढवज्जपंजर जिणिंद । वम्महकुरंगकेसरि मच्छरतमपसरदिवसयर ! ॥ २ ॥

सच्चं चिय सिद्धत्थो कहं न सामिय ! जहत्थनामत्थो ? । चिंतामणिसारिच्छो जस्स सुओ तं विसालच्छो ॥ ३ ॥

अच्चंतमविरइपरायणं पि अइपुन्रवंतमप्पाणं । मण्णेमो जिण ! जं तुज्झ मज्जणे एवमुवयरिया ॥ ४ ॥

भइं भारहखेत्तस्स नाह ! तं जत्थ पाविओ जम्मं । धरणीवि वंदणिज्जा जा वहिही तुज्झ कमकमलं ॥ ५ ॥

जइ तुह पयसेवाए जिणिंद ! फलमत्थि ता सया कालं । एवंविहपरममहं अहं पेच्छता होमो ॥ ६ ॥

इय चउविहदेवनिकायसामिणो जिणवरं थुणेऊण नियनियठाणेसु गया मोचुं सोहम्मसुरनाहं, गए य सट्ठाणं
देविंद सोहम्माहिवइं कयसव्वकायव्वो जिणिंद करसंपुडेण गहिऊण अणेगदेवकोडाकोडिपरिखुडो गंतूण जिण-

जम्मघरंमि पडिरूवं ओसोवणिं च अवणिता तिसलादेविसमीवे निसियावेइ, एगं च पवरं देवदूसजुयलं कुंडलजुयलं च
 ऊसीसगमूलंमि ठवेइ, एगं च पंचवन्नियरणविच्छित्तमणहरं जच्चकंचणविणिम्मियं लंबंतमुत्ताहलावचूलं लंबूसयं
 भगवओ अभिरमणनिमित्तं अवलोयंमि ओलंबेइ, जं अवलोयंतो जिणो सुहेण चक्खुक्खेवं करेइ, तओ सक्को वेसमणं
 आणवेइ-जहा भो ! सिग्घमेव वत्तीसं हिरन्नकोडीओ वत्तीसं पुवन्नकोडीओ वत्तीसं नंदाइ वत्तीसं भदाइ अन्नाणि य
 विसिट्ठवत्थूणि भगवओ जम्मणभवणे उवणमेहि, सोऽवि जंभगदेवेहिं सव्वं तहत्ति निव्वत्तेइ, पुणरविदेविंदो निय-
 तियसेहिंतो सव्वत्थ एवं उग्घोसावेइ-भो भो भवणवइवाणमंतरजोइसियेवमाणिया देवा देवीओ य ! सुणंतु
 भवंतो-जो किर तित्थयरस्स तित्थयरजणणीए वा असिवमणिट्ठं काउं संपहारेही तस्स अवस्सं अज्जगंजरिब्ब
 उत्तिमंगं सहस्सहा तडित्ति फुट्ठिहित्ति, एवं च सव्वं काऊण विहिं भगवंतं पणमिऊण उप्पइओ नीलुण्णलसामल
 गयणं पुरंदरो ॥

अह उग्गयंमि दिणयरे पगासीभूयासु सयलदितासु वज्जिएसु गंभीरघोसेसु जयतूरेसु सुहपडिबुद्धा तिसला
 पेच्छइ सव्वालंकारविभूसियं पवरसुरहिपरियायमंजरीपरिमलमिलंतालिवलयसामलियसरीरं सुरहिगोसीसचंदणरस-
 कयंगरागं जिणेसरं, इओ य सिद्धत्थनरिंदो सहरिसपधाविएण चेडीजणेण साहियतिहुयणच्छेरयरुवसुयजम्ममहूसवो
 चेडीजणरस अवणिथदासत्तभावो आसत्तेविणिवंछियत्थसमत्थरणरासिदाणजणियाणंदो भणइ, जह-भो पुरिसा !

गच्छह तुभे सव्वत्थ नयेर तिथचउक्कच्चरेसु कयवरावणयणपुव्वयं वारिवरिसपसमिययमणहरेसु कुंकुमपिंजरियधर-
णियेलेसु कुणह पंचपयारपुण्णजोवयारं, अगुरुत्तुक्कुदुरुक्कधूधमंधयारियदिसिमुहाओ पइट्टह ठाणे ठाणे कणग-
धूवघडियाओ, पवरमणिमुत्ताजालेरंहतमज्झभागे नचत्तरुणीचरणकिंकिणीकलवाजरियदिसिमुहे गायंतगायण-
जणे ऊसियविविहवेजयंतीसहस्सोवसोहिए समंतओ समुत्तुंगथोरंथभावलीसुसिलिट्टुलट्टावबद्धे मंचाइमंचे संचएह,
पडिभवणदुवारं च विसिट्टपइट्ठाणगपइट्ठिए सहस्सपत्तपउमपिहियाणणे कुसुममालुम्मालिए सरसचंदणपंकपंडुरि-
ओदरे विमलसलिलपुन्ने पुन्नकुंभे निवेसह, सयलपएसेसु य कहगतालायरनडपेच्छणथाइ पयट्ठावेह, नयरदुवारसु य
नवचंदणमालाउ बंधेह, जूयसहस्सं चक्कसहस्सं च उव्ववेह, उस्सुक्कं उक्करं अचाडभडपवेमं ववगयधरणिज्जं माणवु-
ड्डिजुत्तं विमुक्कचारगागारनिरुद्धावराहकारिनरनियरं पुरं च कारवेहत्ति, जं देवो आणवेइत्ति सविणयं पडिस्सणि-
ऊण वयणं गया पुरिसा, सविसेसो य साहिओ नरिंदाएसो, तओ—

हरिसपणीच्चिरतरुणीकरंगुलीगलियमुद्धियाजालं । जालुब्भडधयमहुसित्तसंतिहोमानलाउल्लिधं ॥ १ ॥

आउल्लियचित्तमगणधणलभनिमित्तविहियहलबोलं । हलबोलसवणधाधियनरवइजणदिज्जमाणधणं ॥ २ ॥

धणावियरणमुणणीकयनिहाणपविसत्तित्तियसतवणिज्जं । तवणिज्जपुंजपिंजरचीणंसुयचिंधसयरम्मं ॥ ३ ॥

रम्ममहीयलविलिहियपसत्थसत्थियसहस्ससोहंतं । सोहंतकंतपुवरनरजणकीरंतमगल्लं ॥ ४ ॥

मंगलकरणवाडलपुरोहियारद्धदेवयापूयं । पूयाबलिविक्खेवणपीणियनिस्सेसपक्खिगणं ॥ ५ ॥

गणणाइकंतसमुच्छलंतमहिदूररुद्धनिहिनिवहं । वहबंधविरत्तपंतलोयपारंभियविलासं ॥ ६ ॥

लसुल्लासिरकुलथेरिनारिपारद्धचच्चीगीयं । गीयवियक्खणगायणसुस्सरसरपूरियदियंतं ॥ ७ ॥

इय कुंडगामपुरं सबहिरब्भंतरं समत्तेण । तित्थाहिवजम्ममहूसवंभि जायं सुरपुरं व ॥ ८ ॥

एवं च पुरमहूसवे पयट्टे समाणे सिद्धत्थनारिदो ण्हाओ कयालंकारपरिग्गहो नियंसियमहग्घपहाणवत्थो निसण्णो अ-
त्थाणमंडवे, एत्थंतरे समागया मंतिसामंतसेट्ठिपमुहा विसिट्ठलोया, निवडिया चलणेसु, भणिउमाढत्ता य-देव ! विजएणं
धणागमेणं रज्जवित्थारेणं सरीरारोगत्तणेणं वद्धाविज्जह तुब्भे, जेसिं तिहुयणेक्कचूडामणी नियकुलनहयलमियंको एसो
पुत्तो पसूओत्ति जंपिऊण समप्पियाओ तेहिं पवरकरितुरयरयणरासीओ, राइणावि ते सम्माणिरूण पुण्फत्तयंगंयालं-
काराइदाणेण विसज्जिया नियनियट्ठाणेसु, खणंतरेसु य दंसणसुओ पत्थावमुवलब्भ पत्थिवो उट्ठिओ अत्थाणाओ, गओ
य मणिकुट्ठिमलिहिज्जमाणसुरंगरंगावलीसत्थियं दुवारदेसनियेसियलोहरक्खं उब्भवियमहंतमुसलजूसरं विविहरक्ख्वा-
परिक्खेवसस्सिरीयं जिणजम्मणभवणं, दिट्ठो य तत्थ रयणरासिच्च सरयदिणयोव एगट्ठियसच्चतेयपुंजोच्च समुज्जोइय-
मंदिरब्भंतरो जिणवरो, तं च दट्ठण चित्तिउमाढत्तो-अहो पढमदिवसजायस्सवि अपुच्चा सरीरकंती अनणसरिसरू-
वसंपया अविभावणिज्जं लायणं निम्मेरसुंदरं अभग्गं सोहग्गं, ता सच्चहा पुण्णपगरिसागरं मम कुलं जत्थ पसूयमेवं-

विहं पुत्तरयणंति विभाविकुण भणिया तिसलादेवी—

येच्छसु नियसुयपसरंतकतिपम्भारविजियपहपडले । कज्जलसिहाणदीवे परिगोविंतोव अत्ताणं ॥ १ ॥

पुवं बहुसोवि मए दिट्ठमिमं मंदिरं विसालच्छि ! । किं तु पमोयमियाणिं किंपि असरिच्छमावहइ ॥ २ ॥

संजुणियचामीयरचुण्णयसरिसेण कंतिनिवहेण । एगसरूवा कीरंति उभयगिहचित्तिभिन्तीओ ॥ ३ ॥

इय एवमाइकहाहिं नारिदो देवी य विगमिज्ज भगवओ पढमदेवसियं ठितिवडियं करंति, तइयदिवसे य तरुणतरणिनाराहिबिंबाइं दंसेति, कमेण य जाए छट्ठवासरे रायकुलसंवड्डियाहिं अविणट्टलट्टपंचिदियाहिं नीरोग-सरीराहिं जीवंतपाणनाहाहिं कुंकुमंपकालितवयणकमलाहिं कंठकंदलावलवियसुरहिमालइमालाहिं कुलविलयाहिं अचं-तजायचिन्तसेतोसाहिं जागरमहूसवं पयट्टइ, आगए य एक्कारसदिवसे जहाभणियविहाणेण सुइजायकम्मभवणंति, बारसदिवसंमि नाणाविहवंजणसमेयं बहुप्पगारखंडखजपरिपुन्नं विविहपाणयपरियरियं सुगंधगंधद्वयेयणसूयसंपन्नं रसवइं निव्वत्तावेति, तयणंतरं कारियणहाणविलेवणालंकाराणं नायखत्तिथाणं पणयजणपुरप्पहाणलोगाणं परमायेण भोयणं पणांमेति, खणंतरेण य आयन्ताणं सूइभूयाणं वीसत्थाणं सुहासणगयाणं ततथ गंधमल्लालंकारेहिं सम्भाणियाणं तेसिं पुरओ सिद्धत्थनराहिबो एवं वयासी—भो भो पहाणलोया ! पुवंपि मम एस संकप्पो समुप्पज्जित्था जहा—जहि-वसं एस कुमारो देवीए गब्भं संकंतो तद्विसाओवि करितुरयकोसकोट्टागारज्जेहिं सुहिसयणपरियणेहिं परमं

बुद्धिमहमुवागओ, अओ मए एयस्स वद्धमाणोत्ति नामधेयं कायच्चति, तम्हा इयाणिंपि तुम्ह समक्खं एयमेव नामं
 हवउत्ति, तेहिं भणियं-देव ! जुत्तमेयं, गुणनिप्पन्ननामधेजे विज्जमाणंमि कीस न जहट्टियमभिहाणं कीरइत्ति ?
 एवं तेहिं जंपिए पइट्टियं जयगुरुणो वद्धमाणोत्ति नामं, जाओ परमप्पमोओ, पुरंदरेणावि अयलो भयभेरोवसग्गेहिं
 खंतिख मो य इतिकारुण वरं महावीरोत्ति नामधेयं से कयंति, इय निव्वत्तियाभिहाणो सुरसंकाभियकाभियपवर-
 रसाए निययंगुलीए पाणेण कयभोयणकायवो जयगुरु पंचहिं धावीहिं परियरिओ अंतउरीजणेण सायरं चेव ला-
 लिज्जमाणो अम्मापियरोहिं बहुप्पयारं चरणचंक्रमणं काराविज्जमाणो चेडचडयरेणं पइक्खणमुल्लाविज्जमाणो सायरं
 देवदेवीविदेण पज्जुवासिज्जमाणो निरंतरं गीएहिं गिज्जमाणो पाढेहिं पढिज्जमाणो चित्तेहिं उचलिहिज्जमाणो दंसणू-
 सुएहि लोएहिं अहमहमिगाए पलोएज्जमाणो गिरिकंदरगउव्व कप्पपायवो वहिउमारद्धोत्ति कमेण य पडिपुन्न-
 सरीरावयवो ताचिच्छगुच्छसच्छहरुढसिणिद्धमुद्धरुहसिंहडो विमुद्धपबुद्धबुद्धिपगिरिसागिड्डलुभासाविसेसविसारओ
 पडिपुन्नसुयसायरपारगामी ओहिन्नाणमुणियचक्खुगोयराइकंतवत्थुवित्थारो अतुच्छमुइनेवत्थधरो सयललयलयणाणं-
 दज्जणणं देसूणट्टवरिसपज्जायं कुमारत्तणमणुपत्तो समाणो भयवं बालभावसुलहत्तणओ कीडारइए अणेगेहिं समव-
 एहिं मंतिसामंतसेट्टिसेणावइसुएहिं खेड्विहिवियक्खणेहिं समं पारद्धो रुक्खखेड्डुण अभिरमिउं, तत्थ य एसा
 ववत्था-जो रुक्खेसु सिग्घं आरुहइ उत्तरइ य सो सेसाइं डिंभाइं पट्टीए आरुहिज्ज वाहेइ, इओ य सोहम्मे

देवलोए सोहम्माए सभाए अणेगदेवकोडिपरिवुडस्स सहस्सनयणस्स पुरओ जायंतसु तियसोहिं समं विविहसमुद्धावेसु धीरत्तणगुणवन्नणपत्थावे भणियं पुरंदरेण-भो भो सुरा ! अपुबं किंपि भयवओ वद्धमाणसामिस्स बालत्तणमणुपत्तस्सवि धीरत्तणं सरीरपरक्कमो य, जं न तीरइ केणावि बलपगरिसकल्लिएण देवेण दाणवेण वा समयमेव पुरंदरेण वा भेसिउं, परक्कमेण वा पराजिणिउंति । एवं च निसामिऊण एणो सुरो अचंतकिल्लिट्ठचित्तत्तणओ अतुच्छमिच्छतुच्छाइय-वियेयत्तणओ य चित्तिउमारद्धो, कहं ?—

जह तह जंपियरम्मं सच्छंदुद्दामचिट्ठियसणाहं । मुक्काववायसकं धन्ना पावति सामित्तं ॥ १ ॥

किं संभवज्ज एयं जं बालंपिहु न खोभिउं सक्का । अविचित्तिणिज्जमाहप्पसालिणो देवदणुवइणो ? ॥ २ ॥

अहवा हत्थट्ठियकंकणस्स किं दप्पणेण परिमिणणं ? । गंतूण सयं चिय तस्स धीरिमं लहु परिकस्वामि ॥ ३ ॥
एवं संकप्पिऊण जत्थ सामी अभिरमइ तत्थ आंगंतूण तरुवरस्स हिट्ठओ खोमणत्थं एणं महापमाणसरीरं अंज-
णंगुंजगवल्लुगुलियापडलकसिणप्पभोलिसामालियवणनिगुंजं तंबचूडचूडाईरगरत्तलोयणं विज्जुदंडचंचललतलोली-
हाजुयलं उक्कडुडिलवट्टुलकक्खडफडाडोवकरणदच्छं जुगक्खयलुभियसमीघोरघोसं अणाकलियपयंडरोसेवंगं
तुरियगमणं संसुहमित्तं दिव्वमहाविसं सप्परूवं विउवइ, सामीवि तं तहारूवं लीलाए अवलोइऊण जुम्भरज्जुखंडं व
वामहत्येण उहं दूरे निच्छुभइ, ताहे देवो विचिंतइ-एसो एत्थ न ताव छलिओ । अह पुणोऽवि सामी तिंदूसएण

अभिरमइ, सो य देवो धिट्टिमवलंविऊण आगामियमवायमविभाऊण य बालयरूवं विउविऊण सामिणा सद्धिं
रमिउमारद्धो, अह जिणेण वियक्खणत्तणओ पराजिया सध्वेऽवि बालगा पट्टिए समारुहिऊण समाढत्ता वाहिउं,
अह वाहिएसु सयलेसु तेसु समागओ सुरकुमारस्सवि वारओ, पणामिया तेण सहरिसं पट्टी, आरूढो य तत्थ वद्ध-
माणसामी, तओ सो देवो सामिभेसणद्धं तं पिसायरूवं विउच्चित्ता पवट्टिउमाढत्तो, केरिसं पुण तस्स रूवं?—खरफ-
रुसा सूयरवालसन्निभा से केसा घडीसंठाणसंठियं उत्तिमंगं उट्टियाकभल्लखल्लयमज्झं निडालवट्ठं कविलजडिललोमाओ
भसुहाओ, मरुकूवयंगंभीरं पुरंतपिंगलपभाजालं लेयणजुयलं, जमलच्चुल्लिमहल्लं चिविडं च नासापुडं, रुंदगिरिकंदरा-
गारं कवोलमंडलं, घोडगपुच्छसच्छहाओ दाढियाओ, करहस्स व दूरपलेविं ओट्टुजुयलं, कुंजरस्स व बाहिं निग्गया
कुडिलभीसणा दसणा, अनिलंदोलियपडायच्च चंचला निसियकरवालीदीहा जीहा, सुक्कवाणुसरिसा कंधरा, कोट्टिगा-
णुरूवाओ दोवि वाहाओ, सुप्पचप्पडं पाणिसंपुडं, सिलापुत्तगोवमाओ करंगुलीओ, पुराणसिप्पिपुडरुक्खा अंगुलीणं
नहा, पयडनसाजालजडिलं पंसुयंतराले पसुत्तघोरंतविसहरं उरट्टिपुंजरं, अलंजरागारं उयरं, मुट्टिगेज्जा ठाणट्ठाणभग्गा
कडी, वालुंकीफलपलंविंरा वसणा, करिवंगण्णरूढं मेढं, दीहबीभच्छाविवन्नोमावलीपरिखित्तं तालतरुदीहरं जंधा-
जुगं, नीसाहपत्थरविच्छिन्ना चलणा, कुदालदारुणा चरणंगुलीणं नहा । अवि य—

विगरालविडंविचययणकंदरुगिरियजलणजालोहं । चलणतलपहयभूयलचालियपासायसिहरगं ॥ १ ॥

उद्धृपसारियदीहतरभुयगगलाखलियसूरहपसरं । परिमुक्कमहंतदृढहासपायडियदढदाढं ॥ २ ॥
 कंठपलंबिरपयतलविलगबीभच्छसरडवणमालं । नउलकयकण्णपूरं जन्नोइयकयमहासण्णं ॥ ३ ॥
 उक्कात्तियच्चित्तयचम्मनिवसणं रुहिरमंसलित्ततणुं । अइधोरजराजज्जरअयगरपरिवद्धखयतलं ॥ ४ ॥
 पइसमयमुल्लतं नच्चतं कहकहंति पहसंतं । उक्काट्टिं च करितं भीसणसहेण भासंतं ॥ ५ ॥
 इय तस्स भीसणं जिणवरेण दिट्ठं महापिसायस्स । पइखणविवहुमाणं रूवमसिमहतमसामं ॥ ६ ॥
 तथो सुणियकइयववियारेण जिणेण सव्वा अंसंभेण सो पहओ हेलोए पट्टियट्ठमि मुट्ठोए, करयलकुलिसज्जि-
 यसराराभिघाओव्व विरसमारसंतो झडत्ति पत्तो मडहत्तणं, निरुक्कमकायत्तणओ चेव न सयसिक्करमुवगओ, नवरं
 निच्छियसुराहियइववणो जायपच्छायावो नियदुच्चरियच्चुन्नियगो सवायरं पणमिऊण जिणं पटिउमाढत्तो—
 हा दुट्ठ दुट्ठ तइलोयनाह ! एयं मए समायरियं । सच्चं पि न सद्दहियं सहस्सनयणस्स जं वयणं ॥ १ ॥
 तस्सऽणुरूवं संपइ संपत्तोऽहं फलं इमं भीमं । अवगन्निगुलवयणाण अहव किर केत्तियं एयं ? ॥ २ ॥
 संसारमहाभयमवि जो तं विद्दवसि देव ! लीलोए । अह्मारिसे भयकरे तुह तस्स हवेज्ज का गणणा ? ॥ ३ ॥
 तथा-चलणंगुलिचालियकणयसेल डोलियमहल्लमहिगोल । जस्स किर बाललीलाइयपि चित्तं चमक्केइ ॥ १ ॥
 तस्सविय तुज्झ तइलोक्कनाह ! जो विक्कमं न याणामि । सो नाममेत्तओ चिय विबुहोऽहं न उण किरियाए ॥ २ ॥

एवंविहस्स दुविणयविलसियं खमसु एक्कवारं मे । पर्यईएऽवि हु जं पणयवच्छला हुंति सप्पुरिसा ॥ ३ ॥
 इय खामित्ता भुवणेक्कबंधवं पणमिऊण सो तियसो । गयणयलं उप्पइओ चलंतमणिकुंडलामरणो ॥ ४ ॥
 भयवंपि खणं एक्कं कीलित्ता ताहिं ताहिं कीलाहिं । चेडसुहडंगरक्खेहिं परिबुडो नियगिंहमि गर्जो ॥ ५ ॥
 अह समहिगऽट्टवच्छरपजाए जयगुरुमि जायंमि । हरिसियमणो नरिंदो तिसलाए पुरो इमं भणइ ॥ ६ ॥
 देवि ! कुमारो संपइ गहणसमत्थो कलाकलावस्स । वट्टइ ता उवणिज्जउ लेहायरियस्स पढणत्थं ॥ ७ ॥
 इय भणिए देवीए जएक्कनाहो महाविभूइए । ण्हविओ पसत्थतित्थुत्थसलिलभरिएहिं कलसेहिं ॥ ८ ॥
 नासानीसासोज्झं चक्खुहरं हरिणलंछणच्छावं । परिहाविओ य पवरं सुकुमारं देवदूसजुयं ॥ ९ ॥
 मणिमउडकडयकुंडलतुडियपमोकखेहिं भूसणेहिं च । सुरवरसमणिएहिं अलंकिओ तक्खणं चेव ॥ १० ॥
 सिद्धत्थनरिंदेणवि नीसेसकलाकलावकुसलमई । अज्झावगो महप्पा वाहरिओ निययभवणंमि ॥ ११ ॥
 एणं महप्पमाणं ठवियं सिंहासणं च तस्स कए । अन्नं च थेववित्थसुवणीयं जयगुरुनिमित्तं ॥ १२ ॥
 अह जाव नोवणिज्जइ सामी अज्झावगस्स पढणत्थं । सक्कस्स ताव चलियं सिंघासणममलमणिरुइरं ॥ १३ ॥
 ता ओहिन्नाणेणं मुणिउं जयनाहपढणवुत्तंतं । चित्तेइ अहह मोहो कह विलसइ जणणिजणगाणं ? ॥ १४ ॥
 जं सयलसत्थपरमत्थज्जाणं जयगुरुंपि पढणत्थं । अज्झावगस्स संपइ समण्डं अभिलसंतित्ति ॥ १५ ॥

सक्तो इय चिंततो आंगंतूणं महप्पमाणंमि । सिंहासणंमि ठविडं नाहं परमाएँ भत्तीए ॥ १६ ॥
वंदिता जोडियपाणिसंपुडो सदसत्थपरमत्थं । आपुच्छिउं पवत्तो सामीऽविय वोत्तुमारद्धो ॥ १७ ॥

सोऽवि उवज्झाओ परमं विम्हयमुव्हंतो तं कहितं एगगचित्तो निसामेह, जणणिजणगाइणो य विम्हियमणा जाया । अह सदसत्थपयत्थे कहिऊण ठिओ, ताहे सक्केण साहियं तेसिं-जह जाइसरणाणुगओ आगब्भवासाओऽवि नाणत्तयपरिगहिओ एस भयवं, पाणिपइड्डियं लट्ठमाणिं व सबं वत्थुं नियमईए मुणह, ता किमेवं अणत्थओ संरंभो कओ ? एवमायन्निऊण विम्हियमणा परं पमोयमुवगया जणणिजणगा, पुरंदरोऽवि जिणं नमिउं दिवं गओ, तेण पुण उवज्झाएण जे केऽवि पयत्था भयवओ वागरेतस्स सम्ममवधारिया तयणुसारेण सुसिलिहं विरइयं इंदवागरणंति । भय-वंपि निरुवसगं कमेण पत्तो तरुणत्तणं, तयणुभावेण य तस्स सुसिणिद्धसुहुमकसिणकुंचिरकेसपासेण विराइयं छत्ता-गारमुत्तिमंगं, सवणमूलावलंबिणा नलिणेणं व नयणजुयेलोवसोहियं वयणं, अच्चंतसस्सिरीएण रयणेणं व सिरिवच्छेण पसाहियं कणयसेलसिलापिहुलं वच्छत्थलं, गंभीरदक्खिणावत्ताए सप्पुरिसचित्तिवित्तीएव नाभीए अलंकिंयं झसाणु-रुवमुयरं, हंसतणुरुहकोमेलहिं लोमेहिं करिकराणुरुवं मंडियं जंधाजुयलं, अंगुलीदलगगविप्फुरंतनहावलीए चिंताम-णिपरंपराएव सोहियं जयपडागामगरमच्छाइलक्खणलंछियं चरणकमलं ।

अन्नं च-भाधिरमपायमासंकिऊण मन्ने जिणस्स पढमंपि । हिययाओ नीहरिउं ठियं व केसेसु कुडिलत्तं ॥ १ ॥

रागोविहु श्रेषुप्पन्नपणयभावोऽवि भाविभयभीओ । बाढं कुणइ व वासं करचरणतलाघरतलेसु ॥ २ ॥

एवं च भयवंतं तरुणत्तणमुवगयं रूवविणिज्जियदेवदाणविंदसंदोहं नाऊण सेसमहीवईहिं नियनियधूयापाणि-
ग्गहत्थं पेसिया वरगपुरिसा सिद्धत्थनरिंदसमीवे, विन्नत्तो य तेहिं राया, जहा-देव ! अम्हे वद्धमाणकुमाररूवाइरेगरं-
जियमणेहिं नरिंदेहिं अप्पणप्पणधूयावरणत्थं तुम्ह सगासे पेसिया ता साहेह किमिह पच्चुत्तरं ? , रत्ता जंपियं-सम्म-
मालोचिऊण कहिस्सं, वच्चह ताव तुब्भे निययावासेसु, एवं भणिए अवक्कता ते पुरिसा, नरिंदेणवि साहिओ एस
वइयरो तिसलादेवीए, एवं च आयन्निऊण हरिसभरनिब्भराए जंपियं तीए-देव ! तुम्ह पुत्तपसाएण पावियाइं
मए पावणिज्जाइं, अणुभूयाइं अणुभूयपुच्चसुहाइं, जइ पुण इण्हि तस्स वीवाहमहूसवं पेच्छामि ता कयकिच्चा
होमि, रत्ता वुत्तं-जइ एवं ता देवि ! वच्चसु कुमारसमीवं, पन्नवेसु य तं विवाहनिमित्तं, देवीए भणियं-महाराय !
न जुज्जइ पढमं चिय तत्थ मह गंतुं, लज्जापहाणो हि कुमारजणो होइ, ता सिक्खविऊण पेसिजंतु तप्पणइणो, एवं
वुत्ते रत्ता पेसिया कुमारसमीवे पाणिग्गहणपडिवज्जावणत्थं पणइणो, तेहि य गंतूण सविणयं जयगुरुणो साहिओ
तदादेसो, तं सोच्चा भगवया भणियं-भो महाणुभाव ! किं न सुणह मम चित्तवित्तिं ? नोवलक्खह विसयविरागं ?
न जाणह गिहवासपरिहरणाभिलासं ? जेणवसुल्लवह पाणिग्गहणविसए, तेहिं भणियं-कुमार ! सुणेसो सच्चं, किंतु
अणुवत्तणिज्जं अम्मतायाण वयणं अलंघणिजा नियपणइणो, न खलुदुल्लहो पच्छिमकाले गिहपरिचायभावो, न यावि

पुण्यमणोरहा पडिकूलिस्सति पुणो तुम्हाभिप्येयं अम्मापिउणो, भगवया भणियं-पाणिगहणमंतरणावि पुच्चं चिय
अब्भुवगयं मए इमं-जं न जणणीजणगसु जीवंतसु सवविइं पडिवज्जिस्सामि, ता जइ एवं ठिए मइ संतोसमुच्च-
हंति जणणिजणगा किमकल्लाणं हवेज्जा?, का वा पाणिगहस्स लट्ठया?, जेण पेच्छह पयडच्चिय विवाहसमए कलस-
परंपराठवणमिसेण दंसिज्जइ उत्तरोत्तरदुहाण पावपबंधो, पज्जलंतजलणच्छलेण पयडिज्जइ महामोहवियंभणं, गयणय-
लविलसंतधूमपडलनिभेण कहिज्जइ अत्तणो लहुयत्तणं, चउमंडलगवत्तणववएसेण परुविज्जइ चउगइयं संसारभरणं,
वयमहुपसुहवत्थुहुणकवडेण दाविज्जइ सयलगुणगणदहणं, तरुणीजणभिणिज्जमाणमंगलउउमेणरियंउगिरियंभाविज्जइ
चाउहिंसमजसो, कंठावलंबियकुसुममालामायाए परुविज्जइ समीववत्तिणी दुक्खदंदोली, चंदणरसंगरागमिसेण सुइज्जइ
तक्खणं चिय कम्ममलावल्लो, कन्नगापाणिगहणकइयेवण दाविज्जइ अट्टकम्ममहामोल्लभंडकिणत्तयं हत्थसन्नंति ।

किं बहुणा ?-जं जं विवाहसमए विहिं पलोएमि सुहुमबुद्धीए । सो सो चित्तिजंतो रोसुद्धोसं जणइ मज्झं ॥ १ ॥

ता सुयह मोहपसरं अणुजाणह मं विणा विवाहेण । एवं चिय निवसंतं अम्मापिउनिवुइएण ॥ २ ॥

एवं भणिए पटुणा तो ते जंपंति विणयपणयंगा । तुम्हारिसाण काउं एयं नो जुज्जइ कुमार ! ॥ ३ ॥

पणइयणपत्थणा भंगभीरुणो जं सयावि सणुरिसा । निवकज्जपवित्तिपरंमुहा य पयइए जायंति ॥ ४ ॥

तहा-किं उसभजिणवरेण पाणिगहणाइ नो कयं पुट्ठिं ? । किं वा न चक्किलच्छी परिमुत्ता संतिपसुहेहिं ? ॥ ५ ॥

इय एवं जंपतेसु तेसु कंचुइजणेण परियरिया । तिसलादेवी सयमेव आगया भगवओ मूले ॥ ६ ॥

अह सत्तट्ठ पयाइं अणुगतं संसुहं जिणो तीसे । आसणदाणप्पमुहं पडिवत्तिं कारयइ सच्चं ॥ ७ ॥

अण्णोणघडियकरसंपुडं च देविं पडुच्च भगवंतो । जंपइ अम्मो ! साहह आगमणं किंनिमित्तंति ॥ ८ ॥

देवीए जंपियं-पुत्त ! तुह दंसणाओऽवि किमन्नं निमित्तं ? जओ एत्तिएण वसइ जीवलोगो भरियं दिसावल्लयं सुहावहा रायलच्छी संतोसमावहइ गेहं निवुइ उवजणइ पणइजणो विगयंधथारं तिहुयणं, ता किमवरं वरं सोहेमि निमित्तंति, एवमाइन्निउण भगवया चित्तियं-अहो अणाइक्खणिज्जो कोऽवि जणणीजणस्सावचे सिणेहो, अतुलं किंपि वच्छलं, असरिसा कावि अवलोयणाभिरई, जं सया चक्खुगोयरगएवि मए अम्भा ईसिअंसणेऽवि संपइ एवं संतप्पइत्ति विगप्पिऊण पुणी भणिया देवी-अम्मो ! तहावि साहेसु किंपि पओयणं ? तिसलाए भणियं-पुत्त ! जइ एवं ता पडिवज्जसु विवाहमहूसवं, जओ एयनिमित्तं एसो पणइजणो अम्हेहिं तुज्झ पासे पेसिओ, तुह विवाहुक्कंठिओ खु नराहिवो नयरजणो य, ममावि एत्तियमेव संपयं अपत्तपुद्वं सुहं, पडिपुन्ना सुहाणुभावेण सेसमणोरहत्ति, भगवयवि आगन्धकालाओऽवि मम एस पइन्नाविसेसो-जं अम्मापिऊणं अप्पत्तियकारिणी पव्वज्जावि न कायव्वत्ति चित्तिऊण निरभिलासेणवि अन्भुवगयं तथाइट्ठं, परिट्ठो य देवी समं परिजणेण, निवेइओ एस वइयरो नरिंदस्स ।

एत्थंतरे सिद्धथरायसुवट्ठिओ पडिहारो निवडिऊण चलणेसु विन्नविउमाढत्तो य-देव ! समरवीराभिहाणराइणो दूथो

दुवारदेसे तुम्ह दंसणसुओ चिट्ठइ, तत्थ को आएसो?, राइणा भणियं-लहु पवेसहि, जं देवो आणवेइत्ति भणिऊण पवेसिओ पडिहारेण, पणमिओ य तेण राया, उवविट्ठो य दिन्नासणो, पत्थावे य पुट्ठो नरिंदेण, जहा-भइ! किं आग-मणकारणं?, दूएण भणियं-देव! निसामेसु, अत्थि नियसोभापराजियकुबेरपुरे वसंतपुरनथरे समरंगणपरितोसिय-सुरउच्छरासत्थो जहत्थाभिहाणो समरवीरो नाम राया, तस्स य नियपाणनिद्विसेसा पउमावईए पणइणीए कुच्छि-संभूया जसोयानाम कन्नगा, सा य कहं जसोयत्ति नाममणुपत्ति निसामेह कारणं, किर इमीए जम्मसमए देवो समरवीरो रयणीए सुहपसुत्तो पभायसमए सुमिणं पासइ-जहाउहं अंगरक्खिगपरिक्खित्तगत्तेहिं विविहपहरणकरेहिं सुहडेहिं परिकरिएहिं तरलतुरंगमेहिं गुडियाहिं गयघडाहिं नाणाविहपहरणजोहजुत्तेहिं पहाणरहवरेहिं पखेदिओ संयंयि मत्तकुंजराधिरूढो उज्जाणमइगओ, तत्थ य ठियस्स सहसच्चिय पाउब्भूओ हलबोलो, अंतरंतरा नच्चति केउवि सुहडा केउवि पलायंति केउवि य महीयले धूलीधूसरा रुंलति पडंति विजयचिधाइं विहडंति जयतूराइं, एवं च असमंजसं दट्ठण मए इओ तओ डोळंतं गहियं नियछत्तं हत्थेण, पत्तो एगो महाविजयद्धओ, सोउवि संठ-विओ सारिओ य, एवंविहं च सुविणं पासित्ता पडिबुद्धो संभत्तचित्तो पभायसमए सुमिणपाढगे सदावेत्ता तेसिं सुमिणं परिकहेइ, तेहि य सिट्ठ-देव! पंचहिं कारणेहिं सुमिणोवलंभो हवइ, तंजहा-अणुभूएण दिट्ठेण चित्तिएण पयइवियारेण देवयावसेण वा, तत्थ न सुणिज्जइ तुम्हाणं एएहिंतो केणावि कारणेण सुमिणोवलंभो जाओत्ति, राइणा

मणियं-एवमेयं, न सम्मं उवलब्भेमि कारणं, तेहिं वुत्तं-जइ एवं ता करेह सच्चं सुविणंगं, जहा दिट्ठिइए सब्बसा-
मरिं काऊण गच्छह उज्जाणं, को दोसो?, न सुणिज्जइ कोऽवि परमत्थो, एवंपि कीरमाणे कयावि गुणो होज्जा,
साभिप्पाओ य किंपि एस डोळंतच्छत्तधरणविजयचिंधलाभोत्ति वुत्ते राइणा पडिवज्जिऊण तेसिं वयणं ताडाविया
सन्नाहभेरी, तीए सद्दायन्नणेण तक्खणादेव कयसब्बसंनाहो नरवइसमीवमुवगओ सामंतवग्गो परिचत्तसेसवाचारो
पुरो ठिओ जोहसमूहो, पासमल्लीणा करितुरयाइणो, तओ चाउरंगबलकलिओ पहाणहत्थिकंधराधिरूढो नयरदूरव-
त्तिणं गओ नंदणुज्जाणं, तत्थ य रयणिदिट्ठसुमिणभीसणत्तणं चित्तैतस्स तक्खणफुरियवामनयणपिसुणियानिट्ठवड-
णस्स किंपि अरइविगारमणसालीणस्स बज्झवित्तीए काणणमणुपेच्छंतस्स नरिंदस्स सच्चिय पुव्वदिणपेसियचारपुरिससू-
इयपत्थावो चिरपरूढवेरसाहणगाढामरिसो अमुणिथतद्विवसनरवइवइयरो जुज्झसज्जो पच्चंतसामंतो दुज्जोहणाभि-
हाणो पहुत्तो उज्जाणसमीवं, दिन्नो परिवेढो, जाओ हलबोलो, लक्खियतदागमणो य निग्गओ उज्जाणत्ताहिं नरिंदो,
दिट्ठो य पडिरिउणा संगामसज्जो राया, तओ किं वियाणियं ममागमणमणेणंति खुभियचित्तेणवि दुज्जोहणेण पारदू-
रन्ना सह पहरिउं । अह-

निसियखगकप्पियपयंडं नरसुंडमंडियाभोगं । दट्ठोदुवद्धमोगरनिप्पिट्ठुक्किट्ठुरहनिवहं ॥ १ ॥

कुंतग्गभिन्नकुंजरकुंभत्थलगलियमोत्तियसमूहं । तक्कालमिलियवेथालकिलिकिलारावभयजणं ॥ २ ॥

निवडंतछत्तधयचिंधनिचयसंछन्नमेइणीवट्टं । उत्तट्टसहत्थिविहम्ममाणनियपवरपरिवारं ॥ ३ ॥

करितुरयथायनिस्सरियरुहिरपूरिज्जमाणमहिगत्तं । रणतूरलुन्नच्चिरकबंधपेच्छणयभीसणयं ॥ ४ ॥

इय धोरसमरवावारमेक्केहलाए काउमच्चिरेण । सिरिसमरवीरणणा बद्धो सो नागपासेण ॥ ५ ॥

भणिओ य सुमर रे इट्टदेवयं एस वट्टसि जमस्स । संपइ पाहुणगो तं दुच्चरियरहमि आरूढो ॥ ६ ॥

दुज्जेहेणेण भणियं भो नरवर ! कीस वाहारसि एवं ? । पारंभे चिय समरस्स सुमरणिज्जं मए सरियं ॥ ७ ॥

नियकुलकमाणुरुवं अणुचेट्टसु संपयं विगयसंको । देहेण कयं देहोऽवि सहउ को एत्थ अनुतावो ? ॥ ८ ॥

एवं च आयान्निऊण पडिवन्नकरुणाभावेण समरवीररत्ना नीओ नीयमंदिरं, उच्छोडिया बंधा, काराविओ ण्हाणभो-
यणाइयं, समप्पियाइं समरगाहियाणि करितुरयाइणि, तेणावि अंगीकया सेवावित्ती, तओ जाओ राइणो परमसं-
तोसो, पसरिओ चाउदिसिं जसोत्ति, भणियं च रत्ना-अहो मम इमीए कन्नगाए पसवकालेऽवि एरिसो जसो दिण्णो,
तम्हा होउ एयाए जसोयत्ति जहत्थभिहाणंति वुत्ते महया रिद्धिसमुदणं कयं एवमेव से नामं ।

अह सा चंदलेहव्व वड्ढंती पत्ता कमेण जोव्वणं, अन्नया पुट्ठो राइणा नेमिस्सिओ-को इमीए पाणिग्गाहो भविस्सइत्ति ? ,
तेणावि साहियं-देव ! सिरिवच्छलंछियवच्छयलो सयलसुरासुरनमियकरकमलो अट्टसहस्सलक्खणधरो पुरिसणवरो नि-
च्छियं एयाए पई होहिच्चि, एवं निउणिए ठिओ नरिंदस्स हियए तुम्ह कुमारो, तओ आहूओ मेघनाओ नाम सेणावई

समप्यिया तस्स जसोयकन्नगा, दिन्नो संयवरविवाहजोगो महंतो हयगयकणगाइविच्छड्डो, भणिओ य जहा-भह !
 गच्छसु तुरियं, कारेसु पाणिगहणमहिमंति, तओ नरवइवयणाणंतरेव चलिओ अक्खलियपयाणगेहिं एसो, अहं
 पुण एयकज्जनिवेयणत्थमेव पढमं चिय तुम्ह पासे पेसिओत्ति, ता देव ! एयं तं आगमणकारणं । रत्ता भणिथं-भह !
 सम्मं कयं, अणुरूचमेयं, पयट्टिज्जउ अकालपरिहीणं वंछियत्थो, दूएण जंपियं-देव ! कहं न पयट्टिज्जाइ जेण विवाह-
 लगंगपि आसन्नं वट्टइत्ति वुत्ते रत्ता सेसनरवइवरगपुरिसा सम्माणिऊण विसज्जिया नियनियट्टाणेसु, अन्नदिवसे य
 समागया सा रायकन्नगा वद्धाविओ नरिंदो दवाविओ तीसे निवासनिमित्तं समुत्तुंगसत्तभूमिगो पासाओ पेसिया
 रसवई काराविया अन्नावि तक्कालोचिया पडिवत्ती, पसत्थमुत्ते य कयपवरसिंगारो अणेगसाभंतमुहडपरिबुडो आगओ
 मेहनाओ सेणावई, पणमिओ अणेण राया, पुच्छिओ य कुसलोदंतं, राइणाडवि तस्स दवाविं आसनं तंबोलाइदाण-
 पुब्बयं च पुट्टो समरवीरनरेसरसीरकुसलवत्तं, सविणयं साहिया य तेण, अह विविहसंक्कहाहिं गमिऊण खणमेक्कं रत्ता
 अब्भणुन्नाओ समाणो उट्ठिओ मेहनाओ, गओ य निययावासे, समारद्धो विवाहोवक्कमो, बंधाविया मंचा, जहोच्चियं
 विरइयाइं आसणाइं, निरुविया विविहकम्मेषु किंकरा, परिकप्पियं वेइगाविमाणं । तं च केरिसं ?-

मरययमणिचिक्किय सुवण्णवरकलसविरयणारम्मं । अइनिम्मलरंभागब्भसंभउद्धूयविजयपडं ॥ १ ॥

परिमुक्कुसुमंजोवयापरिभमिरभमरवसुहरं । निम्मलमुत्ताहलभरियचारुमणिक्कोट्टिमचउक्कं ॥ २ ॥

चउदिसिविसुकदण्णपडिबिबियकामिणीवयणकमलं । ठाणट्ठाणनिवेशिवरमणिपडिहणियसंतमसं ॥ ३ ॥

गरुडमणिपसरियकिरणपडलविच्छुरियमहियलाभोयं । नवगोभयरसलित्तं व रेहए वेइयाभवणं ॥ ४ ॥

एवं च निवृत्तिऊणं तक्कालोचियकायवं मेहनोहेण कहावियं सिद्धत्थन्नो, जहा-समीवमागं वट्टइ पसत्थं हत्थ-
गहणमुहुत्तं, ता कुमारं घेत्तूण सिग्घमागच्छहत्ति । राइणावि एवमायन्निऊण भणिया तिसला-देवि ! सिग्घं कोरहि
कुमारस्स पुंखगाई कायवं, आसन्नो वहइ समओत्ति, एवं सोच्चा देवीए परमायरेण विविहप्पयोरहिं मंगलसहपुरस्सर
पुंखिऊण सवोसहीहिं ण्हविओ कुमारो, नियंसाविओ महामोळं धवलदुगुल्लजुयलं, काराविओ सवं कायवविहिं,

अविय-गोसीससुरभिचंदणविलेवणापंडुरो जिणो सहइ । सरयनिसायरजोणहए धवलिओ कंचणगिरिच्च ॥ १ ॥

कसिणवणकेसपासो रेहइ सो कुसुमगुच्छसंछन्नो । पण्डुरियतारतारोवसोहिओ गयणभगोच्च ॥ २ ॥

सट्ठाणपिणद्धविचित्रयणनवभूसणब्भहियसोहो । जंगमभावमुवगओ रोहणसेलोच्च पडिहाइ ॥ ३ ॥

साभावियावि सोहा न तीरए जिणवरस्स साहेउं । किं पुण विसेसमंडणसंडियदेहस्स तत्थ खणे ? ॥ ४ ॥

एवं च कयउचियकायवे कुमारो निवेश्यं राइणो, तेणावि निउत्ता नियपुरिसा-अरे पयट्टेह नगरसहूखवं मेलेह
नायखत्तियवगं समण्णेह कुमारस्स पसाहियसरीरं जयकुंजरं जेण गम्मइ विवाहट्ठाणमि, जं देवो आणवेइत्ति भणि-
ऊण गया पुरिसा, निवृत्तिओ नरिंदाएसो, तओ धवलपसाहियकारिवारूढो पवणपणच्चंतयवडुग्घाययुंदरहवरा-

रुढरायलोयपरिथरिओ मणहरनद्वेवयारकुसलनचंतावरोहसुंदरीवंदनिरुद्धरायमगो वज्जंतमंगलतूरवाऊरियसयलदि-
 सासुहो सिद्धत्थनराहिवेण जेट्टभाउगनंदिवद्धणजुवराएण य अणुगम्ममाणो सिरिवद्धमाणकुमारो सायरमवल्लोयण-
 विखत्तचित्तेण भवणमालातलसंठिएण पुरजणेण दंसिजंतो अंगुलिसहस्सेहिं पुज्जमाणो आसीससएहिं अग्घविज्ज-
 माणो अक्खयसम्मिस्सकुसुमुट्ठिवरिसेहिं संपत्तो कमेण विवाहमंडवंति, अह मंडवदुवारेच्चिय पडिरुद्धो पडिहार-
 जणेण सामन्नलोओ, पविट्ठो पहाणलोएण समं अब्भितरंमि, विलयाजणेण ओमिलणपुव्वगं झत्ति विविहं पसाहिया
 सा जसोयवरारायकन्नावि, तथाहि—

रमणफलंगंमि तीसे आवद्धा पंचरायमणिकंची । अइविच्छिन्ने गयणंगणंमि हरिधणुहेलहच्च ॥ १ ॥
 नयणेहिं कज्जलुम्मिस्सिरोहिं सइदीहरोहिं निद्धेहिं । पच्चक्खा सरयसरिच्च सहइ सा नीलनल्लिणेहिं ॥ २ ॥
 कंठतलंमि य तीसे लोलंतो नवसरो वरो हारो । वयणिंदुविब्भमागयतारावलिलीलमुव्वहइ ॥ ३ ॥
 तीसे जावयरसंपकाडलं कोमलं चलणजुयलं । पल्लवजुयं व नज्जइ वम्महकंकिल्लसाहिस्स ॥ ४ ॥
 भालतलंमि य तीसे लिहिओ गोरोगणाए वरतिलओ । तह दससु अंगुलीसु आविद्धं सुदियाजालं ॥ ५ ॥
 इय सविसेसपसाहणपसरंतसरीरकंतिरमणिज्जं । मंजुमणिनेउरारवसवणागयहंसखलियगइ ॥ ६ ॥
 मणिकुट्टिमपडिबिंबियमुहकमला मत्तकुंजरगइए । चलिआ चेडीचक्केण परिबुडा सा नरिंदसुया ॥ ७ ॥

पत्ता य तक्खणागयपुरोहिथारद्धजलणकम्ममि । नववंदणमालामणहरमि वरवेइगाभवणे ॥ ८ ॥
तत्तो पाणिगहणं पारद्धं गीयमंगलसणाहं । सयलतइल्लोक्कदावियपरमाणंदं महिड्डीए ॥ ९ ॥
एत्थंतरे उभयपक्खेहि वि काराविओ जणाणमुवयारो दाविथाइं मिगनाभिपमुहसुराहिगंधविलेवणाइं सरमसरुंटेत-
छप्पययनिवेसमज्झिराइं कुसुमदामाइं सुराहिगंधबंधुरा पडिवासा भूरिकप्परपारीपहाणाइं पूगीफलसणाहाइं नागवल्ली-
दलाइं देवंगचीणद्धचीणदोगुल्लपट्टमुहाइं पवरवत्थाइं केयूरकुंडलकिरीडतुडियकड्याइणो आभरणविसेसा सिंधुतुर-
क्कवल्लीयवज्जरकंबोजाइसुखेत्तजायाओ तुरयबंधुराओ मंदमहाइविसिट्ठवंसप्पसूया महागयविसेसा, एत्थंतरे जलणे हुणि-
ज्जमाणंमि महुधयाइंहिं कन्नावराण वित्तं चउत्थमंडलगपरिभमाणं, ताहे सेणावइणा आणंदुल्लियवहलपुलएण कोडी-
वत्तीसं पवररुवस्स कणगस्स कुंडलकडिसुत्तयमणिकिरीडपमुहं तमाभरणं कच्चोलिसिण्णिथालाइयं च कलहोयमयभंड
अइदूरदेससंभूयचित्तेलाइं भूरिभेथाइं कन्नाए पाणिविभोयणंमि दिन्नाइं कुमारस्स, सिद्धत्थनरिंदेणवि बहुगाए
कणगवत्थलंकारा परितोसमुवहंतेण विथरिया मुवणदुल्लभा ।

एवं च सुरासुरनरपरितोसकारए वित्ते विवाहमहूसवे कए भोयणाइसक्कारमि सट्टाणसु पडिनिचत्तंमि रायलोए
निचनयरमुवगयंमि मेहनायेसणावइंमि ससहरकरगोरपासायसिहरसंठियस्स उचियसमए दिव्विसयमणुमुंजमाणस्स
पुन्नपरिसुधपज्जंतचित्तिथत्थस्स देवगणोवणिज्जमाणपवरवत्थंगंधमल्लविलेवणालंकारस्स ववगयरोगायंकस्स कयाइ

सेवागतुंबरुसमारद्धकलरवपंचमुगारसवणेण कयाइवि साथरपणच्चिरसुरवहूपेच्छणयावलोयेणेण कयाइ गंभीरजणं-
विवायनिन्नयकरणेण कयाइ जणजणगसमीवगमणेण भगवओ वोलेति वासरा ।

अह गएसु किच्चिएसुवि संवच्छरेसुवि आवन्नसत्ता जाया जसोया, कालक्रमेण य पसूया सुकुमारचरणकरयल चारु-
रूवोवसोहंतसरीरावयवं तेयसिरिं व पच्चक्खं दारियं, कयं च समुच्चियसमए पियदंसणत्ति से नामं, सा य सायरसुव-
लालिजमाणा पवट्टिउमारद्धत्ति । अह भगवओवि वट्टमाणमि अट्ठावीसइमे वरिसे पालियनिकलंकपासजिणपणीय-
धम्मा अम्मापियरो कुससंथारयमारुहिच्चा कयभत्तपच्चक्खाणा अपच्छिमसंलेहणाड्डुसियसरीरा तइयभवे अवरीवि-
देहंमि अवस्सपावियव्वनिव्वइणो कालं काऊण अचुयकप्पे देवत्तेण उववन्ना, ततो सोगाउरेण नंदिवद्धणपसुहेण
रायलोएण कओ तेसिं सरीरसक्कारो, कयतक्कालोच्चियकायंवे य सट्ठाणट्ठियंमि तंमि अणिट्ठं दट्ठु अपारंतोच्च पत्थिओ
अत्थमणगिरिं दिणयरो, सउणिकोलाहलरेवेण रोविउमारद्धव संझा, निस्सरंतभमररिंछोलिच्छलेण अंसुजालं व सुक्कं
कमलायेहिं, सदुक्खमहिलाजणमणुसासिउं व पयट्ठा रयणी, विरहानलसंतत्तगत्तं रायलोयं निव्वविउक्कामोच्च
समुग्गओ ताराहिओ, अहापभायाए रयणीए समुग्गयंमि दिणयरे अचंतदुस्सहसोगावेगविवससरीरं पिव विरह-
विदुरंतैउरीपरिगयं नीसेसयणवगगरिवुडं नंदिवद्धणजुवरायं पेच्छिऊण भणियं भगवया-भो परिचयह सोयं,
अणुच्चित्तह परमत्थं, निरत्थओ खु सोगो, जओ-अणिवारियसच्छंदसंचरणदुल्लिओ पंचाणणोच्च कयंतो सुमिणं व

खणदिदृनट्टं संजोगविलसिथं माइंदजालरमियं पिव मुहुत्तमेत्तसुदरं पेम्मं कोदंडलट्टिव गुणाणुगयावि कुडिला कज्ज-
परिणई संझंभरागोव अचिरावत्थाणं धणं महाभुयंगा इव दुन्निवारा विविहरोगायंका, ता सन्नहा नत्थि किंपि
एत्थ संसारे सोयणिज्जं पडिबंघट्टाणं वा पवलं, एक्कं चिय अणुसरह विवेयं परिचयह भोगपिसायं कुणह कायव्वं,
सव्वसाहारणो हि एस वइयरोत्ति । एयं ते निसामिऊण पयणुपमाणुबंधा सिट्ठिलियसोयावेया जायत्ति ।

अन्नदिवसे य जोइससत्थपरमत्थवियक्खणनिमित्तिगोवइट्ठपसत्थमुत्तमि पहाणलोणेण अणेगपयारोहिं भणिओऽवि
जयगुरू जाव न पडिवज्जइ रज्जं ताव नंदिवद्धणो अभिसित्तो सिद्धत्थराइणो पए, पणमिओ नायक्खत्तियवग्गेण
बहु मन्निओ नयरकारणिएहिं परियरिओ सामतेहिं पडिवण्णो सेवगज्जेणं पूहओ पंचतराईहिं, एवं जाओ
सो महाराओत्ति ।

अन्नया य तं सयणवग्गाणुगयं भयवं भणिउमाठत्तो-ओ पडिपुन्ना मम संपयं पुव्वपडिपुन्ना पइन्ना, कयं च सव्वं
करणिज्जं, ता सिट्ठिलेह नेहगंठि, होह धम्ममसहाइणो, अणुमन्नेह मम सव्वविरइगहणत्थंति, अह वज्जासणिनिवडणदु-
विसहं निसामिऊण वयणमेयं भणियं तेहिं-कुमारवर ! अज्जवि महारायसोगो तहट्ठिओ चेव अम्हाणं नट्टसंछं व
विइवइ हिययं, किं पुण अकाले चिय तुम्हेहिं सह विओगो खयक्खारावसेगोव दुत्तसहो ?, अहो मंदमग्गसिर-
सेहरा अम्हे जेसिं उत्तरोत्तरा निवडइ दुक्खदंदोलित्ति भणिऊण रेविउं पवत्ता, बहुण्ययारं च तासिया महुवय-

नेहिं भगवया, कहकहवि निरुद्धवाहप्यवाहा य तक्कालचउग्गुणीभूयं संतावेगं निरुंभिऊण भणिउमाढत्ता—अहो परमे-
 सर ! करुणापरो हयसु अम्ह जीवियवे, परिहरसु संपयं सबविरइवंछं, एयंपि कारुण तुमए पाणिणो रक्खणिज्जा, ते
 य जइ पढमंपि दुस्सहविओगकरवत्तभिज्जमाणहियया रक्खिज्जिस्संति ता किमजुत्तं होजा?, तुम्हेहिं रहिया नूणं
 अवगयलोयणव्व अमुणियगम्मागम्मविभागा वइदेसिगा इव अणाहा खणमेत्तंपि न संघारेमो अयाणंति, भगवया
 भणियं—जइ एवं ता सम्ममालोचिऊण भणह—केत्तियकालेण तुब्भे ममं दिक्खिगागहणत्थमणुमन्निस्सह?, तेहिं
 भणियं—संवच्छरदुगेणं अइगएणंति, भगवया जंपियं—एवं होउ, परं मम भोयणाइसु न तुम्हेहिं विसेसंचिता कायद्वा,
 तेहिं भणियं—एवं करिस्सामो, तओ तद्दिणाओ आरब्भ परिचत्तसव्वसावज्जवाचरो सीओदगपरिवज्जणपरायणो
 फासुयाहारभोई दुक्करवंभचेरपरिपालणपरो परिमुक्कणहणविलेवणपमुहसरीरसक्कारो फासुओदगेण कयहतथपायपक्खा-
 लणाइकायव्वो जिणिंदो ठिओ वरिसमेगं ॥ तहिं च—

परिमुक्काभरणोऽविहु ण्हाणविलेवणविवज्जिओऽवि जिणो । जुगवुग्गयवारससूतेयलंछि समुवहइ ॥ १ ॥

सयणोवरोहेणेण धारियगिहसरिसवज्जवेसोऽवि । लक्खिज्जइ जयनाहो संजमरासिद्ध पच्चक्खो ॥ २ ॥

सा कावि गिहगयस्सवि जिणस्स मज्झत्थया पवित्थरिया । जा निग्गहियमणाणवि सुणीण चित्तं चमकेइ ॥ ३ ॥

अह वच्छरपज्जंते तिलोयचूडामणी महावीरो । वारिसियमहादाणं दाउं परिचितए जाव ॥ ४ ॥

सोहम्मदेवलोए सुहासणत्थस्स ताव सक्कस्स । रयणपहपसरययडं झडत्ति सिंहासणं चलयं ॥ ६ ॥
तच्चलणे ओहीए सो नाउं नाहमाणसविकप्पं । अइरभसयरवियंभियपुलउप्पीलंचियसरीरो ॥ ६ ॥
सिंहासणाओ उट्टिय सत्तट्ट पयाइं संमुहं गंतुं । थोउं जएक्कनाहं चित्तेउमिमं समाढत्तो ॥ ७ ॥
भयवं जिणवरवीरो आवरिसं दाणमीहए दाउं । तस्स य धणप्पयाणं जुज्झइ मह संपयं काउं ॥ ८ ॥
इय चित्तिऊण जक्खं वेसमणं आणवेइ वज्जहरो । निक्खमणदाणजोगं खिव कणगं जिणगिहंमिति ॥ ९ ॥
इमं च सोच्चा धरणिवट्टुचुबिणा मत्थएण पडिच्छिऊण सुरिंदसासणं कयकिच्चमप्पाणं भवंतो वेसमणो तिरि-
यजंभगे देवे आणवेइ, तेऽवि तहत्ति विणएण पडिसुणित्ता जिणिंदमंदिरे तरुणतरणिसप्पयासं चाभीयररासिं वरि-
संति । तओ भयवं पइदियहं तियचउक्कचरचउम्मुहमहापहहेसु अन्नसु य तहाविहट्टाणेषु बहूणं सणाहाण य
अणाहाण य पंथियाण य करोडियाण य कप्पडियाण य वाहियाण य वइदेसियाण य रिणपीडियाण य दोगच्चसं-
तावियाण य अन्नोसिं पि धणाभिलासीण अणिवारियप्पसरं वरवरियाधोसणापुव्वयं कणगं सययं दवोवेइ, तं च महया
पवंधेण दिज्जमाणं अट्टलक्खाहिगएगहिरन्नकोडीमित्तं एगदिणेणं निट्ठविज्झइत्ति ।
अह मयहमसूरकलिंगवंगसोरट्टपमुहदेसेसु । अच्छिन्नमुवन्नमहापयाणओ पसरिया किन्ती ॥ १ ॥
ताहे जंपंति जणा परोप्परं तेसु तेसु ठाणेषु । चल्लह लहु भयवंतं पेच्छामो तत्थ गंतूणं ॥ २ ॥

तवणिज्जपुंजलाभेण इह भवे विगयदुक्खमप्पाणं । कुणिमो परलोयंमि य तंहसणजणियपुंनेण ॥ ३ ॥
 परभवपरुद्धखरदुक्खनिवहसंतत्तसव्वगत्ताणं । अन्नो नत्थि उवाओत्ति अम्ह एसो हवउ सरणं ॥ ४ ॥
 इय गेगेसुं मग्गणगणेसु इत्तेसु दूरदेसाओ । पूरियमणोरहेसुं अन्नेसु नियत्तमाणेसु ॥ ५ ॥
 कुंडग्गामंमि पुरे रुंदासुवि तासु तासु रत्थासु । निइयनिहलियउरो दुक्खेण जणो परिब्भमइ ॥ ६ ॥
 जत्थ निहाणे दिट्ठिं पम्हलधवलं परिकिखवइ वीरो । दट्ठइ तत्थ हिरन्नं करुणारसमच्छरेणं व ॥ ७ ॥
 अत्थिजणपरिवुडे जिणवरंमि गेहंगणे भमंतंमि । परिसक्किरक्कप्पमहादुमव लक्खिज्जए पुहइ ॥ ८ ॥
 दाणे य जायणंमि य दायगतक्कुयजणेण सव्वत्थ । सरिसच्चिय उल्लावा विंयंभिया देहि देहिति ॥ ९ ॥
 एत्थ रयणुक्कर एसु ठवेह एत्थ य पवित्थरे वत्थे । पूरेह एत्थ तवणिज्जपुंजए मग्गणनिमित्तं ॥ १० ॥
 इय दाणनिउत्तजणस्स पइदिणं किंकरे भणंतस्स । पुणरुत्तो वावारो जाओ संवच्छरं जाव ॥ ११ ॥
 अखलियपसरं सिरिजिणवरणे दिंतेण दुत्थियाण धणं । सेसाणवि पयडिज्जइ सिवपुरपंथो धुवं एस ॥ १२ ॥
 सव्वावायनिबंधण धोणेवि जो कुणइ मोहिओ मुच्छं । सो दुक्करतवचरणे अत्ताणं कह व संठविही ? ॥ १३ ॥
 ता जिणवराणुमाणेण सव्वविरइं समीहमाणेण । अन्नेणवि एवं चिय पयट्ठियव्वं सइ धणंमि ॥ १४ ॥
 एवं च दाणे अणुदियहं पयट्ठमाणे नंदिवद्धणनरिंदो निययुरिसे सदावेत्ता एवं आणवेइ-भो भद्दा ! एयस्स

रस्स तेषु तेषु पएसेसु बहूओ महाणससालओ काराविज्जण विउलं असणपाणखाइमसाइमरूयं आहारं उवक्ख-
डेह, तयणंतरं च जे जहागच्छति खुहाभिभूया तण्हापरिसुसियंकठा पासंडत्था गिहत्था वा अन्नो वा तहारूवा
तेसिं तहा आसत्थाणं सुहासणगयाणं हरिसुप्फुल्लोयणाणं तं चउच्चिहंपि आहारं सवायरेण दवावेह, तहा ठाणे
ठाणे मुंचह मंदभदाइजाइणो करिणो चउइसं संठवेह सूरहत्तुरयविब्भमे पवरत्तुरंगमे सवत्थ पयडह रहनिवेह
पएसे पएसे मेलह पवरपट्टणुगए वत्थससुदए देसेह गामागराइणो संनिवेसे, एएहिंतो जो जं समीहेइ तस्स तं
वियरहत्ति, जं देवो आणवेइत्ति भणिज्जण निगया पुरिसा, समारद्धो सवत्थ नरिंदाएसणुरूवो उवक्कमो । अह
अनिचारियवेरिए समगणियरायरोरे अमंदाणंदसंदोहज्जणे भगवओ पयट्टे संवच्छरियमहादाणे एत्तिंयं अत्थो
सव्वसंखाए गओ—

तिन्नेव थ कोडिसया अट्ठासीयं च होति कोडीओ । असियं च सयसहस्सा सव्वगेणं दविणसंखा ॥ १ ॥

इय मगगलोयं तप्पिज्जण आवरिस कणगवरिसेण । पव्वज्जापडिवत्तिं कुणइ मणे जिणवरो वीरो ॥ २ ॥

अह बंभलोयकप्पे रिट्ठमि विमाणपत्थडे विउले । दिव्वविमाणोवगया एए देवा महासोक्खा ॥ ३ ॥

सारस्सयमाइच्चा वण्णी वरुणा य गहत्तोया य । तुसिया अच्चावाहा अगिच्चा चेव रिट्ठा य ॥ ४ ॥

तक्खणविचलियसीहासणा य ओहीए नायनियकिच्चा । नियनियपरियणसहिंया झडत्ति जिणपासमल्लीणा ॥ ५ ॥

विणयपणमंतमथयगलंतमंदारसुरहिकुसुमभरा । तत्थाहिं गिराहिं जिणं थोउं एवं समारद्धा ॥ ६ ॥
 जयसि तुमं मयरद्धयसिंधुरखरनहरदारुणमंडद ! । चलणगगालियाचलसंखोभियसधरणिगल ! ॥ ७ ॥
 नियकज्जपरंमुहमुवणरक्खणक्खणिय ! परमकारुणिय । नायकुलकमलवणसंडंचडमायंड ! तुज्झ नमो ॥ ८ ॥
 जह लोथालोयगयंपि नाह ! तं मुणसि वत्थुपरमत्थं । तह किं कयाइ जाणइ मंदमई मारिसो लोओ ? ॥ ९ ॥
 अहवा हेलुछासियकरपसरनिरुद्धतिमिरनियरस्स । सूस्स पुरो खज्जोयगण का होइ देहपहा ? ॥ १० ॥
 तहवि य निययाहिगारं नाह ! कलिऊण नूणमग्गेहिं । सुमरणमेत्तनिमित्तेण तुह इमं सीसए किंपि (सामी) ॥ ११ ॥
 पव्वज्जं पडिवज्जसु भवरुयसंतत्तगत्तसत्ताणं । तित्थंकर ! तित्थमणत्थमंथणं लहु पयट्ठेसु ॥ १२ ॥
 अइमूढकुत्तित्थयदुट्ठदेसणातिमिरनियरअंतरियं । पयडेसु मोक्खमग्गं निरुवमनाणप्पइवेण ॥ १३ ॥
 अइभूरिविचिच्चाइसयरयणकारुन्नवारिमरियाओ । वयणामयं पगिणहउ लोओ तुह सायराउव ॥ १४ ॥
 निस्सामन्नं सामन्नभावमायन्निऊण सयलजणो । रोमंचकंचुइछो आकप्पं तुह कंहं कहउ ॥ १५ ॥
 इय सविणयदेवगणोवइट्ठकायवदुगुणिउल्लासो । जाओ जएक्कचक्खू सविसेसं मोक्खसोक्खमई ॥ १६ ॥
 एवं च विन्नविऊण सट्ठाणं गएसु लोगंतियतियसेसु उट्ठिऊण भयवं सीहासणाओ पासवत्तिणा परियेण ^{अणु-}
 गम्ममाणो गओ नंदिवद्धणपमुहाणं नायक्खत्तियाणं समीवे, तेऽवि जिणमितं दट्ठुण सत्तट्ठ पथाइ गया सम्मुहं, कथा

उचियपडिवची, दवाविद्यं महप्पमाणं सिंहासणं, निसन्नो जिणो, अणुरुवासणेसु य जहक्कमं उवविट्ठा नंदिवट्ठाइणो ।
तओ ते भगवया अमयविंदुसंदोहसुंदरीए सभावमहुराए अणुरुत्ताए गंभीराए भारईए भणिया, जहा-ओ देवाणु-
प्पिया ! पडिपुन्नो तुम्हाणमवही, जाओ पत्थावो मम सबविरइपडिवचीए, ता सहसिं अणुमन्नह इयाणिं, मुयह
पेमाणुबंधं, निट्ठरं कुणह विओगकायरं नियमणंति, ते य एवमायन्निउण गाढमणुपरिपूरिजिमाणगलसरणिणो कह-
कहवि निरुद्धसोगावेणा अणवरयनिस्सरंतनयणंसुविंदुजालच्छलेण पणयप्पम्भारं व चिरं उगिरिऊण भणिउमाढत्ता
-भयवं ! तुम्ह एवं भणंता वज्जमया धुवं अम्ह सवणा जं न संपत्ता बहिरत्तणं, वइसरप्परमाणुविणिम्मियं हिययं
जं न वच्चइ तडत्ति सयसिक्करत्तणं, निदक्खिन्नत्तणपरममंदिरं व सरीरमिमं जमज्जवि न पवज्जइ रसायलगमणं, एवं
ठिए य कहं पत्थुयत्थणुमन्नणनिमित्तं पयट्ठउ वराइणी वणी, जओ-को होही विसमक्कजोयहिनिवडिराण अम्ह
हत्थावलंबो ? कहं वा ससुरासुरनरनरिंदसंदोहवंदणिज्जपायपकेरुहेण तुमए विराहियं भुवणत्तयपयंडं सोहिस्सइ
नायखत्तियकुलं ? अहो महामंदभागिणो अम्हे जेसिं करयलाओऽवि अवक्कमइ रयणंति, एवमाईणि कलुणवयणाणि
भासिऊण निरभिलासा चेव निवडिऊण चलणेसु भगवओ विव्रान्तिं काउं पवत्ता—

जइवि जिणनाह ! तुम्हे पवज्जं काउमुज्जमह इणिंह । तहविदु अम्ह सुहट्ठा पडिवज्जह निक्खमणमहिमं ॥ १ ॥
तेसिं उवरोहेणं तओ जिणिंदो इमपि पडिसुणइ । अब्भत्थणभंगपरमुहाइं हिययाइं गरुयाणं ॥ २ ॥

अह नंदिवद्धणनरिदेण भणिया नियपुरिसा-अरे सिग्घं महरिहं भगवओ अणुरूवं अभिसेओवगरणं उवाहं-
 रेह, जं देवो भणइत्ति सम्मं पडिमुणिऊण निग्गया पुरिसा, पडणीकया अट्टोत्तरसहस्ससंखा अणेगे सुवन्नाइ-
 कलसा, उवाहरियाइं समत्थपसत्थत्तित्थसमुत्थाइं सलिलाइं, उवणीयाओ परमोसहीओ, पणामिया गोसीसिचंद-
 णाइविलेवणविसेसा, एत्थंतरे चलियासणा बत्तीसंपि पुरंदरा विम्बियमणा ओहिणाणसामत्थमुणियपरमत्था
 तक्खणं महप्पमाणविमाणारूढा वियसियसयवत्तविसालोयणा अहचंदणाणुलित्तगत्ता नियंसियसिलंधपुण्णसुहं-
 फरिसपवरदूसरयणा कुंदसंखदलदगरयधवलदंतंपतिरेहंतवयणा अंजणपुंजघणमसिणरुयगरमणिज्जेकसपासा भइजो-
 वणे वट्टमाणा मऊहपडलपल्लवियचूडामणिपसाहियमत्थया अणेगरूवाभरणभूसियसररा सोमचारूवा छत्तविंधाइ-
 विविहक्कुहधारिणो असंखदेवकोडिचडगरपरियरिया पडहमुइंगकाहलतिलिमहुडक्काइतूरवभरियंवरा जिणिदस्स
 अंतियं समागया, तिपयाहिणादाणपुव्वगं च पणमिऊण पराए भत्तीए पहूणो पायपंकयं कयत्थमप्पाणं मंनता
 जिणचरणमुद्दाविन्नासमुंदरे निसन्ना भवणंगणे ।

अह अचुयामरिदेण हरिसुल्लसंतदेहेण भणिया नियनियदेवा-भो सिग्घमेव निवत्तह जिणस्स महावीरस्स जोगं
 महंतं निक्खमणाभिसेयं, ते य एयमायन्निऊण कयपणामा अणेगकणयाइकलसे खीरोयसलिलपडिपुन्ने असंखपुण्णप-
 डलाइं च अन्नं च तहप्पगारमभिसेयपाओगं पहाणवत्थुनिवहं अचुयसुराहिवस्स पणाभेत्ति, तओ अचुयतियसाहिवा

सयलनियदेवपरिथरिओ तेहिं दिवैहिं कणयाइकुमेहिं अट्टसहस्ससखेहिं दिवोसहिंसुगंधगधुम्मिस्समेहिं मंदिरिट्ठियं
भयवंतं हरिसचियसियवयणो अभिसिंचइ, एवं कमेण सेसावि सुराहिवइणो चंदसूरपज्जता णवन्ति जयगुरुं, अह तेसु
मज्जणं काज्जण सट्ठराण्हिएसु नंदिवद्धणो राया कयमुहकोसिचिन्नासो परेणं विणएणं अचंतमप्पमत्तचित्तो तेहिं पुवो-
वणीएहिं चामीयराइकलसहस्सेहिं गंधुद्धुरपवरतिथजलभरिएहिं मज्जेइ जिणवरं, तहा वट्टमाणे य भगवओ मज्ज-
णमहूसवे केइ सुरिंदा चालेति मंदं मंदं चामीयरदंडुडामराओ चामराओ केवि धारिंति नियधवल्लिमाविजियसिय-
सयवत्ताइं आयवत्ताइं केवि संमुहमभिट्ठाविति पणट्ठखंपणं पवरदप्पणं केवि करयलेणुव्वहति सुगंधखीरोयसल्लिपुन्न-
पिहाणपउमगंधुक्कडे कुडे केवि उप्पादेति इज्झंतारुखणसारसुराहियूधूमंधयारलंछियं पंचवन्नयणधूवकडुच्छुयं केवि
समुव्वहति परिमलमिलंतालिसामलाओ दसद्धवन्नकुसुममालाओ, अन्ने देवा य देवीओ य भगवंतं अभिसुहट्ठियाओ पज्जु-
वासंति । अह निव्वत्तियम्मि मज्जणे नंदिवद्धणो राया दोच्चपि उत्तरावक्कमणं सीहासणं विरयावेइ, तत्थट्ठियं च भयवंतं
सेयापीयकलसेहिं णववेइ, तयणंतरं च णं अलंकारियस्स पुव्वाभिसुहसीहासणसन्निस्सन्नस्स सामिणो सुराभिसुकुमालाध-
कासाइल्लहियसरीरस्स गोसीससरसंचदणचच्चियंगस्स परिहियनिरुव्वहयफ़ल्लिहुज्जलदिद्वेद्वदूसजुयलस्स निव्वज्जपंचराय-
रयणकडिसुत्तयस्स कणगसेलसिलाविच्छिन्नवच्छत्थलवोलेतविमलमुत्ताहलकलावस्स विचिच्चमणिखंडमडियंकुडलुज्जो-
वियगंडयलस्स रयणक्कडकिरीडविभूसियसिरस्स पंचवन्नपुफ़मालालंक्रियस्स पाविस्वत्तसुगंधवरवासस्स भगवओ वट्टमा-

णस्स वंदिऊण चलणजुयलं सुरासुरिंदा पुणो पुणो धरणियलनामिउत्तिमंगा आसीसासएहिं थुणिउं पवत्ता, कहं ?—
 विजयसु जएक्कबंधव ! ससुरासुरतिहुयणेणवि अजेयं । अचंतमहल्लं भोहमल्लमचिरेण लीलाए ॥ १ ॥
 मिच्छत्ततिमिरसुच्छिदिऊण सन्नाणसूरकिरेहिं । पयडेसु सुत्तिमगं विमग्गलग्गाण भव्वाण ॥ २ ॥
 पालेसु समणधम्मं चिरकालं जाव निग्गयपयावो । अजियं जिणेसु मज्झे जियस्स निवससु तुमं नाह ! ॥ ३ ॥
 तुह अणवरयं गुणनिवहक्कित्तणारावओ विबुहलोगो । सवत्तो दिसिवलयं पक्कुणउ कोऊहलाउलियं ॥ ४ ॥
 तुज्झ जसो कुमुओयरगोरो भुवणत्तएवि हिंडंतो । सवत्तो उग्गयचंदविबसोहं समुव्वहउ ॥ ५ ॥
 सिंहस्स व तुह अचंतविक्कमं पेच्छिऊण तरलच्छा । भीया कुत्तिथियमिगा एत्तो दूरे पलायंतु ॥ ६ ॥
 इय आसीवायपुरस्सराहिं थुणिउं गिराहिं भुवणगुरुं । नट्टविहिं च पयट्ठिय विरयंमि सुरिंदविंदंमि ॥ ७ ॥
 भावियजयगुरुविरहग्गिदूमिओ नंदिवद्धणो राया । वाहरिउं निययुरिसे पयंपिउं एवमाढत्तो ॥ ८ ॥
 भो भो देवाणुपिया ! जगपहुणो निमित्तं विसिट्ठवेइगापरिविखत्तपरिसरं सरसचंदणुम्मिस्सद्युसिणरसालिहिय-
 विविहसत्थियं थिरनिवेशियसपायपीढनानामणिमयसीहासणं रणंतकणयकिंकिणीमहुरनिनायमुहलियदियंतरं रंगंत-
 विविहचिंधसयसंपुन्नं पन्नासधणुहायामं पणुवीसधणुविच्छिन्नं छत्तीसधणुमुविद्धं चंदण्णभनामधेयं सीयं उवट्ठवेहत्ति ।
 तओ ते सामिवयणं निसामिऊण पहिट्ठहियया तहत्ति सव्वं निवत्तंति ।

एत्थंतरे तियसाहिचेण हरिसुल्लसंतहियएण । पवरमणिलुडमंडियमहतसंभवावलीकलिया ॥ १ ॥

पंचविहरयणकिरणोहविहियदिसिसुखिंदकोदंडा । चंदप्पभाए तुल्ला कारविया न्यियुरोहंतो ॥ २ ॥

सुवणच्छेरयभूया सिबिगा लंबंतमोत्तिओज्जला । नवरं इमावि तं चिय पढमं सिबिगं अणुपविट्ठा ॥ ३ ॥ त्रिभिर्विशेषकम् ॥

अह भयवं केसालंकारेण वत्थालंकारेण आभरणलंकारेण मल्लालंकारेणालंकिओ कयच्छुतवोकम्मो उट्टिऊण आस-
णाओ अणुप्पयाहिणीकुणंतो चंदप्पहं सीयमारुहिन्ता पुट्ठाभिमुहंमि सीहासणे निसीयइ, तओ भयवओ कुलमहारिया
णहाया सूइभूया गहियपवरनेवत्था हंसलक्खणं साडयं आदाय सामिस्स दाहिणे पासे भदासणंमि निसन्ना, एवं
अम्मघाईवि वामपासे संठिया, तहा सामिस्स पिट्ठओ एगा वरतरुणी विचित्तसिगारागारभूयं महंतं विमल-
मुत्ताजाललंबतावचूलयं पुंडरीयदंडं छत्तं धरेमाणी ठिया, उभयपासेसु य हुवे वरविलासिणीओ धोयरुप्पपट्टुधवलं
चामरजुयलं गहाय संठियाओ, उत्तरपुरत्थिममि य भागे एगा अबंतदरिसणिज्जा विलया निम्मलसल्लिपडिपुन्नं
सुरकारिरेरहंतनालागारं रथयभिंणारसुवहंती निसन्ना, एवं दाहिणपुरत्थिमेण एगा वरसुंदरी विचित्तमणिकिरण-
जालं सुयंतं कणयदंडं तालवटं करयलेण कलयंती दूरूढा, पिट्ठओ य सुवणनाहस्स भगवओ देविंदा हिमरययुद्धं-
दुप्पगासाइं वेरुल्लियमयदंडाइं अट्टसहस्सकंचणसलागाइं सबरयणामयाइं कुमुदामंदतुराइं आयवत्ताइं धरिति,
उभयपासेसु चंदप्पहसीयाइ सोहम्माहिवो ईसाणो य अमयहिमफेणुपुंजसन्निगासाइं चामरेहिं भयवंतं वीयंति ।

एतथंतरे नंदिवद्धणनरवइणो वयणेण पवररूवा निरुवहयंगा णहाया कयविलेवणा परिहियपवरवत्था सवालंकार-
मणहरसरीरा विसिट्ठवलसालिणो समवथा पुरिसा समूससियरोमंचकंचुथा कयसवकायच्चा नीसेसपुन्नपगरिसमग्गणं
मन्नमाणा सहस्ससंखा झडत्ति आंगंतूण तं सीयमुक्खिवंति, अह वचंतीए तीए सोहम्माहिबई सुराहिचो दाहिणिल्ल-
मुवरिल्लबाहं गिणहइ, ईसाणोऽवि देविंदो उत्तरिल्लबाहं, चमरवल्लिणो य असुरिंदो दाहिणुत्तरसिबिगाहेड्डिल्लबाहाओ
समुवहंति, अवसेसा भवणवइवाणमंतरजोइसवेमाणिया य जहारिहं सीयमुक्खिवंति । किं बहुणा ?—

पुविं उक्खित्ता माणुसेहिं साहट्ठरोमकूवेहिं । पच्छा वंहति सीयं असुरिंदसुरिंदनागिंदो ॥ १ ॥

गेहाओ नीहरंते जिणंमि चाउविहेहिं देवेहिं । इतेहि य जंतेहि य कहमिव उब्भासियं गयणं ॥ २ ॥

वणसंडोव कुसुमिओ पउमसरो वा जहा सरयकाले । सोहइ कुसुमभरणं इय गयणयलं सुरगणेहिं ॥ ३ ॥

सिद्धत्थवणं व जहा असणवणं सणवणं असोगवणं । चूयवणं व कुसुमियं इय गयणयलं सुरगणेहिं ॥ ४ ॥

अयसिवणं व कुसुमियं कणियारवणं व चंपगवणं वा । तिलयवणं व कुसुमियं इय गयणयलं सुरगणेहिं ॥ ५ ॥

वरपडहभेरिझल्लरिंदुभिंसंखाइतूरनिग्घोसो । धरणिथले गयणयले पयट्ठिओ देवमणुएहिं ॥ ६ ॥

एवं च भुवणबंधवस्स वच्चमाणस्स तण्णढमयाए सव्वरयणविणिम्भविथा पुरओ अहाणुपुवीए सेत्थियइणो
अट्ठमंगलगा संपट्ठिया, तयणंतरं च पुन्नकलसंभिगारा दिवा सच्छत्तपडागा गयणतलंचुंविणीओ पयणकंपराणं-

चलाओ महावेजयंतियाओ संपट्टियाओ, तयणंतरं वेरुलियविमलदिप्पतदंडं पलबकोरिटमालोवसोहियं चंदमंड-
लाणुरूवं समूसियं दिवमायवत्तं, पवरसिंहासनं च समणिरयणपायवीढं मणिमयपाउयाजोगसंपजुत्तं बहुकिंकरनपरि-
ग्गहियं संपट्टियं, तयणंतरं च ललियपुलियलंधणजवणगईणं लोलंतलासगललभवरभूसणाणं कणयमयमुहनिजोगजु-
त्ताणं उज्जलगथासगमडियकडीणं तरुणपुरिसपरिक्खित्ताणं अट्टसयं जच्चतुरगाणं अहाणुपुट्ठीए संपट्टियं, तयणंतरं
च सत्तंगपइट्टियाणं भइजाइसमुब्भवाणं सवलक्खणोवेवयाणं कंचणकोसीपविट्ठकलहोयधवलदंताणं कंचणमणि-
तारगामूसियाणं कुसलारोहसंपउत्ताणं अट्टसयं उत्तमकुंजराणं संपट्टियं, तयणंतरं च सलत्ताणं सज्झयाणं सघटाणं
सपडागाणं सतोरणवराणं सनंदिदोसाणं हिमवंतुगयतिणिसदारुनिम्मियाणं सुसिलिट्ठचक्रमंडलधुराणं जोत्तियपव-
रतुरंगाणं रणज्झणंतकिंकिणीजालाणं वत्तीसतोणपरिमंडियाणं चावपमुहपहरणनिवहभरियाणं अट्टसयं रहाणं अहा-
णुपुट्ठीए संपट्टियं, तयणंतरं निविडपरियराणं करयलकलियविविहाउहाणं निययविक्रमोवहासियससभडाणं पुरिसा-
णमट्टसयं संपट्टियं, तयणंतरं च अपरिगणियसखं हयाणीयं गयाणीयं रहाणीयं पायत्ताणीयं च पहावियं, तयणंतरं
च पंचवन्नकुडभीसहस्सकल्लिओ वइरमयवट्टडुजट्टिपइट्ठिओ विचित्तलत्ताइच्छत्तपरिक्खित्तो रंतंभभरुसुममाला-
मंडिओ अनिलदोलिजमाणधंटियापडलमणहरारावपूरियनहविवरो जसपुंजोव्व सुत्तंतो सुत्तिमगोव्व पयडो नियगु-
रुयत्तणेण गयणं व परिमिणंतो सायरसुराविसरसंपरिगहिओ जोयणसहस्ससिओ महिंदज्झओ संपत्थिओ, तयणंतरं

च अन्ने य बहवे दंडिणो मुंडिणो सिंहडिणो हासकरा खेडुकरा चाडुकरा गायंता य वायंता य नचंता य रमंता य हसंता य जयजयसहं पंडजमाणा मंगलसहस्साइं कुणमाणा गुणगणं शुणमाणा संपत्थिया, तयणंतरं उग्गा भोगा रायन्ना खत्तिया सेट्ठिणो सत्थवाहा पुरिसनियरपरिरिया केइ पायविहारेणं केइ रहगया केइ तुरगाधिरूढा केइ कुंज-
रपट्टिसन्निसन्ना केइ जाणजंपाणाइगया सामिस्स पुरओ मग्गओ य संपट्ठिया, तयणंतरं अन्ने य बहवे देवा य देवीओ य सएहिं सएहिं विमाणेहिं सएहिं सएहिं चिंधेहिं सएहिं परिवारेहिं समंतओ संपट्ठिया, नंदिवद्ध-
णमहानरिंदोऽवि कयमज्जणो विहियसिंगारो गंधसिंधुरखंधगओ समूसियसियायवत्तो धुवंतधवलचामरो हयगयर-
हओहसेणापरिकिन्नो पिट्ठओ भयवंतं अणुगंतुमारद्धो ।

एवं च नियनियट्ठाणगयसुरासुरनरनियराणुगम्ममाणो वद्धमाणो सत्तरयणिप्पमाणसरीरो समचउरंसंठाणसं-
ठिओ वज्जरिसहनारायसंधयणो कमलुप्पलसुरहिनीसासो जल्लमलकलंकसेयरयदोसवज्जियतणू देहप्पभापभारभा-
सुरियदिसिचक्कवालो भिंगनीलजल्लभसलसामलपसत्थसुहुमनिबद्धनिउरंबनिचियकुंचियपयाहिणावत्तकेसो अद्धयं-
दम्ममनिडालवट्ठो पमाणजुत्तमुंदरसवणो चावदंडकुडिलभमुहो धवलपत्तलवियसियपुंडरियनयणो गरुडाययउज्जुतुं-
गनासो विपक्कविंवाफलसंनिभाधरोट्ठो संखगोखीरमुत्तामणिधवलसुसिलिट्ठसमदंपती पीणमंसलकवोलजुयलो सज-
लघणत्थणियदुंडुभिनिग्घोसगंभीरसरो दाहिणावत्तरेहावलयालंकियसुप्पमाणकंठकंदलो वणमहिससीहसंहलपडि-

पुन्नवदृखंधो सुहुमलोमरेहतंसलपलंबवाहुदंडो संजमलच्छिनिवाससुभगविसालवच्छत्थलो पयरोमराइरेहिरगंभी-
रनाहिसोहियमज्झभागो वट्टाणुपुवोवचियचारुजंधो सुसिलिदुहलुंको नगनगरभगरसागरचक्कसुमच्छाइलक्खण-
लच्छियचलणतलो परिचत्तपाणभोयणेसु पासायसिहरमारुदसु चेलुक्खेवं करेतसु पुरजणेसु कुसुमनियरं सुंचमाणेसु
गयणट्ठियतियेसु सप्पणयपणच्चमाणेसु विज्जाहरीसु मंगलसुहल्लसु वारविलयासत्थेसु दिज्जमाणेसु सवकासुयदा-
णेसु गोत्तमुक्कित्तमाणेसु देवचारणेसु कमेण संपत्तो नायसंडाभिहाणंसुववणंमि । तं च केरिसं ?—

पढमुम्मिछिरपल्लवसोहिल्लमहल्लपायवसमूहं । सवोउयकुसुमसमिद्धगंधवायंतमिउपवणं ॥ १ ॥

तरुणतरुसंडपत्तलसाहापडिरुद्धसूरकरपसरं । अच्चंतरम्मयागुणरंजियपरिभिमियसुरखयरं ॥ २ ॥

दिसिसुहपवियंभियकुसुमपरिमलायडिहया भमरनियरा । उज्जाणंतरविहरणपरंसुहा जत्थ कीलति ॥ ३ ॥

जं जिणमितं नाऊण पवणडोल्लतपल्लवकरेहिं । चिरकालदिट्ठपियमाणुसं व तं वाहरइ तुरियं ॥ ४ ॥

मयभरपरवससिहिकल्लरेवण जं सागयं व वागरइ । निवडंतकुसुमनियरुक्क्रेण अगंधं दओइ ॥ ५ ॥

इय निययचंगिमाविजियनंदणुज्जाणरम्मयगुणस्स । जयनाहचलणपूयस्स तस्स का वणणा होउ ? ॥ ६ ॥

एवंविहिंमि तत्थ आंगतूण सिबियाओ ओयरिऊण सामी असोगवरपायवस्स मूले सयमेव अलंकारकुसुमनिवहं
ओमुयइ, सा य कुलमयहरिया हंसलक्खणेण पवरसाडएणं तं पेच्छमाणी छिन्नमुत्ताकलावगतंतमुत्ताहलविब्भमाइ

अंसुयाइं विणिम्सुयमाणी सदुक्खं रोयमाणी मन्नुभरखलंतक्खराए गिराए भयवंतं भणिउं पवत्ता—

कासवगोत्तुब्भूओऽसि पुत्त ! सिद्धत्थपत्थिवसुओऽसि । नायकुलनहयलामलसारयथणीमयंकोऽसि ॥ १ ॥

वासिट्ठसगोत्तुब्भवतिसलादेवीए कुच्छिजाओऽसि । खत्तिजणतिलओऽसि य नवजोच्चणदिब्वदेहोऽसि ॥ २ ॥

गन्भावत्थाओच्चिय अइसुकुमालोऽसि सुंदरंगोऽसि । अप्पडिमख्खलायन्नकंतिपब्भारकल्लिओऽसि ॥ ३ ॥

तिहुयणविकखायजसोऽसि सयलविन्नाणनीइनिउणोऽसि । ता कहमिममइद्धरतवकम्मं संपवज्जिहिसि ? ॥ ४ ॥

इह असिधारसरिच्छं महच्चयं वच्छ ! अणुचरेयन्नं । घोरोवसग्गवेयणनिवहाओ न भाइयन्नं च ॥ ५ ॥

सुद्धुच्छतुच्छभोयणवित्ती निच्चं पि एत्थ कायच्चा । गामागराइसु तहा पडिबंघमई विमोत्तच्चा ॥ ६ ॥

इय वच्छ ! तुज्झ साहेमि केत्तियं सुणियसयलभावस्स । तह कहवि पयट्ठेज्जसु जह सिवसोक्खं लहुं लहसि ॥ ७ ॥

एत्थंतरंमि नीसेससयणवग्गेण परिगओ राया । आणंदांमंदगलंतनयणवाहप्पवाहेण ॥ ८ ॥

अभिवंदिऊण चरणे जिणिंदसिरिवद्धमाणसामिस्स । एगंतमवक्कंतो दुस्सहविरहग्गिसंतत्तो ॥ ९ ॥

कुलमयहरियावयणं तहत्ति पडिसुणिय जिणवरो वीरो । सयमेव पंचसुट्ठियलोयं काउं समारद्धो ॥ १० ॥

ते य केसे सामिकरयलपल्लत्थिए सुरिंदो नियदेवदूसंचलेण ईसिविणमियसरीरो सम्मं पडिच्छइ, कमेण य निव्वत्ति-

यंमि लोयकम्मे जिणं अणुन्नविऊण तं कुंतलकलावं मेहपडलं व सामंलं दुज्जणहिययं व कुडिलं खीरोयसल्लिले पक्खिस्सवइ,

दिवतूरनिनाथं मणुस्समंगलुग्गारहलबोलं च निवारइ, अह मग्गसिरकिण्हदसमीए पच्छिमण्हसमए हत्थुत्तरनक्खत्ते वट्ट-
माणे सयमेव संबुद्धो भयवं नमोत्थु णं सिद्धाणंतिक्कहु करमि सामाइयं सवं सावज्जं तिविहं तिविहं वोसिरामिन्ति चारित्तं
पडिवज्जए, एत्थ य पत्थावे अंवरतलट्टिण भूमितलगएण य देवदेविविजाहरनरविसरेण विमुक्को भगवओ चाउहिंसिपि
इंकारसुहलभसलविलुप्पमाणो सुगंधियसयलजीवलोओ पिंगलियगयणमंडलो पवरवासनुत्तो, बहलधूमसिहाजालुच्छा-
इयदिसासुहो ठाणठाणेसु ठविओ डञ्झंतागुरुक्खुरंगमयमीणुग्गारकणूरधूवघडियनिवहो, पहराओ असंखसंखयोसु-
म्मिस्सभंभासुइंगमदलकाहलालिलिमडुक्कदक्काओ, कओ य निब्भरभरियमुवणंतरालो जयजयारवोत्ति ॥

अह चत्तवसणभूसणमल्लस्स पुरंदरेण जयगुरुणो । वामंसतले नसियं अदूसियं देववरदूसं ॥ १ ॥
नीसामन्ने सामन्नगुरुभरे तह जिणेण उक्खित्ते । काउं साहिज्जं पिव मणपज्जवणाणमुप्पणं ॥ २ ॥
ओलंबियभुयपरिहो वाढं निक्कासियमोहमाहणो । मेरुव निण्णकंपो काउस्सग्गे ठिओ भयवं ॥ ३ ॥
चउविहदेवनिकाओ नयरजणो नरवई य नमिज्जण । जयनाहं भत्तीए नियनियठाणे पडिनियत्तो ॥ ४ ॥

इय उत्तमगुणगणवद्धमाणसिरिवद्धमाणचरियमि । सग्गापवग्गसंगमल्ल्छीण निवासभवणमि ॥ ५ ॥

गब्भावयारजम्मणादिक्खाकक्षाणकहणपडिवद्धो । संपत्तो पज्जंतं चउत्थओ एस पत्थावो ॥ ६ ॥

इइ सिरिगुणचंदसूरिरइए सिरिमहावीरचरिए गब्भावयारजम्मदिक्खाकक्षाणगमओ चउत्थो पत्थावो

भाविमणत्थसत्थं पेहंताविहु सबुद्धिविहवेण । धीरा सहरिसमणिसं पत्थुयवत्थुं समत्थंति ॥ १ ॥

इति विभाविकुणं व भविस्सोवसगवगसंसग्गासंखुद्धमाणसो महावीरजिणवरो गंभीरिमाइगुणरथणागरो दूरज्झियनीसेसवसणोवि वासवोवरोहधरिएक्कचारुवसणो मग्गणगणपूरिआसोऽवि निव्वाणकरो सुक्कतुरयचारोवि दूर-
दमियदुद्धिदियासो सकलत्तोऽवि परिचत्तपरिग्गहो परिहरियकरिवरोवि मत्तकुंजरगमणो भयवं आपुच्छिऊण अहास-
न्निहिं नायवगं नायसंडवणाओ निग्गओ, कमेण य अतुरियं जुगमित्तिनिहितचक्खुपसरो सुहुत्तावसेसंमि वासरे
कुम्मारागामं नाम संनिवेशं पाविओ, ठिओ य एगंते काउसमगेणंति ।

इओ च सिद्धत्थरायवालवयस्सो कुंडगामपुरवत्थवो महाज्यूवसणविणासियासेसतहाविहद्वनिचओ भोगोव-
भोगलालसो असंपज्जंतवंछियत्थो सोसो नाम बंभणो झीणविहवत्तणेण अचयंतो परिचियजणमज्झे निवसिऊण
गिहे मोक्षूण बंभणिं गओ वइरागराइसु दवोवज्जणनिमित्तं, तत्थ य अइनिविडत्तणओ अंतराइयकम्मस्स अच्चंतपव-
लत्तणओ असायवेयणिज्जस्स निष्फलत्तणओ पुरिसयारस्स अवस्सं भवियव्वयाए तहाविहभावस्स सुचिरं कालं परि-
भमियस्सवि तेसु तेसु ठाणेसु न तस्स काणकवड्डयमेत्तावि संपत्ती जाया, समइक्कंताणि य आसापिसायनडियस्स
बहूइं वच्छराइं, अणया य—

धवलबलायादीहरवयणो अह तरलियविज्जुलियनयणो । कलियसुरारायचावो अंजणगिरिसिंगसारिच्छो ॥ १ ॥

परिमुक्कगज्जिघोरदृहासहयविरहियहियवावारो । वरिसायालो वेयालदारुणो झत्ति संपत्तो ॥ २ ॥

तं च ददूण सो सुमरियनियकलत्तो तक्कालवियंभमाणनीलकंठरवसवणचउगुणीकयउक्कंठो दीहं नीससिऊण चलिओ
अविलंबियपयाणगेहिं सनयराभिमुहं, अइदूरत्तणेणं मगगस्स दुब्बलत्तणओ सरिस्स असमत्थत्तणेणं सिग्घगमणस्स
मासपंचमपज्जंते संपत्तो कुंडग्गामे नगरे, पविट्ठो नियगिहे, संभावियविट्ठदवाए अब्भुट्ठिओ पणइणीए, दिणं
आसणं, पक्खालिया चरणा, पुच्छिओ सरिस्सकोसलं, वाहियं सरिं, दंसिओ पणयभावो, भोयणकाले य उवट्ठा-
विया य कंठिगाइ हट्ठे विणिवट्ठिऊण विचित्ता रसवई, काराविओ भोयणं, तटुत्तरकालं ठिओ सयणिज्जे, वंभणीवि
पहिट्ठहियया समीवमागया तस्स, आरद्धा य पुच्छिउं, जहा-अज्जपुत्त ! केसु केसु देसंतरेसु परिभसिओ एत्तियं
कालं ? केत्तियं वा दविणजायमज्जियंति ? तेण भणियं-पिए ! केत्तिए साहेमि देसे ? किं वा केहेमि दविण-
ज्जणं ? तहाहि—

सिरिपच्चवइरागरसमुदपरतीरोहणगिरीसु । रसकूविगासु विवरेसु भुयंगभीमेसु विविहेसु ॥ १ ॥

भमिओ एत्तियकालं दच्चपिवासाए गेगठाणेसुं । विहिओ य खन्नवाओ धमिया य सुवणणपाहाणा ॥ २ ॥

अंजणसिद्धिनिमित्तं दिट्ठोसाहिणो निरुविया बहुसो । विहिआ नरिंदसेवा वियाणिआ भंतंतताई ॥ ३ ॥

असिचावकुंतचक्काइएसु सत्थेसु जणपसिद्धेसु । पक्कओ परिस्समोविहु किं किं अहवा मए न कयं ? ॥ ४ ॥

तहविहु पिए ! न जाया भोयणमेत्तावि मज्झ सामग्गी । तुह दंसणतण्हाए नियत्तिओ केवलं इण्हि ॥ ५ ॥

इमं च आयणिऊण वज्जताडियच्च सुसियच्च सा माहणी कसिणवयणा कोवफुरंताहरा रत्तनयणा भणिउमाढत्ता-आ पाविट्ठ ! अवलक्खणसिरसेहर ! वाहणसरिच्छ ! निब्भग्गनिडाल ! जइ एवं ता कीस एत्तियं कालं कडुघोसेडीफलाइ बुक्कमाणो ठिओऽसि !, किं निरास ! तत्थ वसंतेण तुमए इमावि वत्ता न निसामिया ? जहा पोक्खलावट्ठगमेहोच्च अणवरयकणगधाराहिं सिद्धत्थनरिंदनंदणो संवच्छरं जाव वरवरियापुव्वगं वरिसिओत्ति, किन्न पेच्छसि पुरओ आज-म्मदारिहियावि रहतुरयवाहणा परिहिद्यदिवाभरणा कारियउत्तुंगभवणा नियपणइणीपरिगया जिणप्पसाएण विल-संति ?, किं वा न दिट्ठा पडिपुण्णमणोरहा उवलद्धकणयरासिणो सगिहेसु पडिनियत्तता देसंतरागयजणा ?, बंभ-णेण भणियं-पिए ! दूरदेसंतरनिवासत्तणेण नो सुणियमेयं मए, किं करेमि विपरंमुहो हयविही दीहकालमणुभ-वियच्चा विसमदसा, बंभणीए भणियं-अज्जवि लहुं गच्छसु तस्स सगासे, करुणापरो खु सो भयवं निच्छियं तुमए मग्गिज्जमाणो किंपि दाविस्सइत्ति, एवं निसामिऊण धाविओ महावेगेण जिणाभिमुहो बंभणो, आपुच्छंतो पत्तो कुमारगामं, दिट्ठो काउस्सग्गठिओ सुरवइनिहित्तसुगंधचुण्णपरिमलुम्मिलंतच्छप्पयच्छणदेहो भयवं जिणवरो, तिपया-हिणिकाऊण पणमिओ परमायरेणं, विण्णत्तो य जहा-देव ! निसामेसु मम वत्तं-

कंठब्भंतरपक्खलियजीहमफुडक्खराए वाणीए । को को न पत्थिओ नाह ! दाणविपरंमुहोवि जणो ? ॥ १ ॥

कथं न वसिओ पहधूलिधूसरो देव ! पहियगेहेसुं । हयउयरपरणट्ठा किं वा न कयं कुकम्ममवि ? ॥ २ ॥
दविणोवज्जणेहं लहुं पविट्ठो कयंतवयणेवि । नेवत्थं पि नडेण व तं नत्थि मए न जं धरियं ॥ ३ ॥
इय दूरदेसविहरणपरिसमुण्णविविहरोगस्स । विगओ एत्तियमेत्तो कालो मम मंदपुन्नस्स ॥ ४ ॥
संपइ पुण धरिणीए आगयमेत्तस्स साहियं एयं । जह संवच्छरसीमं दिन्नं तुमए महादाणं ॥ ५ ॥
केसिपि नगरपट्टणगामागरपवरदवभंडारा । अन्नसिं मयजलगंधंधुरा उद्धुरा करिणो ॥ ६ ॥
अन्नसिं पारसवब्बरउलवल्हीयसंभवा तुरया । केसिपि जच्चकंचणजडिया वरभूसणुग्घाया ॥ ७ ॥
इय संकप्पियभूरिप्पभेयदाणेण कप्पतरुणव्व । निम्महिया नाह ! तए तण्हा मेहेण व जणाणं ॥ ८ ॥
एकोच्चिय दुग्गयलोयतिलोयभूओ ठिओ अहं विहलो । पुव्वभवजणियदुव्विसहदुद्धुकम्माणुभावेणं ॥ ९ ॥
करुणारसवरिसणिसित्तदुक्खसंतत्तसव्वभुवणवण ! । ता पसिय पणयवच्छल ! पूरेसु मणोरहं मज्झ ॥ १० ॥
तुज्झ पयकमलसेवाविथंभियं सगमच्चपायाले । जं कीलंति जहिच्छं सुरवइनरनाहदणुवइणो ॥ ११ ॥
सिद्धत्थरायनंदण ! तुमएऽविहु जइ कहं पि चत्तोऽहं । पायालनिवडियस्स वि नत्थि धुवं ता मम परित्ता (धरिस्ती) १२
एमाइ दीणावसगलंतनयणंसुधोयवयणेणं । तह तेण विन्नविज्झइ जह भिज्झइ वीयरगोऽवि ॥ १३ ॥
भगवयावि एवमायणिऊण समुच्छलियापरिकलियकारुण्णचित्तेण भणियं-भो भो देवाणुप्पिय ! परिचत्ता-

सेससगोऽहं संपयं, तुमं च अचंतदोगचभरविहुरियसरीरो, अओ जइवि असारिच्छमेयं तहावि गिणहसु इमस्स देव-
दूसस्स अद्धंति, जं सामि ! आणवेइत्ति भणिऊण हरिसवसुग्गयवहलपुलओ बंभणो वत्थस्स अद्धं गहिऊण कयप्प-
णामो अणुचिंततो पुणो पुणो सामिस्स अपुवसु दारत्तणं गओ नियगेहं, दिट्ठो य बंभणीए, पुच्छिओ परमायेरणं,
साहिओ तेण देवदूसद्धलामो, जाओ बंभणीए परमसंतोसो ।

अन्नदिवसे य तेणवि समप्पियं तं दूसद्धं दसिगाबंधणत्थं तुन्नागस्स, तेणवि तारिसमदिट्ठपुव्वं पेच्छिऊण
पुच्छिओ सो बंभणो-भइ ! तुमए कहिं लद्धमेयं ? , न जेण एरिसदूसाइं महीयले दीसंति, बंभणेण भणियं-मुद्ध !
भगवया दिण्णंति, तुण्णागेण भणियं-वीयंपि खंडमाणेहि, जेण उभयखंडमीलणेण तुण्णेमि एयं, पडिपुणं व दीणा-
रलक्खसुद्धं पावेइ, अद्धेण य तुज्झ ममंपि दवं भविस्सइत्ति, बंभणेण भणियं-कहं पुण दुइज्जं वत्थद्धं लभि-
स्सामि ? , जिणसमायारवियक्खणेण भणियं तुन्नागेण-जया खाणुगाइफरिसेण सामिखंधेदसाओ निवडइ
तया गिणिहज्जासि, एवं सोचा सो तल्लोभेण लग्गो भगवओ पिट्ठीए, जहा य तस्स तल्लामो भविस्सइ
तहा पुरओ भणिस्सामि ।

अह कुम्मारगामवहिया पडिवन्नपडिमस्स पलंबियमुयस्स भगवओ महावीरस्स समीचे सयलदिगवाहपरिस्संते छुहा-
भिहए चरमाणे वसहे भलविऊण एगो अचंतपावसंगयसरीरो विणयणयविण्णज्जा(नो)णविज्जिओ गोवालो गावी-

दुहणनिमित्तं गओ गाममज्जे, तत्थ द्वियस्स वावारंतरवावडणेण लग्गा महती वेला, ते य वड्डग्गा खणमेकं भगवओ समीवे चरिऊण खुहाभिहयसरीरा सणियं सणियं तिणभक्खणं कुणमाणा पविट्ठा अडविं, सो य गोवालो खणंतरेण आगओ भगवओ समीवे, वसहे अपेच्छतो पुच्छिउमारद्धो-भो देवज्जया ! जे तुह मए भलाविया पुंघं वसहा ते साहेसु कत्थ गयत्ति ? ,सामीवि असुणिंतोव तुणिहक्को ठिओ, तेणावि नायं-नूणमेसो महाणुभावो न जाणइत्ति, तओ गिरिकंदरेसु य नईसु य निज्झरेसु य महातरुहणेसु य गामंतरालेसु य अन्नसु य विविहप्पएससु य गोसामि-यभयभीओ विमणहुम्मणो तं सगगं काउमारद्धो, ते य वसहा सुचिरं सच्छंदप्पयारेण उवसंतछुहावेयणा पुणोवि समागया तत्थेव पएसे, भयवंतं दट्टूण रोमंथता य ठियत्ति, सो य गोवालो अणुबलद्धगोणपउत्तिविसेसो चउपहर-रयणिजागरपरिमिलाणनयणो रेणुभरधूसरियसरीरो खाणुकंटगाइपरिविहओ सुचिरं परिसमिऊण बलिओ तेणव पएसेण, दिट्ठा य ते सामिणो समीवे सुहनिसन्ना नियवसहा, अह रोसरुणियच्छो फरुसगिराए भयवंतं तज्जिउमा-ढत्तो, कहं विय ?—

देवज्ज ! दुज्जणो इव दावोसि पसंतवत्थनेवत्थं । अन्विमतओ पुण चित्तकुडिलया एरिसी तुज्ज ॥ १ ॥

जं गोविऊण हरणट्ठया तुमं मज्ज संतिए वसहे । नूणमियाणिं गच्छंतओऽसि जइ मं न पेच्छतो ॥ २ ॥
तावित्थ चंगिमा तुह वयस्स ! अरि भल्लिमा विवेयस्स । गोमट्टत्तणमणं किंपिय दक्खिन्नभावस्स ॥ ३ ॥

मन्ने पलवियभुओ निरुद्धनीसेसवज्जवावारो । तं जणमुसणनिमित्तं उवायजालं विचिंतेसि ॥ ४ ॥

इय दुव्वयेहिं तज्जिऊण सो दावणेण हणिउमणो गोवालो वेयालोच्च धाविओ भयवओऽभिमुहं, एत्थंतरे सोहं-
म्मसभासीहासणनिसण्णो सहस्सनयणो सामिस्स लुहविहारोवलंभनिमित्तं ओहिं पउंजइ पेच्छइ य भयवंतं पडुच्च
वेणेण धावमाणं तं गोवयं, तओ तत्थट्ठिओऽवि तं थंभिऊण सको दिवाए देवर्गइए उइण्णो जिणसमीवे, तज्जि-
उमारद्धो य तं गोवालयं, जहा-रे दुरायार ! पुरिसाहम ! पसुनिविसेस ! नूणं एयाण वसभाण चैव पुण्णेहिं न
भवसेसि तूमं तिणाइ, जो एयं सिद्धत्थनारिंदनंदणं परिचत्तकारितुरयपाइक्कसंदणं संपयेमेव गहियपव्वजं नियथस्मक-
ज्जसज्जं समसुणिवतणमणिं वट्ठमाणमहासुणिं पि न सुणेसित्ति, एवं निब्भच्छिऊण तं सको तिपयाहिणीकाऊण भय-
वंतं वंदेइ, सिरनिमियकरकमलो य विन्नवेइ-भयवं ! तुम्ह दुवालस वरिसाणि जाव ससणमेत्तेणवि दुक्खजणगा इयर-
जणजीवियंतकरणखमा पवरसूराणवि लोमुद्धोसजणगा उग्गा उवसगवग्गा भविस्संति, ता कुणह पसायं, अणु-
मन्नह एत्तिंयं कालं मम, जेण समीवट्ठिओ वेयावचं भे करेमित्ति, एयं च आयन्निऊणुस्सारियकाउसगणेण भणियं
भयवया, जहा-भो भो देविद !

तुह असरिसभत्तिमहाभरस्स जुज्जइ इमं न संदेहो । किं तु न भूयं एयं नो भवइ न भावि कहयावि ॥ १ ॥
जं तित्थया तुम्हारिसस्स निस्साए पुव्वकयकम्मं । खवइसु खविस्संति य खवेति वा निच्छियं सक ! ॥ २ ॥

अह परसामर्थेणवि जइ कम्मकखउ घडेज ता विहलो । सिरलोयंभचेराइविविहवचरणवावरो ॥ ३ ॥
अइसंकिलिट्टुचिचत्तणेण दढबद्धरसविवागाणं । सयसणुभवणं मोचुं कम्माण ण णिज्जरणभत्थि ॥ ४ ॥

एगोच्चिय सुहमसुहं एस जिओ सहइ कम्मवसवत्ती । अवयारुवयारकरा तस्सेव पभावओ हुंति ॥ ५ ॥

ता जे पुवं सिद्धा जे सिज्जिस्संति जे य सिज्जंति । ते नियवीरियकम्मकखएण अन्नोऽत्थि नोवाओ ॥ ६ ॥

एवंविह विविहमहोवसगवगं वियाणिउं पुवं । पडिवन्नोऽहं संजमभत्तो का तेसु मम गणणा ? ॥ ७ ॥

इय सुरनाहं विविहोवउत्तिजुत्तीहिं वोहिउं भयवं । काउस्सगंगमि ठिओ नूणं मियभासिणो गरुया ॥ ८ ॥

एत्थ य पत्थावे भयवओ चेव जणणिभगिणीए पुत्तो कयतहाविहघोराबालतवविसससामत्थोवलद्धवंतरसुरभवो सिद्धत्थो नाम देवो समागओ तं पएसं, सो य भणिओ सुरिंदेण जहा-भो सिद्धत्थय ! एस भयवं तुह आसन्नसयणोत्ति एगं कारणं, वीयं पुण ममाएसो, ता सब्बहा पासट्ठिओ सामिस्स मारणंति यमुवसगं पडिक्खलेज्जासिन्ति, सोऽवि एयमायन्निज्जण देविंदसंभासणजायपरमतोसो तहत्ति पडिसुणइ, पुंदरोऽवि सट्ठाणं गओ । अह जायंमि पभावसमए भयवं चलिओ तओ ठाणाओ, कमेण य पत्तो कोल्लागसंनिवेसे, तत्थ य बहुलो नाम माहणो परिवसइ, तस्स य गिहे महूसवो समारद्धो, निष्फाइया रसवई, जेमइ सयलजणो, एत्थंतरे भयवं सुणियमिक्खासमजो अतुरियं असंभतो छट्टपारणगे पविट्ठो भिक्खानिमित्तं गाममज्झे, उच्चनीयगिहेसु य परिभमतो संपत्तो बहुलस्स मंदिरं, दिट्ठो

य अणेण अप्पडिमरूवो भयवं भवणंगणगओ, तं च दट्ठण चिंतिउमारद्धो-अहो इमस्स महासुणिणो सरीरलाव-
णया अहो निरूवमरूवया अहो सयललक्खणपडिपुणया अहो पसंतायारत्तणं अहो सस्सिरीयत्तणं, निच्छियं न
होइ एसो सामन्नगुणो, ता धन्नोऽहं जस्स मम गिहमणुपत्तोत्ति परिभाविंतो उच्छलियवहलपुलयजालो मुत्ताहलालं-
किओव उट्ठिऊण परमायेरेण धयमहुमिस्सं पायसं भगवओ पणामेइ, भयवंपि निच्छिइं चक्कुसलंछणलंछियं
पसारेइ करकमलं ।

अह पाणिसंपुडे बंभणेण खित्तंभि पायसे पवरे । गयणयले सुरनिवहा ओयरिउं भत्तिभरभरिया ॥ १ ॥

वायंति केवि जयदुंदुहीओ अन्ने सुयंति कुसुमाइं । चेलुक्खेवं केवि य करंति अन्ने थुणंति जिणं ॥ २ ॥

गंभीरगुरगिराए अहो सुदानंति केइ धोसंति । अच्छिन्नकणयधाराहिं हरिसिया केइ वरिसंति ॥ ३ ॥

सेसोऽवि गामलोओ तहाविहं पेच्छिऊण अच्छरियं । विम्हियहियथो सहसा जिणस्सगासं समद्धीणो ॥ ४ ॥

किं बहुणा ?—भयवं पायसलाभेण निव्वुओ माहणोऽवि कणगेण । विम्हियरसेण लोगो एवं जाओ महाणंदो ॥ ५ ॥

अह चम्मचक्खूहिं अपेहिज्जंतो पारिऊण भयवं अन्नत्थ विहरिओ । गामाणुगामेण परिभंसंतस्स य ससिणो

पव्वज्जासमयसुरक्खित्तकुसुमवासुन्नगंधवासियंमि सरीरे कयज्झंकारवा निरंतरं परियुक्कवणकुसुमभयरंदा भसर-

नियरा पीडं उप्पायंति, चिरनिच्चसणेण य किंचि अपावमाणा रोसेण नेहेहिं विंधंति सुहेहिं खाइंति, वसंतसमए

रोमकूयनिगथं सिणेहसापिबति, सरीरमारूढा य समं विहरन्ति, गामतरुणाथवि तेण गंधेण आयरसियचित्ता मणति-भयवं! अमंहं पि देहि इमं गंधजुत्तिं, सुरभो तुज्झ सरीरगंधो, तहा नवनीलुण्णपलपलासरिच्छमच्छिजुयलं सुरभिनीसासुभगं सुहकमलं रूवसंपयं च दट्ठेण भयरुद्धयसरपहारज्जरियहिथयाओ गामतरुणीओ गामाणुगायं परियट्ठमाणस्स भगवओ निवासट्ठणं पुच्छति, बहुप्पयारं उवसगंति यत्ति । एवं पवज्जादिणाओ आरब्भ चत्तारि मासा समहिथा जाव सुरनिहित्तवासपच्चइया दुट्ठभमराइणो उवसग्गा जायत्ति ।

अन्नया तेलोक्कतिलओ सयलुण्णनिलओ सामी परियडतो गओ मोरागसंनिवेसे, तत्थ दूइज्जंता नाम तावसरूय-धारिणो पासंडिणो परिवसंति, तेसिं च अहिर्वई जलणस्समो नाम, सो य भित्तो सिद्धत्थरणोत्ति पुव्वनेहेण सामि दट्ठेण सागयंति भणिऊण संसुहसुबट्ठिओ, भयवयावि पुव्वपओगेण चेव वाहा पसारिया, तओ कुलयइणा संसभम आपुच्छिऊण पुव्ववत्तं भणिओ भयवं-कुमारवर ! एत्थेव निवसह किंचिकालं, निप्पच्चवाओ एस आसमो, न य कोइ ज्ञाणविगघकारी, वासारत्तस्सवि समुचिओत्ति, ता सबहा जइ संपयं न ठाउकामो तहावि वासासु इहावसेज्जासित्ति वुत्ते सामी तव्वयणं पडिसुणिय तत्थेव एगराई वोलेइ । तयणंतरं च—

पणट्ठपेमबंधणो असंखदुक्खनासणो । पसंतचित्तसुंदरो सधेज्जजित्तमंदरो ॥ १ ॥

बहूवसगसंगओ गओ व मंदगाभिओ । मिओव सुन्नसेवओ व(पि)उव रक्खणुज्जुओ ॥ २ ॥

मडबखेडकब्बडे अणेगलोगसंकडे । सुरिंदविंदवंदिओ परिब्भमेइ सामिओ ॥ ३ ॥

एवं च हिंडमाणस्स जयगुरुणो पज्जंतमणुपत्तो गिह्समओ, उवागओ वासारत्तो, तओ थणियसहं कुणमाणेसु सजलजलहरेसु मंदं मंदं निवडंतीसु वारिधारासु नियनियगेहमणुवच्चंतेसु पहियजणेसु माणससरं सरंतेसु रायहत्तेसु सामी पडिनियत्तिऊण समागओ तत्थेव मोरागसंनिवेशे, दिट्ठो कुलवई, समण्णिओ तेण पेमसवस्समुव्वहंतेण संछन्नो मढो, वुत्थो तत्थ पलंबियमुओ काउस्सग्गेण भयवं, एवं वच्चंति वासरा ।

अह वट्टमाणंमि पढमपाउसारंथे निट्ठिएसु चिरं संचियवुसतणपलालपमुहचारिविसेसेसु अणुगमंतेसु अभिणयत-
णाईसु कत्थवि किंपि भक्खणिज्जं अपावमाणाइं गोरूवाइं छुहापरिगवाइं आगंतूण तेसु तावसग्गिहेसु छायणतण-
भक्खणत्थमल्लियंति, तावसावि निट्ठुरलड्डिप्पहारेण ताणि कुट्टिऊण निद्धाडिंति, दुवारद्विया य निचंपि सव्वायेरेण
रक्खंति नियउडवए, गोरूवाणि तेहिं ताडियाणि इओ तओ परिब्भमिऊण अविज्जमाणरक्खणं भगवओ मढं
उव्वहंति, तावसावि नियग्गिहद्विया तं विलुप्पमाणं पेच्छिऊण भयवओ उवरि परिओसमुव्वहंति-अहो अस्से निय-
उडवए रक्खेमो, एस पुण समणो मणांगंमि न रक्खेइ, ता किं करेमो?, कुलवइणा धरिओत्ति न किंपि पारिज्जइ
पच्चक्खं फरसमुल्लविउंति, एवं च पइदिणं जायमाणे पस्सुढगाढमच्छराणुवंचा एग्गया गया ते कुलवइसगासे, सोचा-
लंभं च भणिउमाढत्ता, जहा-सामि !

अरु गिहे तुम्हेहिं कोऽविहु मुक्तो उ जो इमो समणो । सो अचंतं नियकज्जकरणपडिबद्धयावरो ॥ १ ॥
एयंपि नो विद्याणइ गोरूवेहिं जहागिहं एयं । पइदिणमुवदविज्जइ रक्खइ न खणंतरं एगं ॥ २ ॥
किं आलस्सं अहवाऽणुकंपणं अहव होज्ज व उवेहा । निद्विखणत्तं वा न याणिमो तस्सऽभिप्पायं ॥ ३ ॥
अहवा मुणित्ति गोरूववारणं नो करेति स महप्पा । गुरुदेवपूयणपरा अम्हे समणा न किं होमो? ॥ ४ ॥
हे कुलवइ ! जइ रुट्ठोसि अम्ह तं उडवयं हणिज्जंतं । एएणावि पओगेण वंछसे ता लहुं कहसु ॥ ५ ॥
जेण विमुंचामो तस्स संकहं को मए सह विरोहो? । रुट्ठोवि तोसणिज्जो जो किर को तेण सह माणो? ॥ ६ ॥
तुह चित्तविच्चिमवियाणिऊण णूणं मुहा कओ रोसो । तस्सोवरि अम्हेहिं का वा मूढाण होइ मई? ॥ ७ ॥
इय ईसाभरसम्मिस्सकोवदरफुरियअहरमुखविउं । दूइजंतगमुणिणो कुलवइपासाउ निक्खंता ॥ ८ ॥

ते व तहा गच्छमाणे दट्ठण कुलवई सवायेण वाहाराविऊण भणिउमाढत्तो, जहा-भो महाणुभवा ! किमेवं
परिक्कण्ह? , को मज्झ दोसो?, मए वयंससिद्धत्तरायपुत्तोत्ति कलिऊण एयस्स मुणिणो गउरवं कयं, किं मए एयं
विद्याणियं? जं एसो एवं नियगेहमुवेहिस्सइ, एवं ठिएवि तहा करिस्सं जहा न विणस्सइ तुम्ह आससो, एत्तो
मा वहिस्सह संतावं, मा चित्तिज्जह कुविगण्णजालं, तुम्हां अवरो को मम पिओत्ति?, एवमायन्निऊण जायसं-
तोसा गया ते जहागयंति, कुलवईवि गओ जिणसगासे, दिट्ठो उडवओ निलुत्तपुखपुडविडओव नाममेत्तावसेसो,

तं च पेच्छिऊण चित्तियं कुलवइणा-अहो सम्ममुवइहुं तेहिं वरागेहिं, मए पुबं वियाणियं-मच्छेण एए जंपति,
इयाणिं पुण एयदंसणे जहावट्ठियं नायंति, एवं संकप्पिऊण भयवंतं भणिउमाढत्तो—

चउरासमगुरुणो तं सुओऽसि सिद्धत्थमुवइस्स जओ । तइलोकूपिहियकित्ती ता तं पइ किंपि जंपेमि ॥ १ ॥

तुज्झ पिउणावि एयं आसमपयमायेरेण निचंपि । रक्खियमिणिं ह पुत्तय ! पालेयवं हवइ तुमए ॥ २ ॥

दुट्ठाण ताडणं चिय तुम्ह नयं तेण सुक्कपरिसंको । कीस न गोरूवाइं तणभक्खणओ निवारिसि ? ॥ ३ ॥

सउणीवि वच्छ ! नियनीडरक्खणं कुणइ सबजत्तेणं । भूभारधरणधीरो किं पुण तुम्हारिसो पुरिसो ? ॥ ४ ॥

अम्हारिसजइजणरक्खणइया निच्छियं पयावइणा । तुम्हारिसा महायस ! निष्काइज्जंति सप्पुरिसा ॥ ५ ॥

अन्नह गोरूवेहि व दुट्ठेहिं धम्मपच्चणीएहिं । उवहम्मंता अम्हे कं सरणं किर पवज्जंता ? ॥ ६ ॥

ता गिहनाहोव कुमार ! वससु तुह संतियं इमं सबं । पइं दिट्ठे पियमिच्चं सिद्धत्थनिवं सेरेमि अहं ॥ ७ ॥

इय संथवणोवालंभणयसिक्खवणगम्भवयणेहिं । भणिऊण जिणं सो तावसाहिओ पडिगओ सगिहं ॥ ८ ॥

अह तेसिं भयवं तो मुणिउं अप्पत्तियं महासत्तो । जयजीवहिएक्करओ चित्तेउमिमं समाढत्तो ॥ ९ ॥

मज्झ निमित्तेण इमे पाविंति अबोहिवीयसइभीमं । ता सबहा न जुत्तं एत्तोऽवत्थानमिह काउं ॥ १० ॥

इय भुवणगुरु संचित्तिऊण जाएऽवि वरिसयालंमि । ठाणाओ तओ चलिओ परपीडावज्जिणो गरुया ॥ ११ ॥

एत्तो चियं अब्बोहिंवि परणीडावज्जणंमि जइयच्चं । जहसत्तीए एवं जम्हा सदम्मसारोत्ति ॥ १२ ॥
एयं चेव भगवया वेरगणकारणमुच्चंतेण तिवा पंच अभिगहा गहिया, तंजहा-अचियत्तकारए उग्गहंमि न
वसियच्चं, निच्चं उस्सग्गं करेयच्चं, एगदुवयणवज्जं भोणेण ठाइयच्चं, पाणिपत्ते भोत्तच्चं, एगे किर सूरिणो एवं भणंति,
तं च किर कहं?—सपत्तो धम्मो पत्तवेयच्चोत्ति भगवया पढमपाणगे परपत्तंमि मुत्तं, तेण परं पाणिपत्तंमि जाय
छउमत्थोत्ति, गिहत्यो य न अब्बुट्टेयच्चोत्ति पंचमो, एवं च गहियपंचाभिगहो अट्ठसासावसाणे तत्तो नीह-
रित्ता अट्ठियगामंमि वच्चइ, तस्स पुण अट्ठियगामस्स पढमं वट्ठमाणानाममासि, तं च किर कहं वच्चयंति?
निसामेह कारणं—

कोसंबीए नयरीए असंखदविणसंचओ धणो नाम सेट्ठी परिवसइ, तस्स अणेगोवजाइयसएहिं पसुओ धणदेवो
नाम पुत्तो, अच्चंतं पाणप्पिओ वीसासट्ठाणं च, सो य अन्नया अणेगकुवियप्पदुट्ठसत्तभीसणं समुल्लसंतमयणकुसुभसारं
रंगंततण्हामिगवणिहयापडलं दुव्वारएसरेदिथोरभयावहं दुरुत्तारमूढयामहानिन्नगाविसमं अन्नं व रउइं संपत्तो
तारुणं, तवसेण य वसइ वेसागिहेसु रमइ जूयं पइदियहं विहवइ अत्थसंचयं, कुणइ विविहे विलसे, उवचरेइ दुल्ल-
लियगोहिं, पोसेइ नडनाइज्जगायणपसुहं अनिवच्चं जणं, नाउवेकसइ कुल्लमं न परिचित्तेइ सयणाववायंति, एवं
च वच्चतेसु य वासरेसु खीणेसु दव्वपडिपुण्णमहानिहाणेसु, सुन्नीभूएसु कोट्ठागारेसु चित्तियं धणसेट्ठिणा-अहो

अजपञ्जयाइपुरिसंपरंपरागथं पि अपरिकलियसंखं पि खयं व पत्तमियाणिं मम धणं, ता न जुत्तं एत्तो पुत्तस्स उवेहणंति निच्छिऊण एगंते भणिओ धणदेवो-पुत्त ! तुम्हारिस्ताणं उवभोगाइनिमित्तमेव अत्थोवज्जनमम्हाणं, न एत्तो विसिट्ठं ठाणमत्थि, केवलं जराज्जरियसरीरोऽहमियाणिं असमत्थो चंक्रमणमेत्तेऽवि अखमो समहिगमसियेवेवि अपरिहत्यो कलाकोसलेवि, ता वच्छ ! तुमए एस सव्वो लुहुवमारो धम्मववहारोय अणुचिंतणिजो, सो य अत्थं विणा न तीरए सुहुत्तमवि सोढुं, अत्थोत्ति नाम पवरो पुरिसत्थो, तहाहि—

अत्थेण सुगुणसुणिजणखेत्तनिहितेण सुहफलोणमियं । निष्काइज्जइ सद्धम्मसस्सयं विणु पयासेण ॥ १ ॥
किं पुत्त ! तए न सुयं जिणाण दिन्नाउ जेहिं भिक्खाओ । पढमाउ ते य तस्मिंवि केऽवि जणा सिद्धपयं पत्ता ॥ २ ॥

केई तइयभवेणं सुरवरसोक्खाइं भुंजिउं धीरा । सट्ठाणनिहिततहविहऽत्थसामत्थओ सिद्धा ॥ ३ ॥

अत्थेणं चिय कोसुइमयंकतुल्लाणणाउ तरुणीओ । आवद्धपाणिसंपुडमाणाए लहुं पयट्ठंति ॥ ४ ॥

निंदियकुलुभयोविहु सयलकलावज्जिओविहु धणेणं । पुरिसो गुरुच्च देवोच्च पुच्छणिज्जो हवइ लोए ॥ ५ ॥

जे सूरा समरसिरे जे माणेणं गिरिंदसारिच्छा । जे भव्वकवंधेण जंति किंतिं परं भुवणे ॥ ६ ॥

जे रुवमरेट्ठेणं मयरद्धयमवि हसंति किर पुरिसा । अत्थहुण जणाणं तेवि हु सेवं पवजंति ॥ ७ ॥

अच्छउ दूरे अन्नो नियगिहिणीऽविहु न जेण धजहीणं । आयरइ नरं पुत्तय ! सयलोऽविहु लज्जए तेण ॥ ८ ॥

चिरसंश्रुयावि चिर(सह)कालियावि निचं कओवयारावि । गोहचकारंगपिव भित्तावि सुयंति धणरहियं ॥ ९ ॥
किं बहुणा दढदालिदूढमि(स)यं माणुसं विणासंतो । सवंकसो कयंतोवि पुत्त ! आलस्ससमुच्चहइ ॥ १० ॥
इय सव्वगुणाहाणं सधणत्तं तदियरं च दोगच्चं । नियबुद्धीए नाउं पुत्तय ! उच्चियं समायरसु ॥ ११ ॥
जइ ववसायं वंछसि काउं दविणज्जणत्थमिह भइ ! ता एसो पत्थावो जावड्ज्जवि अत्थि किंपि धणं ॥ १२ ॥
सव्व विणासे जाए अंगिगपि समप्पिही न ते कोडवि । किं पुण ववहारकए भंडोलं जीविगाजोगं ? ॥ १३ ॥
एवं निसुणिऊण भणियं धणदेवेण-ताय ! जइ एवं ता किं तुमए उवेहिओऽहमेत्तिं कालं ? किं मए
अवगणियं कयाइ तुम्ह वयणं ? दंसिया अणुचिया पडिबत्ती ! सुरुद्धताडणेणवि पासिओ विरूवो मुहरागो ?
जं विणस्समाणेऽवि घरमारे ण सिक्खविओऽमिह, अहवा अलं पुव्वगयवइयरसोयणेण, पसीयह मे, देह
आएसं, दुट्ठमहिंलं आकरिसेमि दूरगयंपि लब्धिं, नंदह तुम्हे वहुं कालं केत्तिमेत्तमेयंति, सेट्ठिणा भणियं-
पुत्त ! किं न सुणेमि तुह कलाकोसलं, न जाणामि सामावियं भुयबलं, न लक्खेमि अंगीकयभरधुरधव-
लत्तणं, न बुज्झामि महिं चित्तावट्ठमं, अओच्चिय मए एत्तिदिणाइं न किंपि भणिओऽसि, विससदसाविडि-
यस्सवि पुत्त ! किमसज्जं तुह परक्कमस्स ? , ता इयाणिपि कुणसु समुज्जमं पूरेसु पणइज्जणमणोरहे दलेसु दुज्जणदुट्ठ-
चित्तिं अब्भुद्धेरेसु विहलियं जणं पयडेसु मयंकनिम्मलं नियकुलंति, धणदेवेण भणियं-ताय ! किं पुणरुत्तवयणवित्थ-

रेणं?, पगुणीकरोसु सपडि सत्थं सच्च(सग्ग)संवाहगं च, इय भणिए सेट्ठिणा नारुण से निच्छयं वाहराविद्या नियपुरिसा,
 भणिया य-अरे! करेह संवलगाइसमेयं समग्गं सग्गसंवाहगं, संजेत्तेह विविहमहामोहभंडपडिपुणं सगडसमूह
 उचणेह वलिट्ठं लट्ठसंधोगणं पवत्तेह कम्मकरजणं वाहरह पहरणत्थं गोहसत्थंति, जं सामी आणवेइत्ति पडिसु-
 णिरुण गया पुरिसा, अकालविलंबं समायरियं सच्च, निवेइयं च सेट्ठिणो, सो य धणदेवो ण्हाओ कयविलेवणो केस-
 वद्धसियकुसुमो परिहियपंडुरवत्थो पणयदेवगुरुवरणो आपुच्छियजणजणगसयणवग्गो गणिमधरिसमेयपारिच्छे-
 ज्जपडिपुन्नपंचसयसगडीसत्थसमेओ सुसुहुत्ते पट्ठिओ दूरदेसंतरं, ताहे पेच्छंतो अपुच्चापुच्चसंनिवेसे किणंतो अन्नोन्न-
 मंडाई, आपुच्छंतो देसंतरसमायारं, विण्णासंतो विचिच्चभासाविसेसे, देंतो दीणदुत्थयाण दाणं अइगओ दीहस-
 द्धाणं, कमेण रणज्झणिरवसहकंठपलंवन्तं वट्ठियारात्रनिरुद्धावरसहवाचारो अणेगसहाइजणपयट्ठियंगंतियागणो पहुत्तो
 वद्धमाणगगामसमीवं, तस्स य अन्तरावि समनिवृत्तयंगंभीरखड्डुविसमण्यवेसा आनाभिमेत्तसुहुमवेळुगापडहत्थविसा-
 लुलिणा महल्लचिक्खल्लाणुविद्धतुच्छसलिला वेगवई नाम नई, तहिं च पविट्ठाओ सगडीओ, ताओ पुण उभयपा-
 सावलंविणा जणेण सुसमणेणव धरियपचणेण (धरियवचणेण) सारहिणा निणिणहंतेण वसहनवहं कोदालाइणा पगु-
 णिज्जेतेण चक्कमग्गेण कहकहवि कट्टेण पावियाओ अद्धमग्गं, अह विसमत्तणओ नदीए दूरपहखीणसामत्थत्तणओ
 वसमाणं अइमारियत्तणओ सगडीणं बाढमायासिया सारहिणो अविगणियकसखं(वं)घाइघाया निवडिया महीयले

बलीषद्वा, बाढमुद्विगो धणदेवो, वाउलीहूओ परियणो, तत्थ य सत्थे एगो वसभो सयलगोमंडलप्पहाणो सणुरिसो
इव लीलाए चिय ससुद्धरियमहाभारो विसमप्पएसनित्थारणसमत्थो य अत्थि, सो य तहाविहविसमनिवडिण
सुमारिओ धणदेवेण पप्फुक्कारपुव्वयं च सक्कारिऊण जोत्तिओ सो सगडीए, तक्खणं अखेवेण य गओ सो निक्खवडसा-
मत्थेण गहिऊण लीलाए भारियंपि तं नईए परकूलं, जहा सा एगा, एवं पंचसथाणिवि सगडीयं निव्वहियाणि
तेण विसमप्पएसोत्ति । अविय—

एगत्तो सो वसहो अन्नत्तो सयलगोणसंघाओ । उत्तरइ सगडीओ सम्भावस्सत्थि किमसज्झं ! ॥ १ ॥

अइदुद्धरभरपरिकट्टणेण तुट्ठं तडत्ति से हियं । वयणुग्गीरियरुहिरो धसत्ति धरणीयले पडिओ ॥ २ ॥

तं च तारिसमवत्थंतरं पत्तमवल्लोइऊण धणदेवो परिसुक्कसेसकायघो सोयभरमुव्वहतो वाहरावेइ विज्जे, कारवेइ
चिगिच्छं, सयमेव समीवडिओ बंधवं व भित्तं व पडिजागेइ, अन्नदिवसे य भणिओ सो परियेण जहा—सत्थवाह । किमे-
गोणनिमित्तं उवेहिज्जंति नियकज्जाइ ? किं न सुणह तुब्भे सीयंति वणिजपुत्ता ? विणस्संति कियणगाइ ? बोलंति
बह्वे वासरा, समीयमणुसरइ वासारत्तोत्ति, धणदेवेण भणियं—एवमेयं, किं तु न सक्कमि एयं वराणं परमपित्तं व
सम्भावसारं भोत्तुं, परियेण भणियं—तुब्भे जाणह जमेत्थोचियंति, तओ तप्परिहारकायरमणेणवि धणदेवेण सदा-
विद्या वद्धमाणगगामप्पहाणा पुरिसा, सुहासणत्था तंबोलाइदाणेण सम्भाणिऊण सप्पणयं वसहस्स समक्खं

भणियं जहा-एसो मम पवरवसभो एरिसदुदुत्थाममवत्थंतरं पत्तो ता तुम्हेहिं एयस्स इमिणा रुवगसएण ओसहं-
चरणाइचिंताए संमं वद्वियच्चं, एसो तुम्ह नासगो इव समप्पिओ मए, न सब्बहा अन्नहा कायच्चंति निलुवियुज्ज सो
मयहत्तरजणे मोयावियुज्ज वसहस्स पुरओ वहुं चारिं पाणियं च ससियेहं खामियुज्ज य तं जहाभिमयं धओ धणदे-
वसत्थवाहो । सो य वसभो गाढवेयणाभिभूओ जेट्टमासदिणयरनिट्टुरकरोलिकरालिओत्ति गिम्हुणहतत्तमहियलड्डज्झभा-
णदेहो विरसमारसंतो दिणं गमेइ, तं पि से तिणाइयं अवरगोरूवेहिं भविस्सज्जइ, सोऽवि चारिवारिहियत्तणेण गाढ-
वाहिपीडियत्तणेण य सदीणं दिसाओ अवलोएमाणो तणसलिलहत्थे तं पएसं वोलेते जणे दट्ठूण चित्तेइ-नूणं मय
निमित्तं एए इममुवाहरंति, लोगोऽवि तं अइक्कमित्ता नियनियकज्जेसु पयट्ठइ, एवं च सो वसभो पइदिणं तहा-
दंसणविहलियासो, चम्मट्ठिपंजरावसेसो एवं सो परिकप्पेइ-अहो महापाविट्ठो वज्जंगिठिनिट्टुरमाणसो निगियणो
चंडालविससो असच्चसंधो कलिकालकलिलकलुसिओ एस गामजणो जेण मम एवं दुहियस्स अच्छउ दूरे करुणाए
तण्णपूलगाइदाणं जं तइया धणदेवसत्थवाहेण मम समक्खं जवसाइ जीवणमणियं तं पि गसियुज्ज ठिओत्ति । एवं
च पइदिणं पओसमुवहतो अकामतणहाए अकामलुहाए अकामतिव्वेयणाए आउलीकयसरीरो महानगरदाहमज्झो-
पडिओ इव देहदाहाभिभूओ मरियुज्ज तं मि चेव गामे अग्गुज्जाणे सूळपाणिनामो वाणमंतरो समुण्वन्नो, तहिं च उव्वं-
वण्णो समाणो तहाविहं देवरिद्धिं पेच्चियुज्ज विमरिसिउमारद्धो-अहो मए पुव्वभवे किं दाणं दिन्नं ? किं वा तं

तविषं? कस्म वा उवयारे ठियं? को वा धम्मो सम्ममाराहिओ? कत्थ वा सुतित्थे सरीरचाओ कओत्ति?, इइ विमंसिज्जण पउत्तो ओही, दिट्ठं च तं तहाविगरालखं बलीवहसरीरं, ताहे समुच्छलिओ से महाकोवानलो विषं-
मिओ अविवेओ समुल्लसिओ अकज्जकरणपरिणामो, तयणंतरं पेच्छंतु दुरायारा नियपावपायवस्स फलंति विभावित्तेण तेण विउव्विया सयलगामयासिज्जण मारी, तप्पभावेण य अणवरयं मरिउमारद्धा उत्तिममज्झिमजहन्ना बहवे जणा, जायंति य पइदिणं अक्कदियया । कंहं चिय?—

हा नाह! पाणवल्लह! कत्थ गओ मज्झ देसु उल्लायं । हा हा कयंत! निक्खिव! कह सहसा ववसिओ एव? ॥१॥
हा वच्छ! किमुच्छंगेऽवि तं गओ अइगओ सि पंचत्तं । मम मंदमाइणीए अहो किलेसो मुहा जाओ ॥ २ ॥
हा जणणि! तहा कट्ठेण पालिउं मं निलक्खणमियाणिं । कह निरवराहएच्चिय न देसि तं मज्झ पड्वियणं? ॥३॥
हा भाय! बंधुवच्छल! हा हा तं भइणि! निक्खवडपेम्मे । एक्कपए चिय चलियाइं कीस सुत्तण मं दुहियं? ॥४॥
हा वच्छे! बहुदविणवएण परिणाविया पयत्तेण । तहविहु इमं अवत्थं संपत्ता हा हयासोऽमिह ॥ ५ ॥
हा जक्खबंभहरिसूरबुद्धजिणखंदरुइपमुहसुरा । तह पूइयावि संपइ किमुवेक्खह तो कुणह रक्खं ॥ ६ ॥
इय अणवरयं तियचचरेसु लोयस्स रोयमाणस्स । परिमुक्कावरकज्जस्स जंति दुक्खेण दिवसाइं ॥ ७ ॥
एवं च जुगंतसमएव रोगेहि य छिइपवेसेहि य पियजणविरहुक्खेहि य हिययंसंघट्टेहि य मरमाणमि अणेगलेगे

सुत्रीभवत्तेषु पवरमंदिरेषु बुच्छिज्जमाणेषु य अइगरुयकुलेसु मडयकोडिसंकुलसु गामरथासु भयभीओ अवसेसो
 जणो जीवियरक्खणनिमित्तं लिहावेइ रक्खावल्यं पाणिपल्लवेषु बंधेइ दिवोसहीओ कुणइ महागहपूयं समायरइ
 पियरपिंडप्पयाणं परावत्तेइ विविहमंते समीवट्ठियं धरइ दिवमणिगणं पयट्ठावेइ होमविहिं आपुच्छइ जाणयजोइ-
 सिए समारंभइ गिहदेवयाणं णइयणवल्लिपूयामहूमवं, अन्नपि जं कोइ समाइसइ तं सवं तहट्ठियं निवत्तेइ, तहवि
 ओइणमहाजरोव पढमच्छुहाभिभूयपंचाणणोव निकाइयकम्मनिवहोव न मणागं पि सो सूलपाणिवंतरो उवसमं
 गच्छइति । अह गामजणो अणिवत्तगं दट्ठण मारिं धणकणगसमिद्धां गोमहिमितुरगाइपरिकिन्नाइं गिहाइं मोत्तूण
 जीवियट्ठयाइं नियनियकुहुंवाइं घेत्तण अन्नन्नगामेषु गओ, तत्थवि गयं महावेरिओव उवइवइ सो तग्गामवासिलेयं,
 एगया य तेमिं चिंता जाया-न नजइ तन्थ अस्सेहिं देवो वा दाणवो वा खेत्तवालो वा जक्खो वा रक्खमो वा
 विराहिओ होजा, नम्हा ताहिं चेव गंतूण पमाणमोत्ति संपथारिऊण समागया तत्थेव गामे, उवट्ठाविथा वल्लिकुगुम-
 धूवाइमामग्गी, नयणंतं णहाया पंडुरवत्थक्कयउत्तरांगगा लवंनविमुक्कंकेमा सव्वममुदाणं नियचउक्कचत्तं
 पढिमडियभूयगिहेनु रुद्धमंदावमंहुमु उज्जाणंनु य वलिं च कुमुमपयं च मुंचमाणा उहुमुहा जोंडियकंगंजिणो
 एवं जंपिउं पउत्ता—

भो अनरिक्खानियया देवामुत्तमस्वरक्कचकिंगुगिमा । दिवाटमयंगमेया निमुगइ विन्नजियं ण्यं ॥ १ ॥

इत्सरियमएणं वा अन्नाणेणं व अविणएणं वा । जं अवरद्धं तुम्हं तं सबं खमह अम्हाणं ॥ २ ॥
पणएसु सदुच्चरिओहखाभाणाउज्जएसु सत्तेसु । जं तुम्हारिस देवा खमंति गरुयावराहंणि ॥ ३ ॥
कोवस्स फलं दिट्ठं पेच्छामो संपयं पसायस्स । इति भणिए सो देवो गयणठिओ वुत्तुमारद्धो ॥ ४ ॥
'रे रे विणट्ठसीला । धट्ठा निण्डिसिद्धजणचिट्ठा । लोहमहागहनडिआ एत्तो मे खामणं कुणह ॥ ५ ॥
तइया न सरह पावा वसहस्स छुहाइणा किलंतस्स । तणजलसमप्यणेणवि अणुकंपा जं न विहियत्ति ॥ ६ ॥
नियसयणवग्गमरणे जाए संतावसुग्गमुवहह । वसहे तहा मयंमिवि न श्वेमत्तोऽवि भे सोगो ॥ ७ ॥
अलमहुणा भणिएणं वच्चह दूरेवि नत्थि भे मोक्खो । खलविसवेळिं आमूलओवि छिंदेमि दुहहेउं ॥ ८ ॥
इय तव्वयणमायन्निऊण भयवसकंपंतसरीरा धूवकडुच्छुयहतथा सुरभिपुण्णपुंजोवयारं कुणमाणा जय जीव नंदाइ-
कोमलवयणेहिं शुणंता अट्ठगं निवडिया महीए, भणिउमाढत्ता य-देव ! सच्चमेव अवरद्धमम्हहिं, नत्थि तुम्ह एत्था-
वराहो, तहावि पसीयह इयाणिं, आइसह इमस्स दोसस्स निग्घायणनिमित्तं पायच्छित्तं, 'अइकंतत्थसुभरणं विह-
लं चिय विणट्ठकज्जंमि' किं बहुणा ? , खित्तं नियसिरं तुह चरणपुरओ, कुणसु जं किंपि कीरइ सरणागयाणंति भणि-
ऊण अग्घदाणपुरस्सरं पुणो पडिया चरणेसु, एवं च निसामिऊण सुलपाणिंयंतरो मणागं उवसंतचित्तो भणइ-जह
एवं ता एयाणि माणुसद्वियाणि एगतथ पुंजीकाऊण उवरि पवरं कणंतंकिंणीधयवडाडोवमणहरं देवहरं विर-

एह, अब्भंतरे बलीवहाणुगयं जयलपडिं पइहवेह, निचं बलिकुसुमचणियं पयट्टेह, एवं कुणसाणां तुम्हाणं
 जीवियं देमि, न अन्नहत्ति, तओ जं देवो आणवेइत्ति तं तहत्ति विणएण सासणं सिरेण पडिच्छिऊण तेहिं गामस्स
 अदूरदेसे जहोवइहं तहेव कारवियं तस्स मंदिरं, इंदसम्माभिहाणो य निरुविओ तत्थ देवचओ, आयेरेण तिसंझं
 कीरइ पेच्छणयंति । एवं च अणेगमाणुसट्ठिनिचयपूरियत्तणेण इंतजंतेहिं पहिएहिं अन्नगामजणपुच्छिज्जमाणेहिं तस्स
 अडिगामोत्ति नामं कयं, पसिद्धिं च सवत्थ संपत्तं । एएण कारणेण अट्टियगामं जायति । तत्थ पुणवाणमंतरघरे जे
 तडियकप्पडियाइणो मग्गपरिस्समपीडिया परिवसंति रयणीए ते सूळपाणी पुट्टीए आरुहिऊण चिरं ताव वोहेइ जाव
 न सक्केति पयमवि दाउं, पच्छा किलिकिलारावं कुणमाणो केइ तिंदूसयं व गयणे उल्लालिऊण अहो निवडंतेसु तिवख-
 खगेण छिंदइ केइ चरणेसु गहिऊण वत्थं व सिलायलंमि पच्छाडेइ केइ धंटं व दुवारतोरणे पलंवेइ केइ खंडाखंडिं
 काऊण बलें व सवदिसासु पक्खिवइ, एवंविहजायणाहिं पहियजणं विणासेइ, तब्भएण य गामलो गो दिवसे अ-
 च्छिऊण वियाले सगिहेसु वच्चइ, इंदसम्मदेवच्चगोऽवि धूवं पईवं पूयं च से काऊण दिवसओ चेव निक्खमइत्ति ।
 एवं वच्चंतेसु वासरेसु भयवं महावीरसामी तावसासमाओ समागओ समाणो तं वंतरसुरं वोहिउकामो देवचगं
 भणइ-अहो एत्थ जक्खगिहे अम्हे निवसामो?, तेण भणियं-गामो जाणइ, तओ भगवया तत्थेव मिलिओ सयलो
 गामजणो अवत्थाणनिमित्तेणमापुच्छिओ, लोणेणवि अचंतसोमसस्सिरियरूवं भयवंतं दट्ठण भणियं-देवज्जग ! न सक्का

एतथ वसिष्ठं, एहि गाममज्ज्ञे, गिणहाहि जहाभिरुइयं अमह गिहेसु वसहिं, भयवंपि अणिच्छमाणो भणइ-इत्येव
अणुजाणह, लोणेण भणियं-जइ एवं ता ठाहत्ति, ताहे गंतूण एगंमि कोणे पडिमं ठिओ सामी, सो य इंदसम्मो
पच्छिमसेलसिहरं संपत्ते दिवसयरमंडले ध्रुवेलं निम्मविज्जण कप्पडियाइतडियवगं निस्सारित्ता भयवंतंपि
भणइ-देवज्जगा ! तुब्भेवि नीहरह, मा इमिणा जक्खेण मारिज्जिहिह, सामीवि असुणमाणोव तुसिणीए य गमेइ,
पुणो पुणो इय भणंते य देवच्चगे सो वंतरसुरो चित्तेइ-अहो कोऽवि एस देवचएणं गामजणेण य भणिज्जमाणोवि
न गओ एत्तो ठाणाओ, ता पेच्छिही जमज्ज करिस्सामि, बहूणं दिवसाणं दिट्ठियाखेछणगमुवागयंति । एतथंतरे अत्थ-
मिओ दिणयरौ समागया संझा, सट्ठाणं गओ देवच्चगो, काउस्सग्गे ठिओ भुवणबंधवो ।

ताहे काउस्सग्गे ठियस्स सो भेसणट्ठया गुरुणो । जुगविगमघोरघणघोसविब्भमं भेसियजणोहं ॥ १ ॥

अट्ठट्ठहासमसमं चाउदिसिपसरियं महाभीमं । उच्छलियवहलपडिसहनायविप्फारियं कुणइ ॥ २ ॥

गामलोओऽवि तं सइं सोऊण भयसंभंतो परोप्परं भणइ-अहो एसो देवज्जगो महाणुभावो जक्खेण मारिज्जइत्ति,
तत्थ य उप्पलो नाम परिद्यागो पासजिणत्तिथपुव्वपडिवन्नसामन्नो भोसुप्पायसुभिणंतलिकखअंगसरलक्खणवज्जणरूव-
अंडुगमहानिमित्तसत्थपरमत्थवियाणगो लोगओ एरिसो तारिसो देवज्जगो जक्खेण मारिज्जिहत्ति निमुणिऊण मा
तित्थंकारो महावीरो पडिवन्नदिकखो होज्जत्ति संकियमणो वंतरगिहे य तब्भएण गंतुमचाइतो अद्धिइं काउमारद्धो ।

सो य सूलपाणी जाहे अट्टट्टहाससद्देण भयवं न भीओ तोहे पिसायरूवं विउव्वइ, तं च केरिसं?—
 अइकविलथूलंलंबिरकेसोहच्छन्नगणयलमज्झं । अविपक्कसुक्कतुंबयसरिच्छबीभच्छवयणिहं ॥ १ ॥
 दिसिंखुंजरंखुसागारदूरनिकसियकलुसदसणगं । चिविडगगघोरघोणानिलकंपियकविलमुहलेमं ॥ २ ॥
 लंबिरबलिचम्मोणद्धमडहवच्छत्थलट्टिसंधायं । पिट्ठावलगलेंजरकप्परसमजरडजठरतलं ॥ ३ ॥
 तालतरुजुयलदीहरनिम्मंसणहारुनद्धजंघजुयं । ठाणट्ठाणोलंबियपलंबतंडवियफणसण्यं ॥ ४ ॥
 अइवेगसुक्ककमभरथहरियससेलमेइणीवट्टुं । कक्खंतरालनिग्गहिमडयपिसायासणाभिरयं ॥ ५ ॥
 अइकुडिलकत्तिउक्कत्तियंगिनिससरियरुहिरपाणपरं । उब्भवियपयंडमुयं पावसमूहं व पच्चक्खं ॥ ६ ॥
 इय एवंविहरूवं पिसायमवि पासिऊण जयनाहो । मसगं व अवगणितो धम्मज्झाणं विंचित्तेइ ॥ ७ ॥
 ताहे स सूलपाणी उवउत्तो पेहए जिणवरिंदं । मेरुव्व निप्पकंपं निब्भयचित्तं पवरसत्तं ॥ ८ ॥
 तयणंतरं च पुणरवि भेसणकज्जेण सो महापावो । निसियगकुंतभीसणउग्गविसुग्गाढदाढालं ॥ ९ ॥
 अविकलियरोसवसनिस्सरंतविसमिस्सजलणजालोहं । पप्फुरियफारफुक्कारवायभज्जंततरुनियरं ॥ १० ॥
 वियडुब्भडचडुलफणाकडप्पपडिरुद्धदिसिसुहाभोगं । सिरियणकिरणसंचयदावियगुरुयणदबासंकं ॥ ११ ॥
 कलिकालपदममित्तं व तिच्चदुरिओहभूरिरासिं व । जमपासंपि व सकखा महिमहिलवेणिदंडं व ॥ १२ ॥

सप्यं विउवइ महं तो सो सारिं निएण देहेण । आंगतूणावेढइ बाढं थंभं व रज्जए ॥ १३ ॥ पंचहिं कुलयं ।

पुच्छच्छडाए ताडइ सच्छंदं दसइ तिकखदसणेहिं । कंठस्स पीडणेणं कुणइ निरुस्सासयं सहसा ॥ १४ ॥

अह अट्टहासभीसणपिसायनागोवसग्गकरणेवि । अविचलचित्तं सुणिऊण जयगुरुं गाढकुवियमणो ॥ १५ ॥

सो सबं सव्वरिं जाव अचंतरउइं दुरहियासं सत्तविहं वेयणं भगवओ करेइ, तंजहा—सीसवेयणं सवणवेयणं नयणवेयणं दसणवेयणं नहवेयणं नासावेयणं पिट्ठिवंसेवयणं, एयाणं वेयणाणं एक्ककावि समत्था पागयनरस्स जीवियं ववक्कमिउं, किं पुण सत्त एयाओ एगकालपाउब्भूयाओ अणाइक्खणिज्जरूवाओत्ति?, भयवं पुण ताओ सम्ममहिथासेइ, सो य वाणमंतरो जाहे न पारेइ भयवंतं भेसिउं वा खोभिउं वा ताहे बाढपरिस्समसुवगओ अहो निष्फलो मम वावारोत्ति कयचित्तसं-तावो धीरिसारंजियहियओ य भयवंतं पायवडिओ सव्वायेरेण भणइ—भयवं! खमह मम अवरहं, अयाणमाणेण तुम्ह सामत्थं सुचिरं मए अवरद्धंति, एत्थंतरे नियक्ककरणवावडिचित्तो तक्खणसुमारियसुरवइजिणभलावणावयणो सो सिद्धथेदेवो दट्ठूण भयवओ तिवोवसग्गं धाविओ वेगेणं, पत्तो तं पएसं, भणिउमारद्धो य—अरे रे सुलपाणिवंतराहमा! अचंतदुट्ठलक्खणा दोगच्चमच्चुपत्थगा विसुद्धबुद्धिच्चज्जिया न जाणसि खलियारंतो इमं सिद्धथरायपुत्तं भयवंतं चरि-मत्तित्थयरंति?, जइ रे दुरायार! एयं वइयरं सक्को कहवि जाणंतो ता को जाणइ तं किंपि पाविंतेत्ति?, सो य एवमायन्निऊण बाढं भयभीओ चउग्गुणं पुणो पुणो जिणं खामेइ, सिद्धथो य तस्स धम्मदेसणं काउमाढत्तो जहा-

वीथरागो देवबुद्धीए गहियवो, साहुणो य गुरुबुद्धीए परिभायियवा, तत्तथसहहणं कायव्वं, सव्वपाणीणं पीडा परि-
 वज्जियवा, पुव्वदुच्चरियाइं भुज्जो गरहणिज्जाइं, जओ एकसिं कयाणंपि तिव्वपओसेण पावाणं कोडाकोडाइरूवो
 दुहविवागो हवइत्ति, सूलपाणीवि एवमायन्निऊण अणेगलोगक्खयसुमरणउप्पन्नातुच्छपच्छायावो जायसंमत्तो अञ्चत-
 भवविरत्तचित्तो असेसदोसपसमणट्ठा तिहुयणपहुणो पुरओ गीयनट्टमहिमं काउं पयत्तो, गामवासिलोगोऽवि गीया-
 इसइं सोचा चित्तेइ-अहो तं देवज्जयं जक्खो मारित्ता इयाणिं परितुट्ठो सच्छंदमेवं कीलइत्ति, भयवंपि चत्तारि रयणि-
 जामे देसूणे परिताविओ समानो पभायकाले मुहुत्तमेत्तं निदापमायसुवगओ संतो इमाइं दस महासुमिगाइं पस्सइ,
 कइं?, जहा किर मए तालपिसाओ उहुं बहुमाणो निहओ १ पंडुरो(सउणो)चित्तकोइलगो य दुव्वे पज्जुवासमाणा
 दिट्ठा २-३ सुरहिक्कुसुमंगंधुद्धुरं दामदुगं ४ गोवगो य पज्जुवासणापरो ५ पउमसरो विबुद्धपंकओ अवलोइओ ६
 कळोलमालाउलो सायरो समुत्तिण्णो भुयाहिं ७ पइण्णरस्सिमंडलं चक्खुगोयसुवगयं दिणयरविंबं ८ नियंतेहिं
 माणुसुत्तरगिरी परिवेदिओ ९ मंदरसिहरं चारुढोत्ति १०, एवं एए दस सुमिणे पासित्ता पडिबुद्धो सामी । एत्थंतेरे
 समुगओ सूरु, समागओ धूवक्कुसुमक्खयहत्थो सयलगामजणो उप्पलनेमित्तिगो य, ते य दिव्वगंधचुण्णपुण्णवासिंहि
 समच्चियं अक्खयसरीरं सामिं पेच्छिऊण उक्कुट्टिसीहनायं करेमाणा चरणेसु पडिया, परोप्परं भणिउमेवं पवत्ता
 य-अहो देवज्जगेणं जक्खो उवसामिओ, तेणेसा पूया कयत्ति, उप्पलोवि परियाणिऊण भयवंतं पहिट्ठो, वंदिऊण

चलणजुयलतिए निसन्नो, अह भगवओ काउस्सग्गावसाणंमि पुणरवि नमंसिऊण अट्ठगनिमित्तसाम्थओ सुणियसु-
मिणाइवइयरो भणिउमारद्धो-सामि ! तुभेहिं अंतिमराइए दस सुमिणा दिट्ठु, तेसिं इमं फलं-जो किर तालपि-
साओ महादेहो निहओ तमचिरेण मोहणियकम्मं उम्मूलहिंसि, जो य सियसउणो तं सुक्कज्झाणं झियाइहिसि, जो
विचित्तो कोइछो तं दुवालसंगं पणवोहिसि, गोवगेण य जं तुमं परियरिओ तं ते चउव्विहसमणसमणीपमुहो चउ-
विहो संघो भविस्सइत्ति, पउमसरा य चउविहो य देवनिकाओ तुमं पज्जुवासेही, जं च सायरसुत्तिण्णो तं संसारसुत्त-
रिहिसि, जो य सूरु अवलोइओ तमचिरेण केवलनाणं उप्पज्झिही, जं च उदराउ निस्सरिऊण अन्तेहिं माणुसुत्तरगिरी
वेढिओ तं ते निम्मलजसकित्तिपयावा सयलतिहुयणे अनिवारियपसरा परिभमिस्संति, जं च मंदरसिरमारुढो तं
सीहासणत्थो सदेवमणुयासुराए परिसाए धम्मं पन्नविहिसि, जं च दामदुगं तस्स फलं न याणासि, सामिणा
भणियं-हे उप्पल ! जं तुमं न याणेसि तमहं कहेमि, जं इमं दामदुगं तमहं दुविहं सागारमनागारियं धम्मं पन्नवेहा-
मिन्ति, एवं निसामिऊण हरिसुल्लसियपुलयजालो उप्पलो नमंसिऊण जयगुरुं जहागयं पडिनियत्तोत्ति । भयवंपि धम्म-
ज्झाणपरायणो कालं गमेइ ।

अह अद्धमासखमणेहिं जयगुरुवि गमिऊण चउमासं । विविहाभिग्गहनिरओ अट्ठियगामाओ निक्खंती ॥ १ ॥
ताहे स सुलपाणी जक्खो अणुगच्छिऊण भयवंतं । पयकमलनिलीणसिरो भत्तीए भणिउमाढत्तो ॥ २ ॥

नाह ! तुह तिद्वउवसगकरणओ नत्थि मम समो पावो । जं एत्थ तुमं वुच्छो तेण कयत्थोऽवि नेवत्थि ॥ ३ ॥
 जाणामि सामि ! मम बोहणट्टया तं समोसढो एत्थ । न हु सूणासालाए कोवि निवासं जओ कुणइ ॥ ४ ॥
 बहुजीवविणासणजणियपावपडलेण पीडिओ संतो । नो पेच्छंतो दुक्खं किमहं जइ तं न इंतोऽसि ? ॥ ५ ॥
 ता तुमए चिय भवकूवयाओ हत्थावलंबदाणेण । उत्तारियमिह जयगुरु ! नियसोक्खपरमुहमणेण ॥ ६ ॥
 इय सूलपाणिजक्खो संथविउं जिणवरं पयत्तेणं । दुस्सहविओगभल्लीए सल्लिओ पडिनियत्तोत्ति ॥ ७ ॥
 पव्वज्जागहणाओ पढमं संवच्छरं जहावित्तं । सिद्धं जइक्कगुरुणो इण्हिं वीयं निसामेह ॥ ८ ॥

अह धुणिऊण वलियंमि जक्खे भयवं गामाणुगामं विहरमाणो गओ मोरागसन्निवेसे, तत्थ य वाहिरुज्जाणे थीप-
 सुपंडगाइदोसरहिए पएसे ठिओ पडिमाए, तहिं च गामे अच्छंदूगा नाम पासंडत्था परिवसंति, तेसिं च एगो
 अच्छंदगो लोगाणं मंततंतभूइकरणेहिं जीवइ, सो य सिद्धत्थवंतरो भयवंतंमि पडिमापडिवन्नंमि कलहकेलिपियत्त-
 नेण विणोयमपावमाणो नाहस्स पूयमपेच्छमाणो य अधिइं करेइ, अन्नदिवसे य सो भयवओ सरीरे संकंतो तेणं-
 तेणं वोलितं एगं गामगोहं सदित्ता कीलानिमित्तं एवं जंपइ-भो भइ ! तुमं कंगुकूरं सोवीरेण सह अज्ज पजिमिओ,
 संपयं च वसहरक्खणट्टया चलिओ, इतेण य मग्गे भुयंगमो दिट्ठो, सुमिणगंमि परुत्तो य ता रे संभवइ सव्वमेयं ?
 गामगोहेण भणियं-भयवं ! अवितहमेयंति भणिए सिद्धत्थेण अन्नंपि से बहुं समाइहं, सो परितुट्ठो परमच्छेरयंति

मणमाणो गंतूण गाममज्झे नियसयणवगस्स पुरओ एवं परिकहेइ, अह कोऽवि देवज्जओ गामवाहिं ठिओ तीया-
णागयवट्टमाणाइं जाणइ, पूरिया मम तेण बहवे पच्चया, एवं च आयत्तिज्जण गाढकोज्जहलाउल्लिजमाणमाणसो
गामजणो कुसुमकखयहत्यो गओ भयवओ समीवं, संभासिओ तेण जिणतणुसंकंतेण सिद्धत्थेण, जहा भो तुब्भे मम
अइसयपेच्छणत्थं एत्थ संपत्ता, गामजणेण भणियं-सामि ! एवंति । तदणंतरं--

जं पुव्वकालवित्तं जं च सुयं जं च दिट्ठमित्तिहं । जं भासियं परोप्परमहं जं रयणीए अणुभूयं ॥ १ ॥

जं इट्ठाणिट्ठविओगजोगसुहुदुक्खलाभलोभाइ । अज्जवि भविस्सविसयं तंपि हु सो साहए तेसिं ॥ २ ॥

ते य तहाविहं कोउगं दट्ठूण सदायेरेण वंदंति महिमं च कोरंति, एवं च पइदिणं इंतजंतसु गामिछएसु
पवित्थरिओ सिद्धत्थस्स परमो आणंदो । अन्नया य लोगो भणइ-भयवं ! एत्थं अन्नोवि अच्छंदओ नाम जाणओ
परिवसइ, सिद्धत्थो भणइ-सो बराओ न किंचि जाणइ, ताहे लोगो गंतूण तस्स पुरओ साहेइ, जहा देवज्जगो
भणइ-तुमं न किंपि जाणसि, सो य तं सोच्चा अहंकारमुव्वहतो अप्पाणं ठाविउकामो भणइ-एह तुम्ह समवसं अव-
णेमि जेण तस्स परिन्नाणाभिमाणं, दुक्करं खलु अम्हारिसस्स पुरओ अत्तणो पयासणं, सुकरा तुम्हारिसस्स पुरओ
गामिछयाण मज्जे विविहसमुखावत्ति, एवं च नियदियकखणत्तं पयडंतो ईसामहलसल्लविछियहिययो सकोउहल्लेण
लोणेण परियरिओ गओ सो तत्थ जत्थ जणसमूहोवासिजमाणपायकओ भयवं काउस्सगे चिट्ठइति । तयणंतरं च

करंगुलीहिं उभयपज्जतेसु तणयं घेत्तूण भयवओ समुहं ठिओ पुच्छिउमारद्धो-भो देवज्जय ! इमं तणं किं छिज्जिही नवत्ति ? , तस्स एस अभिप्पाओ-जइ किर देवज्जो भणिही-छिज्जिही तो न छिंदिसं, अह अन्नहा तो छिंदि-स्सामि । एवं च विगप्पमाणंमि तंमि सिद्धत्थेण भणियं-न छिज्जिही, सो एवं सोचा समारद्धो छिंदिउं ।

एत्थंतरंमि सक्को सुहासणत्थो इमं विचिंतेइ । गामागरेसु भयवं ! कह विहरइ संपयं वीरो ? ॥ १ ॥

दिद्वोवओगविभवेण वइयरं तं तओ सुणइ सव्वं । पेच्छइ य तं पुरत्थं तणभंगसमुज्जयं समणं ॥ २ ॥

अहह महापावो कह जिणंमि मिच्छं समीहए काउं ? । इय चिंतिऊण मेहइ महल्ल धारुक्कडं कुलिसं ॥ ३ ॥

तं मणसमाणेवंगं आंगंतुं करजुंगुलीवल्लयं । छिंदइ तस्स सहसा अछिज्जमाणंमि तंमि तिणे ॥ ४ ॥

अहं सो अच्छंदगो कुलिसघायनिवडियासु दससुवि करंगुलीसु जायवेल्कखभावो सयल्लगामज्जेण धिक्कारिज्ज-माणो गओ तप्पएसाओ, ताहे सिद्धत्थो तस्सोवरि बाढं पओसमावन्नो तं गामज्जणं भणइ-अरे रे दुरायारो महा-चोरो एसो, लोएण वुत्तं-भयवं ! कस्स एएण चोरियं ? , सिद्धत्थेण भणियं-निसामेह, अत्थि एत्थ वीरवोसो नाम कम्ममारओ, सोऽविय निसामिज्ज नि यनामं लोयमज्झयाराओ आंगंतूण निवडिओ चलणेसु, भणिउं पवत्तो य-भयवं ! तुइहेहिं जो समुक्कित्तिओ सो अहं, साहेह किं कीरउत्ति, सिद्धत्थेण भणियं-भइ ! तुह असुगंमि काले दस-पालियं वट्टगं नट्टपुवं ? , तेण भणियं-आसं, सिद्धत्थेण वुत्तं-तं एएण पासंडियाहेमण हरियं, वीरवोसेण भणियं-कत्थ

तं पुण फोविस्सं?, सिद्धत्थेण भणियं-एयस्स चव पुरोहडे महिसिंदुनामस्स पायवस्स पुरत्थिमेणं हत्थमेत्तं गंतूण भूमिनिहिंसं उक्खणिऊण गिण्हसुत्ति वुत्ते सो कम्मारओ लोणेण समं गओ जहावइद्वएसे, आगरिसिऊण गहियं वट्ठयं, हल्लबोलं कुणंतो य जणो पडिनिचसो जिणस्स अतिए । तयणंतरं च पुणो सिद्धत्थेण भणियं-अन्नपि सुणेह, अत्थि किमिह इंदसम्मो नाम गाहावई?, जणेण भणियं-अत्थि, एत्थंतरं सो इंदसम्मो निथयनाममुक्किज्जिमाणं सोऊण तयमेव उवट्ठिओ भणइ-आणवेह सो अहंति, सिद्धत्थेण भणियं-अत्थि भइ ! तुज्झ पुवकाले ऊरणगो पणट्ठो?, तेण भणियं-अत्थि, सिद्धत्थेण भणियं-अरे एण अच्छंदएण सो हणिऊण खाइओ, अट्ठियाणि से उक्कु-रुडियाए वदरीए दाहिणे पासे उज्झियाणि अज्जवि चिट्ठति, जइ कोऊहलं ता अज्जवि गंतूण पेच्छहत्ति वुत्ते वेणेण धाविथा तदभिमुहं, अट्ठियाणि पलोइयाणि, कलकलं करेता आगथा जिणसगासे, पुणरवि सिद्धत्थेण भणियं-एयं दुइज्जं दुचरियं, अन्नपि तइज्जं अत्थि, परं नाहं कहिस्सं, ते य एयमायन्निऊण गाढं निब्बंधं काऊण पुच्छिउ-मारद्धा, कहं?—

देव ! पत्तीय महापहु पुणोवि अण्णं न पत्तिणइस्सामो । अद्धोवइद्वमक्कं एयं अमहं निवेएसु ॥ १ ॥

जह जह न साहइ सुरो तह तह पुच्छंति आउला धणियं । सच्चं जायं एयं जमद्धकहियं हरइ हिययं ॥ २ ॥
एयं निब्बंधपरएसु तेसु सिद्धत्थेण भणियं-अरे मा तरलायह, अमह अभासणिज्जमेयं, जइ अवस्सं सोयवं ता

गंतूणं पुच्छह एयस्स चैव भजं, सा तुम्ह साहिस्सइत्ति, एयमायन्निरुण पधाविद्या तगिगहाभिमुहं, इओ य-सा अच्छं-
 दयस्स भज्जा तद्वियं तेण पिट्ठिया, वाढं पओसमावन्ना चित्तेइ-सोहणं जायं जं तस्स अंगुलीओ छिन्नाओ जणेण
 धिक्कारिओ य, तथा इयानिं जइ गामो एइ ता सच्चं दुस्सीलयं पयडेमिप्पि विगण्पंतीए संपत्तो गेहंगणे गामज्जणो,
 पुच्छउं पवत्तो य, सा भणइ-मा इमस्स कम्मचंडालस्स नामपि गिणहह, जओ एस नियमगिणीए सहोयराए
 सद्धिं विसए अणुमुंजइ, ममं निच्छइत्ति, एवमायणिरुण ते उक्किट्ठीसिहनायं कुणंता नियनियगिहेसु गया पणवेंति-
 जहा एरिसो तारिसो सो महापावोत्ति, एवं सो अच्छंदओ जणेण अवमाणिज्जमाणो कयवंभणहचो इव अपेच्छिज्ज-
 माणो लुक्खमिक्खक्खलंपि अपावमाणो एगया गंतूण जिणनाहं सकरुणं जोडिय करसंपुडं च भणिउमाढत्तो—

देवज्जय ! बल्लेसुं निवासमिह तं महाणुभावोऽस्ति । ठाणंतरेवि तुज्झं पूयामहिमं जणो काही ॥ १ ॥

अन्नत्थं गओऽहं पुण कित्तिमकणगं व नेव अग्गामि । सदरीए चिय गोमाउयस्स सूरत्तणं सहइ ॥ २ ॥

तुह पुरओ जो विहिओ दुव्विणओ देव ! मूढहियएणं । सो मं दढकुवियकयंतदडयाओव दुक्खयइ ॥ ३ ॥

एवं भणमाणे अच्छंदगे अचियत्तो गहोत्तिकिरुण सच्चस्सापत्ति (पीति) परिहारपरायणो भयवं नीहरिरुण मोराग-
 सन्निवेशओ उत्तरवाचालाभिमुहं पत्थिओ, अह मग्गे वच्चमाणस्स दक्खिणवाचालसन्निवेशं समइक्कंतस्स उत्तरवाचा-
 लसंनिवेशं च अपावमाणस्स अंतरा सुवण्णकूलाभिहाणाए महानइए पुलिणं वोलितस्स भगवओ महावीरस्स खंघाव-

लंघि वत्थखंडं कंहं पि पवणकंपिजसागं कंटए विलगिऊण निवडियं, सामीवि थेंवं भूमिभागं गंतूण अत्थंडिले पडियं
होअत्ति मणागमेत्तं वलियकंधरो तमवलोइऊण जहाभिसयं गंतुं पवत्तो । सो य पिउवयंसो पुव्वमणिबंभणो चिर-
कालेण तं निवडियं वत्थखंडं पहिट्टिचित्तो गिणिहऊण भयधत्तं च वंदित्ता कुंडगामनयरसुवगंतूण पुव्वमणियतुम्हा-
गस्स समणोइ । तुम्हागोऽवि अइनिउणं तुम्भिऊण एगरूयं विरएइ । तओ सो बंभणो देवदूसं आदाय गओ नंदिवद्धण-
नराहिवस्स समीवे, पणामियं तं वत्थं, राइणावि कोऊहलसुवहतेंण सुचिरं पलोइऊण भणियं-भह् ! एवंविहं पवर-
वत्थं कत्थ तए पावियं ? बंभणेण भणियं-देव ! भहइ एयस्स कहा, राइणावि भणियं-वीसत्थो सम्मं साहसु, तओ

जह दालिदोवहओ सुचिरं देसंतरेसु भमिऊण । नियमंदिरमणुपत्तो गिहिणीए तज्जिओ पुव्वं ॥ १ ॥

जह जिणनाहो करुणक्खरोहिं गंतूण भूरि विन्नविओ । अणुकंपाए तेणं जह दिन्नं देवदूसद्धं ॥ २ ॥

जह तुम्हाएण पुणो दूइज्जवत्थद्धलाभकज्जेण । जयगुरुणोच्चिय पासे सिक्खविउं पेसिओ सहसा ॥ ३ ॥

जह संवच्छरमेगं पुट्ठिमि ठिओ पुरागराईसु । सिस्सो इव परिभमिओ जयपहुणो विहरमाणस्स ॥ ४ ॥

जह वा सुवणणकूलानईए कंटगलगवत्थद्धं । चइऊण गए नाहे तयं च गहिऊण चलिओ य ॥ ५ ॥

जह तुम्हागेण तयं दुखंडसंसीवणेण मेलवियं । तह सयलं नरवइणो निवेइयं तेण सविसेसं ॥ ६ ॥

एवं च निसामिऊण तुट्ठो नंदिवद्धणनरिदो दीणारलक्खमेगं वत्थस्स सुळं दाविऊण सबहुमाणं सक्कारिऊण

भणइ-अहो भइ ! कहं भयवं विहरइति, बंभणेण भणियं-देव ! सुणेह, सो जएकनाहो कयाइ फुट्टहासजणियसं-
तासेसु भूयभवणेसु गोदुहियाए दुद्धरं नियमविसेसमालंविऊण नासगसंगिचकलुविकखेवो मंदरोव थिमिओ द्वाणं
झियाइ, कयाइ करालेवेयालमालाउलासु पयंडपडियनरमुंडयंडलीसु सुसाणभूमीसु वीरासणं संठिओ निरुद्धउ-
स्साससमीरपसरो सूरविंवनिहियनयणो मज्झदिणंयि आयावेइ, कयाइ गुरुभारकंतनरोव ईसिअवणयकाएण पलं-
वियभुयदंडो गामवहिया काउस्सगणे चिट्ठइ, कयाइ निक्कारणकुवियपिसाथविहियतिवोवसगं सोकखपरंपरं पिव
सम्ममहियासेइ, कयाइ छट्ठममद्धमासाइतव विसेससुसियसरीरो पंतकुलपरिब्भमणलुंडुलुञ्छासाराहार गहेण
पाणवित्तिं निव्वत्तेइ ।

कइयावि हीणरूवेहिं दुट्ठसीलेहिं कीडसेत्तेहिं । पागयनेरेहिं विहियं विसहइ सो तिव्वसुवसगं ॥ १ ॥

सा आवथावि सण्णे नियुणिज्जइ जा जएक्केदेवस्स । दइयव्व दुन्निवारा नेव समीवं समल्लियइ ॥ २ ॥

एवं किर तस्स महायसस्स उत्थरइ दुत्थिमा भीमा । कइथावि तियसनिवहा पूयामहिमं पकुवंति ॥ ३ ॥

इय नरवर ! तच्चरियं न मारिसो किंपि साहिउं तरइ । तारिसजणचरियाइं सुणंति जइ तारिसा चेव ॥ ४ ॥

एवं निसामिऊण राया तपरिसाजणो दीहरमुक्कनिस्ससो अच्छिन्ननिवडंतवाहापवाहाउलवयणकमलो सोगे
काउमारद्धो । बंभणोऽवि गओ सणिहं । समण्णियं तुन्नागस्स मोलऽद्धं, सेसद्वेण विविहं विलसंतो कालं बोलेइति ।

इओ य-वद्धमाणसामी उत्तरवाचालसन्निवेशे गंतुकामो कुडिलपहपरिहारेण उज्जुयमगाणुलगणगखलाभि-
हाणासममज्जेण पट्ठिओ संतो निवारिओ गोवालेहिं, जहा-भयवं! एत्थ आसमे दिट्ठीविसो सप्पो अभिद्वेइ ता
मा एएण पहेण वचह, सामीवि जाणइ, जहा-सो भविओ संबुज्झिहत्ति निवारिजमाणोऽवि गोवेहिं परकज्जकरणर-
सियत्तणेण गओ कणगखलं नाम आसमपयं, जं च केरिसें?—

कपूरतमाललवंगतिणिससाहारपमुहतरुद्धं । अइमुत्तयवासंतियकयलीहरनिवहरमणिज्जं ॥ १ ॥
तावसजणनिम्मियहोमहुयवहुच्छलियधूममलिणाओ । तेछोछा इव रेहति जत्थ साहीण साहाओ ॥ २ ॥
पवणपकंपियपल्लवकेरोहिं जं वारइव जिणमितं । दिट्ठीविससप्पभयं कहइ व सउणाण सदेणं ॥ ३ ॥
एवंविहंमि तत्थ आसमपए आंगंतूण ठिओ जक्खभवणमंडवियाए सामी काउस्सग्गेण चंडकोसियसप्यं पडि-
बोहणत्थंति । को पुण एस सप्पो पुव्वभवे आसित्ति?, निसामेह—

अत्थ अणेगधणधणकणगसमिद्धजणपरिच्छन्नो अदिट्ठपरचक्कोवद्वो समुदोव बहुवाणिओवेवओ महासरोव वि-
चित्तचित्तपत्तपउमाहिट्ठिओ रासिसमुदओव मेसविसमिहुणकन्नासमओ गयणाभोगोव सुरसोमगुलुहलोगाहिट्ठिओ
कोसिज्जो नाम सन्निवेशो । तत्थ असेसदेसआसाविसेसवियक्खणो नाणविन्नाणकोऊहलविहिविहण्ण छंदलक्खणजो-
इससत्थपरमत्थकुसलो छक्कम्मकरणनिरयचित्तो गोभदो णाम माहणो परिवसइ,

नियबुद्धिविषयविविहोवधारओ जेण सयलगामजणो । विहिओ पहिद्वहियओ एणं लच्छि विमोत्तणं ॥ १ ॥
अहवा न सो कोऽवि गुणो जो तस्स न विज्जए दियवरस्स । तं नत्थि किंतु जं भुंजिएहिं दिवसं स बोलेइ ॥ २ ॥
एवं च धणाविरहेवि सो अविचलचित्तत्तणेण मणांगं पि दीणत्तमदांसितो नियनियपरिगहत्तणेण चैव संतोसमुब्व-
हंतो चित्तेइ-अहो महाणुभावा ! इमे धणिणो जे इमीए सिरीए परिगहिया पीडिज्जंति दाइएहिं विलुप्पिज्जंति
नराहिवेहिं अभिभवज्जंति तक्करनियरोहिं मग्गज्जंति मग्गणगेहिं अणुहवंति विविहावयाओ, पयमेत्तं पि न परि-
भमंति सच्छंदयाए, तुच्छऽपत्थमोइणोवि अभिलसिज्जंति वाहीए, अहं पुण एत्तो एगस्सवि अणत्थस्स न गोयरमु-
वगओत्ति, एवं तस्स परिभावितस्स वच्चति वासरा । अन्नया य सो सिवभदाभिहाणाए निययपणइणीए भणिओ,
जहा-अज्जउत्त ! आवन्नसत्ता वहामि अहमियाणिं, पसवसमए विससेण मह ओसहाइणा कज्जं भविस्सइ, तो कीस
तुमं न किंपि पुरिसयारमवलंबेसि ? न वा दवोवज्जणोवायं विगप्पेसि ? , न हि अणागयत्थचित्तापरमुहा सलहि-
ज्जंति पुरिसत्ति, सो एवमायन्निकुण तक्खणविसुमारियपुव्वविओ जलहिव मेहोदएणं कुवियण्णकल्लोलमालाउलो परि-
भाविउमारद्धो-किं एत्तो ववसायं करेमि ? कं वा जणं अणुसरामि ? को वा इमस्स कज्जस्स होज्ज साहेज्जदायगो ?
कत्थ व गयस्स एयं सिज्जेज्ज ? को इमस्स हेउत्ति, इय किंकायवययाउलत्तजलहिमि सो बुड्ढो, ताहे सिवभदाए
भणिओ सो-कीस वाउलो होसि ? , केत्तियमेत्तं एयं तुह विमलकलाकलावस्स ? , जइ कमयिहु धणवत्तं गंतुं मग्गेसि

सोऽपि ध्रुवमेयं कज्जं पसाहइस्सइ, दुलहो तुम्हारिसो अतिही, गोभेहेण भणियं-पिए ! साहेसु परपत्थणं मोत्तणं
अन्नमुवायं, पत्थणा हि नाम नरस्स जणेइ मरणसमयनिविसेसत्तणं, तहाहि-जायणापयइस्स सन्निवायाभिभूयच्च
पक्खलइ वाणी विगलंति विच्छायछायाओ अच्छीओ विगयसोहं हवइ वयणकमलं कंपति अंगाइं पयइति दीह-
दीहा उस्सासा संखुब्भइ हिययंति । अविय—

तावच्चिय दुमुयस्यकनिम्मला विप्फुरंति गुणनिवहा । जाव परपत्थणाकलुसपंकलेवं न पावैति ॥ १ ॥
तावच्चिय पूइज्जइ गुरुत्तबुद्धीए परमभत्तीए । जावऽत्थित्तं सत्तुत्तणं व पयइइ न पुरिसो ॥ २ ॥
तावच्चिय सुहिसयणत्तणाइं दंसंति निच्छियं लोया । देहिस्सि दुट्ठमक्खरजुयलं जा नेव जंयेइ ॥ ३ ॥
देहिस्सि जंपिरेणं भाणविमुक्केण विणयहीणेणं । धम्मत्थवज्जिएण य जाएणवि को गुणो तेण ॥ ४ ॥
ता अन्नमुवायंतरसहुणा मम दुक्करं पि किंपि पिए ! । साहेसु पत्थणंपिहु सरमाणोवि हु न काहामि ॥ ५ ॥

इय सा तन्निच्छियमुवलब्भ खणमेगं चित्तिज्जण भणिउमारद्धा—अज्जउत्त ! जइ एवं ता अत्थि अन्नो उवाओ,
परं बहुसरारायाससज्जो अचिरकालसाहणिज्जो य, जइ भणह ता निवेएमि, गोभेहेण भणियं-पिए ! को दोसो ? निवे-
एहि, तीए भणियं-सुणेसु, अत्थि पुव्वदेसे असंखदेवउलमालंकिया वाणारसी नाम नयरी, तीसे समीचे फुरंतफा-
रंभंगुरतरंगाविद्धविपुद्धसलिला हंसचक्कवायमिहुणोवसोहिया अणवरयवहंतमहासलिलप्पवाहूपूरियरयणागरा गंगा नाम

महानई, तीसे तडंमि बहवे दूरदेसंतरागयराईसरसेट्टिसेणावइंदनाहणमुहा जणा केइ परलोगस्थिणो केइ
किन्तिजसस्थिणो केइ अणत्थपडिवायस्थिणो केइ पियतण्णस्थिणो अणवरयं काराविति महाहोमं पाडिति
पिंडं दिति सुवन्नदानं सक्कारिति उद्धूलियचलणे साहणेत्ति, अओ अज्जउत्त ! जइ तुमंपि तत्थ वच्चासि ता उवत्थाण-
मेत्तेण पत्थणाविरहेऽवि पावेसि कणगदक्खणं, थेवमेत्तकालेण य पडिनिगत्तिहिसि, इमं निसामिऊण भणियं गोभइ-
ण-पिए ! मुद्धाऽसि तुमं, सवणरमणीया खलु दूरदेसवत्ता, सिवभदाए भणियं-अज्जउत्त ! तहावि भवणनिविट्टस्स का
तुज्झ कज्जनिप्फत्ती ? गोभइण भणियं-किमजुत्तं ? एवंपि होउ, कुणसु संबलं जेण वच्चासि, तओ तीए कयं से नि-
मित्तं पाहेज्जं, अन्नदिवसे संबलगहत्थो पयट्ठो सो वाणारसीसंमुहो, कमेण वच्चेतेण दिट्ठो निट्ठसररीरसंठाणो नियंसि-
यवत्थजुयलो निराभरणोवि अहिगंसरीरप्पभाए उवसेहंतो बज्झागारेणविलिखज्जमाणातिसओ पवरपाउगाधिरूढो
रतिविरहिओ वम्महोच्च पचक्खो सलीलं असंभंतो पेह वच्चेतो एगो सिद्धपुरिसो, तं च संभमभरियाहिं अच्छीहिं जाव
पेच्छइ ताव संभासिओ अणेण-भो गोभइ ! समागओऽसि ? किं संपयं तुमं वाणारसिं गंतुमिच्छसिति वुत्ते सवि-
म्हयं गोभइो चित्तिउमारद्धो-अहो कहां अदिट्ठं असुयं मं पच्चसिजाणइ ? कह वा मम गिहिणीए य एगंतजायं इमं
गमणवइयरं उवलक्खेइ ? सव्वहा न एस सामन्नो हवइत्ति, तहा जो एत्तियं मुणइ सो अन्नंपि मुणिस्सइ, ता देवयं
व उवचरेमि एयं, जइ पुण एत्तोच्चिय निगफ्फत्ती होज्जत्ति विभावित्तो जोडिय करसंपुडं तं भणिउमाट्ठत्तो-अज्ज !

एवमेयं, सम्मं तुभोहं वियाणियं, तेण भणियं-भद् ! एहि समं चिय, जेण तहिं वच्चासो, पडिवन्नं गोभेण, गंतुं पयट्ठा, खणंतरे जाए भोगणसमए गोभेहेण भणियं-अज्ज ! पविसह गाममज्जे, करमि भोगणोवक्कमं, अइकालो वट्ठइत्ति, विज्जासिद्धेण भणियं-सोम ! किमत्थ पविट्ठहिं कायच्चं ? एहि अज्जवि जाममेत्तो वासरो कोमला सूरकि-रणा थेवमगं अइकंता य, गोभेहेण भणियं-जं तुभे वियाणह, तओ पुणो पयट्ठा गंतुं, मज्झादिणसमए य संपत्ता बहलतरुसंडसंछणं उज्जाणं, दिट्ठा य तत्थ अच्छसलिलपडिहत्था कमलकरवकहारापरागपिणरहंसावसोहियतीर-देसा एगा महासरसी, पविट्ठा तत्थ, कयं मज्जनं, विहिया मुहसुद्धी, पयट्ठो य गोभदो देवयणुसरणं काउं, इय-रोऽवि ठिओ समाहीए ।

एत्थंतरंमि बहुभक्खभोगणा रसवई गुणसमिद्धा । बहुवंचणपडिपुण्णा मंतपभावेण अवयरिया ॥ १ ॥

कच्चोलथालदवीसिप्पिसणाहो उवक्खरो सबो । सुविणीयपरियेणप्पिओव पुरओ ठिओ तस्स ॥ २ ॥

एरिसं च परमब्भुयभूयं वइयरमवल्लोइऊण विम्विओ गोभदो, भणिओ य विज्जासिद्धेण-गोभद् ! पगुणो भव, कुणसु भोगणंति, जमज्जो आणवेइत्ति पडिवज्जिऊण तच्चयणं उवविट्ठो सो भोगणकरात्थं, विज्जासिद्धोऽवि परिवे-सिउमारद्धो, कमेण य निव्वत्तियभोगणंमि गोभद् सयसुवविट्ठो विज्जासिद्धो, गोभेहेणवि कओ से परिवेसणइया-वारो । एवं च निव्वत्तियमि भोगणे विज्जासिद्धविमुक्केकुहंकाराणंतरमेव अंसणसुवगया थालाइसमेया रसवई, खण-

मेतं च वीसमिऊण माहवीलयाहरे निरुव्विगहियया विविहकहाओ कहेभाणा संपट्टिया गंतुं, गच्छंताण य जाए रयणिसमए गोभेइण भणियं-अज्ज ! कलयंतकंठसच्छहा समुच्छलइ तिमिरिंछोली न लक्खिज्जेति संपयं निणणुणया महिमगा निदावसविसंतुलाइं युम्मंति लोयणाइं पयत्तसंचालियावि न चलंति चलणा, ता गच्छह गामे, कुणह वीसामंति, विज्जासिद्धेण भणियं-सोम ! सिग्घगईए एहि मुहुत्तमेत्तं, किं गामपवे- सणकज्जे, गोभेइण भणियं-एवं हवउत्ति । ताहे जाममेत्तं अट्ठाणमइलंघिऊण ठिया एगत्य पएस्से । तथणंतं च विज्जासिद्धो आबद्धपउमासणो निरुद्धसमीरणपयारो ज्ञाणं काउमारद्धो, अह—

कणगकलसकलियं रणंतमणिक्किणीनिवहरम्मं । सुसिलिट्ठुट्ठुथिरथोरथंभसोहंतवरसालं ॥ १ ॥

सुविभत्तचित्तेरंहवेइगावल्यलीढपरंतं । बज्झपएसनिवेशियमहल्लपल्लकसोहिहं ॥ २ ॥

गयणाओ अहापवरं विमाणमेगं समोयरेऊणं । विज्जासिद्धस्स पुरो लहुं निविट्ठं धरणिवट्ठे ॥ ३ ॥

अह तत्तो नीहरिऊण दिप्पंतमणिमउलंकियसिरा विमलकुंडलकंतिविच्छुरिथिगंडयला पवरमुत्तासरिविराइय- सिरौहरा हारलयाच्छाइयथणकलसा पंचरायमणिकंकणमंडियकोमलबाहुलया रोमावलीसणाहमुट्ठिगेज्झमज्झभाग- देसा रसणादामंसगयनियंबफलया नियंसियपंचवन्नदिवदूसा झंकारमणहरमणिनेउराणुगयचलणा हरियंदणरसचि- च्छुरियसरीरा अप्पडिमरूवा एगाए समाणरूवजोव्वणाइगुणालंकियाए विलयाए अणुगम्मभाणा समागया विला-

सिणी, जोडियकरसंगुडा य विज्जासिद्धं भणिउमारद्धा, जहा-भो महायस ! उवसंहरेसु संपयं मंतमुमरणं अलंकरेसु विमाणमेयंति निसामिऊण उट्टिओ विज्जासिद्धो, पविट्टो विमाणब्धंतरे निसन्नो सेजाए, उवणीयाणि य तस्स तंबोलवीडगाणि, ताहे वाहरिओ विज्जासिद्धेण गोभद्रो, तंबोलदाणपुव्वगं च विसज्जिओ निहाकराणाय, दूरे ठाऊण य तदीयमाहणपविम्हिइयमणो पसुत्तो एसो, विज्जासिद्धोवि ताहिं रमणीहिं समं विविहसंकहाहिं गमिऊण खणमेकं जेट्टाए अणुचरिं जुवइं भणइ-मइ ! तुमं इमस्स गोभद्रस्स माहणस्स भज्जाभादंसणेण अत्ताणं पवित्तं कोसु, तीए वुत्तं-एवं करोमि, अह जायमि विजणे विज्जासिद्धो पारद्धो इयरीए समं भोगे उवमुंजिउं, सावि तदुवरोहेण गया गोभद्रसमीवे, पवोहिऊण सिद्धो विज्जासिद्धाएसो, तेण य कुसलमइत्तणेण नाऊण कज्जपरमत्थं भणिया सा, जहा-मयच्छि ! भगिणी तुमं मे होसि, ता अलं एत्थ पत्थुयत्थवित्थेणं, जहाभियेयं समायसु, अकज्जपवित्तीएवि जओ न एयस्स हयजीवियस्स कोऽवि समुण्यज्जइ सुणो, अविय—

अइधोरमासयाहयनलिणीदललमसलिलवचवलं । जीयं सुपालियंपिहु न चिरावत्थाणमणुहवइ ॥ १ ॥
विविहोवभोगविसयणुकूलयालालियंपि बहुकालं । परिसडियविटफलमिव विगलइ गत्तंपि अचिरेण ॥ २ ॥
सुव्वंति य नरएसुं धम्मविरुद्धत्थकरगसत्ताणं । सत्ताणं तिकखदुकखाइं तेण कुणिमो कहसकज्जं ? ३ ॥
सकलत्तसंगईविहु उउकालाओ परेण पडिसिद्धा । किं पुण परमणीजणविसयपसंगो समयसत्थे ॥ ४ ॥

नियजीवस्सवि उम्मग्गगामिणो जइ केरमि न निरोहं । ता कह अन्ने अणयारयारिणो नणु निरंभिस्सं ? ॥ ५ ॥

इय गोभदेण तहा कहंणि संभासिया सवेरगं । नियभायनिविसेसो जह जाओ तीए पडिबंधो ॥ ६ ॥

खणमेत्तं च विगमिऊण भणियं तीए-अहो महाणुभाव ! सुंदरो तुहाभिप्पाओ, एयं चिय सण्णुसिलक्खणं, एयं चिय धम्मसद्वस्सं, एत्तो सयलकल्लाणोवल्लो, इमाओ असेसदुस्सज्झविज्जासिद्धीओ हवंति, एयं खु सुरासुरा-णवि दुरणुचरं, एयाणुगओ य नरो न रोगसोगदुक्खेहिं बाहिज्झह, ता पत्तं तुमए जम्मजीवियफलं जस्सेरिसो दुक्कपरित्थीसेवापरिहरणपरिणामो, एयं च कुणमाणेण तए अहंणि निओइया सव्वकामुयसिद्धिआमेणंति, गोभदेण भणियं-कहं चिय मए निओइया सव्वकामुयसिद्धीए ? , तीए भणियं-महायस ! भायनिविसेसोत्तिकाऊण साहि-जइ तुज्झ एस वइयरो, निसामेहि, गोभदेण भणियं-एसो निसामेमि, तीए कहियं—

अत्थि सयलतइलोयविकखायं अणेगअच्चमुयभूयाइसयजणियजणविस्सयं आगरो विज्जारयणाणं कुलभवणं तं-तप्पओगाणं ठाणं खुइसिद्धीणं जालंधरं नाम पुरवरं, जत्थ—

आगट्ठिवसीकरणप्पओगअदिस्सकरणकुसलाओ । नहगमणदूरदंसणपमोक्खलद्धीसमिद्धाओ ॥ १ ॥

हुंकारमेत्तपडिभिन्नसत्तुसंदोहतुट्ठहिययाओ । निरुवमरूवनिरक्खियंमहमहिलाभिमाणाओ ॥ २ ॥

अट्ठप्पयारअणिमाइसिद्धिसंवधसस्सिरियाओ । निवसंति जोगिणीओ देवानवि वंदणिज्जाओ ॥ ३ ॥

इयंरजणा दुविणयं जं नो दंसति तं किमच्छरियं ? । तासिं महाबलाणं संकइ कुविओ कयंतोऽवि ॥ ४ ॥

सुरखयरजकखरकखसमडफरफंसणावि नूण जरा । निचावट्टियजोव्वणुणाण जासिं न संकमइ ॥ ५ ॥

चिरदूरकालवोलीणभूवईणं समग्गचरियाइ । अज्जवि जाओ पयडंति सेललिहियप्पसत्थिच्च ॥ ६ ॥

इय तारिसपयडपभावजोगिणीचक्कवालकलियस्स । नयरस्स तस्स भण केण वज्जणा तीए काउं ? ॥ ७ ॥

तत्थ य अहं चंदेलेहाभिहाणा जोगिणी परिवसामि, एसवि विज्जासिद्धसमीववत्तिणी मम जेड्डा भइणी पसा-
हियपवरविज्जा अचंतदरिसिज्जा जोगिणीपीढस्स चउत्थट्ठाणपूयणिज्जा चंदकंतानामा, गोभइेण भणियं-भइणि !
को एस विज्जासिद्धो ?, किंनामो ?, कहं वा एरिसमाहण्यो ?, किं वा एस तुह जेड्डभइणीए एयं उवचरइत्ति, केहेसु
बाढं कोऊहलाऊलं मे हिययं, चंदेलेहाए भणियं-कहेमि, एसो हि कामरूपाभिहाणजोगिणीपरिवेदियस्स डमरसी-
हस्स पुत्तो ईसाणचंदो नाम, एएण य पुरा अणेगण्ययाराओ साहिऊण विज्जाओ अखलियपसरं सयलकाभियसिद्धिं
समीहमाणेण कच्चाइणीए भगवईए पुरओ कओ अट्टोत्तरविछलक्खेण होमो, तित्थियमित्तेणवि जाव न परिटुट्ठा
भगवई ताव आकट्ठिऊण खग्गधेणुं समारद्धो नियकधरं छिंदिउं,

नियजीवियनिरवेक्खो, कंठद्धं जा न छिंदए एसो । ताव सहसत्ति कत्तोवि आगया देवि रुद्धाणी ॥ १ ॥

अहह महाकट्टमिमं कीस तुमं पुत्त ! ववसिओ भीमं ? । इय जंपिरीए तीए कराओ छुरिया लहुं हरिया ॥ २ ॥

ताहे इमेण भणियं देवि ! पसीयसु ममेत्तिएणावि । पडिवज्जसु सिरकमलेण पूयणं होउ सीसेण ॥ ३ ॥
 देवीए तओ भणियं पुत्तय ! तुह साहेसेण तुट्ठमिह । वरसु वरं एत्ताहे पज्जत्तं देहपीडाए ॥ ४ ॥
 तओ एएण भणियं-सामिणि ! जइ सच्चं चिय तुट्ठासि ता जं तुमए पुत्तत्ति अहं वागरिओ एसो चिय मम वरो,
 एत्तो य पुत्तवुट्ठीए मम पेच्छेज्जासित्ति भणियावसाणे दाऊण सव्वसमीहियत्थकरं रक्खावलयं पडिवज्जिऊण तद्वयणं
 अहंसणमुदगया कचायणी, एसोऽवि पावियतिलोयरज्जं पिव अत्ताणं मन्नमाणो रक्खावलयमुद्वहंतो सगच्चं अक्खलि-
 यगमणो सव्वत्थ वियंभिउमाढत्तो । अविय—

न गणइ नरवइवग्गं नय भीमभएवि उव्वहइ कंप्पं । सच्छंदलीलगमणो जमंप्पि उव्वहसइ सव्वलेणं ॥ १ ॥
 अंतोउरेसु निवसइ उव्वमुंजइ कुलगयावि विलयाओ । आगरिसइ दूरगयंप्पि वत्थु वरमन्तसत्तीए ॥ २ ॥
 जण्णभिहं चिय कचाइणीए एयस्स बाहुमूलंमि । बद्धं रक्खावलयं तत्तो चिय चित्तियं लहइ ॥ ३ ॥
 अह अन्नया कयाई हिंडत्तो एस महियलं सयलं । संपत्तो जालंधरपुरंमि रामाभिरामंमि ॥ ४ ॥
 दिट्ठा य जोगिणीजणमज्झगया विहियपवरसिंगारा । अह तत्थ चंदकंता एसा मम जेट्ठिया भयणी ॥ ५ ॥
 ताहे हठेण वररूवजोव्वणाइसयरंजिओ एसो । कुणइ पसंगमिभीए सद्धिं सद्धम्मनिरेक्खो ॥ ६ ॥
 ठाऊण कहवय दिणे सच्छंदं विविहदिक्खीलाहिं । अणवट्ठियमणपसरो अमुणिजंतो विणिकखंतो ॥ ७ ॥

तयणंतरं च कथवि एत्तिथकालं परिब्रमिय इमिणा । दिवविभाणारूढा अहयं एसावि मह भइणी ॥ ८ ॥
आगिटिसत्तिणा आणीयाओ संपइ पयंडदंढेण । सिरिपव्वयासणट्ठा गेहाओ नीहरंतीओ ॥ ९ ॥
एत्तोऽणंतरमेवं जेमस वागरइ तं करेमोत्ति । तुज्झइ खंधेण हडी सच्चं चोरस्स वलियस्स ॥ १० ॥
एयमायव्विऊण गोभइण चित्तियं-अहो रक्खसाणंपि भेक्खसा अत्थि, जमेवंविहजोगिणीजणीवि एवं आणानि-
हेसंमि वट्ठाविज्झइ, अओ चिय भणिज्झइ-वहरयणा वसुंधरा भगवई, एत्तोचिय वरगुणगणनिहियोऽवि न नवसुव-
हंति सण्णुरिसा, चंदलेहाए भणियं-अहो महायस ! एयं किर साहियवं, जइ एस विज्जासिद्धो एत्थ प्रत्यवे मम
भइणीचंदकंताए न वंभयरभंगं करंतो ता इमीए सयंपमा नाम महाविज्जा साहिया हुता, वस पुण तुमए तील-
खंडणं अकुणमाणेण तस्साहणविही अज्जवि पडिपुन्नो चेव वट्ठइ, सत्तरत्तमेत्तेण य चित्तियत्थसंपत्ती भवित्सइ, ता
भो महाणुभाव ! जं पुरा पुच्छियं तुमए जहा कहं मए जोइया सब्बकापुव्वलायसिद्धीयत्ति तत्थ इत्थ पररत्थो, गोभ-
इण भणियं-सुयणु ! किमतथ भणियवं ?

पीडंतु गहा निहडंतु संपया पडउ दुक्खदंदोली । सयणावि होंतु विमुहा तहवि न सुंयमि तच्चरियं ॥ १ ॥
नियजीवस्स खलस्सव जहिच्छचारेण दिन्नपसरस्स । दुक्खेण मामि ! सम्मगगढावणं जइजणी कुणइ ॥ २ ॥
चंदलेहाए भणियं-एवमेयं, किं वन्निज्झइ तुमह निम्मलगुणाणं जस्स एरिसं जिहंदियत्तणं ? एयंविहो अज्जकरण-

निधमो एरिसं पावभीरुत्तणं एवंरूवा य वयणपइट्ठा, सबहा धन्नाऽहं कयलक्खणाऽहं जं मए तुमं सप्पुरिससिसेहरभूओ
 दिट्ठोसित्ति, गोभदेण भणियं-केत्तियमित्तोऽहं, अज्जवि महीयले दीसंति ते महापुरिसा जेसिं चरणेणुमेत्तस्सवि न सारि-
 स्समुवहंति अम्हारिसा । तओ चंदलेहा सप्पणयं सीसे अंजलिं काऊण भणिउमारद्धा-अज्ज ! तुह असरिससच्चरियमत्ति-
 परवसत्तणेण किंपि विन्नविउमिच्छइ मम मणो, गोभदेण भणियं-भदे ! कीस एवं संखोहमुवहसि ?, निव्विसं कं भणसु
 जहाभिप्पेयं, चंदलेहाए भणियं-जइ एवं ता कयाइ परिभमणपरिवाडीए कायवो अम्ह गेहागमणेण अणुगगहो, गोभ-
 देण भणियं-किमणुचियं ?, नहि तुह गेहमागच्छंतस्स मम किंचि लहुयत्तणं, पत्थावंमि जहोचियं आयरिस्सामि, न
 अन्नहा तुमए संभावणिज्जं, चंदलेहाए भणियं-महाभाग ! बाढं अणुगगहियमिह, न एयमन्नहा कायवंति, एवं च जाय-
 तक्खणपमाणुबंधंधुराहिं विविहसंकहाहिं सन्भावसाराहिं विमुमरियसेसवावाराणं ससहरजोणहावसोवलीक्खियपरो-
 प्पररूवाणं तोसिं झडत्ति जाया पच्छिमरयणी, उम्मीलिओ पुरंदरदिसिमुहे जवाकुसुमगुंजद्धुंभरसकिंसुयसुयमुहप-
 उमरायसरिसवन्नो कुंकुमबहलरागोवसित्तोव सूरसारही, पविरलीभूयं गयणंणे तारागावल्यं, वियंभिओ पच्चससिसिर-
 मारुओ पलहत्थिओ पच्छिमजलहिम्मि रस्सिरज्जुजडिओ ससिपुण्णकलसो सलिलाकट्ठणत्थं व पच्छिमदिसिरमणीए,
 एत्थंतरे विज्जासिद्धेणं भणियं-भो भो गोभद ! बहुप्पभाया रयणी पगुणो भवसु जेण गम्भइ, गोभदेण भणियं-एस्स
 पगुणीहूओऽमिह, चंदलेहाऽवि तं आपुच्छिऊण गया चंदकंताए समीवं, विज्जासिद्धोऽवि ताओ सविमणाओ बी-

सज्जिऊण गंतुं संपयद्दो, गोभदोऽवि पुणो पुणोऽणुचिंततो निसावुत्तंतं लग्गो से अणुमगगओ, तओ आयुच्छिओ विज्जासिद्धेण-भद्द ! निसिंसि मए तुह समीवे पेसिया एगा तरुणी, तीए कया कावि पडिवत्ती ? गोभद्रेण भणियं-अज्ज ! बाढं कया, किं चिरं जीविउकामो कोइ तुह सासणमइक्कमइ ? केवलं अहं वाणारसीतित्थदंसणत्थं अबं-भकयनियमो आसि, एवमायण्णिऊण भणियं विज्जासिद्धेण-भद्द ! समावि चरणेहिं तत्थ गंतवति अत्थि एस नियमो, न बंभचरपडिवत्तिरूवो, एवं ठिए विसेसेण मए तुह निमित्तं एस उवक्कमो कओ, जइ पुण तुहाभिप्पायं सुणितो ता अहंपि बंभचरं करितो, एवं च कए तित्थदंसणं सफलं हवइ, गोभद्रेण भणियं-अज्ज ! एवमेयं, को तुम्हाहि-तोवि अन्नो एरिसविवेयभायणांति ? अह पुवक्कमेण भोयणं कुणमाणा विदेसियमढेसु रयणिं अइवाहिता पत्ता कमेण वाणारसिं, पक्खालियमुहकररणा य गया सुरमंदिरिसे, दिट्ठा य खंदमुगुंदरुदपमुहा देवया, कया तेसिं पूया, एवं च अण्णणसुरमंदिरावलोयेण जाए वेयालसमए विज्जासिद्धेण भणिओ गोभदो-भद्द ! संपयमणुसरमो सुरसरिपरिसं, करेमो तत्थ पहाणेण पूयपावं अत्ताणं, गोभद्रेण भणियं-एह जामो, गया दीवि गंगातीरे, एत्थंतरे अविभाविय-आवयावडणेण अविचिंतियवत्थुपरमत्थेणं विज्जासिद्धेण अहरमसवसेण ओत्तारिऊण तं दिव्वरक्खावल्लयं समप्पियं गो-भदस्स, भणिओ य सम्मं रक्खेज्जासि जाव अहं इह भागीरहीवारिमज्जे मुहुत्तमेत्तं पाणायामं करेमि, एवंति पडिवज्जिय गहिय रक्खावल्लयं ठिओ गोभदो, इयरोऽवि पविट्ठो वारिमज्जे, अह मुहुत्तमेत्ते गए गोभदो विज्जासिद्धमपेच्छमाणो

संभतनयनो इओ तओ सयलं अवलोइउं पयत्तो, जाव तहेव सव्वओ पलोयमाणस्स पच्छिमदिसिमवलंविंयं भाणु-
 विंयं, विष्फुरिया बालप्पवालाडला किरणा वाउलीहूयाइं रहंगमिहुणाइं, तओ गोभहेण निवेइया गंगातारगण
 वत्ता, जहा-भो भहा ! अचंतरूवो वरपुरिसो एत्थ तित्थंमि पविट्ठो, सो य संपयं दुत्तरउचुंगतरंगपरपरापच्छाइओ
 वा मगराइदुसत्तनिकंतिओ वा विसमंपकनिमगो वा भवेज्जत्ति न जाणिज्जइ परमत्थो, ता लहुं तद्विरहतरलियं
 मम जीवियं अणुकंपमाणा पविसह नईमज्जे निरुवह तं महाभागं, मा अपत्थावे चिय अत्थमउ तारिसवरपुरिस-
 दिणयरो, मा आजम्मं पाउब्भवउ सुरतरंगिणीए एरिस महाकलंकोत्ति भणियावसाणे करुणापरव्वसीकयहिद्वया
 पहाविया सव्वओ तारगा, समारद्धं च अमरसरियावारिप्पवाहावगाहणं, अह सव्वायेण दीहप्पसारियमुयाहिं अओ
 डिज्जण जलं तेषु तेषु ठाणेषु आमूलाओ कत्थवि तं अलभमाणा पडिनियत्ता तारगा, निवेइया तद्वसपत्तिवत्त-
 गोभइस्स, सो य गादमुगराभिहओव दुस्सहसोगावेगविहलंघलसरीरो विचिंतिउमारद्धो—

कह जणनयणाणंदो समुग्गओ सरयपुण्णिमाइंदो । कह दाहुग्गाढमुहेण कत्रलिओ सो विडप्पेण ? ॥ १ ॥

कह भूमंडलमंडणरुप्पो कप्पहुमंकुरो जाओ । कह वा मूलाओ चिय समुक्खओ वणवराहेण ? ॥ २ ॥

कह एस भुवणतिलओ विजासिद्धो अकारणसिणिद्धो । मइ भित्तत्तमुग्गओ कह वा अहंसणं पत्तो ? ॥ ३ ॥

मम मंदभग्गयाए मण्णे तस्सेरिसी दसा जाया । जत्थइल्लिग्रइ कवोडो सचं सा सुमइ तरसाहा ॥ ४ ॥

किल मे मणोरहो एस आसि जं चितियत्थसंपत्ती । एत्तो होही सयला सा पुण विहलीकया विहिणा ॥ ५ ॥
ता किं अज्जवि एरिस कलंकपंककियं नियसरीरं । विसपायवं व जणहुक्खकारयं परिवहिस्सामि ? ॥ ६ ॥
एवं च संचितिऊण मुक्ककंठं रोइउमारद्धो-हा परमच्छेरयरयणयायर ! हा निक्कारणकरुणरससायर ! हा परम-
विज्जाहरीविलासलुभग ! हा असमसाहसपरितोसियक्काइणीदिणवर ! कत्थ सहसच्चिय अइगओसि ? देहि मे
पडिवयणं मंदउण्णस्स, किं तुम्हारिसाणवि निवडंति एरिसीओ आवयाओ ? हा पावकयंत ! किमेक्कपएच्चिय पणट्ट-
पुरिसरयणं धरणिं काउमुज्जुओ सि, एवं परदेविऊण तच्चिरहुयवहपसमणत्थं गंगाजले निवडिउकामो आवद्धनिवि-
डनियंसणो संजमियकेसपासो जोडियकरकमलो भागीरहिं विणविउमारद्धो-देवि ! सुरसरि एस परमबंधवो
तुमए चिय अवहरिओ अओ तमणुसरिउकामो अहंपि संपयं पडेमि तुह सलिले, जओ अगिगदह्वाण अगिगच्चिय
ओसहंति बुड्ढवाओ, इइ भणिऊण जावज्जवि न सुयइ उचुंगदोत्तडीओ अत्ताणं ताव गहिओ सो समीववत्तिणा
नत्थियवाइज्जेण, पुच्छिओ य-अरे मुद्ध ! कीस तुमं इह निवडसिस्ति ? निवेइओ अणेण गामनिगमाओ आरब्भ
सयलवुत्ततो जाव तहंसणं अभिकंखमाणो इह निवडाभिमिस्ति, तोहिं भणियं-मूढ ! केण तुह निवेइयमेयं जमिह निवड-
णेण पियसंपओगो वाहिविगमो पावनसो वा हवेज्जिस्ति, एसा हि असेसदेसंतरावगाढकोढुडियसत्त्वंगनरनिवहवगा-
दणदुगुंछणिज्जसलिला अणेगसद्वयद्विसंघायणभक्खणपरा महारक्खसिस्ति कहां मणवंछियत्थं पूरेजा ? अहो महामोहो

किल मे मणोरहो एस आसि जं चितियत्थसंपत्ती । एत्तो होही सयला सा पुण बिहलीकया विहिणा ॥ ५ ॥
ता किं अज्जवि एरिस कलंकपंककियं नियसरीरं । विसपायवं व जणहुक्खकारयं परिवहिस्सामि ? ॥ ६ ॥
एवं च संचितिऊण मुक्ककंठं रोइउमारद्धो-हा परमच्छेरयरयणयायर ! हा निक्कारणकरुणरससायर ! हा परम-
विज्जाहरीविलासलुभग ! हा असमसाहसपरितोसियक्काइणीदिणवर ! कत्थ सहसच्चिय अइगओसि ? देहि मे
पडिवयणं मंदउण्णस्स, किं तुम्हारिसाणवि निवडंति एरिसीओ आवयाओ ? हा पावकथं ! किमेक्कपएच्चिय पणट्ट-
पुरिसरयणं धरणिं काउमुज्जुओ सि, एवं परदेविऊण तच्चिरहुयवहपसमणत्थं गंगाजले निवडिउकामो आवद्धनिवि-
डनियंसणो संजमियकेसपासो जोडियकरकमलो भागीरहिं विण्णविउमारद्धो-देवि ! सुरसरि एस परमबंधवो
तुमए चिय अवहरिओ अओ तमणुसरिउकामो अहंपि संपयं पडेमि तुह सलिले, जओ अगिगदह्णण अगिगच्चिय
ओसहंति बुड्ढवाओ, इइ भणिऊण जावज्जवि न सुयइ उचुंगदोत्तडीओ अत्ताणं ताव गहिओ सो समीववत्तिणा
नत्थियवाइज्जेण, पुच्छिओ य-अरे मुद्ध ! कीस तुमं इह निवडसिस्सि ? निवेइओ अणेण गामनिगमाओ आरब्भ
सयलवुत्ततो जाव तहंसणं अभिकंखमाणो इह निवडाभिमिस्सि, तोहिं भणियं-मूढ ! केण तुह निवेइयमेयं जमिह निवड-
णेण पियसंपओगो वाहिविगमो पावनसो वा हवेज्जिस्सि, एसा हि असेसदेसंतरावगाढकोढुडियसत्तंवनरनिवहवगा-
दणदुगुंछणिज्जसलिला अणेगसद्वयद्विसंघायणभक्खणपरा महारक्खसिस्सि कहां मणवंछियत्थं पूरेजा ? अहो महामोहो

अहो गड्डरियापवाहो, सचं चिय पढति इमं वियवखणा—

कर्णविषेण हि दग्धः किं किं न करोति बालिशो लोकः?, । क्षपणकतामपि धत्ते पिबति सुरां नरकपालेन ॥ १ ॥

अह एत्थ निमग्गा पावन्ति समीहियत्थं ता रे किं कयसिमेहिं मच्छकच्छवाइहिं आजम्मपि सलिलावगाढे-
हिति, किं बहुणा?, सुयसु विसायं, परिचयसु मरणाभिलासं, कुणसु नियकरणिज्जं, न एवंविहजणो कयंतवयणपवि-
ट्ठोवि विवज्जह, अह विणिवाओऽवि होज्ज ता विवणजीयं सरीरं सलिलोवरि सयमेव टाएज्जा, अओ अलं वाउ-
लत्तणेणं, होउ परिदेविण्णंति । एत्थंतरे गुलुगुलियं गंधहत्थिणा वज्जियं मंगलतूरं पढियं वंदिणा रसियं सारससि-
हुणेण, तओ तेहिं भणिओ—ओ भइ! एरिसनिमित्तेहिं अज्जवि सूहज्जह से जीवियं, गोयइण भणियं—तुम्ह वयणसा-
मत्थेण एवं हवउ, इय सो तेहिं मरणाओ वावत्तियचित्तो दो तिन्नि दिणाइं तत्थेव निवसिओ, अन्नदियेहे य
चित्तियमणेण, जहा—न जुत्तं एत्थावत्थाणं, जओ—

वाणारसीवि वाणारसिच्च किंतइ सरीरमहिगं मे । मंदाइणीवि मं दाइणिच्च दूमेइ पयदियहं ॥ १ ॥

ता गच्छामि जालंधरं, पेच्छामि चंदलेहाए भणियं पणयंति विभाविऊण तमभिसुहं गंतुं पयट्ठो, गच्छंतेण य
संपत्ते मज्झणहसमए विज्जासिद्धभोगणाइललियं सुमरणमाणेण अंसुजलाविलोयणजुयलेण चित्तियमणेण—

तारिसजणदुस्सहविरहजलणजालातविज्जमाणंपि । अज्जवि न लज्जसि वज्जघडिय ! निहज्ज हयहियय ! ॥ १ ॥

तथा-तं चिय महण्पभावं रक्खावल्यं इमो य सो समओ । तेणेकेणव विणा सुन्नं सत्वं दिसापडलं ॥ २ ॥
अहवा रक्खावलएवि होज्ज निपुन्नयस्स किं मज्झ ? । चिंतामणिलभेऽविहु सीयइ विसुहो विही जस्स ॥ ३ ॥
आधारवसेण धुवं गुणोदया न उण जहा तथा होति । सल्लपि सिण्णिसंपुडपडियं मुत्ताहलं होइ ॥ ४ ॥
इय एवं भावितो तमेक्कचित्तेण सो निराणंदो । जालंधरमणुपत्तो कमेण अविलंबियगईए ॥ ५ ॥

तद्वासिजणं च पुच्छितो पविट्ठो चंदकंताए गिहे, सुन्नप्पायं च तं दट्ठण भणिया दुवारट्ठिया गेहरक्खिया,
जहा-भद्दे ! किमेत्थ कोऽवि न दीसइ, तीएवि बहिरत्तेण वयणमसुणमाणीए दांसिया नियसवणा, तेणावि बहिरिति
नाऊण जंपियं महया सट्ठेण, एत्थंतरे समीवगिहट्ठिण्ण ईसाणचंदविज्जासिद्धेण सुणिओ सो सट्ठो, पच्चभिन्नाओ य,
तओ भणिओ सो-गोभद्द ! इओ इओ एहि, इहाहं निवसामि, गोभट्ठोऽवि संसंभमं वयणमेयं निसामिऊण कंहं विज्जा-
सिद्धो इव मं बाहरइत्ति जायसंको जाव किंत्तियंपि भूभागमइक्कमइ ताव समक्खं चिय दिट्ठो अणेगनाडीनिविडज-
डियसरीरो चरणपसारणंपि काउमसमत्थो ईसाणचंदो विज्जासिद्धो, तं च दट्ठण चित्तिमणेण—

किं किंपि कूडमेयं विभीसिया वा मइब्भमो किं वा । दिट्ठीए मोहणं वा होज्जा छलणप्पगारो वा ? ॥ १ ॥

अहवा पीढमिमं जोगिणीण सच्चपि संभवइ एत्थ । नूणं सकम्मपवणप्पणामिओ जामि निहणमंहं ॥ २ ॥
सुरसरियातीरे जइ तइया काऊण धम्मकिंचाइ । परलोयं साहितोऽम्हि ता धुवं लट्ठयं होतं ॥ ३ ॥

इय जाव मरणभयकंपमाणदेहो स चिंतइ ससोगो । तुरियं ताव पुणोऽविहु विज्जासिद्धेण वाहरिओ ॥ ४ ॥

गोभइ ! भइ किं कुणसि बिब्भमं नत्थि तुज्झ भयमेत्थ । पुव्वोवणीयमहुणा रक्खावलयं समणेषु ॥ ५ ॥

इय भणिए गोभदो वीसत्थो अइणओ समीवंमि । पेच्छइ विज्जासिद्धं विविहपयारेहिं अवरुद्धं ॥ ६ ॥

अह सो तं दट्ठणं वाहाऊल्लोयणो भणइ एवं । हा अज्ज ! तुज्झवि कहं दुत्थावत्था समोत्थरइ ? ॥ ७ ॥

विज्जासिद्धेण भणियं-गोभइ ! अलं विसाएण, लहुं बंधेहिं मम बाहुमूले रक्खावलयं, जमज्जो आणवेइत्ति भणि-
ऊण बद्धमणेण, एत्थंतरे तडयडत्ति बिहडियाइं नियलाइं, जाओ पगुणसरीरो, पुच्छिओ गोभदेण-अज्ज ! को एस
बुत्तंतो ? , कहिं नईनिमज्जनं ? कहिं एत्थ आगमणं ? , कहं वा एस निरोहो ? , बाढं कोऊहलाउलं मम हिययं,
साहेसु परमत्थं, विज्जासिद्धेण भणियं-साहेमि, जं तइया तरलत्तणेणवि सुमरियजुत्ताजुत्तवियारो दिव्वमाहप्पमणि-
ऊण तुह रक्खावलयं पविट्ठोऽम्हि गंगाजले तस्स फलमेयं, गोभदेण भणियं-कहं ? , सो भणइ-जाव किर तत्थ
मुहुत्तमेत्तं पाणायामं काऊण ठिओ ताव सहसच्चिय अब्बंतं सरारिविबलत्तणं लंभिऊण तुम्हारिसेहिं अपेच्छिज्जभाणो
उक्खित्तो अहं एयगिहसामिणीए पुव्वेराणुबंधमुव्वहंतीए चंदलेहाभिहाणाए जोगिणीए, उवणीओ एत्थ ट्ठणो, दढं
निजंतिओ निगडाईहिं, गोभदेण भणियं-अज्ज ! केण पुण कारणेण इमीए सद्धिं वेराणुबंधो ? , विज्जासिद्धेण भणियं-जं
तइया विमाणमारुहिय समागयाए जेट्ठमइणीए चंदकंताभिहाणाए मए बला परिभोगो कओत्ति, गोभदेण भणियं-

कहं पुण चितियमेत्तसमत्थवत्थुलाभेऽवि संपयं तुह एरिसं अचित्तिणिज्जं विसममावडियं?, विज्जासिद्धेण भणियं-देवया-
दिन्नरक्खावल्यविरहो एत्थ कारणं, परं भइ! तुमए नित्थारिओऽहं इमाओ आवयाओ, साहु साहु तुह वियक्खणत्त-
णस्स, एरिसमवत्थंतरनिवडियस्स न तहा जाया मह देहपीडा जहा तुह अइसणेणं, भन्ने इह भवे चिय पसन्ना भा-
गिरहो देवी जीए तुमं अणुवचरियपरूढपणओ मित्तो पणामिओ, ता बाढं पसन्नं मे मणो, वरसु जहा पियंति भणिए
गोभइणेण भणियं-अज्ज! देवो वडण्णो जाणइ कोवि अणुवचरियपरूढपणओ कस्सवि मित्तो पणासिओ, विज्जासिद्धेण
भणियं-अलं इमीए संकहाए, वरहि जहिच्छियं वरं, गोभइणेण भणियं-महापसाओ, पत्थावे वरिस्सामि, एत्थंतरे डम-
डमिरडमरुथनिनायभरियभुयणंतराला वराभरणकिरणविच्छुरियनहंगणा दिवविमाणाखुडा पविट्ठा चंदलेहा य चंद-
कंता य, तओ गोभइणेण भणियं-विज्जासिद्ध! कहमिणिह तुमं एयासु वट्ठिस्ससि?, विज्जासिद्धेण भणियं-जहा सत्तुसु
वट्ठिज्जइ, गोभइणेण भणियं-अज्ज! मामेवं जंपसु, जओ विसवल्लिच्च वट्ठती वरपरंपरा न कोसलमावहइ, विज्जासिद्धेण
भणियं-ता किं कीरइ?, विवक्खाभिभवेणेव अत्तणो अवत्थाणंति, नहि निसासंतमसमखंडिज्जण पभवइ मायंडमंडलं,
नेव य पंकत्तणमपावेज्जण धूलिपडलं चिरावत्थाणं बंधइ सलिलं, गोभइणेण भणियं-अत्थि चिय एस ववहारो, परं मम
वयणोवरोहेण ताव उदासीणेण होयवं तुमए, विज्जासिद्धेण भणियं-जं तुमं जाणासि, एवं वुत्तं जणेण असुणिज्जंतो
तत्तो सो नीहरिज्जण पट्ठिओ तंमदिराभिमुहं, इंतो य दिट्ठो चंदलेहाए, रयणियरप्पगासदिट्ठरूवाणुमाणेण य

जायपच्चभिन्नाणाए तीए गाढमालिगिऊण सुहासणत्थो हरिसुल्लसियलोयणाए पुच्छिओ-अज्ज ! कत्तो कहं वा समा-
 गओऽसिन्ति ? तेणावि से साहिओ सामन्नेण वुत्ततो, चंदलेहाए भणियं-मुहु कयं तुमए जमेत्थ पत्थावे समाग-
 ओऽसि, जओ अह पडिपुन्ना इयाणिं सब्बे मणोरहा, गोभइण भणियं-कहं चिय ? तीए भणियं-जं तहया तुमए
 मम बंभचेरखंडणा रक्खिया तेण सत्तरत्तपज्जंते सम्मभाराहिज्जमाणा सिद्धा भगवई संयंपभाभिहाणा विज्जा, सो य
 दुट्ठविज्जासिद्धो ईसाणचंदो सव्वकामुयरक्खावल्यविहूणो जणहुकन्नाजलमज्झगओ झसोव विवसो पाविओ, गोभ-
 इण भणियं-कहमियाणिं सो संठविओ ? तीए भणियं-जहा दुट्ठकरिवरो, तेण भणियं-किमित्थं पुण तहा धरि-
 ज्जइ ? तीए भणियं-कसिणचउइसीए चंडिगाए बलिबिहाणत्थं, गोभइण भणियं-जइ एवं ता दंसेसु तं थेवदिणपरि-
 चियत्तणेण तेण समं मे किंपि वत्तवमत्थि, तीए भणियं-को दोसो ? एहि जेण दंसेमि, तओ पट्टियाइ गंतुं, जव
 य केत्तियमेत्तमंतरमुवगया चंदलेहा ताव दिट्ठो विज्जासिद्धो बाहुबद्धरक्खावलओ वियलियनियलंबंधणो महाकोव-
 फुरंताहरो पायडियनिडालभिउडिमासुरोत्ति, तं च दट्ठण चित्तिमयाए-अहो कहं रक्खावल्यलाभो इमस्स रक्ख-
 सस्स ? कहं वा नियडच्छओ संपत्तो ? अहो अवित्तिक्कियं केरिसमावडियंति ? जायभयावि आगारसंवरणं काऊण तेण
 समेया समीवमुवगया एयस्स, तेणवि इंति दट्ठण ईसि पच्छाइयकोवविराणेण संभासिया, जहा भइ ! एवविस्स,
 तओ आसणनिसन्नाए चंदलेहाए पुणो कइयवेण उट्ठमवल्लोइऊण भणियमणेण-अहो कहं पुवपरिचिओ गोभइ

दीसइ?, इओ एहि भइ!, किं तुमपि अहमिव एयाए छलणगोयसुवगओत्ति जेण वाणारसीविमुक्कोवि एत्थ पेच्छि-
ज्जसि?, गोभइण चित्तिं-अहो गाढो अमरिसो, ता तहा केमि जहा अवरोप्परं पणयभावो हवइ एसिं, अणु-
बिया हियोवहा विसिद्धुरिसाणंति, इइ संचित्तिज्ज आवद्धकरंजली सो भणिउमाढत्तो—
हे भइणि चंदलेहे! हे विज्जासिद्ध! गुणगणसमिद्ध! जइविहु कुसलत्तणओ तुम्हाण न किंपि वत्तव्वं ॥ १ ॥
तहविहु असरिसपेमप्पबंधसंधतरलियमणोऽहं। दियभावभूरिजंपिरसभावओ किंपि साहेमि ॥ २ ॥
जो तुम्ह परोप्परमेस रोसलेसो कहंपि संभूओ। सो मोत्तव्वो होइत्ति परमेवरिच्च दुहदायी ॥ ३ ॥
जेणानलुव्व पढमं नियठाणं दहइ एस वहुतो। ता अवगासोऽवि कहं दायव्वो होइ एयस्स? ॥ ४ ॥
अह वेरिसु दोसकरणत्तणेण कोव्वो समुल्लसइ तुम्ह। कोवेच्चिय किं कोवं न कुणह दुक्खेक्कहेउमि? ॥ ५ ॥
न चलइ गरुयाण मणो अवराहपए अइव गरुएवि। जह जलहरेण खुब्भुइ गिरिसरिया तह न नइनाहो ॥ ६ ॥
तथा-अवयारे अवयारो जं कीरइ एस नीयववहारो। उवयारकारगच्चिय गरुया अवयारिणि जणेऽवि ॥ ७ ॥
इहरा विसेसलंभो उत्तमनीयाण कह णु जाएज्जा! न हि एगरुववत्थुमि होइ विविहाभिहाणाइ ॥ ८ ॥
अलमेत्तो भणिएणं तुम्हं जइ मम गिरिमि पडिब्वो। जइ उत्तमगुणमग्गेण विहरिउं विज्जए विच्छा ॥ ९ ॥
जइ ससहरजोणहासत्थहं च किंत्तिं सया समभिलसह। पुव्वाणुसयं मोत्तुं परोप्परं कुणह ता पणयं ॥ १० ॥ जुम्मं।

अणं च-हे विज्ञासिद्ध ! पओसमुव्हंतो कंहं न लज्जिहिसि ? । इत्थीसु तिहुयणंमिवि अवज्झसम्भावसिद्धासु ॥ ११
इतिहासपुराणपमोक्खसत्थविव्खायमवि इमं तुज्झ । पम्हुट्टंकीस ? महाणुभाव ! कुसलावि मुज्झंति ? ॥ १२ ॥
आयन्निज्जण एवं विज्ञासिद्धेण जायल्लेण । भणियं आपसं मे देहि लहुं जमिह कायव्वं ॥ १३ ॥

उप्पहपवन्नमारिसज्जणवोहणकारेण निम्मविया । वेयत्थमहानिहिणो तुब्भे नूनं पयावइणा ॥ १४ ॥

एवं सोऊण गोभइण भणियं-साहु साहु विज्ञासिद्ध ! को अन्नो एवं वियाणेइ वोत्तुं ? अहवा-को सिसिरइ नि-
सिनाहमंडलं ? को वा चित्तेइ सिहिसिंहडाइ ? । देहसहसमुगओ चैव विणओ तुम्हारिसज्जणं ॥ १ ॥ उट्ठसु
संपयं कुणसु चंदलेहाए पणामं, चंदलेहे ! तुमंपि विमुक्कमच्छरं परिचत्तपुद्वाणुसयं नियसु इमं सयणनिद्विसेसं,
विहेसु इमेण समं पणयभावं, इय भणियावसाणे निवडिओ चंदलेहाए चलणेसु विज्ञासिद्धो, भणिउमारद्धो
य-सुयणु ! तारुन्नमएण वा विज्ञाबलावलेवेण वा अविवेयसुलभदुव्विणएण वा मए जमवरद्धं तं तुमए मरिसियव्वति,
चंदलेहाए भणियं-विज्ञासिद्ध ! अलं खामणेणं, सव्वहा मंदभागिणी अहं जा थेवमेत्तावराहेवि एवंविहभणत्थं
काउं ववसिया ।

एत्थंतरंमि कइवयचेडीचक्केण परिवुडा झत्ति । विम्हयनिब्भरहियया समागया चंदकंतावि ॥ १ ॥

ताहे गोभइणं विज्ञासिद्धो पयंपिओ एवं । जीए कए वइरमिमं तहि(तुह)ट्टिया सा इमा सुयणु ॥ २ ॥

ता परिमुक्तामरिसं सविसेसं कुणसु खामणमिमीए । रोसावेसो थेवोऽवि होइ अगिगव दुहहेऊ ॥ ३ ॥
इय भणिए भइणीसिद्धसंधिसंघडणतुट्टहिययाए । तीए विज्जासिद्धेण खामणा सायरं विहिया ॥ ४ ॥
एवं च पणट्टकोवाणुबंधाणं एगजजणीजणियाणं व जायदढपेमाणं तेसिं परोप्परं जंपिराणं महाणसिणीए आगं-
तूण विवत्ता चंदकंता-देवि ! कुणह पसायं, एह गेहम्मि, निफफ्फा रसवई, मज्झादिमणुपत्तो य भयवं भुवणचक्खू
दिणयरोत्ति, एवं च निसामिऊण चंदकंताए भणियं-हे चंदलेहे ! भोयणत्थसुवनिमत्तेसु पाहुणगे अइकालो वट्टइत्ति,
तओ चंदलेहाए उट्टुविओ विज्जासिद्धो गोभदो य, गया भोयणमंडवं, कयं समगं चिय विविहविच्छित्तिप्पहाणं
भोयणं, तटुत्तरं च दवावियाइं कप्पूरधूलिधूसरपूगीफलदलसणाहाइं तंबोल्बीड्याइं, एत्थंतरे विज्जासिद्धेण सिरमि
करकमलं कट्टु भणिओ गोभदो, जहा-पुव्वपडिवन्नं गिणहसु वरं, नियत्तिउकामोऽहमियाणिं, गोभदेण भणियं—
जइ सच्चं चिय तुट्टो वियरेसु तुमं वरं महाभाग ! । ता तं एयाहिं समं (पे)म्मं सययं वहेज्जासि ॥ १ ॥
एवं कयंमि तुमए विहियं चिय मज्झ चित्तिथमसेसं । परचित्ततोसदाणाओ दाणमन्नापि किं अत्थि ? ॥ २ ॥
किर सिविवल्लिहरिचंदणमोक्खविस्संभराहिवा पुव्वं । नियजीवियदाणेणवि अकरसु जणाणमुवधारं ॥ ३ ॥
खणनस्सरस्स दुहनिवहभाइणो जीवियस्स फलमेयं । जं उवयारो कीरइ दुहसंतत्ताण सत्ताणं ॥ ४ ॥
विज्जासिद्धेण तओ भणियं भो कीस वाहरसि एयं ? । तुट्ठारिसाणवि पुरो किमन्नहा हुंति उल्लावा ? ॥ ५ ॥

निद्राधुम्मिरनयणावि सज्जणा जं वयंति किर वयणं । नियजीवियव्वएणवि तं तह अहियं समत्थंति ॥ ६ ॥

मिच्छाकारिं मिच्छा व भासिणं मं धुवं सुणेऊण । कच्चाइणीवि देवी लज्जइ किं पुण परो लोगो ? ॥ ७ ॥

ता-गोमइ ! परिचयसुं एत्थ मम संतियं अविस्सासं । अन्नं मग्गेसु वरं मा कीरउ मे पणयभंगो ॥ ८ ॥

एयमायन्निऊण गोभेइण भणियं-जइ एवं ता परिहरेसु परमहिलापसंगं, एसो हि कारणं वेरपरंपराए कुलभ-
वणं अणत्थसत्थाणं वत्तणी नरयनगरस्स बंधवो दुव्विणयस्स ठाणं परिभवस्स आगरो अकित्तीए मसिक्खुच्चओ निय-
कुलस्स निलओ पावपडलस्स मूलकसो गुणकलावस्स जणगो उत्तरोत्तराधम्मपरिणइए, एत्तोच्चिय मुयणपयइवि
वेरिभुयदंडकंडचंडिमखंडणेक्कसुंडावि असेसविज्जाइसयसालिणोऽवि पाविया लंकाहिवइपभिइणो विणासं, एत्तोच्चिय
अविणयितणनिच्चिसेसनियजीवियव्वा असुणियजुत्ताजुत्तकायवा तिकखदुक्खलक्खंपि अभिकंखंति पाणिणोत्ति, ता
मूसगोव मज्जारस्स घयकुंभोव हुयवहस्स पयंगोव पईवस्स सारंगो इव पंचाणणस्स सुहाभिलासी दूरमवक्कमइ कुसलो
परदारस्सत्ति निसामिऊण समुण्णणगाढपच्छायावो वेरगमग्गणुलगगचित्तो विज्जासिद्धो भणिउमाट्तो-गोमइ !
साहु समुवइठ्ठं साहु समुवइठ्ठं समुद्धरिओऽहं तुमए अपारपावपारावाराओ, होउ संपयं सदारपरिभोगं मोत्तूणाऽऽर-
णंतं निवित्ती मम सेसमहिलापसंगस्सत्ति, गोभेइण भणियं-अज्ज ! जाओ इयाणिं मम वंछियत्थलाभो, एत्तो सुम-
रिज्जासि मं सुहिसयणाइकहंतरेसुत्ति । एवं बुत्ते विज्जासिद्धो जोडियपाणिपल्लवो पणामं काऊण सव्वेसिं सिणेहवस-

संदतवाहफुरतनयणो सायरमवलोज्जमाणो चंदकंतापमुहेहि अंदसणसुवगओत्ति । चक्खुपहमइक्कतेऽवि तंमि खणं
विरहेवेयणासुन्नत्तणमणुभविऊण भणियं गोभदेण-अहो से वयणविन्नासो अहो पावपरिहारो अहो भीरुत्तणं अहो
विणीयया अहो सुगुणज्जणसमुज्जमो अहो असरिसदक्खिणत्तणंति, चंदेहेए भणियं-तुहाणभावो खलु एसो,
न हि नरिंदसामत्थमंतरेण भुयगफणाफलगमइक्कमिउमभिसक्कइ साल्लो, न तिकखल्लुसकरारोहं विणा पहे पयदुइ
मत्तदोषद्वोत्ति, एवं च विविहसंकहाहि ठाऊण कइवय दिणे अन्नदियहे य भणियं गोभदेण, जहा-बहूइ दिणाइ
मम गिहनिग्गयस्स ता अणुजाणह मं गसणत्थं, न जाणिज्जइ कहंपि तुम्ह भाउज्जाया संपयभावणसत्ता निवसइत्ति,
एवमायणिऊण चंदेहेहाए पुणोवि कइवय वासराणि धरिऊण अन्नसमए य पभूयरयणदाणपुद्गणं सम्भाणिऊण
विसज्जिओ गोभदो सट्ठणं पत्तो कहाणगविसंसेणं निययगामं ।

अह जाव पिययमादंसणसुओ निययगेहाभिमुहं वच्चइ ताव दूराओ चिय दिट्ठं भग्गदुवारदेसं रेणुपडलसंछन्नं
दरीपसुत्तसाणधुरियधोरघोसभीसणं अणेगकोलविलाउलं सुसाणं व भयावहं तं गिहं, तारिसं च दट्ठणं सुभिय-
हियएण पुच्छिया सहेज्जिया, तीएवि चिरकालागयं दट्ठणं तं जायपणयाए आहूओ सणिहे, दावियं आसणं, कयं
चरणसोयणं, भणियं च-गोभद! करेसु ताव भोयणंति, तेणावि तहाविहगेहंदसणजायसरीरदाहेण आपुट्ठा पुणोवि
एसा सघरवुत्तंतं, तीएऽवि अणिट्ठं भोयणावसाणे सीसइत्ति लोयवायं परिभावितीए भणियं-पियहरं गया तुह

घरिणी, सेसं पुणो कहिस्सामि विहेसु ताव भोयणं, तओ आउलहियएणावि तदणुविचीए कयमणेणाहारगहणं, तयणंतरं आयंतस्स सुहासणगयस्स निवेइयमणाए-गोभइ ! तुह गयस्स कइवयदिवसावसाणे विओगदुक्खेण वा तहाविहवाहिवसेण वा परिकिसियसरीराए सिवभदाए अयंडेच्चिय समुप्पन्ना गाढं सुलवेयणा, आउलियं तरीरं, ओसहेहिवि न जाओ विसेसो, गया य मुहुत्तमेत्तेण पंचत्तंति, एयं च सो आयन्निज्जण विओगवज्जजरियहियओ खणंतरमुच्छिओ इव विगमिज्जण मुक्कपोक्कारकरुणसइ रोइउं पवत्तो, समासासिओ पासवत्तिणा जणेण, कयाइं मय-लोइयकिचाइं, कालेण य जाओ अप्पसोगो । अन्नया य भणिओ लोगेहिं, जहा-गोभइ ! कीरउ कलत्तसंगहो, विसु-च्चउ सोगो, एसच्चिय गइं संसारविलसियाणं, तेण भणियं-भो दूरमसरिस्समेयं, तहाहि-

पढमं दवोवज्जणकएण देसंतरं गओऽहमहो । चिरकालकिलेसवसा तह्हाभे नियगिहं पत्तो ॥ १ ॥

किर भुंजिस्सामि अहं इणिंह नियपणइणीए परियरिओ । पंचविहविसयसोक्खं निरवेक्खो सेसकज्जेसु ॥ २ ॥

भवियव्वयावसेणं अक्काले चिय दिवं गया सावि । एवं ठियंमि अन्ना परिणिज्जइ केण कज्जेण ? ॥ ३ ॥

जह सा मरणं पत्ता अहुणुवूढावि तह जइ मरेजा । ता होज्ज निष्फलच्चिय पुणोऽवि सवेऽवि आरंभा ॥ ४ ॥

नियजीवियस्सवि कहं विस्सासो वुज्झए सयन्नेण ? । आगययाइं जं किर कुणइ व मुहमारुयमिस्सेण ॥ ५ ॥

संघडणविहडणापडुपरक्कमे निक्खिे कयंतंमि । सच्छंदं वियरंते कत्थ व जाएज्ज थिरवुद्धी ? ॥ ६ ॥

दइयाधणपरिणसंगमेसु जइ सरिसवोवमं सोकखं । पाविज्ज विण्णओगे निथमा मेरुवमं दुक्खं ॥ ७ ॥
इय पज्जत्तं मह घरणिविसयतणहाए बहुकिलेसाए । एत्तिथमेत्तमि वए विसयासा हीलणाठाणं ॥ ८ ॥
एवं तन्निच्छयं मुणिऊण तुसिणीए ठिओ जणो, सो य धम्मकज्जेसु उज्जओ जाओ, अन्नदियहे समोसरिओ
तत्थ पंचसयमुणिपरिवुडो लत्तीसगुणरयणरयाथरो नीसेसपाणिगणरक्खणपरो सुगहियनमो धम्मवोससूरी, गया
तस्स वंदणत्थं बहवे जणा, गोभदोऽवि भवविरत्तमणो जाणिऊण तदागमणं पत्तो सूरिसमीवे, पहिट्ठचित्तो य पण-
मिऊण से पायपंकयं गुरुणा दिन्नासीसो उवविट्ठो भूमिवट्ठे, सूरिणावि पारद्धा धम्मदेसणा, जहा—
जीववहालियवज्जणसदत्तधणगहणेनुहणनिवित्ती । जो य परिगहचाओ एवं धम्मस्स सबस्सं ॥ १ ॥
जीववहे आसत्ता सत्ता अट्ठण्णयारमवि कम्मं । वंधति जंति नरए पावंति य तिवस्सदुक्खाइं ॥ २ ॥
तत्तो उवट्ठित्ता तिरिक्खजोणीसु लक्खमेयासु । उववज्जंति वराया नियदुच्चरिण बहुकालं ॥ ३ ॥
जे उ नियजीवियसमं समं रक्खंति सव्वपाणिगणं । ते सयल्लोयलोयणससहरतुल्ला हवंति जणा ॥ ४ ॥
दीहाऊउववेया वारूवा दिव्वदेवसोक्खाइं । अणुमुंजिऊण नूनं कमेण मोक्खंमि वच्चंति ॥ ५ ॥
भूयत्थनिणहयकरं पाणिविणासेक्कारणं घोरं । जं वयणं तं सव्वपि वज्जणिज्जं सुबुद्धीहिं ॥ ६ ॥
इह लोए चिय जीहानिकंतणं निंदणं च लोथाओ । पावंति वितहभासणपरायणा परमवे य दुहं ॥ ७ ॥

एत्तो विरत्तचित्ता कुडिलत्तणवज्जिया मियाभासी । जे ते अवजसंपकेण नेव छिप्पति कइयावि ॥ ८ ॥
 पडिबुद्धकमलपरिमलसममुहनिस्साससुरहियदियंता । पूहजंति जणेण य आएज्जगिरा य जायंति ॥ ९ ॥
 जो परघणं विलुपइ सो झंपइ सुगइगिहकवाडाइं । निविडाइं कम्मनिगडाइं कुणइ तुच्छेहियसुहत्थं ॥ १० ॥
 एत्तो चिय दोगचं पइजम्मं उवचिणेइ मूढप्पा । सुयदइयाविरहुब्भवदुहं च पावेइ दुव्विसहं ॥ ११ ॥
 जे पुण संतोसपरा तणंपि गिण्हंति नेव य अदिन्नं । ते देवाणवि पुज्जा हवंति किं पुण मणुस्समाणं ? ॥ १२ ॥
 वट्ठंति धणविलासा निवडंति न आवयाउ कइयावि । पुज्जंति य निव्विग्घं मणोरहा तेसि नीसेसा ॥ १३ ॥
 जे अणिगिहियप्पाणो इहभवसुहलेसमेत्तपडिबद्धा । दासव्व कामलुद्धा सुद्धा जुवईण वट्ठंति ॥ १४ ॥
 नरवइसेवणसंगामकरणपमुहाइं विविहवसणाइं । मेहुणसन्नाभिरया असइंवि ल्हंति ते पुरिसा ॥ १५ ॥
 कामविवरंसुहा पुण नरसुरजणपूयणिज्जकमकमला । देहुब्भवमविणस्सरपरमाणंदं सइ चरंति ॥ १६ ॥
 पडिपुण्णवंभपालणपवित्तगत्ताण पुरिससीहाण । सुमरणमेत्तेणं चिय विज्जा मंता य सिज्झंति ॥ १७ ॥
 जे न परिग्गहविरइं कुणंति पावेसु संपयट्ठंति । वंधंति कोसियारोव्व अप्पयं ते सकिरियाए ॥ १८ ॥
 पइदियहलाभवसवहुमाणगुरुलोभदूभियसरीरा । सव्वत्थ ममत्तपरिग्गहेण सुचिरं किलिस्संति ॥ १९ ॥
 अपरिग्गहा उण नरा ससरीरेऽविहु ममत्तपडिबंधं । न कुणंति वत्थपत्ताइएसु सेसेसु का गणणा ? ॥ २० ॥

एतौ चिय तिव्वयरोवसग्गवेऽवि ते ण ज्ञाणाओ । मंदरगिरिव्व विचलति मोक्खसोदखं च साहंति ॥ २१ ॥
इय भो देवाणुपिया ! अविरयविरयाण दोसगुणसहियं । कहियं तुम्हाण मए सुद्धं सद्धम्मसव्वस्सं ॥ २२ ॥
चिंतामणिव्व दुलहं संसारमहोयहिंमि भमिराणं । जीवाण नूणमेयं सकम्मगुरुभारपिहियाणं ॥ २३ ॥
एयंमि उ संपत्ते तं न जए जं न पावियं होइ । ता एयंमि पयत्तो कायवो कुसलबुद्धीहिं ॥ २४ ॥
एयं च निरइयारं न साहुदिकखं विणा घडइ जम्हा । पडिवज्जह पव्वजं तम्हा दुहसेलवज्जसमं ॥ २५ ॥
एवं च गुरुणा उवइट्ठे सद्धम्ममग्गे पडिबुद्धा बहवे पाणिणो पलीणा मिच्छत्तवासणा जाओ केसिंचि सव्वविरइ-
परिणामो अन्नसिं समुण्णन्ना देसविरइबुद्धिं, एत्थंतरे संसारसारयं परिभावंतो तक्कालतिव्वेरगसमुग्गयपव्वजाप-
रिणामो गोभद्रो गुरुसमीवं गंतूणं विन्नविउमारद्धो-भयवं ! अमयं व परिणयं सम तुम्ह वयणं समुल्लसिओ विवेओ
तुट्ठा गेहवासणा, ता तुम्भेहिं निज्जामगेहिं पव्वज्जाजाणवत्तमारुहिऊण भवोदहिं लंघिउमिच्छामि, गुरुणा भणियं-
मद्द ! जुत्तमेयं तुम्हारिसाणं, तओ सूरिं पणमिऊण गओ गेहे, रयणविक्खओवलद्धद्वेण दिन्नं दीणाणाहार्इणं महा-
दाणं, अह पसत्थे तिहिमुहुत्ते सूरिसमीवे गहिया पव्वज्जा, जाओ महातवस्सी, पालेइ निरयारं समणधम्मं अहि-
यासेइ सम्मं परीसहे पंउजइ बालगिलाणार्इणं विणयं भावेइ भावणाजालं पेढेइ समयसत्थं परिचितेइ तन्भावत्थं
कुणइ अपुव्वापुव्वतववरणं, एवं च विसुज्झमाणस्स तस्स वोळिति वासरा, अन्नया य गुरुमापुच्छिता समारद्धां तेण

मासकखमणाइं,परिसुसियं च से सरीरं, तहावि वालाईण कज्जेसु अणिग्गहियसामत्थो सबत्थ पयट्ठइत्ति । अन्नसमए य सो खमगो गओ खुड्डगेण समं वासियभत्तस्स, तेण य पहे गच्छमाणेण जुगमेत्तनिहित्तचखुपसरेणवि कहवि दिव्वजो-
गवसा चंपिया चलणेसु मंडुक्किया, विवन्ना य सा, पट्ठिट्ठिएण य भणिओ सो सुड्डएण-जहा खमग ! तुमए एसाविरा-
हिया, ता सम्मं निरूवेहि, सोऽवि एवमायन्निज्जण ईसिसमुप्पन्नोसावेसो असूयाए इयरजणचरणचंपणपणहुजीवाओ
मंडुक्कलियाओ दंसितो भणइ-अरे दुट्ठसिक्ख ! इमावि मए मारिया ? इमावि मए मारिया ? इमावि मए मारियत्ति,
खुड्डगेण नायं-होउ ताव, वियाले सयमेव गुरुपुरओ आलोइस्सइत्ति, एवं च पत्थुयकज्जं काऊण पडिनियत्ता दोवि
निययासमं, कमेण य जाओ संझासमओ, आरद्धं आवस्सयं, गुरुपुरओ य खमयरिसी आलोइत्ता देवसियं उवविट्ठो,
नवरं मा विस्सुमरियं होहित्ति चित्तयंतेण खुड्डएण कहिओ मंडुक्कियावइयरो खमगस्स, एत्थंतरे निट्ठुरविगिट्ठुतवचरण-
संतत्तत्तणेणं सरीरस्स माहणजम्मसुलभत्तणेणं तहाविहित्तिकोवुब्भवस्स पणट्ठो से विवेओ, समुद्धाइओ महया
वेगेणं खुड्डगताडणनिमित्तं, अंतरा य आगच्छमाणो निट्ठुरथंभसिरावडणघाइयम्ममपएसो तहाविहकलुसाभिप्पाय-
विराहियसामन्नो कालं काऊण उववन्नो जोइसियदेवेसु, कोहदूसियस्स एवंविहा विडंबणा, जेण—

छट्ठट्ठमाइदुक्करविगिट्ठुतवभेयसेवणुब्भूयं । गुरुवालसिक्खगेलणपंडियविणओवणीयंपि ॥ १ ॥

दसविहजइजणकिरियापरिपालणपोसियंपि सुहपुन्नं । खणमेत्तेणवि तेणं तणं व कोहग्गिणा दहं ॥ २ ॥ जुम्मं ।

एत्तोच्चिय पसमविवज्जियाण सद्वा निरत्थिया किरिया । उच्छिद्रुतयोऽविहु होइ केवलं मुखमारो सो ॥ ३ ॥
जह पवथाण मेरू नईण गंगा मियाण पंचमुहो । पक्खीण जहा गरुडो सेसाही सयलमुयगाण ॥ ४ ॥
जह साहूण जिणिंदो मणीण चिंतामणी तहा पसमो । सारो समत्थधम्मस्स तेण एत्थेव जइयवं ॥ ५ ॥ जुम्मं ।
अलं पसंगेणं । सो खमगजिओ जोइसदेवेसु अहाउयं पालिऊण चुओ समानो कणगखले आसमपए पंचतावस-
सयाहिवइस्स कुलवइणो गिहिणीए उववन्नो दारगत्तणेणं, जाओ य उचियसमए, कथं से कोसिओत्ति नामं, सो य
समावेणं चंडरोसो, थेवावराहेऽवि सेसतावसकुमारो कुट्टेति, ते य तेण ताडिज्जमाणा नियनियपिऊणं साहेति, तेहि
य केण कुट्टियत्ति पुच्छिज्जमाणा निवेइति कोसिएणं, तत्थ अब्बेऽवि तावसकुमारगा कोसियाभिहाणा अत्थि अओ
न मुणिज्जइ केणावित्ति तव्विसेसोवलंभनिमित्तं तप्पभिइं ठावियं चंडकोसिओत्ति नामं, ताहिणाओ आरब्भ पावियं
च पसिद्धिं, एवं सो चंडकोसिओ जाओत्ति । अन्नया य कुलवइं पंचत्तमुवगओ, पच्छा सो सेसतावसेहिं कुलवइपए
निवेसिओ समानो तत्थ वणसंडे अच्चंतं अज्झोववण्णो, अणवरयं अपुद्वापुद्वापायवसेयणपालणपरो कालं गमेइ, सेस-
तावसे य पुण्णफ़लाइं तहिं गेण्हते पयत्तेण निवारोइ, ते य तत्थ कुसुममेत्तपि अपावमाणा गुरुस्मि व गुरुपुत्तंगमि
पवट्टियव्वंति सुमरिऊण तव्वयणमविकूलंता दिसोदिसिं गया, जोऽवि गोवालागई तत्थ फ़लाइनिमित्तमेइ तंपि
हंतूण सो निद्धाडेइ, जाया य समीवगामनगरेसु पसिद्धी जहा चंडकोसिओ उववणं अवलोइउंति न देह । अन्नया य

सो निसियधारं परसुं घेत्तण वइकरणनिमित्तं कंठिगाणयाय गओ दूरवणसंडे, इओ य आसमययासन्नं सेयविया-
 पुरिवत्थवेहिं रायपुत्तेहिं फलगहणनिवारणाकुविएहिं सुणियतगमणवुत्तेहिं पुद्दामरिसेण आगतूण ओकखया तल-
 पोयगा छिंदिया सरलतरुणतरुवरा पाडियाइं फलाइं हयमहियो कओ से उडवओ भग्गा फोडिया कर्म-
 डलू खंडिया दक्खामंडवा पणासियाइं कयलीहराइं, अन्नपि जहासत्तीए उवदविउमारद्धत्ति, एत्थंतेरे दिट्ठतहाविहा-
 समभंगवइयेहिं गोवालगेहिं गंतूण सिट्ठं चंडकोसियस्स, जहा-तुह उववणं कुमारेहिं हणिजइत्ति, सो एवमययिन्ने-
 ऊण कोवेण जलणोव धगधगन्तो परसुमुग्गीरिऊण धाविओ पवणवेगेण तदभिमुहं, दिट्ठो य एंतो कुमारेहिं, ते य
 मुणी अवज्झोत्ति चित्तिऊण पलाणा नियनयराभिमुहं, चंडकोसियोऽत्रि तयणुमगगलग्गो वाहरइ—

रे खत्तियाहमा ! मज्झ उववणं छिंदिऊणवि परोक्खं । इण्हिं नियजणीए किं पुण उयंमि पविमिहिह ? ॥ १ ॥

मा वेगेण पलायह वट्ठह सवंडमुहा खणं एक्कं । तालफलाणिव सीसे जेण कुहाडेण पाडेमि ॥ २ ॥

एमाइ असब्भे गालिगब्भवयणे समुल्लवेत्तो सो । तह कहवि कोववसवियल्लयेणो धाविओ तुरियं ॥ ३ ॥

जह खाणुखलणनिवडणअट्ठियपरसुच्छिन्नसीसस्स । अवमाणंदसणाउव तस्स लहु अइगयं जीयं ॥ ४ ॥

अह अट्ठज्झाणगओ मरिउं सो तस्मिं चेव वणसंडे । मुच्छावसेण जाओ भीमो दिट्ठिविसो सत्थो ॥ ५ ॥

ते य तावसा तम्मरणवइयर निसाभिऊण समागया तंमि वणसंडे ठाउमारद्धा य, अन्नया य पुच्चसिणेहाणुवन्धस-

मुप्यन्नवणरक्खणपरिणामेण इओ तओ परिब्भमतेण दिट्ठा ते दिट्ठीविससप्पेण, तओ सरोससूरेविंबावलोयणुगिग-
रियजलणजालाकलवेण निदुड्ढा अभिसुहट्ठिया अणेण, अदहुंगा य पलाणा दिसोदिसिं, एवं च तिसंझं सो वणसंडं
तिपयाहिणीकाऊण जं सउणगमवि पासइ तंपि देहेइ, अण्णेउवि तम्मगणेण वोलेमाणे तडियकण्डियपमुहे पंथिगे
विह्वेइ, अह तब्भएण अवहो जा जाओ सो मग्गो, एसा चंडकोसियसप्पस्स उप्पत्ती ।

अह तेण सप्पेण उववणंतरे परिब्भमतेण दिट्ठो जक्खमंडविथाए पडिमं ठिओ वद्धमाणजिणवरो, तं च दट्ठुण
समुच्छलियकोधानलो अहो मम सामत्थं एस न सुणइत्ति विगप्पिऊण तरणिमंडलवलोयणचउगुणीभूयविणिस्सरंत-
विमुम्मिस्सदुस्सहसिहिसिहाभासुरच्छिविच्छोहो निहोइकामो भयवन्तं पेच्छिउमारद्धो—

अह जयगुरुणो देहे दिट्ठी दिट्ठीविसस्स पडिफलिया । पिऊससीयले साउणुभावओ झत्ति विज्झाया ॥ १ ॥
असमत्था निहोइउं जाया जिणनाहलोममिच्चंपि । ताहे पडिहयसत्ती तंडवियपयंडफणभित्ति ॥ २ ॥

गरलकणुक्करसम्मिस्सगरयपम्मुक्कफारफुंकारो । वेणेणं डसिउमणो पहाविओ जिणवराभिसुहं ॥ ३ ॥
तओ तिव्वविसुब्भडाहिं दाढाहिं जिणं डसिऊण पच्छाहुत्तं अवक्कमेइ, मा उग्गविसविहयजीनियवो ममोवरि
एस निवडिहिति, भयवंतं च तहट्ठियं चेव दट्ठुण पुणो पुणो तिन्नि वारे जाव डसित्ता अमरिसेणं पलोयंतो अच्छइ,
तहावत्थणे य जिणसोमविंबावलोयणोवसंतदुड्ढदिट्ठिविसविगारो सो करुणाए भणिओ भयवया—उवसम गो

चंडकोसिया!, उबसम महाणुभाव!, किन्न सरसि सयं चिय अणुभूयं तं वइयरं ? ।

पुवभवे जं समणो कोवविराहियसमग्गसामन्नो । कुञ्छियजोइसदेवत्तलच्छिमणुपाविओ मरिउं ॥ १ ॥

तत्तो इह वणसंडे तावसपुत्तो य जं तुमं जाओ । तत्तोऽविय तिच्चविसो इण्हि सयत्तणं पत्तो ॥ २ ॥

ता भइ ! एत्तोऽवि मुंच कोवं, एसो हि विग्घभूओ परमसुहसंपयाणं पडिखलणमल्लो कल्लणवल्लीणं महापडिक्खो पवरविवेयस्स जलणो कुसलाणुट्ठाणवणसंडस्स जणओ दुग्गदुग्गइपडणस्सत्ति, सवहा अलमेत्तो कोवाणुवंधेति, इमं च सोच्चा भुयगस्स पुद्वाणुभूयसरणवसेण ईहावूहमग्गणवेसणं करेमाणस्स जायं जाइसरणं, दिट्ठं च पुद्वाणु-
ट्ठियं तवचरणं सामणणपरिपालणं तच्चिराहणोवलद्धजोइसियसुरजम्मं च, अह उम्मीलियविवेओ समुल्लसियधम्मपरि-
णामो जायपावदुगुलो आयाहिणपयाहिणापुव्वगं परमभत्तीए भयवंतं भुवणगुरुं वंदिऊण अणसणं पडिक्खइ, भय-
वंपि सुणइ जहा एस पडिबुद्धो कयाणसणो य, तहावि तअणुकंपाए तत्थेव काउस्सग्गओ परिवालेइत्ति, चंडको-
सियोऽवि मा कहवि रोसवसेण नयणग्गिणा पाणविणासो होज्जत्ति परिभाविऊण विलनिहित्तुडो पयडिक्खेसररोरो
परमवेरग्गावडियमई चित्तेइ—

कह गुणरयणोयहिणा गुरुणा सह संगमो पुरा जाओ ? । कह पवज्जारयणं अपत्तपुव्वं मए पत्तं ? ॥ १ ॥

कह वा पीऊसंपिव असेसदोसग्गिविज्झवणदक्खं ? । सम्ममहीयं सुत्तं विचिच्चनयभंगदुव्विगमं ? ॥ २ ॥

कह वा मासकसमणाइ दुक्करं तह चिरं तवो चरियं ? कह दुद्धरं पि चरियं अकलंकं बंभचोरं पि ? ॥ ३ ॥
खणमेत्तत्तद्विकोवप्यभावओ कह इमं समगं पि । विफलत्तणमणुपत्तं ? हा सुद्धो मंदभाणोऽहं ॥ ४ ॥
इण्हिं तु पयइभीसणमुयंगमावं गओ हयासोऽहं । मुणिधम्मस्स अजोगो कमुवायं संपवज्जामि ? ॥ ५ ॥
हा पाव जीव ! तइया जह सिरलोथाइ विविहदुक्खाइ । सहियाइ तहा खुडुगवयणां पि य कीस नो सहियं ? ॥ ६ ॥
किं मूढ ! नियसिरंभी एवं पज्जालिओ तए जलणो ? । सुहकामिणा हणिज्जइ अप्पा किं अप्पणो चेव ? ॥ ७ ॥
इय उत्तरोत्तरपवहुमाणवेरगमग्गमणुलग्गो । सप्पो झंप्पियदप्पो संलीगं गो मओव्व ठिओ ॥ ८ ॥
अह भयवंतं समीवमुवगयं पेच्छिऊण गोवालादयो तरुवरतिरोहियसरीरा तहा निचलस्सवि भुयंगमस्स उवारे
अविस्ससेमाणा चेयणापरिक्खणनिमित्तं पाहाणखंडे खिबंति, तेहिं ताडिजमाणोऽवि जाव न मणांगं पि विचलइ
एसो ताव समीवमागच्छन्ति, कट्टेण य घट्टेति, तहावि अण्णंदमाणे तंमि सेसलोयस्स साहेति, जहा—दिट्ठीवि-
ससप्पो देवज्जएणं उवसामिओ, न संपयं डहइत्ति, ताहे लोगो आगंतुं सामिं वंदिता तं पि वंदइ महिमं च करइ,
अन्नाओवि गोउलियविलयाओ घयमहियाविक्किणत्थं तेणतेण वचमाणीओ तं सप्यं तुप्पेण मक्खंति, घयंगं धेण य
(अहि)सरंततिकखंडुपिवीलिगापडलखजमाणदेहुप्पणत्तिद्वेयणं सम्ममहियासमाणो अद्रुमासियाए खंलेहणाए
कालं काऊण सहस्सारे देवलोए देवो अट्टारससागरोवमो उववण्णोत्ति ।

इय सुहपरंपराए निजुंजिऊण चंडकोसिथं परमेसरो तिहुयणेक्कदिणयो वीरो तत्तो निकखमिऊण उत्तरचाथा-
लसन्निवेसं गओ, तत्थ पक्खवखमणपारणए पविट्ठो गोयरचरियाए, कमेण पत्तो नागसेणगाहावइस्स मंदिरं,
तहिं च तहिणे दुवालसवरिसाओ पुत्तो समागओत्तिकाऊण पयट्ठो महूसवो, जेमियो नियगजणो, सो य निय-
गजणो सामिणो रूवसंपयाए आणंदसुब्रहतो परमणेणं भयवंतं पडिलाभेइ, एत्थंतरे अहो दाणं अहो दाणंति
वाहरमाणेहिं चेलुक्खेवं करेतेहिं कणगसुट्ठिं सुयमाणेहिं चउविहत्तरनियरं वायंतेहिं गंधोदयं वरिसंतेहिं दसद्धवन्नं
कुसुमपथरं कीरंतेहिं नच्चमाणेहिं गायमाणेहिं तिवइ अफ्फालेतेहिं सहरिसं थुणंतेहिं असुरसुरखयरनिवहेहिं भरिय-
मम्बरविवरंति, जयगुरुवि पारिऊण सेयविथं नयारं गओ, तत्थ य नमंतसामंतमउलिमंडलीमंडियपायपीढो सम्भइ-
सणमुणियजहट्ठियजिणोवइट्ठजीवाइतत्तप्पवंचो पएसी नाम नराहिवो परमसमणोवासओ, सो य भयवंतं आगयं
मुणिऊण चाउरंगसेणापरिवारिओ सयलनयरजणसमेओ निग्गओ वंदणवडियाए, दिट्ठो सामी, तिपयाहिणीकाऊण
य वंदिओ परमायेरणं, थोउं पयत्तो, कहं?—

जय भुवणेक्कनिसायर ! सायरसुरायनमियकमकमल ! । मलविरहिय ! हियकारय ! स्यतमभरहरणदिवसयर ! ॥ १ ॥
करुणारसनिवावियभवगिम्हुत्तत्तसत्तरुनिवह ! । जिणनाह ! तुमं पुवज्जिएहिं पुणेहिं दिट्ठोऽसि ॥ २ ॥
तं चिय दिणं पसत्थं सोचिय समओ समत्थसुहहेऊ । जत्थ भुवणेक्कवंधव ! तुह सुहकमलं पलोएमो ॥ ३ ॥

अहनिस्सारस्सवि जीवियस्स पत्तं मए फलं अज्ज । जं तुम्ह चरणफारिस्सणपवित्तियं उत्तमंगं मे ॥ ४ ॥

इय जिणनाहं थोउं बहुप्पयारं पराएँ भत्तीए । राया पुरज्जणसहिओ जहागयं पडिनियत्तोत्ति ॥ ५ ॥

भयवंपि सुरहिपुरनयराभिमुहं वच्चइ, तत्थ य अंतरा पएसिनरवइसमीवभागच्छमाणा पंचहिं रेहिं निज्जगा
रायाणो भयवंतं दट्ठूणं पूयं सक्कारं सवायेरेण कुणंति, सामीऽवि नियप्पभावप्पबोहियसत्तसंघओ बहुविहउग्गतव-
विससपणस्समाणासेसनिविडकम्मसो विसुद्धसीलसुरभिसरीरो सुरभिपुरं अइक्कमिऊण संपत्तो जलहिपवाहाणुकारि-
वारिपसरं सयलसरियापवरं गंगामहानइ, अविय—

पवणुच्छालियजलकणसेयवससिणिद्धतीरतरुसंडं । अन्नोन्नोप्पिडणविफुट्टलोलकल्लोलवसुहलं ॥ १ ॥

पप्फुरियफाराडिंडीरपिडपंडुरियतारतीरंतं । जिणदंसणतोसवसा तक्खणविहियदट्ठहासं च ॥ २ ॥

वणकुंजरकुलमज्जणविदलियसिप्पिउडमोत्तियसभिद्धं । वियरंतहंससारसरंहगरवमणहरदियंतं ॥ ३ ॥

मज्जिरविलयाजणथोरथणहराघायमंगुरतरंगं । रंगंतमच्छक्खवमयरोरगभीसणावत्तं ॥ ४ ॥

इय एसिंसं सुरसरिं सरणागवक्खलो जिणो जाव पेच्छइ कमलदल्लो परतीरगमाभिलसेण ताव सुसिलिद्धनिदुर-
विसिट्ठतरुदट्ठफलगनिम्मविद्या परतीरगमणत्थं नाविण्ण पगुणीकथा नावा, तहिं च समारूढो परतीरगामी
जणो, भयवंपि आरुहिऊणं ठिओ तीसे एगदेसे, एवं च निलीणंमि जणे पवाहिया नावा, ऊसिओ सियवडा

चालियाईं अवलुगाईं पथट्टा महावेगेण गंतुं नावा, एत्थंतरे तडट्टिएण वासियं कोसिएण, तं च निसामिऊण भणियं
 खेमिलाभिहाणेनेमित्तिएणं-अहो इमो महासउणो इमं वाहरइ, जहा-तुम्भे इह मारणंतियं आवइं पाउणिस्सह,
 केवलमेयस्स महारिसिस्स पभावेण अक्खयसरीरा नित्थरिस्सहत्ति, एवं निसुणिऊण विम्हिया नावाजणा जाव
 अवरोप्परं विविहं संलवंति ताव पत्ता अगाहसल्लिमज्झयारदेसं नावा,

एत्थावसरंमि जिणं नावारुढं पलोइउं पावो । संभरियपुव्ववरो नागसुदाढो विचित्तेइ ॥ १ ॥

एसो सो जेण पुरा तिविहुचक्कित्तणमुवगएणं । गिरिकंदरमल्लीणो सीहत्ते वट्टमाणोऽहं ॥ २ ॥

सच्छंदविविहकीलाविणोयलीलाविलासदुल्ललिओ । परिजुन्नपडोव्व दुहा विफालिओ पाणिणा घेत्तुं ॥ ३ ॥

एयस्स किमवरद्धं तइया विजणे वणे वसंतेणं ? । जेण तहा निहओऽहं अनिमित्तियसत्तुणा इमिणा ? ॥ ४ ॥

ता मज्झ पुन्नपगरिसवसेण जायं समीहियं अज्ज । जं एस वेरिओ चक्खुगोयरं सयमिहावडिओ ॥ ५ ॥

जीयस्स एत्तियं चिय पंसंसणिज्जं जए सुपुरिसाणं । उवयारे उवयारो जं किज्जइ वेरिए वेरं ॥ ६ ॥

आसन्नमुवगयंपि हु मरणं मम चित्तनिवुइं जणइ । जं पुव्ववरसाहणमुवट्टियं एत्थ पत्थावे ॥ ७ ॥

इय असरिसनिच्चापरिसपगरिसायंअच्छिविच्छोहो । सो चित्तिउं सुदाढो वेगेण जिणंतियं पत्तो ॥ ८ ॥

अह अंतलिवखसुवागएण किलकिलारावं कुणमाणेणं तेण अरे रे कत्थ वच्चिहत्ति भणिऊण विउविओ संवत्तगम-

हापवणो, तेण पहणिज्जमाणे उम्मूलिया तरुणो टलटलिया कुलसेला थरहरियं धरणिवट्टं दूरमुच्छलियं गंगासलिलं
विसंठुला डोलिया नावा भगो तडत्ति कूवयखंभो जजरिओ सियवडो वामूढो कन्नधारो मरणभयभीओ इट्टदेव-
ए सुमरिउं लग्गो नावाजणो, अवि य—

संचलियमच्छकच्छवजलकरिकरघायज्जरतरंगे । तारापहमोगाढे सलिलुपीले महापवले ॥ १ ॥

पवथमहोल्लकलोलपेछणुवेछिरी सफरिगव । बोलें आढत्ता ताहे नावा सुदाढेण ॥ २ ॥

एत्थंतरे कंबलसंबलाभिहाणा दो नागकुमारदेवा तक्खणचलियासणा परमत्थजाणणट्ठा जाव ओहिं पउजंति ताव
पासंति भयवंतं नावारूढं सुदाढेण जले बोलिउमाढत्तंति, तं च पासित्ता अलाहि सेसकज्जेहिं, सामिं ताव मोया-
वेमोत्ति चित्तिज्जण वेगेण समागया तं पएसं, आवडिओ य एगो नागकुमारो सुदाढेण सह जुज्झिउं, बीएणवि विवड-
पाणिसंपुडेणुप्पाडिऊण नावा नइपरिसरंमि पमुक्का ।

अह सो सुदाढनागो सहिड्डिओ जइवि तहवि खीणवलो । आसन्नमरणनिभरणणगुच्छायउच्छाहो ॥ १ ॥

अप्पट्टिएहिवि तथा कंबलसंबलभिहाणदेवोहिं । अहिणवदेवत्तणदिद्वसत्तिणा निज्जिओ झत्ति ॥ २ ॥

उद्धियदाढे नागेव निद्विसे निम्मिए सुदाढंमि । नागकुमारा ताहे वंदित्तु जिणं विणयपण्या ॥ ३ ॥

मुंचंति पुण्णपथरं सुराहिं गंधोदयं च वरिसंति । गाथंति भत्तिभरनिस्सरंतरोमंचकंचुइया ॥ ४ ॥

एवं च अवलोइऊण जायपरमविम्हओ नावाजणो चित्तेइ-अहो कोइ एस महापुरिसो माणुसवेसोवि अमाणु-
साणुरुवपभावो, जओ एयणभावाओ अम्हे समुत्तिन्ना आवयामहन्नवाओ, ता जुज्जइ एस महग्गा पणमिउंति
विभाविऊण निवडिओ तिहुयणगुरुणो चलणकमलंमि, कंबलसंबलावि जिणं पणमिऊण गया जहागयं ।

अह के पुण कंबलसंबला पुव्वभवे हुंतत्ति सुणेह मूलुप्पत्तिं-अत्थि सयलमहियलविकखाया समुत्तुंगपसत्थसुपास-
तित्थयरथूभसोहिया महुरा नाम नयरी, तत्थ य अहिगयजीवाजीवविचारो नियसुद्धबुद्धिपरिसोवलद्धपुन्नपावो
आसवसंचरपमोक्खतत्तवियारवियक्खणो पंचाणुव्वयाइसावग्धम्मपरिपालणबद्धलक्खो जिणिंदसमयाणुरागरंजिय-
हियओ आगरो पसमाइगुणरयणाणं निवासट्टाणं गंभीरिमाए संकेयभूमी करुणाए वल्लहो धम्मियजणाणं बहुमओ
नरवइस्स सबत्थ पावियसाहुवाओ जिणदासो नाम सावओ, साहुदासी नामेण से भारिया, ताणि य दोन्निवि अच्चंत-
धम्मकरणलालसाइं अणवरयगुरूवएसपालणपरायणाइं फासुयएसणिएहिं असणपाणखाइमसाइमेहिं सुणिजणं
पडिलाभेमाणाइं कालं वोलेति । अन्नं च-

संसारावत्तविचिन्तणत्थ(ण्)भीयाइं जइवि अच्चत्थं । जइवि य गिहवाससमुत्थदोसपरिसंकिचमणाइं ॥ १ ॥

तहविहु गिहंमि अन्नोन्नगाढेपमाणुबंधभावेणं । समणत्तणं पवज्जिउकामांइवि ताइं निवसंति ॥ २ ॥

तेहि य अन्नया सुगुरुपायमूले सुणिऊण तिरियाइअंसजयपाणिपरिग्गहतित्थपावोवलेवासमंजस्सं गहिंयं गोमहि-

सिचउप्पयाण पच्चक्खाणं, अन्नो य अंगी कया बहवे अभिगहविससा, अह धेणूमभावे साहुदासी साविगा दिवसे दिवसे गोरसं आभीरिहत्थाओ गिणहइ, अन्नदियहे य तीए आभीरी भणिया, जहा-भहे! तुमं पइदियहं मम घरे महियं घेत्तण आगच्छेज्जाहि, अहं जेत्तियं तुमं आणेसि तेत्तियं गिण्हस्सामि, अन्नत्थ मा वचिहिसि, पडिवन्नं च इमं तीए, एवं च पइदिणंदसणेणं निक्कवडकयविक्रयकरणेण य समुण्णन्नो तासिं परोणरं सिणेहाणुबंधो, अंतरंतरा य साविगा से गंधपुडिगाइदाणेण उवचारं करइ, इयरीवि सविससं दुद्धं दहिं पणामेइ, अन्नया य आभीरीए कन्नगा-विवाहो पारद्धो, तओ सा जिणदासं साहुदासिं च सपणयं भणिउमारद्धा—

जइवि न आसणदाणेऽवि तुम्ह सामत्थमत्थि मे किंपि । तहवि सिणेहवसेणं किमवि अहं विन्नविउकामा ॥ १ ॥

किर गुरुमणोरहेहिं सुहिसयणविसिट्ठगोट्टिकजेण । अम्हारिसेण जायइ सुचिरेण महूसवारंणो ॥ २ ॥

तुम्हारिसाण पुण पुव्वजम्मसुविट्ठत्तपुन्नविमवाणं । पइदियहमूसवच्चिय लीलाए संपथयंति ॥ ३ ॥

एयं च उल्लवती सा भणिया सेट्ठिणा—भहे! फुडक्खेरहे भणसु जमिह पओयणं?, तीए भणियं-अम्ह घरे विवाहो पारद्धो, अओ तुम्हेहिं तत्थ भोयणं कायधं, सेट्ठिणा भणियं-को दोसो?, कीरइ, केवलं बहुरेहवावावा-वडत्तणेणं न पारेमो सुहुत्तमेत्तंपि गिहं परिच्चइउं, अओ न कायधो तुमए चित्तसंतापो न वोढवो अब्भत्थणाभंग-ससुम्भवो अवमाणो न गणियधं निहविसुन्नत्तणं न मोत्तवो मणांगपि पुव्वपणओ, न हि निक्कवडसिणेहाणुबंधो सम-

वेकखइ वज्झोवयारं, ता गच्छ नियगेहे कुणसु समीहियपओयणंति पन्नविऊण समप्पियाइं धूयणवसणाइं पणाभि-
 याइं तदुचियाइं वत्थाभरणाइं दिन्नाइं कुकुमाइविलेवणाइंति, सावि ताणि गहिऊण परमहरिसमुच्चहंती गया
 सगिहं, कओ विवाहो, मिलिया सुहिसयणबंधवा, जाया मइई सोहा, पसंसियाइं ताइं इयरजेणं, जहा-सुदरो
 विवाहमहूसवो एएहिं कओत्ति, ताणि य पसंसं निसामिऊण चिन्तेति-अहो परमोवयारकारी महाणुभावो सेट्ठी
 जेण अमह विवाहे पवरोवगरणदाणेणं एवं सोभा निवत्तिया, ता कहमैयस्स पच्चुवयारे वट्टिस्सामोत्ति संपेहिऊण
 उवचियसरीरे अतुच्छपुच्छोवसोहिए सुप्पमाणकुडिलचारुसिंगे सरयससहरकिरणसरिसवण्णे समानेदेहपरिसंडले
 अच्चंतसुंदरगोरं कंबलसंबलाभिहाणे तिवारिसिए गोवग्गपहाणे जुवाणवसहपोयगे गहिऊण गयाइं ताइं सेट्ठिभवणे,
 पणाभिया य ते सेट्ठिणो, चउप्पयपरिगहकयपच्चक्खाणेण निवारिया ते सेट्ठिणा, तहावि असुणियपरसत्थाणि भव-
 णंगणे ते बंधिऊण गयाइं ताइं नियगेहे, तेण सावएण चित्तिं-अहो संकडमेवमावडियं, जओ-जइ मुचंति एए
 वराया ता लोगो हलाइसु वाहेइ तहाविहहीणसमायारो वा कोइ विदेवइ, अह एत्थेव धरिज्जंति ता निरुवयारि-
 त्तेणे दुरणुपालिजाा हवंतित्ति खणं विगप्पिऊण जिणवरवयणायन्नणसमुप्पन्नकरणापूरूरियियहियएणं संगोविया
 सेट्ठिणा, पइदिणं दावेइ किणिऊण य तेसिं फासुगचारिं, पणामेइ वत्थगलियं सलिलं, एवं पइदिणं उदंते वट्टइ,
 सो य सावगो अट्टमिचाउइसीसु आहारपोसहं सरीरसक्कारपोसहं बंभचेरपोसहं अवाचारपोसहं च पडिपुन्नं काऊण

सामादयपडिवन्नो समणससो अइयारंपकरिक्खणपरो धम्मसत्थपोत्थयं वाएइ, नियपरिणो य पंजलिउडो चित्त-
लिहिओव निसामेइ, तेऽवि कंबलसंबला अहामइयाए तहाविहमोहणिज्जकम्मलाघवेण य थिरिकयसवणउडा
अव्विक्खत्तचित्ता सन्नित्तणेण सुणियजुत्ताजुत्ता सम्मं सुणंति, जायमभवमया य जइवसं सावगो उववासं कुणइ
तद्विसं तेऽवि चारिं पाणियं च परिचयंति, पुणो पुणो दिज्जमाणंपि न गिण्हंतिचित्ति ।

अह तेसु तिरियजोणीसमुब्भवसुवि तवं करेतसु । सगुणत्ति पक्खवायं वहमाणो चित्तए सेट्ठी ॥ १ ॥
एत्तियकालं अनुकंपणद्वया दिन्नमोसिमसणाई । साहम्मिगबुद्धीए एत्तो सबं करिस्सामि ॥ २ ॥

साहम्मियवच्छं जेण जिणिं देहिं भुवणपणएहिं । सम्मत्तसुद्धेहं निदिहं धम्मियजणस्स ॥ ३ ॥

अप्पुवो कोइ धुवं अहो पभावो जिणिंदवयणस्स । जं निमुणिऊण तिरियावि जंति वेरगमगंगमि ॥ ४ ॥

इय चित्तिऊण सविसेसमायरं तोसिं दंसए सेट्ठी । भवेसु पक्खवायं वंहति जं वीयरागाऽवि ॥ ५ ॥

एवं च उच्चियकायव्वपरायणस्स सम्मसुवसंतचित्तस्स सरंति वासरा, अनया य तीए नयरीए भंडीरजक्खस्स
जणेण जत्ता पत्थुया, तत्थ य विविहतुरगाइवाहणाधिरूढो निगंतूण सयलपुरलोओ तस्स पुरओ बाहं केइ ।

इओ य-जिणदाससेट्ठिणो पियमित्तो अच्चंतकोऊहलिओ जक्खजत्ताए वाहियालिं काउमणो सेट्ठिं अणापुच्छि-
ऊण पणयभावेण कंबलसंबले गंतीए जोत्तिऊण गओ जक्खपुरओ, वाहिया महतीबेलं, ते य अच्चंतदरिसिणजायात्तणेण

अन्नपणयिणा जणेण वाहिज्जमाणा आरावेहनिस्सरंतरुहरिधारापरिगया कोमलदेहा अदिट्ठतहाविहयेधणा सुहु-
हियया नित्थामा जाया, तहाविहे य ते सेट्ठिगेहे बंधिता मित्तो पडिगओ, सेट्ठीवि भोयणसमए जाव जवसाइ
धेत्तूणं एइ ताव पेच्छइ एए कंपतदेहे निस्सहगलंतनयणे वणमुहनीहरंतसोणिए दोवि गोणए, एवंविहे य दड्ढण रुद्धो
पुच्छइ—अहो केण दुरायारेण इमे वराया इमं अवत्थमुवणीया?, निवेइयं च से जहावित्तं परियेणं, तदायच्चणेण
य समुण्णन्नो महंतो चित्तसंतावो, कंबलसंबलावि दड्ढायजज्जरियसरीरा अणसणं काउयणा सायरं पुरओ उवणी-
यं पि चारिपाणियं न गेण्हति, जाव य पुणो पुणो गवत्ताइयं दिज्जमाणं नेच्छंति ताव सेट्ठिणा सुणिज्ज तदग्निपायं
दिन्नमेतेसिं भत्तपच्चक्खाणं, पडिवन्नं च साभिलासं एएहि,

ताहे कारुन्नेणं विमुक्कनीसेसगेहवावारो । सुसिणिद्वबंधवाण व तेसिं पासे ठिओ सेट्ठी ॥ १ ॥
भणइ जहा रोसमहो मणागमेत्तं पि मा वहेज्जाह । जं निहएण तेणं दुत्थावत्थं इमं नीया ॥ २ ॥
संसारपवत्ताणं जंतूणं जेण कित्तिं एयं? । न हु नामेगंतसुहो जणं मि जाओ जणो कोई ॥ ३ ॥
दड्ढज्जपंजरोदरगयं पि सेलाइगुगलीणं पि । पुव्वकथमसुभकम्मं जीवं संकमइ कुविंयं व ॥ ४ ॥
विहवइ तयणु विवसं सुबहुं अइविरसमारसंतं च । कूडपडियं व चडयं बहुप्पयारं तडफडंतं ॥ ५ ॥
ता भो महाणुभावा! सम्मं अहियासणं विमोत्तण । अन्नो निज्जरणविही न विज्जए पुव्वपावस्स ॥ ६ ॥

उवचियपुत्रा तुभे सफलत्तणमुवगयं च भे जीयं । जं दुक्खविमोक्खसमा पत्ता जिणधम्मसामग्गी ॥ ७ ॥

इय एवमाइवयणेहि पसमसारेहिं अमयसरिसेहिं । संठविद्या सुहमगे ते वसहा सेट्ठिणा सम्मं ॥ ८ ॥

एवं च विसुज्झमाणज्झवसाणा सरीरेयणं सहमाणा सेट्ठिभणिज्जमाणं पंचनमोक्कारं पडियच्छमाणा कालं काऊण नागकुमारेसु देवेषु उववणणा, ते इमे कंबलसंबलन्ति ॥

इओ य-भयवं महावीरो नावुत्तिन्नो संतो जलतीरमि इरियावहियं पडिक्कमिय सुरसरियापरिसरे ईसिजलोछसु-
हुमवालुगोवरि मंदं मंदं पयाइं निमित्तो थूणागसंनिवेसे गंतुं पयत्तो, नवरि सामिणो पडिफलत्तचक्कमलकुलिसं-
कुसकलसपासायपसुहपहाणलक्खणं किं पयपतिं नइपुल्लिणे पलोइऊण पूसो नाम सामुहुलक्खणवियक्खणो
चित्तिउमारद्धो-अहो आजम्मकालाओऽवि अदिट्ठुवा अचंतमच्छरियभूया कस्सइ महाणुभावस्स छक्खंडमहिमंड-
लेवभोगिणो चक्किणोव पवरलंछणा पयपद्धई एत्थ दीसइ, जइ पुण कंहपि कोइ अपत्तरज्जो वा देसंदसणकोऊहलो
वा तहाविहविसमदसावडिओ वा चक्कवट्ठी एवं भमेज्जा, पेच्छामि तं महापुरिसं, जइ पुण एयावत्थमि इमंमि
सेविज्जमाणमि मय समीहियत्थसिद्धी जाएज्जत्ति परिभाविऊण तुरियगइए जाव कइवयपयंतरमुवगओ ताव दिट्ठो
अणेण थूणागसन्निवेसस्स बहिया बहलपल्लवालंकिक्कलितरुणो हेट्ठओ पडिमासंठिओ जिणो, दट्ठण य परमे-
सरस्स सिरिवच्छलंछियं वच्छयलं दाहिणावत्तगंभीरं नाभिमंडलं बालप्पवालपाडलं व करकमलं चित्तियगणेणं न

केवलं एयस्म चरणजुयले लक्ष्मणं, सरीरंपि नियनियविभागाणुरुवल्लक्ष्मणाणुगयं उवल्लिखज्जइ, ता कंह एवं-
विहा समत्थपसत्थलक्ष्मणसंपया?, कंह परिजुन्नवत्थमेत्तंपि से न संपज्जइ? कंह वा समग्गभरहरज्जसिरिसूयण-
परा तारिसा सासुहसत्थवयणविन्नासा?, कंह असंपज्जंतलुक्खल्लिखल्लिखिस्वाहारकिसमेयस्स सरीरं?, अहो दूरं पच्चक्खेण
विरुद्धं लक्ष्मणसत्थं ।

चिरकालं सेसकलाकलावमवि उज्झिज्जण जत्तेणं । सासुहसत्थमेयं अच्चभिचारंति पढिओड्हं ॥ १ ॥

इण्हिं तु एत्थ समणे निव्वसणे चक्खुगोयरं पत्ते । लक्ष्मणसत्थमसेसं नूनं दूरं विसंवइयं ॥ २ ॥

हा हा धिरत्थु मज्झं परिस्समो जेण हरिणपोयव्व । माइणिणयासमेणं लक्ष्मणसत्थेण नडिओड्हं ॥ ३ ॥

मुट्ठीहिं हयं गयणं नवणीयत्थं विरोलियं सलिलं । अघडंतत्थनिबद्धं जं एयं अहिगयं सत्थं ॥ ४ ॥

केलिप्पिण मग्गे संवड्ढिमिमं पयारणपरेण । धुत्तकयं पिव कच्चं कालेणं होइ सिद्धतो ॥ ५ ॥

अलमेत्तो एएणं पलालकप्पेण दुट्ठसत्थेणं । इय तक्किज्जण पूसो परमविसायं गओ सहसा ॥ ६ ॥

एत्थंतरंमि सक्को सुहासणत्थो पउज्जए ओहिं । कह भयवं भवभहणो विहरइ परमेसरो वीरो?, ॥ ७ ॥

शूणागसन्निवेसे पेच्छइ पडिमट्ठियं जिणवरिंदं । नेमिच्चियं च पूसं दूसंतं अत्तणो सत्थं ॥ ८ ॥

तो सिग्घं वियडकिरीडकोडिमणिकिरणविच्छुरियगयणो तियसेसो जिणकमकमलवदणत्थं लहुं एइ, जहा-

भणियविहिणा य नमंसिऊण सामिं महुरवधणेणं पूसं भणइ-भइ ! किमेवं दूसेसि लक्खणसत्थं, नहु मिच्छी-
भासिणो महाणुभावा सत्थयारा, किं तुमए न सुओ एस ससुरासुरखयरनरेसरसिरपणयचलणो सिद्धत्थनरिदिनं-
दणो तिहुयणविकखायकित्ती धम्मवरचाउरंतचक्कवट्ठी खलमहिलवं रायलच्छि छड्डिऊण एवं विहरइ । अन्नं च-

एसो सो जस्सेसरियकोडिलेसंपि न घडइ समगो । पायालसगनरखेत्तजायलोगो लुतुंगोऽवि ॥ १ ॥
एसो चिय भवभयभीमकूवमज्जेतत्तउद्धरणो । वद्धुत्तुम्भडकलिकालदलणदक्खो इमो चेव ॥ २ ॥
एसो चिय सिवमंदिरकवाडपुडविहडणेक्कतल्लिच्छो । संजमलच्छिनेविसियविसालवच्छत्थलो एस ॥ ३ ॥
एसो चिय करुणाजलनिष्ठावियमच्छरिगतत्तजणो । अप्पडिमनाणदंसणपमोक्खगुणगणनिही एस ॥ ४ ॥
पच्चाइऊण एवं पूसं तिविहेण वयणनिवहेण । पणमियजिणवरचरणो सहस्सनयणो गओ सगं ॥ ५ ॥
इय धोरपरीसहवेरिसमरविद्धसणेक्कवीरस्स । धीरस्स भुवणपहुणो चरियंमि सुहोहभरियंमि ॥ ६ ॥
सुरसूलपाणिकोसियमहाहिपडिबोहणत्थसंबद्धो । पंचमओ पत्थावो समत्थिओ वित्थरेणोसो ॥ ७ ॥

इइ सिरिगुणचंदसूरिरइए महावीरचरिए सुलपाणिचंडकोसिअपबोहणो नाम पंचमो पत्थावो ।

अथ षष्ठः प्रस्तावः

पुष्वज्जियावज्जविणासणत्थं, एगागिणा वीरज्जिणसरेण । तित्तिक्खिया जे उवसग्गवग्गा, निदंसिया ते सयला कमेण ॥१॥
एत्तो य गोसालयदुव्विणयजुत्तस्स तस्सेव महापटुस्स । होहिंति जे ते उ निदंसइस्सं, एग्गचित्ता निमुणेह तुम्भे ॥२॥

अह पुष्वोवइदुथूणागसन्निवेसाओ निक्खमिऊण गामाणुगामेण परिब्भमंतो ठाणे ठाणे सुरविसरेण
पूइज्जमाणो अभणमाणोवि नियमाहप्पेण पाणिगणं पडिबोहिंतो पत्तो काणणुज्जाणदीहिधारमणिज्जं रासगिहं
नयरं, तस्स य अदूरेदसे समुत्तुंगपासायसहस्ससमद्दासिओ नालंदो नाम संनिवेसो, तत्थ धणकणगसगिद्धो
अज्जुणो नाम तंतुवाओ परिवसइ, तस्स य अणेगे कम्मकरा विसालसालासु संठिया विसिट्ठपट्टइसाइं वुणंति, भय-
वंपि वासारत्तं काउकामो अज्जुणं अणुजाणाविऊण एगंतभूयाए तसपाणविरहियाए सुन्नसालाए मासखसणं पढमं-
मुवसंपज्जित्ता विहरइ । इओ य गोसालो नाम मंखलिमंखस्स पुत्तो चित्तफलगोवजीवी एगागी परिभमंतो तत्थेव
सालाए ठिओ जत्थ भयवं पलंविणमुओ चिट्ठइत्ति । जहिं च एयस्स उप्पत्ती तं पच्छा भणिणही, पढमं ताव जस्स
सगासाओ मंखलीमंखो जाओ तहा कहिज्जइ ।

उत्तरावहविसए अत्थि सिलिंदो नाम संनिवेसो, तत्थ केसवो नाम गामरक्खगो, तस्स पाणप्पियाए विणीयाए

सिवाभिहाणाए भारियाए कुच्छिसि संभूओ मंखो नाम पुत्तो, सो य कमेण जोवणमुवगओ, अन्नया सो पिउणा सह सरोवरं गओ, जलमज्जनं च काऊण तडे निवन्नो पेच्छइ चक्कवायमिहुणं अन्नोन्ननिव्वरपेमाणुरारंजियहियंयं विविहकीलाविसेसे कुणमाणं, कहं चिय ?—

चंचपुडछिन्नवननलिणिनालवसंविभागफुडपणयं । सूरत्थमणासंकाकयनिविडपरोप्परसिलेसं ॥ १ ॥

जलपडिर्विविनयनिरूपेकखणुप्पन्नविरहपरिसंकं । अन्नोन्नविहियनिकवडचाडुवकिखत्तमणपसरं ॥ २ ॥

एरिसं च तं नाऊणं मंदं मंदं परिसप्पिणा कयंतेणेव असुणियागमणेण पारद्विएण आयन्नंतमाकड्डिऊण खित्तो तदभिमुहो सिलीमुहो, अह दिवसजोगेण लग्गो चक्कवायस्स, मम्मिओ य सो तेण घाएणं, जावडज्जवि न वावज्जइ ताव तं तहाविहं पेच्छिऊण खणं रुणुञ्जुणिऊण य सकरुण विवन्ना चक्कवाई, इयरोऽवि मुहुत्तमेत्तं जीविऊण पंचत्त-
मुवगओत्ति । एवं च तद्वइयरमवल्लोइऊण मंखो सुच्छानिमीलियच्छो निवडिओ वरणिमंडले, दिट्ठो य केसवेण अहो किमेवमतक्कियमावडियंति विव्हियमणेण, समासासिओ सिसिरोवयारोहिं, खणंतरेण उवलद्धचेयणो पुच्छिओ य—
पुत्त ! किं समीरखोभो ? उय पवलपित्तदोसो ? अहवा नित्यामत्तणं ? अन्नो वा कोइ हेऊ ? जेणेवं निससंहंगो चिरं मो-
हसुवगओऽसि ? साहेसु परमत्थं, तेणावि पिउवयणमायन्निऊण विमुक्कदीहुस्सासेण भणियं—ताय ! एवंविहं चक्कवाय-
मिहुणं नियच्छिऊण मए पुव्वजाई सरिया, किर अहं पुव्वभवे माणससरोवेर एवं चिय चक्कवायमिहुणत्तणेण वहुंतो पुल्लं-

दमुक्कमग्गणाभिहओ तक्खणविरहफुट्टहिययाए चक्कवाईए अणुगओ मओऽम्हि, मरिऊण संपयं तुह पुत्तत्तणेण उववन्नो,
इण्हिं च चिरपणइणीए तीसे चक्कवाईए विरहं सोढुं न पोरमि, केसेवेण भणियं-वच्छ ! अलं समइक्कंतदुक्खसुमरणेण,
एसो चिय सहावो एयस्स दढकथंतस्स जं न सहइ दहुं चिरकालं पियसंपओगसुहियं कमवि जणं, अवि य—

देवाविय निथपणइणीविरहुब्भयदुक्खदहणसंतत्ता । सत्तच्च मुच्छया इव कहकहवि गमति नियजीयं ॥ १ ॥

तुम्हारिसाण पुत्तय ! केत्तियमेत्तं इमं अओ दुक्खं । जेसिं चम्मओणद्धं देहं सवावयासज्जं ॥ २ ॥

ता विरम पुब्बभवसुमरणाउ वट्टेसु वट्टमाणेणं । तीयाणागयचित्तणवसेण सीयइ सरीरंपि ॥ ३ ॥

तेणं चिय संसारो नूणमसारो इमो दढं जाओ । जं जम्ममरणजरोगसोगपलुहाइं दुक्खाइं ॥ ४ ॥

इय पन्नविउं विविहप्पयारेहऊहिं केसेवेणं सो । नीओ कहमवि गेहे विरहमहावेयणाभिहओ ॥ ५ ॥

तत्थ गओऽवि सो पसुक्कपाणभोवणो सुन्नमणो धरणिनिसियलयणो महाजोगिच्च निरुद्धवाचारंतरपरिचित्तणो
तणंपि व नियजीविंधपि गणेमाणो अच्छइ, एयावत्थं च तं पासिऊण जायचित्तपरितावेण सयणवग्गेण मा छलणा-
विगारो कोऽवि होजत्ति संकियमणेण सवायेरेण वाहराविया तंतमंतवाइणो, दंसिओ तेसिं, कया य उवयारा, न
जाओ मणांगपि विसेसो, अन्नया य देसंतराओ आगओ एगो धेरपुरिसो, ठिओ एयस्स चैव गिहे, दिट्ठो अणेण मंसो,
पुट्ठो य पासवत्ती केसवो, जहा-भइ ! किं कारणं जं एसो जुवावि रोगाइणा निरुवहओवि ससखो इव लक्खिअइ ?

केसवेणवि साहिओ दोसुब्भवो, तेण भणियं-कयं किपि तुमए एवंविहोसस्स पडिविहाणं? केसवेण भणियं-दंसिओ एसो पवरमंततंताइजाणगाणं, थेरेण जंणियं-निरत्थओ सवोवक्कमो, पेमगहस्स किं करिंति ते वरागा?, तहाहि—

उग्गविससप्पसंभूयवेयणोवसमकरणदक्खावि । पंचाणणदुट्ठुकरिंदरक्खसीथंभणपरावि ॥ १ ॥

भूयसमुत्थोवद्वविणासकुसलावि परमविज्जावि । पेमपरव्वसहियं पणुणं काउं न पारिंति ॥ २ ॥

केसवेण भणियं-किं पुण एत्तो कायवं?, तेण भणियं-जइ मं पुच्छसि ता जावज्जवि दसमिदं न यावइ एस ताव आलिहावेसु चित्तफलहगे पुव्वइयरं, जहा-पुल्लिदेण चक्कवाओ सेरेण पइओ, जहा तंमि जीवंते चेव तप्पणइणी मयत्ति, एवं च काराविज्जण चित्तफलगहत्थं एयं परिब्भमावेसु गामनगराइसु, मा एवं कए कहवि विहिव-सेण पुव्वभव्वभज्जावि पाविथमहिलाभावा फलगलिहियचक्कवायमिहुणवइयरवलोयणजायजाइसरणा इमिणा सद्धि संघडेज्जा, सुव्वंति य पुराणागमेसु एरिसवुत्तंता, एवं च कए एसोऽवि आसाभुयगलाखलियजीओ कइवय-दिणाणि जीवेज्जा, एवमायन्निज्जण केसवेण साहु साहु तुह बुद्धीए, को जाणइ परिणयमइणो पुरिसे मोत्तुण एवं-विहविसमत्थनिन्नयं? ति अभिणादिज्जण तव्वयणं निवेइयं मंखस्स, तेणावि भणियं-ताय! किमजुत्तं?, सिग्घमुवट्ठ-वेह चित्तफलं, एसो चेव हवउ कुवियण्णकलोलमालाउलस्स चित्तस्सुवक्खेवो, तओ केसवेण मुणिज्जण तदभिप्पायं आलिहावियं जहाचट्ठियचक्कवायमिहुणरूपाणुयं चित्तफलं, समणियं च मंखस्स, दिन्नं संबलं, तयणंतरं च सो

चित्तफलगत्यो सहाइणा एगेण अणुगम्ममाणो नयरपुरखेडकब्बडमडं वपमुहेसु सन्निवेसेसु आसापिसायनडिओ निव्विस्सामं परिब्भसइ ।

दंसेइ पइगिहं चिय समूसियं तं च तियचउक्केसु । चउमुहमहापहेसु य पवासभादेउलेसुपि ॥ १ ॥

ताहे रहंगमिहुणं तहासरूवं निरुविकुण जणो । कोऊहलेण पुच्छइ साहेइ य सो जहावित्तं ॥ २ ॥

अणवरयंपि सवित्थरमसमत्थो नियकहं च सो कहिउं । संखेवत्थनिबद्धं साहइ दुवईए नियवत्तं ॥ ३ ॥

जहा-माणससरोवरंमि अवरोप्परपोढपमाणुरंजियं, नयणनिमेसमेत्तविरहदूभिज्जंतदेहयं । लुद्धयमुक्कनिसियसर-
विहुरियमह पंचत्तमुवगयं, संपइ संपओगमभिवंछइ एयं चक्कमिहुणयं ॥ ४ ॥ इमं च निसामिकुण केई पइसंति
केई अवहीरंति केइ अणुकंपंति, सोऽवि अविलक्खचित्तो सकज्जपसाहणेक्कनिरओ परियडंतो चंपं नयरिं गओ, तत्थ
य निट्ठियं पुच्चाणियं संबलं, तओ अन्नं जीवणोवायमपेच्छंतो तं चेव चित्तफलं पासंडं ओड्डिऊण गायणाइं गाय-
माणो भिक्खं भमिउं पवत्तो, अविय—

अइतिक्खल्लुहाभिहयस्स पिययमाजोगऊपुयमणस्स । एक्काविय से किरिया उभयत्थपसाहिया जाया ॥ १ ॥

इओ य-तत्थेव पुरे वत्थवो मंखली नाम गिहवई, सुभदा य से भज्जा, सो य अपरिहत्थो वाणिज्जकलासु अकु-
सलो नरिंदसेवाए असमत्थो करिसणसमए अलसो कट्टकिरियाए अवियक्खणो वावारंतरेसु, केवलं भोजणमेत्तं-
पडिबद्धो कइं सुहेण निव्वाहो होज्जति अणवरयं उवायंतरं विचिंतंतो पेच्छइ मंखं चित्तपट्टपयडणपडियकगभिकखा-

विचीए पइदिणं सुहेण निव्वहंतं, तं च दट्ठण चित्तिमणेण-अहो एयस्स इमा अणुवरोहिणी विची अचोरहरणिज्जं
मंडोळं निचंडुहा कामधेणू असलिला सस्सनिप्फत्ती अपरिकिलेसो महानिही, ता जीविओऽहि चिरकालाओ जं
पाविओ एस परमोवाओत्ति विगप्पिऊण गओ मंखस्स समीवं, पडिवन्ना तस्स सेवा, सिक्खियाइं गाथणाइं, अह
तंमि पुव्वभच्चमज्जाविरहवज्जजरियहियंमि पंचत्तमुगए सुणियत्तं व अण्णाणं मन्नतो महया वित्थरेण चित्तफल-
गमवरमालिहाविऊण समागओ नियमंदिंरं, भणिया नियगेहिणी-पिए ! पाडेसु संपयं छुहासिरे वज्जासणिं पगुणा
सवाहि य विहारजत्ताए, तीए वुत्तं एसा पगुणाऽहं, वच्चसु जत्थ भे रोयइ, तओ चित्तफलं घेचुं तीए समओ
नीहरिओ सो नयरीओ, तव्विचीए परिब्भमिउमारद्धो य देसंतरेसु, तव्वासिलोगोऽवि पुव्वदिट्ठनाएण तमागयं
पेच्छिऊण मंखो आगओत्ति वाहरइ, एवं मंखली मंखोवइट्ठपांसंडसंबद्धेण मंखो जाओत्ति । अन्नया य सो परिब्भ-
मंतो पत्तो सरवणसन्निवसे, ठिओ गोबहुलमाहणस्स गोसालाए, तत्थ निवसयाणस्स पसूया सुभदा, जाओ से
दारगो, कयं उचियसमए गुणनिप्फन्नं गोसालोत्ति नायं, संवड्ढिओ कमेणं, अइकंतो बालत्तणं, सो य दुट्ठसीलो
समावेणं, कुणइ विविहाणत्थे समावेण, न वट्ठइ आणानिदसे, सिक्खविज्जमाणो पवइइ पओसं । अवि य-

सम्मानदानपगुणीकओवि उज्जुत्तणं खणं धरइ । सुणपुच्छंपिव पच्छा कुडिलत्तं झत्ति दंसेइ ॥ १ ॥

अत्थक्कजंपिरं सम्मवेहगं कूडकयडपडिवद्धं । वेयालं पिव तं पेच्छिऊण को को न संकेइ ? ॥ २ ॥

पाव ! नवमासमेतं गन्धे वृढोवि पालिओवि बहं । सयवारंपि य भणिओ वट्टसि नो वयणमेत्तेऽवि ॥ ३ ॥
 इय जणणीए एसो वुत्तो पच्चुत्तरं इमं भणइ । अम्मो ! ममोदरे विससु जेण दुगुणं तुमं धरिमो ॥ ४ ॥
 जत्थ दिवसंसि कलहं पिउणावि समं पउंजइ न एसो । भोयणरुईवि पावस्त तस्स जायइ न तत्थ कुहं ॥ ५ ॥
 नीसेसदोसनिवहेण निम्मिओ निच्छियं पयावइणा । जं तारिमो न दीसइ अन्नो सबंनिवि जयंमि ॥ ६ ॥
 तह कहवि तेण नियदुट्ठिमाइ लोगो परंमुहो विहिओ । जह दुस्सीलजणाणं सो पढमनिंदसणं पत्तो ॥ ७ ॥
 इय विसतरुव दिट्ठीविसोच्च पढमुग्गमेवि वट्ठतो । दंसणमेत्तेणं चिय भयावहो सो जणे जाओ ॥ ८ ॥
 अन्नया य सो पिउणा समं बाढं कलहिऊण तारिसयं चिय चित्तफलं आलिहावेत्ता एकळो भयंतो उवागओ
 तत्थेव सालाए जत्थ भयवं ठिओत्ति । एसा गोसालगस्स उप्पत्ती ॥

अह सामी पढमं मासकलमणं काऊण पारणगदिणे पविट्ठो भिक्खट्ठा, गोथरचरियाए पत्तो विजयाभिहाणस्स
 सेट्टिस्स मंदिरं, दिट्ठो य तेण भयवं, तओ परसहरिसवसविसप्पमाणसमुच्चरोमंचमुव्वहेतेण पाराविओ भूरिमकल्लवं-
 जणसनिद्धाए भोयणविहीए, पाउब्भूयाणि नहयले गंभीरभेरीभंकारुम्मिस्सचउविहत्तूरसणाहाइं विंदूरपूरारुणचा-
 मीयरधारापज्जवसाणाइं पंच दिवाइं, विणंभिओ तियचउक्कवचरपहेसु विविहो साहुवाओ, निसागिओ गोसालेण
 एस वुत्तंतो, तओ चिंतियमणेण-अहो न सामन्नसाहप्पो एस देवज्जो, ता परिचइऊण चित्तपट्ठिगापासंइं पडिक्क-

ज्जामि एयस्स सीसत्तणं, न कयाइ निष्फला हवइ रयणायरसेवा, एवं विगणपमाणस्स भयवं पारिऊण पत्तो तमेव तंतुवायसालं, ठिओ काउस्सगेणं, गोसालोऽवि सामिणो अट्टुगं निवडिऊण चलणसु विन्नवेइ—

एरिसमाहणं तुह देवज्जय ! नो मए पुरा नायं । कुसलोऽवि मुणइ नग्घं अहवा थवियाण रयणाणं ॥ १ ॥

नियजणगच्चाओऽविहु वंछियसुहअत्थसाहगो जाओ । अणुकूले वा दइवे अनओऽवि नयत्तणमुवेइ ॥ २ ॥

हवउ बहुजंपिणं पडिवज्जिस्सामि तुम्ह सीसत्तं । अब्भुवग्गेसु सामिय ! पत्तो एक्को तुमं सरणं ॥ ३ ॥

सामीवि इमं सुणित्तावि विहिपडिसेहे अकुणमाणो तुसिणिक्को ठिओ, इयरोऽवि निययाभिप्पाएण पडिवन्न-
सिस्सभावो भिक्खाए पाणवित्तिं काऊण भगवओ समीवं न मुयइ, अह बीयमासखमणपारणए आणंदनामस्स गिहवइस्स घरे गोयरचरियाए पविट्ठो भयवं, पडिलाभिओ य खज्जगविहीए, तइए य मासखमणपारणए सुनंदस्स मंदिरे सव्वकामगुणिणंति । एत्तो चउत्थमासखमणमुवसंपं जित्ताणं विहरइ, गोसालोऽवि बहुदिवसेवासंभाविय-
पणयभावो कत्तियपुन्निमादिवसे संपत्ते पुच्छइ—भयवं ! एरिसियंमि वारिसियमहूसवे किमहमज्ज भत्तं लभिस्सामि ?, एत्थंतरे जिणवरतणुसंलीणेण भणियं सिद्धत्थवंतरेण—भइ ! अज्ज तुमं पाविहिमि अंबिलेण समं कोहवक्कूरं, कूड-
रुवगं च दक्खिणाएत्ति, सो एवं निसामिऊण सूरुगमाए आरब्भ सव्वायेण उच्चावएसु गिहेसु परिभमिउमा-
रद्धो, जत्थ जत्थ वचइ तत्थ तत्थ आरनालकछविचं कोहवक्कूरमेव लब्भइ, अह जायंमि अवरणहसमए छुदा-

पिवासाभिहओ जाहे अन्नं किंपि न पावेइ ताहे एगेण कम्मएण गेहे णेऊण जेमाविओ अंबिलोछियं कोदयकूरं,
उवणीओ य से भोगणावसाणे रूवणो, गहिओ य तेण, नवरं वीहीए दंसिओ, कूडगो य जाओ, तओ सो 'जेण
जहा भवियव', न तं हवइ अन्नह'त्ति नियइवायं गिणहइ, भयवंपि तंमि चिय कच्चियपुण्णिमादिणे निक्खसिऊण नालं-
दाओ गओ कोल्लागसन्निवेसं, तत्थ य बहुलो नाम माहणो तद्दिणं दिथवरे परमायरेणं भुंजावेइ, तस्स य गिहे
चउत्थमासखमणपारणं काउकामो सामी पविट्ठो भियखं, दिट्ठो अणेण, तओ परमन्नेण ययमहुसणाहेण पडिला-
मिओ, वियंभियाइ पंच दिवाइ । इओ य—

कूडगरूवयहतथो लज्जाए मंदमंदसंचरणो । जाए वियालसमए गोसालो एइ सालाए ॥ १ ॥

जिणनाहमपेच्छतो संभतो पुच्छइ समीवगयं । लोयं जिणप्पउत्तिं पुणरुत्तं सब्वजत्तेणं ॥ २ ॥

जाव न कोइ निवेयइ सबाहिरम्भंतरं समत्तेणं । नालंदं तावेसो हिंडइ सामिं निहालंतो ॥ ३ ॥

न य कत्थवि उवलद्धो तग्गमणविही तओ स चित्तेइ । पडिकूलो मज्झ विही पुणोवि विहिउड्ढि एगागी ॥ ४ ॥

एवं च सुचिरं परिञ्चूरिऊण परिचत्तचित्तफलपमुहोवगरणो विमुक्कनियसणो सउत्तरोट्ठं सिरं खउराविऊण नीहं-
रिओ तंतुवायसालाओ, तुरियं वचंतो य पत्तो कोल्लागे, तत्थ य बहिया जणो अणमणं एवं जंपेइ—अहो धणो
कयउणो उवलद्धजम्मजीवियफलो माहणो जस्स धरंमि तहाविहमहामुणिदाणयसेण निवडिया कणगवुट्ठो, तिय-

सेहिं उग्रधुट्टं अहो दाणं, जाओ जयमि निम्मलो साहुवाओ, गोसालोऽवि एयमहुं जणंतियाओ सोचा हट्टुट्टो
एवं विचिंतै-जस्मिं महासुणिं एए वयंति तारिसण्णभावो सोच्चिय मम धम्मायिओ महावीरो, जेण न खलु अत्थि
अन्नस्स कस्सइ तहारुवस्स समणस्स वा माहणस्स वा एवंविहा इहीसक्कारपरक्कमत्ति निच्छिऊण कोल्लागसंनि-
वेसमि स बाहिरब्भंतरं सुनिउणदिट्ठोए जाव पलोएइ ताव दिट्ठो भयवं काउस्सग्गमुवगओ, तं च पेच्छिऊण हरिस-
वस्ससियरोमकूवो वियसियवयणो पावियचित्तायणं व अण्णाणं मन्नंतो तिव्वुत्तो आयाहिणपयाहिणं काऊण
निवडिओ भयवओ चरणेसु, भालतले वडियपाणिसंपुडो य एवं भणिउं पवत्तो—

असरिसगुणगणयणायरो तुमं तिहुयणस्स पुज्जो य । विहलियजणसाहारो य जेण ता विणवमि इमं ॥ १ ॥
पुव्वं वत्थाइपरिग्गहेण जोग्गो न आसि दिक्खाए । संपइ पुण परिचत्तमि तंमि जाओ अहं जोग्गो ॥ २ ॥
ता तेलोक्कदिवायर ! पडियज्जसु जेण संपइ भवामि । तुह सिस्सो जा जीवं एत्तो तं चेव धम्मगुरू ॥ ३ ॥
तुह थवमेत्तविरहेवि नाह ! हिययं कहंपि फुट्ठंतं । पुणरुत्तसंगमसमीहणेण कट्टेण संघरियं ॥ ४ ॥
जाणामि वीयराने कीरंतो नेव निव्वहइ नेहो । पेमगहिलं सचित्तं किंतु न पारेमि पडिखलिउं ॥ ५ ॥
अन्नं च-अच्छउ दूरे सेसं वियसियनवल्लिणमणहरच्छीए । जं पेच्छसि तं तेणवि सुणेवि अब्बुवगओऽहंति ॥ ६ ॥
इय सविणयं सपणयं भणमाणे तंमि तिहुयणेक्कपह । उज्झियपेमवियारोवि तस्स वयणं पडिस्सुणइ ॥ ७ ॥

जाणंताविहु अइदुदुसीलयं भाचिरं अणत्थं च । गरुया पणएसु तहावि हुंति न परंमुहा कहवि ॥ ८ ॥

एवं च सामी तेण पडिवणसिस्सभावेण समओ सुवन्नखले सन्निवेशे वच्चइ, तस्संतरे गोवाले बहुखीरं गहाय महतीए थालीए अखंडफुडिएहिं नवएहिं सालितंदुलेहिं पायसमुवक्खइते पेच्छिऊण गोसालो भणइ-भयवं ! दढं छुहाभिभूओऽस्मि, ता एह एत्थ पायसं परिमुंजामो, अह सिद्धत्थेण चिरकाललद्धावगासेण भणियं-भइ ! मा तम्मसु, एसा थाली अद्धसिद्धा चेव विहडीहि, ताहे सो नियदुदुसीलयाए तं वयणं वितहं काउमणो गंतूण ते गोवे भणइ-अरे एस देवज्जगो तीयाणागयजाणओ एवं केहइ, जहा-एस पायसथाली अद्धसिद्धा चेव विवज्जिही, ता पयत्तेण संठवेह, एवं च निसामिऊण ते भयभीया वंसदलेहिं तं पिढरं गाढं वेढिऊण रंधिउमारद्धा, अह पउरतं दुलपक्खेवविहसिया निमेषमेत्तेण फुट्ठा थाली, पच्छा गोवेहिं जं जहा पावियं तीसे पायसालिद्धं कप्परं तं तहा घेत्तूण परिमुत्तं, गोसालोऽवि कंदुकाविरालोव्व पेच्छमाणो विलक्खो चेव ठिओ सुहुयरं च नियइवायं पडिवन्नो, अह सामी वंभणगामं गओ, तत्थ य गामे द्दोन्नि पाडगा, तेसु दो भायरो नंदउवणंदनामाणो सामित्तं कुणंति, भुवणगुरूवि छट्टुपारणगंमि पविट्ठो नंदपाडयंमि, दिट्ठो नंदेण, पडिलाभिओ दहिमिस्सेण वासियकूरेण, गोसा-लोऽवि गओ इयरपाडयं, उत्तुंगपासायमवलोइऊण पविट्ठो उवन्दस्स मंदिरे, भणिया उवन्देण कम्मयरी, जहा-देहि एयस्स भिक्खंति, उवणीओ अणाए वासियकूरो गोसालयस्स, सो य तं अणिच्छंतो उवणंदं एवं निब्भच्छेइ-

गामुक्कोडं गिणहह नरनाहस्स व न देह किंपि करं । विविहे कुणह विलासे अक्खलियं पावमायरह ॥ १ ॥

अम्हारिसाण सुणिपुंगवाण गेहंगणमुवगयाणं । वासियभत्तं दावितया कंहं नेव लजेह ॥ २ ॥

एवं च आयन्निज्जण रुट्ठेण उवणंदेण भणिया दासी-भइ ! एयस्स चेंव समणस्स सीसंमि पविखवसु भत्तमेयंति, खित्तं च तीए, तओ गोसालो बाढसुव्वदामिमाणो दट्ठोडभिउडिभासुरो अन्नं किंपि तस्स अणत्थं काउमसमतथो गेहदुवारे ठाऊण भणइ-जइ मम धम्मायरियस्स अत्थि तवो वा तेओ वा ता एयस्स भणुयाहमस्स भवणं डज्झ-उत्ति, अह अहासन्निहिइहिं वाणमंतरेहिं भगवओ पक्खवायमुव्वहंतोहिं विउव्विओ हुयवहो, दहं से मंदिरं ।

तयणंतरं च भयवं चंपानयरिं गओ, तत्थ य तइयं वासारत्तं ठाइ, दोमासिएण य खमणेण तवोकम्ममुवसंपज्जइ, विविहाणि य उक्कुडुयासणाईणि करेइ, चरिमदुमासियपज्जवसाणे य बाहिं पारेत्ता गोसालेण समेओ कालायं नाम सन्निवेशं वच्चइ, तहिं च एंगंतमूए तसपाणरहिए सुन्नागारे निसासमयंमि पडिमं पडिवज्जइ, गोसालोडवि चवल-त्तणेण निरोहमसहमाणो गेहदुवारदेसे निळुक्को अच्छइ, एत्थंतरे सीहो नाम गामाहिवपुत्तो विज्जुमईनाभाए दासीए समेओ भोगत्थी तं चेंव सुन्नघरं पविट्ठो, तेण य महया सहेण भन्नइ-अहो जइ कोइ एत्थ समणो वा वंभणो वा विओ वा वसिओ ता सो साहेउ जेण अहे अन्नत्थ वच्चासो, इमं च सुणिज्जण सासी ताव पडियापडिवन्नत्तणेण तुणिहक्को जावेइ, इयरो पुण कवडेण न देइ पडिवयणं, ताणि य अणुवलद्धपडिवयणाणि निस्सकं सुरयविणोएण

खणं अच्छित्ता नीहरिउमारद्धाणि, एत्थंतरे दुवारदेसंतरट्टिएण गोसालेण गच्छंती छित्ता विज्जुमई, तओ तीए भणियं-अज्जउत्त ! अहं पुट्ठा केणावि, एयं च निसामिऊण सीहेण वलित्ता गहिओ बाहाए गोसालगो, भणिओ य-अरे कइयेवेण अम्हे अणायासमायमाणानि पाससि, पुच्छिओऽवि न साहेसि जहा अहमिह निवसाभित्ति विष्म-च्छिऊण जहिच्छं पिट्ठिओ लट्ठीए, गओ य सट्ठाणं, तओ-गोसालो भणइ जिणं-तुम्ह समकबं पि एकओ अहयं । एवं निट्ठुरघाएहिं कुट्ठिओ कारणेण विणा ॥ १ ॥ न मणागं पि हु तुम्हे निवारणं कुणह तस्स पावस्स । मम दाय-पुज्जुयस्सवि जुज्जइ गरुयाण किमुवेहा ? ॥ २ ॥

अह जिणतणुमल्लीणो सिद्धत्थो वागरेइ गोसालं । रे दुट्ठसील ! जइ तं सच्चं चिय सुहसमायारो ॥ ३ ॥ ता किं अनिमित्तं चिय तं महिलं छिवसि पाव ! गच्छंति । जह अम्हे संलीणा तह ठासि न गेहमज्झगओ ॥ ४ ॥ तुह पक्खं कुणमाणा अम्हेवि तुमं व नणु हणिज्जामो । दुट्ठोवट्ठभपरा होति सदोसा अदोसावि ॥ ५ ॥ एत्थंतरंमि सामी निक्खमिउं पत्तकालगामंमि । पुव्वविहाणेणं चिय सुन्नघरे संठिओ पडिमं ॥ ६ ॥ अह तत्थवि रयणीए गामउडसुओ उ खंदओ नाम । नियभज्जालज्जाए एइ समेओ सदासीए ॥ ७ ॥ दंतलियानामाए ताहे पुव्वं व पुच्छइ इमोऽवि । गोसालोऽवि निलुक्को भएण गेहेक्खेदंसंमि ॥ ८ ॥ विजणंति मन्नमाणो तत्तो तीए समं जहिच्छाए । उव्वमुंजिऊण भोगे सो निस्सरिउं समारद्धो ॥ ९ ॥

तेसिं मिहो कहुल्लावसवणसंवड्डमाणपरितोसो । कहकहकहत्ति पहसइ गोसालो अह पिमाओच्च ॥ १० ॥
सोचा पहसियसइं खंदो कोवेण जट्टिसुट्ठीहिं । हणिज्जण तं विमुचइ ताहे सो एइ जिणमूले ॥ ११ ॥
भणइ य सोचालंभं नायगधम्मो किमेस संभवइ ? । पेच्छंताणवि तुमं जं एवमं हणिज्जामि ॥ १२ ॥
रक्खाकएण तुब्भे ओलगिज्जइ सया पयत्तेणं । जइ पुण सावि न विज्जइ निरत्थिया ता धुवं सेवा ॥ १३ ॥
अज्जवि सद्दोसाणवि पहुणो नियसेवगण परित्ताणं । सद्दायेरेण कुच्चंति किं पुणो नीइनिरयाणं ? ॥ १४ ॥
सिद्धत्थेणं भणियं केत्तियमित्तो इमो विणिग्घाओ ? । अज्जवि सुहस्स दोसेण नत्थि तं जं न पाविहिंसि ॥ १५ ॥
तओ सामी कुमारसंनिवेसं गओ, तत्थ य चंपगरमणिज्जाभिहाणे उज्जाणे पलंबियभुओ ठिओ काउस्सग्गेण, तहिं
च सन्निवेसे अपरिमियधणधन्नसमिद्धो अबंत्तसुरापाणप्पिओ कुवणयनाम कुंभकारो परिवसइ, तस्स आवणंमि पास-
जिणसिस्सा ससमयपरसमयत्थपरिन्नाणनिउणा भवोयहिनिवडंतपाणिगणसमुद्धरणसमत्था छत्तीसगुणरथणनिहिणो
जहोवइट्ठपिगिड्डइकिरियापरूवणापरायणा अणेगदेसंतरागयविणेयभमरलिहिज्जमाणसुयभयरदा सुणिचंदा नाम
सूरियो निवसत्ति, ते य बाढं वुहुभावसुवगया एवं विचिंतंति—

सवणणुजिणपणीओ धम्मो सवत्थ वित्थरं नीओ । मिच्छत्तवसपसुत्ता सत्ता पडिबोहिया बहुसो ॥ १ ॥
सुत्तत्थेहिं सिस्सा संपइ निप्फाइया जहासत्तिं । परिवालओ चिरं तह सबालवुहुड्डालो गच्छो ॥ २ ॥

ता एत्तो जुत्तं मे विससपरिकम्मणं सरिरस्स । काउं जहसत्तीए सव्वथवि उज्जमेयव्वं ॥ ३ ॥
 इय चित्तिज्जण सपए निवेसिओ तेण वद्धणो नाम । सिस्सो पडिरूवगुणो विहिया से तह गणणुन्ना ॥ ४ ॥
 भणिओ य वच्छ ! गच्छो जहा मए पालिओ पयत्तेण । तुमएवि तहा एसो पालेयव्वो सयाकालं ॥ ५ ॥
 सिद्धंतदेसणावि य अविगणियपरिस्समेण कायवा । सिस्साणं एवं चिय रिणमोक्खो कम्मविगमो य ॥ ६ ॥
 एत्तोऽवि भद्द ! भद्दं नूणं भुवणत्तएवि नो अत्थि । तो सुहसीलो होउं सुहाए मा हारिसिं एयं ॥ ७ ॥
 भो मुणिणो ! तुम्हेहिं पयट्ठियं इमस्स वक्कमि । निब्भच्छिहिवि बहुं कमकमलं नेव मोत्तव्वं ॥ ८ ॥
 जं किंपि मए पुवं तुम्हे सम्मं गुणेषु नो ठविया । अपए वा सिक्खविया तं सव्वं मरिसिज्जं मे ॥ ९ ॥
 इय मुणिचंदमुणिंदा तक्कालोचियविहिं विहेज्जण । पारंभंति सुधीरा दुक्करजिणकप्पपरिकम्मं ॥

अन्नाया य ते महाणुभावा भाविद्यदुवालसविहभावणा पंचणहं तुलणाणं तवसत्तसुत्तएगत्तवलसरूवाणं मज्झया-
 राओ बीयाए सत्ततुलणाए अप्पाणं भावेमाणा विहरंति । इओ य-गोसालो मज्झंदिणसमए भगवंतं भणह-एहि
 पत्थावो वट्ठइ, पविसामो गाममज्जे भिक्खानिमित्तं, सिद्धत्थेण भणियं-पज्जत्तं अम्ह अहुणेणं, तओ गोसालो
 पविट्ठो भोयणत्थं गामे, दिट्ठा य अणेण इओ तओ परिभमतेण ते पासनाहसिस्सा विचित्तपडपाउरणा पत्तमसुहो-
 वगरणकलिया यत्ति, ते य पेच्छिज्जण गोसालेण पुच्छिया-के तुब्भे ? तेहिं भणियं-समणा निगंगथा, सट्ठकमट्ठवि-

णिम्मियमहाभेहवारिधरोवसग्गावलोयणाउलफणिरायफणाफलगविरइयातुच्छत्तस्स पासनाहस्स सिस्सा, इति सोचा सो सिरं धुणंतो भणइ-अहो अहो निग्गंथा दुक्करकारया तुम्हे जे एत्तियमेत्तपि गंथमुव्वहंता अत्तणो निग्गंथत्तणं ठावेह, अहो पच्चक्खमुसावाइत्तणं अहो निन्निमित्तमत्तुक्कोसो तुम्हाणं, सव्वहा निग्गंथाणं मज्झे न केवि तुम्हे, मम धम्मायरिओ चेव दूरुज्झियवत्थाइपरिग्गहो दुक्करतवचरणनिरओ महप्पा जहत्यनिग्गंथो भन्नइ, तेहि य जिणनाहं अयाणमाणेहिं उलुंठयाए भासंतं पेच्छिऊण भणियं-भइ! जारिसओ तुमं तं मन्ने धम्मआयरिओऽवि तारिसो चेव, जओ-जाणिज्जइ पुत्तविसरिसचेट्ठाए जणणीए सीलसंपया, कंतिगुणेणवि मुणिज्जइ रयणस्स आगरस्स सुद्धी, ता अलं वन्नणाएत्ति वुत्ते रुद्धो गोसालो भणइ-जइ मम धम्मगुरुणो तवो वा तेओ वा अत्थि ता एएसिं धम्मायरियदूसगाणं पडिस्सओ डज्झउत्ति, तो तेहिं भणियं-न अम्हे तुम्ह वयणेणं डज्झामो, तो विलक्खो सो गंतूण सामिं भणइ-भयवं! अज्ज मए सारंभा सपरिग्गहा निग्गंथा दिट्ठा एवमाइ जाव पडिस्सओ न दट्ठोत्ति किमिह कारणं?, सिद्धत्थेण भणियं-ते पासावचेज्जा थेरा साहुणो, न तेसिं पडिस्सओ तुह वयणेण डज्झइत्ति । एत्थं-तरे जाया रयणी, कज्जलभसलसामलाइं पसरियाइं दिसिमुहेसु त्तिमिरपडलाइं, इओ य ते मुणिचंदसरिणो चउक्कमि तद्दिणे रयणीए एगागिणो उस्सग्गेण ठिया, सोऽवि कूवणयकुंभकारो सेणिभत्तमि निब्भरमइरापाणपरव्वसो विसंठु-लघुलंतचलणो समवणाभिमुहमइतो पेच्छइ बाहिंमि काउस्सग्गपडिवन्ने ते सरिणो, तओ चोरो एसोत्ति जायकुवि-

यथेण तेण निविडकरसंपुडेण पीडियं तेसिं गलयं, निरुद्धो उस्मासपसरो, तहवि अविचलियचित्ता सुभज्झाणे वहुता
 तक्खणमेव कम्मलाघवयाए समुप्पन्नोहिनाणा कालं काऊण देवलोयं गया, तेसिं च अहासन्निहियसुरेहिं कुसुमवरि-
 सपुब्बयं कया महिमा । इओ य गोसालो ते देवे विज्जुपुंजभासुरसरीरे उप्पयंते निवयंते य साहु निवाससमीवे पेच्छिऊण
 सामिस्स साहेइ-भयवं ! तेसिं तुम्ह पडिणीयाण पडिस्सओ डज्झइ, सिद्धत्थो भणइ-भइ ! मा एवमासंकेहि, तेसिं
 आयरिया देवलोगमुवगया, अओ देवा महिमं करेति, ताहे सो कोऊहलेण गओ तं पएसं, देवावि पूयं काऊण सद्धानं
 पडिनियत्ता, अह तत्थ गंधोदकं पुण्फवासं च दट्ठूण दुगुणजायहरिसो पडिस्सए गंतूण सज्झायद्वा णविणयकरणपरिस्संते
 निम्भरं पसुत्ते तेसिं सिस्से उट्ठविऊण वागरेइ-अरे दुट्ठसिस्सा ! तुम्हे सुंडियसिरा चैव हिंडह, जहिच्छं भिक्खं
 परिमुंजिऊण सवं रत्तिं सुयह, एत्तिथपि न मुणह-जहा सूरिणो महाणुभावा पंचत्तमुवगया, अहो तुम्हं गुरूसु
 पडिबंधो, एवमाइ कलकलं करेत्तंमि उट्ठिया साहुणो, णवरं तवयणासंकिया सहसा गया ते सूरिसमीवे जाव
 पेच्छंति कालगयमायरियं, तओ सुचिरं अद्धिइं काउमारद्धा । कंहं ?-

तह पालियावि तह पाडियावि तह गुणगणेसु ठवियावि । तह सिक्खविद्यावि दढं हा हा अकयन्नुया अम्हे ॥ १ ॥
 किं दुक्करतवचरणेण अम्ह किं वावि कुसलबोहेणं । किं चिर गुरूकुलसंवाससेवणाएवि विहलाए ॥ २ ॥
 जं असरिससंजमरयणरोहणं नियगुरुं पि कालगयं । पच्चक्खधम्मरासिं पि नेव मुणिमो पमाएणं ॥ ३ ॥

इय ते नियदुच्चरियं पुणो पुणो चेव जंपिरे समणे । गोसालो निब्भच्छिय बहुसो सामिं समल्लीणो ॥ ४ ॥
तओ सामी चोरगसन्निवेसं गओ, तत्थ य तद्दिवसं परचक्कभयसुवट्ठियं, तब्भएण य खंडरक्खा तियचउक्कसुन्न-
मढसभादेउलकाणणुज्जाणेसु अन्नसु य तहाविहठाणेसु अपुवपुरिसं चारियसंकाए निभालेमाणा पेच्छंति भयवंतं
एगंमि वणनिगुंजे फासुगविजणरूवे गोसालएण परिवुडं काउस्सगेण संठियंति, तं च पिच्छिऊण 'भीओ भयाइ
पासइ' त्ति जायसंका चिंतिउमारद्धा-अहो एरिसंमि एगंतदेसे एएसिं अवत्थाणं न कोसल्लमावहइ, तहाहि-जइ
इमे निद्दोसा ता किं पयेडे चिय नो गाममज्झे वुत्था?, अओ निच्छयं चारोवलंभत्थं परचक्कसंतिथा केइ आगयत्ति
निच्छिऊण पुट्ठो तेहिं सामी गोसालगो य, अहो के तुब्भे? किं निमित्तं वा एत्थावत्थाणंतिवुत्ते भयवं मोगेण
चिट्ठइ, गोसालोऽपि तयणुविचीए तहेव जावेइ, जाव य पुणो पुणो वागरिज्जमाणाऽपि न दंति पच्चत्तरं ताव निब्भंतं
चारगा एएत्ति कलिऊण तेहिं नीथा कूयतेडे, पारद्धा य वरत्ताए बंधिऊण तत्थ पक्खिविउं, नवरं पढमं गोसालं पक्खि-
वंति, पच्छा तं उत्तारिऊण भयवंतं बोलींति, एवं च उब्बोलणनिबोलणे कुणमाणाण सोमाजयंतनीमाओ प्रासजिणत्ति-
त्थपडिवन्नसामन्नपन्नपरीसहराइयाओ जीविगानिमित्तघरियपरिघायगनेवत्थाओ पुट्ठभणियस्स उण्णलेनेमित्थियस्स
भगिणीओ निमुणियएवंविहवइयराउ मा भयवं चरिमत्तिथयो गहियदिक्खो एस होज्जत्ति जायसंस्याउ जाव
तत्थ पएसे आगच्छंति ताव पेच्छंति भयवंतं तहा वाहिज्जमाणंति, तओ ताहिं भणियं-अरे रुरायारा! नूणं विण-

स्मिउकामा तुभे जे इमस्स सिद्धत्थनरवइसुयस्स सुरविसरपणयचलणस्स एवं उवसगं करेह, एवं च निससि-
ऊण भयभीएहिं सबहुमाणं खामिऊण मुक्को खंडरक्खेहिं जयगुरू, तं च ताओ वंदिऊण भावसारं गयाओ सद्दा-
णंमि । सामीवि तत्थेव कइवय दिणाइं परिपालिऊण गोसालेण समेओ नीसेसनयरमंडलमंडणाए पिट्टिचंपापुरीए
गंतूण चउत्थं वासारत्तं उवसंपज्जइ, वीरासणलगंडासणाइनिसेज्जाहिं निरंतरं जावेइ चाउम्मासियं च महास्यमणं
करेइ, तस्स पज्जंतदिणंमि य अन्नत्थपारणयं काऊण कयंगलसन्निवेसंमि वच्चइ, तत्थ य दरिद्धेरा नाम पासंडत्था
सारंभा समहिंला सपरिगहा सपुत्तनचुगाइसयणा परिवसंति, तेसिं च गेहपाडगस्स मज्जे सकुलक्कमागयदेवया-
समद्धासियब्भंतरं विउलपट्टसालपरिक्खेवमणहरं समुचुंगसिहरोवसोहिअं देवउलमत्थि, तस्स एगंतकोणे समा-
गंतूण सामी ठिओ पडिमाए, तद्विसं च मंदमंदनिवडंतजलतुसारवायं निरारियंतसिसिरमारुयं निवडइ महंतं
सीयं, तेसिं च पासंडत्थाणं तंमि दिणे जाओ महूसवो, तम्मि दिणे देवउले मिलिऊण सडिंभा सदारा भत्तीए गायंति
यं नचंति य, तेऽवि तहारूवे दट्ठूण अविगणियभाविभओ गोसालो सोवहासं भणिउमाढत्तो—

जत्थ गिहिणीसु पेमं ज्ञाणज्झयणेहिं सह महावेरं । सुरयपवंचपरूवणपरायणाइं च सत्थाइं ॥ १ ॥

जीवदयानामंपिपि न सुणिज्जइ जत्थ नूण सुमिणेऽवि । निब्भरमइरापाणंमि निच्चसो उज्जमो जत्थ ॥ २ ॥

गाइज्जइ नच्चिज्जइ सविलासं नियकुंडुबसहिएहिं । को होज्ज नाम एसोऽवि कोऽवि पासंडपरमत्थो ? ॥ ३ ॥

ते एवं फरसक्खरं तं जंपमाणं पेच्छिऊण समुणन्नोसा भणंति-अरे बाहिं निच्छुमह एयं दुडुमुहं, न कज्जमेएण इहट्टिएणं, एवं कहिए कंठे घेच्चण इयरोहिं निस्सारिओ देवउलस्स बाहिंमि गोसालो, तहिं च हिमत्तुसारसंवलि-यानिलेण अब्भाहओ समानो निविडबाहुवल्लरीसंछाइयवच्छत्थलो कंपंतकाओ दंतवीणावायणं कुणमाणो समुद्ध-सियरोमकूवो अच्छिउं पवत्तो, तारिसं च तं दट्ठण जायानुकंपेहिं अइनीओ सो अन्नोहिं देवउलमज्जे, खणमेत्तं च जायसीयावगमो नियदुद्धसीलयं पडिक्खल्लिउमपारयंतो पुणोऽवि वागरेइ-‘जत्थ गिहिणीसु पेम’मिचाइ, तओ पुणोऽवि नीणिओ पवेसिओ य जाव तित्ति वारे, चउत्थवाराए भवणमज्झपविट्ठो गोसालो भणइ-

दूरे अच्छउ नियमयविगप्पियं जं न लब्भए वोत्तुं । सबभूयंपि न पावेमि भासिउं किं करेमि अहं ? ॥ १ ॥

नमिमो तिसंझमेयं ठाणं न जहिं सदुच्चरीयस्स । रुसिज्जइ थेवंपिहु जइ पर फुडवाइणो चेव ॥ २ ॥

एवं च निसामिऊण परिणयबुद्धाहिं भणिथा-एस इमस्स देवज्जगस्स कोऽवि पीढियावाहगो वा छत्तधारगो वा पडिचारगो वा होही, ता किं अरे एएण ? तुण्हक्का अच्छह, नियनियकजाइं करेह, जइ सोढुं न तरेह ता सवत्तराइं वाएह, जहा से सहो न सुणिज्जइ, तहेव विहियं तेहिं, अह जायंमि पभायसमए समुगए दिणयेरे पचक्खी-भूयंमि जीवनियेरे तओ ठाणाओ पडिमं उवसंहरिऊण सामी सावत्थिं नयरिं गओ, ठिओ तीसे वाहिं पडिमाए, इओ य भोयणसमए गोसालो पुच्छइ-भयवं ! तुभे भिक्खहुं अइयह ?, सिद्धत्थो भणइ-अज्ज अम्ह उववासो, सो पुच्छइ-

भयं! अज्ज किमाहारं भुंजिस्सामि?, सिद्धत्थो भणइ-अज्ज तुमए माणुसमंसं खाइयच्चं, सो भणइ-अज्ज मए तं भोत्तच्चं जत्थ इयरमंसंभवोऽवि नत्थि, किंमग पुण माणुसमंसस्स?, एवं निच्छयं काऊण सच्चत्थ हिंङ्गिउमारद्धो ।

इओ य-त्तत्थेव नयरीए पियदत्तो नाम गाहावई, तस्स सिरिभद्दा नाम भारिया, सा य मरंतविद्यायणी, पुत्तभंङ्ग-जीवणनिमित्तं उवयरेइ मंतवाइणो पुच्छेइ संवच्छरिए सविसेसं पूएइ देवयाओ तहवि न जाओ कोइ विसेसो, तंमि य समए वेलामासे वट्टमाणे देसंतरागयं पसिद्धं सिवदत्तनामधेयं नेमित्तिं पुच्छइ-कह मम पया जीविस्सइत्ति?, तेण भणियं-जइ जायमेत्तं मयल्लयं बालं ससोणियमंसं पीसिऊण दुद्धपक्खेवपुव्वयं पायसविहाणेण रंघिऊण ययमं-हूहिं सुसंभियं काऊण सुतवस्सिणो उद्धूलियचरणस्स सबहुमाणं भोयणत्थं पणामसि ताधे पया थिरा होइत्ति, केवलं तंमि कयभोयणे सट्टाणमुवगए गेहस्स अन्नओमुहं दारं करेज्जासि, मा सो कहंमि मुणित्ता भोयणसरूव गेहं देहेज्जत्ति, पडिवन्नं च सयलं तीए, तम्मि य दिणे पसूया सा मएल्लयदारयं, तओ जहाभणियविहाणेण पायसं काऊण दुवारदेसे ठिया अतिहिं निहालेइ ।

एत्थंतरे गोसालो अणेगमंदिरपरिचागं कुणमाणो समागओ तं पएसं, दिट्ठो अणाए, सायरं उवणिमंतिओ य समाणो पविट्ठो तंमि गेहे, दिन्नमासणमिमीए, उवविट्ठो एसो, ठावियं से पुरओ भायणं, परिवेसियं च ययमहुस-णाहं पुव्वसंसिद्धं पायसभत्तं, कहं एत्थ मंसंसंभवोत्ति सबुद्धीए निच्छिऊण संतोसमुव्वहंतएण भुत्तमणेणं, भुंजिऊण

गओ भगवओ मूलं, ईसिं विहसियं काऊण भणिउं पवत्तो-भयवं! तुमए चिरं नेमिच्चित्तणं कयं, नवरि अज्ज विह-
डियं, सिद्धत्थेण भणियं-भइ! मा ऊसुगो होसु, अवितहमम्ह वयणं, जइ पुण न सदहेसि ता उवमेसु जेण
पच्चक्खं हवइ, तओ अंगुलिं गलए दाऊण वभियमणेण, दिट्ठा कुवियंमि पायसे मंसकेसाइसुहुमावयवा, तदंसणे य
रुद्धो सो तं धरं मग्गिउमारद्धो तं पुण तेहिं धरं तब्भएण चव अन्नओमुहं कयं, सो य तंमि पएसे पुणो पुणो
हिंडमाणो जाव न लहइ ताव भणइ-जइ मम धम्मगुरुणो तवतेयप्पभावो अत्थि ता डज्झउ इमो पएसो, जिण-
माहप्पमवितहं कुणमाणेहिं अहासन्निहिइयाणमंतरेहिं निहड्ढो सबो सो पएसो, भयवंपि कइवय दिणाइं विगमि-
ऊण गंतुं पयट्ठो, संपत्तो हलहुयाभिहाणंमि गामे ।

तस्स बहिया अणेगसाहप्पसाहाभिरामो बहलपत्तपडलपडिबलियतरणिमंडलपभापसरो महाखंधो हलिद्दगो नाम
तरुवरो, तस्स हेट्ठओ ठिओ भयवं काउस्सग्गणं, इओ य सावत्थि नयरीं गंतुकामो रयणिंमि आवासिओ तत्थेव
सत्थो, सो य सीयपीडिओ संतो पज्जालिऊण जलणं सुचिरं तप्पिऊण य पभायसमए उट्ठित्ता गओ, जलणोऽवि
जणेण अविज्झविओ निहंतो क्रमेण पत्तो जिणंतियं, गोसालेण भणियं-भयवं! नासह एस हुयवहो एइ,
इय निसुणिएऽवि सामी अविचलचित्तो तेहव जावेइ । अह पसरिएण सहसा पयकमलं ज्ञामियं सिहिणा ॥ १॥

गोसीसचंदणंपिच तुसारवरिसं व सिसिरसलिलं व । परिभाविंतो तिबं सिहिदाहं सहइ जिणनाहो ॥ २ ॥

गोसालोऽवि तहाविहमसमंजसमिक्खिऊण भयभीओ । अइदूरमवक्कंतो नियजीवियरक्खणट्टाए ॥ ३ ॥

अह उवसंतंमि जलणंमि सामी मंगलाभिहाणे गामे गओ, तहिं च वासुदेवमंदिरे ठिओ पडिमाए, गोसालोवि
निलुक्को एगत्थ पएसे, केवलं केलिकलहाइविणोयाभावेण बाढं दुक्खमणुहवंतो फालचुक्कोव मक्कडो दिसीओ अवलो-
एइ, एत्थंतरे कीलानिमित्तमागयाइ तं पएसं गामचेडरूवाइ, तओ ताइ पेच्छिऊण उवलद्वयणनिहाणं व पच्चुजी-
वियं व सण्णमाणो विडंविद्यवयणकंदरो दूरं निछालियलोलजीहो पसारियवीमच्छिऊणुयलो धाविओ वेगेण भय-
जणणनिमित्तं तेसिमभिमुहं ॥

अह तं भीसणरूवं दट्ठूणमतक्कियं समुहमितं । गामाभिमुहं भयओ चेडाइ लहु पधावंति ॥ १ ॥

धावंताणं ताणं पक्खलणवसेण केसिमवि जंघा । भज्जइ अन्नसिं पुण फुट्टइ सीसं टलइ चलणो ॥ २ ॥

इथेरेसिं पुण वियलंति देहनद्धाइं भूसणाइंपि । केसिं चिय वत्थाइं निवडंति तदा भयवसेण ॥ ३ ॥

अह तारिसमसंजसमम्मपियरो पलोइऊणेसिं । रोसेण दोसमूलं गोसालं संपवज्जंति ॥ ४ ॥

रे पाव पिसाय किममहं चेडरूवाइ तमिह भाएसि । इय तज्जिऊण तेहिं कुट्टिजइ सो दढं विवसो ॥ ५ ॥

ताहे तं हम्मंतं दट्ठु वारिंति गामजणवुट्ठा । देवज्जगस्स एसो खु नूनं सिस्सो अओ सुयहा ॥ ६ ॥

कहमवि तेहि विसुक्को गोसालो वागेरइ जिणनाहं । किं मइ हणिज्जमाणे तुम्हाणं जुज्जइ उवेहा ? ॥ ७ ॥

एत्तिथिदिणाइं समसोकखदोकखसहणेवि नेव पडिबंधो । किं उप्पन्नो तुम्हं ? अहो सिलानिदुरं हिययं ॥ ८ ॥
सिद्धत्थेणं भणियं-किं रूससि निन्निमित्तमम्हणं ? । अप्पाणमण्णच्चिय दोसकरं भो निरुंभेसु ॥ ९ ॥
अह उस्सगं पाराविऊण सामी तओऽवि निक्खमिउं । आवत्तनामगामे बलदेवगिहे ठिओ पडिमं ॥ १० ॥
तत्थवि कलहिकरुइ गोसालो दारिएक्कवयेण । पुवाणत्थं विसमारिऊण डिभाइं भेसइ ॥ ११ ॥
रुयमाणाइं ताइं गंतुं मायापिऊण साहंति । तेहि पुणेवि हणिज्जइ गोसालो पुव्वाएणं ॥ १२ ॥
गामपहाणजणेणं भणियं किं हम्मए मुहा एसो ? । एयमनिवारयंतस्स होइ दोसो गुरुस्स इमो ॥ १३ ॥
इय कहिए झत्ति जएक्कचक्खुणो सम्मुहं च ते लोया । उग्गीरियददंढा उवट्ठिया ताडणट्ठाए ॥ १४ ॥
एत्थंतरंमि जिणपक्खवाइणा वंतरेण सा पडिमा । लोआण भेसणत्थं नंगलहत्था समुट्ठविया ॥ १५ ॥
ताहे अदिट्ठपुवं पडिमाचलणं पलोइउं झत्ति । भयभीया ते सामिं भूरिपयोरेहिं खांमिति ॥ १६ ॥

खामिऊण विमुक्को जयगुरू चोरायसन्निवेसं गओ, तत्थ पच्छन्नपएसे पडिमं पडिबन्धो, गोसालोऽवि छुहाए परिकिलंतो पुच्छइ-भयवं ! अज्ज चरियवं न वा ? , सिद्धत्थो वागरेइ-अंतरं अम्हं, तओ गोसालो पविट्ठो गाममज्झे तहिं च गोट्ठीभोयणकएण बहुभक्खभोयणजायं उवक्खडिज्जइ, सो य अत्थिरत्तणेणं केवलं देसकालो भविस्सइत्ति जाणणट्ठा निहुओ होऊण पुणो पुणो तथभिमुहमवलोयइ, तत्थ य गामे तद्वियं महंतं चोरभयं, ताहे गामवासिणो

जणा जाणंति-एस पुणो पुणो पलोएइ, मन्ने चारो चारिओ वा हवेजा, ता जइ पुण कंहं पि एत्तो पुव्वमोसोवल्लदी जाइज्जत्ति विगण्णिऊण गहिओ तेहिं निस्सट्ठं हणिउमारद्धो, य, पुच्छिज्जमाणो जाव न किंपि जंपेइ ताव सुक्को कुट्टिऊण, तओ सो विलक्खो चित्तेइ-अच्छउ दूरे भोगणसंपत्ती, सरीरस्सवि जं न सुक्को तमच्छरियं वट्ठइ, अहो निक्कारणदुज्जणाण मीलणो, अहवा किमेएण ? जइ अत्थि मम पडुणो पभावो ता डज्झउ एएसिं पावाणं मंडवोत्ति भणिए निदद्धो जिणाणुरागिणा वाणमंतरेण, जिणिंदो पहाविओ कलंबुयाभिहाणसन्निवेशाभिमुहं, तत्थ य दो पच्च- न्तिया भायरो मेहो कालहत्थी य, सामित्तं कुणंति य, तस्मि पत्थावे कालहत्थी भडचडयरपरियरिओ करयलकलि- यविविहपहरणो चोराणुमगलगो जाव केत्तिथं पि भूभागं गच्छइ ताव पेच्छइ समुहमित्तं जिणं गोसालयं च, ते य दट्ठूण भणइ-के तुब्भे ? सामी तुसिणीए जावेइ, गोसालोऽवि केलिपियत्तणेण मोणमवलंबिऊण ठिओ, तओ सो रुद्धो निस्सट्ठं हणिऊण भयवंतं गोसालयं च बंधिऊण महल्लुगस्स भाउणो मेहस्स पेसेइ, सो य भयवंतं तहो- रूवं दट्ठूण समुट्ठिओ बंधणावणयणपुव्वयं पूएइ खामेइ य, तेण किर सामी कुंडगामे नयरे सिद्धत्थनरवइणो समीवसुवगएण दिट्ठो आसि, अह तेण सुक्को समाणो भयवं ओहीए इमं आभोएइ-अज्जवि बहुं कम्मं निज्जरियच्चं, तं च सहायविरहेण निज्जरित्तं न सक्किज्जइ, ता अत्थारियादिट्ठतो एत्थ जुत्तो, सो य एवं—

जह फलभरविणमंतगसंस्ससभारपूरियं छेत्तं । दट्ठूण तस्स सामी सिग्घं गहणं समीहंतो ॥ १ ॥

एगाणि चिय लुणिउं अपारयंतो परंपि बहुलंगं । समुचियमुल्लपयाणेण सस्सलुणणे पयट्ठइ ॥ २ ॥
तह मज्झवि चिरभवसंभवस्स कम्मस्स निज्जरणिमित्तं । जुज्झइ अणज्जणसंगएसु देसेसु विहरेउं ॥ ३ ॥
जं तत्थ अणज्जणो निक्कारणकोवसंगओ धणियं । उवसग्गणेण काही साहेज्जं कम्मनिज्जरणे ॥ ४ ॥
इय चित्तिऊण नाहो लाढाविसए मिलेच्छज्जणकिन्ने । गोसालेण समेओ अह निज्जाओ विजियमोहो ॥ ५ ॥
अह तत्थ गयं नाहं हेरियबुद्धीएँ केइ पाविट्ठा । निट्ठसुट्ठिपहारेहिं विद्वंति निरणुकपा ॥ ६ ॥
अन्ने असब्भवयणेहिं तज्जणं हीलणं च कुवंति । अइचंडुडसाणेहि पेसणेणं वंहंति परे ॥ ७ ॥
वंतरसुरऽसुरवइजक्खरक्खसपमुहंमि देवसंघाए । बहुमाणपरेऽवि जिणो एगागी सहइ उवसग्गे ॥ ८ ॥
धम्मायरिओ एसोत्ति मज्झ हिययंमि निहियपडिबंधो । पट्ठि ठिउ गोसालोऽवि सामिणो दुक्खमणुहवइ ॥ ९ ॥
अह तत्थ भूरितरकम्मनिज्जरं पाविऊण जिणनाहो । आरियखेत्ताभिमुहं आगच्छइ पुन्रवंछोव्व ॥ १० ॥
आरियखेत्ताभिमुहंमि तस्स भयवओ पुन्रकलसाभिहाणगामसन्निहिंमि बट्टमाणस्स दोन्नि चोरा लाढाविसयसुस-
णट्ठा नीहरंता अवसउणोत्तिकाऊण जमजीहासन्निहं खग्गं उगिरिऊण धाविथा संमुहं, एत्थंतरे पुरंदरो कहिं
जिणो वसइत्ति जाणणट्ठं जाव ओहिं पउजेइ ताव पेच्छइ थवेणासपत्ते आयड्डियकावाले चोरे वहनिमित्तं
जिणस्स उवट्ठिए, अह जायतिव्वकोवावेगेण तेण तहट्ठिएणैव समुचुंगगिरिसिहरदलणदुल्लिएण निहया कुल्लिसेण,

सामीवि गामाणुगामं विहरमाणो गओ भदिलनयरिं, तत्थ य वासारत्तो पंचमो समुवागओ, तो भयवं विचित्तास-
णाइं कुणमाणो चाउम्मासियं खमणमुवसंपज्जइ, कमेण समइक्कंते वासारत्ते बाहिं पारित्ता विहरमाणो पत्तो कय-
लिसमागमे गामे, तत्थ य तदिवसमत्थारियाभत्तं जहिच्छं भोयणं पहियकप्पडियाईण विपणाभिज्जइ, गोसालोऽवि तं
दट्ठण पविट्ठो, सामिं भणइ-एह एत्थ जामो, सिद्धत्थो भणइ-अज्ज अंतरं अम्हाणं, एवं निसामिय गओ गोसालो
अत्थारियाभत्तट्ठणे, उवविट्ठो भोयणत्थं, परिवेसिउमारद्धं जणेण, सो य बहुयासित्तणेण न पावइ कहिंपि तित्तिं,
ततो गामजणेण महल्लं भायणं दहिकल्लवियकूरस्स भरिऊण समप्पियं एथस्स, सोऽवि समग्गमवि तं भोत्तुमपारयंतो
भणइ-एत्तिं न नित्थरिही, तओ पाव ! दुक्कालकवल्लोव नियभोयणमाणंपि न याणसित्ति भणिऊण रोसेण
खित्तं तं भायणं से मत्थयंमि जणेण, पच्छा उयरं परामुसंतो गओ सो जहागयं ।

पुणोवि जंबूसंडं गाममुवागयस्स जयपहुणो तहेव सो अत्थारियाभत्तमल्लीणो खीरं कूरं च जेमिओ तहेव पज्जंतो
जणेण धरिसिओ य, अह सामी अहाणुपुवीए विहरमाणो तंवायनामसन्निवेसं गओ, तस्स बहिया ठिओ पडिमाए,
तत्थ य गामे बहुस्सुया बहुपरिवारा पासजिणसंताणवत्तिणो नंदिसेणा नाम थेरा गच्छचित्तं मोत्तण सुणिचंद-
सूरिणोव जिणकप्पपरिकम्मं करंति, गोसालो य पविट्ठो गाममज्झो, ते समणे सवत्थकंबलोवगरणे दट्ठण पुव्व-
साहूणं पिव खिसं काऊण सामिस्स सयासमेइ, ते य नंदिसेणा थेरा तीए चेव रयणीए चउक्के काउस्सग्गेण निच्चला

संठिया, पच्छा आरबिखयपुत्तेण इओ तओ परिभंतेण चोरोत्ति कलिऊण महल्लभल्लएण आहया, तव्वेळ चिय
ससुप्पण्णोहिनाणा मरिउं दिवमुवगया, अहा सन्निहिदेवनिवहेहि य तेसिं महिभं कीरमाणिं पासित्ता तं पएसं
गओ गोसालो, दिट्ठा य कालगया थेरा, तओ सुहपमुत्ता पडिस्सए गंतूण पडिबोहिया तेसिं सिस्सा, निब्बन्धि-
ऊण साहिओ थेरमरणवइयरो, गओ य सट्ठाणं, जयगुरुवि कुवियसन्निवेसमेइ, तत्थवि चारियत्तिकऊण गहिओ
दंडवासिएहिं, बंधणताडणपमुहकयत्थणाहिं पीडिउमारद्धो य ।

अह जिणनाहे तेहिं वहिज्जमाणे जणे समुल्लावो । जाओ जह देवजो अप्पडिमो रुवलच्छीए ॥ १ ॥
कह चारिओत्ति गहिओ किं सोऽवि कोल्ल एरिसं कम्मं । अहवा विचित्तरूवा कम्मगइ किं न संभवइ ? ॥ २ ॥
तहविहु इमं सुणिज्जइ जत्थागिति तत्थ निवसइ गुणोहो । ता नूण मूढयाए एए एयं कयत्थति ॥ ३ ॥
भोगोयभोगेउं साहूवि विरुवमत्थमायइ । जो वत्थपि न वंछइ स चारियत्तं कहं काही ? ॥ ४ ॥
इय लोयपवायं निमुणिऊण विजया तहा पगन्भा य । पासजिणसिस्सिणीओ तक्कालविमुक्कादिक्खाओ ॥ ५ ॥
निच्चाहत्थं परिवाइयाए वेसं समुवहंतीओ । मा वीरजिणो होहित्ति संसएणाउलमणाउ ॥ ६ ॥
गच्छंति तहिं दट्ठूण जिणवरं आयरेण वंदंति । पच्छाऽऽरबिखगपुरिसे तज्जति सुनिट्ठुरगिराए ॥ ७ ॥
रे रे किं न हयासा ! सिद्धत्थनरिंदनदणं एयं । धम्मवरचक्कवट्ठिं सुंचह ? सिग्घं च खामेह ॥ ८ ॥

जइ रे वइयरमेयं सुणइ सुरिंदो कंहपि ता नूणं । तुम्हे सरज्जरहुं किणसगेहंमि पेसेइ ॥ ९ ॥
 इय भणिए भयभीया भयवंतं ते णमंति विणयनया । खामेति सदुच्चरियं निडालतलघडियकरकमला ॥ १० ॥
 अह तेहिं परिमुक्को भयवं वेसालिनयरिमणुसरिउं । चलिओ गच्छंतस्स य जाया विचे दुवे मग्गा ॥ ११ ॥
 अह लाढाइसु देसेसु विविहतिवोवसगवग्गेणं । पडिभग्गो गोसालो सामिं विन्नविउमाढत्तो ॥ १२ ॥
 एक्कं पेच्छंतोऽविहु हणिज्जमाणं ममं न रक्खेसि । अन्नं तुहोवसग्गेण एइ मज्झंमि उवसग्गो ॥ १३ ॥
 अवरं पढमं लोगो मं चेव हणइ पेच्छओ तुम्हे । भोयणवित्तीवि महाकिलेसओ पइदिणं होइ ॥ १४ ॥
 माणावमाणसमचित्तवित्तिणो सुणणेसेवणपरस्स । नायगधम्मोऽवि न तुज्झ कोऽवि पेच्छज्जइ समीवे ॥ १५ ॥
 जेण-जो सेवगंमिमुहिए नो मुहिओ दुक्खिए य नो दुहिओ । सोक्खाभिकंखिणा नणु सेविज्जइ सोऽवि किं सामी? ॥ १६ ॥
 तम्हा अज्जवि चिरजीवियत्थिणो सोक्खकंखिरमणस्स । एत्तो तुह सेवाए देवज्जय ! मज्झ पज्जत्तं ॥ १७ ॥
 इय कहिए सिद्धत्थो वागरइ करेसु जं तुहावडइ । अम्हाण एरिसच्चिय ववहरणा किमिह तुह भणिमो ? ॥ १८ ॥
 एवं जाए परोप्परुद्धावे सामी वेसालीमग्गेण लग्गो, इयरोऽवि भगवओ निव्वट्टिऊण रायगिहमग्गेण पट्टिओ,
 अंतरा य करिहरिहरिणविरुयवग्गपमुहसत्तंसकुले गयणतलावलंबिदीहरतरुभीसणे निवडिओ महारण्णे, तत्थ य
 चोरवइणा एगंमि महातरुसिहरे पहियजणावलोयणनिमित्तं आरोहिओ नियपुरिसो, तेण य दिट्ठो सो सच्छं-

दलीलाए आगच्छमाणो, दट्टूण य साहिं चोरवहणो, जहा-एगो नगसमणो एइ, तेण भणियं-न हरियद्वमत्थित्ति एस न भाइ, अन्नहा कहं एत्थ अमाणुसाए अडवीए पविसेज्जा?, अहवा एस कोइ दुरायारो अम्हाणं एवंविह-रुवपडिवण्णो मण्णे परिभवं उप्पाएइ, ता एउ अक्खलियगईए जेण अवणेमो से दुव्विययं, एवं च जंपताण समीवमाणओ गोसालो, तओ तेहिं दूराओ चिय साहिलासं-एहि माउलग ! सागयं तुहत्ति भणिऊण गहिओ करेण, उड्ढाविओ पट्टिं, मरणभयविहुरेण य उड्ढिया अणेणं, तओ चोराहिवइणा पंचसयचोरसमेएण आरुहिऊण जहक्कं वाहिओ सुचिरेवं, छुहातणहापरिस्समभिहओ जया कट्ठगयजीओ जाओ ताहे मोत्तण जहाभिमयं गया तक्करा, गोसालोऽवि बाढं सुट्ठियसरीरो मोग्गरपहारजज्जरिउच्च कुलिसताडिउच्च विगययेयणो तरुसड्ढायाए सुहुत्तमेत्तं विगमिऊण सिसिरमारुएण उवलद्धचेयणो सोगं करेउमारद्धो, कहं?—

हा दुहु दुहु विहियं हियत्थिणा नट्टुद्विणा उ मए । जं सो सामी मुक्को अचित्तमाहप्पपडिहत्थो ॥ १ ॥

निदोसंमिवि नाहे कुविययेहिं मए हयासेण । जा किर कया अवण्णा सा संपइ निवड्डिया सीसे ॥ २ ॥

तस्स पभावेण पुरा अणेगठाणेसु दुट्ठसीलोऽवि । निदूढोऽहं संपइ तच्चिरे नत्थि मे जीयं ॥ ३ ॥

अहवा-सहसच्चिय सम्ममच्चित्तिऊण कीरंति जाइं कजाइं । अणत्थभोयणं पिव ताइं विरासे दुहावेत्ति ॥ ४ ॥

मण्णे इमिणच्चिय कइयेण मं छलिउमिच्छइ कयंतो । कहमन्नहा कुबुद्धी हवेज्ज एयारिसी मज्झ ॥ ५ ॥

ता किं एत्तो सरणं सरेमि ? किं वा गइं पयज्जासि ? । कस्स व पुरओ दुक्खं निवेइउं होमि निच्चित्तो ? ॥ ६ ॥

अहवा कयं विगप्पेहिं नत्थि मम तिहुयणेऽवि साहारो । तं चेव धम्मसूरिं मोत्तुं ता तं निहालेमि ॥ ७ ॥

इय निच्छिऊण कहमवि संसारं पिव सुभीसणसरणं । लंघित्ता गमाइसु हिंडइ सामिं निरूवित्तो ॥ ८ ॥

वेसालीए नयरीए, तत्थ य बहूणं कम्माराणं साहाराणए सालाए अहासन्निहियजणं अणुजाणावित्ता ठिओ पडि-
माए, अन्नया य एगो कम्मारागो रोगपीडिओ संतो छट्ठमि मासे पणुणसरीरो जाओ समाणो पसत्थे तिहिसुहुत्ते
मंगलतूरपुरस्सरं चंदणुच्चिन्नदेहो हरहासकासकुसुमपंडुरदुकूलनिवसणो सिरे निसियदोवक्खयसरिसवो सयणजणं
अणुगम्ममाणो तमेव कम्मारासालमागओ, पेच्छइ पुरट्ठियं उद्धट्ठाणं पडिवन्नं विगयवत्थं जिणवरं, तं च दट्ठण विगं-
भियपलयकोवानलो पढमं चिय अमंगलरूवो नगगओ दिट्ठो, ता अमंगलं एयस्स चेव उवणेमिति चित्तिऊण लोह-
घणं घेत्तुं धाविओ सामिवहणत्थं, एत्थंतरे सुराहिवइणा कहं नाहो विहरइत्ति जाणणनिमित्तं पउत्तो ओही, दिट्ठो
एयरूवो वइयरो, तओ नयणनिमेषमेत्तेण आगओ चलंतमणिकुंडलो आखंडलो तं पएसं, नियसत्तीए य निवाडिओ
घायगस्स चेव सिंरमि सो घणो, तग्घायाभिहओ य पत्तो पंचत्तमेसो, तओ हरी तिपयाहिणादाणपुव्वं पणमि-
ऊण जयगुरुं भणिउमाढत्तो—

निरुमकल्लाणकलावकारणं लोयलोयणाणंदं । तं पेच्छिऊण सामिय ! कहमिव पावा पउस्संति ? ॥ १ ॥
तिक्करणसुद्धीएविहु जणक्खं जो समीहए काउं । तस्स तुहोवरि दुट्ठा कह वा बुद्धी पयट्ठेज्जा ? ॥ २ ॥
किं अमयंपिव विसनिव्विसेसबुद्धीए कोऽवि बोहेज्जा । अहवा विमूढहिययाण होइ एसेव नूण मई ॥ ३ ॥
धुवमम्हाणं देवत्तदिव्वमाहण्यसंपया विहला । जा तुम्हावइविणिवारणेण नो होइ सकयत्था ॥ ४ ॥
निच्छउ सा पडुभत्तीवि कह व लक्खिज्जए सयणणेहिं । जाव न निच्चं पासट्ठिएहिं सेविज्जसे तंसि ॥ ५ ॥
इय सुरनाहो सुचिरं उवसग्गकरं जणं समत्तिं च । दूसित्ता सुदुहत्तो नमिउं अहंसणं पत्तो ॥ ६ ॥

सामीवि विहरमाणो गामागरसन्निवेशमागतो, तस्मि य विभेलगो नाम जक्खो, सो य पुव्वभवफासियसम्मत्त-
वसेण समुप्पणपरमपमोओ भयवओ पडिमापवणस्स अहिणवपरियायमंजरीपरिमलुम्मिलंतफुल्लयधुसराहिं
हरियंदणरसुम्मिस्सघुसिणघणसारविलेवणेण य पृथं परमाथरेणं निव्वत्तेइ, अह पुण को एस विभेलगजक्खो पुव्वभवे
आसि ? भण्णइ—

मगहाविसए सिरिपुरे नयरे महासेणो नाम नरवई, तस्स सिरि नाम भज्जा, तीसे य असेसविन्नाणकलकलाव-
कुसलो सुरसेणो नाम पुत्तो, सो य संपत्तजोव्वणोऽवि न खिवइ चक्खुं पवररूवासुवि रमणीसु, बडुं भणिज्जमा-
णोऽवि न पडिवज्जइ पाणिग्गहणं, किं तु सुणिवरोव्व संहरियवियारो चित्तपत्तच्छेयाइविणोदेहिं कालं वोलेइ, रायावि

एरिसं तं पेच्छिऊणमच्चंतमाउलमाणसो अणेगेसिं मंततंताइजाणगाणं एयवइयरं परिकहेइ, ते य करेति विधिं उवाए,
न य जायइ कहिं पि कुमारस्स भावपरावत्ती ।

अह अवरासंमी बाहिं नगरस्स करिवारूढो । सह परियेण राया नीहरिओ रायवाडीए ॥ १ ॥

चिविविहपएसेसु खणं परिभमिउं वाहिउं च करितुरगे । पच्छाहुत्तं इंतो पेच्छइ नयरीजणं सयलं ॥ २ ॥

रहतुरगजाणिसिविगापयप्पयारेण सिग्घवेगेण । कयसुंदरनेवत्थं वच्चंतं काणणाभिमुहं ॥ ३ ॥

तं पेच्छिऊण रणणा पयंपियं रे किमेस पउरजणो । परिमुक्कावरकज्जो वच्चइ एगेण मग्गेण ॥ ४ ॥

नो अज्ज जेण कस्सवि महूसवो देवयाविसेसस्स । नउपेच्छणयाइयं कोउगमवि दीसइ न किंपि ॥ ५ ॥

अह परियेणेण भणियं तुच्चं नो मुणह देव ! किं एयं । जं एत्थ समोसरिओ सूरी सूरप्पहो नाम ? ॥ ६ ॥

जो तीयाणागयवत्थुविसयसंदेहतिमिरहरेणं । पुहईए पत्तिकत्ती जहत्यनोमेण परमप्पा ॥ ७ ॥

जस्स पयपउमधूलीफासेणविवि विहरोगकलियावि । जायंति तक्खणं चिय मयरद्धयसन्निभा पुरिसा ॥ ८ ॥

जस्सेस दंसणेणवि समत्थत्तिथोहपूयसलिलं व । विद्धंसियपावरयं पाणिगणो गणइ अप्पाणं ॥ ९ ॥

जे पिउणोऽवि पणामं कुव्वंति न दुव्वहेण गवेण । जस्संहिनक्खकिरणा ताणवि सिरसेहरीभूया ॥ १० ॥

सूरिस्स तस्स पयवंदणत्थमेसो पुरीजणो जाइ । तुम्हं पि देव ! जुत्तं पयपंकयंदंसणमिमस्स ॥ ११ ॥

एवं सोचा विम्ववियमाणसो तर्कखणेन नरनाहो । उज्जाणस्साभिमुहं वच्चइ कोऊहलाउलिओ ॥ १२ ॥
ता दूराओच्चिय करिवराउ ओयरिय परमभत्तीए । वंदित्ता सुणिनाहं निसीयए धरणिवडुंभि ॥ १३ ॥
सूरीवि जोगगयं से पलोइउं दिव्वनाणनयणेण । गंधीराएँ गिराए एवं भणिउं सभाढत्तो ॥ १४ ॥
भो नरवर ! संसारे पढमं चिय दुल्लहो मणुयलंभो । तत्थवि य निरुवयरिया ङ्कलरूवारोग्गसाभग्गी ॥ १५ ॥
तीएवि पवरकरितुरयजोहरहनिवहभूरिभंडारं । भयवसनमंतसामंतमंडलं नरवइत्तंपि ॥ १६ ॥
तत्थवि सत्थत्थवियक्खणेहिं अच्चंतभवविरत्तेहिं । कुसलेहिं समं गोट्ठी दुल्लभा धेवमेत्तंपि ॥ १७ ॥
एयं च तए सयलं संपत्तं पुन्नपगरिसवसेणं । ता एत्तो सविसेसं पाणवहाईण वेरमणे ॥ १८ ॥
नयसेवणंमि सुगुणज्जणंमि करुणाय दुत्थियजणानं । धम्मत्थविरुद्धविवज्जणे य परलोयचिंताए ॥ १९ ॥
भंगुरभवभावविभावणंमि वेसइयसुहविरांगमि । तुम्हारिसेण नरवर ! पयट्ठियच्चं मणो निच्चं ॥ २० ॥
इय गुरुणा उवइट्ठे नरनाहो पुरजणो य हिट्ठमणो । सबं तहत्ति पडिसुणिय पडिओ न्थियगिहाभिमुहं ॥ २१ ॥
नवरं भूमीनाहो गंतुं थोवंतरं पडिनियत्तो । पुव्वभणियस्स पुत्तस्स वइयरं पुच्छिउं सहसा ॥ २२ ॥
ता एगंते ठाउं वंदिय सूरिं पयंपए एवं । भयवं ! अगोयरं नत्थि किंपि तुह नाणपसरस्स ॥ २३ ॥
ता कहसु मज्झ पुत्तो भणिज्जमाणोवि विविहहेज्जहिं । किं कारणं न वंछइ सोउं परिणयणनामंपि ? ॥ २४ ॥

किं भवभएण अहवा भूयपिसायाइछलणदोसेण । धाउविचज्जासेण व कूरगहपीडणेणं वा ? ॥ २५ ॥
 गुरुणा भणियं नरवर ! मा संकसु कारणाइं एयाइं । दढपुव्वभवावज्जियमेगं कम्मं विमोत्तण ॥ २६ ॥
 संजोगविओगुप्पायपलयसुहदुक्खपसुहकिरियासु । सत्तावत्थासुं पिय पभवइ कम्मं चिय जणस्स ॥ २७ ॥
 रणणा भणियं भयवं ! किं पुण एएण पुव्वजम्मंमि । पकयं कम्मं ? साहह महंतमिह कोउगं मज्झ ॥ २८ ॥
 सूरिणा पयंपियं-महाराय ! एस तुज्झ पुत्तो पुव्वभवे संखपुरंमि नयरे ख्वलायन्नसोहगाइगुणसंगओ चारुदत्तो नाम
 वणियसुओ आसि, तेणवि एगया निकाणकुवियाए भज्जाए दुव्वयणेहिं तज्जिएण सरोसं पयंपियं-आ पावे ! तहा कांह
 जहा सदुक्खं जीवसि, तीए वुत्तं-जं तुह पिउणो पडिहाइ तं करेज्जासि, तओ सो एगेण नम्मसचिवेण सद्धिं कन्नगंतर-
 परिणयणत्थं पयद्दो गंतुं दक्खिणदिसाए, अविलं वियपयाणएहिं वंचतो पवराभारयणनिहाणभूयाए पत्तो कंची-
 पुरीए, ताहिं च पविसमाणेण दिट्ठाइं परोप्परं कीलंताइं डिंभाइं, तेसिं च एगेण डिंभेण सुरहिमालइमाला अन्नस्स
 डिंसस्स कंठे पक्खिविउमारद्धा अन्नस्स निवडिया, तं च दट्ठुण चित्तिं चारुदत्तेण-अहो सोहणो सउणो, परं दूरं
 वगमो, जओ एसा कुसुममाला अन्नत्थ पक्खिविउमारद्धा अन्नत्थ निवडिया, अहवा किमणेण ?, चित्तिगतत्थं-
 पत्तीए सयं चेव होही एयावगमोत्ति विभाविऊण पविट्ठो सयणवग्गगेहंमि, कओ तेण ण्हाणविलेवणभोगणपया-
 णणसुहो से य वावारो, ठिओ य कइवय बासराइं, पत्थावे य सयणवग्गस्स सिट्ठमणेण निययपओयणं, पडि-

सिद्धो य बहुष्यारं तेण एसो । इओ य तत्थेव पुरे गंगदत्तसेट्ठिणो कन्नगा अण्डिमरूवजोव्वणाइगुणकलावकलिया
कणगवइसहीजणपरिवुडा उज्जाणमि कुसुमावचयं कुणंतीं सिरिदत्ताभिहाणं वणिज्जुवाणमवलोइऊण मयणुम्मु-
क्कसरविसरपहारजजरियसरीरा कहकहवि पडिनियत्तिऊण संगेहे निसट्ठं निवडिया सुहसेज्जाए, वाउलत्तं च से सुणि-
ऊण मेलिओ गेहजणो, पुट्टा सरीरवत्ता, अलद्धपडिवयणेण य तेण कओ तक्कालोचिओ विही, सो य जुयाणो तदं-
सणमेत्तेणवि हरियहियओ तक्कालवियंभमाणमयणजलजालाकलावकवलियसरीरो कर्हिपि रइं अयावमाणो तमेव
कुवल्यदलदीहरच्छिं चितंतो अच्छिउं पवत्तो, नवरं पुच्छिओ एसो एगाए पद्दाइगाए-वच्छ ! किमेवं सुन्नवक्खुक्खेवो
लक्खिज्जसित्ति, तेण भणियं-भयवइ ! किं कहेमि ? अबलाएवि हुंतीए विसट्ठकंदोददीहरच्छीए । हरियहिययस्स वट्ठइ
विहलं चिय मज्झ पुरिसत्तं ॥ १ ॥ एत्तिथमेत्तेणं चिय न ठिया सा छणमयंकविवसुही । अवहरिउमिच्छइ धुवं संपइ मह
जीवियंघंपि ॥ २ ॥ ता एव ठिए भयवइ ! तसुवायं किंपि लहु विचित्तसु । पसमियमणपरितावो जणेस जणो सुहं वसइ ॥ ३ ॥
पद्दाइगाए जंपियं-पुत्त ! फुडक्खरं साहेसु, तओ तेण कहिओ कणगवइदंसणवुत्तंतो, तीए भणियं-पुत्त ! वीसत्थो
होहि, तहा करेमि जहा तीए सह निरंतरं संपओगसुहमणुहवसि, तेण वुत्तं-जइ परं तुह पसाएणंति, भणियावसाणे
गया सा गंगदत्तसिद्धिणो गिहे, दिट्ठा य सदुक्खेण परियणेण संवाहिज्जमाणसरीरा कणगवइ, भणियं चऽणाए—
भो ! किं कारणं सरीरे विहुयत्तणमिमीए ? परियणेण भणियं-भयवइ ! न सुणेभो, तीए वुत्तं-जइ एवं ता अवसरह,

खणमेकं कुणह विजणं, न होइ सामन्नो एस दोसो, उवेहिजंतो जीवियणि हरेज्जा, एवमायन्निऊण दिन्नं से परि-
 यणेण आसणं, विजणं च कयं, तओ तीए सुचिरं अडुवियड्डाई पल्लविऊण महाया वित्थरेण कओ सुहाविन्नासो,
 पारद्धं मंतसुमरणं, कुसुमक्खयखेवेण य पूइयं जोगिणीचकं, मुक्को हुंकारो, अचंतसमीवे य ठाऊण महामंतोव सिट्ठो
 तस्स वणियस्स वुत्तंतो, कणगवईवि झत्ति तं निसामिऊण पच्चुज्जीवियव्व हरिसभरमुव्वहंतो भणिउं पवत्ता-भयवइ !
 एत्तो तुमं चेव पमाणं, तो तहा कंहपि कुणसु जह निरंतरो तेण सह संजोगो जायइ, तीए वुत्तं-एवं करेमि, अह
 दिन्नंतंबोला उट्टिया एसा, सिट्ठो य एस वइयरो तस्स जुवाणस्स, तेणावि पवरवत्थाईहिं उवचरिया एसा, अवर-
 वासेर य तेसिं सिट्ठमेयाए, जहा-अज्ज रयणीए जामदुगंमि अइक्कंतंमि सोहणो सुहुत्तो ता तुब्भेहिवि भगवथो कुसु-
 माउहस्स भवणे गंतव्वं, विवाहो कायव्वोत्ति, पडिवन्नं च तेहिं । इओ य सो चारुदत्तो सयणजणेण दारपरिग्गहाओ
 पडिसिद्धो समाणो असिद्धकज्जोत्ति सोगमुव्वहंतो तेण सहाइणा समं नीहरिऊण रयणीए सयणवराओ पसुत्तो तंमि
 चेव कुसुमाउहमंदिरंमि, खणं च समागयनिदो पडिबुद्धो समाणो जाव कुसुममालानिमित्तनिष्कलत्तणपमुहं पुवव-
 इयरं विचिंतंतो अच्छइ ताव गिहजणेण अविथाणिजंतो अविमुणियरयणिविभागा अपत्तेऽवि मज्झरत्ते परिणयणाणु-
 रूवोवगरणहत्थाए पवाइगाए अणुगया मंदमंदमुक्कचलणा समागया कणगवई, विरइया कुसुमाउहस्स पूया, पद्मा-
 इगाएवि भवणन्मंतरं करेण परामुसंतीए पत्तो चारुदत्तो, पुव्वभणियवणियसंकियाए सवणमूले ठाऊण भणिओ-अहो

किमेवं विलंबेसि ? अवक्कमइ एस पसत्थहत्थलग्गमुहुत्तो, एयं च सोच्चा चारुदत्तेण चित्तिंयं-मन्ने एसा वराई पुच्चदिन्नसंकेयपुरिसबुद्धीए मं समुल्लवइ, ता जावडज्जवि सो न आगच्छइ ताव करेमि कुसुममालासउणं जहत्ययंति चित्तिऊण झडत्ति उट्ठिओ एसो, नीओ तीए कुसुमाउहस्स पुरओ, पाडिओ तच्चरणेसु, गहाविओ कणगव-
ईए सभावपाडलं पाणिपल्लवं, कओ संखेवण सेसोऽवि तक्कालोचियविही, इय वित्ते विवाहे पणमिऊण कणगवईए विसज्जिया सट्ठाणं पच्चाइगा, भणिओ य चारुत्तो-अज्जउत्त ! उत्तमाणं एसो नो सम्मओ ववहारो, ता कइवय वासराइं जुज्जइ अन्नत्थ निवसिउं, पडिवन्नं चारुदत्तेण, निहारियाइं कुसुमाउहस्स मंदिराओ, नवरं चारुदत्तेण मयण-
पायपण्णकइयवेण पडिनियत्तिऊण तं नम्मसच्चिवं निब्बरपसुत्तं पवोहिऊण सिट्ठो परिणयणवुत्तंती, तेण भणियं-
चारुदत्त ! जइ एवं ता वच्चसु अलक्खियसरूवो चिय तीए सह तुमं, अहं पुण खणंतरं एत्थेव पडिवाल्लिऊण आगमि-
स्सामि, एवं भणिए चारुदत्तो तच्चयणं पडिवज्जिय तीए समं समयं नयरहुत्तं गंतुं पवत्तो । इओ य समइक्कंते रयणीए जामदुगे पत्थावं मुणिऊण सो वणिज्जुवाणो विवाहसामग्गिं घेत्तूण समागओ तंमि कुसुमाउहमंदिरं, मंदगिराए भणिउं पवत्तो य-भो कणगवइ ! एहि संपयं आगओऽहं वट्ठाभित्ति, सो य नम्मसच्चिवो केलीकिलत्तणेण इत्थी-
भासाए निहुयं पडिवयणं दाऊण ठिओ तदभिमुहो, तेणावि रभसभरवक्खित्तचित्तणेण अविभाविऊण परमत्थं स्थित्ता से कंठमि कुसुममाला, कंकरुणबंधपुरस्सरं च कओ पाणिगहो, एत्थंतरे य कहकहत्ति पहसंतेण भणियं तेण-भो

भो महाणुभाव ! किं अत्थि एस बवहारो तुह नयरीए जं पुरिसो पुरिसेण पुरिणिज्झइ, सब्बहा असुयमदिट्ठं च बो-
ज्जमिणंति जंपिऊण पलाणो वेगेणं, इयरोऽवि विलक्खमाणो एवं परिभाविउमाढत्तो—

हे हियय ! हयास तुमं एवंविहवंचणाए जोगंसि । जं कूडकवडभरियासु पावग ! रमणीसु पत्तिथसि ॥ १ ॥

किं एत्तिथंपि न मुणसि जं एयाओ विचित्तसीलाओ । नियकुसलयाए सहसा सुगुरुमवि विप्पयारंति ॥ २ ॥

तथा—एगेण समं पणयप्पहाणवयणेहिं बहुप्पयंपंति । साणंदच्चक्खुविक्खेवमेत्तओ अक्खिवंति परं ॥ ३ ॥

अन्नेण समं कीलंति निब्भरं हरियहियमविरामं । अवरस्स य संकयं लीलाए च्चिय पयच्छंति ॥ ४ ॥

इय मूढ ! हियय ! मा तम्म निष्फलं मुणिय वत्थुपरमत्थं । अभिरमसु जहादिट्ठसु संपयं निययकजेसु ॥ ५ ॥

एवं अत्ताणं संठविऊणागओ जहागयं । सो य नम्मसच्चिवो समुगगच्छंतंमि तरणिमंडले मिलिओ चारुदत्तस्स,
तेणावि से बाहुमि कंकणं बद्धमवलोइऊण जंपियं—अरे णवपरिणीओव लक्खिज्जसि, ता दंसेहि निययभज्जं, ईसिं
पहसिऊण भणियं तेण—पियमित्ति ! तुह पसाएण अहं सयं चिय भज्जा वट्ठामि, चारुदत्तेण कहियं—कहं चिय ? तओ
तेण सिट्ठो सबो पुव्वुत्तंतो, इमं च सोच्चा मुणियजहड्डिवइयरा परिचत्तलजं हसिउं पवत्ता कणायवई, दिट्ठरूपाइ—
सया य अणुरत्ता चारुदत्तंमि ।

अह परोप्पररूढगाढपेम्माणि ताणि पत्ताणि संखपुरं, पविट्ठाणि य निययगिहं, सुहसागरावगाढाणि य वोलेति

कालं, सा य पुव्वमज्जा असमंजसाइं पलवतीं निद्धाडाविद्या कणगवईए, तप्पच्चइयं च वद्धं भोगंतराइयं कम्ममणाए । काल-
क्केमेण य मरिऊण उववन्ना सा तिरिएसु, चारुदत्तोऽवि तप्परिणयणोवट्ठियवियविसंवायणपरिणामज्जियनिविडभोगं-
तरायपाहिज्जो कालं काऊण पत्तो तिरियत्तणं । एवं च सुचिरं तीए विण्णउत्तो संसारं परियट्ठिऊण सुचरियसुहकम्म-
वसेण भो महाराय ! तुह मंदिरंमि जाओ पुत्तत्तणेणं, सावसेसभोगंतरायकम्मवसओ य पुव्वभवमज्जमपेच्छतो न वंछइ
अन्नं परिणेउं, एवं सूरिणा कहिए सूरसेणकुमारवुत्तं राया विद्धियमणो गओ नयरिं । सूरिंवि अन्नत्थ विहरिओ ।

सा य कणगवई चिरभवममणेण जायकम्मलाघवा कुसुमत्थलनयरे जियसत्तुरन्नो उववन्ना धूयत्तणेणं, उचिय-
समए कयं रयणावलित्ति नामं, सा य संपन्नजोवणावि तेण पुव्वभवपियपरूढपणयवसेण सुरूवपि रायसुयनिवहमण-
मिलसंती कालं वोलेइ । अन्नया य तं सूरसेणकुमारं रामापरमुहं सोचा नियधूयं च पुरिसपउसिणिं मुणिऊण चित्तियं
रन्ना-जइ पुण एयाणं परोप्परं विहिणा संजोगो काउं वंछिओ वट्ठइ ता दंसावेमि एयाण परोप्परं पडिरूवाइं, एवंपि
कयाइ समीहियसिद्धी जाएज्जित्ति विभाविऊण लिहाविद्या रयणावलीरूवाणुगा चित्तपट्ठिया, समप्पिया य दूतस्स,
मणिओ य एसो-अरे वच्चसु तुमं महासेणरणो समीवे, केहेसु य जहा-अहं जियसत्तुरणा तुह सुयस्स निय-
धूयादाणत्थं पेसिओऽम्हित्ति, पत्थावे य चित्तवट्ठियं दंसिऊण कुमारपडिरूवं च गहाय एजाहित्ति, गओ य एसो,
दिट्ठो राया, पत्थावे य कहियं पओयणं, राइणावि मणिंयं-भो मुणिंयं मए एयं, केवलं दूरट्ठियाए रायसुयाए रुव-

मेपेच्छमाणो कहमिहट्टिओ कुमारो तीए पणयमुघेहजा ?, सा वा अविण्णायकुमारसरूवा सहसच्चिय परिणाविया पच्छा कहं न संतप्पेज्जा ?, ता न जुत्तमेयं । जेण—

सुनिरूविऊण कीरंति जाइं कज्जाइं निउणबुद्धीए । दिवाओ विहड्डियाणिवि न ताईं लोए हसिज्जंति ॥ १ ॥

एवं भणिए रत्ता तेण उवणीया चित्तफ़लहिगा, राइणावि समप्पाविया सा कुमारस्स, सो य पुव्वभवपेम्मवसेण तदवलोयणे समुण्णणहरिसो चिरलद्धावसरकुसुमसररोसनिस्सट्ठाकुठुस्सहविसिहकीलिओघ निचलसरीरो परिचत्त-वाचारंतरो थुलमुत्ताहलविब्भमसेयविंदुजालभासुरियभालवट्टो जाओत्ति, तं च तहाविहं दट्टुण सुणियमणोपयथा-वेण पासट्टियजेण सिट्ठं नरनाहस्स, समुप्पण्णो से परिओसो, कहियं चउणेण दूयस्स-अरे जाओ तीसे उवरि कुमारस्स पडिबंधो, नवरं रायमुया एयंमि केरिसित्ति सुणियवमियाणिं । जओ—

एगंमि नेहनिब्भरमणंमि अन्नमि नेहरहियंमि । श्रीपुरिसाणं भोगा विडंबणामेत्तथा होंति ॥ १ ॥

अणुवक्खरियं अकुडिलं परोप्परं छिड्डपेच्छणविमुक्कं । उभओ चिय जं तुळं पेम्मं सलहिज्जइ जंयंमि ॥ ३ ॥

दूएण भणियं-देव ! सच्चमेयं, ता समप्पेह मम कुमारस्स पडिरूयं रायमुयाए उवदंसणत्थं, राइणा कहियं-जुत्तमेयं, तओ चित्तफ़लगे आलिहाविऊण कुमाररूयं गओ दूओ, पत्तो कालक्केभेण जियसत्तुनरिंदसपीवं, पण-मियपायवीढो उवविट्ठो सन्निहियधरणिवट्ठे, पुट्ठो राइणा, जहावुत्तं सिट्ठं च अणेण, तदवसाणे य आकड्डिऊण दंसिया

चित्तपट्टिगा, अवलोइया य सायरं रत्ना, चिरं निवृत्तिऊण पेसिया रयणावलीए, सावि तेण पुव्वभवपरुण्डपेम्मवसेण तं पलोइऊण मयणमल्लिसल्लियहियया समुच्छलियसेयविंदुपिसुणियवियारावि कुमारीजणोचियं लज्जं पमोत्तुमपार-यंती नियगविगारगोवणत्थं आवद्धकवडभिउडिभीसणं वयणं काऊण भणिउमारद्धा-अहो केणोवणीया एसा चित्त-पट्टिगा?, चेडीहिं भणियं-सामिणि ! ताएण, (तीए भणियं-किमट्ट?, चेडीहिं) भणियं-तुम्ह दंसणनिमित्तं, तीए भणियं-किं ममं दंसियाए?, काऽहमेत्थ?, गुरुज्जणायत्तो कण्णगालोयो हवइ, सच्छंदचारित्तणं तु परमं कुलदूसणं, ता अलमेयाए इति भणिऊण पविट्ठा भवणभंतरे, निसण्णा सुहसेज्जाए, तग्गया य चिरकाललद्धावसेणं व सव्वंग गहिया रणरणएणं, धाईएव्व अणुसरिया उक्कंठाए, चित्तालिहिइयकुमारावल्लोयणविरामपरिकोविण्णं व बाढमालीढा परित्तोवेण, तओ तत्थट्ठाउमपारयंती कइवयपहाणचेडीपरिबुडा गया पमयवणं, तहिं च अणवरयवहंतजलजंतगंभीरयो-सघणविबभमुभंतपहिट्ठनीलकंठमणहारावाडंवरसु सुरहिमालइकमलपरिमलसुंदरदियंतरेसु तुच्छा खणमेकं कयलील-याहरेसु, भणिया य चेडीओ-हलाओ ! वाहरेह सरसनलिणनालाइं विरएह सेज्जं, बाढं दुस्सहा अज्ज मज्झंदिणदिणयरते-यत्तच्छी, जं भट्टिदारिया आणवेइत्ति भणिऊण समासणसरसीओ आणीयाइं नलिणीनालाइं कया सेज्जा निवन्ना रयणा-वली, समारद्धो अन्नोहिं विमलयरसघणसारपमुहेहिं वत्थूहिं सिसिरोवयारो, न य मणांगं पिजाया से संतावहाणी । अवि य-जह जह कीरइ तीसे सीयलवत्थूहिं तणुपडीयारो । तह तह मयणहुयासो हवइ हयासो सहस्सगुणो ॥ १ ॥

किं च—उवत्तइ परियत्तइ दीहं नीससइ जंपइ न किंपि । थोयजलमज्जलीणा भीणच्च नरेसरस्स सुया ॥ २ ॥

एवंविहं च उट्ठितं देहदाहं पलोइऊण पुच्छिया चेडीहिं—सामिणि ! किं कारणं जमेवं अज्ज वाढं वाउलसरीरा उवलक्खिजसि ?, किमपत्थभोगणवियारो उयाहु पित्तदोसो अन्नं वा कारणंतरं ?, सच्चहा कहेउ भगवती, जेण सा-
हिज्जइ वेज्जस्स, कीरइ समुच्चियमेसहाइसामग्गी, अणुवेहणिज्जा खलु रोगा सत्तुणो य, रयणावलीए भणियं—न मुणेमि किंपि संपइ विसेसकारणं, चेडीहिं भणियं—सामिणि ! जण्यभिइं तुमए सा चित्तपट्टिगा पलोइया तवेलंचिय जाओ कित्तियओवि सरीरस्स अन्नहा भावो इइ अम्हे वितक्कमो, निच्छियं पुण सरीरधारणं तुमं जाणेसि । तओ लक्खिय-
मेयाहिंति विगप्पिऊण भणियमणाए—हला ! तुभे जाणह, तओ ताहिं चित्तियं—जाव अज्जवि विरेहेण न वाढं वाहिज्जइ इमा ताव निवेएमो रत्तो, जेण विसमा कज्जगई निट्ठरा सरा कुलुमाउहस्स सिरीसकुसुमकोमला सरीर-
सिरी इमीए, न जाणिज्जइ किंपि हवइत्ति निच्छिऊण कहाविओ एस वइयरो राइणो, तेणावि आहूया रयणावली, सपणयं भणिया य—पुत्ति ! सूरसेणकुमारोण तुमं परिणाविउमम्हे वंछामो, जुत्तमेयं ?, तीए भणियं—ताओ जाणह, तओ लक्खिऊण तदभिप्पायं राइणा भणिया नियपहाणपुरिसा—अरे गच्छह महासेणनरवइणो सयासे, अणेह
सुरसेणकुमारं, जेण विवाहो लहुं कीरइ, जं देवो आणवेइत्ति भणिऊण निग्गया पहाणपुरिसा, गंतुमारद्धा, कमेण य पत्ता सिरिपुरं, दिट्ठो राया, निवेइयं पओयणं, नरिंदेणवि पवरमंतिसामंतचाउरंगसेणाणुगओ रयणावलीविवाहनि-

मित्तं पेसिओ सूरसेणकुमारो, अचिलंविषयपाणगेहिं पत्तो सिरिथलनयरसमीवं, निवेइयं जियसत्तुनरिंदत्स कुमारगमणं,
परितुट्ठो एसो, दावियं पियनिवेयगाण पारिओसियं, समाइट्ठा य अणेण नियपुरिसा-अरे मोयोवेह बंधणवद्धं जणं
दवावेह अविसेसेण महादाणं सोहावेह रायमगे कारावेह हट्ठसोहाओ पयट्ठेह महूसवं सज्जेह मंगलतूरं वायोवेह
हरिसुक्करिसकारए जमलसंखे, ढावेह करणुं जेण निगच्छामो कुमाराम्भिसुहं, संपाडियं इमं रायसासणं पुरिसेहिं,
निगगओ राया, दिट्ठो यऽणेण लच्छीसमागमसमूजो चेव महमहणो कुमारो सूरसेणो, दूराचिय पणमिओ कुमारोणं,
गाढमालिगिऊण अभिनंदिओ राइणा, पवेसिओ महाविभूईए पुरं, दिट्ठो उचियठाणे जन्नावासओ, अन्नपि संपा-
डियं तक्कालोचियं कायवं, कमेण समागओ विवाहदिवसो, तओ कयमज्जणो गहियसुंदराभरणो पवरचारुवारणाधिरूढो
संखकाहलागब्भगंभीरतूरनिगवोसपूरियदिसामंडलो गहियकणयदंडधयवड्डुग्घायनरनिवहाणुगओ मंगलपहाणगाय-
तगायणसणाहेपेच्छणयसंकुलो पइन्नवरवासधूलिधूसरियमणहरुत्तालनचंतवेसविलओ कुमारो सूरसेणोवि विवाहम-
डवमागओ, कयं से सासुयाए उचियकरणिज्जं, पेसिओ कोउयहरयं, दिट्ठा अणेण पसाहिथा विविहवन्नएहिं विभू-
सियंगमंगा पवररयणालंकारेहिं नियंसिया चिम्मलखोमजुयलयंति चच्चिया हरिचंदणेणं पडिनद्धा सुरहिसियकुसुमदा-
मेहिं, तं च दट्ठूण पुवभवदढपेम्मदोसेण सहसा विर्यंमिओ कुमारस्स अणोरपारो पेसपसरो, चितियं चऽणेण-अहो नि-
रुवमा रुवसंपया अहो अखंडियपसरं सरोरलावणं, असोरेवि संसारे एरिसाइं कणणगारयणाइं दीसंतिचि पमोयमुव-

हंतो काराविओ पुंखणगाइकिंचं, सविसेसं, च पूइया देवगुरुओ, पारद्धो परमविभूइए हत्थगहो, जाओ राइणो परि-
तोसो, सम्माणिया सामंता, कयत्थीकया तक्कुयजणा, अभिनंदिया नायरया, भमियाइं चत्तारिवि मंडलाइं, चित्तो
विवाहमहूसवो, अनन्नसरिसं च रयणावलीए सह विसयसुहमणुहवंतस्स समइकंता कहवि वासरा । अन्नदियहं य
नरवइमाणुच्छिऊण तीए समेओ नियनयराभिमुहं गंतुं पयट्ठो कुमारो, वंचंतस्स य अंतरा समागओ वसंतसमओ ।
सो य पुण केरिसो ?—उद्दामरामाजणमणवियंभंतपंचबाणो महुपरहुयरववित्तासियपहियहियओ कुसुमभरंदविहु-
पाणपरवसिलीसुहइंकारसुहरो पण्णुलसहयारेणुधूलीधूसरियसयलदिसामंडलो कुरवयकुसुमामोयहरियमहुयरिय-
गणो सेवणसुहपसुरिहम्मंतपामरो जणचचरीतूरमहुरनिग्घोसो तरुसंडमंडवावद्धहिंडोल्याउलो वीयरगोव अहसुचं-
याणुगओ लच्छीनाहोव छप्पयरिंछोलिसामलच्छओ माणससरोव पाडलापसूयसुंदरो तरुणीजणोच्च ससिणिहिलोह-
तिलयपसाहिओ सुसुणिणुव असोगाणुगओ, अवि य—

गिमहुणहतावियाइं पल्लपंङ्कुल्लियंगमंगाइं । गिरिक्खडा इव नज्जंति जत्थ वणमहिसजूहाइं ॥ १ ॥
कुडयसिलंधसिरासाइविविहतरकुसुमंगंधरमणिज्जो । छज्जइ गंधियहट्ठो व जत्थ वरकाणणाभोगो ॥ २ ॥
रेहंति कुसुमसंचयसमोत्थया जत्थ किंसुयसमूहा । तक्कालपहियपण्णुट्ठहिययरुहिरोवलित्तव ॥ ३ ॥
जत्थ य परहूयकलरवगीयनिनायं रणंतअलितूरं । पवणेरियतरुपल्लववाहुलयं नचइव वणं ॥ ४ ॥

जन्मि य पियंति तरुणा दइयासुहकमललद्रुहवासं । मइरं मयरद्धयजीवणेक्कपरमोसहिरसं व ॥ ५ ॥
वेइल्लमउलदसणा कुवल्लयनयणा मरालवसदा । उगगायइव्व जहियं उउलच्छी कमलवयणेण ॥ ६ ॥
सुमरियपणइणिवरगं पहियसमूहं विलुत्तयेयन्नं । वउल्लण कुणइ गंधो विसपुप्फाणं व पसरतो ॥ ७ ॥
जन्मि य उच्चा तरुणो वियसियसियकुसुमगुच्छसंछन्नो । तारानियराउल्लगयणदेसलच्छि विडंबन्ति ॥ ८ ॥

एवं गुणाभिरामे य पत्ते वसंतसमए सो सूरसेणकुमारो तक्कालदेसंतरागवणियजणोवणीयपवतुरंगमाभिरूढो
विसेसुज्जलनेवत्थेण परिगओ जणेण पयद्वो काणसिरिं पेच्छउं, गच्छंतस्स य विवसीभूओ तुरंगमो विवरीयसिक्ख-
त्तेणेण य जहा जहा वेगपडिसल्लणत्थं रज्जुमायडुइ कुमारो तहा तहा अपत्थसेवाए उइन्नरोगोव्व वेगेण सो गंतुमा-
रद्धो, दूरपरिसुक्कपरियणो य दुक्कयकम्मुणव्व निवाडिओ कुमारो एगागी महाडवीए घोडएण, परिस्समकिलंतो य
मओ एसो, कुमारोवि तण्हाभि भूयो इओ तओ सलिलमन्नेसिउं पवत्तो, अइगंभीरयाए अडवीए कहिंचि तमपाव-
माणो निसन्नो सिसिरतरुच्छायाए, चिंतिउमारद्धो य-अहो कुडिला कज्जपरिणइ अहो सच्छंदाभिरइ दुल्लिओ दइवो,
जं सव्वहा अपरिचिंतियंपि कज्जं एवमुवदंसेइ, अहवा किमणेण?, सत्तथणो चेव सप्पुरिसजणो होहिति, एवं च
विगण्यमाणो जाव खणंतरं विगमेइ ताव समागओ एगो पुल्लिदगो गहियकोदंडो करकलियवाणो तं पएसं, सपणयं
पुच्छिओ य अणेणं, जहा-भइ ! को एसण्यएसो ? कत्थ वा सलिललाभोत्ति ? तेण भणियं-कायंबरीए महाडवीए

मञ्जुदेसो एस, सलिलं पुण एत्तो वणसंडाओ केत्तिएणवि भूभागेणं वट्टइ, केवलं दुट्टसत्ताउलत्तणेणं न सुहगेज्झं, भो
महाणुभाव! जइ पिवासिओ ता एहि जेण सयमेव दंसेमि, एवमायन्निज्जण पडिवन्नं कुमारेणं, पयट्ठो य तयभिमुहं,
तओ पुल्लिदगेण चडावियचावगुणारोवियारोवेण देसिज्जमाणमग्गो पत्तो सरोवरं, कयं जलावगाहणं, अवणीया
तण्हा, अहो णिक्कारणोवयारी एसोत्ति चिंतिज्जण कुमारेण दिन्नं से नामंकिंयं मुहारयणं, परिहिंयं च अणेण अंगु-
लीए, नीओ य तेण नियगुहाए, काराविओ कयलीफलाइणा पाणवित्तिं, अह परिणयंमि वासरे कुमारेण भणिओ
पुल्लिदगो-अहो बाढं कोऊहलं मे बहुअच्छरियनिलयभूया य एसा संभाविज्जइ महाडवी, अहो दंसेसु किंपि अच्छ-
रियनिलयभूयं इमीए पएसंतरं, पुल्लिदगेण भणियं-जइ एवं ता एहि दंसेमि, तओ गया एगं वणगहणंतरं, तं च
केरिसं?—एगत्य रत्तचंदणालिहियमंडलगं निहितरत्तकणवीरकुसुमदामंदतुरं अन्नत्थ मंतवाइजणहुणिज्जमाणगुगुलुगु-
लिकांगंधुद्धयाभिरामं एगत्य मिलियधाउवाइनिवहधमिज्जंतधाउपाहाणं अन्नत्थ विविहोसहीरससाहिज्जमाणभूहयं
एगत्य पउमासणनिविट्ठजोगिजणपारद्धमणपरिकम्मणं, एवंविहं च तं दट्ठण जायपरमविम्वहएण पुच्छिओ सो कुमा-
रेण-भइ! किं नाम एयस्स पएसस्स?, तेण भणियं-सिद्धिखेत्तंति, कुमारेण चितियं-अहो नामेणवि मुणिज्जइ एयस्स
महिमासारो, ता निच्छियं तं नत्थि अच्छरियं जमिह न होही, अहो एयं सट्ठाणे पेसिज्जण असंभंतो पलोएमि
निहुयदिट्ठीएत्ति विगण्णिज्जण भणिओ अणेण पुल्लिदो, जहा-भइ! गच्छसु तुमं गुहाए, अहंपि खणमेकं परिभमिज्जण

विगयकोऊहलो पडिनियत्तिस्सामि, तेण भणियं-अज्ज! न जुज्जइ निसाए एत्थ निमंसं पि वसिउं, जओ इह पाउब्भ-
वंति पिसाया मिलति वेयालवंदाइं समुच्छलंति घोरफक्कारसदा जायंति छिहपवेसा, अओ अलमेत्थावत्थाणेण, कुमा-
रेण भणियं-जइ एवं ता तुमं इहेव निलुक्को पडिवाडेसु खणंतरं जाव अहं संखेवेण पेक्खिउमागच्छामि, तेण भणियं-जं
भे रोयइत्ति, परं सिग्घं एज्जाहि जेण समइक्कंता जाममेत्ता रयणी, एवंति पडियज्जिऊण कुमारो अइयओ वणगहणब्भं-
तरं, पज्जलंतदिबोसहीपहापसारेण य इओ तओ पलोयंतो पत्तो दूरविभागं, अह एगत्थ माहवीलयाहरे जालाउलं
पज्जलंतं जलणकुंडं पेच्छिऊण सकारणमेयंति जायबुद्धी पहाविओ वेगेण तयभिमुहं, जाव केत्तियं पि भूभागं वचइ
ताव निसुणइ साहगविहिबुक्कमंतसाहगं पडुच्च सकोवं चेडयसुरं समुल्लवंतं, कहं तं?—

रे मुद्ध! मरिउकामोऽसि नूण जं मंतसाहणं कुणसि । अविगण्णिऊण पुब्बं सबुद्धिविभवस्स माहणं ॥ १ ॥
किं कोऽवि तए दिट्ठो निसुओ वा साहगो महियलंमि । जो साहणंमि चुक्को मुक्को हि मए जमेणं व ॥ २ ॥
जह इयरदेवमंताण सुमरणं कुणसि तं जहिच्छाए । तह मज्झवि कुणमाणो न भवसि तं निच्छियं एत्तो ॥ ३ ॥
कयमणपरिकम्मोहिं मुणिनाहेहिवि दुसाहणिज्जोऽहं । पायडियकूडकवडो न चेडओ किं सुओ तुमए? ॥ ४ ॥
इमं च भणिज्जमाणं कुमारेण निसुणिऊण चित्तिं-नूणं कोइ महाणुभावो साहणविहिपरिभट्ठो एस चेडएण
निब्भच्छिऊण हणिज्जइ [लग्गो], ता जुत्तं मम एयपरित्ताणंति विगण्णिऊण दाहिणकरणे नीलमणिञ्चायं छुरियं

धरंतो धाविओ तम्मगेण, दिट्ठो यडणेण तवेळं चिय भो भो सुरासुरा परित्तायह परित्तायहत्ति भणमानो
 चलणेसु घेत्तण चेडगेण उप्पाडिओ सिलायले पच्छाडणनिमित्तं विज्जासाहगो, तओ देवेषु सत्थं न कमइत्ति चिं-
 तिऊण मुक्कपहरणो निविडिओ कुमारो चेडयसुरस्स चलणेसु, विण्णविउमाढत्तो-देव ! पसीयह पसीयह, परिचयह
 कोवं, मम जीविण रक्खह एयं, को तुम्ह इमिणा सह कोवो ? , न हि सुकुद्धोऽवि पंचाणणो पहरइ गोसाउयसि,
 किं तुम्हेवि अहमजणोचियं कम्मं काउमरिहह ? , इमं च सोचा ईसिं जायपसमो चेडगो समुल्लविउमारद्धो-भो
 कुमार ! अविलंबणिज्जोऽसि तुमं, तहावि निमुणेषु एयावराहं, इमिणा हि मम मंतराहणपरेणावि न संमं वट्टिज्जइ,
 कुमारेण भणियं-महावराहकारीवि ममं जीवियमोलेण मोत्तवो, मा कुणसु विहलं देवदंसण प्पवायं, चेडगेण भणियं-
 सुयणु ! किं तुमए निरवराहेण विणासिएण ? , एसो चेव विणासणिज्जो आसि, परं तुह महाणुभावयाहयहियएण
 पसाउत्तिकाऊण एस परिचत्तोत्ति भणिऊण अक्खयसरीरं चेव मंतसाहगं मोत्तण अंसणमुवगओ चेडओ, सोऽपि
 मरणभयागयमुच्छाभिभूयचेयणो अहसन्निहियमंतसाहणत्थोवणीयहरिचंदणरसेण समासासिओ कुमारेण, युट्ठत्त-
 मेत्तेण य उवलद्धचेयणो पच्चुजीवियं व अप्पाणं परिकप्पितो मंदमंदमवलोइउं पयत्तो, खणंतरे य समुल्लविज्जो कुमा-
 रेण-भइ ! निब्भओ निरुद्धिगो अच्छसु, दूरमवक्तो तुह कयंतो, केहसु परमत्थं, को तुमं ? किं नामधेओ ? कुओ
 वा आगओ ? किमियं सुहपसुत्तकेसरिकंङ्कयणं विणासपज्जवसाणं मंतसाहणं समारद्धं ? कहां वा विहडियं ? , जीव-

दाइति पेमसुब्रह्तेण भणियमणेण—

सुंदर ! विज्ञाहरो कणयचूडयनामोऽहं गयणवल्लहपुराजो चेडगसाहणं काउमिहागहो म्हि, मंतं च परावत्तयंतस्स मे कहवि भवियव्वयावसेण सुण्णणिहियस्सवि विसंखुलियमेक्कमक्खरं, एत्तियमेत्तावराहसंभवेऽवि परिक्खिविण्ण उण्या-
डिओ सिलायले निवाडणत्थमणेणं, तक्कालं भयविहुरेण य न सरियाणि तणुरक्खामंतक्खराणि, तयणंतरं च न मुणेमि किंपि जायं, एत्तियमेत्तं ईसिं जाणामि जं तुमए भणियं-मम जीवियमोळेणऽवि मोत्तवो एसत्ति, कुमा-
रेण भणियं-भद ! के अम्हे ? , नियमुक्कियदुक्कियाणि चेव सबत्थ सुहदुक्खेलु पभवति जीवाण, कणयचूडेण भणियं-
को सहेहज्ज अहिसमाणरूवाइं सुकयदुक्कयाइं । तुमए सजीयदाणेण रक्खमाणेण मह जीयं ॥ १ ॥

कहमिव बहुयणा नो वसुंधरा ? जत्थ तुमह सारिच्छा । परहियकरणेक्कपरा अज्जवि दीसंति सण्णुरिसा ॥ २ ॥

जाय चिय नीसेसावि मज्झ नूणं समीहिया सिद्धी । दुल्लभंदसणो दिट्ठिगोयरं जं गओ तंसि ॥ ३ ॥

अन्नं च-तुह सच्चरिएणवि नामगोत्तमुक्कित्थियं जइवि भुवणे । तहवि सविससजाणणकएण तम्मइ गहं हिययं ॥४॥

तओ कुमारेण सुणिऊण तदभिप्पायं साहिओ दुट्ठुरागवहरणपज्जवसाणो सवो नियवइयरो, विज्ञाहरेण भणियं-
कुमार ! किमिह मे जीवियप्पयाणत्थमेव तुमह आगमणं?, किं वा कारणंपि आसि ?, कुमारेण भणियं-कोज्जहलेण,
न पुण अन्नं कारणंतरं, विज्ञाहरेण भणियं-जइ एवं ता कुणह ममाणुगहंति एह वेयहुपव्वयं, पेच्छइ तत्थ अणे-

गच्छरियाई, अणुगिणहह नियंदसनदाणेण मम कुंडुवयंति, अचंतकोऊहलावलोयणसयणहेण पडिवन्नं च कुमारेण ।
 तयणंतरं सो कुमारं घेत्तूण उप्पइओ तिमिरुप्पीलसामलं गयणयलं, निमसमेत्तेण पत्तो वेयहगिरिं, पविट्ठो सभवणं,
 कया कुमारस्स महई भोयणाइपडिवत्ती ॥ सो य पुल्लंदगो तत्थ जाममेत्तं पडिवाल्लिऊण जाव कुमारो नागओ
 ताव वणनिगुंजेसु सुचिरं पलोइऊण दुहत्तो सगुहाए गओ ॥ कुमारोऽवि कणगचूडेण समेओ वेयहगिरिपरिसरेसु
 सुरहिपारियायतरुंजरीगंधुदुरेसु विसमगिरितडनिवडंतनिज्झरझंकारमणहरेसु सचिलासकिन्नरमिहुणसंगीयसहसुंदरे-
 सु निंकुंजदेसोवसोहिएसु विहरिउमारद्धो, अह परिब्भमेत्तेण कोऊहलवियसियच्छिणा कुमारेण दिट्ठो एगत्थ
 सिलायले एक्कचलणावट्ठभनियमियसयलंगभारो उट्ठसमुक्खित्तोभयभुयाजुयलो ज्ञाणवसनिमिसियनिच्चलपयंडभायंडमं-
 डलुम्मुहलोयणप्पसरो निप्पकंपत्तणतुलियकुलाचलो पडिमासंठिओ एगो चारणसमणो, तं च दट्ठूण अंतो वियंमि-
 यउद्दामहरिसवसपयंटतपुलयपडलेण कुमारेण भणियो कणगचूडो-भद्द ! एहि एयस्स महासुणिस्स वंदणेण पक्ख-
 लियकल्लिमलं अत्ताणं केरमोत्ति, विज्जाहरेण संलत्तं-एवं होउ, तओ गया सुणिसमीवे, पणमिओ सविणयं, सुणिणावि
 जोगगयं नाऊण पारियं काउस्सग्गं, उवविट्ठो समुच्चियट्ठाणे, अज्जवि मूलगुणट्ठाणवत्तिओ एए इति परिभाविऊण
 भणिया साहुणा-भो महाणुभावा ! एयस्स निस्सारसंसारस्स सारमेत्तिं जं वीयरगेहिं करुणापरियरियंतकरणेहिं
 देसिओ सबजत्तेण कीरइ धम्मो, तस्स पुण मूलं अहिंसा, सा य मज्झमंसनिसिभत्तपरिहारेण जहुत्ता संभवइ, तत्थ

मज्जं ताव विसिट्ठजणपेयवज्झं, अमञ्जरसंपि व परिहरणिज्जं दूरओ, न मणसावि तप्पिवासा कायधा, एयं हि पिज्जमाणं निट्ठोवेइ दविणं अणवेइ विसिट्ठत्तणं जणेइ उम्मायं संपाडेइ विहलत्तणं दावेइ कज्जहाणिं पयडेइ अत्त-
मम्माणि लज्जावेइ मित्ताइं कलुसेइ बुद्धिगसरं विनडेइ कुलजाइओ भंजावेइ निम्ममं सीलं उप्पाएइ वेरपरंपराओ भंसेइ धम्मकम्माओ संजोएइ अकुलीणजणमेत्ताए अभिगमावेइ अगम्माणि भक्खावेइ अभक्खाणि उवहसा-
वेइ गुरुजणं मइलावेइ सयणवग्गं बोलावेइ अबोल्लणिज्जाणि, तहा इमं हि मज्जपाणं मूलं असुइत्तणस्स अवभासो
वरियाणं पडिबोहो कोहाइणं संकेयट्ठाणं पराभवाणं अट्ठाणीमंडवो अणत्थाणं । अविय-

पच्चक्खं पि य दावेइ कलुसभावं जमेत्थ जंतूणं । मज्जस्स तस्स का होज्ज चंगिमा पावमूलस्स ? ॥ १ ॥

वरमुग्गतालुडुभक्खणेण अत्ता विणासमुवणीओ । मा मज्जपाणवत्थाए थेवमित्तं पि संठविओ ॥ २ ॥

एत्तो चिय लोइयसाहुणोऽवि मइरं मुयंति दूरेण । वेयपुराणेषुपिवि निसिद्धमेअं जओ भणियं ॥ ३ ॥

गौडी पैथी तथा माध्वी, विज्ञेया त्रिविधा सुरा । यथैवैका तथा सर्वा, न पातव्या द्विजोत्तमैः ॥ ४ ॥

नारीपुरुषयोर्हन्ता, कन्यादूषकमघपौ । एते पातकिनस्तूक्ताः, पञ्चमस्तैः सहाचरन् ॥ ५ ॥

तथा-सुरां पीत्वा तु यो मोहादशिवर्णां सुरां पिबेत् । तथा सकाये निर्दग्धे, मुच्यते किल्बिषात्ततः ॥ ६ ॥

यस्य कायगतं ब्रह्म, मधेन प्लाव्यते सकृत् । तस्य व्यपैति ब्राह्मण्यं, शूद्रत्वं च निगच्छति ॥ ७ ॥

इय भो देवाणुपिया ! मज्जं पाउं न जुज्झइ कयावि । सग्गापवग्गसंगमसुहत्थिणो सव्वकालपि ॥ ८ ॥

जहा य किर विसिट्ठाणं मज्जमपेज्जं एवं मंसमवि अभक्खणिज्जं । एयं हि—

अवचओ सुहज्झाणस्स पयारिसो अट्ठरूढाणं उवसंहारो संपाइमसत्ताणं उप्पत्तिपयं किमियाणं आयंतियजीवा-
(ववा)ओ सव्वावत्थासु हेऊ विसेसरसगिद्धीए कारणं पारद्धिकम्मस्स निमित्तं महारोगायकाणं बीभच्छं पेच्छगच्छीणं
पउणपयवी दुग्गईए जलंजलिदाणं सुहाणुबंधसुहाणुभावस्स, ता को नाम सयन्नो एवंविहदोसनिहाणमिणं मणसादि
समभिलसेज्जा !, अवि य—

धम्मं सलाहणिज्जं परपीडावज्जणं पयत्तेणं । तं पुण मंसामीणं न घडइ गयणारविंदव्व ॥ १ ॥

मंसमसारयस्स सरीरयस्स परिपोसणत्थिणो मणुया । भुंजंति परमवेसुं तिकखदुक्खाइं अगणिंता ॥ २ ॥

को नाम किर सयन्नो मोहोत्तियतुच्छसोकखकजेण । अस्संखभवपरंपरदुहरिंछोलिं पवट्टेजा ॥ ३ ॥

लोइयसत्थेवि इमं बहुप्पयोरेण भणिइनिवहेण । पयडं चिय पडिसिद्धं अविकद्धं जेण भणियमिणं ॥ ४ ॥

हिंसाप्रवर्धकं मांसं, अधर्मस्य च वर्धनम् । दुःखस्योत्पादकं मांसं, तस्मान्मांसं न भक्षयेत् ॥ ५ ॥

स्वमांसं परमांसेन, यो वर्धयितुमिच्छति । उद्धिन्नं लभते वासं, यत्र तत्रोपजायते ॥ ६ ॥

दीक्षितो ब्रह्मचारी वा, यो हि मांसं प्रभक्षयेत् । व्यक्तं स नरकं गच्छेदधर्मः पापपौरुषः ॥ ७ ॥

आकाशगामिनो विप्राः, पतिता मांसभक्षणात् । विप्राणां पतनं दृष्ट्वा, तस्मान्मांसं न भक्षयेत् ॥ ८ ॥
शुक्रशोणितसंभूतं, यो मांसं खादते नरः । जलेन कुरुते शौचं, हंसते तं हि देवताः ॥ ९ ॥
श्रूयन्ते यानि तीर्थानि, त्रिषु लोकेषु भारत ! । तेषु प्राप्नोति स स्नानं, यो मांसं नैव भक्षयेत् ॥ १० ॥
नाश्विना न च सूर्येण, न जलेनापि मानव ! । मांसस्य भक्षणे शुद्धिः, एष धर्मो युधिष्ठिर ! ॥ ११ ॥
किं लिङ्गेष्वग्रहणैः ? किं शिरस्तुंडमुण्डनैः ? । यदि खादन्ति मासानि, सर्वमेव निरर्थकम् ॥ १२ ॥
यथा वनगजः स्नातो, निर्मले सलिलार्णवे । रजसा गुण्डते गात्रं, तद्वन्मांसस्य भक्षणम् ॥ १३ ॥
प्रभासं पुष्करं गङ्गा, कुरुक्षेत्रं सरस्वती । देविका चन्द्रभागा च, सिन्धुश्चैव महानदी ॥ १४ ॥
मलया यमुना चैव, नैमिषं च गया तथा । सरयू कौशिकं चैव, लौहित्यं च महानदम् ॥ १५ ॥
एतैस्तीर्थैर्महर्द्धिक्यैः, कुर्याच्चैवामिषेचनम् । अभक्षणं च मांसस्य, न च तुल्यं युधिष्ठिर ! ॥ १६ ॥
यो दद्यात्काञ्चनं मेरुं, कृत्स्नां चैव वसुन्धराम् । अभक्षणं च मांसस्य, न च तुल्यं युधिष्ठिर ! ॥ १७ ॥
हिरण्यदानं गोदानं भूसिदानं तथैव च अभ० ॥ १८ ॥ कपिलानां सहस्रं तु मासे मांसं गवां ददे । अभ० ॥ १९ ॥
इय लोह्यसत्थमुवि परिहरिज्जत्तणेन निदिष्टुं । मंसं महाविसंपिब किं पुन लोउत्तरे समए ? ॥ २० ॥
जह मज्जमंसविरई बहुदोसत्तेण होइ कायवा । तह रयणिभोयणंपिबि परिहरणिज्जं सयन्नोहिं ॥ २१ ॥

जइविहु फासुगमन्नं कुंथूपणगा तहावि दुण्यस्सा । पच्चक्खनाणिणोवि हु राईभत्तं परिहरंति ॥ २२ ॥
जइविहु पीथीलगाई दीसंति पईवजोइउज्जोए । तहवि खलु अणाइन्नं मूलवयविराहणा जेण ॥ २३ ॥
इय भो देवाणुपिया ! संसारतरुस्स रूढकंदसमं । मज्जं मंसं निसिभोयणं च नाउं परिच्चयह ॥ २४ ॥
किं वा मूढा अच्छह नो पेच्छह छिड्डपाणिपुडपडियं । सलिलंपिव विगलंतं पइसमयं चैव नियजीयं ॥ २५ ॥
केत्तियमेत्तं एयं ? अज्जवि संसारचारगविरत्ता । रज्जंपि विवज्जित्ता पव्वज्जं संपवज्जंति ॥ २६ ॥

एवं च सुणिणा कहिए कणगचूडो समुट्टिऊण परमं भवविरागमुद्धहतो निवडिओ सुणिचलणेसु, भणिउमाढत्तो य-
भयवं ! जाव कुमारं संठावेमि ताव तुम्ह समीवे पव्वज्जापडिवत्तीए कोरमि सफलं नियजीवियं, सुणिणा भणियं-एसो
च्चिय परिच्छेओ भवपासस्स, अओ जुज्जइ तुम्हारिसाण काउमेयं । एत्थंतरे कुमारोऽवि जायसंवेगो पणामं काऊण
भणइ-भयवं ! ममंपि मज्जमंसनिमिभत्ताणं आमरणंतं देह पच्चक्खाणं, साहुणावि नाऊण जोगगं दिन्नं से पच्च-
क्खाणं, तओ गुरुं वंदिऊण गया सगिहं, पवराभरणाइदाणेण सम्मानिऊण भणिओ कुमारो कणयचूडेण, जहा-
कुमार ! भवविरत्तोऽमिह, संपयं दिक्खागहणेण विगयपावं अत्ताणं करिस्सामि, अओ तुमं साहेसु जं मए कायवं,
कुमारेण भणियं-किमहं साहेमि ?, दुण्परिहारो तुमं, केवलं चिरकालविमुक्को गुरुज्जणो मम दंसणसुओ कहंपि वहु-

इत्ति बाढं परितप्पइ मणो, कणयचूडेण भणियं-जइ एवं ता वच्चासो तत्थ, पडिबन्नं कुमारेण, तओ विमाणमारु-
हिऊण दोवि गंतुं पयद्दा ।

इओ य तं सेन्नं दुट्टुत्तरगावहरियं कुमारं सुचिरं अरन्ने पलोइऊण कहवि अपत्तवत्तं निराणंदं निरुळाहं गयं
सिरिपुरं नयरं, निवेइया नरवइस्स कुमारवत्ता, तओ राया अवहरियसन्नस्सो इव संतावमुव्हंतो परिचत्तपाणभो-
यणो चाउरंगिणीए सेणाए अणुगम्ममाणो अंतउरेण दुस्सहदुक्खकंतहिययाए रयणावलीए य समेओ निगओ
नयरओ कुमारन्नेसणनिमित्तं, पत्तो य कमेण तं चैव कायंबरीए मज्झदेसं, पेसिया कुमारवलोयणत्थं सवत्थ
पुरिसा, समारद्धा य निरुविउं, अब्बया इओ तओ परिममंतोहं दिट्ठो सो पुलिंदगो, पलोइयं च से अंगुलीए कुमा-
रनामंकिंयं मुद्दारयणं, तं च दट्ठूण जइ पुण अणेण विणासिओ होज्ज कुमारोत्ति कुविकप्पकलुसियहियएहिं उव-
णीओ सो नराहिवस्स, तेणावि अणाउलहियएण पुच्छिओ एसो-अहो मुद्ध! मह अवितहं सोहेसु कत्तो एस मुद्दा-
रयणलाभो? कत्थ वा कुमारोत्ति भणिए सो पुलिंदगो अदिट्ठपुव्वं हरिकरिरहमड्डुम्भंडं रायलच्छं पेच्छिऊण जाय-
संखोभो अड्ढविअड्डु खलंतक्खरं कुमारवत्तं कहिउमारद्धो, तओ राइणा भणियं-अरे अवरोधरविरोहिणा वयणसं-
दब्भेण मुणिज्जइ जहा कुमारो अणेण विणासिओत्ति, कहमन्नहा मुद्दारयणलाभो हवेज्जा?, न हि जीवंतस्स भुय-
गाहिवस्स फणारयणं केणावि घेत्तुं पारिजइ?, एवं ठिएवि पंचरत्तं जाव सुसंगोविधं करेह एयं, ण मुणिज्जइ कोऽवि

परमन्थो, गंभीराइं विहिविलसियाइंति भणिए पुरिसेहिं निगडिओ पुल्लो, राया हि संदेहदोलाहिरुठो अंसुजल-
 पुन्नलोयणो मन्नुभरं रोविउं पवत्तो, अह पसरिया कुमारपंचत्तगमणवत्ता खंधावारे, दूमिया सामंता, विञ्छायत्तं
 पत्तो पायक्कजणो, विमणदुम्मणीभूया मंतिणो, हाहारवग्गं रोविउमारद्धमंतेउरं, चिरं अक्कदिऊण सोगभरभारियंगा
 निस्सट्ठं निवडिया धरणिवट्ठे रयणावली, समासासिया कहकहवि चेडीचक्कवाल्लेण, एत्थंतेरं जाया रयणी, अज्जण-
 गिरिविन्ममाइं वियंभियाइं तिमिरपडलाइं, एवं च कमेण पत्ते मज्झरत्तसमए रयणावलीए भणिया निययधावी-
 अम्मो ! किं एत्तिएवि गए धरियव्वं नियजीवियं मए सहिअवा हीणजणफेसणा दट्ठवाइं पियगेहे सामलाइं सयणाण
 वयणाइं सुणियवाइं अकारणकुवियखलुद्वयणाइं, ता सावियासि तं मए नियजीविएण, मा अन्नहा काहिसि, होसु
 संपथं सहायणी, पज्जत्तं पेसुब्भवसुहेण जस्स एरिसा गई ॥ अविय—

किं पागतुरुस्स फलं उवमुजंत्तं जणेइ पज्जंते । दुक्खं पियजोगो पुण पढमारंभेऽवि विद्वइ ॥ १ ॥

करिकन्नविज्जुसुरचावचावल्लेणं विणिम्मियं मन्ने । पियजणसंगमसोक्खं नूनं विहिणा हयासेण ॥ २ ॥

तेणेव पंडिया परिहरंति पेम्मं अहिं बिलगयं व । जाणंति जेण पियविप्पओगविसवेगमाहणं ॥ ३ ॥

अंबधाईए भणियं—पुत्ति ! कस्स कज्जस्स ममं सहायणीं पत्थेसि ? , तीए भणियं—अम्मो ! दुस्सहविरहुहयासण-
 परितावियस्स नियजीवियस्स परिचागकएणं, धावीए भणियं—वच्छे ! मा ऊसुगा होसु, अज्जवि न मुणिज्जइ

कोऽवि निच्छओ, पच्छावि सुलभो चैव मरणाभिलासो, तओ रयणावलीए सुणिऊण तीसे निसेहपर वयणं कंय मोणं, खणंतरेण य दिट्ठिं से वंचिऊण परियेण असुणिजमाणा निग्गया आवासाओ, पविट्ठा दूरदेसगरिसंठियंमि वणनिगुंजे, जोडियपाणिसंपुडा य भणिउं पवत्ता—

भो काणणेदेवीओ ! वयणं मे सुणह मंदपुत्ताए । को अन्नो इह ठाणे ? साहिज्जइ जस्स नियकज्जं ॥ १ ॥
एसाऽहं दुहेहउं विरुवलक्खणचएण निम्मविद्या । परिणयणुत्तरकालंपि जीए जाओ इमो विरहो ॥ २ ॥
एत्तो तुज्झ समक्खं अत्ताणं तरुवरंमि लंबित्ता । मोएमि अजसकालुस्सकलुसिएणं किमेएण ! ॥ ३ ॥
सिरिपुरायतणुब्भव ! तुमंपि दूरट्ठिओऽवि लक्खिज्जा । जह तीए वराईए मम विरहे उज्झओ अप्पा ॥ ४ ॥
इय भणिऊण संजमिओ केसपासो निविडमापीडिया नियंसणगंठी उत्तरिखवत्थेण रइओ तरुसाहाए पासओ आवद्धो नियकंधराए, सुक्को अप्पा, एत्थंतरे सेज्जाए तमपेच्छमाणी अणुमग्गेण धाविया अंबघाई, पत्ता कम्मधम्म-संजोएण तं पएसं, चंदजोणहाए य लंबमाणा दिट्ठा रयणावली, तओ हाहारवं कुणमाणी तक्कालिययं पडियारं काउयस-मत्था लग्गा वाहरिउं—भो भो सुरवितरखयरा ! परित्तायह परित्तायह, इमंमि इत्थीरयणंमि देह पाणभिकखं, छिन्नह पासगं, मा अंगीकरेह उवेहाजणियं पावपंकति । इओ य कणगचूडो सुरसेणकुमारो य पत्ता तं पएसं, सुणिग्या एसा उग्घोसणा, तओ गयणाओ ओयरिऊण छिन्नो से पासओ संवाहियं अंगं, पुच्छिया य अणेहिं-सुयणु ! को

एरिसदुरज्झवसायस्स कारणं जाओ?, रयणावलीए चिरं निस्ससिऊण भणियं-दुक्खिकम्माइं, कुमारणे भणियं-त-
 हावि विसेसेण साहेसु, जइ एवं ता सुरसेणकुमारस्स महासेणतणयस्स विरहोत्ति, तओ पच्चभिन्नाया कुमारणे,
 भणिया य-जइ एवं ता पज्जत्तं एत्तो दुरज्झवसाणेणंति बुत्ते जायपच्चभिन्नाणा लज्जावसनिमित्तलोयणा तुण्हक्का
 ठिया रयणावली, सुणियपरमत्थाए 'सागयं सागयं चिरागयकुमारस्स'त्ति जंपियं धावीए, निवेइओ नरिंदस्सागमण-
 बुत्तंतो य । एत्थंतरे विन्नत्तं विज्जाहरेण-कुमार ! पडिपुन्नमणोरहा तुब्भे, ता अणुजाणह ममं सट्ठाणगमणाय संपयं,
 अह तद्विओगकायरमणेण कहकहवि विसज्जिओ सो कुमारणे, गयमेत्तेण य तेण पडिवन्ना भावसारं चारणसुणिस-
 मीचे पवज्जा । कुमारोऽवि रयणावलीए समेओ गओ खंधावारं, मिलिओ राइणो, सिट्ठो नियवुत्तंतो, जायं वट्ठावणयं,
 मुक्को सम्माणिऊण सो पुल्लंदगो, पडिनियत्तो य राया सनयराभिमुहं, पत्तो य कालक्कमेणं, समप्पिओ कुमारस्स
 सुंदरो पासाओ, तत्थ ठिओ य गमेइ वासरे विविहकीलाहिं । अन्नया य सो पंचत्तमुवागओ महसेणराया, कयाइं
 कुमारणे मयगकिच्चाइं, पडिवणं च रज्जं, परिवालेइ रायनीतीए पुहइं । अन्नया य सो कणयचूडो सुमुणियसुणिधम्मो
 अहिगयसुत्तथो विहरमाणो समागओ बाहिरुज्जाणे, विन्नायतदागमणो वंदणत्थमागओ सुरसेणनरिंदो, वंदिओ
 अणेण परमभत्तीए, दिन्नासीसो य निविट्ठो गुरुपायमूले, कहिओ साहुणा जिणप्पणीयधम्मो, पडिबुद्धा बहव
 पाणिणो, धम्मकहावसाणे य सुणिणा पुच्छिओ राया-सम्मं निव्वहंति चिरगहिया मज्जमंसनिसिभोयणवेरमणरूढा

अभिगमहन्ति, रायणा भणियंन्वाढं निव्वहन्ति, तथो पुणो समणेण भणिओ राया, जहा-पडिवज्जसु असेसदोसरहियं
जिणनाहं देवबुद्धीए, अंगीकोरसु सम्मत्तं, परिचयसु कुचासणासमुत्थं मिच्छत्तं, एत्तियमेत्तणवि कएण परमत्थेण कयं
चिय परभवहियं, रायणा भणियं-एवमेवं, पडिवन्नो मए एत्तो जिणधम्मो, जाया तुम्हाणुभावेण मम मिच्छत्तचा-
यबुद्धी, सब्बहा कयत्थीकओ तुम्भेहन्ति अभिन्नदिऊण य गओ जहागयं, मुणीवि कण्णसमत्तीए विहरिओ अन्नत्थ ।
अन्नया राया तहाविहसमुप्पन्नसरीरेयणो अविमुद्धञ्चवसाणवसदूसियसम्मत्तो कालं काऊण उववन्नो जक्खत्तणेण ।
एसा विभेलगजक्खस्स मलुप्पत्ती ॥

अह महावीरजिणवरो तस्स विभेलगजक्खस्स उज्जाणाओ निक्खमिच्चा सालिसीसयनागस्स गामस्स बाहिर-
ज्जाणे संठिओ पडिमाए, तम्मि य समए माहमासो वट्ठइ, तत्थ कडपूथणा नाम चाणमंतरी, सा य सामिस्स तिवि-
ट्ठुभवे वट्टमाणस्स विजयवई नाम अंतोरिया आसि, तथा य न सम्मं पडियरियत्ति परं पओसमुव्वहंती मया समाणी
संसारपरिभमणवसमासाइमाणुसत्ता बालतवायारेण पाविद्यवंतरीभवा पडिमोवगयस्स जिणस्स पुव्वेरेण तेयम-
सहमाणा तावसीरूवं विउव्वइ, तथो वक्कलनियंसणा लंबंतगुरुजडाभारहिमसीयलसल्लेण सवं सरीरं उल्लिज्ज
सामिस्स उवरिं ठिया, अंगाणि धुणिउं पयत्ता, तयणंतरं च—

हिमकणनिवहुम्मिस्सा अइसिसिरसमीरेण परिगहिया । लगन्ति जिणं सल्लविट्ठो वाणनिवहव्व ॥ १ ॥

पइसमयं विहडियजडकडप्पक्कलगलंतजलकणिया । अंतो विसंति तणुणो जयगुरुणो दुस्सहा धणियं ॥ २ ॥

पयईए चिय माहुब्भवस्स सीयस्स दुस्सहं रूवं । किं पुण परोट्टुचेट्टवंतरीसत्तिपग्गहियं ॥ ३ ॥

पागयनरस्स तारिससीउब्भववेयणाविणिहयस्स । फुट्टइ देहं निरुक्कमाउत्ता ण उण पहुणो ॥ ४ ॥

इय चउजामं रयणिं जिणस्स सीओवसग्गसहिरस्स । सविसेसं संलगं धम्मज्झाणं भवुम्महणं ॥ ५ ॥

तओ तदहियासेणेण जायमि विसेसकम्मक्खए विंथंभियं ओहिनाणं, सबं च लोगं पासिउमारद्धो, पुंघं पुणं गब्भसंभवाओ आरब्भ सुरभवकालमित्तो ओही आसि, एक्कारसय अंगाणि सुयसंपयं होत्था, अह कडपूयणा निण-
कंपं भयवंतं वियाणिऊण रयणिविराममि पराजिया समाणा उवसंता कयपच्छावाया य भत्तीए पूयं काऊण गया
सट्टाणं । सामीवि तत्तो निक्खमित्ता भदियं नाम नयरिं छट्टं वासावासं काउमुवागओ, गोसालगोडवि मिलिओ छट्ट-
मासाओ, सामिं दट्ठूण जायहरिसो नमिऊण पायपंकयं पमोयमुवगओ समाणो पुव्वपवाहेण पज्जुवासिउं पवत्तो,
सामीवि तत्थ विचित्ताभिग्गहसणाहं चाउम्मासखमणं काऊण वासारत्तपज्जंते बाहिं पारेत्ता गोसालेण सभेओ
मगहाविसए अट्ट मासे उउवट्ठे निरुवसग्गं विहरइ ।

सत्तमं च वासारत्तं काउकामो आलहियं नाम नयरिं एइ । तत्थवि चाउम्मासखमणाणंतरं बाहिं पारेत्ता कंछा-
गनामसन्निवेशमुवागच्छइ, तहिं च उउंगसिहरस्स महुमहणभवणस्स समुचिए एग्गेसे ठिओ काउस्सग्गेण सामी,

गोसालोऽवि जीयरक्खं व जिणनाहमाहणमुव्वहतो चिरकालं संलीणयापीडिओ अविगणियपडिमओ दूरपरिचत्तल-
ज्जावल्लोवो भंडोव्व महुमहपडिमासुहे अहिट्ठाणं दाऊण ठिओ । एत्थंतरे पुप्फपडलगहत्यो धूवक्कडुल्लुयसमेओ
समागओ देवच्चगो, दूराउ चिय तहट्ठियं दट्ठूण गोसालयं सविम्भयं चित्तियमणेण—

बोलिणो बहुकालो देवमिमं मज्झ पूयमाणस्स । न य दिट्ठो कोइ मए कुणमाणो एरिसं भत्तिं ॥ १ ॥
ता किं होज्ज पिसाओ कोऽवि इमो अहव गहपरिगहिओ । धाउविवज्जासवसेण किं नु एवं ठिओ कोऽवि ? ॥ २ ॥
इय भावैतो जाहे भवणब्भंतस्सुवेइ ताहे सो । समणोत्ति नगभावेण लक्खिओ तेण छेएण ॥ ३ ॥
परिचित्तियं चऽणेणं जइ दंडमहं इमस्स काहामि । तो जाणिस्सइ लोगो जह दुट्ठो धम्मिओ एस ॥ ४ ॥
तम्हा गामस्स परिक्खेमि सोऽविय सयंपि दट्ठूण । एयस्सुचियं काही किं मम इमिणा अणत्थेण ? ॥ ५ ॥
इय चित्तिऊण सिट्ठं जणस्स तेणावि तत्थ गंतूण । तह चैव ठिओ दिट्ठो गोसालो वासुदेवपुरो ॥ ६ ॥
कुविएण जट्टिमुट्ठीहिं कुट्ठिओ गहिल्लओत्ति काऊण । सुक्को चिरेण कहवि हु जणेण सो जजरसरीरो ॥ ७ ॥
सुक्कमि तंमि सामी महणनामंमि सन्निवेसंमि । गंतुं बलदेवगिहे फासुयदेसे ठिओ पडिमं ॥ ८ ॥
दुस्सिक्खियत्तणेणं गोसालो पुण मुगुंदपडिमाए । लिंगं दाऊण मुहे अपमत्तो अच्छइ सुणिघ ॥ ९ ॥
तत्थवि पुव्वपवाहेण गामलोणेण जायकोवेणं । सुचिरं निस्सट्ठं ताडिऊण तो तंमि परिचत्ते ॥ १० ॥

पढु सालगाभिहाणे गामे तत्तो विणिक्खमेऊणं । सालिवणंमि जिणिंदो धम्मज्झाणं समारुहइ ॥ ११ ॥
 सालज्जानामेणं वंतरदेवी अकारणं कुविया । कुणइ विविहोवसग्गे तत्थेव ठियस्स जयगुरुणो ॥ १२ ॥
 सयमेव परिस्संता जोहे उवसग्गणेण सा पावा । ताहे पूयं काउं जहागयं पडिनियत्तत्ति ॥ १३ ॥
 उवसग्गकारगच्चिय परिस्सममुव्वहंति चोज्जमिणं । कीरंति जस्स सो पुण कत्थवि नो गणइ जयनाहो ॥ १४ ॥
 अह भुवणतिलयभूए सुविभत्तचउक्कचचरावसहे । लोहगलंमि नयरे सामी पत्तो विहरमाणो ॥ १५ ॥
 तत्थ य राया दरियारिसूरनिहलणदंतरासिसिहो । जियसत्तू नामेणं भुवणपसिद्धो समिद्धो य ॥ १६ ॥
 तइया तस्स विरोहो जाओ पच्चंतराइणा सद्धिं । ताहे अपुव्वपुरिसो पेहिज्जइ चारपुरिसिंहं ॥ १७ ॥
 दिट्ठो य तेहिं साभिय पुट्ठोऽवि न देइ जाव पडिवयणं । रिउहेरिउत्ति कलिऊण ताव गहिओ विमूढेहिं ॥ १८ ॥
 अत्थाणमंडवत्थस्स राइणो तक्खणं समुवणीओ । अह पुव्वविणिद्धिदो उण्णल्लो पेच्छउं सामीं ॥ १९ ॥
 हरिसुक्कारिससमुट्ठियरोमंचो वंदिऊण भत्तीए । भणइ नरिंदं एसो न होइ भो चारिओ किं तु ॥ २० ॥
 सो एस जेण तइया आवरिसं कणगवारिधारहिं । निव्ववियमत्थि जायगकुट्टुवमिच्छाइरित्ताहिं ॥ २१ ॥
 सिरिधम्मचक्कवट्ठी सिद्धत्थमहानरिंदकुलक्केऊ । पव्वज्जं पडिवन्नो सयमेव जिणो महावीरो ॥ २२ ॥
 किं वा सुरक्खयरनरिंदविंदविज्जमाणचरणस्स । एयस्स पुरा तुमए निसामिया नेव कित्तीवि ? ॥ २३ ॥

जइ मम वक्कं नो सहेहेह ता उयह निउणदिट्ठीए । एयस्स चक्कगयकुलिसकलसकमलंकिए पाणी ॥ २४ ॥

इय लद्धनिच्छएणं जियसत्तुनराहिवेण सविसेसं । सक्कारिऊण सुक्को गोसालेणं सह जिणिंदो ॥ २५ ॥

तथो पुरिमतालंमि नयरे गओ भयवं, ठिओ काउस्सगणं, तत्थ य नयरे धणउव्व समिद्धिसंगओ तोणीरुव्व मग्गणगणसाहारो मुणिव्व उभयलोगहियपवित्तिपरो पयइसरलो पयइपियंवओ पयइदक्खिन्नो निम्मलगुणहरिणवग्गुरासमो वग्गुरो नाम सेट्ठी, निरुव्वचरियपेसमायणं भद्दा नाम से भारिया, सा य वंझा, वहुण देवयाणं उवाइयसयाणि विविहोसहसयपाणाणि य पुत्तयनिमित्तेण काऊण परिस्संतत्ति । अन्नया सेट्ठिणा सह सिविगासमारूढा समयणजेण परियरिया विविहभक्खभोगणसमिद्धरसवइसणाहसूयारसमेया महया विच्छइणं निग्गया उज्जाणजत्ताए, पत्ता नाणाविहविहगकुलकलरवमणहरं विचित्तत्तरसुराहिक्कुसुमपरिमलसुंदरं सगडमुहाभिहाणं उज्जाणं, तहिं च सुचिरं सरोवरे जलकीलं काऊण पुष्पावचयं कुणमाणो वग्गुरो भद्दा य पेच्छंति जुणं खडहडियसिहरदेसं विहडियनिविडसिलासंचयं विणट्टनट्टलट्टभसालानिवेसं देवकुलं, तं च पेच्छिऊण पविट्ठाइं कोऊहेलेण अब्भंतरे, दिट्ठा य तत्थ सरयससिमुत्तिव्व अंचंतपंतसरारा निराभरणावि भुवणमहग्गवरयणभूसियव्व सस्सिरीया चिंतामणिव्व दंसणभेत्तमुणिज्जेत्तरसमाहप्पाइसया फल्लींदलसामलच्छाया सिमिद्धिजिजिनाहपडिमा, तं च दट्ठूण वियंभियो तेसिं भावाइसओ, जाओ य एस अभिण्णओ-जहा नूणं इमीए पडिमाए जारिसा कलाणुगया रुव्वलच्छी तारि-

सीए ण हवइ एसा सामन्ना, ता फलियच्चमियाणिं अम्ह मणोरहपायवेणंति चिंतिऊण एवं थोउमारद्धाई-
अज्जं विहडियनिबिडुहनिगड पविहाडिय [अज्ज परपवरसुगइ] मंदिरदुवाराइं ।

अज्जं चिय करकमलि लीण, सुहाइं संसारसाराइं ॥ १ ॥

अज्जं चिय तिहुयणसिरीहिं, अम्हि पलोइय नाह ! । जं तुह लोयणपहि गयउ, नासियदोसपवाह ॥ २ ॥

अहह अम्हेहिं तिवखुदुखोहसिहित्तगत्तिहिं, कह नाह ! तुम्ह पयमंडवंतरि ।

नहनिवहनिम्मलरयणकिरणजालसंछाइयंवरि ॥ ३ ॥

संपइ लडु निवासु फुडुमरुपहिएहिं व देव ! । जं तुह दिट्ठं मुहकमलु, खालियकम्मवलेव ॥ ४ ॥

एवं च भत्तिसाराहिं सुसिलिठ्ठाहिं मणाणंददायिणीहिं गिराहिं हरिसुफुल्लोयणाहिं थोऊण पुणो पुणो नि-
डालतडताडियधरणिवट्टाईं भणिउमाट्ठाईं-देव ! जइ एत्तो अम्ह दारगो वा दारिगा वा तुम्ह पसाएण होज्जा
ता इमं तुह भवणं कणयकलसकलियसिहरं थूरथंभाभिरामविसालसालापरिक्खत्तं कविसीसयसओवसोहियं पवर-
पागारसंपरिगहियं सुसिलिठ्ठठावियसालभंजियासुंदरगोयराणुगयं कारवेमो, सयावि तुम्ह भत्तिपरायणाणि य
होमो, अणवरयं पूयामहिमं च विरएमोत्ति भणिऊण उज्जाणकीलं काऊण गयाणि सगिहं । अह तेसिं भत्तिपगरि-
सागरिसिथहिययाए अहासन्निहियवाणमंतरीए देवयाए अणुभावेण आहूओ भद्दाए सेट्ठिणीए गब्भो, ससुपपन्नो

सेष्टिस्स पच्चओ, तओ तहिणाओ आरब्ध समारंभियं जिणमंदिरे कम्मंतरं, कओ अकालखेवेण जिन्नुद्धारो, तिसंझं च सुरहिंपच्चन्नकुसुमेहिं निम्मवेइ पूयं, पयद्वावेइ वरविवासिणीनट्टविहिं, वायावेइ मंजुगुंजतसुरयसणाहं चउविहा-
उज्जं, एवं च कुणमाणस्स वच्चंति वासरा ।

अन्नया य जिणवंदणवड्डियाए अणिययविहारेण परियडमाणा समागया सूरसेणा नाम सूरिणो, ठिया य सूरि-
समुचियपएसे, सुत्तपोरिसीपज्जंते य गया मल्लिजिणाययणं, वंदिया देवा, उवविट्ठा उचियट्ठाणे, काउमारद्धा य
भवसत्ताण धम्मदेसणा । एत्थंतरे पूयासामग्गिसणाहो समागओ वगुरसेट्ठी, जिणपूयं वंदणं च काऊण अल्लीणो
सूरिसयासे, पणमियं चऽणेण से पायपंकयं, दिन्नासीसो य आसीणो महीयले, गुरुणावि तज्जोगयाणुसारेण पारद्धा
धम्मदेसणा । कंहं चिय ?—

जिणनाहमुवणकरणं तण्णडिमापूयणं तिसंझं च । दाणंमि य पडिबंधो तिन्निवि पुन्नहिं लब्भंति ॥ १ ॥
नीसेससोक्खतरुवीयमूलमुद्दामदुग्गइक्काडं । कारिति मंदिरं जिणवरस्स धन्ना सविभवेणं ॥ २ ॥
तुहिणगिरिसिंगारहारि जे निम्मवंति जिणभवणं । ते कह न लीलाएच्चिय चित्तियमत्थं पसाहिति? ॥ ३ ॥
सामेन्नएवि जिणेगेहकारणे को मिणिज्ज पुन्नभरं? । को पुण तंमि विहिणा जिन्नंमि समुद्धरिज्जंते ॥ ४ ॥
ता भो महायस! तए नियमा सम्मं समायरियमेयं । समुयज्जियदद्वेणं जिन्नुद्धारो जमेस कओ ॥ ५ ॥

एयंमि अकीरंते तित्थुच्छेओ जिणे अभत्ती य । साहूणमणागमणं भव्वाणमवोहिलाभो य ॥ ६ ॥
 काराविए इमंभी भवजलनिहितरणजाणवत्तंमि । अच्चंतसंतकंता कारेअवा जिणप्पडिमा ॥ ७ ॥
 तीसे तिसंझमपमत्तमाणसेहिं परेण जत्तेण । पूया य विरइयवा सा पुण अट्टपयोरेवं ॥ ८ ॥
 वासकुसुमकखएणं धूवपइवेहिं वारिपत्तेहिं । फलभोयणमेएहि य जणनयणाणंदजणगेहिं ॥ ९ ॥
 इय अट्टविहा पूया कीरंती भत्तीए जिणिंदाणं । तं नत्थि नूण कल्लाणमेत्थ जं नो पणाभेइ ॥ १० ॥
 तथाहि-हरियंदणघणसारुभवेहिं गंधेहिं सुरहिगंधेहिं । सवण्णुसिरे निहिएहिं होति भव्वा सुरहिदेहा ॥ ११ ॥
 नवमालइकमलकंभवमल्लियापमुहकुसुमदामाहिं । विरयंता जिणपूय धरंति भव्वा सिवसुहं च ॥ १२ ॥
 नहरइजलपडिहतथे जिणपयच्छेत्ते जमकखया खित्ता । पसवंति दिव्वसुहसस्ससंपयं तं किमच्छरियं ? ॥ १३ ॥
 घणसारगुरुधूवो जयगुरुपुरओ जणेण डज्झंतो । उच्छलियधूमपडलच्छलेण अवणेइ पावं च ॥ १४ ॥
 जे दीवं देति जिणिंदमंदिरे सुंदराय भत्तीए । ते तित्थुयणभुवणब्भंतरेक्कदीवत्तणमुर्वेति ॥ १५ ॥
 तित्थुअणपहुणो पुरओ ठवेंति जं वारिपुन्नपत्ताइ । तं नूणं पुव्वज्जियदुहाण सलिलं पयच्छंति ॥ १६ ॥
 परिपागवससमुग्गयविसिद्धगंधेहिं तरुवरफलेहिं । जिणपूयं कुणमाणा लहंति मणवंछियफलाइ ॥ १७ ॥
 बहुभकखवंजणाउलओयणचरुपागपमुहवत्थूहिं । धन्ना विरइंति बलिं सुहनिहिउक्खणणेहउत्ति ॥ १८ ॥

अहवा किमितिणं ? जं किंचिवि अत्थि वत्थु सुपसत्थं । तित्थेसराण तं तं विणिओगे निति कयपुट्ठा ॥ १९ ॥
 दाणमवि सुगइसंगमनियाणमनियाणमेव दिज्जंतं । पुन्नाणुवंधिरूवं कल्लाणपरंपरं जणइ ॥ २० ॥
 तं पुण तित्तिहिं भणियं अमयपयाणं च नाणदाणं च । धम्मपवत्ताणं पुण तइयमुवट्ठभदाणं च ॥ २१ ॥
 तत्थाभयप्पयाणं लोइयलोगुत्तरेसुवि पसिद्धं । सत्तावत्थासुपिवि अनिसिद्धं सिद्धिरसियाणं ॥ २२ ॥
 करिसणमिव कणरहिंयं नरनाहंपिव विवेयपरिहीणं । एयविउत्तं धम्मं न कयाइ बुहा पसंसति ॥ २३ ॥
 जं पुण नाणपयाणं दीवोच्च पयासयं तमत्थाणं । भवजलहिपडियजंतूण ताणणे द्ढतरंडसमं ॥ २४ ॥
 उम्मगगपयट्ठाणं व विसममिच्छत्तभीमरत्तमि । समगगेदसयं सिवपुरीए वरसत्थवाहोच्च ॥ २५ ॥
 तइयं पुण भेसहवत्थपत्तंकवल्लगपसुहद्वेहिं । साहूण धम्मनिरयाण होइ उवट्ठभकरणेण ॥ २६ ॥
 जं ते महाणुभावा कह दूरविसुक्कसवसावज्जा । सक्कति तवं काउं आहारार्इण विरहंमि ? ॥ २७ ॥
 एत्तियमेत्तेणं चिय गिहिणो लंघति गुरुभवसमुद्धं । उवयारे जं असणाइएहिं वट्ठति साहूणं ॥ २८ ॥
 धणसत्थाहिवसेयसमूलदेवाणो य जयपयडा । दिट्ठता निदिट्ठा इत्थं सिद्धतसुपसिद्धा ॥ २९ ॥
 इय भो देवाणुपिया ! तिन्नि पयत्था मए तुह पसत्था । परिकहिया एएसिं पढमो तुमए सयं विहिओ ॥ ३० ॥
 अन्ने पुण सावगधम्मकुसलबुद्धीहिं जंति काउं जे । सद्धाणनाणसारं ता गिहिधम्मं पवज्जेसु ॥ ३१ ॥

इय गुरुणा निंदसिए वत्थुपरमत्थे जायपवरविवेगो पणमिऊण गुरुणो पयपंकयं सेट्ठी वागरिउं पवत्तो-भयवं! सुट्ठु बोहिओऽहं तुम्हेहिं, उवदंसेह मे सावगधम्मं, सिक्खवेह जुत्ताजुत्तं, तओ सूरिणा भेयप्पभेयसाहासहरससं-कुलो सुहफलोहकलिओ कहिओ वित्थेण गिहिधम्मकणहुमो, पडिवन्नो य भावसारमणेण । तप्पभिइं च अट्ठप्प-यारजिणपूयारओ सुणिदाणसमुज्जयचित्तो सावगतं पालेइ । पसूए पुत्ते सविसेसं धम्मपरिवत्तो जाओत्ति ।

अन्नया सो पंडुरपरिहियपडो कुसुमाइसमग्गसामगीसणाहो सयलपरियणसमेओ वयट्ठो मल्लिजिणपडिमापूय-णत्थं, इओ य तव्वेलं भयवंतं महावीरं नगरस्स सगडमुहुज्जाणस्स य अंतरा पडिमं पडिवन्नं ओहीए आभोइत्ता ईसाण-सुरनाहो अणेगसुरकोडिपरिवुडो पंचराययणविणिम्मियविमाणारूढो आंगतूण तिवसुत्तो आयाहिणपयहिणपुरस्सरं सहारिसं वंदिऊण अन्नोन्नघडियपाणिसंपुडो भयवओ चरियं गायमाणो सामिणो वयणंमि दिव्वादिट्ठो पज्जवासभाणां चिट्ठइ, वग्गुरसेट्ठीवि भयवंतमइक्कमित्ता चलिओ मल्लिजिणायणाभिमुहं, तं च वच्चंतं ईसाणिदो पासित्ता भगइ-भो वग्गुर ! दूरयरदेवा सच्चोवाया हवंति(त्ति) सच्चो कओ तुमए लोयप्पवाओ, जं पच्चक्खं तित्थगरं मोत्तूण पडिगं अच्चिउं वच्चसि, किं न सुणसि जं एस विसमभवावत्तनिवडंतं भुवणत्तयसमुद्धरणधीरो सिरियहावीरो सयमेव इह चिट्ठ-इत्ति?, तओ सेट्ठी एवं निसामिऊण जायअतुच्छपच्छायावो मिच्छाभिदुक्कडंति भणिऊण तिययाहिणादागपुवं जिगं वंदइ माहिमं च करेइ, सुचिरं च पज्जवासिऊण जहागयं पडिनियत्ते सुरिंदे मल्लिजिणसुवणंमि वचइ ।

जयगुरुवि तत्तो निक्खमिन्ता पट्ठिओ तुन्नागसन्निवेशाभिमुहं तस्स य अंतरा तक्कालपरिणियाणि चहूयराणि स-
पडिजुत्तमिति, ताणि पुण दोणिवि टप्परकन्नपुडाणि मज्जारणुरुवनयणाणि अइलंबमोद्वपुद्दाणि दीहरकंधराणि
कसिणकुसंठाणसरीराणि अहरसीमासमइकंतदीहरदंताणि, गोसालो पेच्छिऊण जायपरितोसो सहासं भणइ-अहो
भमिओऽहि पउरजणवएसु नियधम्मगुरुपसाएण, एत्तिक्कालं परियडत्तेण एरिसो संजोगो न कत्थवि पलोइओ ।
ता नूणं—

तत्तिछो विहिराया जणेऽइदूरेवि जो जहिं वसइ । जं जस्स होइ सरिसं तं तस्स दुइज्जयं देइ ॥ १ ॥
एवं च पुणो पुणो पुरा ठाऊण समुल्लवित्तो जाव न कहंपि विरमइ ताव तेहिं बाढं पिट्ठिऊण बद्धो पक्खित्तो
य वंसीकुडंगे, तत्थ य उत्ताणो निवडिओ अच्छइ, महया सदेण य वाहरइ, जहा-सामि ! कीस मं उवेक्खह ?,
एसोऽहं एत्थ वंसकुडंगे निवडिओ वट्ठामि, सब्बहा मोअह इमाओ वसणाओत्ति पुणो पुणो उल्लवंतं तं सो सि-
द्धत्थो पडिभणइ-भइ ! सयं कडं सयं चैव भुंजाहि, किं सुहा परितप्पसि ? , सामीवि अदूरेदंसं गंतूण करुणाए चिर-
समसुहदुक्खसहणपक्खवाएण तं पडिवाल्लिउमारद्धो, एत्थंतरे तेहिं नायं, जहा-एस कोइ दुट्ठसीलो एयस्स देवज-
गस्स पीडियावाहगो छत्तधारगो वा होही, तेण एस एयं पडिवालेमाणो निच्चलो अच्छइ, ता न जुत्तं एयस्स
धरणंति चिंतित्तुण सुक्खो गोसालो, मिलिए य तंमि गंतुं पवत्तो जयगुरु । कमेण य पत्तो गोभूमिंमि, तत्थ य

सुलभचरणपाणियत्तणेण गावीओ चरंति, तेण सा गोभूमी वुच्चइ । तत्थ य कलहपियत्तणेण गोसालो गोवालए मणइ-अरे मिलिच्छा ! जुगुच्छणिज्जरूवा ! एस मगो कहिं वच्चइ?, गोवेहिं भणियं-अरे पासंडिया ! कीस अम्हे निक्कारणं अक्कोसेसि?, सो भणइ-दासीपुत्ता ! पसुयपुत्ता ! जइ न मरिसिहिह ता सुद्धअरं अक्कोसिस्सामि, किं अलियमेयं?, मिच्छजाइया एरिसगा चेव तुब्भे, किं जहट्ठियं न भणिस्सामि?, को मे तुम्ह पडिभओत्ति, तओ तेहिं समुप्पन्नगाढकोवेहिं मिलित्ता पणिहसुट्ठिलेद्धिं विद्वित्ता बद्धो वंसीगहणे य पक्खित्तो, तत्थवि पुव्वनाएण करुणाए पहियजणेण विमोइयंमि गोसाले तिहुअणगुरू रायगिहे नयरे अट्टमवासारत्तं काउमुवसंपज्जइ, विचित्ताभि-
ग्गहसणाहं च चाउम्मासखमणं आरंभेइ । तस्स पज्जंते बहिया आहारगहणं कुणइ ।

तओ अणिज्जरियं अज्जवि बहुं कम्मं अच्छइत्ति चिंतिऊण पुणोऽवि सामी अत्थारियादिट्ठतं परिभाविंतो कम्मनिज्ज-
रणनिमित्तं अच्चंतपावजणसंगएसु लाढावज्जभूमिसुद्धभूमिनामेसु मिलिच्छदेसेसु गोसालेण समेओ विहरिओ । तत्थ य ते अणारिया कयाइ असुणियधम्मक्खरा निरणुकंपा लोहियपाणिणो परमाहम्मियासुरसरूवा भयवंतं विहरमाणं पासित्ता हीलंति निंदंति तहाविहप्पयारेहिं विद्वंति, साणादओ य दुट्ठसत्ते सामिस्स अभिमुहं मुयंति । अवि थ-
जह पविरेयणतणुतयतच्छणखारोचलेवपामोक्खं । किच्छविगिच्छं विज्जं कुणंतमभिणंदए रोगी ॥ १ ॥

तह जयनाहोवि समग्गसुग्गउवसग्गकारयं लोयं । उवयारिबंधुबुद्धीए बंधुरं पेहइ पहिद्धो ॥ २ ॥

जेण दंरुडुविकिट्टमेरुविस्संठुलं धरावट्ठं । हलहलियसत्तकुलसेलसायरं विरइयं सिसुणा ॥ ३ ॥
 सोवि कह अतुलबलसारविक्रमो निक्खिणेण कम्ममेण । कीडप्पायकयावयमहह महाविज्झइ जिणिंदो ? ॥ ४ ॥ जुम्मं ।
 किंच-जो हरिणा सिद्धत्थो आवयविणिवारणट्ठया सुक्को । गोसालगपच्चत्तरेलाए वियंभइ सोवि ॥ ५ ॥
 अन्नं च-जइ किर तिलेयरंगे अतुल्लमल्लोऽवि जिणवरो वीरो । एवंविहावयाओ विसहइ सुपसंतचित्तेण ॥ ६ ॥
 ता कीस थेवमित्तावयारकरणज्जएऽवि लोयंमि । मुणियजहट्ठियभावा वहति रोसं महासुणिणो ? ॥ ७ ॥ जुम्मं ।
 अहवा चुन्निज्झइ थेववायमेत्तेवि सक्कारालेड्डू । निट्ठुरकालायमघडियदुवणघाएहिं नवि वइरं ॥ ८ ॥
 अह तिहुयणेक्कनाहो अणज्जभूमीसु तासु हिंडतो । पत्ते वासारत्ते नवमेऽनवभासयविहाणे ॥ ९ ॥
 वसहिं च अलभमाणो सुन्नागारेसु रुक्खमूलेसु । धम्मज्झाणाभिरओ वरिसायालं अइक्कमइ ॥ १० ॥ जुम्मं ।
 वित्ते य तम्मि सामी सिद्धत्थपुरमागओ, तत्तोऽवि कुम्मारगामं संपट्ठिओ, तस्स य अंतरा तिललित्तसमीवेण
 बोलेमाणो पुच्छिओ गोसालेणेण सामी-एस तिलत्थंबो किं निप्फज्झिही नवत्ति ?, तओ तहाभविद्यवयावसेण
 समेव भणियं जिणेण-भइ ! निप्फज्झिही, परं सत्तवि पुप्फजीवा उदाएत्ता एयस्स चैव तिलत्थंबस्स एगाए तिल-
 संगलिगाए सत्त तिला समुवज्जिस्संति, एयं च असइहमाणेण अणज्जेण तेण अवक्कमित्ता मूलावणद्धभूमिलेड्डुसणाहो
 समुप्पाडिओ सो तिलत्थंबो, एगंते उज्झिओ य, एत्थंतरे अहासंनिहियदेवहिं भयवओ वयणमवितंहं कुणमाणेहिं

विउधिया घणावली, जायं सलिलवरिसं, समासासिओ तिलथंवओ, तेण पएसेण वेगेण आगच्छमाणीए गावीए सुरेण चंपिय मूलविभागो पविट्टो जलसेयसुकुमारो धरणिवेह्ठे, जाओ दढपइट्ठाणो, कमेण परूढाहं मूलाहं, उम्मीलियाहं कंदलाहं, पयट्टो फुल्लिउंति । भयचं पुण कुम्मारगामनगरं संपत्तो, तस्स बाहिं सूमंडलस्सुवरिं निहियदिट्ठो उद्धी-
कयभुयपरिहो दीहरजडाकड्ढो पयइविणीओ पयइपसमपरो पयइदयादक्खिणाणुगओ समारद्धसद्धमज्झाणि वि-
हाणो वेसियायणो नाम लोइयतवस्सी मज्झंदिणसमयंसि आयावेइ । तस्स य उप्पत्ती भन्नइ—

मगहाविसए धणघन्नसमिद्धलोयकलिए गोब्बरगामे आभीरलोयाणं अहिबइ गोसंखीनाम कुंडुबिओ, बंधुभइ नाम से भज्जा, सा य अविआउरी, ताणि य परोप्परं दढसिणेहाणुरायाणि विसयसुहमणुहवंताणि कालं वोलेति, इओ य तस्स गामस्स अदूरे खेडयं नाम संनिवेशो, तत्थ य अविगप्पिया सन्नद्धबद्धकवया पउरपहरणसणाहा मिलेच्छाण धाडी पडिया, तीए य सो गामो निवाडियारक्खिगजणो लुंदियधणधन्नकंसदूसो विणिहयपहरणहत्थसुहडसत्थो कओ, तओ बंदिग्गेण लोगं गहिऊण पट्ठिया सट्ठाणं, एगा य गामइत्थिया तवेळं पसूया पंडमि मारिए करकं-
लियवालया सुरूयत्तिकाऊण चालिया चोरेहिं, सा य चेडवावडकरत्तेण न पारेइ सिग्घगईए समांगंतुं, तओ तेहिं सरोसं भणिया—भदे ! परिचयसु सुयं जइ चिरजीवियत्थिणी, इमं च सुणिऊण अइगरुययाए मरणभयस्स परिचत्तो तीए सुओ तरुच्छागाए, गया य चोरोहिं समं, सो य गोसंखिओ गोरूवाइ धेत्तूण पहायसमए समागओ तं पएसं,

दिदौ य सो रुक्खच्छायाए पडिपुन्नसंघोवंगो सस्सिरीओ अक्खयसरीरो बालओ, गहिओ य तेणं, पणामिओ नियभज्जाए, भणिया य एसा-पिए ! एस तुह अपुत्ताए पुत्तो होही, सम्मं रक्खिज्जाहि, गोसे य पगासियं जहा मम महिला गूढगब्भा आसि, सा य संपयं पसूया, दारगो से जाओ, एयस्स चैव अत्थस्स निच्छयनिमित्तं छगलकं वा-वाइत्ता लोहियंगंधो कओ, सा य सुइयनेवत्थेण ठाविया, वद्धावणयं च विहियं, सम्माणिओ सयणवग्गो, पसारिया लोयम्मि वत्ता, निवत्तिथाइं छट्ठीजागरणचंदसूरदंसणियमुहाइं किचाइं, समुचियसमए ठवियं वेसियायणोत्ति नामं, कालक्कमेण य पत्तो जुव्वणं, सावि से जणणी चंपाए नयरीए नेऊण चोरोहिं विक्रयनिमित्तं ओहििया रायमग्गे, सुरु-वत्तिकऊण गहििया थेरीए वेसाए, सिक्खाविद्या गणियाण वेज्जं । अविय—

सुरविलयब्भहियविसिट्ठरुक्खसोहमपवरलायन्ना । सुरयप्पवंचकुसला वियक्खणा गेयनेट्ठसु ॥ १ ॥

उवयारभणियपरिचत्तबोहसमयाणुरुक्खचेट्ठासु । पत्तट्ठा सा जाया लद्धपसिद्धी य नयरीए ॥ २ ॥

दंसणमेत्तेणं चिय जणस्स पुवं जणेइ विक्खेवं । किं पुण उब्भडसिंसारसारनेवत्थरुहरा सा ? ॥ ३ ॥

इओ य सो वेसियायणो अत्थोवज्जणनिमित्तं कोइ विविहयाणिज्जाइं, अन्नया य धयस्स सगाडिं भरिऊण वयं-सएहिं समेओ गओ चंपानयरिं, तम्मि य समए समारद्धो पुरे महूसवो, पवराभरणरुहरदेहा नियसियपहाणपट्ठणु-गयचीरंसुयाइवत्था जहिच्छं तियचउक्कचचेरसु रामाजणेण परिगया विलसंति नायरा, ते य दट्ठण चितियभणेण-

अहो एए एवं विलसति, अहंपि न कीस रमेमि !, ममावि अत्थि केत्तिमेत्तावि अत्थसंपया, किं वा इमीए रक्खि-
याए ? , धम्मट्ठाणदानभोगोवभोगफलं हि पसंसिज्जइ धणं । जेण भणियं—

दानं भोगो नाशस्तिन्नो गतयो भवन्ति वित्तस्य । यो न ददाति न भुङ्के तस्य तृतीया गतिर्भवति ॥ १ ॥

दैवात्कथमपि जाते सति विभवे यस्य नैव भोगेच्छा । दाने च न प्रवृत्तिः स भवति धनपालको मूर्खः ॥ २ ॥

इति परिभाषिऊण कओ अणेण सिंगारो, परिहियाइं पहाणवत्थाइं, गओ पेच्छणगे, दिट्ठा य वेसाजणमज्झा-
गया सच्चिय पुव्वमाया , जाओ तीए उवरिमणुरागो, वियंभिओ से पंचबाणोऽवि सहस्सवाणोच्च मयरद्धओ, सम्म-
प्पियं तंबोलदाणपुव्वगं से गहणगं, रयणिसमए घणसारुम्मिस्सचंदणरसविलित्तगतो केसपासविणिम्मियकुसुमदामो
गहियंतंबोलवीडओ पयट्ठो तीसे गिहाभिमुहं, एत्थंतरे तत्स कुलेदेवया चित्तेइ—अहो अमुणमाणो परमत्थं अकज्जमा-
यरिउं लग्गो एस वरागो, ता संबोहेमिति विभाविऊण अंतरा सबच्छगाविरूवं विउच्चित्ता ठिया, वेसियायणरस्सवि
सिग्घं गच्छमाणरस्स लित्तो अमेज्जेण चलणो, जाया से आसंका जहा असुइत्ति, तओ अन्नं विसोहगं किंपि अपाव-
माणेण तेण तीसे चेव गावीए सन्निहमि निविट्ठस्स वच्छस्स पट्टीए पारद्धं चलणलूहणं,

तयणंतरं स वच्छो माणुसभासाए पडिभणइ गाविं । अम्मो ! पेच्छसु एयं विगयासंकं ममंगमि ॥ १ ॥

मिज्झविलित्तं चलणं लूहन्तं चत्तधम्मववहारं । किं कोइ कुणइ कइयावि सुरहिसुए एरिसं हीलं ? ॥ २ ॥ जुम्मं ।

गावी वागरइ तओ पुत्तय ! मा वहसु अद्धिइं किंपि । अइधम्मववहारा बाहिरो वट्टए एसो ॥ ३ ॥
वच्छेण भणियम्ममे ! कहमेवं ? , पुत्त ! कित्तिं कहिमो ? । नियजणीएवि समं जो वासं वंछइ अणजो ॥ ४ ॥
ता वच्छ ! सहसु सबं तं धन्नो एत्तिण जं मुक्को । उज्झियनियमजाया किमकजं जं न कुव्वति ? ॥ ५ ॥
तावच्चिय तत्तरुइं तावच्चिय धम्मकम्मपडिबंधो । लोयाववायभीरुत्तणं च तावेव विप्फुरइ ॥ ६ ॥
तावज्जिवि न विणस्सइ लज्जा जणणी गुणाण सयलाणं । अह सावि कहवि नट्टा ता नट्टा कुत्तलचेट्टावि ॥ ७ ॥ जुम्मं ।
इय सुराहिं साभिप्पायवयणसंदोहमुखेमाणिं वच्छस्स पुरो दट्ठु सो सहसा संकिओ हियए, चित्तिउमारद्धो य-
अहो पढमं ताव इमंपि महअच्छरियं जं तिरिच्छजोणिया होऊण माणुसियाए भासाए संलवइ, तत्तयवि नियमाया-
भिगमलक्खणं दूसणं मे दंसेइ, कहमेवं संभवइ ? , कत्थ मम माया ? कत्थ अहं ? कहां संवासो ? , सबं अचंतमघडंत-
मेयं, अहवा होयव्वमेत्थ कारणेणं, चित्तरूवाइं विहिणो विलसियाइं, संभवइ सबं, अओ पुच्छिस्सामि तं चेव
वेसाविलयं उट्ठाणवडियंतिभाविऊण गओ तीसे घरं, अच्चुट्ठिओ अणाए दावियं आसणं पक्खालिया चरणा ठियाइं
खणंतरं अवरोप्परुल्लोवेण, अह पत्थावमुवलब्भ पुच्छिया सा अणेण-भइ ! सोहेसु कत्थ तुम्ह उप्पत्ती ? , तीए
सहासं भणियं-जत्थ एत्तियजणस्स, तेण भणियं-अलाहि परिहासेण, अहं सकजं पुच्छामि, तीए भणियं-मुद्धो-
उसि तुमं, जेण-

नरह नरिंदह रिसिकुलह वरकामिणिकमलाहिं । अचुग्गमणु न पुच्छियइ कओ कुसलत्तणु ताह ? ॥ १ ॥

पंकात्तामरसं शशाङ्कसुदधेरिन्दीवरं गोमयात्, काष्ठादग्निरेहः फणादपि मणिर्गोपित्तो रोचना ।

कौशेयं कृमितः सुवर्णमुपलाहूवापि गोलोमतः, प्राकाश्यं स्वगुणोदयेन गुणिनो गच्छन्ति किं जन्मना ? ॥ २ ॥

अओ किं तुह एणंति भणिऊण हावभावरूवं महिलाविब्भमं दंसिउमारद्धा, ताहे तेण भणियं-अन्नपि एत्तियं मोलं दलयिस्सामि साहेहि मे सब्भावं, अइगरुयसवहसावियाऽसि तं, मा अलियमुल्लविस्ससित्ति भणिए जहा-
वित्तं मूलाओ आरब्भ सव्वं सिट्ठमेयाए, तहावित्तंतनिसामणेण य जाया से आसंका, जइ पुण एयाए जो तरुल्ल-
याए छड्डिओ सो अहं चेव होजा, एवं च सुरहिवयणंपि घडेजा, इमं च परिभाविऊण दुगुणमत्थपयाणं काऊण
पडिनियत्तो जाव तत्थप्पएसे सवच्छं सुरभिं निज्झाएइ ताव न किंपि पेच्छइ, तओ नायमणेणं-नूणं अहं केणइ
देवयाविसेसेण इयवइयेण अकज्जमायरंतो नियत्तिओऽस्मि । अह सगडिं घेत्तूण गओ नियगामं, उचियपत्थवे
अम्मापियरो उट्ठाणपरियावणियं अत्तणो पुच्छिउमारद्धो, ताणि य कहंति-पुत्त ! अह कुच्छिसंभूओऽसि तुंगं,
मा अन्नहा विकप्पेसु, को परडिंभरूवाइं परिपालेइ ?, तओ सो गढनिब्बंघेण ताव अणसिओ ठिओ जाव से तेहिं
कहियं, जाओ तस्स जणणित्ति निच्छओ, गयो य चंपानयरिं, साहिओ तीसे गणियाए वुत्तं, जहाऽहं
सो तुह पुत्तो जो तरुमूले उज्झिओत्ति । तओ सा एवमायन्निऊण सुमारियपुव्वइयरा विरहदुक्खेण अकजपवित्ति-

पारंभसमुल्लवियसवियारवयणविलिएण बाढमब्बाहया समाणा उत्तरिजेण वयणकमलमवगुंठिऊण दीहरुम्मुकपो-
क्कारं रोइऊण विलविउं पवत्ता । कइं चिय ?—

हा पाव दइव निग्घिण निहज्जाणज्ज ! सुकमज्जाय ! किं अन्नो तुह नाही विडंवणांडवरपयंचे ? ॥ १ ॥
जं कुलविलयामलिणत्तकारिणा उभयलोगदुट्टेण । वेसाभावे विणिम्मियड्ढिह सुकुलणसूयावि ॥ २ ॥
तत्थवि न ठिओ तं एत्तिएण घडिअम्हि नियसुएणावि । हा हा गरुयमकज्जं सत्थेसुवि सुम्मइ न एवं ॥ ३ ॥
जइ पुवं चिय पावेहिं तेहिं चोरेहिं विणिहया हुंता । ता किं असच्चमविगोवणिज्जिमिमज्ज पेच्छेज्जा ? ॥ ४ ॥
किं कूवयपक्खेवेण अहव उल्लवणेण सोहेमि । सासनिरौहेणं वा लहुं समुज्झामि अत्ताणं ॥ ५ ॥
एवं चिय मेरुगिरिंदिविब्भमाओ इमाओ दुक्खाओ । पावाए मज्झ नूणं होही संपइ परित्ताणं ॥ ६ ॥
इय दुस्सहदुहकरवत्तगाढफालिज्जमाणहियया सा । अइसुचिरं विलवित्ता निमीलियच्छी गथा मुच्छं ॥ ७ ॥
तारिसं च दट्टुण वेसियायणेण सित्ता सीयलसलिलेण वीजिया दुगुलंचलेण संबाहिया पासवत्तिणा चेडीजणेण,
कह कहवि लद्धचेयणा संभासिया अणेण-अम्मो ! कीस तावसंभारसुव्वहसि ? को एत्थ तुज्जावराहो ? एसो
चिय सच्छंदाणिबद्धघडणविहडणरसिगो दइयो एत्थावरज्झइ जो विविहसंविहाणगनेवत्थेहिं नडं व विवसं माणुसं
विनडेइ, अच्चंतविरुद्धमवि वत्थुं कारवेइ, अगममेणवि सह संगमं संपाडेइ, ता उज्झसु संतावं पडिवज्जसु धीरत्तणं

होसु निवडियसहा, तीए भणियं-पुत्त ! बाढं असहणिज्जमगोवणिज्जं च इममावडियं, इमं च संभरंती वज्जगंठिनि-
 दुरहियत्तणेण चेव जीवामि, न पुण अन्नं किंपि दुज्जम्मजायाए मज्झ जीवियकारणं, संपयं पुण वच्छ ! वंछामि
 अतुच्छवच्छसाहासमुलंबणाइणा सकुलकलंकभूयं जीवियं परिचइउं, अओ अणुमन्नेसु मं, तुमं चेव इयाणिं पुच्छणिज्जो,
 तेण भणियं-अम्मो ! अलं दूरज्झवसाएण, इओ मए वेसाहत्थाओ मोइया समाणी तवनियमेहिं अत्ताणं अत्ताणं
 साहेज्जासि, अपत्तकालजीवियवयरोवणं हि दूसियं समयसत्थेसुत्ति संठविऊण बहुदव्वदाणपुव्वगं मोइया सा वेसासया-
 साओ, नीया सग्गामे दावियं जीवणं ठाविया धम्ममग्गमि, अन्नया इममेव वेरग्गसुव्वहंतो सो चित्तिउं पवत्तो, जहा-

तिव्वाववायजलवाहदुलंघणिज्जं, दोगच्चमच्चुमयरज्झसभीममज्झं ।

संसारसायरमिमं परियाणइत्ता, सत्ता सुहेण निवसंति कंहं व गेहे ? ॥ १ ॥

जे इत्तिंयपि न सुणंति किमज्ज होही, सोक्खं व दुक्खमुच्चियं व तहेयरं वा ।

संसेवणिज्जमिमन्नयरं च मोहमाहण्णपियपहाणविधेयेनेत्ता ॥ २ ॥ जुम्मं ।

किंच-कालंमि तंमि बहुला जइ नो कहेज्जा, संभोगदुच्चिलसियं जणणीययं मे ।

ता तारिसं द्दडमकज्जमहं करेत्ता, तिवालेणवि लभिज्ज न नूण सुद्धिं ॥ ३ ॥

एवंविहाण विविहाण विडंबणाणं, भोगाभिलासमहमेक्कमेवमि मूलं ।

ता होउ संपइ इमेण दुगुंछिएणं, सबोवहाविरहियं पकरेमि धम्मं ॥ ४ ॥

इति निच्छिऊण बहुप्पयोरहिं गोसंखियं जणणिं च पडिवज्जाविकुण पाणाभाए पव्वजाए पव्वइओ एसो, करेइ विविहे तवोविसेसे, अब्भसेइ निययधम्मसत्थाइं, रक्खेइ पाणिणो, पज्जुवासेइ गुरुणो, लद्धट्ठो य जाओ निययधम्ममग्गंमि । अन्नया सो विहरंतो कुम्मारागमबाहिं ठिओ आयावेइ, एसा वेसियायणस्स उज्जत्ती ॥

तस्स य जडाजूडाओ दिणद्धदिणमणिकिरणपरितत्ता निवडंति धरणीअले जूयानियरा, सो य जीवाणुंरुपयाए निवडियमेत्ताओ करेण गिणिहऊण खिवइ जडामउडे, इओ य तेणंतेणं भगवया सभं गच्छंतो गोसालो तं दट्ठूण अणत्थसीलयाए ओसरित्ता महया सहेण वागेरेइ-भो भो किं भवं सुणी सुणिओ उयाहु जूयासेज्जायरो?, इत्थी पुरिसो वा?, न सुणिज्जसि सम्मं, अहो ते गंभीररूवत्तणं, एवं च भणिए खमासीलयाए जाव वेसियायणो न किंपि जंपेइ ताव दुव्विणयरसिगत्तणेण तिन्नि वाराओ पुणो पुणो पुच्छिओ गोसालणेण ।

अह तस्स पसमसीलत्तणुणोऽविहु दुट्ठवयणमहिदस्स । अइयदुचंदणस्सव विथंभिओ तिच्चकोहग्गी ॥ १ ॥

तो तेणुब्भडजालाकलावपसरप्परुद्धगयणयला । गोसालगदहणत्थं तेउल्लेसा विणिस्सिट्ठा ॥ २ ॥

एत्थंतरे जिणेणं तीसे विज्झवणपच्चला झत्ति । गोसालगरक्खक्खट्ठा सीयल्लेसा पडिविमुक्का ॥ ३ ॥

अह तीएँ तेउलेसा बाहिरओ वेढिया समतेण । सिग्धं चिय विज्झाया हिमबुट्टीएव जलणकणा ॥ ४ ॥
 ताहे तिलोक्कपहुणो अण्णणुरूवं वियाणिउं रिद्धिं । सो खामिउं पवत्तो इमाहि वग्गूहिं विणयणओ ॥ ५ ॥
 भयवं ! न नायमेवं जह सिस्सो तुम्ह एस दुस्सीलो । इण्हिं चिय सुणियमिमं ता इण्हिं खमह अवरहं ॥ ६ ॥
 इमं च जंपमाणं वेसियायणं दट्ठूण गोसालगेण भणियं-भयवं ! किमेस जूयासेजायरो उम्मत्तोच्च पलवइ ? भय-
 वया भणियं-भइ ! जया तुमए मम पासाओ ओसरित्ता एसो एवं भणियो, जहान्किं तुमं सुणिमुणियो इच्चाइ,
 तथा पढमेवलाए सहित्ता ठियो, पुणो पुणो तुमए भणियो समाणो तुज्झ दहणट्ठयाए उग्गं महापमाणं सलिल-
 इसिसिरवत्थुणावि अप्पडिहयसामत्थं तेउल्लेसं निसिरइ, सा य जावज्जवि तुह देहदेसं ईसि न पावइ ताव मए तप-
 डिघायनिमित्तमंतरा ताराहिवाहिमसिसिरा सीधेला पक्खित्ता, तप्पभावेण य तुह सरीरं तहट्ठियं दट्ठूण उवसंह-
 यकोववियारो ममं पडुच्च एवं भणिउं पवत्तो-भयवं ! न सुणियो तुज्झ एस सिस्सो, ता मरसियवो मम दुव्विण-
 उत्ति । इमं च आयन्निज्जण गोसालओ भयसंभतो भयवंतं भत्तीए पणमिज्जण भणइ-कहं नं भंते ! तेउलेसालद्धी
 हवेज्जा ?, भयवया वुत्तं-जे णं गोसालया ! छट्ठछट्ठेणं निरंतरेणं तथोकम्मणेणं आयावेइ, पारणगदिवसे य सवहाए
 लुक्खकुम्मासमुट्ठीए एगेण य सलिलचुलुगेणं जावेइ जाव छम्मासा, तस्स विउला तेउलेसा संपज्जइत्ति । इमं च
 तद्विहाणं सम्ममवधारियं गोसालगेणं ।

अन्नया य सामी कुमारगामनयराओ सिद्धत्थपुरंमि संपट्टिओ, संपत्तो य पुच्चयणियतिलयंयपएसं, तओ पुच्छिओ गोसालगेण भयवं-सो तिलथंबो मन्ने न निफन्नो होजा?, यगवया भणियं-भहू! मा एवं उल्लेखेसु, निफन्नो चेव सो अमुगप्पएसे वट्ठइत्ति बुत्ते गोसालो भयवओ वयणमसहंतो गंतूण तस्स एगंते निहितस्स तिल-थंबस्स तिलसंगलियं हत्थेण फोडित्ता तिले पत्तेयं गणमाणो भणइ-नूणं सव्वजीवा एवं परिघट्टिऊण भुज्जो भुज्जो तत्थेव नियसरीगे उववज्जंतित्ति वाहं पउट्ठपरिहारं नियइवायं च सम्मभवलंवेइ । अन्नया य सो तेउल्लेसासाहणत्थं भयवंतं विसुत्तूण गओ सावत्थि नयारिं, ठिओ कुंभकारसालाए, कयं छम्मासियसुगं तवक्कमं, सिद्धा तेउल्लेसा, विन्नासिया कूवतडट्ठियाए दासीए सरीरदहणेणं, तओ जायनिच्छओ पसुइयमाणसो अणवरयकोऊल्लवल्लोयणस-यण्हो गामागराईसु परिभमिउमारद्धो ।

अह अन्नया कयाई अट्टगनिमित्तसत्थपत्तट्ठा । पासजिणनाहसिस्सा सिट्ठिलियसद्धम्मवावारा ॥ १ ॥
कोऊल्लेण गामागरेसु उस्सिखलं परिभमंता । गोसालगस्स मिलिया जाओ य परोणरुद्धावो ॥ २ ॥
सिट्ठं च तेहिं गोसालगस्स सनिमित्तसत्थलवमेत्तं । तेणावि सो विथंभइ जणस्स तीथाति साहित्तो ॥ ३ ॥
पयइइ चिय उड्डमरसीलयं तस्स को तरइ कहिडं? । पाउब्भूयाइसयस्स किं पुणो पावनिरयस्स? ॥ ४ ॥
भयवंपि तेण रहिओ हरिणको इव विडप्पपम्मुको । अब्भहियसस्सिरीओ विहरइ वसुहं विगयमोहो ॥ ५ ॥

इय निरुवमसंजमभूरिभारधरणेकधीरधवलस्स । वीरस्स भुवणगुरुणो चरिए तइलोकवित्थरिए ॥ ६ ॥
बहुउणत्थसत्थसालयगोसालयदुव्विणयपडिवद्धो । वित्थरओ पत्थावो समत्थिओ छट्ठओ एस ॥ ७ ॥ जुम्मं ।

इति गोसालदुव्विणयपडिवद्धो छट्ठो पत्थावो सम्मत्तो ॥

॥ इति षष्ठः प्रस्तावः ॥

अथ सप्तमः प्रस्तावः

गोसालएण सहियस्स सामिणो संसिया उ उवसग्गा । एग्गगिणो उ एत्तो जह जाया ते तह कहेमि ॥ १ ॥
अह पलयपयंडानलाणुरुवधम्मज्झाणनिज्झोसियासुहसलोवलेवो दाहोत्तिग्गजच्चकंचणच्छाएण पभापसरणे ससु-
ग्गमंतदिणयरनियराउलं दिसियक्कवालं कुणंतो सो महावीरजिणवरो कमेण विहरमाणो वेसालिं नयरिं संपत्तो,
तत्थ य अहिग्गयजिणभणियजीवाजीवाइनवपयत्थो विविहाभिग्गहग्गहणनिग्गहियाविरइभावो भवभयारद्धसुविशु-
द्धाणुव्वयाइसावग्गधम्मो सिद्धत्थनरवइवालमित्तो संखो नाम गणराया, सो य भयवंतं पच्चभिजाणिज्जण पराए
भत्तीए महया रिद्धिसमुदएण सक्कारेइ, अह कइवयदिणावसाणे सामी वाणियगामे पट्ठिओ, तस्स य अंतरा रंगं-
तंभंगुरतरंगा महाजलुप्पीलपूरियपुलिणा महिलाहियं व दुग्गेज्झमज्झा रणभूमिच्च कच्छवयमयरहिया गंडइया नाम

महानई, तं च सामी नाचाए सयुत्तिन्नो समानो वेलुयाणुलिणंसि सुछनिमित्तं धरिओ नाविगेहिं, एत्थ य पत्थावे दिणद्धसमओ वट्ठइ, खरं तावति वेलुयं सूरस्स करपहकरा, तीए य संतप्पइ कमलकोमलं चलणतलं जिणस्स । इओ य तस्सेव संखस्स गणराइणो भाइणिज्जो चित्तो नाग दूयकज्जेण पंचतराइणो सगीवे गंतूण नावाकडएण पडिनियत्तो पेच्छइ य तहट्ठियं साभिं, तओ ते दुव्वयेहिं बहु तज्जित्ता मोयावेइ, गहिगं च से करइ । अह—

सुसमाहियमणपसरो संरक्खंतो चराचरं लेयं । विविहपडिमाविससे पइदियहं चैव फासंतो ॥ १ ॥
कत्थइ निदिज्जंतो उस्सिखलखलजणेण कुविएणं । कत्थइ थुणिज्जमाणो नयंतसांमंततियसेहिं ॥ २ ॥
कत्थइ पागयजीवियविणासखमतिकखआवयकंतो । कत्थइ अणुकूलजणोहिविहियपूथासहागहिमो ॥ ३ ॥
उभयत्थवि धम्मतुलं व चित्तवित्तिं समं चिय धरंतो । विविहाउ भावणाओ भावित्तो भयइ वपुहाए ॥ ४ ॥

तस्स य भगवओ अणेगतवोविहाणनिरयस्स न मणांगं पि कं पिज्जइ मणो पढमुग्गिभलुभागसारसहयारमंजरी-
पुंजपरिमलमिलंतभमिरभमरभमरोलिरोलरमणीएण पल्लविछकंकिलिसरलसल्लईपसुहुदुमसंडेण कन्नाडचेडीनिडाल-
विलुलंतोलयवच्छरीचलणलंपडदाहिणानिलाडंबरिल्लेण पयरनेवत्थकुंगनिज्जिज्जंतचचरीवुदीरिउद्दामभयरद्धएण महु-
समएण १ न य पयंडमायंडमंडलुल्लसिपवलकिरणजालकरालियमुव्वगंतरालेण तणहभिभूयवप्पीहगजिवहयोरसर-
संछाइयावरसंहतरेण खरसमीरसमुद्धुदुहफरिससक्करुक्कमणदुग्गमेण निदाहकालेण २ न य धोरयोसघणाघण-

गयघडाडोवडरियपथियसत्थेण विप्फुरंतविज्जुपुजुप्पिच्छपउत्थकामिणीहिययदारिणा पहिट्टनीलकण्ठकोलाहल्लेण पाउसकालेणं ३ न य विसट्टकंदोट्टकमलकल्हारपरागधूसरियरायहसेण परिपक्कसस्ससंपयाभिरामधरणीमंडलेण गहंढ-
दाणगंधसरिच्छातुच्छसत्तच्छयपुष्फगुच्छुच्छलताभोयवासियदियंतरालेण सरयकालेण ४ न य फुल्लंतफलिणीमंजरीपुंज-
पिंजरियवणविभागेण पहिट्टपामारारद्धवणमलणुत्तालकंकेल्लिकलकलक्खिज्जमाणगामसंनिवसेण हेमंतारमणेण ५ न य
हिमतुसारसंभिलियसिसिरसभीरपकंपतपहियमुक्कसिक्कारकेडणा ठाणठाणपज्जालियग्गिट्ठियपासपासुत्तपावासुयनिवहेण
परिफुट्टकुसुमट्टहासहसिरुज्जाणाभोगेण सिसिरसमएणंति ६ ।

इय धम्मज्झाणनिवेशगाढवक्खित्तचित्तपसरस्स । छप्पिवि उउणो पडुणो भीयव्व कुणंति न विचारं ॥ १ ॥

एवं च विहरमाणो वाणिज्यागमं नगरमुवागओ, ठिओ य तस्स वहियाविभागे काउसग्गेणं । तत्थ य नयरं
आणंदो नाम सांवओ, सो य छट्ठेणं निरंतरेणं तवोविससेण आयावेह, तस्स य तवप्पभावेणं ओहिज्जाणं
समुप्पन्नं, तथणुभावेण य सो पडिमापडिवन्नं जयगुरुं दट्ठण अचंतभत्तिभरनिब्भरंगो गओ सायिसमीवं, जहा-
विहिं वंदित्ता भणिउमाढत्तो य-भयवं ! चिरमहियासिया दुस्सहपरीसहा तुमए, अहो तुम्ह वज्जसारसररत्तणं अहो
निप्पकंपत्तणं, पत्तं च इमस्स किलेसस्स तुम्हेहिं फलं, जओ कइयववरिसोहिं केवल्लणाणमुप्पज्जिहित्ति भणिऊण गओ
सगिहं । सामीवि तत्तो निक्खमित्ता सावत्थीनयरीए विचित्ततवक्कमसणाहं दसमवासारत्तं अइवाहिऊण नयरीय

वाहिमि कयपारणगो साणुलद्धियनाममि य गामे वचइ । तत्थ य भद् पडिमं ठाह, तहिं च अणसिओ पढमं पुद्वा-
भिमुहो एगपोगलणिसियदिट्ठो दिवसमसेसमच्छिज्जण रयणीमि दाहिणाभिमुहो ठाह, तओ अवरेण दिवसं उत्तरेण
रत्तिं, एवं छट्ठवोकम्मेण इमं भद्पडिमं सम्ममणुपालिज्जण सामी अपारिउं चव महाभद् ठाह, तीए य पुद्वाए दिसाए,
अहोरत्तं, एवं चउसुवि दिसासु चत्तारि अहोरत्ताइं, पलंबियमुयपरिहो उस्सग्गेण ठाज्ज दसोणेण इमं समत्थेइ ।
पुणो अकयपारणगो सव्वओभद् पडिममुवसंपज्जइ, एइएवि पुद्वाइयासु तमापज्जवसाणासु दससुवि दिसासु उस्सग्गेण
अच्छइ, नवरं उहुदिसाए जाइं उहुलोइयाणि दव्वाणि ताणि ज्ञायइ, अहोदिसाएवि हिट्ठिज्जाणित्ति । एवं एयं वावीस-
इमेण पज्जंतमुवाणेइ । समत्थियासु य इमासु तिसुवि पडिमासु दढं परिसंतो भयवं, जाए य पारणपसमए पविट्ठो
आणंदगाहावइस्स गेहे, तवेलं च बहुलियाभिहाणाए दासीए भंडयाणि खणीकरंतीए दिट्ठो जयगुरू, अह तण्ण-
एसं संपत्तस्स तइलोक्कादिवायरस्स वासियभत्तं पणामियमणाए, सामिणाऽवि असंभतेण जोग्गंति कलिज्जण पसा-
रियं सभावसोणिमासुभगं पाणिसंपुडं, परमसद्धाविसेसमुद्धहंतीए दिन्नमेयाए, एत्थंतरे लुक्खरतवचरणपज्जवसाणजाय-
जिणपारणयपट्ठुहयहियएहिं सुरासुरकिन्नरनिवहेहिं पूरियंभवरतलं, सुक्का य पंचरायकुसुमसमूहसणाहा अद्धतेरस-
कोडिमेत्ता कणयवुट्ठी, ताडियाइं चउविहत्तूराइं, जाओ य जणाण परितोसो, सा य बहुलिया दासी ण्हाविया
नरवइछत्तच्छायाए, अवणीयं से दासित्तणं ।

इय एत्थेव भवंमिवि विसिट्ठभत्तीए पत्तदाणेणं । पाविज्जइ धणरिद्धी समुद्धुरा किं पुणउणभवे ? ॥ १ ॥

एत्तोच्चिय रुंदोविहु भवन्नवो गोपयं व लीलाए । दुक्करतवविरहेणवि लंघिज्जइ पुन्नवंतेहिं ॥ २ ॥

लब्भइ तिलोयलच्छी लब्भइ सवंपि कामियं सोक्खं । एकं चिय नवि लब्भइ सुपत्तदाणं जयपहाणं ॥ ३ ॥

नाणपि तवोवि हवेज्ज निष्फलं कहवि दिव्वजोएणं । दिन्नं सुपत्तदाणं वभिचरइ न नूण कइयावि ॥ ४ ॥

इय जाणिऊण कल्लाणकोसकलणेक्कपच्चले दाणे । न करेज्जा नणु जत्तं को अत्तसुहं समीहंतो ? ॥ ५ ॥

अह जयगुरू तत्थ पारिएण बहिया विहरिउमारद्धो । अन्नया य गामाणुगामेण गओ बहुमेच्छजणसंकुलाए दढभूमीए, तत्थ य पेढालाभिहाणस्स गामस्स बहिया पेढालुज्जाणे पोलासचेइए अट्टयेणं तवोकम्मणेणं अपाणएणं ईसिं ओणयकाओ अचित्तलुक्खपोगलनिवेशियानिमसनयणो गुत्तसद्धिंदियगामो सुप्पनिहियगत्तो अहोपलंविथ-
मुयदंडो सुसिलिट्ठसंठवियनिचलचलणो दुरणुचरं कायरनरुद्धोसकरं एगराइयं महापडिममारभेइ । एत्थंतरे सोहम्माए सभाए नाणामणिरयणभामुरकिरणपज्जलंतमहंतसिंहासणमुहासीणो अणेगसुरसुरंगणाकोडाकोडिसंबुद्धो किरीडाइवराभरणपहाविच्छुरियदेहो पुरंदरो तथा पडिमापडिवन्नं जयनाहमोहिए पलोइऊण तक्खणविसुक्का-
सणो अचंतभत्तिभरनिब्भरंगो पुणरुत्तनिडालताडियमहीवद्धो पणमिऊण आणंदसंदोहसंदिरीए सम्भूयत्थगुणगणु-
ब्भासणसमत्थाए परमपवक्खवायंसुंदराए गिराए सुचिरं संथुणिऊण य निस्सामन्नं सामिणो असामन्नगुणपब्भारं हि-

ययमि धरिउमपारयंतोव शुणिउं पवत्तो-भो मो तियसा ! एस भगवं महावीरो पंचसमिओ तिगु तो अफोहो अभाणो
अमाओ अलोभो अणासवो अममो अकिंचणो संखोव निरंगणो जच्चकंचणं व जायखुवो जीवोव अण्णडिहयणमणो
गयणंपिव निरालंबणो समीरणोव अण्णडिबद्धो सायरसलिलं व सुद्धहिउओ पुक्खरपत्तं व निरुवलेवो कुम्भुव
सुगुत्तिदिओ खगविसाणं व एगो विहगोव विष्णुमुक्को भारुडपक्खिअ अण्णमत्तो मंदरो इव निष्पकंपो सागरो
इव गंभीरो चंदो इव सोमलेसो दिवायरोव दित्ततेओ कुंजरो इव सौंडिरो पंचाणणोव दुद्धरिसो वसभोव
जायथामो वसुंधरव सव्वासाविसहो घयमहुसित्तो हुयासणोव तेयसा जलंतोत्ति, तहा एयस्स भगवओ न कत्थइ
पडिबंधो समुण्णज्जइ, सो य चउव्विहो, तंजहा-दव्वओ खेत्तओ कालओ भावओ य, तत्थ दव्वओ गाया मे पिया मे
भाया मे सुहिसयणसंगंथसंथुया मे सच्चित्ताचित्तमीसाणि य दव्वाणि मे, एवं न ममीकारो जाएजा, खेत्तओ य-
गामे वा नगरे वा रत्ने वा खेत्ते वा खेले वा घरे वा अन्नत्थ वा तहप्पगारे पडिबंधो न हविजा, कालओ य-
समए वा आवलियाए वा आणपाणए वा खणे वा सुहुत्ते वा दिवसाइए वा न ममत्तं जाएजा, भावओ य-कोहे
वा माणे वा मायाए वा लोभे वा पेजे वा दोसे वा कलहे वा अब्भक्खाणे वा पेसुन्ने वा परपरिवाए वा अरइ-
रइए वा मायामोसे वा मिच्छादंसणसल्ले वा न ममत्तं उप्पजेज्जत्ति । तहा एसो भगवं वासारत्तवज्जं अट्टगिम्हहे-
मंतियमासेसु गामे एगराइए नगरे पंचराइए ववगयहाससोगभओ निरहंकारो निग्गंथो वासीचंदणकण्णो समत-

णमणिलेहुंकंचणो समसुहदुखो इहलोयपरलोयअण्डिबद्धो जीवियमरणेसु निरवकंखी पुवजियकम्मसंचनिरघाय-
णट्ठाए अबुद्धिओ विहरइ । किं च—

एयं महाणुभावं नियधीरिमतुलियतिहुयणजणोहं । नो धम्मज्झाणाओ खमति संखोहिउं केइ ॥ १ ॥
देविंदा तियसा वा जक्खा रक्खा व खयरवग्गा वा । भूया महोरगा वा अणप्यमाहणजुत्तावि ॥ २ ॥
अवि चालिज्जइ मेरू पल्लत्थिज्जइ महीवि पायाले । ससिसूरविमाणानिवि बलिणा केणवि दलिज्जंति ॥ ३ ॥
अवि सोसिज्जंति महणणवावि बहुमीणमगरभीमावि । न य भगवं चालिज्जइ ज्ञाणाओ तिहुयणेणावि ॥ ४ ॥
इय सोचा जायपयंडकोवदट्ठोड्ढीमभिउडिमुहो । दोसाण संगमो इव संगमओ नाम गिवाणो ॥ ५ ॥
सुरवइसमाणविभवो तक्कालविसुक्कलज्जमज्जाओ । ववगयविवेयभावो सया अववो भणइ सकं ॥ ६ ॥
सामि ! किमेवं भण्ह निग्गुणमवि समणयं सुरसहाए । अहवा सच्छंदाविथ सोहंति प्हूण उल्लावा ॥ ७ ॥
सच्चं चिय सुविसुद्धा जइ होज्ज इमस्स कावि चंगिमया । गिहपालणं विमोचुं ता किं पासंड भंडेज्जा ? ॥ ८ ॥
गिहवासाओवि न धम्मकम्ममन्नं वयंति किर कुसला । कीवत्तेण चत्ते य तंमि किं संसणिज्जमिह ? ॥ ९ ॥
वागरियं जं च तए ज्ञाणाओ एस सुरवेरहिंवि । नो तीरइ चालेउं तंवि न वोचुं खमं तुज्ज ॥ १० ॥
जे लीलाए चिय पाणिपल्लवे संठवंति भूवीढं । गुरुसिहरमरुक्तं गोलं व तुलंति मेरुंवि ॥ ११ ॥

वायामेत्तेणवि तिहुयणंपि कुविद्या खिंधति जमवयणे । निघडियगुणाण सुराण ताण को वहउ समसीसिं ? ॥ १२ ॥
जइ सहैसि एयं ता अच्छउ खोभिएण किं इमिणा ? । अह नो ता पेच्छ जहा भग्गपइणं नियत्तेपि ॥ १३ ॥
इय भणिए पुरंदरो विंचितेइ-अहो महापापपडलविलुत्तविवेओ सव्वहा एस, अओ जइ एत्थ पत्थावे निवा-
रिजइ ता निच्छियं इमं परिकप्पेज्जा-सुरवइसामत्थेण एस भगवं तवोकम्ममविचलचित्तो कुणइ, न उण सत्ति-
एत्ति परिमाविऊण ठिओ मोणेणं । संगययसुरोऽवि अतुच्छमच्छसुव्वहतो निवारिज्जमाणोऽवि नियपहाणपरियेण
केत्तियमेत्तो एस ? अज्जेव खोभेमि इमंति पइणं काऊण नीहरिओ अत्थाणीमंडवाओ, गओ भगवओ समीवं, तओ
दंसणवसुप्पन्नगाढकोवेण विउविओ पलयकालोव पवलो धूलिनिवहो, तेण य चलणजुयलाओ आरब्भ जाव अ-
च्छीणि सवणा य ताव पच्छाइओ, सामी जाओ निरुस्सासो, नवरि तिलतुसतिभागमेत्तंपि न चलिओ झाणाओ,
अचलियचित्तं च नाऊण कओ अणेण कुलिसकटिणचंडतुंडभीमो पिवीलियासमूहो, सो य लद्धावयासो दुज्जणोव
जिणं विद्विउं पवत्तो, किंतु निब्भगजणमणोरहोव जाओ निफ़लो, तओ दुन्निवारो सूइतिवसुहो उइसे पेसेइ,
तेहिवि असोभिज्जमाणे भुयणवंधवे घइलाओ चंडमुहमंडलाओ निवत्तेइ, ताहिवि खज्जमाणसरीरे निणकंपे जयनाहे
निम्मिया पिंगलसरीरइणो अतुच्छपुच्छविसालिद्धकटिणकंदया विच्छुया, तेसुवि जहासत्तिकयणहारपडिहयसामत्थेसु
पसंरतमच्छरेणं विउविद्या दाढाकडप्पकराला नउला, तेहिंपि अभिभावियं भयवओ सरीरं, न उण ईसिंपि सत्तं,

अह सविसेसविद्यंभियकोवप्पसरेण तेण तियसेण । मुक्का फुरंतफणरयणभासुरा दुस्सहा भुयगा ॥ १ ॥
 चंदणतरुणोव्व तणू जिणस्स आवेढियं दढं तेहिं । अइतिकखदीहदंतगदसणंतडवियंतुंडेहिं ॥ २ ॥
 न मणागंपि विचलियं तिलोयनाहं पलोइउं तियसो । ताहे मूसगनिवहं निव्वत्तइ दिव्वसत्तीए ॥ ३ ॥
 पुणरवि पयंडदोघट्टघट्टयं तक्खणं पयट्टइ । उल्लालियसुंडादंडभीसणं सेलुंतुगतणुं ॥ ४ ॥
 तेणवि विविहकयत्थणविसेससंपीडिएवि देहमि । धम्मज्झाणाउ जिणो न चालिओ वालमेत्तंपि ॥ ५ ॥
 एवं चिय करणीहि वि पिसायनिवहेहिं एवमेव जिणो । खोभेउं पारद्धो तेणं सुरकुलकलंकें ॥ ६ ॥
 अचलंतंमि जिणिंदे करालदंतगविसिहभीमसुहो । सज्जिज्जइ सहूलो तेण लहुं जिणवरस्सुवारिं ॥ ७ ॥
 अइतिकखनक्खदाढाहिं पीडिउं सोवि जयगुरुं बाढं । विज्झाओ झत्ति पउससमयदुग्गयपइवोव्व ॥ ८ ॥
 इय खलियारणनिवहे पागयजणजीवियंतकरणखमे । पक्कएवि जिणं दट्ठुं सुनिच्चलं दूमिओ देवो ॥ ९ ॥
 तओ जहावट्ठियरूवं सिद्धत्थरायं तिसलादेविं च विउव्वइ, ताणि य कलुणाइं विलवंति, भणंति य-सुत्त ! किं
 तए दुक्करमिममारद्धं?, उज्झाहि पव्वज्जं आगंतूण परिपालेह अम्हे, तुह विरहे वच्छ ! असरणणि अत्ताणाणि य
 जायाणित्ति, एएणवि जा न सक्को खोभिउं ताव खंधावारं विउव्वइ, सो य परंतसु आवासिओ जिणस्स, तत्थ
 सूयारो पत्थरे अलभमाणो जिणचलणोवरि पिढरं ठविऊण हेट्ठा वज्जानलजालणेण रंधिउं पयत्तो, अह तक्कालसवि-

सेससमुच्छलियधम्मज्झाणजलुणीलकलोलविज्झाचिएव निष्फलत्तणं पाविए तंमि पक्कणं निम्मवेइ, सो य अणेगाइं सउणिपंजरगणि जयगुरुणो सवणे भुयदंडेसु खंधतलंमि जंधाजुयले य ओलंबेइ, तेहिंतो य नीहरिऊण पक्खिणो नहसिहाहिं तिकखग्गचंचुण्हारोहि य विद्वंति जिणसरीरं, तहावि अबुमिए जयनाहे पइसययचट्टंतकोवेणं उग्घा-
इओ जुगखयसमएव सक्खसक्करकलुसो खरानिलो, तेणावि समहिंयं सामिस्स पज्जालिओ कम्मत्तणगहणम्मि ज्ञा-
णानलो, न उण चित्तंसखोभोत्ति, पच्छा कलंकलियावायं विरएइ, तेणवि चक्काविद्धोव सलिलावत्तनिवडिओव भा-
मिओ जिणो देहमेत्तेण, न उण चित्तासएणं ।

इय एवंविहतिवोवसग्गकरणेऽवि निच्चलं नाहं । आभोगिऊण चितइ संगमओ जायगुरुक्रोवो ॥ १ ॥
वज्जसरीरो एसो खलीकओऽविहु बहुप्पयारेहिं । नो तीरइ खोभेउं किं काउं जुज्जइ इयाणिं ? ॥ २ ॥
जइ एयमुज्झिऊणं सुरालयं जामि भग्गसपइन्नो । ता सुरवइपमुहेहिं आजीवमहं हसिज्जाभि ॥ ३ ॥
किंच-निययस्सवि हिययस्सा नत्थि एवं कयमि परितोसो । पारद्धवत्थुनिवाहणंमि पुरिसाण पुरिसययं ॥ ४ ॥
अहवा होउ विगोवण निहणं एयं नएमि कूडसुणिं । एयस्स विणासमी झाणंमि विणस्सिही नूणं ॥ ५ ॥
एवंपि य निव्वाहियगरुयपइण्णाभरो भविस्सामि । सुरवइपमुहाणमहं अहीलणिज्जो य तियसाणं ॥ ६ ॥
इय निच्छिऊण पज्जालियजलणजालाकलावसंचलियं । विज्जुलयाउलयसमयमेहचंदं व दुण्णेच्छं ॥ ७ ॥

कालायसभारसहस्सकोडिघड्गुब्भडं महाचक्रं । जंबुदीवरसुग्गवयवयणपिहाणं व धेत्तूण ॥ ८ ॥
 उप्पइओ संगमओ दूरं गयणं गुणविमुक्को । थालकरो तइलोकं भोत्तुं छुहिओ कयंतोव ॥ ९ ॥
 तो तं सुमेरुत्तुन्नपणंपयडमाहप्पपायडं चक्रं । सुक्कं सवससत्तीए तेण जयबंधुणो उवरिं ॥ १० ॥
 तेणावि जिणित्तणू तडत्ति संताडिया गुरुभेरेणं । आकरनहं निमग्गा महीए दढवज्जसंकुव ॥ ११ ॥
 तत्थवि छज्जीवहिं द्वायंतं जिणवरं सुणेऊणं । वेलक्खसुवगओ सो चितइ तियसाहमो एवं ॥ १२ ॥
 लल्लक्कवक्कपहओवि नेव पंचत्तमेइ जो एस । सो सत्थस्साविसओ ता संपइ किं करेमि अहं ? ॥ १३ ॥
 एवंविहोवसग्गा दिट्ठावि हरंति जीयमियराणं । किं पुण सरिरीगोथरमुवागया दुस्सहा नूनं ? ॥ १४ ॥
 इइ विगण्णिऊण एगूणवीसइमोवसग्गपज्जेते जइ पुण अणुकूलाए खोभिज्जइत्ति जायविब्भमेण संगमएण
 विणिम्मियं नाणामणिकिरणंचिचइयं पवरं विमाणं, तंमि समारूढो दिव्वाभरणपहाविच्छुरियसरीरो नियंसिय-
 विमलदुगुलो दिव्वं सामाणियदेविट्ठं दंसेमाणो महुरेहिं वयणेहिं भयवंतं भणिउं पवत्तो—भो महरिणि ! तुट्ठोहि
 तुह सत्तेण तवेण खमाए बलेणं पारद्धवत्थुनिवहणेणं जीवियनिरेक्खत्तेणेणं पाणिगणरक्खणुज्जयभणेण य, ता अलाहि
 एत्तो तवकिलेसाणुभावणेणं, जइ भणसि ता पवरसुरमणीजणाभिरामं अगवयपयट्ठविसट्ठनट्ठं विचित्तसत्तिजुत्ता-
 मरकीरमाणच्छरियं इमिणच्चिय सरिरेण तुमं नएमि तिवसालयं, अहवा उत्तरोत्तरभयपरंपरापरल्लजराइदोस-

निवहरहिं एंगतियसुहसणाहं पणामेमि सिद्धिनिवासं, अहवा इहेव धरामंडले मंडलाहिवसहस्ससविणयाणुस-
रिज्जमाणसासणं पडरकरितुरयरहजोहकोससंभियमेगच्छत्तं संपाडेमि नरिंदत्तणं, वरेसु एएहिं किं पि जं भे रोयइ,
उज्झसु संखोहं परिच्चयसु कुवियणंति भणिएवि जाव भयवं पलंविद्यमुओ एगगचित्तो धम्मज्झाणपडिवन्नो न
किंचि जंपइ ताव संगमएण अलद्धपडिवयेण चिंतियं, जहा-दुविलंघं मयरद्धयरायसासणं, महासुणीणवि कुणइ
चित्तसंखोहं, ता तस्स सवस्सभूयाओ पेसेमि दिव्वकामिणीओ, जइ पुण ताहिं हीरिज्जा एयरस मणंति कलिऊण
कओ समकालं सव्वेसिं उऊण समवाओ, तप्पभाविण य फुल्लिया सहयारा पल्लविया कंकिल्लिणो जायं दुहिणं
पयट्ठो मलयमारुओ उच्छलिओ परहूयारावो मउरिया नीवा पणचिया वरहिणो विथंभिओ य कमलपरिमलो
जायाइ कासकुसुमपंडुराइं दिसिसुहाइं, मुक्का भगवओ पेरेतेसु दसद्धवन्ना कुसुमवट्ठी, तयणंतरं य विसज्जि-
याओ विविहसरमंडलपहाणगेयकुसलाओ कारणप्वंचमणहरद्वविहिवियक्खणाओ वीणावेणुप्पमुहाउज्जसंजुयाओ
पवरालंकारधारिणीओ तियसविलासिणीओ, संपत्ताओ य जयगुरुसमीवं, सविलासं विथंभिउं पवत्ताओ य,
कहं चिय ?—

उब्भडसिंगारसनादेहलायन्नजलपवाहेण । सरियच्च वणाभोगं लीलाए पूरयंतीओ ॥ १ ॥

पमहलविसालदीहरतरलच्छिच्छोहचक्खालेणं । दिसिदिसिविसट्टकंदोट्टपयरसकं कुणंतीओ ॥ २ ॥

काओवि कुणंति नमंतसीसनिवडंतकुसुमदामाओ । जिणसंगमसोकुक्खिरीउ बाढं पयावणइं ॥ ३ ॥
 काओऽविहु गलियंसुयसंजमणमिसेण पायडिंति पुरो । जयगुरुणो पीवरकणयकलसपरिरेहिणं सिहिणं ॥ ४ ॥
 मिच्छच्चिय कारुणियत्तणं तुमं उव्वेसि हे सुहय ! । मयणसरज्जरंगं पि जं न रक्खेसि जुवइजणं ॥ ५ ॥
 मुंच कढिणत्तणं देहि नाह ! पडिवयणमम्ह दुहियाणं । पेम्मपरायत्तमणं सप्पुरिसा नावहीरंति ॥ ६ ॥
 तुह दंसणमेत्तेणवि दसमदसं पाविउच्च एस जणो । एत्तोऽवि मा उव्वेहसु एवं तज्जंति काओऽवि ॥ ७ ॥
 इय सविलासं सुरकामिणीहिं पायडियवहुवियाराहिं । न मणांगं पि विचलियं चित्तं ज्ञाणाओ जगगुरुणो ॥ ८ ॥
 अह उगगंयंमि मूरं अखुभियहिियं पलोइउं नाहं । संगमओ हयसत्ती चित्तिउभेवं समाढत्तो ॥ ९ ॥
 अणुकूलवसगेहिवि न चलइ एसो मुणी महासत्तो । ता किं एत्तो मोत्तुं एयं वच्चामि सुरलोए ? ॥ १० ॥
 अहवा न जुज्जइ इमं काउं मे दीहरेण कालेण । उवसग्गियस्स जइ पुण इमस्स चित्तं पकंपेज्जा ॥ ११ ॥
 इय कलुसासयगोयगएण तइलोककंधुणो धणियं । उवसग्गं गाभेविहू विहरं परिचत्तमत्तस्स ॥ १२ ॥
 बालुयपंथ सुभूमे सुछेत्त मलयंमि हत्थिसीसंमि । ओसलिमोसलितोसलिपमुहेसुं संनिवेसेसुं ॥ १३ ॥
 ते केवि तेण तियसाहेभेण विहरंतयस्स उवसग्गा । विहिया अइदुविसहा जे कहिउं पि हु न तीरंति ॥ १४ ॥
 एएणं चिय ते कारणेण चरिए न एत्थ वित्थरिया । सिद्धंताओ कुसलेहिं किंतु सयमेव नायवा ॥ १५ ॥

एवं तदुवसगवग्नावि अविचलचित्तो गामार्दणं वहिया बहुकालं गमिऊण सामी छम्मासियं पारणयं काउ कामो
समागओ वयगागे गोउलंमि, तत्थ य तद्विसं ऊसवविसेसो, सवत्थ पायसं उवक्खडिज्झइ, तिहुयणेऊनाहोऽवि अण-
वरयमुवसगवग्गं कुणमाणस्स संगमयामरस्स जाया छम्मासा नेव उवसग्गेइ संपयं, जइ पुण परिस्संतो सट्ठण
गओ होज्जा, इय विगप्पिऊण पविट्ठो भिक्खानिमित्तं, संगमएणवि तत्थ पत्थावे जहिं जहिं गिहे भयवं वच्चइ
तहिं तहिं समारंभिया अणेसणा, सामिणाऽवि पउत्तो ओही, सुणिओ थ एसो, तयणंतरमद्धहिं डिओ चेव
नियत्तिऊण ठिओ पडिमाए, संगमएणावि आभोइओ भयवं,—किं भग्गपरिणामो नवत्ति?, जाव पेच्छइ ताव छजीव-
हियमेव परिचित्तित्तं जिणवरं, ताहे संखुद्धो चित्तेइ—जो छहिं मासेहिं भूरिणयारोवसग्गेहिं अणवरयं कीरमाणे-
हिवि न चलिओ सो दीहेणावि कालेण न सक्को चालिउं, निरत्थओ मज्झ उवक्कमो, दीहकालं खुक्कोऽहिं सुर-
विलासाणं, अहो नियसामत्थमचित्तिऊण कहं मए अप्पा विनडिओ? । इय बहुप्पयारोहिं नियचिट्ठियं दूभिऊण
निवडिओ भगवओ चलणेसु, भणिउमाढत्तो य—भयवं! भग्गपइन्नोऽहं, तुन्मे पुण समत्तपइन्ना, अवितहं भणिंय
महाणुभावोण समागएण सुरवइणा, केवलं दुहु कयं मए जं न तइया सहहियं ।

अलमेत्तो भणिणं खमेसु मे पुवदुक्कडं कम्मं । उवसंतोऽहं संपइ तुह उयसग्गं न काहामि ॥ १ ॥
ता वच्चसु निस्सकं गामागरपसुहविविहठाणेसु । पविससु भिक्खनिमित्तं किलिस्ससे किं खुहाभिहओ? ॥ २ ॥

एत्थंतरंमि भणियं जिणेण संगमय ! सुंच मम तत्ति । पत्थावे चिय अम्हे सकज्जकरियासु वेट्ठमो ॥ ३ ॥

इय सोउं जिणनाहं पणमिय परमायरेण संगमओ । अइपावभरंक्तोवि पट्ठिओ सुरपुराभिमुहं ॥ ४ ॥

इओ य-सोहम्मे देवलोए तंकाळं सव्वे देवा देवीओ य उव्विग्गा निराणंदा निरुच्छाहा अच्छंति, सक्कोऽविय मुक्कविलेवणालंकारो समुज्झियपेच्छणयाइविलासो परिचितेइ-अहो एत्तियमेत्तस्स भगवओ अणत्थसत्थस्स अहं मूलकारणं जाओ, जओ मम पसंसाकुविण्ण इमिणा सुराहमेण इमं महापावं ववसियंति, एत्थंतरे सयलतइलोयजी-वरासिविणासजणियपावपंकविलित्तोच्च नीसेसावजसंपसुपडलविलुत्तगत्तोच्च अकल्लाणावलीकलिओच्च पणदुपुच्चंकिंति-पब्भारो पडिभग्गपइन्नाविसेसुम्मिलंतलज्जाभरसंकुचियलोयणो संपत्तो सोहम्मसभाए संगमयाहमो । तं च ददुण्ण पुरंदरो ठिओ परंमुहो, भणिउमारद्धो य-

भो भो सुरा ! निसामह मम वयणं एस संगमयदेवो । चंडालो इव तुम्हं ददुपि न जुज्जइ कयावि ॥ १ ॥

एएण पावमइणा चिरमवरद्धं निराणुक्पेण । जं अम्ह पूयणिज्जो कयत्थिओ तिहुयणेक्कपहू ॥ २ ॥

जइ ताव इमस्स नत्थि पडिब्भयं भीसगुरुभवाहितो । ता किं ममवि न भीओ ववसंतो ददमकज्जमिभं ? ॥ ३ ॥

जह जयगुरुणा निच्चलसामाइयगुरुभरो समुक्खित्तो । तह किं मएवि जं एस मज्झ संकंपि नो कुणइ ? ॥ ४ ॥

एएण जिणिंदवमाणेण जणिओ पयंडपावभरो । तुम्हे पुण इत्थ डिया पाविहिह इमस्स संगेण ॥ ५ ॥

किमहमिमं निगहिउं सक्रो नवोवसग्गकालमि ? । किंतु मुनिस्सइ एसो हरिस्स निस्साए तवइ जिणो ॥ ६ ॥
पज्जत्तं एत्तो जंपिएण निविसयमाणवेह इमं । वरि सुन्न चिय साला मा भरिया चोरएग्गेण ॥ ७ ॥
इय सुरनाहेण सरोसभासिणा चलणकोडिणा विवसो । निच्छूढो संगमज्जो एवागी सुरपुरीहिंतो ॥ ८ ॥
एवंविहं च माणमलणं पेच्छिऊण चिंतियं संगमएण—अहो एयाइ ताइं असमिक्खियकयाइं पायडीहवंति संपइ
दुव्वलसियाइं, इय झूरिऊण सो जाणएण विमाणेण पट्ठिज्जो गंदिराभिसुहं, तज्जो अक्कोसिज्जमाणो युरविलयाहिं
हीलिज्जमाणो नियपरिवारेण पेच्छिज्जमाणो सक्कसुहडेहिं उवेहिज्जमाणो सामाणियदेवेहिं नीहरिऊण सुरपुरीज्जो
ठिज्जो मंदरचूलियाए, तस्स य सागरोवमं सेसमाउयंति । इज्जो य—से अग्गमहिमीहिं विन्नाविज्जो पुरंदरो—जइ सागि !
तुम्ह आएसो हवइ ता अम्हे पियमणुसरासो, तज्जो विसज्जियाज्जो य इंदेण, सेसो पुण परिवारो पडिसिद्धोति ।
इज्जो य—भयवं वद्धमाणसामी जायंमि निरुवसग्गे तत्थेव गामे वीयदिवसे पविट्ठो गोयचरियाए, हिंडंतो य
समागज्जो वच्छवाल्थेरीगिहे, तज्जो तीए मत्तिभरनिस्ससंतपयडुलपडलाए वासियपायसमेत्तेण पडिलभिज्जो
छमासस्स निरसणो भयवं । एत्थंतरे चिरकालजायजिणपारणगंदसणपरितुट्ठेहिं अहासच्चिहियसुरनिवहेहिं पहायाइं
तूराइं मुक्का कणगबुट्ठी परिखित्तो कुमुनियरो वरिसियं गंधोदयं अहो दाणमहो दाणंति उग्गयोसणा कया, तत्थेव
ताव जाया अदरिदा थेरी । अह सामी निव्वियसरीरो गज्जो आलभियाभिहाणं नयरीं, तत्थवि पडिमापडिचन्नस्स

भक्तिनिम्भरो हरीनाम विज्जुकुमारिंदो तिपयाहिणापुव्वगं निवडिऊण चलणेसु संथवं काउं पवत्तो । कंहं ?—

जय निज्जियहुज्जयकुसुमबाण !, अविणस्सपाविण्यलुहनिहाण ! ।

उवसग्गेरसमेक्कधीर !, तुह सच्चं नाउँ जिणिंद वीर ! ॥ १ ॥

संसारजलहिनिवडंतसत्त !, पइं एक्किं रक्खियवहुहुत्त ।

तुह सुमरणमित्तेवि पावरासि, नासइ तिमिरं पिव रविपयासि ॥ २ ॥

तुह दंसणमेत्तेऽवि जे न बुद्ध, ते तिकखहुक्खलक्खोहिं रुद्ध ।

तुह चलणकमलमुद्दंकियस्स, भद्दाइं होति धरणीयलस्स ॥ ३ ॥

स कयत्थ जाय हरिहरिणपसुह, भुवणेसर ! ते तेरिच्छनिवह ।

गिरिकंदरपडिमासंपवन्न, तुहं दिहु जेहिं जिण ! कणयवन्न ॥ ४ ॥

तावच्चिय घोरभवाडवीए, निवडति जीवा दुहसंकडाए । जावऽज्जवि तुम्ह पयारविंद—सेव कुणति नो जिणवरिंद ! ॥ ५ ॥

हिमवंतपसुहकुलपव्वएसु, खीरोयहिवेइरसायेलसु । गायति कित्तिं तुह भुवणनाह !, किन्नरसमूह दइयासणाह ॥ ६ ॥

तुह एक्कह कह वित्थार पत्त, नीसेसकहंतर जणिहिं चत्त । उइयंमि अहव रविमंडलंमि, खज्जोय न सोहइं नहयलंमि ॥ ७ ॥

इय विज्जुकुमारिंदो थोउं कहिउं च केवलुपत्ती । पचासन्नं पच्छा नियमवणं अइगओ नमिउं ॥ ८ ॥

सामीवि सेधयियानयरिसुवगओ, तत्थवि हरिस्सहो नाम भवणाहिबई देवो एइ वंदइ य पियं च पुच्छइ, जहा-
भयवं ! नित्थिन्ना बहूवसग्गा, थेधमियाणिं सोढवं, केवलनाणं च लहुं उण्णजिहत्ति भणिऊण जहागयं पडिनियत्तो ।
तिहुयणपहूवि तत्तो विहरिऊण सावत्थीए नयरीए परिसरे पलंविधमुयदंडो ठिओ काउस्सग्गेणं, तम्मि य दिणे
लोगो सिंगारियसरीरो गहियसुरहिक्कुमुमदामो विविहविलेवणभरियकचोलयसणाहो खंदपडिमाए पूयणत्थं भयवंतं
अइक्कमिऊण गंतुं पयट्ठो । सा य खंदपडिमा तव्वेण्हविया विलित्ता य जावडज्जवि न समारोविज्जइ रहवरे ताव
कहं महावीरो विहरइत्ति परिज्ञाणनिमित्तं पउत्तो ओही सुराहिवेण, दिट्ठो सो पुरज्जणो भयवंतं मोत्तूण खंदप-
डिमाए पूयामहिमं कुणमाणो, तथगंतरं ओयरिओ सुरलोयओ, अणुपविट्ठो य खंदपडिमं, ताहे पुरंदराहिट्ठिया
चलिया भयवओडभिमुहं खंदपडिमा, तं च सयमेव चलंति दट्ठूण तुट्ठो लोगो-अहो देवो ! सयमेव रहं आरुहइत्ति,
खंदपडिमावि रहं मोत्तूण गया भगवओ समीवं, त्रिपयाहिणदाणपुच्चयं च पडिया पाएसु, भूमितलनिविट्ठा य
पज्जुवासिउमारद्धा, लोगाडवि तहाविहमच्छरियं पेच्छिऊण विम्बिया चिंतंति-अहो वंदियवंदणिज्जो एस कोइ
महप्पा निप्पडिमणभावसंगओ य ता सव्वहा न जुत्तमायरियमहेहिं जं इममइक्कमिऊण गयत्ति अत्ताणं निंदंतेहिं
सामिणो कया सव्वायेरेण महिमा, अह जाए पत्थावे जयगुरू तओ पएसओ निक्खमिऊण गओ कोसंबिं नयरिं,
तत्थ य उस्सग्गमुवगयस्स जयगुरूणो जोइसच्चक्काहिबइणो सूरससहरा सविमाणा वंदणत्थं ओयरिया वसुंधरापीढं,

गाढविम्वयक्खित्तनरनियरपलोइज्जमाणा य त्तिपयाहिणापुव्वयं पणमिऊण तइलोकैक्कल्लमहं जयवंधवं, निसन्ना जहो-
 इयट्ठाणेसु, पुच्छिया सुहविहारवत्ता, खणभेकं च ते जिणरूवदंसणसुहसणुहविऊण जहागयं पडिनियत्ता ।
 अह जयनाहो गामाणुगामयं विहरिऊण भूवीढं । वाणारसीए पत्तो तत्थ य महिओ सुरिंदेण ॥ १ ॥
 पुणरवि रायगिहंमि य फुरंतमणिरयणमंडियसिरेण । ईसाणतियसवइणा थुयमहिओ पुच्छिओ य पियं ॥ २ ॥
 महिलानथरीएवि हु पत्थिवजणगेण परमभत्तीए । धरणिंदेण य नागाहिवेण हिट्ठेण पणिवइओ ॥ ३ ॥
 गामागराइसु चिरं विहरिय पत्तंमि वरिसयालंमि । एक्कारसमे सामी वेसालीए पुरीए गओ ॥ ४ ॥
 तसपाणवीयरहिए धीपसुपंडगविवज्जिए ठाणे । चाउम्मासियखमणं पडिवज्जित्ता ठिओ पडिमं ॥ ५ ॥
 भूयाणंदो य तहिं भुयगवई भगवओ भवमएण । भत्तिभरनिभ्रंगो पूयामहिमं पयट्टेइ ॥ ६ ॥
 अह तत्थेव पुरीए सावगधम्मंमि बद्धपडिबंधो । दक्खिन्नदयापसमाइपवरगुणरयणरयणनिही ॥ ७ ॥
 नामेण जुन्नसेट्ठी सुसावगो वसइ विसुयजसोहो । अन्नो मिच्छादिट्ठी अहिणवसेट्ठित्ति नामेण ॥ ८ ॥
 एगम्मि वासरंभी कज्जवसा नयरि बाहि नीहरिओ । सो जुन्नसेट्ठी सहो परमवियट्ठो गुणट्ठो य ॥ ९ ॥
 पेच्छइ कंचणसच्छहसरीरकरपसरभरियनहविवरं । नीसेसलवखणधरं उस्सग्गठियं महावीरं ॥ १० ॥
 तं पेच्छिऊण निच्छउमजायसव्वणुनिच्छओ सहसा । हरिसुच्छलंतरोमंचकंचुओ वंदिउं सामिं ॥ ११ ॥

सो चिंतितं पवत्तो भिवत्साकालेऽवि नीह जन्न पहू । पडिमोवगओ चिट्ठइ तं अज्जववासिओ गन्ने ॥ १२ ॥
जइ कल्लमि य कल्लाणबल्लिकंदो करिज्ज पारणयं । एसो भयवं मह मंदिरंमि ता सुंदरं होइ ॥ १३ ॥
इय चिंतितो पइवासरंमि सो पज्जवासए सामि । ता जाव चउम्मासक्खमणं पजंतयणुपत्तं ॥ १४ ॥
तो बीयवासरे आगयंमि मुणिऊण पारणगसमयं । सामि निमतइत्ता लुरियं गेहं गओ सट्ठो ॥ १५ ॥
पगुणीकयाइं तेण य सनिमित्तं पुव्वालसिद्धाइं । फालुयएसणियाइं भत्तीए पवरमोजाइं ॥ १६ ॥
एयाइं अज्ज जयवंधवस्स दाहामऽहंति कथबुद्धी । अणिमिसविद्यसियनयणो जयगुल्लगणं पलेयंतो ॥ १७ ॥
धन्नो कथपुन्नोऽहं सुलद्धनरजम्मजीवियफलो य । होहामि अज्ज नूनं तिहुअणपहुणो पयाणेण ॥ १८ ॥
चिरभवपरंपरज्जियनिविडासुहकम्मनिगडजडिअस्स । संपज्जइ जइ घरमज्जमेव भोक्खो धुवं मज्झु ॥ १९ ॥
इय चिंतितो सुविसुज्झमाणलेसो स जायए जाव । ताव पविट्ठो सामिय अहिणवसेट्ठिस्स गेहंमि ॥ २० ॥
अचंतविभववित्थरदप्पगवेण सेट्ठिणा तेण । भणिया दासी भइ ! समणं दाउं विसज्जेहि ॥ २१ ॥
तीएविहु तव्वयणाणुरोहओ चट्ठएण कुम्मासा । उवणीया दाणत्थं पहुणावि पसारिओ पाणी ॥ २२ ॥
खित्ता य तीए तयणंतरं च देवेहिं दुंदुही पहया । परिसुक्का वसुहारा चेलुम्बेवो कओ इत्ति ॥ २३ ॥
घुट्टं च अहोदाणं महया सइण पंचवन्नाणं । बुट्ठी विहिया लुसुमाण सुरहिंगंधुडुराणं च ॥ २४ ॥

मिलिओ य नयरलोगो रायाविय विम्हिओ गिहं पत्तो । वित्तंतमिमं पुट्टो य तेहिं सेट्टी पहिट्टेहिं ॥ २५ ॥
 तेणावि कवडसीलत्तणेण काउं बहुं फडाडोवं । सिट्ठं जहा महण्णा एसो परमन्नपाणेहिं ॥ २६ ॥
 सयमेव मए पाराविओत्ति अंचंतमत्तिज्जेत्तेण । एत्तो चिय तियसेहिं घुट्टमहो दाणेमेयंति ॥ २७ ॥
 सोचा एवं लोगो रायाविय गाढहरिसपडिहत्थो । तग्गुणगहणं काउं जहागयं पडिनियत्तोत्ति ॥ २८ ॥
 सो पुण पुराणसेट्टी अंचंतविसुज्झमाणसुहभावो । दुंदुहिसहं सोच्चा झडत्ति सोगाउलसरीरो ॥ २९ ॥
 पडिचिंत्तिउं पवत्तो हाहाऽहं मंदभग्गजणजणो । जणिओ विहिणा नूणं जस्स घरं लंघिउं नाहो ॥ ३० ॥
 अन्नत्थ पारिओ अज्ज सायरं उवनिमंतिओऽवि मए । अहवा निप्पुन्नाणं न घरे चिंतामणी एह ॥ ३१ ॥ जुम्भं ।
 अह भयवं पारित्ता गामागरसुंदरं धरावीढं । विहरइ हरियतमभरो सूर्रो इव भव्वकमलाण ॥ ३२ ॥
 अन्नंमि य पत्थावे समोसढो तत्थ पासजिणसिस्सो । सूर्री केवलनाणप्पईवपायडियपरसत्थो ॥ ३३ ॥
 नाउं समोसढं तं नयरिजणो नरवई य हिट्ठमणो । वंदणवडियाएँ लहुं समागओ तस्स पासमि ॥ ३४ ॥
 वंदित्ता भत्तीए उचियट्ठाणंमि सन्निसन्नो य । सुचिरं धम्मं सोउं पुच्छिउमेवं समाढत्तो ॥ ३५ ॥
 भयवं ! एत्थ पुरीए अणेगजणसंकुलाए को धन्नो ? । लहुईकयंससारो य ? कहसु अइकोउगं मज्झ ॥ ३६ ॥
 तो केवल्लिणा भणियं अइधन्नो एत्थ जुन्नसेट्ठित्ति । रत्ता वुत्तं किं नणु सामी पाराविओ तेण ? ॥ ३७ ॥

किं वा अद्धत्तेरसुवन्नकोडिण्यमाणवसुहारा । तम्मंदिरंमि पडिया ? अइधन्नो जेण सो जाओ ॥ ३८ ॥
तो केवल्लिणा भणियं भावेणं तेण तिहुयणेक्कयहू । पाराविओ चिय तथा दाणत्थं कयपयत्तेण ॥ ३९ ॥
वसुहाराविहु परमत्थओ परं तस्स मंदिरे पडिया । जं सग्गमोकखसोकखाण मायणं सो इह जाओ ॥ ४० ॥

किंच-जइ खणमेत्तं नो दुट्ठहीए सइ तथा सुणितो सो । खवगस्सेणिं आरुहिय केवलं ता लहु लहतो ॥ ४१ ॥
पत्तपहाणत्तणओ कणगं मोत्तण तेण उ न अन्नं । भाववियलत्तणेण फलमहिणवसेट्ठिणा लद्धं ॥ ४२ ॥
इय भो देवाणुपिया ! चरणं दाणं च देवपूया य । कासकुसुमं व बिहलं सवं चिय भावपरिहीणं ॥ ४३ ॥
एवं केवल्लिणा पन्नत्ते जहागयं गओ सभाजणोत्ति । अलं वित्थरेणं, पत्थुयं मन्नइ-सो महावीरजिणो कमेण
विहरमाणो गओ सुसुमारपुरं, तत्थ य असोगसंडंमि उज्जाणे असोगपावयस्स हेट्ठओ पुढविसिलपट्टए कयअट्टम-
भत्तस्स एगराइयं पडिमं पडिवन्नस्स एगपुग्गलनिवेशियानिमसनयणस्स ईसिपब्भारगयदेहए भयवओ चमरो
नाम असुरिंदो पुरंदरभयविहुरो संखसीणुण्णलोवसोहियं महागउव कसजुयलसरोवरतरुल्लीणो, अह को एस च-
मरो ? कइ पुरंदराहितो भयं ? को वा पुबभवे आसित्ति ? , निसामेह

अत्थि गइंदकुलकवल्लिज्जंतमहल्लसल्लईपल्लवो नियसिहरतुंगिमाखलियरविहपयारो पवरकाणणाभोगभूसियदिसि-
निवहो विज्झो नाम गिरिवरो, तस्स पायमूले विभेलो नाम संनिवसो, तंमि य दयादक्खिन्नसवसोयाइगुणोवेवओ

अपरिमितद्वसंचओ पूरणो नाम गाहावई परिवसइ, सो य सम्मओ सयणवगस्स वल्लहो नरिंदस्स चक्खुभूओ पयइवगस्स हिययनिविसेसो धम्मियलयस्स उभयलोयाविरुद्धेणं ववहारेणं कालं वोलेइ । अन्नया य पंच्छिभरथणी- समयमि सुहसिजागयस्स निहाविगमुम्मिद्धमाणनयणनलिनस्स जाया से चिंता, जहा—

पुव्वभवे नूण मए दाणं दिन्नं तवं च आयरियं । तस्स पभावणेसा मणवंलियकज्जनिष्फत्ती ॥ १ ॥

तहाहि—नरवइसम्माणेणं धणेण कोसविभवेण । पुत्ताइपरियणेण य पइदियहमहं पवहुमि ॥ २ ॥

पडिक्खलोचि हु लोगो दंसणमेत्तेऽवि होइ अणुकूलो । अनिवारियपसराविहु निवडंति न आवया गज्झ ॥ ३ ॥

ता जावऽज्जवि पुव्वज्जियस्स कम्मस्स कुसलरूपस्स । विज्जइ थेवोऽवि लवो जावऽज्जवि उज्जयो अत्थि ॥ ४ ॥

जाव जणे सम्माणो जाव य रोगादओ न दूमिति । जाव न विहडइ सरयब्भविब्भमा निच्छियं लच्छी ॥ ५ ॥

जाव न जज्जरइ जरा जाव न जायइ पिएण सह विरहो । आणानिहेसम्मि य जावज्जवि वट्टइ कुडुवं ॥ ६ ॥

ताव पुणोचि हु धम्मं परभवसुहसाहगं उवचिणेमि । नहु कारणविरहेणं कज्जं उप्पज्जति कयावि ॥ ७ ॥

धम्मपभावो एसो जं किर साहारणेऽवि मणुयत्ते । एगे करेति रज्जं अन्ने ते चेव सेवंति ॥ ८ ॥

तम्हा सूरम्मि ससुगयंमि भुंजाविडं सयणवगं । ठविडं च गिहे पुत्तं तावसदिकखं पवज्जामि ॥ ९ ॥

इय चिंतियंतस्स उगगओ दिवायरो, तओ निमंतिओ सयणवगगो काराविओ परमविच्छुडुणं भोग्यं संभणिओ

तंबोलाइदाणेण, जोडियकरसंपुडेण भणियमणेण-भो भो सयणा ! निमुणह मह वयणं, एसोऽहं विरत्तो विसयाणं पडिनियत्तो गेहवावाराणं पणट्टसिणेहो पियपणइणीपुत्तमित्तपमुहपरियणे, अओ अनुमन्नह भं दाणिं दाणायाए पव्वजाए पज्जमणुगिणिहं, चिरं एत्थ दुत्थेण य मए जन्न भे सम्मं वट्ठियं तमियाणिं खमणिजं, जहा य ममोवरि पुवं पव्वख-वायमुव्वहंता एवं मम पुत्तस्स संपयं वहेज्जह, इह सप्यणयं भणिरुण ठवियो नियपए पुत्तो, समणियो से गेहपरियरो, साहियाइं निहाणाइं भलावियो सयणजणो, अन्नपि कयं तक्कालोचियं कायव्वं । अह सोहणतिहिमुत्ते निसव गेहवासं परिचइरुण चउप्पुडं दाकमयं भायणं गहाय दाणायाए पव्वजाए पव्वइओ पूरणो । तं चैव दिवसवारव्वं छंडुल्लुणं अणि-विस्सेत्तणं तवोविसेसणं आयावणाभूमीगओ अत्ताणं सोसेइ । पारणगदिवसे य तं चउप्पुडं भायणं गहाय उचावएणु गेहेसु मज्झादिणसमए भिवखं परिभमित्ता जं पढमपुडए पडइ तं पहियाणं अणाहाणं च देइ, जं दोये रं कागसुणग-पमुहाणं, जं च तच्चे तं मच्छमगराईणं जलचरजीवाणं पणामेइ, जं च चउत्थपुडए पडइ तं अयणा अरत्तहुओ आहारइ ।

एवंविहुक्करतवविहाणनिरयस्स निच्चमवि तस्स । न तहा पावविणासो जायइ सन्नाणहीणस्स ॥ १ ॥

जह श्रैवतवेऽवि जिणिंदमगमणुलगयस्स साहुस्स । कालायसंपि अहवा रसाणुविद्धं हवइ हेभं ॥ २ ॥

अह तेण दुरणुचरेण बालतवेण अब्भाहओ सो पूरणो लुक्खो अट्टिचम्ममेत्तगतो चित्तेइ-खीणोऽहभियाणिं, ता-जावऽज्जिवि अत्थि किंपि पुरिसक्कारपरक्कमविसेसो ताव सयमेव तहाविहभूविभागे गंतूण अणसणं करेमिंति विथा-

विज्जण चउण्डयपमुहउवगरणमेगंते परिचइऊण विभेलगसन्निसेसस्य ईसाणदिसिविभागे गंतूण भत्तं पंचकखाइ ॥
 एत्थंतरे चमरंचचा रायहाणी अणिंदा यावि होत्था, सोऽवि पूरणो बालतवस्सी बहुपडिपुन्नाइं दुवालस वासाइं
 परियायं पाउणित्ता मासियाए संलेहणाए अप्पाणं झोसिऊणं मओ समानो तीए चमरंचचाए रायहाणीए चमरिंद-
 ताए उववन्नो, तयणंतरं पंचविहाए पज्जत्तीए पज्जत्तिभावं गओ समानो विविहमणिरयणनियरकिरणविच्छुरियाइं विभ-
 सियसरसकुसुमपयरपरिरेहिराइं सविलासधावंतसुरकामिणीललियकरयलुत्तालचालियचामराइं नियभवणंतराइं इओ
 तओ आमोएमाणो वीससाए जाव उहुं पलोयइ ताव पेच्छइ सोहम्मदेवलोए सयलदेवरिद्धिसंभारसुंदरिल्ले गहसंहतध-
 णसारसंवलियक्कालागरुवहलधूमपडलिल्ले दुवारदेसनिवेसियवियसियसहसपत्तिपिहाणपुन्नकलसे निम्मलमणिभित्तिओ-
 ण्हापणासियसंतमसे रणिरकणयकिंकिणीजालाउलउप्पंतधयवडाडोए ठाण्हाणपलंवंतमुक्कमुत्ताहलकलावे विवि-
 हमणिरयणविणिम्मवियवरवेइयावेढियेपरंतविभागे सोहम्मवडिसयविभागे सोहम्माए सभाए संकसि सीहासंशसि
 निसन्नं चउरासीए सामाणियसहस्सेहिं अन्नाहि य अणेगाहिं देवकोडाकोडीहिं पंजलिउडाहिं पज्जुवारिज्जमाणं
 पयपडुपडहमुखपमुहतूरनिनायसंवलियतंतीतलतालाणुगयसंगीयपमोयभरनचमाणविलासिणीपलोयणपरं असंभा-
 वणिज्जसुहसंभारमणुभवमाणं सयमेव वज्जपाणिं पुरंदरं, तं च दट्ठण सामरिसं चित्तियमणेणं-अहो को एस अप-
 त्थियपत्थओ दुरंतपन्तलक्खणो लज्जामज्जायपरिवज्जिओ सुरकुलकलंकभूओ अपत्तकाले चिय कालययणं पविसिउ-

कामो? जो ममावि असुरराइणो सीसोवरि वट्टमाणो दिवाइं भोगाइं भुंजमाणो अणाउलं विलसइत्ति, एवं संपे-
हिता सामाणियपरिसोववन्नए देवे संसयसएसु आपुच्छणोचिए सहाविता भणिउं पवत्तो-भो भो देवाणुपिया !
को एस दुरप्पा मम सिरोवरि वट्टइत्ति? ते य सिरसावत्तं करणलपरिगहिणं मत्थए अंजलिं कट्ठु विजएणं वद्धा-
विरुण य सविणयं जण्डिमारद्धा-भो भो देवाणुपिया! एस सुरेदो सोहम्माहिर्वइं महग्गा महाजुइं अपरिअविग-
सासणो सयमेव विहरइ । तथो तव्वणसवणानंतरसमुण्णत्तामारिसाविण्यंभंतो भिउडिबिकरालवयणो भणिउं पवत्तो-
भो भो बुहा ! किमेवं अदिट्ठपरक्कमा मम पुरोवि । कइवयसुरपरियरियं एयं तुम्हे पसंसेह ? ॥ १ ॥
जइ उच्चट्ठाणठिओ किमेत्तिएणवि गुरुत्तणमिमस्स ? । न हु वरइ तरुसिरह्यो कवोडओ नीलंकठसिरिं ॥ २ ॥
अहवा तोलिजंते तुलाए वत्थुमि जं हवइ सारं । तं हेट्ठच्चिय ठायइ इयरं पुण बट्टइ उयरिं ॥ ३ ॥
एत्तो य लहू एसो अरिट्ठवसएण पाविओ सगं । जह कोइ लहइ रजं मायंगकुलप्पसूओऽवि ॥ ४ ॥
भो भो सुचिरं इमिणा सूरविहीणे रणेव्व सुरलोए । काउरिसेण व सुरसुंदरीहिं सज्जं सुहं वुत्थं ॥ ५ ॥
संपइ पुण अवणिज्जइ इमस्स चिररूढदप्पमाहणं । दुट्ठा उवेहियत्ता न हुंति रोगव्व कुसलणं ॥ ६ ॥
तत्थ-जो ववसायं न कुणइ सकमागयसामिभावपरिट्ठो । स सिरीएवि हु सुचइ सो काउरिसोत्ति कलिज्जं ॥ ७ ॥
इय होउ अज्ज सुरलोयसामिणो माणदलणमलिणत्तं । सहसच्चिय कीरंतं पयंडं बलसालिणावि मए ॥ ८ ॥

एवं च चमरासुरदंस्स अपरिभाविथनियभुयबलमाहणदण्जपियं परिभाविऊण पयंपियं सामाणियसुराहिं देव ! एसो हि परभवोवज्जियविसिट्ठुपन्नपरिससमासाइयपवरलोयथलच्छिविच्छडो पुरंदरो, तुमं पुण उज्जमवसावबलाइ गुणगणपरिगओऽवि भवणवासीण अम्हारिसाणं सामी, ता नाह ! सुयसु मच्छं, उवमुंजेसु तुमं सकमावज्जियं सामि-त्तणं, एसो पुण सुरपुरसंपयं, निरत्थओ एत्थ परोप्परं विरोहो, किं कज्जं संसयतुलवलंबिएण नियमाहण्येणं !, निउण-बुद्धीए परिचिंतउ सामी । अपरिभाविथकयाणं कजाणं उवमुंजंतविसतरुफलाणं व पज्जंतविरसत्तणं, नहु एक्कसिएपि माणखंडणासमुब्भूओ अवजसंपसू सुकयसहस्सवारिधारावरिसणेणवि पसमिउं तीरइ, ता सामी ! सयमेव गुणइ जमेत्थ जुत्तं, को अम्ह तुमाहितो विवेयभावो ? ॥

इमं च निसामिऊण गरुयामरिसवसविसप्पंतभिउडिभीममालयलो चमरासुरिंदो समुल्लविउमारद्धो भो भो सामाणिया ! सुरा निरत्थयं समुवहह परिथायपरिणयविवेयविरहियं थविरत्तणं, जेण एवंविहसपहुपराभवपिसुण-वयणनिवहमुल्लवंताण दूरमवक्कतं तुम्ह गरुयत्तणं, गुणा हु गोरवमुवजणित्ति, एत्तो थिय लहुओऽवि परियाएणं गुणा-हियत्तेण गुरुव धेप्पइ जणेणं, कहमण्णाहा अनुमेत्तोऽवि सुचित्तमुदरयामहग्घाविओ सिरम्मि निहिप्पइ सरिसवो, अहवा किमेएण !, अदिट्ठमहपरक्कमाणं तुम्हाणं को दोसो ?, ता सोहेह किं हेलाकरयलतालुण्डुण्णयंतनिवडंतहि गंदुएहिं व कीलेमि कुलाचलेहिं उयाहु गयणंगणविसप्पमाणकखोलोपेळण्डूरियतारयविमाणमालं निरुंभेमि पचलं-पवणपक्खुभिथजलहिजलवेलं, अहवा पयंडमुयदंडचंडिमावसपरित्थि एगत्तीकरेमि भुवणत्तयं, इइ बहुपणारा-

मरिसभरचित्तवयणाडंबराऊरियभवणभ्रंतकरुच्छलंतपडिसहयच्छलेण अणुमन्निउव्व निगगओ सकेण सह जुल्लिअउं सो भयभीयाए सामाणियसभाए, अह ईसिजायविवेगेण पुणो चित्तियं चमरेण-एए सम सामाणियसभावत्तिणो असुरा बाढं भायंति पुरंदरस्स, ता सम्मं न मुणिज्जइ कज्जगई, जइ पुण तत्तो हवेज्ज गंजणा अओ तदभिहम्ममाणेण को मए सरणं पवज्जणिज्जोत्ति परिभाविऊण पउत्तो ओही, दिट्ठो य भयवं महावीरो सुसुमारपुरणरिसरतरुसंडे पडिमापडिवन्नो, तं च दट्ठूण समुट्ठिओ सयणिज्जाओ, निर्यसियं देवदूसं, गओ नाणाविहवयरमयपरहरणपडिहत्थाए चोप्पालगनामाए पहरणसालाए, कयंतभुयदंडविन्ममं गहियं महप्पमाणं परिहरयणं, तयणंतरं साहिलासं नयणं जलीहिं पिज्जमाणो असुरतरुणीहिं किंकायवयावामूढेहिं निरिक्खिज्जमाणो अंगरक्खेहिं दुव्विणीओत्ति उवेहिज्जमाणो सामाणियासुरेहिं किंपि भविस्सइ इह इति संसइज्जमाणो भ्रुवणवइवगेण निगगओ चंमरवंचारायहाणीओ, वेगेण य गच्छंतो संपत्तो भयवओ महावीरस्स समीवं, तिपयाहिणीकाऊण वंदिओ परमभत्तीए, पवत्तो विन्नवेउं, जहानाह ! तुह पायंपकयाणुभावेण दुल्लहावि पुज्जति मनोरहा, अओ इच्छामि तुह निस्साए पुरंदरं हयपरकमं परिसुक्कप-हुत्ताभिरामभियाणिं काउत्ति भणिऊण अवक्कंतो उत्तरपुरिच्छिमंमि दिसिविभागे, समारद्धो वेउवियसमुग्घाओ, विउव्वियं चेगं महंतं घोरायारं जोयणलक्खप्पमाणमेत्तं सरीरं । तं च केरिसं ?-

उत्तुंगघोरीसीसगभागघोलंतकुंतलकलावं । अंजणगिरिसिहरं पिव नवमेहसमूहपरियरियं ॥ १ ॥

अइधोरवयणकंदरफुरंतदाढाकडपदुणेच्छं । वयणुच्छलंतपज्जलियजलणजालाकलाविछं ॥ २ ॥

दिसिचक्कमुक्कउब्भडमुयदंडकंततारयाचक्कं । उरंपंजरुंदत्तणपच्छाइयसूरकरपसरं ॥ ३ ॥

गंभीरनाभिमंडलपसुत्तफणिमुक्कफारफुक्कारं । उद्दामदीहजंवाभरभज्जिरचलणतलदेसं ॥ ४ ॥

कवल्लिउमणं व ससुरासुरंपि तेलोक्कमेक्कहेलाए । भीमाणवि भयजणगं गयणयले पसरियं झत्ति ॥ ५ ॥

एवंविहेण य सरीरेण पहाविओ तुरियतुरियं सुराहिवइसमुहं, तओ वेगवसवियम्भमाणमुहसमीरपवलत्तणपल्लहत्थि^१ यसवडंसुहावडंतसुरविमाणो लीलासमुल्लासियचलणकोडिताडियसमुचुंगसेलटालियगंडपाहाणपहयभूमिवट्ठो अंजणपुं जमेहसंदोहकलयंठभमरनियरसरिसेण देहपहापसरेण लवणजलहिंवेलाजलुप्पीलेणेव पूरयंतो गयणंतरं सरीरगरुयत्तणेण भरितोव तिरियलोयं अणवरयगलगज्जिरवकरणेण फोडयंतोव वंसंडमंडोदरं कत्थइ जलवुट्ठिं सुयमाणो कत्थइ रेणुं ऊरं किरंतो कत्थइ तिमिरनियरं निसिरंतो कत्थइ विज्जुपुंजमुगिरंतो वाणमंतरदेवे भएण छिन्नधन्नं व कंययंतो जोइसिय^२ तियसे वित्तासित्तो फल्लिहरयणमंवरतले वियट्ठमाणो निमसमेत्तेण विलंघियसूरसभिनकखत्तमंडलो पत्तो सुरपुरं ।

अह तारिसविगरालरूवावलोयेण विम्भिथा सुरसमूहा, हा किमेयंति समुल्लवन्तीउ भयवसविंसंठुलगलियनीची^३ बंधणाओ(जाया)शंभियच्च विहाविथा सुहडसत्था जीवियनिरवेक्खावि संखुद्धा अंगरक्खा बालच्च विचलत्तणपुयगगा लोयपाला, किंकायवयाविमूढा जाया सामाणियदेवा, अच्चंतं चमक्किथा तायत्तीसा विसरसमारसंतो य नट्ठो एरावणो,

चमरिंदो पुण एगं चरणं पउमववेइयाए अवरं च सुहम्माए सभाए ठविज्ज फलिहरयेणं महया संभेण तिकसुत्तो
इंदकीलं ताडिज्ज सरोसं एवं भणिउं पउत्तो-भो भो तियसाहम ! कहिं सो सगिहसच्छंदलीलविलासलालसो
असमिक्खियवत्थुसमत्थणवियक्खणो नियसौडीरिमावगन्नियसेससुहडलोगो अदिट्ठुसलभेतसंभावियसमग्गवेरिव-
ग्गविज्जओ पुरंदरो ? कहिं वा अलियवियट्ठिमावगणियजुत्ताजुत्तसमाधारो सकज्जपसाहणोभेत्तपयाप्पियसामिसेवा-
पराओ ताओ चउरासीइं सामाणियसाहस्सीओ ? कत्थ वा निष्फलकलियविविहपयंडपहरणाडंवाओ चत्तारि ताओ
चउरासीओ आयरक्खेदवसाहस्सीओ ? कहिं वा उचुंगगिरिसिहरदलणहुळलिं तमियाणिं कुलिसं ? कत्थ वा ताओ
अप्पडिमरूवलायन्नमणहराओ अणेगाओ अच्छरकोडीओ ? अरेरे मा कज्जविणासंमि भणिस्सह जहा चमरचंचा-
राइणा अमुणियपयप्पयारेण छलेण विणिहया अम्हे, एसोऽहं संपयं तुब्भे अणाहे जरतंख निम्भूलमुम्भूलमि सक्क-
रालेदुंवं फलिहरयेण चूरूमि, किं बहुणा ? जुगवमेव सरणविरहिए कीणासवयणकुहरे पक्खिवाभि, कुणह जमिह
कायव्वं सरेह सरणिज्जं मग्गह सजीवियसंरक्खणोवायं, अहवा दूरुन्नामिथउत्तिंगगादंसियसब्भावसारा समणह
सुरलोयसिरिं, किं निरत्थयसुव्वहह पुरंदरपक्खवायं ? पयडोच्चिय एस ववहारो-जं चिरकालपरिपालियावि कुलंगणा
कालंतरेऽवि नूनमणुसरइ पाणनाहं । अन्नं च—

अववइणव्व पुरंदर ! मह विरहे जं तए इमा भुत्ता । विणयपणयस्स तं पुण तुह सव्वमहं खमिस्समि ॥ १ ॥

सुमिणेवि अदिट्ठभया नियनियभवणोदरेसु य निलुक्का । विलसंतु सुरसमूहा मम पयपणइप्पसाएण ॥ २ ॥
 अणुरुवपइसमागमपभोयभरानिस्सरंतपुलइद्धा । सुरपुरलच्छी वच्छत्थलंमि कीलउ जहिच्छं मे ॥ ३ ॥
 अहवा किमिच्छिएणं ?-मम बाहुपंजरंतरमल्लीणं तिहुअणंपि नीसेसं । आचंदकालियं वसउ मुक्कपरचक्कभयरंकरं ॥ ४ ॥
 इय ताव कुण पणामं सुरिंद ! नो जाव उत्तिमंगंमि । मोडियमउडकडणं निवडइ निविडं फालिहरयणं ॥ ५ ॥
 असमिक्खियनियभुयविक्रमो तुमं जुज्झिउं मए सद्धिं । रंभातिलुत्तमाईण कीस वेहवमुवणेसि ? ॥ ६ ॥
 पढमं चिय कीरंते नयंमि नो दिति दूसणं कुसला । कहविहु कज्जविणासे पच्छायावोडवि नो होइ ॥ ७ ॥
 एवं च असमंजसपलाविणं चमरमसुरिंदं निसामिऊण हेलाए तिक्ककोवभरउक्कुट्टिभिउडिभंगुरियभुमयभीसणपलो-
 यणेण भणियं पुरंदरेण-रे रे दुरायारसिरसेहर दूरपरिमुक्कमेर चमरासुराहम दुट्ठचिट्ठिमाभित्तवित्तासियतियससत्थ !
 पत्थेसि नूणमियाणिमपत्थणिज्जं ? , कहमन्नहा तुहेहागमणविसओ संभविज्जा ? , ता रे वारणोव ससरीरसंभवेण दसणा-
 इणा सुरहिक्क केसकलावेण सारंगोव कत्थूरिगाए चंदणतरुव सोरब्भेण भुयंगमोव फणारयणेण एस तुमं निदग्धेण
 पणामिज्जसि विणासगोअरंति भणिऊण सिंहासणएणं चिय सुरिंदेण सुमरियं वज्जं, तं च सुमरणान्तरेव उक्का-
 सहस्साइं विणिम्भुयंतं जालाकलावं निसिरंतं जलणकणकोडीओ विक्खिरमाणं फुल्लिंमालासहस्सेहिं चक्खुवि-
 क्खेवमुष्पाएमाणं असेसहुयवहनिवहनिम्भियं व सयलसूरकरनियरविरइयं व समग्गेतथलच्छिविच्छहुसंपिण्डणुणाइयं

व ठियं करयले पुरंदरस, मुकं च तेण, तं च तहाविहमदिट्ठुच्चं वेगेणागच्छमाणं पेच्छिऊण संगगसमरच्छच्छाहो
सुमारियसामाणियासुरसिक्खावयणो वयणविणिस्सरंतदीहनिस्सासो पुत्तेहिं जइ परं पावेमि रसायलंति कयसंकणो
संभसुण्णिच्छतरलतारयच्छिविच्छोहसंवलियनहंगाभोगो कहिंपि अत्ताणं गोविउमपारयंतो भयवसपंकपमाणपाणिंस-
पुण्डपडियं फलिहरयणंपि अविगणंतो अविमुणियतकालोचियकायवो अलाहि सेसोवाएहिं, परं तिहुयणपहुणो पाय-
पंकयमियाणिं सरणंति सुमरिऊण उड्डुचरणो अहोसिरो वेगगमणसमुपपन्नपरिस्समनिस्सरंतकक्खासेयसलिलोच्च उ-
क्किट्ठाए चवलाए [दीहाईए] गईए जिणाभिमुहं पलाइउं पवत्तो, अविय—

निहलियदप्पविभवत्तेणेण जायं न केवलं तस्स । लहुयत्तं देहेणवि वेगेण पलायमाणस्स ॥ १ ॥

एसो सो किं वच्चइ जेण तहा जंपियं हरिसमकखं । पहसिजंतो इय दिन्नहत्थतालेहिं तियसेहिं ॥ २ ॥

तह कहवि देहपब्भारभरियभुवणोदरोऽवि चमरिंदो । तवेलं लहु जाओ जह न मुणिजइ पयंगोच्च ॥ ३ ॥

तं च कुलिसं सुरवइपयत्तपक्खित्तं जलणजालाकलावाउल्लियदिसामंडलं कयलयंतं व एक्केहलाए सयलमाखंडल-
पडिवक्खं जावऽज्जिवि थेवमेत्तेण न पावइ सिरमंडलं ताव भयगगरसरो-भयवं ! तुमभियाणिं सरणंति जंपमाणो
पविट्ठो जयगुरुणो उस्सग्गट्ठियस्स चरणकमलंतरे चमरो एत्थंतरे सहस्सनयणस्स जाओ चित्तसंकणो—अहो न खलु
दणुवइणो अप्पणो सामत्थेण सोहम्मकणं जाव संभवइ आगमणं, केवलं भगवंतं तित्थयरं अरिहंतचेइयं वा भावि-

अप्यं सुसमणं वा निस्साए काऊण इहागओ हविजा, ता वाढं अजुत्तं परभवदुहावहं एवमावडिहितिचिंतिऊण पउत्तो ओही, दिट्ठो य भयवओ पायपंकयमणुसरमाणो कुंथुव सुहुमदेहो चमरासुरिंदो, तं च दट्ठुण सहसच्चिय जायचित्तचमक्कारो हाहा हओ म्हि मंदभगोत्ति वाहरमाणो अचंतसिग्घाए गर्इए वज्जमगेण पहाविओ पुरंदरो, जाव य जिणुत्तमंगमि चउरंगुलमपत्तं जायं वज्जं ताव तक्खणमेव पडिसंहरियमणेण, नवरं अइसिग्घगमणवसेण करयलसमीरणेण तरलिया जयगुरुणो कुंचिरा अग्गकेसा, तओ पुणो पुणो सदुच्चरियं निंदमाणेण तिपयाहिणी-काऊण वंदिओ सामी परमभत्तीए, खाभिउमारद्धो य—

देव ! पसीयह न मए विथाणियं तुम्ह चरणनिस्साए । जं एसो चमरिंदो समागओ मं पराभविउं ॥ १ ॥

इण्हि चिय विन्नायं करयलपलहत्थियंमि कुलिसंमि । ता पणयवच्छल ! लहुं अवराहमिमं खमसु मज्झ ॥ २ ॥

न पुणोवि भुवणबंधव ! संसारपरंपरापरमवीयं । एवंविहं अकिच्चं कइयावि अहं करिस्सामि ॥ ३ ॥

इति सविणयं खामिऊण जयगुरुं सक्को उत्तरपुरच्छिमदिसिविभागंमि ठाऊण वामेण चरणेण तिमसुत्तो भूमि-तलमवदालिऊण दणुनाहं भणिउं पवत्तो—भो भो असुराहिव ! सुंदरं तुमए कयं जमसेसजयजंतुसंरक्खणेक्कदिविख-यस्स पडुणो पयपंकयंतरे तिरोहिओडसि, एवं च ऊणमाणेण तए दढमावज्जियं मम हिययं, अवणीओ पुव्वेवरा-णुबंधो, जणिओ आमरणंतं अब्बभिचरियपणयभावो, ता विहरसु जहिच्छाए, भगवओ पहावेण नत्थि तुह ममा-

हितो भयंति आसासिऊण जहागयं पडिनियत्तो तियसाहिबो ।

चमरोऽवि हरिसुक्करिसवियसंतवयणकमलो भगवओ पायकण्णपायवण्णभायपरिगहिओ निरुवसगं नीहरिऊण जहाविहिं भयवंतं पणमिऊण थुणिलमाढत्तो—

सयलजयजीवबंधव ! झाणानलदड्ढुक्कम्मवणगहण ! । तिच्चपरीसहसहणेक्कधीर ! जय जय महाधीर ! ॥ १ ॥

सिद्धिवहुवद्धपडिबंध ! वुट्ठसद्धम्मबंधुरनिहाण ! । चामीयरसरिससरीरकंतिविच्छुरियदिसिनिवह ! ॥ २ ॥

नाह ! तुह पायछायालीणं नो भवभयंणि अक्कमइ । किं पुण सहावसंगुरगिरिदलणुंदुतुरं छालिसं ? ॥ ३ ॥

जत्थ तुह नाह ! सरणं उवेइ ससुरासुरंणि तइलोकं । पायतले तत्थ ठियस्स कह णु वयणिज्जया मज्झ ? ॥ ४ ॥

पत्तच्चिय सुरपुरसंपयावि परमत्थओ मए देव ! । अब्भुदयमूलवीयं जं पत्तं तुम्ह पयकमलं ॥ ५ ॥

लब्भंति सामि ! जइ मग्गियाइं निरवगहाइं भत्तीए । पइजम्मं चिय ता तुम्ह चलणवासं लभेज्जमहं ॥ ६ ॥

इय चमरिंदो सन्भावसारवयणेहिं संशुणिय वीरं । नित्थरियगरुहहरिभयसहन्नवो अइगओ सपुरिं ॥ ७ ॥

जयगुरुवि पभायसमए एगराइयं महापडिमं पडिसंहरिऊण निक्खंतो सुंसुमारसुराओ, कमेण य पत्तो भोगपुरं नयरं, तत्थ य महिंदो नाम खत्तिओ अकारणसमुण्णन्नतिवकोवाणुबंधो भयवंतं दट्ठूण खज्जरितल्लट्ठिसुग्गीरिऊण धाविओ वेगेण हणणनिमित्तं, एत्थंतरे चिरंदसणपाउब्भयभत्तिपब्भारो समागओ तं पएसं सणकुमारसुराहिबो, दिट्ठो य

सो तहाविहवेगेण जिणाभिमुहं इतो, तओ तं निवारिऊण सुरिंदेण पणमिओ जयगुरू, पुच्छिया परीसहपरजय-
पद्धानसरीरवत्ता, गओ य जहाभिमयं ।-भयवंपि बद्धमाणो पलीणमाणो सुरिंदक्यमाणो । तत्तो विनियसगिचा
नंदिग्गसं समणुपत्तो ॥१॥ नंदीनामेण तहिं पिउमित्तेणं शुओ य महिओ य । तत्तो य नीहरित्ता समागओ गिंठय-
ग्गामं ॥२॥ तत्थ य गोवो कोवेण धाविओ वालरज्जुयं घेत्तुं । जयगुरूणो हणणत्थं, सो य निसिद्धो सुरिंदेण ॥३॥

अह भयवं गामाणुगामगमणेण पत्तो निरंतरधवलहरमालालंकियं सुविभत्ततियचउक्कचचररेहिरं कोसंविगुरिं,
तत्थ य भूपालणगुणनाडीनिविडनिबद्धविपक्खरायलच्छिक्कंणुगो सयाणिओ नाम नराहिवो, तस्स य चेडगमहा-
नरिंददुहिद्या अहिगयधम्मपरमत्था तित्थयरपायपंकयपूयणपरायणा भिगावई नाम भारिया, सुणियनिसेसरायं-
तरचारो सुहुमबुद्धिबिभवपरिवालियरज्जुमारो सुगुत्तो य अमचो, तस्स य सयावि जिणधम्ममाणुगरासंभिन्नसत्तसरी-
रघाऊ नंदा नाम भज्जा, सा य सावियत्ति काऊण भिगावईए देवीए सद्धिं वयंसियाभावं दंसेइ, अन्नो य सयलदरिसगिं-
प्पायपरूवणानिरओ नरिंदसम्मओ तच्चावई नाम धम्मपाढओ, तहा तत्थेव नयरीए विविणिजणचक्खुभूओ धणावहो
नाम सेट्ठी, मूला य से भारिया, एयाणि नियनियकुसलाणुट्ठाणसंगयाणि वसंति, तत्थ य भयवया पोसवहुलं-
पाडिवए एवंविहो दुरणुचरो अभिगहो पडिवन्नो, जहा-जइ कालायसनियलबद्धचलणा अवणीयसिरोरूहा सोय-
भरावरुद्धकंठगगरगिरं रयमाणी रायकन्नगावि होऊण परगिंहे पेसत्तणं पवन्ना तिन्नि दिणाइं अणसिया अरुंथेतर-

निहितैकचलणा बीयचलणलंघियधदुवारदेसा पडिनियत्तेसु सयलभिक्षायरेसु सुप्पेण कुम्मासे पणामेइ ता परमहं पारेमिस्ति कयनिच्छओ पुरजणेण अणुवलक्खिज्जमाणाभिगहविसेसो बावीसपरीसहसहणट्ठाए असंपज्जंत- जहिद्वियभोयणोऽवि पइदिवसं उचावएसु मंदिरेसु पयत्तो परिभमिउं जयगुरू । पुरजणोऽवि भयवंतं अगहियभि- वखं अणुदिणं गेहंगणाओ चेव नियत्तमाणं पेच्छिऊण अचंतसोगंसंभारतरलियमाणसो किंकायव्वयावामूढो चिंति- उमारद्धो, कहं?—

किं दुहनिबंधणेणं धणेण ? किं तेण मणुयभावेण ? । भोगोवभोगलीलाए ताए किं वा दुहफलाए ? ॥ १ ॥

जइ एवंविहसुणिपुंगवस्स गेहंगणं उवगयस्स । पाणन्नपयाणेणवि उवयारे नेव वट्ठामो ॥ २ ॥ जुम्मं ॥

कह वा कम्मजलाउलमणेगदुहमयरभीसणावत्तं । संसारसायरमिमं दाणेण विणा तरिस्सामो ? ॥ ३ ॥

अहवा धन्नाण गिहे पविसइ एवंविहं सुमुणिरयणं । भिक्षवापरिग्गहेण य अइधन्नाणं जणइ हरिसं ॥ ४ ॥

जइ एक्कं चिय वेलं कहमवि पडिलभिओ हवइ एसो । ता पाणिपल्लवे संवसंति सुरभोक्खसोक्खाइ ॥ ५ ॥

इय जह जह जिणनाहो भूरिपयारेहिं दिज्जमाणंपि । भिक्खं नो अभिक्खइ तह तह खिज्जइ पुरीलोगो ॥ ६ ॥

एवं च चत्तारि मासे कोसंबीए हिंडमाणो भयवं अन्नया पविट्ठो सुगुत्तमंतिणो भवणं, दूराओ चिय दिट्ठो सुनं- दाए, पच्चभिन्नाओ य जहा सो एस भयवं महावीरसामिति, तओ अणाइक्खणिज्जं पभोयपब्भारसुव्वहंती उट्ठिया

झडति आसणाओ, नीणिआ परमायेरेण भिक्खा, भयवंपि निग्गओ गेहाओ, सुनंदावि अद्धिं काउत्तारद्धा, ताहे दासीहिं भणियं-सामिणि ! एस देवज्जओ न सुणिज्जइ केणइ कारणेणं दिणे दिणे अगहियभिक्खो तक्खणे पडि-
 नियत्तइ, एवं भणिए तीए नायं, जहा-नूणं कोइ अभिग्गहविससो, तेण तंमि असंपज्जमाणे अकथकज्जो चैव निज्जाइ जिणिंदो, इमं च से चिंतयंतीए जाओ बाढं चित्तसंतावो पम्हुट्ठा गेहवावारा विसुमरिओ सरीरसिंगारो पल्हत्थियं
 करकिसलए गंडयलं, एत्थंतरे समागओ सुगुत्तामचो, पलोइया य एसा तेण, तओ पुच्छिया, जहा-कमलमुहि ! कीस निक्कारणं रणरणयसुव्हंतिव लब्बिखज्जसि ? , न ताव सुमरेमि मणागंपि अत्तणो अवरंहं, मइ अविणयपरि-
 हारपरायणे परयणोऽवि न संभाविज्जइ तुह पडिक्कलकारिति, तीए भणियं-पाणनाह ! अलमलियंसंभावणाहिं, नत्थि थेवमेत्तोऽवि कस्सइ अवराहो, केवलं जस्सप्पभावेण लीलाए लंघिज्जइ दुग्गमोवि भवन्नवो मणोरहागोयोरपि
 पाविज्जइ अपुणागमं सिवपयं अइदूरुल्लसिओऽवि विद्विज्जइ अकल्लाणकोसो तस्स भयवओ भुवणनाहस्स वद्धा-
 णसामिणो बहूइ वासराइं अणसियस्स, न सुणिज्जइ कोइ अभिग्गहविससो अणेण गहिओत्ति, अओ किं तुह बुद्धीविमवेण ? किं वा अमच्चत्तेणं ? जइ एवं अभिग्गहं न जाणहत्ति, अमच्चेण भणियं-पिए ! परिचयसु संताणं,
 कळे तहा केमि जहा एस अभिग्गहो सुणिज्जइ, इय एयाए कहाए वट्टमाणीए विजया नाम पडिहारी भिगावईए देवीए संतिया, सा केणइ कारणेण आगया, तमुल्लावं सोऊण भिगावईए सव्वं परिकेहइ, इमं च सोचा विगावईवि

महादुक्खेण अभिभूया, सोगाउरा जाया, राया य तं पएसमणुपत्तो पुच्छइ-देवी ! किं विमणदुम्मणा लक्खिज्जसि ?, तीए भणियं-देव ! किं परिक्खेमि ?, तुम्हे दुग्गदुग्गइमणमूलेण इमिणा रज्जभेरेण पच्छाइयवियेया एत्तियं पि न सुणह, जहा कत्थ सामी विहरइ ?, कहं वा भिक्खं परिभमइत्ति, वहुं निब्बच्छिऊण साहिओ अभिगहवइयरो, राइणा भणियं-देवि ! वीसत्था होहि, कळे सवपयारोहिं जाणामि परमत्थंति भणिऊण उवविट्ठो अत्थाणमंडवंमि, वाहराविओ सुगुत्तामच्चो, समागओ एसो, तओ पणमिऊण राइणो पायपीठं उवविट्ठो जहोचियासणे, भणिओ राइणा-अहो अमच्च ! किं जुत्तमेयं तुज्झ जं भयवंतं इह विहरमाणं पि न जाणसि ?, अहो ते पमत्तया अहो ते सद्धम्मपरंमुहया, अज्ज किर सामिस्स चउत्थो मासो निरसणस्स अविन्नायाभिग्गहवियेसस्स वट्ठइत्ति, सुगुत्तेण भणियं-देव ! अवरावरकज्जंतराजरियधरवासवासंगित्तेणेण न किं पि सुणियं, इयाणिं पुण जं देवो आणवेइ तं संपा-डेमिन्ति भणिए रत्ता सद्दाविओ तच्चावाइ धम्मसत्थपाढगो, पुच्छिओ य एसो-जहा भह ! तुह धम्मसत्थसु सव-पासंडाणं आयारा निरुविज्जंति, ता साहेहि को भगवया अभिग्गहवियेसो पडिक्खोत्ति ?, तुमं पि अमच्च ! बुद्धि-वलिओ, अओ वीमंसेसु को एत्थ उवाओ ?, खणंतरं च वीमंसिऊण तोहिं भणियं-देव ! बहवे दव्वेत्तकालभावमे-यमिन्ना अभिग्गहवियेसा सत्त पिंडेसणाओ सत्त य पाणेसणाओ हवंति, अओ न नज्जइ कोऽवि अभिप्पाओत्ति । तओ रत्ता सवत्थ नयरीए काराविया उग्घोसणा, जहा-भयवओ भिक्खं भमंतस्स अणेगप्पगारोहिं भिक्खा नीणि-

यद्वत्ति, इमं च निसामिज्ज परलोयसुहकंखिणा विचित्तनेवत्थधारिणा अण्णमत्तचित्तेण नयरज्जेण पइण्णामंदरस्स गोयरचरियं पविट्ठस्स भयवओ पइदिणं पणामिज्जइ अणेण्णयोरोहिं भिक्खा, न य विण्णइ सामिणा, एवं चकहिंणि असंपज्जमाणजहासमीहिियपिंडविमुद्धावि अमिलाणसररीरलायन्नो अदीणमणो य ठिओ तीए चेव पुरीए भयवं ।
 एयं ताव एवं ।

इओ य-सयाणियस्स रन्नो चारपुरिसेहिं आंगतूण कहियं जहा-देव ! तुम्ह पुव्वेरी दहिवाहणो राया संपयं थोवपरिवारो पमत्तो य वट्ठइ, अओ जइ पंचरत्तमेत्तेण देवो तत्थ वच्चइ ता निच्छियं समीहिद्यत्थसिद्धी जायइत्ति-
 पमणिए राइणा दवाविया सन्नाहभेरी, संवूढा सुहडा संखुद्धा सामंता, चलिओ राया महासामग्गीए, आरुद्धो य नावासु, तओ अणुकूल्याए पवणस्स दक्खत्तणेणं कन्नधारजणस्स एगरयणिमेत्तेण अचित्तियागमणो संपत्तो चंपा-
 पुरी, असंखुद्धा चेव वेढिया एसा, दहिवाहणोऽवि सामग्गिं विणा जुज्झउमपायंतो किमेत्थ पत्थावे कायधंति वाउलमणो भणिओ मंतिजणेण-सामि ! कीस मुज्झह, सब्बा एत्थावसरे पलायणमेव जुत्तं ।

यतः-त्यजेदेकं कुलस्यार्थं, ग्रामस्यार्थं कुलं त्यजेत् । ग्रामं जनपदस्यार्थं, आत्मार्थं पृथिवीं त्यजेत् ॥ १ ॥

प्रस्तावसदृशं वाक्यं, सद्भावसदृशं प्रियम् । आत्मशक्तिसमं कोपं, यो जानाति स पण्डितः ॥ २ ॥

विक्रमावर्जिताः सद्यः, संपद्यन्ते पुनः श्रियः । जीवितव्यमवक्रान्तं, तेन देहेन दुर्लभम् ॥ ३ ॥

सर्वेषामेव वस्तूनां, जीवितव्यमनुत्तमम् । तदर्थं राज्यलक्ष्म्याद्यास्तचेत् नष्टं वृथा परम् ॥ ४ ॥
एवं तेहिं भणिओ सरीरमेत्तेण पलाणो दहिवाहणो, सयाणियरन्नावि घोसाविं नियखंवावारे, जहा-भो भो ! दंड-
नाहसुहडपमुहा चमूचरा ! गेणहेज्जह जहिच्छाए एत्थ नथरीए जं जस्स रोयह, मा भमाहितो भणागंणि संकेज्जहत्ति,
एवं जग्गेहे खुट्टे पयट्ठो रायलोणो भग्गो पागारो विहाडियाइं गोपुरकवाडाइं दुट्टिउमारुद्धं असेसंणि नयरं, तहाविहे
य असमंजसे वट्टमाणे दहिवाहणस्स रन्नो अग्गमहिंसी धारिणी नाम देवी वसुमईए दुहियाए समं इओ तओ पलाय-
माणी पत्ता एगेण सेवगपुरिसेण, रायावि संपाइयसमीहियपओयणो पडिनियत्तो नियनयरिहुत्तं, सो य सेवगो
धारिणीदेवीए रूवेण लायन्नेण सोहग्गेण य अवहरियहियओ पहे वच्चंतो जणाणं पुरो भणइ-एसा सग पत्ती होही,
एयं च कन्नगं विक्किणिस्सत्ति, एयं च से उल्लावं सुणिऊण भयभीया धारिणी चित्तिउं पवत्ता-

कह ससहरकरधवले कुलंमि नीसेसमुवणपयंडंमि । जाया मह उप्पत्ती चेडयनरनाहगंहंमि ? ॥ १ ॥
कह वा नमंतसामंतमउल्लिढग्गपायवीढेण । दहिवाहणेण रन्ना ठवियाडुहं पणइणिपयंमि ? ॥ २ ॥
कह वा जिणिंदवयणारविंदसंभूयसमयसवणुत्था । मम सययं वसइ मणे अकज्जविवरंसुहा बुद्धी ? ॥ ३ ॥
कह एस हीणसत्तोवि सुक्कमंरं ममं समुद्दिस्स । वागरइ जहा महिलं अहमेयं किल करिस्सामि ? ॥ ४ ॥
ता पावजीव ! अज्जवि अस्सुयपुव्वं इमंणि सुणिऊण । किं निहेरमि न निछज्ज ! गंजणं सहमि सीलस्स ॥ ५ ॥
हरहासहंसधवलं सीलं मयलंति नो सुकुलजाया । करिकन्नतालंचलजीवियकज्जेण कइयावि ॥ ६ ॥

कह वाविहु मम दुहिया एसा उच्छंगसंगसंभूया । परहत्यगया धरिही नियजीयं विरहसंतता ? ॥ ७ ॥

इय एवंविहसंकपपणुपन्नतिवदुक्खाए । निम्भच्छियं व जीयं नीहरियं से उरो भेंचुं ॥ ८ ॥

तीसे य अपत्तकालमरणं अवलोइऊण चित्तिं तेण सेवगपुरिसेण, अहो दुट्ठ मए भणियं—महिला होहिति, एसा हि महाणुभावा कस्सइ पुरिसोत्तमस्स भज्जा संभावज्जइ, अओ चिय मम दुव्वयणायन्नणेण संखुहियहियया मया, ता किमित्थ अइक्कतत्थसोयेणेण ? एयं कन्नगं इयाणिं न किंपि भणिस्सामि, मा एसावि मरिहिति । ताहे मधुरवयणेहिं अणुअत्तमाणा आणीया कोसंवीं नयरिं, विक्कयनिमित्तं च उड्डिया रायमगे, अह धम्मकम्मसंजोएण तणएस्स जाइणा दिट्ठा सा धणावहसेट्ठिणा, चित्तिं चउणेण-अहो एरिसाए आगिइए न होइ एसा सामन्नजणदुहिया, जओ अणलंक्रियावि जलहिबेलव्व वहइ किंपि अपुवं लावन्नं, किससरीरावि मयलंछणलेहव्व पायडइ कंतिपडलं, ता जुज्जइ एसा मम बहुदददाणेण गिणिहत्तए, मा हीणजणहत्यगया पाविही वराइ अणत्थपरंपरं, एयसंगोवणेण य जइ पुण इमीए सयणवग्गेण ममं समागमो होज्जत्ति कलिरूण जेत्तिं सो मोल्लं भणइ तत्तिं दाऊण गहिधा, नीया सगिहे, पुच्छिया य-पुत्ति ! कस्स तं धूया ? को वा सयणवग्गो ? तओ उत्तमरायकुलपसूयत्तणेण सयं नियव-इयरं कहिउमपायंती ठिया एसा मोणेणं, पच्छा सेट्ठिणा धूयत्ति पडिबन्ना, समप्पिया मूलाभिहाणाए सेट्ठिणीए, संलत्ता य एसा-जहा पिए ! धूया इमा तुह मए दिन्ना, ता गोरेवेण संरक्खेज्जासि, एवं च जहा निययवरे तहा

सा तत्थ सुहेण संवसइ, ताए य सो सेट्ठी सपरियणो लोगो य सीलेण विणएण वयणकोसहेण य वाढं रंजिय-
हियओ समानो चंदणसिसरसहावत्तणओ पुच्चाभिहाणमवणेऊण चंदणत्ति बीयं नामं उवइ, एवं सा चंदणत्ति परि-
यणेण वाहरिज्जंती वट्ठुउमारद्धा, गच्छंतेसु य दिणेषु वियंभियो से ईसि जुघणारंभो, तवसेण य समुल्लसिओ
सविसेसं लायन्नपगरिसो, विजियकुवलयविच्चमं वित्थरियं नयणजुयलं, अलिकुलकज्जलकसिणो दीहत्तणं पत्तो केस-
पासो । अविय—

रुवपरिवज्जिओऽविहु जुघणसमयंमि हवइ सस्सिरीओ । किं पुण सभावओ चिय सुकुमार सा नरिंदसुया ? ॥ १ ॥

तीसे य पइदिणं बहुमाणिं रूवसंपयं पलयंती मूला सेट्ठिणी वाढं मच्छरमावहइ, परिचितेइ य, जहा—को एयं
सहहिज्जा जन्न इमं सेट्ठी परिणेऊण घरसामिणी करेज्जा?, ता सव्वहा मम विणासाय होअवेमयाए, अओ जइ
किंचि छिद्दं पावेमि ता एयं ववरोएमि । अन्नया य सो धणावहसेट्ठी गिम्हुणहकिंलतदेहो विवणिपहाओ आगओ
नियमंदिदं, तम्मि य पत्थावे परियणाओ नत्थि कोऽवि जो चलणपक्खालणं करेइ, ताहे अइविणीयत्तेण चंदणा
समुट्ठया पाणियं गहाय पायसोहणत्थं, निवारिज्जमाणावि सेट्ठिणा जणगोत्ति कलिऊण पयट्ठा घोविउं, अह नीस-
हत्तणओ कुमारभावस्स सिट्ठिलियबंधणो होऊण निवडिओ भूमियले दीहो से कुंतलकलावो, मा चिक्खहे पडि-
हिति करकलियलीलालट्ठीए समुक्खित्तो निवियारमणेण सेट्ठिणा, वट्ठो य । एत्थंतरे अणवरयछिद्दवेच्छणपराए

ओलोयणंतरगयाए दिट्टमिमं पावाए अणत्थमूलाए मूलाए, ताहे ईसाभरवित्थरतदढकोवपाडलच्छीए, इत्थीसभा-
 वओ चिय अचंतं तुच्छहिययाए चित्तियमेयाए इमं-जं पुच्चिं तत्किंयं मए आसि तभियाणिं पयडत्तणमणुभवइ विगण-
 परिहीणं, कहमन्नहा जणगत्तं वायामेत्तेण जंपिऊण पुरा सेट्ठी इमीए दइओव केसपांसपि संजमइ, ता जावज्जिनि लज्जं
 समुज्झिऊणं न पणइणिपयंमि ठवेइ सेट्ठी एयं ताव उवायं करेमि अहं, इय सुविमुद्धपि जणं विवरीयं गियमइए
 कलिऊण मूला मूलाउ चिय उद्धरिउं चंदणं महइ । अह पक्खालियचलणे खणं कयवीसामे बाहिं नीहरियंसि
 धणावहे ईसावसुप्पन्नमच्छराए सेट्ठिभज्जाए वाहराविऊण ण्हावियं मुंडावियं चंदणाए सीसं, बहं ताडिऊण लोहसं-
 कलाए चरणे निगडिऊण य पक्खत्ता एसा दूरयरमंदिरंमि, दिन्नं निविडकवाडसंपुडं, भणिओ य परिगणो-ओ
 सेट्ठिणो इमं वइयरं साहिस्सइ तस्सवि एस चेव दंडो मए कायद्धो, अओ वाटमापुच्छमाणेऽवि सेट्ठिणि न के-
 यवमेयंति पुणो पुणो पन्नविऊण गया सगिहं । विगालसमए य समागओ धणावहो, कहं चंदणत्ति पुच्छिओ
 परिगणो?, मूलाभएण न सिट्ठं केणावि, तेण नायं-पासायतले कीलंती भविस्सइ, एवं रयणीएवि पुच्छिगा, तत्थवि
 तेण नायं-जहा पसुत्तत्ति, नवरं वीथदिवसेऽवि न दिट्ठा, तइयदिणे य अचंतमाउलचित्तस्स आपुच्छमाणस्सवि पुणो
 पुणो जाव न कोइ साहेइ ताव जाया से आसंका-मा केणइ विणिहया होज्जत्ति, समुप्पन्नगाढकोवो भणिउं पयचो-
 अरे रे साहेइ अवितहं तीसे पउत्तिं, अहवा मे सहत्थेण मारइस्सं, जओ एरिसिमुपउत्तंडभाडंवरणे न मुणिजइ तुप्पह

कुसलत्तणंति भणिए चितियेक्काए थेरदासीए, जहा जीविथम्हि बहुकालं सयेमेव, पचासन्नविथाणिं मरणं, एत्तो-
उवि किं करिस्सइ मे मूला?, ता साहेमि चंदणं, जीवउ मम जीविणवि सा वराई, परजीवरक्खणं हि महापुब्बं
बुचइ समयसत्थेसुत्ति चित्तिऊण सिट्ठो सेट्ठिणो परमत्थो । दंसियं च तं गिहं जत्थ सा अयरुद्धा अच्छइत्ति, तओ
गंतूण उग्घाडियं तं गिहं सेट्ठिणा, पलोइया य सिरोज्जणीयकेसपब्भारा छुहाकिलाभियसरीरा मत्तमायंगचलणमलिय-
कमलमालच्च विमिलाणदेहच्छवी चंदणा, तं च दट्ठूण गलंतवाहणवाहाउल्लोयणो-पुत्ति! वीसत्था होहत्ति समा-
सासिऊण गओ महाणससालाए, निरुवियाइं भोयणभंडाई, कूराइयं च विसिट्ठं भोयणमपेच्छमाणेण कुम्मासे चिय
मुप्पकोणे घेत्तूण समप्पिया चंदणाए, भणिया य-पुत्ति! जाव अहं तुह नियलभंजणनिमित्तं आणेमि लोहथारं ताव
मुंजसु तुमं एयंति भणिऊण गओ सेट्ठी, सावि सुप्पप्पणामिए दट्ठूण कुम्मासे करिणिच्च जूहपब्भट्ठा नियकुलं संभ-
रिऊण सोइउं पवत्ता । कहं?—

जइ ताव दइव! तुमए नरवइगेहे अहं विणिम्मविया । ता कीस एरिसावयमहणवे दुत्तरे खित्ता? ॥ १ ॥

सा रायसिरी सो जणणिजणगसम्भावनिम्भरो नेहो । कह सव्वंपि पणट्ठं गंधवपुरच्च वेगेण? ॥ २ ॥

खणमुल्लसंति उट्ठु खणेण निवडंति हेट्ठओ सहसा । खरपवणुद्धुयधयवडसमाइं ही विहिबिलसियाइं ॥ ३ ॥

इय दुव्वहसोगभारावरुद्धकंठक्खलंतवयणा सा । निवडंतसलिलबाहूप्पवाहधोयाणणा बाला ॥ ४ ॥

तण्हाछुहाकिलाभियकबोलमह पाणिपल्लवे ठविउं । वयणं खणंतरं रोविऊण दीहं च नीससिउं ॥ ५ ॥

ते सुप्पकोणनिसिए कुम्मासे सुणिसणं व निन्नेहे । गिण्हइ भोयणहेउं किमभवखं छुहकिंलताणं ? ॥ ६ ॥

अह चित्तियमेयाए जइ एज्ज इमंमि कोइ पत्थावे । अतिही ता से दाउं जुज्जइ मह भोयणं काउं ॥ ७ ॥

इति परिभाविऊण पलोइयं दुवाराभिमुहं, एत्थंतरे चुन्नियचाभीयररेणुसुदरेण कायकंतिपडलेण पूरयंतोव गयण-
यलंगणं उवसंतकंतदिट्ठिप्पहापीऊसवरिसेण निववंतोव दुहसंतत्तपाणिगणं नगनगरसिरिवच्छमच्छसोवत्थियलंछिएण
चलणजुयलेण विचिच्चित्तंकिंयं व कुणमाणो महीयलं सुहकम्मनिचओव पच्चक्खो अहाणुगुवीए विहरमाणो
समागओ तं पएसं भयवं महावीरजिणवरो, तयणंतरं अप्पडिमरूवं भयवंतं दट्ठूण अच्चंतमसारं कुम्मासभोधणं च
निरिक्खिऊण दूरमजुत्तमेयं इमस्स महासुणिस्सत्ति विभावमाणीए सोगभरगगरगिराए गलंतवाहप्पवाहाउल्लो-
यणाए भणियमणाए-भयवं ! जइवि अणुचियमेयं तहावि मम अधन्नाए अणुगहट्ठं गिण्हह कुम्मासभोधणंति,
भयवयावि धीरहियएण निरुविऊण समग्गाभिग्गहविसुद्धिं पसारियं पाणिपत्तं, तीएवि निविडनिगज्जडियं कहं-
कहवि दुवारस्स बाहिरुद्देसंमि काऊण चलणमेक्कमवरं च भवणब्भंतरंमि सुप्पेण पणाभिया कुम्मासा, अह जयगुरुग-
रुयाभिग्गहपूरणपरितुट्ठा गयणयलमवयरिया चउव्विहा देवनिवहा पहया दुंदुही पडिया च पारियायमंजरीसगाहा
भणिरभमरोलिसंवलिया कुसुमवुट्ठी वरिसियं गंधोदयं निवडिया अद्धत्तेरसकोडिमेत्ता सुवणणरासी मंदंदोलियविलया

य वल्लरीकला पवाइओ सुरभिसमीरणो वियंभिओ भवणब्भंतरे जयजयारवो । अविय—

दिसिदिसिमिलंतहरिसिनारजणजणियवहलहलबोलं । नचंततरुणिसत्थं वज्जंताउज्जसंवायं ॥ १ ॥

पइखणपहिट्टुसुरगणतिवइण्णोडणनिनायभरियनहं । मंगलमुहलसुरगणसमूहसंसोभियदियंतं ॥ २ ॥

इय जयपहुपारणगे न केवलं हरिसियं तमेव पुरं । सविसेसरजियमणा जाया पायालसग्गावि ॥ ३ ॥

एवंविहे य परमपमोयसंभारे समुप्पन्ने मुणियजयगुरुपारणगवुत्ततो समागओ कोणुगाखंधाधिरूढो पहाणपुरजणा-
णुगओ अंतैउरसमेओ सयाणियनरनाहो, अमच्चोडवि भज्जासहिओ संपत्तो सेट्ठिमंदिरं, पॅखोलितारहारैरंहंतवि-
च्छिन्नवच्छत्थलो माणिक्कमउडडिप्पंतउत्तिमंगो कडयतुडियथंभियवाहुपरिहो पुरंदरो य, तीसे य चंदणाए देवयाणु-
भावेण पुवंपिव नीहरिओ पवरचिहुरभारो नियलाणिवि जच्चकंचणमयाणि नेउराणि जायाणि, अन्नोहि य हारद्धहारक-
डिसुत्तयकडयंकुंडलतिलयपमुहरयणाभरणेहिं अलंकियमसेसं सरीरं । एत्थंतरे संपुलो नाम दहिवाहणरन्नो कंचुइज्जो
सयाणियरन्ना पुवं वंधिऊण जो आणिओ आसि सो तक्खणं चिय वसुमइं दट्ठुण जायपच्चभिन्नाणो सुमारियपुव्वसुच-
रिओ तीसे पाएसु निवडिऊण सुक्कपोक्कारं रोविउमारद्धो, महुवरयणेहिं आससिऊण कोऊहलेण पुच्छिओ राइणा-
मह ! केण कारणेण एयाए पायपकए निवडिऊण सहसच्चिय अचंतसोगनिब्भरं परुन्नोडसि ? तेण जंणियं—देव ! चंपा-
पुरीपरमेसरदहिवाहणरायगमहिसीए धारिणीदेवीए असेससीमंतिणीतिलयभूया धूया एसा, कंहं तारिसविभवसमुदयं

पाविऊण इयाणिं नियजणणिजणगरहिया परणिहे वसइत्ति एएण कारणेण, राइणा भणियं-भइ ! मा सोएउ
 असोयणिज्जा हि एसा जीए तिहुयणेक्कादिवायरो भवगतपडतजणलगणक्कसंभो भयवं सहत्थेण पडिलायिओ ।
 भिगवईए भणियं-जइ एसा धारिणीहुहिया ता मम भणिणीधूया हवइत्ति । एत्थ पत्थावे थुवमाणो सुवपइएउहे
 सामी पंचदिणोणछम्मासतवपज्जंतकयपारणणो नीहरिओ धणावहमंदिराओ, अह अज्जुकइयाए लोगस्स अयमाय-
 निरेक्खत्तणओ पढुभावस्स सयाणियराया तं सुवण्णदुट्ठिं गहिउसारद्धो, तओ पुरंदरेण सुणिऊण से वित्तयिं
 भणियं-भो भो महाराय ! न एत्थ सामिकोडुबियभावो, किंतु ज्ञस्स कस्सइ सहत्थेण एसा कम्मणा इमं यियइ
 तस्सेव हवइ, एवं च भणिए पुच्छिया रत्ता चंदणा-पुत्ति ! कस्सेयं दिज्जइ ?, तीए भणियं-किमिह पुच्छणिजं ?,
 एयस्स चेव निक्कारणवच्छलस्स जीवियदाइणो मम पिउणो धणाग्रहसेट्ठिणो पणाभइत्ति, ताहे सेट्ठिणा संगोमिमा
 वसुहारा, पुणोऽवि संक्खेण भणिओ राया-एसा चरिमसरीरा भोगोवभोगपिवासायसुही महाजुभावा भयवओ यत्तमा-
 णस्स समुप्पन्नकेवलालोयस्स पढमा अज्जाणं संजमुज्जोगपवित्तिणी तिस्सिणी भविस्सइ, अओ सम्मं रक्खेज्जासि इति
 भणिऊण अइंसणसुवगओ तियसाहिओ । राइणावि कन्नतेउरे सबहुमाणं संगोविया चंदणा । तयणंतरं च असाखं
 संसारस्स तरलतरंगभंगुरत्तणं संजोगस्स कुसग्गयजललवंचलत्तणं जीवियवस्स पज्जंतविरसत्तणं वित्तयपडिंचवस्स
 परिभावयंती सा गमेइ कालं, इमे य मणोरहे करइ, जहा-

भगवद् पुंदरदसे ! जणिहिसि तं वासरं तुमं कइया ? । जत्थ सहत्थेण जिणो उत्तारेही भवाओ ममं ॥ १ ॥
कइया ससुरासुरजीवलोयमज्झट्टियस्स जयगुरुणो । वयणामयं पिबिस्सामि सवणपुण्डहिं अविरामं ॥ २ ॥
कइया निस्सेयससोकखमूलहेऊ खणो भविस्सइ सो । देहंमिवि निरवेक्खा निस्संगा जत्थ विहरिस्सं ॥ ३ ॥
कइया उग्गमउप्पायेणसणादोसलेसपरिहीणं । पिंडं अन्नसंती भमिहं उच्चावयगिहेसु ॥ ४ ॥
इय पवरमणोरहकप्पणाहिं तीसे दिणाइं वोलेति । भावेण सबविरइं फासंतीए ससत्तीए ॥ ५ ॥
मूलावि सेट्ठिणी सुणियवित्तंतेण बहुप्पयोरहिं निंदिया नयरीजणेण ।

जयगुरूवि पुरागराइसु परिब्भमतो गओ सुमंगलाभिहाणगामे, तत्थ सणंकुमारसुरिंदो भत्तीए तिप्पयाहिणी-
काऊण भगवंतं वंदइ पियं च पुच्छइ, अह खणमेक्कं पज्जवासिऊणं सट्ठणे पडिनियत्ते सुरिंदे सामी सुछेत्तसंनिवसंमि
वच्चइ । तत्तोवि माहिंदक्कप्पाहिवइणा हरिसुक्करिसेणं वंदिओ समानो विनिक्खमिऊण पालयं नाम गामं पट्ठिओ,
तहिं च धाहिलो नाम वाणिओ देसजत्ताए पयट्ठो सामिं संसुहमितं दट्ठूण अमंगलंतिकाऊण रोसवसायंविच्छो
नीलपहापडलपल्लवियगयणमंडलं कारवालमायट्ठिऊणं एयस्स चैव समणगस्स मत्थए अवसउणं निवाडेमिच्चि पहाविओ
वहत्यं वेगेण, एत्थंतरे सुमारियसुरिंदाएसेण पुव्वमणियसिद्धत्थवंतरेण छिन्नमेयस्स सहत्थेण सीसं, तंमि य विणिहए
अहासुहं विहरमाणो जयगुरू पत्तो चंपानयरीए, ठिओ साइदिन्नामाहणस्स अग्गिहोत्तवसहीए एगदेसंमि, जाओ य

दुवालसमो वासारत्तो, अह चाउम्मासखमणपडिवन्नस्स सामिणो माणिभदुब्रभइनाभाणो वाणमंतरसुरिंदा भत्ति-
भरमुवहता रयणीए समांगंतूण चत्तारिवि मासे जाव पूयं करेति, ते य दट्ठण विब्धिमणो साइदत्तमांहणो विचिं-
तेइ-किं एस देवज्जगो जाणइ किंपि? जं देवा एयमणवरथं पूयंति पज्जुवासिंति य, तओ परिक्खानिभित्तं
जंपियमणेण—

भयवं! एत्थ सरीरे करसिरपमुहंगसंगए अप्पा । को भणइत्ति? तत्तो भवोत्ति जिणेण से कहियं ॥ १ ॥

जो अहमेवं मन्नइ, केरिसओ सो? अईव सुहुमोत्ति । सुहुमंपि किं भणिज्जइ?, इंदियगेज्झं न जं होइ ॥ २ ॥

एत्तो चिय सद्धानिलंगंधाईया, लहंति न कयाइ । अत्तववएसमेए, जं गेज्झा गाहगो अप्पा ॥ ३ ॥

इय एवमाइपसिणप्पवंचपरमत्थवित्थरे कहिए । विप्पो उवसंतमणो जयगुरुणो कुणइ बहुमाणं ॥ ४ ॥

अह पज्जंतमुवगए वासारत्ते जिणेसरो वीरो । कम्ममहिमहणसीरो जंभियगामंमि संपत्तो ॥ ५ ॥

तत्थ सुरिंदो वंदितु सायरं दंसिऊण नट्टविहिं । कइवयवासरमज्जे नाणुप्पत्तिं परिकहेइ ॥ ६ ॥

तत्तो मिंढियगामे पुबुवयारं सरित्तु चमरिंदो । नमिऊण चलणजुयलं जहागयं पडिनियत्तोत्ति ॥ ७ ॥

इय अणवरयसुरविसरथुणिज्जमाणचरणो दुस्सहपरीसहमहोयहिदरतीरपत्तो आणुपुद्दीए परिब्भममाणो संपत्तो
छम्मासिगामं, ठिओ य तस्स बाहिभागंमि असेससत्तोवरोहरहियंमि पलंबियभुओ काउस्सगेणं । एत्थंतरे तिवि-

दुमवतत्ततयसाउरियसवणवेयणाभिहयसेज्जालपचइयं समुदिन्नं अचंतमसुहं भगवओ वेयणीयं कम्मं, सो य
सेज्जालजीवो तत्थेव गामे गोवत्तणेण वट्टमाणो वसहे भगवओ उस्तगट्टियस्स समीवे गोचूण गोदोहयाइक्खे
पविट्ठो गाममज्झे, ते य वसहा निरकुसं संचरमाणा पविट्ठा अडविमि, इओ य खणंतरेण समागओ गोवो, समाउल-
हियओ गोणे अपेच्छमाणो पुच्छइ-भो भो देवज्जग ! मम संतिथा एवंचिहस्वा गोनगा तुमए दिट्ठपुवा न वत्ति,
पुणो पुणो सदायरएणवि भणिज्जमाणेणावि जाहे जयगुरुणा न किंपि जंपियं ताहे पलयकालाचलविंयमाणकोवदसण-
दट्ठोदडणे भणियमणेण-भो मम सदायरएण समुल्लवित्तस्स पत्थरघडियहियस्स व तुज्झ न यणागंपि पडिवयण-
दाणमेत्तेऽवि अणुरोहो समुण्यणो, अह वहिरोत्ति न निसागेसि ये वयणं, एवं ता किं निरत्थएण तुह कमाछिदुवह-
णेणंति भणिऊण अइक्खूरज्झवसाणसंगएण खित्ताओ सामिणो वामेयरसवणविवरेसु फाससलागाओ, पत्थरेण दहं ताव
समाहयाओ जान परोप्परं मिलियाओ, ताहे मा कोइ उक्खणिहिंति पंचंतभागे सोडिऊण अवकतो गोवाहयो, सामी-
वि पणट्टमायाभिच्छत्ताइसल्लोऽवि सवणविंवरंतरूळ्ळगाढसल्लो अचंतधिर्वालिओऽवि दूसहवेयणावसकिसीभयसरीरो
मणागंपि धम्मज्झाणाओ अविचलियमाणसो तत्तो निक्खमिऊण गओ मज्झिज्जपायासन्निभं, तत्थ य पालणदि-
यहे पविट्ठो सिद्धत्थवणियस्स गेहं, तओ तेण हरिसुच्छलंतपुलयजालेण वंदिऊण पडिलाभिओ सयवं, एत्थावसरंमि
य तहिं चेव पुवागएण जिणं दट्ठण भणियं खरगाभिहाणेण वेज्जणे-अहो भयवओ सच्चलक्खणसंपुनं सरीरं, केवलं

पमिलाणलायन्नत्तणेण सुणिज्जइ ससल्लव, इमं च निमुणिऊण असमजिणपक्खवायकलिएण ससंभमं भणियं सिद्ध-
 त्थेण-भो विज्ज ! जइ एवं ता निउणं निरुवेहि, कहिं ससल्लो एस जयगुरू?, एवं बुत्ते वेजेण अइमुप्पणिहििएण
 सणियं सणियं पलोयमाणेण जिणतणुं दिट्ठं कन्नविवरंतरनिहित्तं काससलियाजुयलं, दंसियं च सिद्धवणिणो, तं च
 तारिसमवलोइऊण जंपियं सिद्धत्थेण-अहो कस्सइ पावकारिणो अच्चतनिकरुणं विलसियं, जं एवंविहं कम्ममायरं-
 तेण न गणिओ दोग्गइनिवडणतिकखासंखुदुक्खागमो न पेहियं आकालियमजसं न चित्तियं धम्मविरुद्धं, अहया
 किमेएण दुट्ठचेट्ठियविकत्थणेण?, भो वेज्ज ! साहेसु को संपयं उवाओ जेण एयं सल्लमवणिज्जइ? । अन्नं च—

सल्लेण जएक्कपहुस्स कन्नविवरंतरं उवगएण । अणवरयं मह हिययं भिज्जइ एत्तो महाभाग ! ॥ १ ॥

अलियं उल्लवइ जणो जस्स वणो वेयणा हवइ तस्स । जं सामिणा ससल्लेण दुक्खिओऽहं दढं जाओ ॥ २ ॥

परमत्थेण इमो चिय जीयं माया पिया य सयणो य । नाहो सरणं ताणं ता एत्तो किं परं परमं? ॥ ३ ॥

इय एयस्स निमित्ते धणं च धन्नं च दव्वनिचयं च । मम जीवियंपि चइऊण कुणसु भो सल्लउद्धरणं ॥ ४ ॥

उद्धरिए एयंमि तु तुमए भवभीमकूवगाहितो । उद्धरिओ परमत्थेण विज्ज ! निस्संसयं अप्पा ॥ ५ ॥

नीसेसगुणनिहाणे इमंमि उवजुंजिऊण नियविज्जं । आसंसारं सुंदर ! आसीसाभायणं होसु ॥ ६ ॥

इयरंमिव उवयारो कीरंतो जणइ निम्मलं कित्तिं । किं पुण तइलोक्कदिवायरंमि सिखियरागंमि ? ॥ ७ ॥

इय सब्भावुब्भडवयणसवणपरिवद्वमाणपरितोसो । सामिचिकिच्छाकरणमि उज्जुओ भणइ सो विज्जो ॥ ८ ॥
सिद्धत्थ ! अलमेत्थ पत्थणाए, तथा करोमि जहा लहुं अवहरामि भयवओ सल्लं, केवलं निष्पडिकम्मो एस नाभि-
लसइ चिगिच्छं न बहु मन्नइ सरीरसक्कारं नाभिनंदइ ओसहाइविहाणं, एवं च ठिए कंहं कायवो सल्लससुद्धरणोव-
क्कमो ?, सिद्धत्थेण भणियं-पज्जत्तं वाउलत्तणेणं, जहा तुमं भणिहिसि तथा करिस्सामिति अब्बोऽन्नं जंपिराणं
निगंओ भुवणगुरू, ठिओ बाहिरुज्जाणे, सिद्धत्थेणावि निययुरिसेहिंतो सवत्थवि अब्बेसाविओ सामी, दिट्ठो य
गामबाहिरुज्जाणे, तओ विज्जेण समेओ तदुवदिट्ठुदिवोसहसामगिसणाहो तत्थेव गओ सिद्धत्थो, तयणंतरं च वेज्जेण
तेल्लदोणीए निवेसाविओ सामी, पच्छा कयकरणेहिं चउव्विहविस्सामणावियक्खणेहिं पुरिसेहिं महाविओ, तओ सिद्धि-
लीभूएसु संधिबंधणेसु बाढं निजंतिऊण संडासएण अइच्छेयथाए लहुमाकड्डिउमारद्धो कन्नेहिंतो सरुहिरं सल्लजुयलं,
अह नीहरिज्जमाणे सल्ले सा कावि वेयणा जाया । जीए मंदरधीरोऽवि कंपिओ इत्ति जयनाहो ॥ १ ॥ सुक्को य
घोरघणघोसविच्चम्मो जिणवरेण आरावो । कुलिसाहय(सुर)गिरिसिगदलणजाओव्व अइभीमो ॥ २ ॥ जिणमाहप्पेण
परं तडत्ति फुट्ठा समंतओ न मही । अन्नह चलणगुलिचालियाचले केत्तियं एयं ?, ॥ ३ ॥

एवमुष्पाडियंमि सल्ले संरोहणोसहीरसनिसेगपक्खेवेण पगुणीकयंमि सवणजुयले सविणयं वंदिऊण य जयनाहं
वेज्जवणिणो परमसंतोसमुव्वहंता सग्गापवग्गसोकखसिरिं भमारिवं करकमलनिलीणं मन्नंता गया सगिहं । परमोवगा-

रिति पूहओ वत्थकणगाइदाणेण विज्जो सिद्धत्थेण । एवं ते दोन्निऽवि आसयविसुद्धीए तिव्वमवि वेयणं भयवओ उदीरयंता सुरलोयलच्छिभायणं जाया । गोवालो पुण अइसंकिलिद्धयाए सत्तमनरयपुढविं दुहनिवहभायणं पत्तो । तं च उज्जाणं महाभेरवंति पसिद्धिं गयं, देवउलं च तत्थ लोणेण कयं ।

एवंविहावयाणं हवंति जयभायणं जिणिंदावि । ता थोवायंकेऽविहु कीस जणो वहइ संतावं ? ॥ १ ॥

जइ एक्कासिं पि कयदुक्कयस्स एवंविहो दुहविवागो । ता असमंजसकिच्चेसुं पइदिणं कह जणो रमइ ? ॥ २ ॥

अतुलियवल्लिएणवि जिणेण तिवावयं सहंतेण । सहणे चिय कम्मविणिज्जरत्ति पडिवज्जइ जणेण ॥ ३ ॥

एवं च भगवओ वद्धमाणसामिस्स परीसहाणं जहन्नगाणं मज्झे उवरि कडपूयणासीयं मज्झिमगाण य काल-
चकं उक्कोसगाण य इमं चेव सल्लुद्धरणंति । एवं गोवालेण मूलाओ आरद्धा उवसग्गा गोवालेण चेव निट्ठियत्ति ।
एवं ता उवसग्गाण संकलणा भणिया ।

इयाणिं सयलं पि तवोविहाणं जं जहा भगवया समायरियं तं तहा संकलिऊण भणिज्जइ—

त्तव किर चाउम्मासे छक्किर दोमासीए उवासी य । बारस य मासियाइं वावत्तरि अद्धमासाइं ॥ १ ॥

एगं किर छम्मासं दो किर तेमासिए उवासी य । अह्माइज्जा य दुवे दो चेव दिवहुमासाइं ॥ २ ॥

भइं च महाभइं पडिमं तत्तो य सव्वथोभइं । दो चत्तारि दसेव य दिवसे ठासीय अणुवद्धं ॥ ३ ॥

गोधरमभिगहजुयं खवणं छम्मासियं च कासी य । पंचदिवसेहिं ऊणं कोसंबीए वरपुरीए ॥ ४ ॥
 दस दो य किर महग्गा ठाह सुणी एगाराहयं पडिमं । अट्टमभत्तेण जई एक्केकं चरिमराइयं ॥ ५ ॥
 दो चेव य छट्ठसए अउणातीसे उवासिया भयवं । न कयाह निचभत्तं चउत्थभत्तं च से आसि ॥ ६ ॥
 बारस वरिसे अहिए छट्ठं भत्तं जहन्नयं आसि । सव्वं च तवोकम्मं अपाणियं आसि वीरस्स ॥ ७ ॥
 तिन्नि सए दिवसाणं अउणापणे उ पारणाकालो । उक्कुडुयनिसज्जाणं ठियपडिमाणं सए बहुए ॥ ८ ॥

इय एत्तिभत्तं पच्चजादिणाउ आरब्भ सव्वग्गेण छउमत्थकालियाए भगवया तवचरणमायरियंति ॥ संपयं पारद्धं भणिज्जह—अह मज्झिमपावासान्निवेसाओ दुस्सहपरीसहनिसासंतमसं हणिऊण जिणदिवाथरो समुम्मिलंतसमहि-
 गाभिरामदेहण्णहापडलपयासियदिसासुहो नीहरिऊण अणिययविहारेण विहरंतो संपत्तो समुत्तुंगपायारपरिचुंबियंवंर
 नाणाविहवणसंडमंडियदितरं जंभियगामं नाम नयरं, तस्स य वहिया विभागे वीयावत्तचेइयस्स अदूरे अणे-
 यतरुवरसुरहिंउसुमामोयभत्तमहुयइंकारमणहररिसराए उजुवालियानईए तीरंमि उत्तरिल्ले कूले सामागामिहाण-
 गाहावइस्स छत्तंमि समुम्मिलियपढमपल्लवपसाहियस्स सुपुरिसस्स व सउणगणसेवियस्स सुरपुरस्स व सुमणसाभि-
 रामस्स महानरिंदस्स पत्तनियरपरियारियस्स व सालमहापायवस्स हिट्ठओ द्वियस्स भुवणवंधवस्स छट्ठेणं भत्तेणं
 अपाणएणं आयावेमाणस्स गोदोहियासणं निसन्नस्स अणुत्तरेहिं नाणदंसणचरित्तेहिं अणुत्तरेहिं आलयविहारमहवज्ज-

वेहिं अणुत्तरेहिं लाघवखंतिगुत्तिमुत्तिसच्चुरिएहिं अप्पाणं भावेमाणस्स सहुळम्माससमहिगेसु दुवालससंवच्छरेसु
समइक्केतेसु वइसाहसुद्धदसमीए सुवयाभिहाणंमि दिणंमि विजए सुहुत्ते हत्थुत्तरानकखत्तंमि चंदेण जोगसुवागयंमि
सुकज्झाणानलनिद्दुधणघायकम्मिधणस्स पुहत्तवियक्कं सवियारमेगत्तवियक्कमवियार च झाइऊण उवरयस्स सुहम-
किरियानिवहिं वोच्छिन्नकिरियमप्पडिवाइ च सुक्कज्झाणचरिमभयदुग्गमसंपत्तस्स अणंतमणुत्तरं निघाघायं निरावरणं
पडिपुन्नं सयल्लोयालोयपयासयं केवलवरनाणदसणं समुप्पन्नंति ॥

तयणंतरं च दुक्करतवचरणफलंमि केवलालोए । जाए सूरें पिव पयडिज्जइ तिहुअणं पहुणा ॥ १ ॥

अह वत्तीस सुरिंदा तक्खणचलियासणा लहुं पत्ता । विरयंति समोसरणं पायारतिएण परियरियं ॥ २ ॥

सुविभत्तचारुगोउरपोक्खरिणीपबलधयवडाइन्नं । सिंहासणं च मणिकणयनियरनिम्मवियहरिचावं ॥ ३ ॥

ताहे तिलोयनाहो शुवंतो देवनरनरिंदेहिं । सिंहासणे निसीयइ तित्थपणामं पकाऊण ॥ ४ ॥

जइविहु एरिसनाणेण जिणवरो सुणइ जोगयारहिं । कण्णोत्ति तहवि साहइ खणभेत्तं धम्मपरमत्थं ॥ ५ ॥

इय निरुक्कमविक्रमनिरक्खिब्भंतरारिविसरस्स । वीरस्स भुवणपहुणो चरिए सूरें व विष्फुरिए ॥ ६ ॥

संगमयाइपरीसहसहणऽज्जियनाणलाभसंबद्धो । संखेवेण समत्तो सत्तमओ एत्थ पत्थावो ॥ ७ ॥

इइ सिरिमहावीरचरिए परीसहसहणकेवलुवज्जणो सत्तमो पत्थावो ॥

अथाष्टमः प्रस्तावः

एवं केवललाभो भणिओ भुवणिक्कभाणुणो एत्तो । एक्कारसवि गणहरा जह से जाया तहा सुणसु ॥ १ ॥

अह निम्महियनीससमोहमहिमो सो महावीरजिणवरो तहाविहोवयारविराहियं परिसं नाऊण परोवयारकर-
णिक्कतल्लिच्छो छिन्नपेम्मबंधणोऽवि धम्मदेसणाईहिं तित्थयरनामगोयं कम्मं वेइज्जइत्ति परिमवित्तो असंखेज्जाहिं
देवकोडीहिं परिवुडो सुरविरइएसु नवसु कणयकमलसु नवणीयसुहफरिससु चलणजुयलं निवेसमाणो दिसासुहवि-
सारिणा देवजणुजोएण पडिहयंधयारे निसासमएवि दिवसेव समुवलक्खिज्जमाणपयडपयत्थसत्थो तित्थनाहो
दुवालसजोयणंतरियाए मज्झिमानयरीए गंतुं पवत्तो, तओ जाव सामी न पावइ मज्झिमापुरीं ताव तीसे अदूरदेसे
संठियंमि महासेणवणंमि उज्जाणे देवाहिं समोसरणविरयणा काउमारद्धा, कंह चिय ?-

आजोयणपरिमंडलभूभागं विगयकयरुग्घायं । हरियंदणसुराहिरसच्छड्डाहिं पडिहणिययनियरं ॥ १ ॥

पंचविहरयणनिधिवरविरइयातुच्छपीडियाबंधं । हरिसुल्लसंतरोमंचकंचुया निम्मवित्ति सुरा ॥ २ ॥

वेमाणियेदेवहिं विरइज्जइ पंचराययणमओ । सालो विसालगोउरकविसीसयसुंदरो झत्ति ॥ ३ ॥

तत्तो बाहिं पसरंतकिरणपब्भारभारियनहविवरो । जोइसिएहिं ठविज्जइ सुवणणपागारपरिवेढो ॥ ४ ॥

तयणंतरं च दगरयधवलपहाहसियसारयमयंको । भुवणवईहिं कीरइ निम्मलकलहोयपागारो ॥ ५ ॥

पवरमणिरयणरुहरं वंतरदेवेहिं सालमज्झमि । सिंहासनं ठविज्जइ सपावपीढं सुरमणिज्जं ॥ ६ ॥
 तस्सोवरिं विउव्वइ सक्को उम्मिल्लपल्लवसिरिहं । जिणदेहाउ दुवालसगुणियं कंकेल्लिपवरतरुं ॥ ७ ॥
 ईसाणसुरिंदो निम्मवेइ लंबंतमोत्तियसरीयं । छणमयलंछणधवलं फलिहदंडं च छत्ततिगं ॥ ८ ॥
 हेट्ठामुहठियविंटा रंतुदाममहुयरसणाहा । आजणु कुसुमवुट्ठी निवडइ गयणाओ वरगंधा ॥ ९ ॥
 सव्वयणामयाइं विचित्तकरइयसक्कचावाइं । रेहंति तोरणां नववंदणमालकलियाइं ॥ १० ॥
 मंदरमहियमहोयहिरवगंभीराइं तियसनिवहेण । दिसि दिसि पहयाइं चउविहाइं तूराइं दिवाइं ॥ ११ ॥
 पवणुद्धुयलीरोयहिमहल्लकलोलविब्भमेहिं नहं । छाइज्जइ धयनिवहेहिं वेजयंतीसएहिं च ॥ १२ ॥
 मयरदुदामसहस्सपत्तकीलंतहंसमिहुणाओ । पडिगोउरं वराओ पोक्खरिणीओ य कीरंति ॥ १३ ॥
 मिच्छत्तसत्तुविवखोभदक्खमक्खंडमाणुबिंबसमं । जंतूण य कमलोवरि ठाविज्जइ धम्मवरचक्कं ॥ १४ ॥
 देवच्छंदयपसुहं अन्नपि जमेत्थ होइ कायवं । वंतरसुरेहिं कीरइ पहिड्डहियएहिं तं सवं ॥ १५ ॥
 इय नियनियअहिगाराणुरूवओ विरइयंमि ओसरणे । जिणरविभीयच्च निसा निन्नट्ठा तक्खणं चव ॥ १६ ॥

एत्थंतरे सायरसुरखयरनमंसिज्जमाणो माणाइरित्तगुणरयणावासो वासवनिंदंसिज्जमाणमगो मग्गानुल्लगभव-
 जणजणियपरितोसो तोसरोसपरिवज्जियगतो गत्तसमभवपडंतजणसमुद्धरणपरो परमकरुणरसनिच्चियजयजणहुहज-

लणो दुरियगिरिदलणो जयगुरुधुवद्वारेण पविट्टो समोसरणभूमिं, तओ सीहासणं पयाहिणीकाऊण ममावि पूयणिज्जे
तित्थंति दंसंतो कयकिचोऽवि नमो तित्थस्सत्ति भणन्तो निसण्णो पुट्ठाभिमुहो सीहासणे, तयणंतरं च सेसत्तिदिसि
सिंहासणेसु सुरेहिं रइयाइं जिणपडिरूवाइं, ताणिऽवि भगवओ माहण्णेण तयणरूवाइं चैव सोहिउं पवत्ताइं, अह
एगरूवोऽवि सयलजंतुसंताणनित्थारणत्थं व चउरूवधरो जाओ जयगुरु, तयणंतरं च सयलतरणिमंडलसारपरमा-
णुनियरविणिम्मियं व सरीरपरिक्खेवमणहरं समुग्गं भांमंडलं, ठिया य भगवओ उभयपासेसु पंचवणणयणविणि-
म्मियदंडुब्भडाओ तुसारगोखीरधाराओव गोराओ चामराओ करकभलेण कलिऊण दाहिणुत्तरभवणवइणो चमरव-
लिनामाणो असुराहिवा, अह—

गायंति केऽवि नचंति केऽवि फोडंति केऽवि तिवइंपि । पकरंति संश्रवं केऽवि भयवओ भत्तिए तियसा ॥ १ ॥
मेळंति सुरहिमंदारकुलुममयरंदविंदुसंवलियं । जिणपय पुरओ केऽविहु पंचविहं जलरुहसमूहं ॥ २ ॥
भवणवइवाणमंतरजोइसवेमाणिएहिं देवेहिं । पूरिज्जइ महविवरं विमाणमालासहस्सेहिं ॥ ३ ॥
पंचप्पयारमणिरयणघडियसुंदरविमाणपडिहत्थं । उव्वइइ गयणविवरं पण्डुल्लियकमलसंडलिरिं ॥ ४ ॥
हरिहरिणस्सप्पसिहिनिउलससगमज्जारमूसगाईया । अन्नोऽन्नमुक्खेरा ओसरणमहिं समल्लीणा ॥ ५ ॥
वहुपुव्वभवपरंपरसमुवज्जियकम्मसत्तुभीयाणं । ओसरणं सरणंपिव रेहइ नीसेससत्ताणं ॥ ६ ॥

एत्थंतरे तिपयाहिणीकाऊण नमंतसिरिमडमाणिक्किरणविच्छुरियपायपीढा सुरासुरिंदा पणमिऊण जिणं निय-
नियठाणेसु निसन्ना, अह सहस्सनयणेण निसिद्धंमि कोलाहले निम्मलदसणमज्जालपक्खालियाए इव' निम्मलाए
एगाएवि अणेगजणसंसयबुच्छेयसमत्थाए सुरनरसवरतिरियसाहाराणाए सजलजलहरनिग्घोसंगंभीराए आजोअणसि-
त्तखेत्तपडिप्फलणपच्चलाए अमयदुट्ठीए इव निव्विवियअसेसभवसत्तसंतायाए वाणीए पवत्तो जिणनाहो धम्मदेसणं
काउं । कहं ?—

जह पाणवहाइसमुत्थपाचनिवेहेण भारिया जीवा । अयगोलगव्व भवसायरंमि मज्जाति वेगेण ॥ १ ॥
जह नाणदंसणचरित्तसेवणाहिं लहुं विसुज्झंति । पावंति य सोक्खपरंपराउ संगगापवग्गेसु ॥ २ ॥
जह मिच्छत्तच्छाइयविवेयनयणा सुणंति न कयावि । नीसेसदोसरहिंयं देवं सुगुरुं च धम्मपरं (यं) ॥ ३ ॥
जह गिहकज्जासत्ता अवितत्ता कामभोगसोक्खेहिं । मणुअत्तं लद्धुपि हु सुद्धा धोवेण हारंति ॥ ४ ॥
जह तज्जमाथपरयाए भूरिसो ताणसरणपरिहीणा । पावंति दहणभेयणपमुहाइं दुहाइं नरएसु ॥ ५ ॥
जह पंचमहव्वयकवयगूढेदहा दलंति लीलाए । अब्भितरारिवग्गं अजेयममरासुरेहिं ॥ ६ ॥
जह सत्तुमित्तमणिलेहुसोक्खदुक्खेसु तुल्लचित्ताण । अमराहिंतोऽवि सुहं पाउब्भूएइ बहुययरं ॥ ७ ॥
तह जयगुरुणा नरतिरियदेवजणसंकुलाए परिसाए । हरिसभरनिब्भराए धम्मो सिद्धो जयवरिद्धो ॥ ८ ॥

अह पत्थरंटकुक्कीरियव दढवज्जलेवघडियव । जिणवयणामयपाणेण सा सहा निचला जाया ॥ ९ ॥

किंच-अनिमसच्छीहिं सुहं जिणस्स पेच्छंतया विरायति । देवचलच्छिवरिअव तक्खणं तिरियनरनिवहा ॥ १० ॥

इओ य-तीसे नयरीए अचंतधणकणसमिद्धो छक्कम्मकरणपरो नियदरिसणपरुवियधम्मनिचलभित्तो सोमिलिजो नाम माहणो, तेण सग्गत्थिणा समारद्धो नयरीए बाहिंमि जन्नो, समाहूया दूरदिसाहितो बहुधिससरायपरिवारा असे-सविज्जाठाणपारागा चउवेयसुत्तथविसाराया नियनियपद्मावलेवोवहसियसुरुरुणो इंदरूहपमुहा एकारता अज्जावगा, मीलियाइं धयमहुजवपमुहाइं जागोवगरणाइं, पगुणीकयाओ दक्खिणानिभित्तं पवरपट्टुगमवनेलक्कगगाइरासीओ, मत्तीए कोउगेण उवरोहेण य समागओ बहुजणवओ, समारद्धो हुयवहे अणवरयमंतु वारपुक्खं जसोत्तगणपक्खेयो । एत्थंतरे गयणयलमइवयंताइं सुरवहूसणाहाइं देवविंदाइं अबलोइऊण परितुहो पेच्छगजओ, जेपेइ य-मुहु लहुं जट्टे जन्निएहिं, जं सयमेव विगहवंतो तियसा परितुहा इहइं अवग्रंतित्ति, अह चंडालनिलयं व जप्पयाडयं परिहरिऊण समोसरणसमुहं गंतुं पयट्टेसु तेसु वियंभिओ लोयप्पवाओ, जहा-सवन्नू तीयाणागभवत्तुजावओ लोगुत्तरि-स्सरियरुवसामत्थजसाइगुणावासो एत्थ समोसढो, तस्स पूयणत्थं एस नयरजणो विभागाख्खुता सियसा य गच्छंतित्ति, अह सवन्नुत्ति गिरं सोउं उप्पन्नगाढपरिकोवो । नियलोथाणं पुरओ इंदरूहइं इमं भणइ ॥ १ ॥

मोत्तूण ममं लोगा तस्स समीवंमि कीस वचंति ? । किं कोउवि ममावि पुरो सवन्नू अत्थि एत्थ जए ? ॥ २ ॥

गच्छंतु व सुकखजणा देवा कहऽणेण विम्हयं नीया ? । पूयंति संशुणंति य जेणं सवणणुबुद्धीए ॥ ३ ॥
अहवा जारिसओ सो सवणणू तारिसा सुरा तेऽवि । अणुसरिसो संजोगो गामनडाणं व सुक्खाणं ॥ ४ ॥

किं वा इमिणा बहुजंपिएण ? अज्जवि असिद्धकज्जंमि । सयमेव तत्थ गंतूण हेउजुत्तीहिं तं लमणं ॥ ५ ॥
काउं हयप्पयावं पुरओ देवाण दाणवाणं च । नासेमि अहमसेसं खणेज सवणणुवायं से ॥ ६ ॥ जुम्भं ।
इय साहंकारं जंपिऊण पंचहिं सएहिं सिस्साणं । परियरिओ सो पत्तो जयगुरुणो पायमूलंमि ॥ ७ ॥

तयणु-ससहरकासकुसुमोहहिमंपंडुरच्छतियनिहयतरणिकरभियरपसरह, पमिलंतसायरनएखयरसुरिंदतदोहयदह ।
पेच्छिवि जयनाहह महिम इंदभूह मणंमि, किं एयंति यमक्खियओ तक्खणि ओत्तरणंमि ॥ ८ ॥

एत्थंतरंमि भुवणेक्कभाणुणा जिणवरेण संलत्तो । भो इंदभूह ! गोमय सागयमिह महुरवाणीए ॥ ९ ॥

ताहे चित्तियमिमिणा नामंपिहु मे वियाणए एसो । सुवणेऽवि पायडजसं अहवा को मं न याणेइ ? ॥ १० ॥

जइ हिययगोयरं मे संसय मणणेज अहव छिंदेज्जा । ता होज विम्हओ मे इय चितंतो पुणो भणिओ ॥ ११ ॥

किं मण्णे अत्थि जीओ उयाहु नत्थित्ति संसओ तुज्झ । सुंदर ! परिचयसु इमं संदेहं माणपडिसिद्धं ॥ १२ ॥

अत्थि जिओ निब्भंतं इमेहिं सो लक्खणेहिं सुणियव्वो । चित्तंचेयणसण्णाविण्णानाईहिं पयडेहिं ॥ १३ ॥

जइ पुण न होज जीवो अवट्ठिओ सुकयदुक्कयाहारो । ता जागदानानोवहाणपसुहं मुहा सव्वं ॥ १४ ॥

इय जयगुरुणो वयणं सोऽं परिभाविउं च महपुवं । मिच्छत्तेण समं चिय उज्झइ तं संसयं झत्ति ॥ १५ ॥
अह ववगयकुविगण्णो दण्णं सण्णं व उज्झिउं दूरे । संसारविरत्तमणो निवडइ चलणेणु जगगुरुणो ॥ १६ ॥
भणइ य भयवं ! नियदिक्खदाणओ भज्झणुगगहं कुणसु । इय बुत्ते नियहत्येण दिक्खिओ एम जयगुरुणा ॥ १६ ॥ १ ॥
तं पवइयं सोऽं अग्निभूहिवि चित्तइ एवं । वच्चांमि तमाणेमी पराजिणेऊण सघण्णुं ॥ १७ ॥
मण्णे छलाइणच्चिय छलिओ माइंदजालिण्णं व । समणेण तेण तम्हा उवेक्खणिज्जो न सो होइ ॥ १८ ॥
संसयमेगंमि ममं जइ पुण छिंदेज्ज होमि ता सिस्सो । तस्सत्ति जंपमाणो सोवि गओ जिणवरसमीवं ॥ १९ ॥
हे अग्निभूह ! कम्मं अत्थी नत्थित्ति संसओ तुज्झ । बाढमजुत्तो एसो विज्झइ जं कम्ममिह पण्डं ॥ २० ॥
कहमण्णहा समेऽवि हु करसिरपसुहंगदेहतवंधे । एक्के भवंति सुहिणो अण्णे पुण दुक्खिया निवं ॥ २१ ॥
धारियधवलयावत्ता विलासिणीविहुयचामरा एणे । भडचडगरपरियरिया वचंति करेणुगारूढा ॥ २२ ॥
अण्णेऽणुवाहण चिय पए पए भयवसेण कंपता । एगाणिणो वरागा कहकहवि पंहंमि गच्छंति ॥ २३ ॥
एगे लीलाए चिय पूरेंति मणोरहे बहुज्जणानं । नियउयरंपिऽवि अब्बे भरंति भिक्खाए समणेण ॥ २४ ॥
ससहरमुहीहिं बिंवाहरीहिं पण्णुल्लकुवल्यच्छीहिं । एगे विलसंति विलासिणीहिं सिद्धिं समवणेणु ॥ २५ ॥
मक्कडमुहीहिं मिरियत्थणीहिं अइलंबमोदुपोट्टाहिं । पच्चक्खरक्खसीहिं व अब्बे गिहिणीहिं सह ठंति ॥ २६ ॥

तुल्यमिव संबधे समेऽवि कालाह्यमि एगस्स । संपज्जइ बहुलाभो मूलंपि पणस्सइ परस्स ॥ २७ ॥
इय एवंविहकज्जाण कारणं कम्ममेव नायध्वं । निक्कारणइ जायंति जेण न विचित्तकजाइं ॥ २८ ॥
एवं बुत्ते निच्छिन्नसंसओ पंचसिस्ससयसहिओ । भववेरगगमुवगओ पडिवज्जइ सोऽवि पवज्जं ॥ २९ ॥ २ ॥
अह वाउभूइनाभो सहोयरो तेसिमेव लहुययो । पम्मुकमच्छरो भत्तिनिब्भरुब्भिन्नरोसंचो ॥ ३० ॥
कह तेऽवि तेण विजियत्ति विम्हयं परममुव्हंतो य । एइ जिणसन्निगासं संसयवोच्छेयमिच्छंतो ॥ ३१ ॥
अह सो जएक्कगुरुणा पयंपिओ भइ ! कीस वहसि तुमं । तज्जीवं तस्सरीरंति संसयं जुत्तिपडिसिद्धं ? ॥ ३२ ॥
जेण सरीरजियाणं एगंतेगत्तकप्पणे जीवो । नो होज्ज देहनासे घडभंगे तस्सरूवं व ॥ ३३ ॥
देहे य विज्जमाणे जीएण विवज्जिएवि जाएज्जा । चित्ताइया धम्मा न य ते तद्विरहओ दिट्ठा ॥ ३४ ॥
तम्हा भिन्नाभिन्नो विन्नाणघणो सरीरओ जीवो । अन्नोच्चिय सुणियध्वो एवं भणियंमि पडिबुद्धो ॥ ३५ ॥
पंचहिं सिस्ससएहिं सहिओ सोऽवि हु जिणस्स पासंमि । निच्छिन्नपेमबंधो मुंचइ घरवासवासंगं ॥ ३६ ॥ ३ ॥
अह इमे तिन्निवि गहियपव्वजे निसामिऊण दुरुम्मुकमच्छरो गच्छामि संसयं च पुच्छामि न सामन्नरूवो सो गय-
वंति बहुमाणमुव्हंतो वियत्तो नाम अज्झावगो गओ जिणसमीचं, वागरिओ य भयवया, जहा-भइ ! वियत्त ! तुह पंच-
भूयसत्ताविसओ संसओ, सो य न जुत्तो, जओ पच्चक्खदिस्समाणा(भू)जलणजलानिलाइणो भूया कंहं अवलविउ

तीरंति?, जं च वेए भणियं-‘सुविणोवमा सवे भावा’ इचाइ, तं पि खणविलाससीलयं सवभावाणं पटुच्च, न उण सवहा भूयाभावसाहगत्तेणंति वुत्ते विवत्तो संसाराणुबंधेण समं चइऊण कुविणपं पंचहिं लत्तसएहिं अणुगम्मभाणो पवन्नो संजमुज्जोयं ४॥ तंमि य पवजं पवत्ते सुहम्मो नाम अज्जावगो विरुद्धेयपयनिबंधणं संसयं पुच्छिउक्काओ संपत्तो जिणंतियं, सो य भयवंतं सिंहासणयं पुवपवयसिंसाधिरुद्धं दिचायरं व पलोइऊथ परं पणोपपच्चारयणु- भवंतो संलत्तो जिणेण-अहो सुहम्म! तुमं इमं संसयं वहसि-जो इह भवे पुरिसो पसू वा सो परयधेडवि पुरिसत्तं पसुत्तं वा लहइ, इमं च न जुत्तं, जओ जो इह जम्मे सभावेण मइवज्जाइगुणजुओ मणूओ सो मणुयाउयं कम्मं बंधिऊण भवंतरे पुरिसत्तणं पाउणइ, पसूडवि मायाइदोसजुत्तो पुणोडवि पसुत्तयं पडिवजइ, व उण निच्छएय, जेण कम्मसच्चपेक्खा जीवाण गइरागइत्ति, न य कारणाणुरूवं कळंति सद्धत्थ वित्थारिउं पारीयइ, विलक्खणरूवाओ सिंगाइकारणाओडवि सराईणमुण्णत्तिदंसणाओ, एवं च निसामिऊण वोच्छिन्नसंसओ पंचसयविणेयपरिवुडो सुहम्मो भयवओ सिस्सो जाओत्ति ५॥ अह तंमि पवइए मंडियनाओ अज्जावगो पुवक्खेण पत्तो रमोहरणं, वागरिओ य भगवया-हंत बंधमोक्खविसयं संदेहं तुमं कुणसि, नणु न जुत्तयं, जओ बंधमोक्खा सुपरिद्धा येव । कहं?—

मिच्छत्तपमायकसायदुट्टजोगाइकारणेहिं दढं । जीवस्स कम्मबंधो जायइ अइभीसणो तत्तो ॥ १ ॥
अणुहवइ रज्जनहुव सवया नयतिरियठाणेसु । किच्चिसदेवनरेसु य दुक्खाइं परमात्तिक्खाइं ॥ २ ॥

मोक्षो पुण निम्मलनाणचरणसद्धानपरमहेऊहिं । कम्माण जो विओगो तो नेओ सिवसुहफलओ ॥ ३ ॥
 नणु कहमणाइनियकम्मजोगओ तेसि होज्ज उ पिहुत्तं । भणणइ जह जलणेणं कंचणउवलाण अत्तोऽं ॥ ४ ॥
 एवं जियकम्माणवि विसिट्टनाणाइकारणेहिंतो । होइ विवेगो तत्तो मोचखो सिद्धो सयं चेव ॥ ५ ॥
 एवं च पलीणंमि संसयतमंमि नमिऊण जयगुरुणो चलणुत्थलं अट्टुट्टिसिस्ससयपरिवारो भंढिओ अण्णारसवगम-
 णुलगोत्ति ६ ॥ अह मोरिओऽवि अप्पडिममाहणं सामिं नाऊण समागओ सगोसरणं, भणिओ अ गगवया--भइ !
 तुमं देवाभावविसयं संदेहमुव्वहसि, तं च इयाणिं परिचयसु, जओ पच्चक्खदिससागांमि अत्थंवि किं अणुसाणत्ते-
 ङणाहिं ? एए देवा विमलमणिकुंडलपहापडलपल्लवियगंडलेहा नियंभियदिवंसुया सरीरकतिसमुज्जोइयदिसिनिमहा-
 महासोकखा अपरिभूयसासणा सुणिणोव नभोगमणा इह चेव संपयं वट्ठति, अओ अणुचिया एयाण विसए अभा-
 वकप्पणा, जं च सेसकालं न दीसंति तत्थ लोयगंधस्स अचंतमसुभत्तणओ पेच्छगगावलोयणाइसु य निचसणित्त-
 त्तचित्तत्तणेण न कंहपि आंगंतुमुच्छहंति, जिणमज्जणाइसु पुणो भत्तिथाराय्हिया आगच्छंति य । एवं सुणिए वत्तुत्ते
 मोरिएण अट्टुट्टिसिस्ससयपरियरएण अब्भुवगया भावसारं जिणपव्वज्जत्ति ७ ॥ अह अकंपिओऽवि कोऊहलउलिय-
 चित्तो संसयमवणेउकामो संपत्तो भयवओ समीवं, सागयभणणपुव्वयं च संभासिओ जयगुरुणा--अहो अकंपिच ! तुयं
 एवं मन्नेसि, जहा--देवा चंदसूरतारयपमुहा ताव पच्चक्खदंसेणेण नज्जंति, नारया पुण सुमिणेऽवि अदिससाणा नूनं न

संतिति, अणुचियं इमं, जओ ते नारया कम्मपरतंतत्तणेण इहागंतुमसमत्था, तुम्हारिसावि तत्थ गंतूणसक्खमा, ता कहमुवलंभो जाएज्जा?, खाइगनाणोवेवेयाणं पुण वीयरगाण पच्चक्खा चेव, न य खाइगनाणोवेवेया असेसपयत्थसत्थ-वेइणो न संतिति वोत्तवं, मए विय वभिचारसंवाओत्ति, एवं छिन्नमि संसए तिहिं खंडियसएहिं समं अकंपिओ अणगारियं पडिवदोत्ति ८ ॥

एत्थावसरंमि अयलभाया नाम अज्झावगो सुणियजिणमाहप्पो मणोगयवियप्पनिब्भंजणत्थं गओ जयगुरुसमीवं, भणिओ य सामिणा, जहा-भो अयल! पुन्नपावाइं अत्थि नत्थित्ति संसयं तुममुवहसि, अजुत्तिसंगयं चेयं, सुहा-सुहफलजणगत्तणेण पुव्वभणियकम्मपक्खनाएण चेव पुन्नपावाणवि पसाहणाउत्ति भणिए जायजहावद्वियविवेओ तिहिं खंडियसएहिं समेओ चारंगं भववासं उज्झिऊण समणो जाओत्ति ९॥ तयणंतरं च तं पवइयं सोऊण जिण-तियं पाउब्भूओ मेअज्जो नाम अज्झावगो, सोऽवि संलत्तो तिहुयणेक्कक्खुणा महावीरेण, जहा-मुंदर! तुमंयि इमं विगप्पेसि-भूयसमुदायधम्मत्तणेण चेयणारूवस्स जीवस्स कहं भवंतरगमणं घडेज्जा?, भूयवगमे चेयणारूवजीवस्सवि विगमाउत्ति, नणु अघडमाणमेयं, पुढवाइं भूयाण एगतथ मीलणेऽवि चेयणाणुवलंभाओ, तम्हा तच्चइरित्ता चेव चेयणा जीवधम्मरूवा अब्भुवगंतवा, तदब्भुवगमे य जीवस्स निरुवचरिओ परभवगमो सिद्धो चेव, जहसराणाइहिं परभवसाहणाओ य, एवं कहिए निच्छिन्नसंसाओ मेयज्जो तिसयसिस्सपरियरिओ भयवओ समीवे पवइओ १०॥

अह दससुवि तेसु पव्वजं पडिवन्नेसु पभासो सकोऊहलं तिहिं सएहिं खंडियाणं परिवुडो दूरमुक्कंपडिचाभिमाणो पंजलिउडो भुवणच्छेयकारयविचित्तिसयसमेयं सामिं दट्ठण हरिसुफुल्लोयणो संसयं पुच्छिउकामोऽवि संखो-
भेण वोत्तुमपारयंतो भणिओ पारगएण—अहो पहास ! निव्वाणमत्थि नत्थित्ति संदेहदोलमालंबेसि तुमं, नणु उज्झ-
सु सव्वहा एयं, जओ अइसयनाणिपच्चवखत्तेण सयलकम्मकलंकपमुक्कजीवावत्थाणट्ठणं निव्वाणं चउग्गइयसंसा-
रावासविलक्खणरूवं निरुवचरियं अत्थि, सुद्धपयकि(वच्च)तणाओ जीवोच्च, तं च बुहेहिं सइहियच्चं, जं पुण
अविज्जमाणं तं सुद्धपयवच्चंपि न होइ, जहा आगासकुसुमंति भणिए पणट्ठसंसओ जयगुरुं पणमिऊण सपरिवारो
पभासोऽवि समणो जाओत्ति ११ ॥ एवं च—

वोच्छिन्नपेम्मवंचणा पणट्ठकम्मसंधणा, विसिट्ठजाइसंभवा पसिट्ठगोत्तउब्भवा ।

पहाणरूवसालिणो विसुद्धकित्तिधारिणो, अचिन्तसत्तिसंजुया अयेससत्थपारया ॥ १ ॥

पयंडकामखंडणा पहीणदोसभंडणा, सुरासुरिंदवंदिया समग्गलद्धिनंदिया ।

जिणिंदधम्मसंगया विसुक्कसव्वसंगया, गुणावलीहिं सोहिया न कामिणीहिं मोहिया ॥ २ ॥

इय इंदभूइपमुहा सुणिणो एक्कारसावि तव्वेलं । दिसिंदतिणोच्च रेहंति सिस्सकरिकलहपरियरिया ॥ ३ ॥

किं वा वन्निज्जइ तेसि जेसि सयमेव भुवणनाहस्स । कण्पतरुक्सिलयसमो हत्थो सीसंमि संठाइ ॥ ४ ॥

इओ य-जा पुव्वभणिया दहिवाहरायमुया चंदणाभिहाणा कन्नगा पढमसिस्सिणी भयवओ भविस्सइत्ति सक्केण संगोवाविया आसि सा तक्कालं सयाणियरायमंदिरे निवसंती गयणंणणे अणवरयं सुरविद्याणाइं इंतारं गच्छंताणि य पलोइऊण निच्छियजिणकेवलनाणसमुप्पाया पव्वज्जागहणुक्कसिरी अहासज्झिहियदेवयाण् करयेलेण कलिऊण रामो-सरणमुवणीया समाणी परमं पमोयसंभारमुवहंती तिपयाहिणादाणपुव्वगं वंदिऊण जिणमुवहिआ पथ रागहणत्थं ।

एत्थंतरे अन्नाओवि राईसरतलवरसेट्टिसेणावइमांतिस्सामंतकन्नगाओ जिणवइवनायस्सगजापभयरेग्गाओ गवचि-रइगहणत्थं तदंतियं पाउब्भूयाओ । तओ भगवया चंदणं पुरओ काऊण सहत्थेण दिदिसयाओ, पपत्तासमुज्जम-ऽसमत्था य बहवे जणा ठाविया सावयधम्मं, एवं एत्थ समोसरणे जाओ भगवओ चउघिहो संघो ॥ जायंमि य गुणरयणरयणांगरंमि संघे भगवया इंदभूइपमुहाणं पहासपज्जवसाणाणं एक्कारसणंहंमि तेसिं सगलपुव्वणमत्थसत्थ-संगहधम्मयाइं 'उप्पन्नोइ वा विगएइ वा धुवेइ व'त्ति कहियाइं तिस्सि पयाइं, तेहि य पुव्वभयवत्थसत्थपरमत्थ-सत्थवित्थारविद्यक्खणत्तणेण तक्कालुप्पन्नपन्नाइसयमुवहंतेहिं तयणुसारेण विरइयाइं हुवालस अंगाहं, तहा विरयमा-णाणं च सत्तण्हं गणहराणं जायाओ विभिन्नाओ वायणाओ, भेअजपभासाणं अयलभाइअकंपिधाण य परोग्गरं समाओ चेव, एवं च निवत्तिए सुत्तविरयणे इंदभूइपमुहाणं गणहरयंमि ठावणनिमित्तमुवट्टिए सयगेव. सुवणवंधवे अवसरंति कलिऊण पवरगंधंधुरवासुम्मिस्सचुण्णभरियं रयणत्थालं गहिऊण सुरनियरणियरिओ सुरिंदो पाउ-

नमूओ जिणंतिंयं, ताहे सामी सीहासणाओ उट्टिता पडिपुण्णं सुट्ठि चुण्णणं गिणहइ, तयणंतरं गोयमसाभिप्पमुहा
 एक्कारसवि गणहरा ईसिओणया परिवाडीए ठायंति, निरुद्धेहिं तियसेहिं तूरवे जयगुरू गुणेहिं पज्जेहिं य मए
 तुह तित्थमणुणायंति भणमाणो पढमं चिय सहत्थेण गोयमसामिणो सीसेदंसमि चुण्णणि पक्खिवइ, एवं चिय
 जहक्कमेण सेसगहराणंपि, देवावि गयणयलमोगाढा आणंदवियसियच्छा गंधधीकयमुद्धुयमुद्धुयमुद्धुवियमुहलं
 पुण्फवासं चुण्णवासं च निसिरंति, गणं पुण चिरजीवित्तिकल्लुण सुहम्मसामी पंचमगणहरं धुरे ठवेत्ताभयवं अणुजाणइ।
 चंदणंपि अज्जाणं संजमुल्लोगघडणत्थं ठावेइ पवत्तिणीपए। एवं एक्कारसहिं गणहरेहिं अणेगेहिं साहूहिं साहुणीहि
 य परियरिओ जंबुद्दीवोच्च दीवंतरेहिं सुमेरुच्च कुलाचलेहिं ससिच्च तारानिवहेहिं सामी सोहिउं पवत्तो। अवि य-
 एगागिणोचि भुवणेक्कबंधुणो को मिणेज्ज माहण्णं?। किं पुण गोयमपमुहेहिं गणहरेहिं परिगयस्स ॥ १ ॥

अह कइवय दिवसाइं भवसत्तज्जणं पडिबोहिज्ज तत्तो निक्खंतो जयगुरू। तो आगासगएणं लंबंतमोत्तियजाल-
 विराइएणं छत्तेणं आगासगयाइं कुमुयमयंकमऊहमणहराहिं चामराहिं गयणयलावलंविणा समणिपायपीढेण सीहा-
 सणेणं रणज्झणिरिक्किणीकुलकलकलमुहलेण अणेगकुडुभियाभिरामेण पुरोगामिणा माहिंदज्झएण य विरायंतो
 सायरं अणुगच्छंतीसु सुरासुरकोडीसु अणुकूलंतसु वायंतसु सुराहिसमीरणेसु भत्तीएच्च नमंतसु मगतरुवरेसु मुणिय-
 विचारसु खलेसु व हेट्ठओमुहं ठायंतसु कंटगेसु मणोरमेसु सबेसु उल्लसु निययमाहप्पेण तिलोयरज्जसिरिं एगत्थ मि-

लियमुवदंसयतो दुब्भिक्षमारिडमराइ उवसामितो ठाणठाणेसु समोसरणमहिं पडिच्छमाणो परप्पवाए सुन्नीकुण-
माणो निव्वाणमगं पयासयतो विरइप्पयाणेण भवसत्तज्जणमणुगिण्हंतो पुरगामखेडकब्बडाइसु विहरमाणो कमेण
संपत्तो पुव्वभणियं माहणकुंडगामं नयरं ।

तहिं च नयरादूरवत्तिंमि नाणाविहतलयासंकुलंमि बहुसालयनामंमि चेइयंमि विरइयं परमविच्छित्तिमणाहं
सुरोहिं समोसरणं, रयणपागरब्भंतरे पइद्वियं पुव्वाभिमुहं समणिपायपीढं सीहासणं, निसन्नो तत्थ जएक्कचूडामणी
महावीरो, पायपीढपच्चासन्ने य निलीणो भयवं गोयमसामी, नियनियठाणेसु निविट्ठो देवनरतिरियनिवहो ।
एत्थंतरे वित्थरिया माहणकुंडगामे नयरे पसिद्धी, जहा-वहुसालगचेइयंभि भयवं महावीरो समोसढोत्ति, एयं
च निसामिऊण पुव्वभणिओ उसभदत्तमाहणो परमपमोयभरनिब्भरयरियमाणसो देवानंदं माहणीं भणिउमाढत्तो,
जहा-तइलोकतिलयभूओ भूयत्थकहापरूवणसमत्थो । सुंदरि ! सिरिवीरजिणो सयमेव समोसढो वार्हिं ॥ १ ॥

निरुवमकळाणकलावकारणं तस्स दंसणंपि पिए ! । किं पुण अभिगमवंदणपयमेवापसुहपडियती ? ॥ २ ॥

ता वच्चाभो तदंसणेण कुणिसो सजीवियं सफलं । तीए वुत्तं पिययम ! किमजुत्तं ? एह वच्चाभो ॥ ३ ॥

सा किर जइवसंचिय गब्भाओ अवहडो जएक्कगुरू । तत्तो चिय अच्चत्थं समुवहित्था महासोगं ॥ ४ ॥

अह तदब्भुवगमं नाऊण उसभदत्तेण आहुया कोहुंविथपुरिसा, भणिथा य-भो ! सिग्घमेव वरयणमयाकिंकिणी-

जालमंडियमञ्जभागेहिं कंचननथापगहिएहिं नीलुण्णलविरइयसेहेरहिं उल्लिहियासिगेहिं लहुण्डुसरीरेहिं पवरगो-
 णजुवाणएहिं संगयं संजत्तेह संदणं जेण गंतूण वंदाभो जयगुरुं, जं सामी आणवेइत्ति भणिऊण निग्गया कुंडुविया
 पुरिसा, पगुणीकओ रहवरो, समुवणीओ उसहदत्तस्स, तओ देवाणंदाए समेओ तमारुहिऊण पुरिसपरिवारपरिय-
 रिओ पयट्ठो जिणाभिमुहं, पत्तो कमेण बहुसालयसमीधं, छत्ताइच्छत्तपमुहाइसयदंसणेण य रहाओ पचोरुहिऊण
 पंचविहेणं अभिगमेणं पविट्ठो समोसरणे, तिपयाहिणादाणपुव्वयं च पणमिऊण जिणं पहिड्डमणो निविट्ठो भूमिपट्ठो ।
 देवाणंदाइवि भगवंतं पणमिऊण सविणयं उसहदत्तं माहणं पुरओ काऊण उद्धट्ठाणिट्ठिया चेव सुस्सूसमाणी
 मालतलारोवियपाणिंसंपुडा पज्जुवासिउमारद्धा, नवरं जंसमयं चेव तीसे भयवं चक्खुगोयरमुवगओ तंसमयं चिय
 वियसियवयणकमला हरिसुप्फुल्लोयणंसंदमाणणंदसलिला जलहरधारापहयकयवकुमुमपिव समूससियरोमकूवा
 धणमुहनिससरंतखीरधारा य जायत्ति, तं च तहाविहं पेच्छिऊण समुप्पन्नंसओ गोयमसामी जयगुरुं पणधियऊण
 पुच्छिउं पवत्तो-भयवं ! किं कारणं देवाणंदा अणिमिसाए दिट्ठीए तुम्ह वयणं पेहमाणा नियसुयंदसणाणुरूवा
 पेमपम्भारगम्भयमवत्थं पत्तत्ति ? भगवया भणियं-भो गोयम ! देवाणंदा ममं जणणी, अहणणं देवाणंदाए कुच्छिंसं-
 भवो पुत्तो, जओ सुरभवचवणाओ आरब्भ वायासी दिणाइ इमीए गब्भंमि तुत्थो, अओ चिय पुव्वसिणेहाणुरागेण
 एसा असुणियपरमत्थावि एवंविहं संभममावन्ना ।

इय सोऊण जिणिंदस्स भासियं उच्छलंतरोमंचा । देवाणंदाए समं झडत्ति जाओ उसभदत्तो ॥ १ ॥
परिसाजणोऽवि सबो विम्हयमंचंतमुवगओ सहसा । अस्सुयपुव्वे सुणिए को वा नो विम्हयं वहइ ? ॥ २ ॥
तओ उसभदत्तो देवाणंदा य समुप्पन्नगाढयरिसपगरिसाइ पुणोऽवि निवडियाइ जयगुरुणो चळणेसु, भयव-
यावि 'दुण्डियारा अम्मापियरो'त्ति सेसलोयस्स उवदंसणत्थं च पारद्धा देसणा । कंहं चिय ?
भो भो देवाणुपिया ! अणाइरूवंमि एत्थ संसारे । को किर कस्स न जाओ सायापिइपुत्तभवेहिं ? ॥ १ ॥
कस्सवि न वा विओगे अणवरयगलंतनयणसल्लेण । पइसमयमुक्कपोकं हाहारवगब्भिणं रुन्नं ? ॥ २ ॥
चोइसरज्जुपमाणे लोगे नो कत्थ वावि वुत्थमहो ? । अणवरयमावयाणं काण व नो भायणं जाओ ? ॥ ३ ॥
कस्स व आणानिइसवत्तिणा दासनिविसेसेण । नो वट्ठियं दुहट्ठेण पाणिलोएण एएण ? ॥ ४ ॥
एवंविहदुहनिवहेक्ककारणे कह भवे महाभीमे । खणमेत्तिपि विजायइ निवासवुद्धी सुबुद्धीणं ? ॥ ५ ॥
एत्तो चिय सासयसोक्खकंखिणो लक्खिउं भवसरूवं । तणमिव रज्जाइ समुज्झिऊण पव्वजमल्लीणा ॥ ६ ॥
ता जाव पुन्नपब्भारपावणिज्जा इमा हु सामग्गी । तुब्भेवि ताव गिण्हह निस्सेयससाहंगं धम्मं ॥ ७ ॥
इय जगगुरुणा कहिए तेसिं आणंदसंदिरच्छीणं । केवलमणुभवगम्मो कोइ पमोओ समुण्णवो ॥ ८ ॥
तओ उसभदत्तो देवाणंदाए समेओ हट्ठुट्ठो उट्ठिऊण सामिं तिमबुत्तो वंदिऊण करयलकमलकोससेहरं सिरं

दूरं उन्नामिऊण भणिउं पवत्तो-भयवं ! अवितहमेयं जं तुब्भे वयह, ता अणुगिणहह अम्हे सदिकखापयण्णेणं, विर-
त्तमिण्हिं गेहवासाओ माणसं, भगवया भणियं-जुत्तमेयं भवारिसाणंपि, तओ कयकिच्चमप्पाणं मन्नंताइं उत्तर-
पुरत्थिमदिसिसमुज्झियभूसणकुसुमदामां निव्वत्तिपंचमुट्ठियलोकम्मां तां तिपयाहिणादाणपुरस्सरं परमेसरं
वंदिता भणिउं पवत्ताइं-भयवं ! जरामरणरोगसोगविप्पओगजलणजालाकलावकवलियाओ अम्हे एत्तो भवजरकुडी-
राओ नित्थारेसु सहत्थेण तुमं, तुह पयसरणमल्लीणो खु एसो जणो, इय भणिए भुवणगुरुणा सयमेव तोसिं दिन्ना
दिक्खा, कहिओ साहुसमायारो परुविओ आवस्सयविही, एवं तक्कालोचियं सच्चं विहिं देसिऊण भयवं अज्जचंद-
णाए पवत्तिणीए देवाणंदं सिस्सिणित्ताए पणांमेइ, उसभदत्तं च थेराणं समप्पेइ, अह तां निक्कलकसमणधम्मपरि-
पालणवद्धलक्खां अपुच्चापुव्वतवचरणपरायणां अहिक्कारसअंगां पज्जंतसमयसमाराहियसंलेहणां निवाणग्गहा-
मंदिरारोहेहऊभूयं निस्सेणिंपिव खवगसेणिं आरुहिऊण पत्ताइं दोन्निवि सिवपयंमि ।

भयवंपि वद्धमाणो परिअरिओ गोयमाइसमणेहिं । हिययाहिंतोवि तमं अवाणितो भवसत्ताणं ॥ १ ॥

गामागरनगराइसु विहरंतो सिवपयं पयासितो । खत्तियकुंडग्गामे नयरम्मि कमेण संपत्तो ॥ २ ॥

तत्थ य सुरेहिं रइयं चीतरुपायारगोयरसणाहं । ऊसियसियधयनिवहं जणसुहकरणं समोसरणं ॥ ३ ॥

वत्तीसंपि सुरिंदा जिणसुहकमलवल्लोयणसत्तणहा । विविहविमाणारूढा ओअरिया सुरपुरीहितो ॥ ४ ॥

अह पुष्पदुवारेणं पविसिन्ना सुरगणेण शुभंतो । सिंहासणे निसन्नो पुद्वाभिमुहो जिणवारिंदो ॥ ५ ॥
एक्कारसवि गणहरा केवलमणपज्जवोहिनानी य । चउदसदसपुद्दीविउद्धिइहूपत्ता य मुणिवसभा ॥ ६ ॥
उद्धट्टिया उ वेमाणियाण देवीओ तहय समणीओ । ठायंति जिणं नमिउं दाहिणपुब्बंमि दिसिमाए ॥ ७ ॥
अह दाहिणदारेणं पविसिन्ना विणयपणयदेहाओ । भवणवइवाणमंतरजोइसदेवाण देवीओ ॥ ८ ॥
काउं पयाहिणं भुवणबंधुणो धम्मसवणलोभेण । निसियंति पहिट्टाओ दाहिणपच्चत्थियविभागे ॥ ९ ॥
तत्तो पच्छिमदारेण पविसिउं पवरभूसणसणाहा । भवणवइवाणमंतरजोइसिया हरिसपणयसिरा ॥ १० ॥
विहिणा जिणं नमंसिय गणहरकेवलपमोक्खमुणिणो य । निविसंति जिणाभिमुहा उत्तरपच्चत्थिमदिसाए ॥ ११ ॥
उत्तरदिसिदारेणं तत्तो पविसिन्नु दिक्खरूवधरा । वेमाणियसुरवग्गा नरा य नारीजणा य तथा ॥ १२ ॥
पम्मुक्कपरोप्परवरमच्छरा धम्मसवणतल्लिच्छा । उत्तरपुरत्थिमंमि य ठायंति दिसाविभागंमि ॥ १३ ॥
न कुणंति हासखेड्डाहं नेव चक्खुं खिर्वति अन्नत्थ । चित्तलिहियच्च सव्वे जिणिंदवयणं पलोयंति ॥ १४ ॥
तयणंतरं च बीए पायारब्भंतरे तिरियवग्गो । हयमहिस्सीहपमुहो उज्झियवेरो सुहं वसइ ॥ १५ ॥ कंहं चिय ?-
दिणयरकरसंतत्तं भुयंगमं छायए सिंहेडिहं । तंडविएहिं सिंहडी करुणाए विमुक्ककुविगप्पे ॥ १६ ॥
कंडूयइ दसणकोडिए कुंजरो केसरिस्स मुहभागं । धावाराइ सीही हरिणसावयं दढ्खुहाभिहयं ॥ १७ ॥

मञ्जारोऽवि हु ससिरंमि मूसगं ठवइ गाढपणएण । वणसेरिहोऽवि तुरयं रसणाए दढं परामुसइ ॥ १८ ॥
 इय जत्थ निव्विवेयावि पाणिणो तत्थ तियसनरनिवहा । उज्झंति मच्छरं जं परोप्परं तं किमच्छरिये ? ॥ १९ ॥
 तइए पायारब्भंतरंमि देवाण विविहरूवाइं । विजयपडायापयडाइं संनिसीयंति जाणाइं ॥ २० ॥
 एत्थंतरंमि भुवणेक्कभाणुणा कलियसयलभावेण । वयणकिरणेहिं मिच्छत्ततिभिरमवहरिउमारद्धं ॥ २१ ॥

इओ य पुव्वमेव जिणविहारनिवेयणवावारियपुरिसेहिं सामिसमागमेण वद्धाविओ नंदिवद्धणनराहिवो, हरिसभर-
 निस्सरंतरोभंचेण य तेण दवावियं तेसिं चित्तियाइरित्तं पारिओसियं, भणिओ य संनिहियकिंकरवगो-अरे ! सिग्धं
 संजत्तेह जयकुंजरं पगुणीकरेह तुरंगवद्दाइं पयट्ठोवेह नयरसोहं उब्भवेह सबविजयचिंघाइं आइक्खह आघोसणा-
 पुव्वयं नयरीजणस्स जहा सिग्धं पाउब्भवह कयमज्जणविलेवणा नियविमवाणुरूवजाणजंपाणारूढा नरिंदसमीधं
 जेण वंदिज्जइ महावीरोत्ति भणिए जं देवो आणवेइत्ति पडिवज्जिऊण संपाडियं नरिंदसासणं, समुवणीओ जयकुं-
 जरो, समारूढो य नरिंदो, पुरजणेण परिथरिओ पयट्ठो भयवओ अभिसुहं, तओ छत्ताइच्छत्ते पेच्छिऊण पमुक्कराय-
 चिंधो परेणं विणएणं जयगुरुं विन्नवेउं पवत्तो । कहां ?—

गयणंगणं व ससहरविज्जियं नाह ! एत्तियं कालं । नयरमिमं तुह विरहे पणट्ठोसोभं दढं जायं ॥ १ ॥

अहमवि तुम्हऽणुवित्तीए नूण चत्तो न रायलच्छीए । अन्नह तुमए रहियस्स नाह ! का जोगगया मज्झ ! ॥ २ ॥

तुह सच्चरियाणं कित्तणेण पइदियहमेव पुणरुत्तं । साहारो मह जाओ जीयस्सवि निस्सरंतस्स ॥ ३ ॥
ता अज्जं चिय सुदिणं अज्जं चिय वंछियाइं जायाइं । चिरकालाओवि जएक्कनाह ! जमिहागओ तंसि ॥ ४ ॥
इय सन्भावुब्भडपेम्मगब्भवयणाइं जंपिउं राया । सट्ठाणंमि निविट्ठो ठविउं दिट्ठं जिणमुहंमि ॥ ५ ॥
इओ य तत्थेव नयरे भयवओ भाइणिज्जो रूवलायणसाली जमाली नाम कुमारो परिवसइ, सो य वद्धमाणंमि
पव्वज्जं पडिवन्ने नंदिवद्धणनरिंदेण भगवओ पुत्तिं पियदंसणाभिहाणं परिणाविओ समाणो केलाससेलसिहरसमुत्तुंग-
धवलहरमारूढो वज्जेतेहिं चउत्तिहाउज्जेहिं वरतरुणीसंपउत्तेहिं बत्तीसइवद्धेहिं नाडएहिं उवगिज्जमाणो उवन-
चिज्जमाणो य पाउसवासारत्तसरथहेमंतवसंतगिम्हपज्जवसाणे छेचेव उउणो जहाविभवेणं माणयंतो पंचविहे पवरे
माणुस्सए कामभोगे पव्वणुब्भवमाणो सिंगाडगतिचउक्कयच्चरेसु जिणगमणसवणहल्लफलियं परिचत्तवावारंतरं हल-
बोलाउलियदियंतरं जणसमूहं एगमगगणुलग्गं अवलोइऊण सविम्हयं नियपरियणमापुच्छइ-अरे किमज्ज एत्थ
नयरे इंदमहो वा खंदमहो वा सुगुंदमहो वा नागमहो वा जक्खमहो वा चेइयमहो वा ? जं एस पुरज्जणो एवमे-
गाभिसुहो गच्छइ, परियणेण भणियं-कुमार ! नो अज्ज इंदखंदार्इणं ऊसववियेसो, किंतु भयवं महावीरो तुम्ह
माउलगो समणसंधपरिवुडो बाहिं समोसढो, तस्स वंदणवडियाए एस जणो वच्चइ, एवं च निसाभिऊण हरिसि-
वससमूससियरोमकूवो कयमज्जणविलेवणालंकारपरिग्गहो सकोरिटमल्लदाभेणं छत्तेणं धरिज्जमाणेणं नाणाविहपहरण-

करपुरिसपरिखित्तो पवररहनिसन्नो गओ समोसरणं, दूराओ चिय ओयरिओ रहाओ, परमायेण वंदिओ जिणो,
तओ अणिमिसाए दिट्ठीए सामिमुहमवल्लोयमाणो पज्जुवासिउमारद्धो । भगवयावि पयट्ठाविया धम्मदेसणा ।
कहं चिय ?—

करयलपरिगलियजलं व गलइ पइसमयेव जीयमिमं । वाहिजरायंकाविय देहं दूमंति निचं पि ॥ १ ॥

अइबहुकिलेससमुवज्जियावि विज्जुव चंचला लच्छी । पियपुत्तसयणजोगोऽवि भंगुरो जलतरंगोच्च ॥ २ ॥

विसयपिवासा पिसाइयव दुन्निगहा तह कहं पि । वामोहइ जह थेवं पि नेव संभवइ वेरगं ॥ ३ ॥

अवरावरगिहवावारविरयणावाडलो सयावि जणो । कीणासमुहं वच्चइ अणुवज्जियधम्मपाहिज्जो ॥ ४ ॥

एसो चिय मुद्धजणस्स विब्भमो सब्बहाऽविय अजुत्तो । जं पज्जंते धम्मं भोचुं भोगे चरिस्सामो ॥ ५ ॥

जं थेरत्ते पत्ते हयंमि सव्विदियप्पयारंमि । अच्छउ दूरे करणं दुलहं धम्मस्स सवणं पि ॥ ६ ॥

किं बहुणा भणिणं ? , जो बालत्तेऽवि नायरइ धम्मं । संगामसमयहयसिक्खगोच्च सो सोअइ विराभे ॥ ७ ॥

इय जयगुरुणा नीसेससत्तसाहारणाए वाणीए । मोक्खसुहमूलवीयं कहियं सद्धम्मसव्वस्सं ॥ ८ ॥

इमं च अवक्खित्तचित्तो सवणंजलीहिं पाऊण जमालिकुमारो हिययंतो समुल्लसंतवेरगवासणो भयवतं पणि-
वइऊण भालयलनिच्चलनिवेशियपाणिपंकथकोसं भणिउं पवत्तो—

भयं ! तुमए जह मज्झ देसिओ मोक्खसोक्खदाणखमो । धम्मो तह नो केणवि अन्नं निउणमइणावि ? ॥ १ ॥
मन्ने पुव्वभवेसुं बाढं समुवज्जियं माए पुन्नं । तेण जयनाह ! तुमए सद्धिं मह दंसणं जायं ॥ २ ॥

ता जाव अम्मापियरो पुच्छामि ताव तुब्भं समीये सफलीकरेभि पव्वजापरिगहेण नियजीवियं, भयवयावि भणियं-वहुविग्धाइं धम्मकजाइं मा पडिवंधं कुणमुत्ति, तओ जमाली कुमारो जयगुरुं वंदिऊण रंदणारूढो गओ सगिहं, पत्थावेण य अम्मापिऊण पाए पणमिऊण भणिउमारद्धो-हंहो अम्मताया ! अज्ज मए गयवओ महावीरस्स अंतिए धम्मो निसामिओ, सो य अमयंपिव अभिरुइओत्ति, अम्मापिऊहिं भणियं-यन्नो कवलन्खणो उवलद्ध-जम्मजीवियफलोऽसि तुमं, नहु अकयपुद्गाण कइयावि सवणगोथरसुवगच्छइ जिणिंदवयणं, जमालिणा संलत्तं-अम्मताया ! तदायन्नणानंतरमेव संसारभउद्विग्गो भीओऽहं जम्मणमरणं ता इच्छामि तुब्भेहिं समणुणाओ समाणो समणभावं पडिवज्जिउं । इमं च अस्सुयपुव्वं निसामिऊण जमालिस्स जणणी तक्खणुप्पन्नं ताववमविस-प्पमाणसेयसलिला सोगमरेवेविरंगी पयंढमायंगकराहयकुमुयं व मिलाणलायन्नं वयणमुच्चंती तक्खणकिसीभूय-बाहुवल्लीरंगलंतकणयवलया धरणिवट्टपब्भट्टउत्तरिछा विक्किणकेसहत्था सिट्ठिलसंधिवंधणा सुच्छावसनट्टचेयणा धसत्ति कोट्टिमतलमि निवड्डिया, अह संसंभमपधाविएण परियेण निम्मलसलिलसीयरसंवलिएण तालियंटपव-णेण आसासिया समाणी सुचिरं विलविऊण विमुक्कदीहनीसासा जमालिं भणिउं पवत्ता-अहो वच्छ ! अम्हाणं तुमं

चेव एगो पुत्तो संमओ पिओ हियनंदणो रयणकरंडगसमाणो ओवइयसमुवलडो, ता नो खलु वच्छ ! अम्हे इच्छामो तुम्ह खणमेत्तमवि विओगं, किमंग पवज्जाणुमन्नणं ? अओ अच्छलु ताव जाव अम्हे जीवासो, कालगएहि पुण परिणयवओ वड्हियकुलसंतई निव्विन्नकामभोगो पव्वेज्जासि, जमालिणा भणियं—अम्मा ! एत्थ खलु माणुसए भवे अणेगसारीरमाणसरोगसोगजरासरणपमुहोवह्वसंपगाढे असासए जलुबुब्बुयसमाणे सरयगिरिसिहरसरंतसरिया-तरंगभंगुरे को एवं जाणइ—के पुर्विं सरणधम्माणो के वा पच्छा सरणधम्माणोत्ति, किं च—

जइ नाम सुणिज्ज इमंपि कोइ ता किं न होज्ज पज्जत्तं ? किं तु अयंडेवि अखंडियागमो पडइ जमदंडो ॥ १ ॥ किंतु—कस्स न हरंति हिययं विसया ? नो कस्स वल्लहा सुयणा ? किंतु खरपवणपहयं किसलयमिव भंगुरं जीयं ॥ २ ॥ एत्तो चिय दुज्जणमाणसं व मोत्तूण रजरट्टाई । धीरा दुरणुचरंपि हु संजममगं समणुलग्गा ॥ ३ ॥ ता मोहपसरमुच्छिदिऊण गयमो(अणुमण्ण)धम्मकरणत्थं । किं वल्लहं निरुंभइ कोवि हु जलणाउले गेहे ? ॥ ४ ॥ एवं च भणिए अम्मापिज्जहिं कहियं—पुत्त ! इमं तुह सरीरं विसिट्ठलक्खणंवज्जणुणोवेवयं उत्तमवलवीरियसत्त-जुत्तं उदगसोहगंसंगं समगरोगरहियं निरुहयलट्ठपंचिदियं पढमजोव्वगुणाणुगयं, अओ कंहं दुरणुचरं संजमं काउं पारिही ? , जेण—

मत्तकरियायदढचलणचंपणं सहइ नेव कमलवणं । उवरमसु पुत्त ! दुक्करसंजमकरणाउ तेण तुमं ॥ १ ॥

जमालिणा भणियं—अम्मो ! माणुसगं सरीरं अणेगरेगसोगसंगयं अट्टिसंचयसमुट्ठियं ण्हारुसिराजालसंपिणद्धं अकुट्टिमट्ठियाभायणं व थेवेणवि विद्धंसणसीलं असुइयं रुहिरमंसवसमेयसुक्काइकुसपडिपुन्नं सधोवद्दवसज्झं अयस्समुज्झणिज्जंति । अविय—

निस्सारस्सवि एयस्स सारया एत्तिएण निव्वडिया । जं उवयारे वट्ठइ मोक्खत्थं उज्जमंताणं ॥ १ ॥

जइ ण्हणविलेवणभूसणेहिं कीरइ इमस्स नो चेट्ठा । ता वासरससहरमंडलय सोहं न उवहइ ॥ २ ॥

तओ पुणोऽवि भणियं जणणीए—पुत्त ! इमाओ समुन्नयरायकुलसंभवाओ सयलकलाकुसलाओ ख्वलायन्नमण-
हरंगीओ जलहिवेलाओ व सकुलालंकरणाओ सुमुणिमालाओ इव मुत्ताहारपरिगहाओ मयगलावलीओ इव लीला-
लसगामिणीओ पीणघणथणविणमियमुट्ठिगेज्झमज्झाओ मणोणुकूलवत्तिणीओ सवंगसुंदरंगीओ पियदंसणापमुहाओ
अट्ठ पिययूमाओ अपत्तकालेच्चिय परिच्चइऊणमच्चंतमजुत्तं तुह तवोकम्ममारंभिउं, तस्मा एयाहिं सद्धिं ताव भुंजाहि
माणुस्सए कामभोए, परिणयवओ य एयाहिं चैव समं पव्वज्जं आयेरज्जासि ।

जमालिणा कहियं—अम्मो ! एए माणुस्सया कामभोगा उचारपासवणवंतपूयसुक्कसोणियसमुब्भवा अयकेलवर-
निस्सरंतविस्सगंधा असुहउस्सासुवेयजगगा बीभच्छा तुच्छकालिया बहुकिलेससज्झा य अबुहजणजणियचिच्चप-
रितोसा साहुगरहणिज्जा अणंतचाउरंतसंसारवट्ठणा करयलकलियद्धदहुकट्ठं व अमुच्चमाणा असंखतिकखंधुबखाणुव-

धिणो सुगइगमणविग्घकारिणो कहं कुसलाण खणमेत्तं पि उवभोचुं जुत्ता हवंति ? । अविय—

को णाम जीवियत्थी तालउडविसं कयावि भुंजेज्जा ? । उग्गाढदाढेकसरिमुहकंदरमहव घट्टेज्जा ? ॥ १ ॥

जालाकलावभीसणवज्जानलमज्झमहव पविसेज्जा । निसियगखगधारासु वावि को वा परिभसेज्जा ? ॥ २ ॥

अहवा सवंपि इमं करेज्ज कोऽवि हु सुराइसामत्था ।

विसए पुण परिभोचुं खेमेण न कोइ (खणमवि न सुहेण) निवसेज्जा ? ॥ ३ ॥

जइ कहवि अयाणंता मूढा विसएसु संपयट्ठति । ता किं सुणियजिणेसरवयणाणवि वट्ठिं जुत्तं ? ॥ ४ ॥

इमं च निसामिऊण पुणोऽवि भणियं जणणीए—वच्छ ! इमं अज्जयपज्जयपिउपज्जायागयं बहुं हिरण्णं रययं कंसं दूंसं निहिनिवहं अलं सत्त पुरिसे जाव पकामं दाउं पकामं परिभोत्तुं ता जहेच्छं विलससु कइवय वासराइति, जमालिणा भणियं—अम्मो ! सुबहुं पि दविणजायं अग्गिसाहियं चोरसाहियं दाइयसाहियं अशुवं असासयं असेसाण-
त्थसत्थनिबंघणं, अओ को एत्थ पडिबंधो ?, एवं च अणेगप्पयारोहिं अणुकूलेहिं वयणेहिं जाव पन्नविज्जमाणोऽनि जमाली न किंपि पडिवज्जइ ताव पुणोऽवि संजमभयकरोहिं वयणेहिं अम्मापिउणो पयंपत्ति-वच्छ ! दुरणुचरं निवगंघं पावयणं, जओ एत्थ लोहमया जवा चावेयद्वा गंगामहानईए पडिसोएण गंतव्वं महासमुदो भुयाहिं तरियव्वो असि-
धारं वयं अणुचरियव्वं, न य वच्छ ! एत्थ समणाणं कप्पइ आहाकम्मियं वा उद्देसियं वा भिस्सजायं वा कीयगड-

श्रीगुणवंद
ह्रवीरच०
ऽ प्रस्तावः
॥ २६४ ॥

अर्थविपाकः
संगमसुक-
स्तादीश-
नुमतिः.

॥ २६४ ॥

पसुहं वा दुब्बिक्खभत्तं वा गिलाणभत्तं वा वहलियाभत्तं वा सेज्जायरिण्डं वा कंदमूलफलवीर्यहरियभोगणं वा परिभोत्तुं, तुमं च वच्छ ! सुहलालिओ न समत्थो सीयवाथायवखुहापिवासापसुहदुस्सहवावीसापरीसहसहणं सुहुत्त-
मवि काउं, ता अलाहि पुणरुत्तवायावित्थरेणं, जमालिणा भणियं-अम्मताया ! इणं निगमंथं पावयणं कीवाणं कायराणं काउरिसाणं इहलोयपडिबद्धाणं परलोयपरसुहाणं विसयतिसियाणं दुरणुचरं, नो सण्णुरिसाणं पडिबन्नभरघरण-
धवलणं नियसरीरजीवियनिरवेक्खणंति, एवं च अणुकूलेहिं पडिक्कूलेहिं य वयणेहिं भणिओ सयाणो जाव
जमाली न परिच्चयइ पव्वज्जाभिलासं ताव अकामएहिं चैव अणुमन्निओ जणणिजणेगेहिं । तयणंतरं आहूया निययपु-
रिसा भणिया य, जहा-सिग्घमेव खत्तियकुडग्गामं नयरं सवाहिरब्भंतरं सम्मज्जिओत्थलितं अवणिअत्तणकयवरं
विसोहियरायमगं कारावेह, जमालिकुमारस्स य जोगं महरिहं निक्खमणभिसेयं निव्वत्तेह, ते य सविण्णं पडिसु-
णित्ता नीहरिया भवणाओ संपाडियं रायसासणं, तयणंतरं च पुरत्थाभिमुहम्मि सीहासणे उवोवसिऊण जमालि-
कुमारो मणिकणगरयपुढविमएहिं अट्टोत्तरसयसंखेहिं अणेगेहिं कलसेहिं गंधुदुरपवरसल्लिभरिएहिं ष्हाविओ ।
अम्मपिऊहिं निव्वत्तिंमि य अभिसेगे भणिओ-वच्छ ! किमियाणिं तुह बहुमंथं पियं पयच्छामो?, जमालिणा
भणियं-अम्मताया ! इच्छामि इयाणिं कुत्तियावणाओ रयहरणं पडिग्गहं च उवणिज्जमाणं तहा कासंथं च वाहरि-
ज्जमाणं, एवं च निसामिऊण जमालिपिऊणा भणिया पुरिसा-अरे सिरिधराओ तिन्नि दविणसयसहस्साइं वेत्तूण

कुत्तियावणाओ रयहरणं पडिगहं च एगमेगलखेण अणेह, एगलखण्णयोणेण कासवां च सदावेह, एवसाणत्ते
 निगया पुरिसा रयहरणं पडिगहं कासवां च घेत्तण पडिनियत्ता, सो य कासवो जमालिपियं पणभिऊण एव
 भणिउं पवत्तो-देव ! सदिह जं मए करणिज्जं, तेण जं पियं-भइ ! जमालिस्स कुमारस्स परेणं जत्तेणं चउरंगुलवजे
 निक्खमणपाओगे अगकेसे कप्पेहि, तओ सो कासवओ सुरभिगंधोदएण करचलणे पक्खालिऊण अट्टगुणाए
 पोत्तीए वयणं संजमिऊण जहुत्तेण विहिणा केसे कप्पिउमारुद्धो, जणणीवि से अणवरयं कज्जलमलिणाइं अं-
 याइं सुयंती भुयगनिम्मोयनिम्मलेण उत्तरिज्जेण केसकलावं पडिच्छइ, तयणंतरं च सुरभिवाणिणा पक्खालिऊण
 हरियंसविलेवणपुण्फेहिं अचेइ, पंडुरवत्थंमि वंधिऊण रयणकरंडगंमि पक्खिवइ, सोगभरगगरगिरं च रुयमाणी
 एवं भणइ-एत्तो मए मंदपुण्णाए जण्णेसु ऊसवेसु य वहीसु य इमोहिं पुत्तो जमाली सुमरणिज्जोत्ति, एवं च अभि-
 कखणं जंपमाणी तं रयणकरंडगं नियसयणिज्जस्स ऊसीसगमूले ठयेइ, अह निवत्तियमज्जनमहूसवो परिहियामल-
 दुगुल्लो हेममयमउडमणिक्कणयकड्यकुंडलालंकियसरीरो वच्छत्थलारिखोलितविमलसुत्ताकलावसोहिद्धो विविहायरण-
 पहाभरविच्छुरियनहंगणाभोगो तक्कालिमिलियविलयासमूहकीरंतमंगलायारो दाणाणंदियमगणगिज्जंतुहामपुण्णि-
 व्हो खंभसयसंनिविट्ठं समीरंबुयधवलधयवडसणाहं सुविचित्तिचत्तम्मं अणेगजणजणियपरितोसं सुइनेवत्थधरां
 छेयाणं पवरनरज्जुवाणाणं सहस्सेणं उक्खित्तं झडत्ति सिबियं समारुद्धो, रयहरणपडिगहधारिणीए दाहिणदिशि

निलीणाए धावीए परियरिओ, अन्नाहि य पवरमणीहिं धरियधवलायवत्तो चलंतससिकंतचामरावयवो दिट्ठिपह-
पइट्ठावियमणिमयअट्ठमंगलओ करितुरयरहवरारूढसयणयगगेण अनुगमिज्जंतो वज्जंतोएज्जसमुच्चलंतरवभरियनह-
विवरो पासायतलट्ठियपरलोयनिवेहेण संथुणिज्जंतो झडत्ति जमालिकुमारो तयणु पयट्ठो जिणाभिसुह ।

अह जमालिस्स भारिया पियदंसणा तहाविहवइयरमुवलब्भ जायभववेरगा पवज्जं पडिवज्जिउकामा तहेव
पट्ठिया, कमेण य पत्ताइ ताइ जिणंतियं, तओ पंचरायसुयसयपरिवारो जमालिकुमारो पडिवज्जो जिणिंदेसियं
समणधम्मं, पियदंसणावि नरिंदुहिया सहस्सेण परिवुडा पवहुमाणसंवेगा समणी जायत्ति ।

अह जमाली सामाइयमाइयाइं एक्कारस अंगाइं समुत्ताइं सअत्थाइं अहिज्जइ, बहूहिं चउत्थलुट्ठुमपसुहेहिं अण-
वरयं विचिच्चेहिं तवोकम्मोहिं अप्पाणं भावितो भगवया सद्धिं पुरागराइसु विहरइ, पियदंसणावि चंदणाए पव-
त्तिणीए समं परियडइ ।

अह अन्नया कयाइं जमाली भयवंतं महावीरजिणवरं वंदित्ता विन्नविउमारद्धो-भयवं! वंछामि अहं तुब्भेहिं
अब्भणुन्नाओ समानो अनिययविहारोहिं पंचहिं समणसएहिं सद्धिं विहरिउत्ति, सामीवि विमलेकवलालोयावलो-
इयसयलजियलोयभूयमाविवट्ठमाणकालकलवलंविमुहासुहपरिणामविसेसो भाविरमणत्थं मुणिऊण जमालिस्स पुणो
पुणो भणमाणस्सवि मोणमवलंबिऊण जाविउं पवत्तो, जमालीउवि अप्पडिसिद्धमणुमयंति कलिऊण पंचहिं समण-

सएहिं सहिओ तवस्सिणीसहस्सपरिवुडाए पियदंसणाए समणुगओ अपुव्वापुव्वगामनगरागराइसु भणितमारुओ, अन्नया य गामाणुगामेण विहरमाणो समागओ साचत्थि नयरिं, ठिओ य कुट्टगाभिहाणम्मि उज्जाणे, तत्थ य ठियस्स बिरसेहिं लुक्खेहिं सीयलेहिं तुच्छेहिं असुदरेहिं कालाइक्कतेहिं पाणभोयणेहिं दुरहियासो पयंडो सरिंमि पित्तजरो पाउब्भूओ, तेण य अचंतं अभिहओ समाणो भणइ—अहो समणा ! मम निमित्तं संथारयं संथारेह, ते य तद्वयणमायन्निकुण तक्खणमेव संथारयं संथारिउमारुद्धा, जमालीवि अहिययरं वेयणाभिहओ निसब्भो ठाउअपा-रयंतो पुणो पुणो पुच्छइ—भो समणा ! संथारगो संथारिओ न वा ?, तेहिं भणियं—संथारिओ, एयं च सोचा उट्ठिओ जमाली गओ तदंतियं, संथारयं च संथारिजंतं पेच्छिऊण उप्पन्नमिच्छत्तो जंपिउं पवत्तो—भो भुणिणो ! इयानिं सुणियं मए तत्तं, निप्फन्नमेव निप्फन्नं भन्नइ, न उण निप्फज्जमाणंपि, अओ संथारिज्जमाणेऽपि संथारगे संथारिओत्ति तुब्भेहिं वुत्तं तमसच्चं, एवं च—

कडमाणं कडमुप्पज्जमाणमुप्पन्नमेवमाईवि । वागरइ जं जिणिंदो दिट्ठिविरोहा न तं घडइ ॥ १ ॥

अवरावरसमथसमूहजोगनिप्फज्जमाणकज्जंमि । कह पारंभे चिय कडमिमंति वोत्तुं खमं होज्जा ? ॥ २ ॥

अत्थकिरियापसाहणखमं च वत्थुत्तणं समुव्वहइ । पढमसमप्पसूए य तथंपि नो विज्जइ पयत्थे ॥ ३ ॥

जइ पारंभे चिय तं कडंति एवं च सेससमएसु । करणे कडस्स आवडइ उब्भडा नूणमणवत्था ॥ ४ ॥

ता जुत्तिसंगयमिमं कडमेव कडं पवुच्चए पयडं । किरियानिट्टासमयाण होइ एवं च न विरोहो ॥ ५ ॥
इय पडिवज्जह समणा ! पक्खमिमं सयलदोसपरिहीणं । वुत्तंति नेय गिज्झइ कुसलोहिं किंतु जुत्तंति ॥ ६ ॥
नय सव्वच्चत्ति पसिद्धिपत्तकित्ती जिणो वयइ मिच्छा । किं तु वए चिय कइयावि जेण गइयायि बुज्झंति ॥ ७ ॥
इय समयसत्थसवणुब्भवंपि तं नियविवेयमवहाय । पित्तजराविदुरिओ इय पलवइ असमंजसं चट्ठसो ॥ ८ ॥
एवं च मुक्कमज्जायं अजुत्तजंपिरं च जमालिं वियाणिऊण थरोहिं भणियं—भो जमालि ! किमेवं विवरियं परूवेसि ?,
न हु विजियारागदोसमोहा अन्नहा जंपंति तित्थयरा, न य तवयणं मणागं पि पचइइविदुइइदोसलेसमावहइ,
तहाहि—जं तए भणियं—अणेगुत्तरोत्तरसमएहिं निष्फज्जमाणांमि कजे कइं पारंभसमएवि निष्फज्जंति बुधइ ?, तमजुत्तं,
जओ—जइ पढमसमए निष्फणं न बुचइ ता समयाविससत्तणेण वीयांसु समएसु अनिष्फत्ती चेव इवेज्जा, जं च
अत्थकिरियाए साहगत्तं वत्थुलक्खणं भणियं तं पि इह अवभिचरियं जुज्झइ, अभिहाणनाणोयओगसंभयाओ, तहा-
हि—तहाविहं वत्थुविसंसं पप्प पढमसमएवि लो गो किमेयं कुणसित्ति अद्वेण पुट्ठो वागरइ—वडं पडं वा करेमिंति,
जं च पढमसमयकडे उत्तरोत्तरसमएसु कडकरणलक्खणाणवत्थादूसणं तं पि अन्नन्नकजंतरएसहाणेण अलियमेव,
किरियाकालनिट्टाकालमेयदूसणपक्खोऽवि विहलो, जं च कहियंन वुत्तं गिज्झइ किं तु जुत्तं, तत्थवि छउम-
त्थस्स तुम्हारिसस्स कइं जुत्ताजुत्तविधेओ संभवेज्जा ?, भयवं चिय केवलालोयकलियलोयालोयभावो एत्थ पमाणं,

जं च भणियं गरुयावि कयावि सुज्झंति तंपि उम्मत्तपलवियं व न कुसलाण चित्तं रंजितं पारइ, ता सुहु भणिं भगवया-कडमाणं कडमुप्पज्जमाजमुप्पन्नमिच्चाइ, किंच—

जइ तिहुयणेक्कूडामणी जिणो वागरेज्ज वितहमहो । ता तद्वयणेण तवोविहाणमेयं किमायरसि ? ॥ १ ॥

रज्जं रट्ठं च विवज्जिऊण आणाए तस्स निक्खमिउं । तद्वयणं दूसितो कह न तुमं लज्जे इण्हि ? ॥ १ ॥

अहवाडणाभोगसमुम्भवेण दोसेण दुहु भणिएवि । जायइ पुणो विसुद्धी आलोयणनिंदणाइहिं ॥ ३ ॥

ता मोत्तुं कुवियण्णं वच्च समीवे जएक्कदीवस्स । पडिवज्जसु पच्छित्तं मा विफलं नेसु नियजम्मं ॥ ४ ॥

अक्खरमेत्तंपि न जो जिणिंदवयणस्स सहइइ मणुस्सो । सो पावइ मिच्छत्तं तत्तो संसारपरिवुट्ठिं ॥ ५ ॥

तत्तो च्चिय किब्बिसतियसतिरियवसहीसु मणुयजोणीसु । दुविसहदुहपरंपरमणंतमणिवारियं लहइ ॥ ६ ॥

गरुओडवि पावरासी जिणिंदसमयत्थसहइहणहणिओ । नावत्थाणं बंधइ घणोघ खरपवणपडिहणिओ ॥ ७ ॥

इय सो शेरोहिं बहुप्पयारहेऊहिं अत्थसारेहिं । तह गाढं पन्नविओ जह सहसा मोणमल्लीणो ॥ ८ ॥

अह विवरीयपरूवणापाउब्भूयपावपायिच्छित्तमपडिवज्जमाणं जमालिं परिहरिऊण केडवि थेरा भगवओ समीव-
मुवगया, अन्ने य तस्स चेव पासे ठिया, पियंदंसणावि अजियासहस्सपरिवारा महिलाभावउलभमिविवेयथाए
पुव्वपडिबंघाणुवित्तीए य जमालिस्स पक्खमणुवत्तिउमारद्धा ।

एगया य जायनीरोगसरीरो जमाली तेण असगहेण अप्पाणं च परं च पइदिणं वुग्गाहेमाणो वुप्पाएमाणो जिणनाहवयणं दूसेमाणो अहमेव उप्पन्ननाणंदसणधरो सव्वन्नत्ति अहंकारमुवहंतो समत्थ हिंदिउं पवत्तो । अन्नया य चंपानयरीए पुण्णभदे चेइए समोसदस्स अणेगसिस्सगणपरिवुडस्स भयवओ महावीरस्स अदूरदेसंणि सो ठाऊण सगवमेवं भणिउमाढत्तो-भयवं ! जहा तुज्झ बहवे सिस्सा छउमत्था चेव भवित्ता मरणधम्मयं पत्ता तहा न खलु अहं, जओ मम दिव्वमक्खयं केवलनाणंदसणं उप्पन्नंति, तव्वसेण य सव्वं जहद्वियं वत्थुत्तां अवगच्छामि, अओ एत्थ धरामंडले अहमेव अरहा सव्वन्नू सव्वदरिसिन्ति । इमं च निसामिऊण भणिओ गोअमसणिणा-भो जमाली ! जइ तुमं एवंविहो ता तुज्झ नाणं सेलेण वा धंमेण वा थूमेण वा न वारिज्जइ, अओ इसाइं दीन्नि परिणाइं मम वागेरहि, किं सासओ लोगो असासओ ? किं सासओ जीवो असासओ वत्ति ? एवं च पुच्छिओ जमाली संसय-मावणो जाव पच्चुत्तरं दाउमसमत्थो विच्छायसुहच्छाओ तुसिणीए संचिट्ठइ ताव भुवणेत्थयाणुणा महावीरेण वाग-रिओ-भो जमाली ! बहवे मम अंतवासिणो जिणा इव समत्था इमं आयक्सिउं, किं तु तुणं व न एवं सगवमु-ल्लवंति, न य भइ ! एत्थ किंणि दुन्नेयं, जओ सासओऽवि लोगो असासओऽवि लोगो, कइं ? कालत्तएवि अवट्ठि-यसामन्नरुवत्तणेण सासओ, ओसप्पिणीपमुहपज्जायपरियत्तणेण य असासओ, एवं जीवोऽवि सवावत्थालु अणुगा-मित्तणेण सासओ, नरेरइयतिरियाइपज्जायंतरसंभा असासओत्ति । एवं च भगवओ आइक्खमाणस्स जमाली

कुविद्यप्पाउलहियत्तणेण असहहिऊण तेण पुब्बलुग्गाहिएण नियसमणसमणीसंघेण परिवुडो पुरजगराहसु भियदं-
सणाभिप्पायं परूवयंतो विहरइ, वित्थरिया सब्बत्थ एसा संकहा जहा जमाली भगवओ भिच्छं पडिवन्नोत्ति ।

अन्नया य सो विहरमाणो पुणो गओ सावत्थि नयरिं, ठिओ य एगत्थ उज्जाणे, पियदंसणाणि अज्जिवासहरा-
परिवारा महिद्धियस्स ढंकाभिहाणस्स कुंभकारस्स आवणे अपुच्छित्ता ठिया, सो य ढंको जिणवयणभाविण्णा
जाणइ जहा एयाणि भिच्छत्तमुवगयाणि, जिणवयणं न पत्तियंति, अओ जइ कहवि बोहिज्जंति तो सुट्टु ल्हं हय-
इत्ति । अन्नया य भंडयाइ उच्चत्तंतेण पडिवोहणत्थं पियदंसणासाहुणीए वत्थंमि पविस्सत्तो एओ जलणकणो, तेण
य दज्झमाणं वत्थं पेच्छिऊण तीए भणियं-भो महाणुभाव ! किमेयं तए कथं ? पच्छ भम पड्ढो दद्दो, तेण
भणियं-अज्जिए ! मा सुसं वयाहि, सद्धंमि चैव वत्थे निहंद्दु एवं भणिउं जुज्जइ, एस किर तुम्ह संमयत्थो, अन्नहा
दज्झमाणं दंहुति जिणवरवीरवयणं चैव पडिवज्जिउं जुत्तं ।

एयं च तीए सोचा तक्कालुप्पन्नमुट्ठुद्धीए । भणियं-सम्मं सावथ ! मूढाऽहं बोहिया लुगए ॥ १ ॥

तइलोयतिलयभूयस्स भगवओ वद्धमाणसामिस्स । वयणं पावाए मए पडिकूलियमेत्तियं कालं ॥ २ ॥

जस्स वयेणेण विहिओ घरचाओ संजमो य पडिवन्नो । सोवि जिणो न गणिज्जइ, अहो महं मोहमाहणं ॥ ३ ॥
ढंकेण तओ भणियं-भयवइ ! मा वहसु चित्तसंतावं । समणीजणपरियरिया वच्चसु सब्बदुपासंमि ॥ ४ ॥

आणाए तस्स वट्टसु गरिहसु नियदुक्कडं समगंगि । उम्मगगं पडियन्नं लेयं परिहसु वरिं व ॥ ५ ॥
इच्छामो अणुसट्ठित्ति जंपिउं साहुणीसहस्सेण । परियरिया सा तत्तो तिहुयणपहुणो गया पासे ॥ ६ ॥
मोचुं जमालिमंगं ढंकेणऽन्नेवि बोहिया समणा । तं मोत्तूणं सध्वे तेऽवि गया जिणवरसमीयं ॥ ७ ॥
इय ताव इह भवे चिय जियवयणविकूलणाणुभावेण । गुक्को न केवलं सुणिवरहिं सुणुगेहिंवि जमाली ॥ ८ ॥
एवं च सो मिच्छत्ताभिणिवेसेणं अप्पाणं समीयवत्तिजणं च वोप्पायएत्तो बहुयाइं वासाइं सामन्नपरियागं पाउ-
णित्ता अद्धमासियं च पज्जते संलेहणं काऊण तस्स ठाणस्स अणालोइयपडिक्कतो मओ सभाणो लंतए कण्ये तेरस-
सागरोवमट्ठिइएसु किब्बिसियसुरेसु देवत्ताए उववन्नो ।

इओ य भगवया गोयमेण जमालिं कालगयं जाणित्ता भयवंतं महावीरं परेणं विणएणं वंदिता भणियं-भंते !
तुब्भं कुसीसो जमाली नामं अणगारो तहाविहं उगं तवविसेसं आसेविऊण कहिं उववन्नो ? तओ भगवया
कहिओ सवो किब्बिसयदेवत्तलाभपज्जवसाणो से तव्वइयरो ।

अह भणइ इंदभूइ-भयवं तारिस तवंपि काऊणं । किं कारणमुववन्नो किब्बिसियसुरेसु स जमाली ? ॥ १ ॥
ताहे भणियं भुवणेक्कभाणुणा सुणियसयलभावेण । गोयम ! सुणेसु एत्थं कारणमेगगचिंतेण ॥ २ ॥
धम्मायारयाणं आयरिआणं विपुद्धसीलाणं । सुत्तप्पवत्तयाणं उज्झायाणं गुणनिहीणं ॥ ३ ॥

कुलगणसंधाणंपिय पडिणीया जे हवंति इह जीवा । विउलंपि तवं काउं ते किब्बिसिएसु जावंति ॥ ४ ॥
 पुणरवि गोयमसामी पुच्छइ भयवं ! तओ सठाणाओ । चइउं कइहिं भवेहिं पाविस्सइ भोक्खणुवासं ॥ ५ ॥
 जिणनाहेणं भणियं सुरतिरियनरेसु पंच वेलाओ । भमिऊण पत्तबोही लहिही निद्याणसोक्खाइं ॥ ६ ॥
 ता भो देवाणुपिया ! जमालिमुणिणो निसामिउं चरियं । धम्मगुरुणमुहाणं विणयपरा होज्जइ सयावि ॥ ७ ॥
 इय सिक्खविउं मुणिणो समत्थजियलोयवच्छलो वीरो । विहरइ पडिबोहिंतो भव्वजणं परमकरुणाए ॥ ८ ॥
 विहरंतस्स य पडुणो एत्तो ससिसूरवरविमानाणं । अवयारणअच्छरियं जह जायं तह निसामेह ॥ ९ ॥
 साएए नयरे सन्निहियपाडिहेरो सुरण्णिओ नाम जक्खो, सो य पइवरिसं चित्तिज्जइ महूसवो य से पराओ
 कीरइ, सो य चित्तिओ समाणो चित्तगरं वावाएइ, जइ न चित्तिज्जइ ता नयरे जणमारिं विउवइ, तन्मएण य सो
 चित्तगरसेणी पलाइउमारद्धा, णरवइणा विचिंतियं-जइ इमे सवे पलाइस्संति ता अवस्समेस जक्खो अचिचित्तिज्जंतो
 अम्ह वहाए भविस्सइत्ति परिभाविऊण ते चित्तकरा संकलियावद्धा कया, सवेसिं नामाणि य पत्तए लिहिऊण वडए
 छूढाणि, तओ वरिसे वरिसे जस्स नामपत्तयं नीहरइ सो चित्तकम्मं जक्खस्स करेइ, एवं कालो वचइ । अन्नवाधको-
 संबीनयरीए वत्थवो एगो चित्तयरदारगो चित्तविजासिक्खणत्थं तत्थागओ ठिओ य चित्तयरथेरीए भंदिरे, जया य
 तण्णुत्तेण सद्धिं तस्स मित्ती, एवं च तस्स अच्छंतस्स तंमि वरिसे समागओ थेरीसुयस्स वारगो, तओ थेरी बहुभयार

उरसिराहं ताडन्ती रोहडमारद्धा, पुच्छिथा य तेण कोसंवीचित्तगरदारगेण-अप्पो ! कीम रोयमि ? तीए भणियं-
पुत्त ! एणो चिय एस मे सुओ, संपयं जक्खं चित्तिज्जण जममुहं पाण्डिकामोणिव लक्खिबल्लइ, तेण जंपियं-अम्मो !
मा रुयसु, अहं जक्खं चित्तिस्सामि, तीए भणियं-वच्छ ! तुयं मे पुत्तो किं न भवथि ? तेण कहियं-तहवि चित्ति-
स्सामि, अह जायंमि पत्थावे सो छट्ठभत्तं काऊण ग्हाओ चंदणरससमालमिगदेहो निवसिभवत्थजुयलो अट्टगुणपो-
त्तीए मुहं संजमिऊण नवएहिं कुच्चगेहिं पसत्थेहिं वन्नगेहिं जक्खं चित्तिज्जण परेण विणएणं पाययडिओ भणइ-
देव ! सुरणिय ! को तुज्झ चित्तकम्मं विणिम्ममउं तरइ ? । अच्चंतं निउणोऽविहु किं पुण अस्सारिखो मुद्धो ॥१॥
तहवि हु चवलत्तणओ न सुहु जं वट्ठियं मए किंपि । तं खमियवं तुमए खामिय ! पणयंमि को कोवो ? ॥२॥
एवं थुणंतस्स तस्स परितुट्ठो जक्खो भणइ-अरे वरं वरेसु, तेण भणियं-देव ! एसो चेव वरो-या एत्तो लोचं
मारिस्ससि, जक्खेण भणियं-तुज्झ अविणासणाओ चेव सिद्धमेयं, अन्नं मग्गेसु, तेण जंपियं-अइ एवं ता जस्स
दुपयस्स चउप्पयस्स अपयस्स वा एगदेसमवि पेच्छामि तस्सानुरूचं चित्तं निवत्तिज्जामि, जक्खेण भणियं-एवं
होहिति, तओ सो उवलद्ववरो रत्ता नगरजणेण सक्कारिओ संतो गओ कोसंभी नयरिं, तत्थ य पुवभणिओ लया-
णिओ राया, सो अन्नया रत्तेणं रट्ठणं चउरंगवलविच्छट्ठणं अन्नेण य विभूहविसेसंणं गव्वगुवहतो अत्थाणीमंडव
निविट्ठो दूयं पुच्छइ-अरे किं मम नत्थि ? जं अन्नतरिंदाणमत्थि, तेण जंपियं-देव ! तुम्ह चित्तसथा नत्थि, एवं च

भणि ए आणत्ता राइणा सभामंडवचित्तणत्थं चित्तगरा, तेहिं च समा भूमी विभइऊण पारद्धा चित्तिउं, तस्स य वरदिन्नस्स जो अंतेउरकीलापचासन्नो पएसो सो समप्पिओ, तथा य तत्थ चित्तकम्मं कुणमाणेण एंगया नरिद्ध-
ग्गमहिंसीए मिगावइदेवीए जालकडंगंतरेण मणिमयमुद्धियाकिरणविच्छुरिओ चरणंगुडुओ दिट्ठो, उवमाणेण य नायमणेणं जहा मिगावइ एसत्ति, तओ तेण अंगुट्ठाणुसारेण जहावड्डियं रूवमालिहिं, तंमि य च कखुंमि उग्गी-
लिज्जंते एगो मसिबिंदू ऊरूअंते निवडिओ, तेणावणीओ, पुणोऽवि पडिओ, एवं तइयवेलाए तं निवडियं पेच्छि-
ऊण नूणमणेण एत्थ होयवंति जायनिच्छएण नावणीओ, अह समत्तंमि चित्तकम्मे राया चित्तसभं पलोयंतो तं पएसं संपत्तो जत्थ तं मिगावइए रूवं, तं च अणिमसच्छिणा पेच्छमाणेण दिट्ठो सो बिंदू, तओ आबद्धभिउडी-
भीमो रोसवसायं विरच्छि विच्छोहो तं च दट्ठूण नरिंदो चित्तिउमेवं समाढत्तो —

एएण पावमइणा मम पत्ती धरिसियत्ति निब्भंतं । कहयन्नहा निर्यसणमज्झगयंपिहु सुणेज्ज मसं ॥ १ ॥

इयरंमिवि परदारे परिभोगपरं वयं निगिणहामो । किं पुण सए कउत्ते एवं नार्यंपिहु खमामो ? ॥ २ ॥

एवं परिभाविऊण सो वरदिन्नचित्तगरो समप्पिओ दंडवासियाणं, आणत्तो य वज्झो, एवं च वइयरं निसामि-
ऊण उवट्ठिया चित्तगरसेणी, विन्नविओ राया, जहा-देव ! वरलद्धओ एसो, जस्स अययवभंतं पि पासइ तस्स पडि-
पुवं रूवमालिहइ, अओ कीस निक्कारणं कोवमुवइ देवो ? , जइ एत्थ न पचओ ता विन्नासिज्जउ, एवं च भणि ए

राइणा दंसविंयं खुज्जाए सुहमेत्तं, तेण य तदणुरूवं निव्वत्तिंयं चित्तं, तहावि रत्ता पुवागरिमवसेण तस्स संडासओ छिंदाविओ निव्विसओ य आणत्तो ।

तथो सो चित्तगरो पुणोऽवि गओ जक्खसमीवं, ठिओ उववासेण, भणिओ य जक्खेण-भइ ! सुंच विसायं, ममाणभावेण पुंवंपि वामहत्येण चित्तिहिंसि, एवं च लद्धे वरंमि एसो परिचित्तेइ-अहो महा पाक्करिणा कहे निरवराहो चेव अहं एयमवत्थं पाविओ ? , ता संपयं तस्स दुस्सिक्खियस्स दंसेमि दुन्नयफलंति परिभाविऊण चित्तवट्ठियाए मिगावईए सिंगारूभडं रूवमालिहिऊण इत्थीलालसं चंडपज्जोयं महानदिमुवट्ठिओ, दंसिया चित्तवट्ठिगा, अवलोइया साहिलासं चंडपज्जोएण, अवलोयमाणस्स य तक्खणं चेव विसट्ठकंदोद्वीहरा वियसिया से दिट्ठी, पम्हुट्ठो कुलाभिमाणो परिगलिओ नयमगो विंयंमिआ अरई समुल्लसिओ एणरणओ पज्जलिओ सवंगिओ मयणानलो, सविसेसं पलोयमाणो य थंमिओव कीलिओव निचलनिरुद्धनयणो ठिओ सुहुत्तमेत्तं, पुच्छिओ य चित्तयरो सुरसुंदरीए रूवं वम्महदइयाए नागकन्नाए ? ! दट्ठूण तए सुंदर ! पडिर्विवमिभं इहालिहिंयं ॥ १ ॥

जइ सुरविलया एसा ता सच्चं भुवणविस्सुया तियसा । अह वम्महस्स लीलाए जिणउ ता सो तिलोयंपि ॥ २ ॥
अहवा भुयगाण इसा ता सोहउ निच्चमेव पायालं । पडिहणियतिमिरपसरं एयाए सुहेदुकिरणेहिं ॥ ३ ॥
द्वसिज्जइ पेच्छ इमीए कायकंतीए कंचणच्छाया । विच्छाइज्जइ नयणेहिं नीलनवनलिलच्छीवि ॥ ४ ॥

अहरप्पहाएँ निहरइ विहुमकंकेल्लिपल्लवसिरीवि । रूवेऽणुरंजिएण व रंभाए वहइ समसीसिं ॥ ५ ॥
 किं बहुणा ?-एवंविहवरजुवईजणस्स विरहे विडंबणा कामा । मणुयत्तंपिहु विहलं दुहावंहं भूवइत्तंपि ॥ ६ ॥
 तं कहसु कस्स एसा सुयणू ! को वा इमीए लाभंमि । कीरंतो य उवाओ अणुरूवो सिद्धिमावहइ ? ॥ ७ ॥
 एवं नराहिंवेण भणिए चित्तगेरं जंपियं-देव ! न हवइ एसा सुराईण रमणी, किंतु सयाणियरत्तो अगमहिंसी
 भिगावइनाम, मए सामन्नेण आलिहिया, विसेसओ जइ पुण परं पयावई से रूवमालिहउ, जइ एवं नाम महिला
 चेव सा अओ रे वज्जंजं च । वय सिग्घं, गंतूण भणसु मम वयणेण सयाणियनरवइ, जह सिग्घं पेसेसु भिगावइ, एवं-
 विह इत्थीरयणाण वरणे को तुज्झ अहिगारोत्ति ? ता सिग्घं पेसेसु, जुज्झसज्जो वा होज्जासित्ति वुत्ते जं देवो
 आणवेइत्ति भणिऊण गओ दूओ, निवेइयं सयाणियस्स नरिंदसासणं, तेण य तमायन्निऊण जायकोवेण भणियं-
 रे दूयाहम ! जइ कहवि सो कुलकमविमुक्कमज्जायं उस्सिखलं पयंपइ ता तुज्झवि किं खमं वोचुं ? किं भिओ
 सोऽवि न जो ससामिणो उप्पहं पवत्तस्स नियबुद्धिवित्थरेण अवजसंपंसु परिसमेइ ? एवंविहदुन्नयवियारिणोऽवि
 जायइ कुले गुरुकलंको, किं पुण बहुजणपुरओ पयडगिरा पभणिज्जेते ? अन्नेसुवि रज्जंतरेसु दिट्ठं सुयं व रे तुमे एवंविहं
 अकज्जं कीरंतं केणइ निवेण, किंच-जत्थ संयं चिय राया दुन्नयमेवंविहं समायरइ ततो हया मूलाओ वराइणी

तत्थ नीईवि, किं बहुणा ? एवं जंपिरस्स तुह चेव इहयं जुज्झइ विणासो काउं, जंच न कीरइ तं न य तेउत्ति कलि-
ऊण, इय निम्भत्थिऊण दूओ निद्वमणेण कंठे धेत्तूण निच्छूढो, गओ य सो चंडपज्जोयसमीवे, साहिओ य चउग्गुणो
नियवइयरो, इमोवि तेण दूयवयणेण वाढं रुढो सबबलेण परियरिओ पयदो कोसंबीए, अणवरयपयाणएहि य
आगच्छंतं निसामिऊण सयाणिओ अप्पबलो तहाविहसंखोहसमुण्णझाइसारो मओ, तओ मिगावईए चितियं-
राया ताव संखोभेण विणदो, पुत्तोऽवि असंजायबलो एयस्साणणुसरणे मा विवज्झिही, एयाणुस्सरणंमि गरुओ कुल-
कलंको, तम्हा इमं पत्तकालं-इहट्ठिया अंचंतमणुलोभवयणवित्थरेण चेव कालहारिं करेमि पच्छा जसुविचं तमा-
चरिस्सामित्ति चितिऊण भणाविओ दूयवयणेण चंडपज्जोयनरिंदो, जहा-राए सयाणिए परोक्खम्मि तं चेव मए
सरणं, केवलं मम पुत्तो असंपत्तबलो मए विमुक्को समानो पंचतनरिंदेहिं पेळेज्झिही, इमं च सोच्चा परमहरिसयगरि-
समुद्वहंतेण भणाविचं रत्ता-पिए ! मम पयंडभुयदंडपरिग्गहिए तुह सुए को चिरजीविक्खत्थी पयं काउं समीहिज्जा ?,
तीए भणियं-अत्थि महाराय !, केवलं उस्सीसए सणो जोयणसए वेज्जो, विणट्ठम्मि कज्जे किं तुमं काहिसि ?,
अओ जइ निप्पच्चवायं मए सह संगममभिलससि ता उज्जेणिपुरीसमुब्भवाहिं निट्ठुराहिं इट्ठियाहिं इमीए नयरीए,
चउदिसिं कारवेसु समुत्तुंगपायारपरिक्खेवंति, इमं चायन्निऊण पडिवन्नं राइणा, तओ चउइसवि नियरायाणो
सबला धरिया मग्गम्मि, पुरिसपरंपराए य आणियाओ इट्ठगाओ, निम्मविओ पायारो, तओ तीए भण्णइ-इयाणिं

नगरि धन्नस्स वत्थस्स इंधणस्स य भरेहि, आसाविणडिएण य भरिया अणेण, जोहे नयरी रोहगसज्जा जाया ताहे सा विप्पडिवन्ना, दुवाराइं बंधिऊण जुज्झिउं उवट्ठिया, चंडपज्जोयरायावि विलक्खो नगरिं वेढिऊण ठिओ, अन्न-दिवसे य वेरगमुवगयाए चित्तिं मिगावईए-धन्ना ते गामागरनगराइसन्निवेसा जत्थ भयवं महावीरसामी भवन्-गिराए जणं पडिबोहंतो विहरइ, संपयं च जइ सो परमेसरो एत्थ एइ तो अहं पव्वयामि, इमं च तीसे संकण्णं केवललोएण कलिऊण गोयमपमुहमुणिजणपरिवुडो नवकणयकमलनिम्मियचलणो अणंतरमेव समागओ भयवं, कयं देवेहिं समोसरणं, उवविट्ठो सिंहासणे जयगुरू, तप्पभावेण य पसमियं वेरं, वट्ठाविया मिगावई चारपुरि-सेहिं, दिन्नमणाए चिन्ताइरित्तं तेसिं पारिओसियं, उग्घाडियाइं गोउरक्काडाइं, महया विभवेण निगया भिगान-वई, जहाविहिणा वंदिओ भयवं, ठिया य समुचियठाणे, चंडपज्जोयरायावि समागओ, एत्थंतेर भगवया पारद्धा धम्मकहा ।

अह एगो पुरिसो करगहियकोदंडबाणो एस सव्वणुत्ति लोथण्णवायं निसामिऊण भयवओ अदूरदेसट्ठिओ निय-संसयं मणसा पुच्छइ, ताहे सामिणा भणिओ-भो देवाणुपिया ! वायाए पुच्छ, वरमन्नेऽवि भवसत्ता पडिवुज्झंति, एवमवि सामिणा भणिए लोथलज्जाए तेण भणणइ-भगवं ! जा सा सा सा ? , तओ भगवया जंपियं-एवमेयंति, अह पायपीढपासट्ठिएण गोयमसामिणा सुयनाणमुणियपरमत्थेणवि भव्वजणपडिबोहणत्थं पुच्छियं-भयवं ! किं

एएण जा सा सा सत्ति संलत्तं?, भगवथा कहियं—महती कहा एसा, एगगचिच्चा निसामेह—

अत्थि इहेव जंबुदीवे दीवे चंपानाम नयरी, तत्थेवगो सुवण्णगारो इत्थीलोलो जं जं पवरलुववइं कन्नगं पेच्छइ तं तं पंच सुवण्णसयाणि दाऊण परिणेइ, एवं च तेण परिणयंतेण कालक्कमेण पंच सयाणि महिलियाणं पिंडियाणि, एक्केकाए य तिलगहारहुहारनेउरपमुहाइं आभरणाइं दिन्नाइं, जहिवसं च जाए समं भोगे भुंजइ तहिवसं सा सवालं-कारपरिगहं ण्हाणविलेवणाइ सिंगारं च करेइ, सेसकालं पुण उवसंतवेसेण अच्छइ, अण्णहा सुवण्णगारो निब्भ-च्छइ, न य ईसालुगत्तणेण सो निमेसमेत्तपि गेहदुवारं भुंचइ, सयणाणवि नावगासं देइ, एवं वच्चंति वासरा, अन्नया य सो अणिच्छंतो महया किलेसेण नीओ भित्तेण भोगणदानत्थं नियमंदिरे, चिरलद्धावगासाहि य चित्तियं तस्स गेहिणीहि—

किं अम्ह जीविणं? किं वा मणिकणगभूसणेहिपि? । किं विभववित्थरेणवि बहुएण निरत्थएणिमिणा? ॥ १ ॥
जं न लभामो निच्चपि विलसिउं नणु कयंतलुस्स । एयस्स पावपइणो दढमंहे गोथरे पडिया ॥ २ ॥
बहुकालाओ गेहं जाव विमोचुं गओ स अन्नत्थ । मणवंचियसोक्खेणं ताव वसामो खणं एकं ॥ ३ ॥
इय चित्तिज्ज गहाया सुराहिविलेवणविलित्तसंबंगा । परिहियपवरदुगुल्ला आलिद्धासेसआभरणा ॥ ४ ॥
भालतलइयकुरुल्ला [तिलया] सिंदूराशणियपवरसीमंता । गंधुब्भडमियनाहीपंकलिहियगल्लपत्तलय ॥ ५ ॥

तंबोलपाडलुट्टीय जाव चिट्ठति दप्पणं धेत्तुं । समुहं पलोयमाणा ताव लहुं आगओ भत्ता ॥ ६ ॥

दट्ठूण तासि तारिस दुच्चिट्ठं तेण जायकोवेण । एगा महिला पहया तह जह सा पाविया मरणं ॥ ७ ॥

तयणंतरं च भयवसकंपिरेदेहाहिं सेसमहिलाहिं । चित्तियमिमं जहेसा तह अम्हेवि हु विवज्जामो ॥ ८ ॥

तम्हा आर्थसेहिं पहणामो रक्खिएण किं इमिणा ? । इइ चित्तिऊण समगं खित्ता तदभिमुहमायंसा ॥ ९ ॥

तओ एगूणपंचसयनारीसयपमुक्कदप्पणेहिं पहओ समणो सो मओ तक्खणेण, पच्छा समुप्पणो तासिं पच्छा-
यावो-अहो का गई एत्तो पइमारियाणं भविस्सइ ? , उद्धूलिस्सइ लोओ दंडिस्सइ नराहिवो अवमन्निस्सइ सयण-
वग्गो गंजिस्सइ खलयणो, तम्हा मरणमेव संपयं पत्तकालंति परिभाविऊण पिहियाइं सव्वदाराइं, पक्खित्तं गेहब्भं-
तरे बहं तणकट्ठपलालं, पज्जालिओ सव्वओ जलणो, जालाउले य तंमि विमुक्को ताहिं अप्पा, अह पच्छायावेण
साणुक्कोसयाए ताए अकामनिज्जराए सव्वाओ मरिऊण मणस्सेसु उववन्ना, कम्मधम्मसंजोगेण य एगतथ मिलिया
एगूणपंचवि सया ते चोरा जाया, एगंमि य विसमंमि पच्चए परिवसंति ।

सो य सुवणणयारो मरिऊण तिरिच्छेसु उववन्नो, तत्थ जा सा अणेण पढमं चिय मारिया सा एगं भवं तिरिएसु
उववज्जिऊण पच्छा बंभणकुले पुत्तो जाओ, कमेण य पत्तो पंचवारिसियत्तणं, सो य सुवणणयारो तिरियभवओ
उव्वट्ठिऊण तंमि चेव बंभणकुले तब्भइणित्तेण दारिया जाया, सो य पंचवारिसिओ समणो तीसे बालग्गाहो

कओ, सा य अइदुदुत्तणेण निच्चमेव रोयइ, अन्नया य तेण बालगाहेण उदरेदेसपरिघट्टणं कुणमाणेण तह कहवि सा जोणिहारे छिका जह तवखणं चैव नियट्ठा रोयणाओ, तओ तेण नायं-लद्धो मए उवाओत्ति, एवं सो तीसे रोयमाणीए निच्चकालं करेइ, अन्नया य तहा कुणमाणो नाओ सो मायापिजहिं, ताहे हणिऊण निदूयाडिओ निय-गिहाओ, पलायमाणो अ गओ तं चैव चोरपल्लिं जत्थ ताणि एगूणगाणि पंच चोरसयाणि परिवसंति, सा य दारिया अप्पहुप्पन्नजोवणा विणट्ठसीला जाया, सच्छंदं परियडंती य एगं गामं गया, सो य गामो तेहिं चोरोहिं आंगंतूण लुंठिओ, सा य तेहिं गहिया, तओ तेसिं सव्वेसिं पि भज्जा जाया । अन्नया य चोराणं चित्ता समुप्पन्ना-अहो इमा वराई एत्तियाणं अम्हाणं पइदिणं सरीरचेट्ठं कुणमाणीं खिज्जिस्सइ, ता जइ अन्ना विइज्जिया संपज्जइ तो से विस्सामो होज्जत्ति परिभाविऊण एगया तीसे विइज्जिया आणिया, जंचैव आणिया तंचैव चिरमहिंला ईसासल्लनि-ब्भिज्जमाणमाणसा तीसे मारणत्थं छिद्दाइ मगइ, अन्नया य ते चोरा गामंतरसुमणत्थं पधाविया, तीए नायं-एस पत्थावो वट्ठइ, ता विणासेमि एयंति परिभाविऊण नीया सा कूवतडे, भणिया य-भइ! पेच्छ कूवमज्जे किपि दीसइ, सावि अविगप्पभावेण दट्ठमारद्धा, तथणंतरं च ताए पक्खित्ता तत्थेव, चोरा य आणया पुच्छंति तीसे बुत्तं, ताए भणइ-अप्पणो महिलं कीस न सारेह?, किमहं जाणामि?, तेहिं मुणियं-जहा एयाए मारिया, तओ तस्स बंभणपुत्तस्स हियए ठियं, जहा-अवस्सं एसा सा मम पावकम्मा भगिणी एरिससीलेण संभावज्जइ,

सुद्वइ य समीववत्ती भगवं महावीरो सवणू सव्वदरिसी, ता तं गंतूण पुच्छामित्ति, इहागओ लज्जाए मणसा पुच्छि-
उमारद्धो, तओ मए भणियं-देवाणुप्पिया ! वयणेण पुच्छ, तओ अणेण जा सा सा सत्ति कहियं, मएवि सच्चेव
सा तव भगिणीत्ति सिद्ध ।

इय गोयम ! एवंविहविडंबणाजालमूलगिहभूया । विसया विसं व विसमं दित्ति विवागं मणुस्साणं ॥ १ ॥
खणदावियसोकखाणं भवोहसंवट्ठियासुहनिहीणं । भोगाण कए सुद्धा जुत्ताजुत्तं न पेच्छति ॥ २ ॥
चोज्जमिणं रागंधा पुरिसा अणवेक्खिऊण परमत्थं । जं अत्थि तं विमोत्तूण नत्थि जं तं विभावित्ति ॥ ३ ॥
तथाहि-मंसलवमेत्तनिच्चित्तिंयपि अहरं पवालखंडं व । जलबुब्बुयसच्छहमवि नयणजुयं नीलनलिणं वा ॥ ४ ॥
चम्मावणद्धअट्ठियमयंपि वयणं मयंकविंबं व । मंसुच्चयमेत्तंपिपि थणजुयलं कणयकलसं व ॥ ५ ॥
वेल्लहलसुणालंपिव बाहुजुयं अट्ठिमंसमेत्तंपि । सोणियसुत्तविलीणं रमणंपिपि असयकूवं व ॥ ६ ॥
मन्नंति विसयमूढा अवियारियपारमत्थियसरूवा । अच्चंतनिदियाणिपि एवं अंगाणि जुवईणं ॥ ७ ॥
इय एवं करुणासायेरेण सिरिवद्धमाणनाहेण । कहिए वत्थुसरूवे समग्गभुवणप्पईवेण ॥

सो पुरिसो संवेगमावन्नो पव्वइओ । सा य ससुरासुरनरतिरियाउलावि परिसा पयणुरागसंजुत्ता जाया । एत्थंतरे
भिगावई देवी हरिसपगरिसवियसिथनयणकमला महावीरं वंदित्ता एवं वोत्तुं पवत्ता-भयवं ! जाव चंडपल्लोयराय-

मापुच्छामि ताव तुम्हं सयासे पद्मयामिति भणिऊण चंडपज्जोयमुवट्ठिया, एवं च काहिउमाढत्ता-महाराय ! जइ तुमं अणुमन्नसि ता अहं पद्मयामि, रायावि तीसे महतीए परिसाए लज्जाए वारिउपपारयंतो तं विसंजेइ, तओ मिगावई नियपुत्तं उदयणकुमारं चंडपज्जोयस्स निकखेवगनिक्खित्तं काऊण पव्वइया, पज्जोयस्सउवि अट्ठ अंगारवइप्प-मुहाओ देवीओ पव्वइयाओ, ताणिवि एगूणपंचचोरसयाणि पुवं पडिवन्नपव्वजेण चोरेण गंतूण पडिबोहियाणि पव्वज्जं च पडिवन्नाणि, अन्नो य बहुजणो संबुद्धो, पज्जोयनरवईवि जयगुरुप्पभावपडिस्सतंवैराणुबंधो उदयणं कुमारं रज्जे सहत्थेण संठाविऊण गओ सनयारिं, मिगावईवि भगवया अणुसासिऊण समणिया चंदणबालाए पव-त्तिणीए, तीसे य समीवट्ठिया जहट्ठियं साहुणीजणसमुच्चियं किरियाकलवमब्भसइ ।

भयवंपि विहरमाणो वाणियगामप्पमोक्खनयरेसुं । आणंदकामदेवाइसावगे दस विबोहेइ ॥ १ ॥

जेसिं धम्ममहाभरधरणुद्धुरकंधराण तियसावि । चालिंसु खोभकरणुज्जुयावि न मणो मणांगपि ॥ २ ॥

जे इस्सरिएण लहुं करिंसु वेसमणजक्खरायमवि । पडिवालिंसु य सम्मं निच्चंपि दुवालस वयाइं ॥ ३ ॥

गेहसमीचनिवेसियपोसहसालासु पोसहुज्जुत्ता । अट्ठमिचउद्दसीसुं समणा इव जे य निवसिंसु ॥ ४ ॥

जेसिं सरिरधाऊ सत्तवि सव्वन्नवयणरसभिन्ना । कुप्पावयणियवयणाणि गोयरं नेव वच्चिंसु ॥ ५ ॥

इय तेसि गुणलवोविहु नो तीरइ मारिसेहिं परिकहिउं । विरइंसु नूण सयमेव गणहरा जेसि चरियाइं ॥ ६ ॥

अन्नेऽविदु नरवइदंडनाहसामंतमतिपमुहजणे । पडिवोहिऊण पुणरवि कोसंबि आगओ सामी ॥ ७ ॥
 तहियं समोसढस्सा चरिमाए पोरिसीए जयगुरुणो । विम्हइयजीवलोयाइं फालिआइं विमाणाइं ॥ ८ ॥
 साहावियाइं पच्चक्खदिस्समाणाणि आरुहेऊण । ओयरिया भत्तीए वंदणवड्डियाए ससिसूरा ॥ ९ ॥
 तेसिं विमाणनिम्मलमऊहनिवहप्पयासिए गयणे । जायं निसिंपि लो गो अवियाणंतो सुणइ धम्मं ॥ १० ॥
 नवरं नाउं समयं चंदणबाला पवत्तिणी नमिउं । सामिं समणीहिं समं निययावासं गया सहसा ॥ ११ ॥
 सा पुण मिगावइं जिणकहाए वक्खित्तमाणसा धणियं । एगागिणी चिय ठिया दिणंति काऊण ओसरणे ॥ १२ ॥
 बोलीणे खणमेत्ते साइं विमाणाइं आरुहित्ताणं । ससिसूरेसु गएसु वियंभिए रयणित्तिमिरभरे ॥ १३ ॥
 समणीओ समीवंमी अपेच्छमाणी य सा महासत्ता । पगया पडिस्सयंमी पवत्तिणीए य तो भणिया ॥ १४ ॥
 तुम्हारिसीण सुकुलुगयाण जुज्जइ किमेवमायरिउं ? । एगागिणीवि य तुमं जंसि ठिया एत्तिं रयणिं ॥ १५ ॥
 पडिवज्जिय तच्चयणं भुज्जो भुज्जो सदुच्चरीयाइं । निंदंतीए तीए उप्पन्नं केवलं नाणं ॥ १६ ॥
 अह-पयलायंतीए पवत्तिणीए सप्पं पलोइयं इंतं । संथारंगमि हत्थो ठविओ तीए धराहिंतो ॥ १७ ॥
 निदावगमे पुच्छा अहिकहणं नाणबुज्झणऽणुतावो । निहयघणघाइकम्मा पवत्तिणी केवलं पत्ता ॥ १८ ॥
 इओ य-उप्पन्नसंसओ पढमगणहरो पणमिउं जिणं भणइ । किमवड्डियावि भावा विवरीयत्तं पवज्जंति ? ॥ १९ ॥

जं ओइन्नाइं नहाओ नाह ! मायंडससिविमाणाइं । गुरुणा भणियं—गोयम ! दस अच्छरियाइं एयाइं ॥ २० ॥
उयसग्ग गब्भहरणं इत्थीतित्थं अभाविआ परिसा । कणहस्स अवरकंका ससिसूरविमाणओयरणं ॥ २१ ॥
हरिंसकुलुपत्ती चमरुप्पाओ य अट्टसय सिद्धा । अस्संजयाण पूया जायंति अणंतकालाओ ॥ २२ ॥
इय साहियमच्छरियं ससिसूरविमाणसंगयं एत्तो । गोसालयवुत्तं साहिज्जंतं निसामेह ॥ २३ ॥
सो पुब्बभणिओ गोसालो तेउलेसामाहप्पडिहयपडिवक्खो अट्टगनिमित्तवपरिन्नाणमुणियजणमणोगयसंक्कणो
अजिणोऽवि जिणसद्दमत्तणो पगासेमाणो सद्धत्थ अणिवारियप्पसरं परिब्भमंतो सावत्थिं नयरिभागओ, ठिओ य
बुधुणधन्नपरिण्णाए हालाहलाभिहाणाए कुंभकारीए आवणंमि, तस्स य लोगो अमुणियपरमत्थो मणोगयसंक्कण-
परिन्नाणमेत्तसमुप्पन्नकोऊहलो जिणोत्ति पसिद्धिं निसामिऊण अणवरयं पज्जुवासणं कुणइ, भयवणिं महावीरो सम-
णसंधपरिवुडो जहन्नेणऽवि कोडिसंखेहिं देवेहिं अणुगम्ममाणो भुवणच्छेरयभूयं विभूइसमुदयमुव्हंतो दिसिचक्काल-
परिसरिएण पभामंडलेण समुग्गयाणेगमायंडपरंपरं व गयणमुवदंसयंतो पयपरिवाडिसुरविरइयकणयंबुरुहनिवहेण
थलकमलसोहं व माहियलस्स दावितो पइ सन्निवेसमसम्भूयभावणं जणाणं पणासयंतो पयंडपासंडप्पखंडणं कुणमाणो
निद्वाणनगरसग्गं पव्वत्तयंतो कोसंबीओ निक्खमिच्चा तमेव सावत्थिं नगरिं संपाविओ, नाणाविहविहगविरायंततरुणत-
रुमणीयंमि य समोसढो कोट्टगचेइयंमि, मुणियजिणागमा य समागया परिसा, पज्जुवासिऊण य गया जहांगयं, पत्ते य

भिक्खुवाकाले छट्टपारणयं काउकामो भयवओ अणुण्णाए पविट्ठो भिक्खुदं गोयमो पुरीए, तहिं च तियचउक्कचचरेसु
 गोसालो जिणो सव्वन्नत्ति परोप्परं जंपंतं जणं निसामिऊण जायसंसओ भिक्खं घेत्तण पडिनियत्तो, जहाविहिं भुंजिऊण
 जायंमि पत्थावे समागए पुरीलोए सामिं पुच्छिउं पवत्तो-भयवं! एत्थ जणो गोसालं जिणं सव्वन्नं च परिकित्तेइ तं किं
 घडइ मिच्छा वा?, भगवया भणियं-भो देवाणुप्पिया! गोसालो मंखलिपुत्तो अजिणो जिणप्पलावी मए चेव पवाविओ
 सिक्खं च गाहिओ ममं चेव मिच्छं पडिवन्नो, अओ न सव्वन्न न य जिणो हवइत्ति, एवं सोच्चा पुरीजणो सुणियपरमत्थो
 पडिनियत्ति नयरीए सिंघाडगतिगचउक्कचचरेसु अन्नमन्नस्स सविम्हयं परूविउमारद्धो-अहो भयवं! महावीरो
 समुप्पन्नदिव्वनाणदंसणो एवं भासइ-एसो गोसालो मंखलिपुत्तो अजिणो जिणप्पलावी, अहं जिणोत्ति मिच्छं संलव-
 इत्ति, इमं च कन्नपरंपराए सोच्चा गोसालगो अच्चंतकोववसफुरंतओट्टुडो आजीवियसंघपरिवुडो अमरिसमुवहतो
 अच्छइ। इओ य-भगवओ महावीरस्स अंतेवासी आणंदो नाम थेरो अणिविखत्तछट्टतवकम्मकरणपरो पारणगंमि
 पडिगगं गहाय निग्गओ गोयचरियाए, उच्चावएसु य गिहेसु भिक्खं परिब्भमतो तीसे हालाहलाए कुंभकारीए
 कुंभकारावणस्स अदूरेण गंतुं पवत्तो, तं च दट्ठण गोसालो भणइ-भो आणंद! इओ एहि, निसामेहि दिट्ठतमेगंति,
 इमं च एवमायन्निऊण समागओ आणंदसाहू, भणिओ य गोसालेण-भो आणंद! इओ चिरा समइकंताए अट्ठाए
 केइ अत्थत्थिणो वाणिथगा नाणाविहभंडविच्छइभरिएणं सगडीसगडेणं सुवहुं भत्तपाणपत्थयणं गहाय एगं महंतं

जणसंचाररहियं छेत्तभूमिं व करिसयविराइयं भारहकहं व भीमअज्जणनउलसउणिसंकुलं दीहछिन्नावायं उब्भडवि-
डविसंकडं महाडविमणुपविट्ठा, तीसे य कंचि देसमणुपत्ताणं तेसिं पुव्वगहियसुदयमणुदियहं पिज्जमाणं झीणं, तय-
णंतरं ते वणिथा झीणसलिला तण्हाए परब्भाहया समाणा एगत्य मिलिज्जण एवं भणिउमारद्धा—
भोयणविरहेवि जियं कइवि दिणे वसइ देहगेहंसि । सलिलाभावे पुण दीवओव पवणेण विज्झाइ ॥ १ ॥
ता जावज्जवि तण्हा कालयणिव अवहरइ जीयं । ताव परकज्जजायं मोनुं सलिलं पलोएह ॥ २ ॥
एवं च ते पयट्ठा सव्वासु दिसासु पाणियनिमित्तं । कत्थइ अपेच्छमाणा एगं वणसंडमल्लीणा ॥ ३ ॥
विच्छायसुहा दीणा अपत्तकालावि संपह मरामो । एवं पयंपमाणा तण्हावससुसियसंवंगा ॥ ४ ॥
सिसिरतरुच्छायाए निमीलियच्छा य जाव चिट्ठति । तावेगनरजुवाणो समाणओ तेसि पासंमि ॥ ५ ॥
भणियं च तेण मुंचह विसायमहुणा मए जओ दिट्ठो । वणसंडमज्झयारे चउम्मुहो वम्मिओ गरुओ ॥ ६ ॥
ता एह तत्थ जामो पढमसुहं भिदिमो य तस्स लहुं । पच्छा अच्छं पत्थं जलखणं आपिवाभोत्ति ॥ ७ ॥
एयं निसामिज्जणं ते वणिथा तक्खणेण गंतूण । भिंदती पढमसुहं तस्स तिसाविवससंवंगा ॥ ८ ॥
फ़ालिदुज्जलं च सलिलं सारयससिणो मज्जहजालं व । हेलाए नीहरंतं पेच्छंति तओ पहिट्ठा ते ॥ ९ ॥
तयणंतरं च करचरणखालणं वयणसोहणं पियणं । वीसत्था वाणियगा निव्वत्तती जहिच्छाए ॥ १० ॥

पच्छा भेरति करवत्तयाइं दिइणो य कलसए चेव । दुलहं लद्धं वत्थुं कह वा नो वेप्पइ जणेण ? ॥ ११ ॥
 जाया पुणोवि चिंता तेसिं जह सलिलमित्थ लद्धमहो । तह बीयमुहे खणिए पाविज्जइ नूण तवणिज्जं ॥ १२ ॥
 ता भिंदह पुणरवि वस्मियस्स बीयं मुहं लहुं चेव । इय भणिए पुरिसेहिं तहत्ति सव्वं तओ विहिंयं ॥ १३ ॥
 ताहे सुजच्चकंचणनिचयं तत्तो विणिगयं संतं । हरिसुल्लसियसरीरा गिण्हंति जहिञ्चियं वणिया ॥ १४ ॥
 हिट्ठा भणंति वस्मियनिभेण चिंतामणी पयावइणा । अम्हारिसपहियहियट्ठयाए मन्ने कओ एत्थ ? ॥ १५ ॥
 ता अज्जवि तइयमुहं भेत्तव्वं होइ संपयमिमस्स । संभाविज्जंति इमंमि जेण रयणाणि मणिणो य ॥ १६ ॥
 एत्थंतरंमि पुरिसेहिं भिंदियं तंमि लोभनडिएहिं । अह नीहरियाइं तओ रयणाइं अणेगंभयाइं ॥ १७ ॥
 कणगं परिहरिऊणं महग्घरयणेहिं तेहिं सगडाइं । भरियाइं गाढपहरिससंभारं उव्वहेतेहिं ॥ १८ ॥
 नवरं चउत्थयंमि य मुहंमि भेतुं पयट्ठिया वंछा । तेसिं तु उत्तरोत्तरविसिट्ठवत्थूण लोभेण ॥ १९ ॥
 अह जाव तं विहाडिंति नेव तावेगथेरपुरिसेण । तेसिं हियत्थिणा सुद्धबुद्धिणा जंपियं एयं ॥ २० ॥
 भो भो देवाणुपिया ! जलं च कणगं च रयणनिवहं च । लद्धूण मुयह वस्मियमहुणा वचह सगेहेसुं ॥ २१ ॥
 मा पविहाडह एयं कज्जाण गईओ हुंति कुडिलाओ । सिट्ठो सिद्धतेविहु लोभो मूलं विणासस्स ॥ २२ ॥
 लोगेऽवि पसिद्धमिमं जं किर निवसंति गाढदाढिळा । अचंततिव्वदण्णा सण्णा वस्मियनिवासेसु ॥ २३ ॥

जइ कहवि मणोवंचियजलाइलाभो इमंमि भे जाओ। तहवि न खणिउं जुजइ विले विले होइ किं गोहा ? ॥ २४ ॥
जओ-अनओ जणियगुणोऽविहु पयावविहवं न देइ गरुयाणं । विहिवसविसंघटतोऽवि गुणकरो नयसमारंभो ॥ २५ ॥
अह तवयणं अवगणिऊण ते लोभतरलिया वणिया । वम्मियचउत्थमुहमवि जवेण खणिउं समाढत्ता ॥ २६ ॥
खणमाणेहिं तेहिं पयंडजमबाहुदंडसारिथ्यो । तस्संतो निवसंतो सुहेण परिघट्ठिओ नागो ॥ २७ ॥
ताहे सो रोसारुणनयणपहापाडलीकयदियंतो । विरइयअकालसंझोव निगओ वम्मियाहितो ॥ २८ ॥
तहवि य फारफणफलगफुरियरयणुच्छलंतरुइपडलो । पुच्छच्छडताडियभूमिवट्ट गुंजंतवणंसडो ॥ २९ ॥
सिग्घं नीहरिऊणं वम्मियसिहरग्गभागमारुहइ । पेच्छइ य भाणुमंडलमह सवियासाहिं अच्छीहिं ॥ ३० ॥
अह खणमेक्कं सूरं पलोइउं अणिमिसाए दिट्ठीए । ते वणिया आलोयइ सो उग्गविसो महासज्जो ॥ ३१ ॥
तयणंतरं च ते तस्स चक्खुणा तिव्वजलणजडिलेण । निदुद्धा समगं चिय समग्गभंडोवगणेहिं ॥ ३२ ॥
नवरं सो एगो चिय थरो नियमंडसगडियासहिओ । अणुकंपिगाए देवीए पाविओ वंचियं ठाणं ॥ ३३ ॥
तो भो आणंदमुणिंद ! ते जहा वाणिया अइविमूढा । अइलोभेणभिभूया सप्पाओ विणासमावद्धा ॥ ३४ ॥
तह तुज्झ धम्मसूरी समणो वरनायकुलसमुच्चओ । लद्धपसिद्धी भुवणत्तएऽवि समणो महावीरो ॥ ३५ ॥
असुरसुरनागकिन्नरनरनरवइपूयणिज्जपयकमलो । एत्तियमेत्ताएविहु सिरीए संतोसमलहतो ॥ ३६ ॥

जइ एत्तो मह संसुहमभत्तिपर वयणलेसमवि वइही । तमहं तवतेएणं भासरासिं करिस्सामि ॥ ३७ ॥
जह पुण सो थेरनरो ते वणिए सव्वा निवारितो । न विणट्ठो तह आणंद ! तं पि नाहं विणासिस्सं ॥ ३८ ॥
ता गच्छ तुमं नियधम्मसूरिणो कहसु सव्वमवि एयं । बलिणा समं विरोहो न कयाइ सुहावहो होइ ॥ ३९ ॥
एवं निसामिऊण आणंदमहरिसी सच्छहियत्तणेण समुण्णभयसंकप्पो अपरिसमत्तभिक्षाकज्जोऽवि तओ
ठाणाओ सिग्घाए गईए समागओ जिणंतियं, तिवसुत्तो आयाहिणपयाहिणपुव्वगं बंदिऊण गोसालगोवइहुं वणि-
यदिट्ठतं दिट्ठीविसमुयगदहणपज्जवसाणं सव्वं परिकहेइ, पुच्छइ य-भयवं ! किं गोसालो एवंविहस्सऽत्थस्स करणंमि
समत्थो न वा ? भगवया भणियं-आणंद ! समत्थो चेव, केवलं अरहंताणं भगवंताणं असमत्थो, परितावमेत्तं पुण
करेज्जा, ता गच्छ तुमं गोयमाईणं समणाणं एयमंहुं केहि, जहा-मा तुब्भं कोइ गोसालं मंखलिपुत्तं मंतिंयं
पाउब्भूयं समाणं धम्मियाएवि पडिचोयणाए पडिचोएज्जा, जओ एस ममं मिच्छं पडिवन्नोत्ति, एवं च विणएण
पडिसुणेत्ता गओ आणंदो गोयमाईण समीवं कहिउमारद्धो य तं वइयरं, एत्थंतरे गोसालो अत्तणो पराभवगस-
हंतो संपत्तो जिणसमीवं, अदूरे य ठाऊण भगवओ अभिसुहं एवं भणिउं पवत्तो-भो कासव ! तुमं मम हुत्तं एवं
वयसि-एस गोसालो मंखलिपुत्तो मम धम्मंतेवासी इच्चाइ, तन्नं मिच्छा, जो हि गोसालो तुमंतेवासी सो सुक्काभि-
जाइओ भविता कालमासे कालं काऊण अन्नयरेसु देवलोएसु देवत्ताए उववन्नो, अहं पुण उदाई नाम महासुणी

विचित्तवचरणसमर्थं नियदेहमुज्झिऊणं तस्स गोसालगस्स सरीरगं थिरं धुवं धारणिज्जं सीयसहं उण्हसहं खुहा-
पिवासासहं विविहदंसमसगाइपरीसहोवसग्गसहं थिरसंधयणंतिकाऊण तमणुपविट्ठो, ता भो कासवा ! साहु तुमं
अपरियाणिऊण मं गोसालं मंखलिपुत्तं वाहरसि, एवं च तेण भणिए भगवया महावीरेण जंपियं-भो गोसालग !
जहा कोइ चोरपुरिसो विविहपहरणहत्येहिं खंडरकुलपाभोक्खनरनियरेहिं पारब्भमाणो णो कत्थइ गड्डं वा दरिं वा
दुग्गं वा वणगहणं वा अत्तणो गोवणत्थं अपावमाणो एगेण उन्नालोमेण वा सणलोमेण वा कप्पासंपुंमेण वा तण-
सूएण वा तदंतरे दिन्नेण व अत्ताणमणावरियपि आवारियपिव मणमाणो निब्भओ निरुव्विगो अच्छइ, एवमेव
तुमंपि गोसाला ! अणणो संतो अणमप्पाणं वागरेसु, ता मा एवमलीयं वाहरसु, सुचेव तुह सरीरच्छाया, नो
अन्नत्ति, एवं च भगवया वुत्तो समाणो पज्जलियपयंडकोवानलो उचावएहिं वयणेहिं जयगुरू अक्कोसिऊण भणइ-भो
कासव ! नट्टोसि अज्ज, भट्टोसि अज्ज, अज्जेव न भवसि तुमंति, जो गिरिकंदरपुत्तं सीहं वोहेसि कीलाए, एत्थंतरे
भयवओ महावीरस्स अंतवासी सत्ताणुमूईनामो अणगारो धम्मायरियाणुरागेणं एयमड्डं सोढुमपारयंतो समांगंतूण एवं
भणिउमारद्धो-भो गोसालग ! तहारूवस्स समणस्स वा माहणस्स वा अंतिए जे एगमवि धम्मियं वयणं निसामिंति
तेऽवि तं वंदंति नमंसंति गुरुबुद्धीए पज्जुवासंति, किं णु तुमं जो मूलाओ चिय भयवया चेव पद्माविओ सिक्खाविओ
बहुस्सुतीकओ भगवओ चेव मिच्छं पडिवज्जंतो न लज्जसि ?, ता मा एवं कुणसु, अज्जावि सो चेव तुमं, सा चेव

तुह देहच्छाया, कीस अप्पाणं अवलवेसित्ति वुत्ते सद्धानुभूइं मुणिं गोसालो समुच्छलियकोवानलो तं दिव्वं पयडं
अणहियासणिज्जं तेउलेसं पक्खिविऊण निदहइ तक्खणेण, सो य तेयनिदहो सुहज्झवसायाणुगओ मरिऊण सह-
स्सारे कप्पे अट्टारससागराऊ देवो जाओत्ति, गोसालगोऽवि पुणो भयवंतं अणेगण्यारोहिं दुव्वयेणेहिं पहणिउं
पवत्तो, इओ य सुनक्खत्तनामो साहू तहा अवक्कोसिज्जमाणं भगवंतं निसामिऊण तणं व नियजीवियमवि गणंतो
सिग्घमांगंतूण गोसालं जहा सद्धानुभूइं तहेव अणुसासइ, नवरं गोसालगपक्खित्ततेउलेसापलीविओ समणो भय-
वंतं तिव्वुत्तो वंदिऊण सयमेव पंच महवयाइं उच्चारइ, समणा य समणीओ खामेइ, आलोइयपडिक्कंतो य कालं
काऊण अञ्चुए कप्पे बावीससागरोवमाउयदेवेषु देवत्तेणं उव्वज्जइ, एवं च तम्मि पंचत्तं गए संते गोसालो दुव्विग्ग-
हिओ बेयालोव लद्धावयासो विसेसओ परुसक्खराहिं गिराहिं तज्जणं कुणंतो चागरिओ सकारणं जयगुरुणा--भो
महाणुभाव ! गोसालग सिट्ठपहसमइक्कंतं तुह चरियं, जं मए पद्दाविओ मए सिक्खाविओ मए बहुत्सुइकओ
ममावि अवणवार्इ जाओ सि, एवं च जयगुरुणा सयमेव संलत्ते तेण अणाकलियकोवावेगेण सत्तट्ठ पयाइं पच्चोस-
क्किऊण पसुक्का महया संरंभेण भगवओ अभिसुहा तेउलेसा ।

अह मंदरगिरियां व निट्ठुरं जिणसरीरमक्कमिउं । असमत्था मारुयमंडलिच्च सा निहयमाहण्णा ॥ १ ॥

सयलदिसामुहपसरियपयंडतरतेयरइयपरिवेसा । आरत्तियदीवयमालियच्च सकखा विरायंती ॥ २ ॥

जच्चतवणिज्जपुंजुज्जलंगपहपडलविजियसोहस्स । भीयच्च तक्खणं चिय सामिस्स पयाहिणं कुणइ ॥ ३ ॥
तप्फरिसवसेण य भुवणबंधुणो अमयसीयतणुणोऽवि । जाओ मणगमेत्तं परितावो सव्वगत्तंमि ॥ ४ ॥
सा य तेउलेसा अहो अहं इमिणा महापावेण एरिसमकज्जं कारावियत्ति जायतिच्चकोवच्च उहुं उप्पइत्ता गोसा-
लगस्स सरीरं डहमाणी अंतो लहुमणुपविट्ठा, तओ गोसालो काउरिसोच्च समत्थेण नियतेएण विणिहओऽवि
धिट्ठिममवलंविऊण एवं पयंपेइ-अहो कासवा ! तुमं मम इमिणा तेएण अभिहओ संतो अंतो छण्हं मासाणं पित्त-
जरपरिगयसरीरो दाहवेयणोवक्कमियाउओ छउमत्थो चेव कालं करिस्ससि, भगवया भणियं-भो मंखलिपुत्त ! नो
खलु अहं तुह तेएण अहिहओ छण्हं मासाणं अंतो कालं करिस्सामि, किं तु अन्नाइं सोलस वासाइं पडिपुन्ननाण-
दंसणघरो विहरिस्सामि, पच्छा खवियसयलकम्मसो सिवपयं गमिस्सामि, तुमं पुण अप्पणो तेएण निहइहसरीरो
अंतो सत्तरत्तस्स पित्तमहाजरजलणपलित्तगतो छउमत्थो चेव कालं करिस्ससि ।

अह सव्वत्थवि नयरे सुद्धजणो जंणितं समाढत्तो । दोण्हं एत्थ जिणाणं परोप्परं वट्ठइ विवाओ ॥ १ ॥
तत्थेगो भणइ इमं पुंविं कालं करिस्ससि तुमंति । इयरोविहु तदभिमुहं इममेव पयंपए वयणं ॥ २ ॥
न सुणिज्जइ परमत्थो को मिच्छा वयइ को य सच्चंति ? । कुसला भणंति वीरो सच्चं वागइ नो इयरो ॥ ३ ॥
इओ य जयगुरू नियसमणगणमामंतिऊण भणइ-भो समणा ! जह तणरासी तुसरासी पत्तरासी वुसरासी

वा जलणजालापलीविया समानी पणहुतेया जायइ, एवं गोसालो मम वहाय तेयं निसिरित्ता विणहुतेउलेसमा-
हण्पो जाओ, तम्हा छेदेण निब्भया तुब्भे एयं धम्मियाए चोयणाए पडिचोएह, हेऊदाहरणकारणेहिं निप्पिट्ठ-
पसिणवागरणं करेहत्ति वुत्ते तहत्ति पडिसुणित्ता जयनाहं च सविणयं वंदिऊण समणा तं भणिउं पवत्ता ।
किं च-भो गोसालग ! किं तुज्झ दंसणे एस सत्थपरमत्थो । जं लोगमगगुक्कं तमेरिसं कम्ममायरसि ? ॥ १ ॥

तहाहि-धम्मगुरुं अवमन्नसि नियमाहण्यं पवित्थरसि बहुसो । जुत्तीहिवि जं न घडइ तं भाससि सुक्कमजाय ॥ २ ॥
चायाए जीवरक्खं पयडसि तं लोयमज्झयारंसि । सद्धम्मगुणपहाणे सयं तु निदहसि साहूवि ॥ ३ ॥
एवविहं अकज्जं कुणंति न कयाइ किर चिलायावि । तुमए पुण अलियवियहमेव सबं समायरियं ॥ ४ ॥
न सरसि उवयारं एत्तियंपि जं रक्खिओ सि जयगुरुणा । तह वेसियायणुम्मुक्कतेयनिहुज्झमाणंगो ॥ ५ ॥

इइ भगवओ समणेहिं धम्मियाए चोयणाए चोइज्जमाणो गोसालो आसुरुत्तो कोवेण मिसिमिसेमाणो समाणो
जाव साहूणं सररीरस्स रोममेत्तंपि निहुहिउं न तरइ ताव पडिहयसामत्थं तं नाऊण केडवि आजीविथथेरा जयगुरुं
गुरुत्तणेण पडिवन्ना, अन्ने पुण विवेगविरहिया तहेव ठिया, गोसालगोडवि खणमेत्तं विगमिऊण रोसेण व माणेण य
दीहुणहं नीससंतो दाढियलोमाइ लुंचमाणो हत्थे पकंपयंतो चलणेहिं भूमिं कुट्टमाणो अंतो विसण्णंतदुस्सहतेउछे-
सादाहवसेण य हा हओऽहमस्सीति पुणरुत्तं वाहरंतो अकयकज्जो चेव भगवओ समीवाओ नीहरिऊण गओ सट्ठाणं,

जयगुरुणाऽवि जंपियं-भो समणा ! जं इमं गोसालेण मम वहट्ठा तेयं निसिद्धं तं खलु अंगवंगमगहमलयमालवअ-
च्छवच्छकोच्छपाढलाढवज्जिमासिकोसलअवाहसुमुत्तराभिहाणाणं सोलसण्हं जणवयाणं उच्छायणाए भासरा-
सीकरणयाए समत्थंति वुत्ते विम्हियहियथा मुणिणो जायन्ति ।

सो य गोसालो कोडरनिहित्तहुयवहो तरुव निडुज्झमाणो कहिं पि रं अलहंतो तस्स दाहस्स पसमणत्थं कर-
कलिणं भायेणं मज्जपाणं पियमाणो तवससंभूयमएण य अभिक्खणं गायमाणो अभिक्खणं नचमाणो अभि-
क्खणं हालाहलाए कुंभकारीए अंजलिपगगहपुव्वयं पणामं कुणमाणो अभिक्खणं भंडगनिमित्तकुट्टियमद्वियंतो-
निहित्तिसिसिरकलिलसल्लेण सरारं उवासिंचमाणो अडुवियडाइ पइक्खणं जंपमाणो परमसोगमुव्वहंतण सिससग-
णेण सिसिरोवयारकारिणा परिवुडो दिणे गमेइ ।

तत्थ य सावत्थीए नयरीए अयंपुलो नाम आजीविओवासओ परिवसइ, सो य पुव्वरत्तावरत्तसमर्थमि धम्मजग-
रियं जागरमाणो जायसंसओ विंचित्तेइ-अहमेयं सम्मं न मुणामि-तणगोवालिया किं संठाणा हवइ ? ता गच्छामि
धम्ममायरियं धम्मोवएसगं समुप्पन्नादिब्वनानदंसणं सव्वन्तुं गोसालं हालाहलाए कुंभकारीए आवणंमि वट्ठमाणमापु-
च्छामिन्ति संपेहिता समुगयंमि दिणयेरे अण्णमहग्घाभरणालंकिवसरारो साओ गिहाओ पडिनिक्खमित्ता पायवि-
हारचारेणं कइवयपुसरिपरियरिओ गोसालयाभिमुहं गंतुं पयट्ठो, कमेण य कुंभारावणसमीवमणुपत्तो समानो तं

गोसालं करकलियभायणमभिवखणं महरापाणं कुणमाणं नच्चमाणं गायमाणं हालाहलाए कुंभकारीए अंजलिं
 विरयंतं मट्टियासलिलेणं सरीरं परिसिंचमाणं असंबद्धाई वयणाई पयंपमाणं पेच्छिऊण लज्जावसविमिलयंतलयणो
 सहसच्चिय सणियं सणियं पच्चोसकंतो झडत्ति समीवट्टिएहिं दिट्ठो गोसालयसिस्सेहिं, तओ वाहरिऊण भणिओ-
 तेहिं-भो अयंपुल ! तुमं पच्छिमरयणीए तणगोवालियासंठाणविसयं संसयं पकओसि, अयंपुलेण भणियं-भयवं !
 एवमेयं, पुणोऽवि गोसालगदुच्चिलिसियगोवणट्टया भणियं तेहिं-भो अयंपुल ! जं च तुह गुरू हत्थगयभायणे जाव
 अंजलिं विरयंतो विहरइ तत्थवि एस भगवं इमाई निव्वाणगमणसूयगाई पजंतलिगाई वागेरइ, तंजहा—

चरिमं गेयं चरिमं नट्टं चरिमं अंजलिकम्मं चरिमं पाणं अन्नं च मट्टियासीयलसलिलसरीराणुल्लिखणपमुहं
 वाचारं, ता अयंपुल ! भगवओ चउवीसमतित्थगरस्स गोसालगस्स पुव्वभणियल्लिगेहिं सूइओ संपइ निव्वाणगमण-
 पत्थाओ वट्टइ, तम्हा गच्छ तुमं स एव तुह धम्मायरिओ इमं वागरणं वागरिही, एवं च सोच्चा सो दट्ठहरिउच्छ-
 लंतपुलयजालो तदभिमुहं गंतुं पयट्ठो, ते आजीवियथेरा सिग्घयरं गंतूण गोसालगस्स अयंपुलागमणं निवेपंति,
 तं च मज्जभायणाइ एगंते परिचयावेंति, आसणंमि य निवज्जावेंति, एत्थंतरे पत्तो अयंपुलो तिकसुत्तो य पया-
 हिणीकाऊण परेणं विणएणं वंदित्ता गोसालयं निसण्णो समुचियासणे, तओ गोसालएण भणियं-भो अयंपुल !
 तुमं पच्छिमरयणीसमयंमि इमं संसयमुव्वहसि जहा तणगोवालिया किंसंठाणसंठियत्ति, नणु वंसीमूलसंठिया सा

पन्नत्ति, इमं च निसामिऊण पहिट्टहियओ पुणो तं वंदिऊण गओ सो सट्ठाणं । अन्नस्मि य वासरे ईसि समुवलद्ध-
चेयणो गोसालो नियमरणसमयमाभोइऊण अप्पणो सिस्से सदावेइ, तेसिं पुरओ य इमं वागेइ-भो देवानुप्पिया !
मं कालगयं जाणिऊण मम सरिरं सुरहिगंधोदएण पक्खालिऊण सरसेण चंदणेण चचिऊण य महरिहं हंसल-
क्खणं पडयं नियंसावेज्जह, तयणंतरं सच्चालंकारविभूसियं सहस्सवाहिणीसिबिगासमारोवियं काऊण नीहरावेज्जह,
सावत्थीए पुरीए सिंघाडगतियचउक्कचचेसु इमं उग्घोसिज्जह, जहा-इमीए ओसप्पिणीए चउवीसाए तित्थयराणं
चरिमो एस गोसालगजिणो तित्थयरत्तं पालिऊण समुण्णक्केवल्लो संपयं सिद्धिं गओत्ति, इमं निसामिऊण ते सिस्सा
विणएणं सच्चं पडिसुणंति, अह सत्तमदिगंमि परिणममाणंमि समुवलद्धमुद्धुद्धिणा पुव्वदुचरियनिवहसुमरणुप्पन्ना-
तुच्छपच्छायावेण चित्तियं गोसालेण—

अहह महापावोऽहं अजिणंपि जिणं भणामि अप्पाणं । सच्चं च मुसावयणंपि मुद्धलोयस्स साहमि ॥ १ ॥
सिरियद्धमाण तित्थंकरो गुरू धम्मदेसगो परमो । आसाइओ मए तह तेयनिसग्गेण दुग्गेण ॥ २ ॥
दुद्धरसंजमभरधरणपच्चले मुणिवरे दहंतेण । निहहु चिय बोही मए हयासेण एमेव ॥ ३ ॥
सच्छंदं उम्मगं पयट्ठमाणेण तह महीवेट्ठे । अप्पा न केवल्लो चिय लोगोऽवि भवन्नवे खित्तो ॥ ४ ॥
अहवा समगमुवणत्तएऽवि तं नत्थि पावठाणमहो । जं कइवयदिगकज्जे मए अणज्जेण नो विहियं ॥ ५ ॥

तं चोन्नं जं इमिणावि दुट्टदेहेण पावमरगुरुणा । जमवयणंपिव भीमं अज्जवि नासं न वच्चामि ॥ ६ ॥
मुद्धेण मए चिरजीवियत्थिणा कवलियं हि तालउडं । आगामियमसुहमतक्किज्ज जं एवमायरियं ॥ ७ ॥

इय वेरगमुवगओ गोसालो तह न तेउलेसाए । संतण्णइ जह तेणं सपुव्वहुचरियवग्गेण ॥ ८ ॥

एवं च सुचिरं परिच्छुरिज्ज सो नियसिस्सगणं उच्चावयसवहसावियं काऊणं एवं भणिउं पयत्तो-भो महाणु-
भावा ! नो खलु अहं जिणो सव्वन्नू सव्वदरिसीवि, किंतु गोसालो मंखलिपुत्तो भगवओ वद्धमाणतित्थंकरस्स
सिस्सोऽवि होऊण पच्चणीओ समणघायगो नियतेएण चेवाभिहओ छउमत्थो विणस्सिउकामो ढंभमेत्तपयट्ठिय-
पउट्ठपरिहाराइदुन्नओ एत्तियकालमण्णणं परं च वुग्गाहतो विहरिओ, अओ एवंविहमहापावकारिणं कालवयं
जाणित्ता तुब्भे वामचलणंमि रज्जूए बंधित्ता इमाए सावत्थीए पुरीए सव्वत्थ सिंघाडगाइसु आकाहिक्किहि कुणमाणा
तिक्खुत्तो वयणंमि निट्ठीवणं पक्खिवंता एसो सो गोसालो मंखलिपुत्तो अजिणो गुरुपडिणीओ समणघायगो
असेसदोसकारी, भयवं पुण महावीरो जिणो तित्थयरो उप्पन्नदिव्वनाणदंसणो सच्चवाई कारुणिओ धम्मदेसगोत्ति
महया सहेण उग्घोसमाणा य मम सरीरस्स नीहरणं करेज्जहत्ति भणिऊण दारुणवेयणाभिहयसरीरो सुओ गोसा-
लोत्ति । तं च कालगयं जाणित्ता ते आजीविथेरा नियगुरुपक्खवायमुव्वहंता कुंभकारावणस्स दुवारं पिहिऊण तस्स
मज्झयारे सावत्थि नयरिमालिहंति, तओ गोसालगस्स वामपायरज्जुबंधणपमुहं आघोसणापज्जवसाणं सव्वहपरिमो-

वखणं करोति, तथणंतरं च तं सरीरं सुरहिसलिलेहिं ण्हाविऊण तण्णखवायपडिवन्नजणथिरिकरणदुया महाया पूवासक्कारसमुदण्णं सिबियाए समारोविऊण नीहराविति, मयकिचाणि य कुणति ।

इओ य भगवं महावीरो सावत्थीओ नयरीओ निक्खमिऊण विहारक्केण गओ मिडियगमनये, समोसढो य मणिकोदुयाभिहाणचेइयंमि, धम्मनिसामणत्थं च परिसा समागया, खणमेगं च पज्जुवासिऊण जहागयं पडिगया, अह भगवओ महावीरस्स तेण तेउलेसापरितावसेण समुप्पन्नो पित्तजरो, तच्चसेण य पाउब्भूओ रुहिराइसारी, रविकरपडिवोहियकणयकमलसच्छहंमि मिलायलायन्नं जायं वयणकमलं सरयदिणयसमुज्जलावि विच्छाईभूया देहच्छवी विवसियकुचलयदलदीहरंमि मउलाविं लोयणजुयलं महानगरगोउरपरिहाणुरुवंपि किसत्तणमुवगयं बाहुदंडजुयलंति, एवंविहं च भगवओ सरीरलंछि पिच्छमाणो मुद्धजणो वाहरिउमारद्धो-अहो भगवं महावीरो गोसालगतवतेयजणियपित्तज्जरविदुरियसरीरो छण्हं मासाणमब्भंतरे परलोयं वच्चिस्सइत्ति, इमं च पवायं जणपरंपराओ निसामिऊण सीहो नाम भगवओ सिस्सो गुरुपेम्माणुराणेण एगंते गंतूण अहिययरमन्नम्भर-रुद्धकंठविवरो कहकहविगन्धिभणं रोविडं पयत्तो, इओ य केयलावलोएण अवलोइऊण भगवया वाहराविओ एसो, भणिओ य-

किं तं जणप्पवायं निसामिडं कुणसि चित्तसंतावं ? । नेवावयाए कइयवि विउक्कमंतीह तित्थयरा ॥ १ ॥

अन्नह संगमयविमुक्कचक्ककडपूयणाइजणिएहिं । मरणं हविज्ज तइयावि मज्झं तिकखेहि दुक्खेहिं ॥ ३ ॥
 जो पुण तणुतणुयत्तणरुहरइसाराइओ विगारो मे । सो(निरु)वक्कमत्तणेणं सोऽवि न दोसं समावहइ ॥ ३ ॥
 सीहेण तओ भणियं जइवि हु एवं तहावि जयनाह ! । तुम्हावथाए तप्पइ सयलं ससुरासुरं भुवणं ॥ ४ ॥
 सिढिलियसज्झायज्झाणदाणपाभोक्खधम्मवावारो । चाउव्वन्नो संघोऽवि लहई नो निव्वुइं कहवि ॥ ५ ॥
 ता पसियसु जयबंधव ! अम्हारिसहिययदाहसमणत्थं । उवइससु भेसहं जेण होइ देहं निरोगं भे ॥ ६ ॥
 एवं कहिए तयणुकंपाए भगवया भणियं-जइ एवं ता इहेव भिंढयगामे नयरे रेवइए गाहावइणीए सभीव
 वच्चाहि, ताए य ममनिमित्तं जं पुवं ओसहं उवक्खडियं तं परिहरिऊण इयरं अप्पणो निमित्तं निष्फाइयं आणेहत्ति,
 इमं निसामिऊण हरिसवसपयट्ठपुलयपडलाउरसरीरो सीहो अणगारो समुट्ठिऊण भयवंतं वंदइ नमंसइ, तयणंतरं
 पडिगगहं गहाय रेवइए गाहावइणीए गिहमुवागच्छइ, साऽवि रेवइ तं अणगारं ईरियासमिइप्पमुहचरणगुणसंपन्नं
 समणधम्मं व पच्चक्खं गिंहमि पविसमाणमवलोइऊण खिप्पामेव आसणाओ अब्भुट्ठइ, सत्तट्ठ पयाइं सम्मुहमवसप्पइ,
 सविणयं वंदिऊण य एवं जंपइ-संदिसह भंते ! किमागमणकारणं ? सीहेण भणियं-जं तुमए वद्धमाणसामीं पटुच्च
 कयं तं मोत्तूण जं अत्तट्ठा निष्फाइयं ओसहं तं पणामेहत्ति, तीए भणियं-भयवं ! को एवंविहदिव्वनाणी जो रहसि-
 कयंपि एवंविहं वइयरं परिजाणइ, मुणिणा कहियं-सयलभावाभावनिब्भासणसमत्थेकवलवलोयनिलयं भयवंतं वी-

रजिणं भोक्तॄणं को अन्नो एवंविहं साहिउं पारइ?, एवं सोचा-सा पहिट्टहियया सायरं तमोसहं सुणिणो पडिग्गहंमि पक्खिखइ, तओ सा तेण भावविमुद्धमेसहणयाणेण देवाउयं कम्मं निबंध्यइ, देवा य तीसे गिहंमि कणगरासिं नि-सिरंति, महादाणं महादाणंति घोसंति, सीहोवि साहू तं गहाय भयवओ समण्यइ, तं च भयवं आहारेइ, आहा-रिए य ताहिं ववगयपित्तजरसमुत्थविगारो अमयपुन्नसरीरोव समहिगसमुम्मिल्लियजच्चकंचणसच्छहच्छवी वीरो वि-राइउं पवत्तो । अह पडिहयरोगे वद्धमाणे जिणिंदे हरिसवियसियच्छो सव्वसंघोऽवि जाओ । असुरसुरसमूहा वद्धि-याणंदभरा सह नियरमणीहिं नच्चिउं संपयत्ता ।

गोयमसामीवि गणहरो महावीरं वंदिऊण पुच्छइ-भयवं! तुब्भं कुसिस्सो गोसालो कालं काऊण कहिं उववन्नो?, भयवया भणियं-अच्चुयंमि देवलोगे बावीससागरोवमाऊ देवो जाओत्ति, गोयमेण भणियं-भयवं! कंहं तहाविहमहा-पावकरणेऽवि एवंविहदिबदेविट्ठलाभो समुण्यण्णोत्ति?, तओ सिट्ठो सामिणा से सव्वोऽवि शरणसमयसमुण्यन्नातुच्छ-पच्छायावाई वुत्ततो, पुणोऽवि गोयमेण भणियं-भयवं! तओ ठाणाओ सो आउक्खएण कहिं उववज्जिही?, कइया वा सिद्धिं पाविहत्ति?, भगवया जंपियं-गोयम! निसामोहि-इहेव जंबुद्वीवे दीवे भारहे वासे विंझगिरिपायमूले पुंडाभिहाणंमि जणवए सुमइस्स रत्नो भद्दाभिहाणाए देवीए गब्भे सो गोसालो तत्तो चवित्ता पुत्तत्ताए पाउब्भवि-स्सइ, तओ नवणं मासाणं समहिगाणं समइक्कताणं पजाइही, तस्स य जम्मसमए तत्थ नयरं सभंभतरबाहिरे

भारगसो य कुंभगसो य परिमलायद्विधफुल्लधुयधूसरा पउमवुद्धी रयणवुद्धी य भविस्सइ, चंदसूरदंसणभणमुहजम्म-
 णमहूसवं काऊण य अम्मापियरो दुवालसमे दिवसे संपत्ते जम्मदिणाणुरूवं महापउमोत्ति से नामं करिस्संति, अह
 समुचियकाले अहिगयकलाकलवं तं सोहणंमि तिहिनक्खत्तमुहुत्तंमि महया रायाभिसेएणं अभिसिंचिहन्ति, तओ
 सो अक्खलियपरक्कमो पयंडपयावपडिहयपडिक्खो अहमहमिगाए पणमंतनरिंदसंदोहमउल्लिमालालियचलणो
 महाराओ भविस्सइ, तस्स य महापउमस्स विजयजत्तमुवट्ठियस्स पुन्नभइमाणिभइनामाणो दो देवा महइहिया महापर-
 क्कमा सेणाकम्मं करिस्संति, ते य राईसरसेणावइमंतिसामंतपमुहा पहाणजणा एवंविहं वइयरमुवल्लभ पहरिसुस्स-
 सिधरोमकूवा महापउमस्स रणो गुणनिष्फणं देवसेणोत्ति दुइज्जं नामधेयं निम्मविस्संति, अणया य तस्स रणो
 सरयससहरधवलं चउदंतं सत्तंगपइट्ठियं लट्ठं हत्थिरयणमुप्पज्जिही, तम्मि य सो समारूढो एरावणपट्ठिओच्च
 पुरंदरो उवसोभमाणो इओ तओ परिभमिस्सइ, तयणंतरं पुणोऽवि ते राईसरादओ जणा नियपहुसिद्धिपलयणु-
 प्पन्नपमोयभरतरलिया तस्स राइणो विमलवाहणोत्ति तइयं नामधेयं पइट्ठिस्संति । अह अन्नया कयाई तस्स
 रजभरमणुपालितस्स पुच्चभवब्भत्थतवस्सिजणविणासहीलणप्पमुहाणत्थपच्चइयकम्मदोसेण समणसंधोवरि बाढं प-
 ओसो समुप्पज्जिही,

तो सो सधम्मकम्मुज्जाएऽवि एगे तवस्सिणो हणिही । अन्ने पुण बंधिस्सइ विविहपयारोहिं बंधेहिं ॥ १ ॥

अक्रोसेही एगे उवहसिही तदपरे महापावो । अन्नसि निग्घिणगणो काराविस्सइ छविच्छेयं ॥ २ ॥
 एगेसिं हरिस्सइ वत्थपत्तकंबलपमोकखमुवगरणं । अन्नोसिं समणाणं वारिस्सइ भत्तपाणंपि ॥ ३ ॥
 अन्ने निव्वासिस्सइ नियनयरपुरागरासयाहितो । अन्ने पुण मारिस्सइ सत्थेहिं लहू सहत्थेण ॥ ४ ॥
 इय एवंविहमसमंजसं तओ पेच्छिऊण पउरजणा । भत्तिविणउत्तिमंगा तं एवं विन्नविस्संति ॥ ५ ॥
 देव ! न जुत्तं सोउंपि एयमच्चंतमजसंसंजणं । समणाण धम्मविग्घो जं एवं हवइ तुह रज्जे ॥ ६ ॥
 दुट्ठाण निग्गहो सिट्ठपालं नियकुलक्कमायरणं । रायाण एत्तियं चिय सलहिज्जइ किं थ सेसेहिं ? ॥ ७ ॥
 एकमकित्ती सवत्थ तिहुयणे उन्नमइ महापावं । अन्नं चिय रज्जखओ हीलिज्जंतेसु समणेसु ॥ ८ ॥
 अन्नं च-जइ देव ! कहव कुप्पंति तुम्ह समणा इमे समियपावा । ता सयलंपिवि रट्ठं दहंति हुंकारमेत्तेण ॥ ९ ॥
 एएसिं पभावेणं धरंति धराणिं सुहेण नरवइणो । एत्तो चिय मज्जायं जलनिहिणोऽवि हु न लंघंति ॥ १० ॥
 ता देव ! विरमसु धुवं तवस्सिजणपीडणाओ एयाओ । अकलंकचिय कित्ती जह वियरइ तिहुयणे तुम्ह ॥ ११ ॥
 इय पुरजणेहिं सुवहुप्पयारवयणेहिं वारिओ संतो । भावविरेहेऽवि सो तं पडिसुणिही तथणुवित्तीए ॥ १२ ॥
 अन्नया य सो रहवरारूढो निग्गच्छिही, इओ य सुभूमिभागे उज्जाणे तिनाणोवगओ विउलतेउलेसामाहप्प-
 दुद्धरिसो विविहतवचरणनिरओ सुमंगलो नाम तवस्सी आयाविस्सइ, सो य राया तेणप्पएसेण • वच्चमाणो

तं ददूण निष्कारणुप्पन्नतिव्वकोवानलो सुमंगलं काउस्सग्गद्धियं रहग्गभागेण पणोछावेही, सो य तेण . पणोछिओ
समाणो धरणीयले निवडिओऽवि सणियं सणियं समुट्टिऊण पुणो काउस्सग्गेण पलंबियभुओ ठाही, सो य राया
तं उडुसंठाणसंठियं ददूण पुणोऽवि रहग्गेण पणोछावेही, सो य मंदं मंदमुट्टिऊण तेहव उस्सग्गेण ठाइस्सइ, नवरं
ओही पंउजिऊण तस्स पुव्वभवे आभोइस्सइ, तओ एवं भणिही—अरे नरिंदाहम ! न तुमं महापउमो न देवसेणो न य
विमलवाहनो, किं तु मंखलिपुत्तो गोसालगो तुमं, जेण निदह्हा महातवस्सिणो अचासाइओ निययधम्मगुरू, ता
जइ रे तथा सव्वाणुभूइणा सुणिवरिट्ठेण पहुणावि होऊण पडिविघायमकुणमाणेण निरुवमं पसममवलंबिऊण तुह
दुच्चिलसियं सम्ममहिंयासियं, सुनक्खत्तमहारिसिणा वा तित्तिक्खियं, असेसतिहुयणरंगानुछमहामछेण महावीरेण
वा खमियं तं, नो खलु अहं सहिस्सं, किं तु जइ एत्तो पणोछावेहिंसि ता भवंतं सरहं सतुरयं ससारहिंयं नियतवत्ते-
एणं छारुक्कुरुडं काहामि, सो य राया इमं निसामिऊण समुच्छलियपवलकोवानलो पुणोऽवि संदणग्गेण पणोछा-
वेही, अह तइयवेलंपि पणोछिओ सुमंगलसाहू विसुमारियपसमसव्वस्सो पणट्ठगुरूवएसो सत्तट्ठ पयाइं पचोसक्किऊण
तेउलेसं निसिरिही, ताए य सरहो ससारही सतुरंगमो सो निदज्झिही, सुमंगलसाहूवि तं निदहिऊण पुणरवि
पच्चागयसुहज्जवसाणो आलोइयनियदुच्चरिओ विचित्तेहिं तवोक्कम्मोहिं कम्मनिज्जरणं काऊण बहुयाइं चायाइं सा-
मणं परिपालिऊण य मासियाए संलेहणाए संलिहियसरीरो मरिऊण सव्वट्ठसिद्धे विमाणे तेत्तीयसागरोवगाऊ

देवो भविस्सइ । तओ चुओ समाणो महाविदेहे सिज्झिहिति । गोयमसामिणा भणियं-भयवं ! विमलवाहणो
कहिं उण्यज्झिही ? भयवया भणियं-गोयम ! विमलवाहणो तेण सुणिणा निहट्ठो सत्तमाए निरयणुढवीए अण्णइ-
ट्ठाणे नरयावासं तेत्तीससागरोवमाऊ नेरइओ भविस्सइत्ति । तयणंतरं च—

सवत्तो पसरियतिकखवज्जसूलगवेहणसमत्थं । अणिसं सहिही विवसो तेत्तीसं सागराइं दुहं ॥ १ ॥
तत्तो उवट्ठित्ता मच्छभवं पाविऊण तिव्वेणं । पुव्वभवसाहुमारणजणिणं पावदोसेणं ॥ २ ॥
सो सत्थहओ संतो दाहजरवोरेवयणाभिहओ । मरिउं होही पुणरवि नेरइओ सत्तममहीए ॥ ३ ॥
तत्तो मच्छो छट्ठीए नारगो इत्थिया य नेरइओ । छट्ठीए पुढवीए इत्थी नेरइओ पंचमीए ॥ ४ ॥
उरगो नेरइओ पंचमीए उरगो पुणो चउत्थीए । नेरइओ सीहो तह चउत्थपुढवीए नेरइओ ॥ ५ ॥
सीहो तच्चाए नारगो य पक्खी य तइय नेरइओ । बिइज्जा पुढवीए नारगो सुयपरिस्सप्पो ॥ ६ ॥
बीयाए नेरइओ सुयपरिस्सप्पो य पढमपुढवीए । सण्णी तओ असण्णी नेरइओ पढमनरगंमि ॥ ७ ॥
तेण सुणिमारणज्जियपावेणं नरयवज्जठाणेसु । सत्थहओ दाहजरविट्ठो होही य मरिही य ॥ ८ ॥
तत्तो पक्खिसिरीसिवउरपरिस्सप्पो नेगमेएसु । जलथरजोणिसु तहा उववज्जिय भूरिवाराओ ॥ ९ ॥
चउरिंदिएसु तेइंदिएसु वेइंदिएसु य भवित्ता । सवत्थ सत्थनिहओ विवज्झिही नेगवाराओ ॥ १० ॥

वणसइपवणानलसलिलपुढविजाईसु विविहभेयासु । कालमसंखं वसिउं अकालमरणेण सो मरिही ॥ ११ ॥
इय उब्भडनियदुच्चरियजलणजालाकलावसंतत्तो । तं किंपि नत्थि दुक्खं जं पविस्सइ न स वरागो ॥ १२ ॥

एवं च अणेगभवुम्मज्जणनिमज्जणाइं काऊण कहकहवि समासाइथेवकम्मविधरो सो गोसालगजीवो रायगिहे
नयरे बाहिं वेसिथित्ताए उववज्जिही, तत्थवि चिरभवसाहुवहसमुत्थनिकाइयकम्माणुवत्तणवसेण रयणीए पसुत्ता
चेव एगेण विडपुरिसेण आभरणलिच्छुणा निसियखगघेणुनिह्यनिहारियउदरा मरिऊण पुणोऽवि रायगिहस्संतो
वेसिथियत्ताए उववज्जिऊण विवज्जिही । तओ जंबुदीवे दीवे भारहे वासे विंझगिरिपायमूले बिभेलए सन्निवेसे
माहणकुले दारियत्ताए पच्चायाही, तं च कालक्कमेण उम्मुक्कवालभावं अम्मापियरो समुच्चियस्स एगस्स माहणपुत्त-
स्स य भारियत्ताए पणामइस्सति, अन्नया य सा गुविणी समुरकुलाओ पियहरं निजमाणी अंतरा समुच्छलियपव-
लदावानलजालाकलावकवलिया कालं काऊण अगिगकुमारेसु देवेसु देवत्ताए उववज्जिही, तत्तो य चविऊण माणु-
सत्तणेण समुप्पन्नो समाणो तहाविहसुगुरुदंसणसमुवलद्धसच्चनुधम्मबोहो भववेरगमुवहतो पव्वज्जं पडिवज्जिही,
कहिंवि पमायवसेण विराहियसामणो य असुरकुमारेसु देवेसु उववज्जिही, एवं कइवयभवगहणाइं पुणो पुणो
विराहियसामन्नो असइं भवणवासिदेवेसु जोइसिएसु य सुरसंपयं समणुभविऊण पुणो समुवलद्धमाणुसत्तो अइयार-
कलंकपरिहीणं पव्वज्जं समायरिऊण सोहम्मं देवलोए देवो होही, एवं सत्त भवे जाव निक्कलंकं सामणमणुपालिऊण

महाविदेहे वासे ददपइण्णाभिहाणो ईसरसुओ होऊण जायभववेरगो परिचत्तवणसयणो धेराण अतिए सवविइं गहाय छट्टट्टमाइतवोकम्मविसेसहिं पुबभवपरंपरासमज्झिआइ पावकम्माइ खविऊण केवलनाणमुण्णाडेही, तओ सो ददपइण्णकेवली सुणियगुरुजणावमाणसमुत्थमहापावविथंभियमवाडवीनिवडणकडुविवागो नियसमणसंधं सहाविऊण

एवं भणिही—

हंहो देवाणुपिया ! जंबुद्वीवंमि भारहे वासे । मंखलिपुत्तो गोसालनामओऽहं पुरा आसि ॥ १ ॥

बहुकूडकवडनिरओ विवरीयपरूवगो समणघाई । धम्मगुरुपच्चीओ समत्थदोसाण कुलभवणं ॥ २ ॥

नियतेएणं चिय दज्झमाणदेहो दढं बहुदुहत्तो । कलुणं विलयंतोऽहं पंचत्तं पाविओ तइया ॥ ३ ॥

तम्मूलं चउगइभुयगभीसणे दीहरे भवारण्णे । भमिओ सुचिरं कालं विसहंतो दारुणदुहाइं ॥ ४ ॥

ता भो देवाणुपिया ! इय सोचा मा कयावि सुगुरुणं । संघस्स पवयणस्स य पडिणीयत्तं करेज्जाह ॥ ५ ॥

बहुओऽवि पावनिवहो वच्चइ नासं सुदुत्तमेत्तेण । गुरुसाहुसंघसिद्धंतधम्मवच्छलभावेण ॥ ६ ॥

एवमणुसासिऊणं नियसमणे सो तथा महासत्तो । पडिबोहिऊण भवे पाविस्सइ सासयं ठाणं ॥ ७ ॥

इय तइलोयदिवायरसिरिवीरजिणेसरेण परिकहियं । गोसालयचरियमिमं गोयमसामिस्स नीसेसं ॥ ८ ॥

एयं च तच्चरियं महादुहविवागमूलं निसामिऊण बहवे समणा य समणीओ य सावयाओ य सावियाओ य गुरु-

प्पमुहाणं सविसेसं आसायणापरिहारपरायणा जायत्ति । अह भयवं महावीरो मिंढियगामनयराओ निक्खमिस्ता-
 समणसंघपरिवुडो गामाणुगामेण विहरमाणो संपत्तो रायगिहं नयरं, तस्स य अदूरविभागवत्तिमि गुणसिलयाभिहा-
 णचेइए विरइयं देवेहिं समोसरणं, पुव्वक्केमेण निसन्नो सिंघासणे जयगुरू साहिउं पवत्तो दयामूलं खमामहाखंधं
 मूलगुणसाहासमाउलं उत्तरगुणपत्तनिगरसंचन्नं अइसयकुसुमविराइयं जससोरभभरियमुवणंतरं विसमसरतरणिताव-
 पणासगं सग्गापवग्गसुहफलदाणदुल्ललियं पवरजणसउणणिसेवणिज्जं धम्ममहाकण्णतरुवरं । एत्थावसरंमि सेणियनरा-
 हिवो भयवंतं समवसरणट्ठियं सोऊण पट्ठिओ अभयकुमारमेहकुमारनंदिसेणपुत्तपरियरिओ वंदणवडियाए जयगुरूणो ।
 कहं चिय ?—

डिंडीरपिंडुडरियहरियखरकिरणविबकरपसरो । सहरिसहरिणिच्छिक्करयलुल्लसियचामरुग्घाओ ॥ १ ॥

गजंतमत्तकुंजरमयजलपडिहणियरेणुपब्भारो । तरलतरतुरयपहकरसंखोहियमहियलाभोगो ॥ २ ॥

रणज्झणिरकणयकिंकिणिमालाउलरहसमूहपरियरिओ । दण्णुब्भडुसुहडसहस्सरुद्धनीसेसदिसिनिवहो ॥ ३ ॥

इय सेणिओ नरिंदो हरिसुक्करिसं परं पवहमाणो । करिणीखंधारूढो नीहरिओ निचपुराहिंतो ॥ ४ ॥

तयणंतरं च पत्तो समोसरणं । जहाविहिणा य पविट्ठो तयब्भंतरे, तिपयाहिणीकाऊण वंदिउं जयगुरू निविट्ठो
 समुचिए भूमिभागे, भगवथाऽवि पारद्धा तदुचिया धम्मकहा । कहं ?—

भो भो महाणुभावा निम्मलबुद्धीए चित्तह सयणहा । संसारं घोरमिमं महामसाणस्स सारिच्छं ॥ १ ॥
तथाहि-उब्भडवियंभियमुही विसयपिवासा महासिवा एत्थ । दढमणिवारियपसरा सव्वत्तो चिय परिब्भमइ ॥ २ ॥
ओहामियसुरनरखयरविक्रमा तंतमंतदुग्गेज्झा । अनिवारियं पयट्ठइ भीमा जरडाइणी निच्चं ॥ ३ ॥
पयडियपयंडपक्खा निरवेक्खकंतजीयमाहप्पा । सव्वत्तो पासठिया कसायगिद्धा विसण्णंति ॥ ४ ॥
दावियविविहवियारा जीवियहरणेऽवि पत्तसामत्था । दढमसुणियप्पयारा रोगमुयंगा वियंभंति ॥ ५ ॥
लुद्धुं छिदं थेवंपि तक्खणुप्पन्नहरिसपब्भारो । भुवणत्तयसंचरणो मरणपिसाओ समुत्थरइ ॥ ६ ॥
इट्ठविओगाणिट्ठप्पओगपामोक्खदुक्खतरुनिवहो । सव्वत्तो विणिवारइ विवेयदिणनाहकरपसरं ॥ ७ ॥
इयं भो देवाणुपिया ! मसाणतुल्ले भवंमि भीमंमि । खणमवि न खमं वसिउं तुम्हाणं सोक्खकंखीणं ॥ ८ ॥
एवं भगवया वागरिए संसारसरूवे पडिबुद्धा बहवे पाणिणो, भावसारं च अणेगेहिं अंगीकया देसविरइसव्ववि-
रइपडिवत्ती, हरिससियसरीरो य सपरियणो राया गओ जहागयं, नवरं मेहकुमारयायुत्तो अंतो वियंभंतहरिसपसरो
संसारविरागं परममुच्चहतो सेणियनराहिंव जणणिं च पणमिऊण भणिउं पवत्तो—अंबताय ! अहमेत्तो वंछामि
तुब्भेहिं अणुण्णाओ भगवओ समीवे पव्वलं पवज्जिउं, तेहिं भणियं-पुत्त ! विसमो जोव्वणारंभो दुरक्खणिज्जो मयर-
द्धयसरपहारो दुद्धरा विसयाभिमुहीभवता इदियतुरंगमा सम्मोहदायगा लडहमहिलाजणविसाला बाढं दुरज्झवसा

पद्मजा, अर्चतं दुरहियासा परीसहा, ता पुत्त ! पडिवालेहि कहियवि वासराइं, मेहकुमारेण भणियं-अम्मताय ! तडि-
तरलमाऊअविलसियं सरयगिरिसरियावारिवेगचडुलं जोवणं मत्तकामिणीकडक्खभंगुरा रायलच्छी, जन्नारंभा इव
दीसंतबहुविण्णओगा इट्टजणसंजोगा, ता पज्जत्तमेत्तो गेहनिवासेण, सद्धहा मा कुणह धम्मविग्घति भणिए अणु-
ण्णाओ कहकहवि जणणिजणगेहिं, तओ महाविभूइसमुदएणं गहिया अणेण भगवओ समीवे पद्मजा, अन्नेऽपि तं
पद्मज्जं अणुणिग्हंतं पासिऊण बहवे नरिंदसेट्टिसेणावइसुया जायभवविरागा पद्मइया ।

अह दुस्सहत्ताए परीसहाणं चलत्तणओ चित्तवित्तीए तस्स मेहकुमारसाहुस्स अणुक्कमेण पढमरयणीए चेन्न
पसुत्तस्स पविसंतनीहरंतमुणिचरणघट्टणुप्पन्ननिद्दाविगमस्स पद्मजापरिचायाभिमुहमाणसस्स कहकहवि अट्टहुह-
ट्टियस्स दुक्खेण बोलीणा रयणी, समुग्गयंमि रविमंडले पमिलाणवयणकमलो समुट्टिऊण तओ ठाणाओ पद्मज्जं
परिमोत्तुकामो गओ भगवओ समीवे ॥

अह केवलावलोएण जिणवरो जाणिऊण भगमणं । मेहकुमारं साहुं मhurगिराए इमं भणइ ॥ १ ॥
किं भो देवाणुपिया ! संजमजोगंमि भंगमुव्वहसि । पुद्मभववइयरं नेव सरसि सयमवि समणुभविं ॥ २ ॥
एत्तो तइयभवंमिं रण्णे किर वारणो तुहं हुंतो । तत्थ य वणग्गिणा पसरिएण संतत्तसवंगो ॥ ३ ॥
बाढं पिवासिओ सरवरंमि पाउं जलं समोगाढो । तडपंकमि य खुत्तो तत्तो नीहरिउमचयंतो ॥ ४ ॥

पडिकरिणो दददसणगगताडणुपन्नतिव्वेयणओ । मरिउं विंझमि तुमं पुणरवि जाओ गयाहिवई ॥ ५ ॥
वणदवपलोयेणेण य जाइं सरिऊण भयवसट्टेण । रक्खे उक्खणिऊणं अवणित्ता तणपलालाई ॥ ६ ॥
करयलसमाई तिन्नि उ महापमाणाई थंडिलाई तए । सरियातीरे पकयाई निययगयजूहरक्खट्टा ॥ ७ ॥ जुम्मं ।
अह अन्नया कयाई तरुवरसंधरिससंभवो जलणो । दहिउं वणं पयट्टो पलयानलविब्भमो भीमो ॥ ८ ॥
तं पेच्छिऊण भीओ तुमं पलणो सथंडिलाभिमुहं । हरिहरिणससगसूयरपडिहत्ये थंडिले दुन्नि ॥ ९ ॥
लंघित्ता तइयमिं संपत्तो अच्छिउं समाढत्तो । चरणो य समुक्खित्तो कंडुयणकए तए तणुणो ॥ १० ॥
एत्थंतरंमि अन्नन्नसत्तसंपेच्छिओ ससो एगो । उक्खित्तचरणहेट्टा ठिओ सजीयस्स रक्खट्टा ॥ ११ ॥
तं दट्ठणं तुमए पयहेट्टुठियं पराए करुणाए । आकुंचिऊण धरिओ नियचलणो गयणदेसंमि ॥ १२ ॥
अह वणदवोऽवि दहिउं सयलं अडविं महाविडविपुन्नं । उवसंतो ते य गया जहागयं ससगपमुहजिया ॥ १३ ॥
तोहे छुहापिवासासंतत्तो तंपि सिग्घवेगेण । असुणियकुटियसचलणो पधाविओ पाणियाभिमुहं ॥ १४ ॥
अह एगचलणवियलत्तणेण पडिओ तुमं गिरिवरोव । तणहाछुहाकिलंतो कालगओ बहुकिलेसेण ॥ १५ ॥
तेण य ससगणुकंपणसमुवज्जियपुन्नपगरिसवसेण । लहुइकयसंसारो संपइ जाओसि रायसुओ ॥ १६ ॥
इय भो देवाणुप्पिय ! तइया पसुणावि जइ तहा तुमए । ससगजियरक्खणेणं बाढं दुक्खाइं सहियाइ ॥ १७ ॥

ता कीस बंभारीण धम्मनिरयाण पवरसाहूणं । चलणाइघट्टणेणवि संपइ संतावमुव्वहसि ? ॥ १८ ॥
 सरयनिसायरधवले कुलंमि पडिवन्नमुज्झमाणस्स । किं सुंदर ! न कलंको होही आचंदकालंमि ? ॥ १९ ॥
 कइवयदिणसुहकज्जेण अज्जिऊणं पयंडपावभरं । किं कोइ भण सयन्नो अप्पाणं पाडइ भवोहे ? ॥ २० ॥
 इय एंवविहवयणेहिं भुवणदीवेण वीरनाहेण । पडिबोहिओ महप्पा मेहकुमारो मुणिवरिड्ढो ॥ २१ ॥
 जाओ सुनिचलमणो तहकहवि जिणंदमणियमग्गंमि । जह दुक्करतवनिरयाण साहूण णिंदसणं पत्तो ॥ २२ ॥
 तस्सणुसाट्ठिं सोच्चा संवेगकारिं परेऽवि मुणिवसहा । सविसेसमण्यमत्ता पडिवन्ना संजमुज्जोगं ॥ २३ ॥
 अह अण्णांमि दिणंमी सोच्चा धम्मं जिणंदमूलंमि । भववेरगगमुवगओ रायसुओ नंदिसेणोऽवि ॥ २४ ॥
 पवज्जापडिवत्तिं काउमणो सो य सेणियनरिंदं । जणणिं च बहुविहेहिं वयणेहिं पन्नवेऊण ॥ २५ ॥
 जाव भुवणेक्कपहुणो पासे चलिओ पवज्जिउं दिक्खं । ताव य सो भणिओ देवयाए गयणट्ठियाए इमं ॥ २६ ॥
 भो भो कुमार ! विरमसु पवज्जागहणओ जओ अत्थि । अज्जवि तुह भोगफलं चारितावारगं कम्मं ॥ २७ ॥
 थेवं कालं निवससु सणिहे ता कीस ऊसुगो होसि ? । सलहिजंति न कज्जाइं पुत्त ! अइरहसविहियाइं ॥ २८ ॥
 काले चिय कीरंतो ववसाओ कज्जसाहगो होइ । समयाभावो सस्सं न फलइ अचंतसित्तंमि ॥ २९ ॥
 तत्तो कुमरेण भणियं देवि ! कीस तुममियं पयंयेसि ? । सयमेवप्यडिवन्नं कहमिव उज्झांमि भिरइमं ॥ ३० ॥

किं वा काही तंपिचि चारित्ताचारंगं ममं कम्मं । कु(दु)स्सीलसंगरहियस्स गाढतवसोसियंगस्स ॥ ३१ ॥
इय तवयणं अवमणिकुण सिग्घं गओ समोसरणं । नवरं जयगुरुणाविहु पडिमिद्धो सो तहचेव ॥ ३२ ॥
तहविहु अहरमसवसा अभाविउं भाविरं विरइभंगं । भुवणगुरुणो समीवे निरवज्जं लेइ पवज्जं ॥ ३३ ॥
तो छट्ठमपमुहं कुणमाणो दुक्करं तवचरणं । जयगुरुणा सह विहरइ बहिया गामागराईसु ॥ ३४ ॥
पढइ विचि(वि)त्तं सुत्तं परिभावइ निच्चमेव य तदत्थं । गुरुणो मूले निवसइ परीसहे सहइ थिरचित्तो ॥ ३५ ॥
संजमनिसेवणपरो विसयविरागं परं परिवहंतो । आयावइ अणवरयं सुसाणसुन्नासमाईसु ॥ ३६ ॥
अह अन्नया कयाई एगल्लविहारपडिमपरिकम्मं । काउमणो स महण्या जाए छट्ठस्स पारणगे ॥ ३७ ॥
भिक्षलट्ठाए पविद्धो एगोऽणाभोगदोसओ सहसा । वेसाए मंदिरमी पयंपए धम्मलाभोत्ति ॥ ३८ ॥
तो वेसाए सहासं सवियारं जंपियं अहो समण ! । मोचूण दम्मलाभं न धम्मलाभेण मे कज्जं ॥ ३९ ॥
अहह कहं हसइ ममपि बालिसा संपयंपि(त्ति) चित्तिता । तेण तवलद्धिणा नेवतणयमायडिऊण लहुं ॥ ४० ॥
अइपवरयणरासी निवाडिया एस दम्मलाभोत्ति । भणिकुण य नीहरिओ तीए भणिओ य साणंदं ॥ ४१ ॥
भयवं ! उज्झसु दुक्करतवचरणं कुणसु मज्झ सामित्तं । इहरा चएमि जीयं पुणरुत्तं तीए इय वुत्तं ॥ ४२ ॥
भावियमईवि तवसोसिओऽवि विन्नायविसयदोसोऽवि । कम्मवसा भग्गमणो पडिवज्जइ तीए सो वयणे ॥ ४३ ॥

नवरं दस अहिं गे वा जइ नो बोहेभि अणुदिणं भवे । तो परिचएमि विसए विसंव इइ गिणहइ पइन्नं ॥ ४४ ॥
 अह उज्झियमुणिवेसो चिंतितो देवयाए तं वयणं । जयगुरुणोऽवि निवसइ वेसाए गिहंमि स महप्पा ॥ ४५ ॥
 भुंजेइ विसयसोक्खं धम्मकहाए य बोहिउं भवे । पवज्जागहणत्थं पेसइ पासे जिणिंदस्स ॥ ४६ ॥
 अह अन्नया कयाइ खीणे भोगफलंमि कम्ममि । वेरग्गावडियमई चित्तेउमिमं समाढत्तो ॥ ४७ ॥
 पुच्छं सोक्खं तडितरलमाउयं भंगुरं च तारुन्नं । रोगविहुरं सरीरं दुल्लभा धम्मसाभग्गी ॥ ४८ ॥
 खंडियसीलाण निरंतरं च निवडंति दुस्सहदुहाइं । एवं ठिए न जुज्जइ संपइ मह निवसिउं एत्थ ॥ ४९ ॥
 तो गंतुं जयगुरुणो पुणो समीवमि लेइ पव्वज्जं । आलोइयदुच्चरिओ विहरइ य समं जिणिंदेण ॥ ५० ॥
 चिरपव्वजापज्जायपालणं भावसारमह काउं । सो नंदिसेणसाहू मरिउं देवत्तणं पत्तो ॥ ५१ ॥

इओ य सो सुदाढनागकुमारदेवो नावारूढस्स भगवओ पुवं उवसणं कारूण आउयखयचुओ समानो समु-
 प्पन्नो एंगमि रोरकुले पुत्तत्तणेण, दुहिं गओ य संतो करिसगविचीए जीवइ, तंमि य पत्थावे सो जाव नियच्छेत्तं
 लंगलेण करिसिउमारद्धो ताव पत्तो तं गामं भुवणेक्कंभवो जिणो, तओ भगवया तस्स अणुकंपाए पडिवोहणत्थं
 पेसिओ गोयमसामी, गओ य तदंतियं, भणिओ य गोयमेण एसो-भइ ! किमेयं कीरइ?, करिसगेण भणिंयं-जं
 कारवेइ एस हयविही, को वा अन्नो अम्हारिसाण कलाकोसल्लवज्जियाण जीवणोवाओ?, गोयमसामिणा जंपियं-

एवंविहगाढकिलेससंविदत्ताए भोयणविहीए । दिणगमणियं कुणतस्स सुद्ध ! का चंगिमा तुज्झ ? ॥ १ ॥
 किं वा सरीरसोकखं संपज्जइ को य विसयवामोहो । किं वा सुचरियनिष्कायणं च संभवइ एवं च ? ॥ २ ॥
 नो एयपरिचागो सुदुक्को दिव्वसोकखंखीणं । तुम्हारिसाण जायइ जेणऽज्जवि किर महासत्ता ॥ ३ ॥
 पउरमणिकणगरयणुक्कराइ तरुणीओ सुदरे गेहे । मोत्तूण पन्नगंपिव धन्ना लगंति धम्ममंभि ॥ ४ ॥
 अन्ने पुण आकालियदुरंतदारिद्विहुयावि दढं । पावारंभपयद्वा जम्भं सयलपि वोलेति ॥ ५ ॥
 ते अण्णत्थवि जम्मे तहेव पुणरुत्तदुक्खसंतत्ता । तल्लोच्चिल्लिं पकुणंति थोवसलिलंमि मच्छोव ॥ ६ ॥
 जइ पुण ते घरवाधारलक्खभागे व धम्मकज्जंभि । अब्भुज्जमंति रुंधंति निनुलं ता दुहदुवारं ॥ ७ ॥
 किंच-एगत्तो संपज्जइ जहिच्छभोगोवभोगदुल्लियं । धणमन्नत्तो सज्जणपंसंणिज्जा हि पव्वज्जा ॥ ८ ॥
 एगत्तो छक्खंडाहिवस्स सेवा महानरिंदस्स । कीरइ अन्नत्तो पुण सुणिणो सद्धम्मनिरयस्स ॥ ९ ॥
 सुंदर ! इमाओ दोन्नि उ गईउ लोयंमि सुप्पसिद्धाओ । एयाणं अन्नयरिं जे कुसला ते पव्वजंति ॥ १० ॥
 ता वज्जसु कम्ममिमं धम्मं चिय सरसु तं महासत्त ! । दीणाण दुत्थियाण य एसो एक्को परं सरणं ॥ ११ ॥
 इय गोयमेण भणिए सबइल्लं लंगलं च मोत्तण । नमिउं चलणे सो भत्तिनिब्भरो भणिउमाढत्तो ॥ १२ ॥
 भयवं ! विन्नाणविवज्जियस्स जइ जोगयत्थि मे काऽवि । ता देहि निययदिकखं भववासाओ विरत्तस्स ॥ १३ ॥

इयं बुत्ते से परियट्ठिणोवि सिरिगोयेमेण पव्वज्जा । तक्खणमेव विदिन्ना बोहिन्नीयंतिकाऊण ॥ १४ ॥
 एवं तेण गहियदक्खेण समं पयट्ठो गोयमसामी भगवओ अभिसुहं, अह जयगुरुणो चक्खुगोयरमुवागयस्स
 तस्स करिसगस्स तेण सीहभवावज्जियगाढेवरवेसण पम्हुट्ठा पव्वजापडिवत्ती जायपयंडकोवो य भणिउं पवत्तो-
 भयवं ! को एसो?, गोयमेण भणियं-अह धम्मगुरू, तेण भणियं-जइ तुह एस धम्मगुरू ता मम तुमएविन कज्जं,
 अलं पव्वजाएत्ति भणिऊण परिचत्तरयहरणो धाविऊण गओ खेत्तंमि, गहिया बलीवद्दा, उब्भीकयं लंगलं, पल्लगो
 पुव्वपवाहेण खेडेउत्ति । गोयमसामीवि विम्हियमणो भयवंतं पणमिऊण भणिउं पवत्तो—

भुवणभूयभूयमहप्पभावपडिहणियपाणिगणपीड ! । जयनाह ! मए असरिसमिममज्ज पलोइयं चोज्जं ॥ १ ॥
 जं सोक्खकरेवि हु तुज्झ दंसणे दूरओऽवि सो हल्लिओ । सूरस्स कोसिओ इव सोढुं तेयं अचाइतो ॥ २ ॥
 समयमेव य पडिवन्नं पव्वज्जं उज्झिऊण संभंतो । अइसिग्गमवक्कंतो सखेत्तहुत्तं परोट्टमणो ॥ ३ ॥
 किर तुम्ह संकहावि हु जणइ अपुवं जणाण परितोसं । किं पुण चीतरुपमुहट्टपाडिहेरुम्भवं रूवं ? ॥ ४ ॥
 अह जयगुरुणा भणियं गोयम ! सो एस केसरिस्स जिओ । जो किर तिविट्ठुकालेमए दुहा फालिओ होतो ॥ ५ ॥
 तुमए मह सारहिणा निज्जविओ कोवफुरुरुरंततणू । सीहे सीहेण हए इचाइमइरवयेण ॥ ६ ॥
 तप्पच्चइएणं मइ दोसेणज्जवि स वेरमुवहइ । तेणं चिय तप्पडिबोहणट्ठया पेसिओ तंसि ॥ ७ ॥

इय पुव्वकम्मवसवत्तिजंतुकीरंतविविहवावारे । संसारे परमत्थेण किंपि नो विज्जे चोज्जं ॥ ८ ॥
एवं गोयसं पचाइऊण सामी तामलित्तिदसन्नपुरवीभयंचपाउज्जेणिगयपुरकणिल्लनदिपुरमहुरापमुहेसु महानगरेसु
भवसत्तज्जणं पडिबोहितो पसन्नचंदसन्नभइउदायणसालमहासालपमुहं रायनिवहं पद्माविंतो चंडपज्जोयारिमहण-
जियसत्तुपामोक्खं नरिंदवग्गं च सावगधम्मो उव्वंतो कइवयकालाणंतरं पुणो समागओ रायगिहं । तत्थ य—
कक्केयणीलयलोहियक्खपामोक्खरयणनिवेहेण । कुट्टिमत्तलं रइज्जइ सुरेहिं आजोयणमहीए ॥ १ ॥
मणिरयणजक्कंचणकलहोयमया सुगोउरसणाहा । तिन्नेव निम्मविज्जंति तक्खणं पवरपागारा ॥ २ ॥
अब्भंतरंमि तेसिं विचित्रयणोहरस्सिजडिलाइं । ठाविज्जंती सीहासणाइं जोगाइं जयगुरुणो ॥ ३ ॥
पुव्वदिसिक्खसीहासणेसु तइलोयविह्यकराइं । कीरंति तिन्नि रूवाइं भुवणनाहस्स सरिसाइं ॥ ४ ॥
डज्झंतागुरुयणसारसिल्हयाभोयसुरहियदियंता । धूवघडीण समूहो पमुच्चइं सव्वपासेसु ॥ ५ ॥
मंदंदोलियकंकिळ्ळिपल्लवो विधुयधयवडाडोवो । वित्थरइ तित्थनाहाणुभावओ सीयलो पवणो ॥ ६ ॥
इय सुरगणेण सवायेण निवत्तिए समोसरणे । सिंहासणे निसण्णो पुव्वाभिमुहो जिणवरिंदो ॥ ७ ॥
जयगुरुपउत्तिविणिउत्तपुरिसपरिकहियजिणवरागमणो । अभयकुमाराइकुमारपरिवुडो सेणियनरिंदो ॥ ८ ॥
हरिसुस्ससियसरीरो वंदणवडियाए आगओ झत्ति । असुरसुराणमंतरताराहिवपमुहतिथसावि ॥ ९ ॥

तिपयाहिणिऊण परेण भत्तिभारेण वंदिउं नाहं । सट्ठाणेसु निसीयंति ते य सद्धम्मसवणत्थं ॥ १० ॥
 उप्पायपलयसत्तासमलंकियसयलवत्थुपरमत्थं । भव्वाणं भवभयहरं तत्तो वागरइ भुवणगुरू ॥ ११ ॥
 वागरमाणस्स य भुवणवंधुणो मुणियसयलभावोऽवि । भव्वज्जणवोहणत्थं गोयमसामी इमं भणइ ॥ १२ ॥
 भयवं ! भवस्स पुणरुत्तजम्मजरामरणसोगपउरस्स । किं मूलकारणं जमिह नेव जीवा विरज्जंति ? ॥ १३ ॥
 न य उज्जमंति तुह पायपउमपूयणपमोक्खवावारे । नो देससव्वविरइओ भावसारं च गिण्हंति ॥ १४ ॥
 भणियं जिणेण गोयम ! मिच्छत्तं अविरइ य मूलमिह । तदणुगया नो जीवा भवभमणाओ विरज्जंति ॥ १५ ॥
 नो बहु मन्नंति जिणाहिवांपि गिण्हंति नेव विरइंपि । मिच्छत्तमज्जमत्ता किं वा कुव्वंति नोऽकज्जं ? ॥ १६ ॥
 जइ तेवि कम्मगंठिं सुनिट्ठुरं भिदिऊण सम्मत्तं । पायंति कहवि ता भवसंयासाओ विरज्जंति ॥ १७ ॥
 अब्भुज्जमंति जिणसाहुपूयणाहस्मि धम्मकज्जंमि । नवरं तेऽवि न विरइं घेचुं पारेंति कम्मवसा ॥ १८ ॥
 जं देसओवि सविसेसकम्मक्खयउवसमेण सा होइ । किं पुण पहाणमुणिज्जणकरणुचिया सव्वओ चेव ॥ १९ ॥
 ता गोयमेण भणियं भयवं ! सम्मत्तरयणलाभाओ । अब्भहिंयं गुणठाणं एवं सइ विरइभावोऽयं ॥ २० ॥
 ता साहेसु जयगुरू ! पउरगेहवात्रावावडमणाणं । संभवइ देसओविहु विरइ कहमिव गिहत्थाण ? ॥ २१ ॥
 तो जयगुरूणा कहियं पंचणहं तिण्ह वा चउण्हं वा । गहणे वयाण एगस्स वावि सा होइ निद्दीसा ॥ २२ ॥

गोयममुणिणा भणियं जइ एवं ता जिणिंद ! सवाइं । सोदाहरणाइं कहेह ताइं भएहिं जुत्ताइं ॥ २३ ॥
 न तुमाहितो अन्नो भयवं एयं निंदसिउं सक्को । जं सव्वं सूरौच्चिय पयासिउं पभवए गयणं ॥ २४ ॥
 इय वुत्ते सिरिवीरेण धम्मपासायमूलखंभेण । भणियं गोयम ! निमुणसु सव्वमिमं परिकहिज्जंतं ॥ २५ ॥
 पंच उ अणुव्वयाइं गुणव्वयाइं च होति तिन्नव । सिक्खावयाइं चउरो विरइए गिहत्यल्लोयस्स ॥ २६ ॥
 तत्थ य अणुव्वयाइं पढमं पाणाइवायवेरमणं । वयमवरययपहाणं पाणाइवाओ य सो दुविहो ॥ २७ ॥
 विन्नेओ बुद्धिमया सुहुमो थूलो य तत्थ पुण सुहुमो । एगिदियजियविसओ थूलो वेइंदियाइगओ ॥ २८ ॥
 संकण्णारंभेहिं दुविहो थूलो य तत्थ संकण्णो । होइ हु उवेच्चकरणं आरंभो पयणकिसिपमुहे ॥ २९ ॥
 संकण्णोऽवि य दुविहो अवराहकरणं निरवराहे य । जो हरइ देव(ह)दव्वं स सावराहोऽन्नहा इयरो ॥ ३० ॥
 एवं नाऊण इमं थूले अवराहविहिहए जीवे । संकण्णओ न घाएज्जं दुविहतिविहाइभएण ॥ ३१ ॥
 इय गहियजीववहविरइमुंदरो सावगोऽणुकंपपरो । अचंतं कोवेऽवि हु गोमणुयाइण न करेज्जा ॥ ३२ ॥
 बंधवहं छविछेयं अइभारं भत्तपाणवोच्छेयं । एए पंचइयारा जम्हा दूंसति वहविरइं ॥ ३३ ॥
 एयाए दूंसियाए विहलो सव्वोऽवि धम्मवावारो । कट्ठाणुट्ठाणंपि वि निरत्थयं एत्तन्नव ॥ ३४ ॥
 जं पाणिवहासत्तो सत्तो तं किंपि पावमायरइ । जेण निमेसंपि सुहं न लहइ नरयाइसु गइसु ॥ ३५ ॥

सबतथवि सोवक्कममइलहुयं आउयं समज्जिणइ । पियपुत्तविओगं वा पात्रइ हरिवम्मराउव ॥ ३६ ॥”

गोयमसामिणा भणियं—भयवं ! को एस हरिवम्मरायाहिबो ? भगवथा जंपियं—गोयम ! निसामेसु, अत्थि इहेव भारहे वासे कुरुज्जवए गयउरं नाम नयरं, तत्थ अंसखदविणसंगओ दत्तो नाम माहणो परिवसइ, रुवजोवणा-इगुणसंगथा य सिरी नाम भारिया, सब्बकज्जेसु पुच्छणिज्जो पाणाइरगेवल्लहो सब्बपसमसुस्सीलयाइगुणसंगओ नंदो नाम से बालमित्तो, सो य अच्चंतं कलयंठकोमलकंठो तहाविहवावारपरिसमत्तीए निगगच्छिऊण निव्विजणंमि पएसे ठाऊण गंधव्वविणोयमायरइ, एवं च वंचंति वासरा । अन्नया य दत्तस्स दिथवरस्स बांठं पाउब्भूया सिरोवेयणा, तव्वसेण य पणट्ठा रई वियंभिओ परितावो जायाणि नीसहाणि अंगाणि खलमहिलव्व चक्खुगोयरमइक्कंता निहा निच्छिण्णा भोयणवंच्छा तुट्ठा जीवियासा, एवंविहं च विसमदसावडणं पेच्छिऊण तेणाहूओ नंदो, भणिओ य-अहो मित्त ! कुणसु किंपि उवायं, सब्बहा बलवई सिरोवेयणा खुड्डइव लोयणजुयलं, मणांगंमि न पारेमि सुहसेज्जाग-ओवि चिट्ठिउं, जइ पुण कहवि मम निहामेत्तंपि होज्जा तो पच्चुज्जीवियं व अट्ठ्याणं मन्नेज्जा, इय दीणं से वयणं निसामिऊण नंदेण भणियं—पियमित्त ! धीरो भव, परिचय कायरत्तणं, तहा करेमि जहा अकालमखेवेण पपुणसरीरो भवसित्ति संठविऊण रयणिसमथंमि समारद्धं कागलीगेयं, जओ—

जह जह गेयनिनाओ पविसइ दत्तस्स सब्बणविवरंमि । तह तह निहावि विलज्जियव्व आगच्छए सणियं ॥ १ ॥

एवं च आगयाए निहाए पसुत्तो सो निम्भरं, सा चेव भज्जा नंदस्स तेण सुइसुहकारिणा गेयरवेण अवहरि-
यहियया तम्मणा जायत्ति, दत्तस्सवि परिगलंतीए रयणीए पणट्ठा सिरिवेयणा, संपत्ता सरीरनिव्वुइ, अन्नया रंमि
सिरीए सपणयं भणिओ नंदो—

सुहय ! जहा नियमित्तस्स देहपीडा तए समवहरिया । मज्झंमि तहा संपइ अवहरसु सरीरसंतावं ॥ १ ॥
उज्जुयभावत्तणओ अवियाणिय से मणोगयं भावं । नंदेण जंपियमिमं—कत्तो ते सुयणु ! संतावो ? ॥ २ ॥
तीए भणियं—सुंदर ! सयमवि काउं तुमं न याणासि ? । किं सच्चं पयडिज्जउ ? , सो भणइ—कहसु, को दोसो ? , ॥ ३ ॥
ताहे तीए सिट्ठो कलगेयायन्नणाओ आरब्ध । सव्वो नियवुत्ततो निम्भरअणुरागसंबद्धो ॥ ४ ॥
आयन्निऊण एयं सुणिऊण य से असुंदरं भावं । नंदेणं सा भणिया कहंमि एयं सुयणु ! वयसि ? ॥ ५ ॥
दूसिज्जइ निययकुलं अजसो य दिसासु जेण वित्थरइ । मरणेऽवि हु तं धीरा कहमवि नो संपवज्जंति ॥ ६ ॥
सुवंधंति य नरएसुं परदारपसत्तयाण सत्ताणं । विविहाओ वेयणाओ मयच्छि ! ता उज्जसु कुवंचं ॥ ७ ॥
इय पन्नविऊण बहुप्पयारवयणेहिं तं महाभागो । नंदो ठाणाओ तओ नीहरिओ सिग्घवेणेण ॥ ८ ॥

एसो य सयलवइयो कडभंतरिएण निसामिओ दत्तेण, तओ चित्तियमणेण—अहो विणट्ठं कज्जं, जं मम महिला
नंदेण सद्धिं एवमुल्लवइ, मन्ने नंदो मं उवलक्खिऊण चित्तरक्खट्ठा सुद्धसमायारं अप्पाणमुवदंसितो एवमुल्लविऊण

एत्तो ठाणाओ सिग्घमवक्कंतो, ता न जुत्ता उवेहा, जओ महिला पुरिसंतरखित्तिचित्ता कयाइ अत्तणो मणोरहविग्घं
संभाविकुण पइणो विसदाणाइणा विणासं करेज्जा, सयमसमत्था वा विडजणं विणासाय वावारेज्जा, अओ जाव-
ज्जवि न जायइ कोऽवि विणासो ताव वावाएमि एयं नंदं, न सबहा सुंदरो एस, कहमन्नहा एयाए सह रहसि
ठाएज्जा?, किं न याणइ एसो सण्णुरिसाण चक्खुक्खेवोऽवि न जुज्जइ काउं परकलत्ते?, किं पुण निब्भरपेमगब्भो
परोप्परमेगंतसंलावो?, एवं निच्छिऊण तस्स वावायणत्थं उवाए चित्तिउमारद्धो, सावि से भज्जा दुन्निगगहयाए
मयणविथारस्स अवजसनिरेक्खत्तणओ इत्थीसहावस्स गाढाणुरागसब्भावाओ दुल्लहजणंमि जत्थ जत्थ नंदं पासति
तत्थ तत्थ लिहियच्च थंभियच्च विचेयणच्च निच्चला एतमेव अणिमिसाहिं दिट्ठीहिं पेच्छमाणा अच्छइ, तीसे य तहा-
विहावल्लोयणेण दत्तो बहुण्ण्यारं संतावसुवहइ, नंदोवि सुद्धसीलयाए पुव्वण्णवाहेण सुक्कसंको तस्स सगासंमि पइ-
दिणसुवेइ, अन्नया य अवगणिऊण पुव्वोवथारं, परिच्चइऊण चिरकालसंभवं सिणेहं, अविमंसिऊण जुत्ताजुत्तं, अणवे-
क्खिऊण परलोयभयं तेण दत्तमाहणेण वीसत्थहिथयस्स नंदस्स तालउडविससणाहो पणामिओ तंबोलवीडओ,
अविगण्णभावेण य गहिओ नंदेण, परिभोत्तुमारद्धो य ।

अह तंमि भुज्जमाणे अच्चुक्कडयाए विसविगारस्स । निन्नट्टुचेयणो झत्ति निवडिओ सो महीवट्ठे ॥ १ ॥

दत्तेणवि मायासीलयाए पणयं पयासमाणेण । पम्मकुद्धीहपोक्कं हाहारवगन्भिणं रुन्नं ॥ २ ॥

मिलिओ य नयरलोगो कहिओ तेणावि तस्स वुत्तौ । जह सहसच्चिय जीयं नीहरियमिमस्स अनिमित्तं ॥ ३ ॥
नयरजणेणं भणियं अलाहि सोणेण कुणसु कायवं । सच्छदविलसिएसुं किं वन्निजइ कयंतस्स ? ॥ ४ ॥
एसाइ जंपिऊणं नयरजणो पडिगओ संगहेसु । दत्तेणवि से विहिओ सरीरसक्कारपमुहविही ॥ ५ ॥
एवं च वावाइयंमि तंमि पणट्टकुविगण्णो भज्जाए समं निप्पच्चवायं विसयसुहमणुहवमाणो कालं वोलेइ, अन्नया
य तीए समं वरिसयालंमि ओलोयणगओ जाव निवडंतजलधाराघोरणीमणहरं गयणयलमवलोएइ ताव सहसच्चिय
तडयरारावभीसणा निवडिआ तस्स सीसंमि कुलिंगमालापलीवियदिसामंडला विज्जू, तीए य तणपूलो इव नि-
दड्डो दत्तो, मरिऊण य तइयनरयपुढवीए सत्तसागरोवमाऊ नेरइओ उववन्नो, तहिं च अणवरयदहणकुभीपागसाम-
लिसाहारोहणकरवत्तफालणवेयरणिनइप्पवाहणमोगरसंनुणणपमुहाइं तिकखदुक्खलक्खाइं निरंतरमणुभविऊण
आउयक्खंयमि तत्तो उव्वट्टिऊण मच्छकच्छपपक्खिसरीसियपमोक्खासु तिरिक्खजोणीसु उववन्नो, तासुवि बहुकालं
चरिऊण पुणो पुणो नरगाइसु य उववज्जिऊण कहवि कम्मलाघवेण एगंमि पंचंतकुले जाओ पुत्तत्तणेण, कयं च से
मंगलउत्ति नामं, तत्थ य जइवसाओ आरब्भ सो पसूओ तद्विवासाओ चिय तंमि कुले पाउब्भूया विविहा
रोगायंका, ससुपन्ना विविहाणद्धा, तओ तेहिं जणणिजणेहिं चित्तिं-अहो दुट्ठलक्खणणुगओ एस अरु पुत्तो ता
जात्र न देइ अकाले चिय मरणं ताव पच्छन्नो चिय अडवीए नेऊण छडिजइ, जीवमाणामने पुत्ता भविस्संति,

किमणेण विसहरसंवहुणेणंति परिभाविऊण वरिसमेत्तवओ सुक्को एसो अडवीए, अह तेणप्पएसेण ससानओ सिवो
 नाम सत्थनाययो, दिट्ठो य तेण एसो, गहिओ अणुकंपाए, नीओ य बुद्धिं। अन्नया य तस्स कम्मपाणुभावेण सो
 सत्थवाहो सधणो ससयणोऽवि अकालखेवेण खयं गओ, सो य भिक्खाविचीए अप्पाणं पोसंतो कमेण जीवण-
 मणुप्पत्तो, अन्नया य वसंतमासंभि पवरनेवत्थमणहरं नयरजणं विलसंतं अवलोइऊण चित्तिमणेण-अहो नूनं महा-
 पावकारी अहं, कहमन्नहा समाणेवि मणुयत्ते इमे कयपुत्ता नायरया एवं विलसंति, अहं पुण पइदिणं लुक्खभि-
 क्खाक्खलक्खलणेण निययउयरं पि(न) भराभि?, ता पज्जंतं गिहवासेण, केरुमि धम्मज्जणंति संचित्तुण गओ जल-
 णप्पभाभिहाणस्स तावसस्स समीचे, गहिया दिक्खा, काउमारद्धो य विविहं तवचरणं। एवं च अन्नाणत्तवेण
 उवज्जिया भोगा, अन्नदिवसे य पउरकंदमूलफलक्खणेण समुप्पन्नं से पोट्टुसुलं, तेण य अभिहओ मरिऊण
 वंसंतपुरे नयेर हरिचंदस्स रण्णो अणंगसेणाभिहाणाए अगमहिसीए कुच्छिसि पाउम्भूओ पुत्तत्तगेगं, पसूओ
 नियसमयंभि, कयं वद्धावणयं. पइट्ठियं च हरिवम्मोत्ति नामं, उम्मुक्कवालभावो य गहिओ कलाकोसलं परिणाविओ
 य अट्ट रायकन्नगओ, अन्नया य जोगोत्ति कलिऊण हरिचंदराइणा महाविभूईए संतिसामंतपउरजणसमक्खं उव-
 चेसिओ नियपए, जाओ सो महानरिंदो। हरिचंदरायाऽवि निविणकामभोगो गओ वणयासं, गहिया दिसपो-
 क्खगतावसाणं दिक्खा, परिवालेइ जहाभिहितं तेसिं धम्मंति। हरिवम्मरायावि जहाविहिपरिपालिय पयइवग्गो

कालाणुरुचपयद्विधनयमगो रजभरं समुद्वहइ, तस्स य विसयसुहमणुहवतस्स समुण्यन्नो पुत्तो, कयं च मे हरि-
दत्तोत्ति नामं, तस्स य राइणो सयलरज्जवाचारनिरुवणनिउणो असेसनीइसत्थविथक्खणो वेसमणो नाम अमच्चो,
सो य लद्धपसरत्तणेण एवं परिभावेइ-जइ किपि अंतरं पावेमि ता इमं रायं वावाइऊण सयमंगीकरेमि रज्जं,
किमणेण साहीणेऽवि सामंते दासत्तकरणेणं?, तहावि केणवि उवाएणं एयस्स राइणो पढमं ताव पुत्तं विणासेमि
पच्छा एस सुहविणासो चेव होहिन्ति परिभावेतो अवरेमि वासरे कइवयपहाणपुरिसपरियरिओ गओ उज्जाणं, उव-
विट्ठो तरुवरच्छायाए, अह खणंतरं अच्छिऊण कवडेण सहसत्ति उट्ठिओ तट्टाणाओ भासमाणं च परियणं निवारि-
ऊण उट्ठसुहो निन्निमेसेण य चक्खुणा गयणमवलोइऊण परमविम्वहयमुव्वहतो नियपरियणं भणिउं पवत्तो—भो! भो!
किं निसामियं किपि तुब्भेहिं एत्थ?, तेहिं भणियं-सामि! किमिव?, अमच्चेण भणियं—आगासे वच्चंतीहिं देवीहिं
इमं जंपियं—जहा एस राया नियपुत्तदोसेण मरिहत्ति, एयं च निसामिऊण अणुकूलभासित्तणं सेवगस्स धम्मोत्ति-
कलिऊण तयणुवित्तीए भणियं परियणेण—सामि! बाढं निसामियं, केवलममंगलंति काऊण पढमं चेव न कहियं,
जइ रे जणगणिद्विसेसस्स सामिसालस्सवि एवं होही ता पज्जत्तं मे जीविएणंति वागरिऊण अमच्चेण आयट्ठिया
कज्जलपुंजसामुम्मिमलंतकंतिपडला खगधेणू, समाढत्तं कवडेण नियपोट्टिवियारणं, तओ कहकहवि बला मोडिऊण
बाहुं परियणेण उड्ढालिया खगधेणू, नीओ मंदिरं, उब्भडकवडसीलयाए य परिचत्तपाणभोगसरीरसङ्कारो जरसि-

कडमंचए निवडिऊण ठिओ एसो असंसेपि दिवसं, वासरंते य अत्थाणीगएण राइणा अमच्चं अपेच्छंतेण पुच्छिओ पडिहारो-अरे ! किं निमित्तं न आगओ अज्ज अमच्चो ? तेण कहियं-देव ! न सुणेमि सम्मं, राइणा भणियं-सयंपि गेहं गंतूण अमच्चं पुच्छसु अणागमणकारणं, तओ जं देवो आणवेइत्ति भणिऊण गओ पडिहारो, दिट्ठो जरसि-क्कडावडिओ सामवयणो अमच्चो, पुच्छिओ य अणेण-अमच्च ! किमकांडे चिय एवंविहमवत्थंतरसुवागओ सि ? साहेसु कारणं, तुह अणागमणेण परितम्मइ नराहिवोत्ति बुत्ते दीहं नीससिऊण भणियममच्चेण-भो पडिहार ! किं निरत्थएण पुव्ववुत्तंतविकत्थणेण ? एत्तिथमेत्तमेव संपइ जंपियव्वं

जस्स पसाएण समगलोगपुज्जत्तणं समणुपत्तं । लच्छी चिरमुवभुत्ता तस्सवि हरिवम्मदेवस्स ॥ १ ॥

सुणिऊण असवणिज्जं विणाससंसूयणं तहावयणं । किं अज्जवि निहज्जं जीवियमहमुव्वहिस्सामि ? ॥ २ ॥

इमं च गाहाजुयलमुल्लविऊण पडेण वयणं समोच्छाइऊण ठिओ मोणेणं अमच्चो, अह परमत्थं अविद्याणमाणेण पडिहारेण पुट्ठो परियणो-अहो किमेवममच्चो वाहरइ ? तेहिं भणियं-पडिहार ! अज्ज उज्जाणगएहिं अग्गेहिं अ-मच्चेण य गयणवाणी निसुणिया जहा देवो पुत्तदोसेण मरिहित्ति, तदायन्नणाणंतरमेव अमच्चो अण्णणो विणासं कुण-माणो महया किलेसेण निसिद्धो मरणब्भुवगमेण य अज्जवि भोयणं न कुणइत्ति, इमं च सोचा पडिहारेण भणियं-अहो ! अकित्तिमा पडुभत्ती, अहो ! असरिसं कयन्नत्तणं, अहो ! ससरीरनिरिवेक्खयत्ति, धुवं धन्नो एस हरिवम्मराया

जस्स एवंविहो अमच्चोत्ति वणिज्जण सो गओ नरिंदसमीवं, कहिओ य एणते सबो तवुत्ततो, इमं च आयन्निज्जण अंचंतवल्लहयाए नियजीवियस्स उदयाओ पुव्वकयदुच्चरियाणं संखुदो नराहिवो, वाहराविओ अमच्चो, पुच्छिओ सव्वं जहावट्टियवइयरं, कहिओ य अणेण, तओ राइणा भणियं-अमच्च ! किमियाणिं कालोचियं?, अमच्चेण कहियं-देव ! तुम्हे चिय जाणह जमेत्थ उचियं, अहं पुण सयमेव सुणिज्जण देवस्स भाविणिं विसमावत्थं न सव्वहा जीवियसुव्वहिस्सामि, जओ तुम्ह पायाण विरहे का अम्ह सोहा ? का वा पडुमत्ती ? किं वा सकज्जसाहणं ? ता अणुमन्नउ देवो, न एत्थ अन्नं वोत्तुं जुज्जइ अम्हाणंति, राइणा भणियं-अलं मरणेण, समायरसुजमिह जुत्तं, अमच्चेण कहियं-देव ! संकडमिमं, के तुब्भे ? को वा तुम्ह पुत्तो ?, अओ न किंपि काउं पारियइ, राइणा भणियं-जो देवीहिं विणासकारित्ति सिट्ठो सो पुत्तोऽवि परमत्थओ सत्तू चेव, ता ममाएसेण तयणुरूवं करेज्जासु, अमच्चेण भणियं-देव ! एवंविहदुट्ठण सासणे दंडवासियाण चेव अहिगारो, ता पसीयउ देवो तेसिमेव आएसदाणेणं, तओ निरुविओ राइणा कुमारविणासणत्थं दंडवासिओ, विणासिओ तेण, पहिट्ठो अमच्चो, कया भोयगाइया सरारवेड्ढा, चितियं च तेण-निहओ एस एगो कंटयो, इयाणिं राया विणासणिज्जोत्ति ।

अह तंमि सुए वहिए नायरलोएण जंभियं एवं । हा हा अहो अकज्जं नरवइणा नूणमायरियं ॥ १ ॥
जं रज्जभरसमतथो पुत्तो अविभाविज्जण परमत्थं । कुस्सुयनिसामणुगगयधयसओ मारिओ सहसा ॥ २ ॥

अच्छउ परेण कहिए तहाविहे दुन्निमित्तपमुहत्ये । सयमवि दिट्ठे कुसला जुत्ताजुत्तं वियारिंति ॥ ३॥ अन्नं च-
गहपीडामारीदुन्निमित्तदुस्सुमिणपमुहदोसगणा । देवाण पूयणाईहिं नूण सिग्घं उवसमंति ॥ ४ ॥
ता दढमणुच्चियमेयं कयं नरिंदेण धम्मपहयज्जं । गरुथाणं गरुउच्चिय उप्पज्जइ अहव सम्मोहो ॥ ५ ॥

इमं च सुयं कन्नपरंपराए राइणा, तओ पाउब्भूया अरई, उप्पन्नो पच्छायावो, पवड्डिओ महासोगो, चत्ता रज्ज-
चिंता, इमं च परिभाविउं पवत्तो-अहो महापावोऽहं जेण मए एवंविहमकज्जमायरतेण न गणिओ धम्मो, नावे-
विखओ अजसो, न अंगीकयं पोरुसं, नावलंबिया खंती, ता किमियाणि परिच्चयामि रज्जं?, पविसामि जलणं? पव-
ज्जामि वा वणवासं?, केण वा कएण इमाओ पावाओ सोक्खो होहिंति चिंतमाणस्स राइणो पडिहारेण गंतूण
विन्नत्तं-देव! दुवारं नंदणुज्जाणपालगा समागया, ते य देवदंसणमभिलसंति, राइणा भणियं-लहु पवेसंह, एयं च
भणिए पवेसिया तेण, ते य निवडिया चलणेसु, विन्नविउमारद्धा-देव! तुम्ह उज्जाणे भयवं अरिट्टेनेमी समोसढो,
ता वद्धाविज्जह तुम्हे तयागमणेणंति, इमं च सोच्चा चिंतियं राइणा-होउ ताव सोणेणं, तं च भयवंतं केवलालो-
यमुणियतिलोयवाचारं जहावित्तं पुत्तविणासेहउं दुन्निमित्तमापुच्छिऊण उचियं करिस्सामिति विभाविऊग पयट्ठो
जिणाभिमुहं । इओ य सो अमच्चो मुणियसव्वसुसमागमो पयडीभविस्सइ संपयं मज्झ कण्डविलसियंति निग्घुच-
रियसंकाए जच्चतुरंगममारुहिऊण जीवियमएण पलाणो वेणेण । रायावि गओ भयवओ समीयं, तओ चित्तंभंतरुडं

संतहरिसपसरो बहलोमंचचियसरीरो भयवंतं तिपयाहिणापुष्पगं पणमिऊण थुणिउमारद्धो । कहंचिय ?—

जय नवतमालदलसामदेह, तुहु निम्मलगुणरयणोहगेह ।

अइदुज्जयनिज्जियकुसुमनाण !, जिण भवियहं दंसियसिद्धिट्टाण ॥ १ ॥

उत्तुंगपओहरिणनयणनवजोव्वणपव्वणचंदवयण ।

पइ उग्गसेणसुय जेण चत्ता, तसु एक्कह तुह पर जयइ वत्त ॥ २ ॥

ओहामियसिंधुसमत्थरयणि, अवयरिए नाह ! जायवह भवणि ।

चित्तामणिमि पइं समुदविजओ, सच्चं चिय जाओ समुदविजओ ॥ ३ ॥

आपूरियनिब्भरसंखवोस—संखोहियजयजण गयदोस ।

भुयपरिहंदोलियलच्छिरमण !, सद्वायेरेण सुरपणयचलण ! ॥ ४ ॥

तइलोकभवणनिम्मलपईव !, परमायररक्खियसयलजीव ! ।

भवि भवि जिणिंद ! तुहुं रिद्वेनेमि !, अम्हारिस लीयह होज्ज सामि ॥ ५ ॥

एय एवं थोऊणं पराए भत्तीए जयगुरुं नेमिं । हरिसियमणो नरिंदो तयणु निविट्ठो महीवेट्ठु ॥ ६ ॥

भववयावि पयट्ठिया धम्मकहा, पडिबुद्धा बहवे पाणिणो, गहियनियनियसामत्थाणुरूवाभिग्गहविसेसा गया य

जहागयं । अह अवसरं सुणिऊण पुच्छियं राइणा-भयवं ! पुरा अमच्चेण जं अम्ह कहियं तं सच्चमलियं वरं ? भयवया भणियं-अलियं, राइणा भणियं-भयवं ! किमेवंविहं तेणाकज्जमायरियं ? भयवया जंपियं-भो महाराय ! भोगत्थिणो रज्जत्थिणो परिचारत्थिणो पाणिणो किं किं पावं न करेति ? किं वा मायामोसं न पयडेति ? अहवा को तस्स दोसो ? पुव्वकयकम्माण चेव विलसियमिमं, सो पुण निमित्तमेतं चेव वरागो, राइणा जंपियं-भयवं ! किं मए पुव्वभवे एवंविहं पावमायरियं जस्स अणुभावेण अच्चंतवल्लहस्स सुयस्स सहसच्चिय विणालं पडिवन्नो ? ,

ताहे जह पुव्वभवे महिलादोसेण दोसपरिहीणं । मित्तं विणासिऊणं समज्जियं पावमइगरुयं ॥ १ ॥

जह नारयत्तिरियभवेसु भूरिसो पाविऊण जरमरणे । कह कहवि माणुसत्ते लद्धे विहिए य बालतत्ते ॥ २ ॥

इह संपत्ते रज्जे जह मित्तविणासकम्मदोसेणं । जाओ पुत्तविणासो तह सबं भयवया कहियं ॥ ३ ॥

इमं च सोच्चा जायगाढभवभओ हरियम्मराया भणिउं पवत्तो-भयवं जइ पाणाइवायस्स एवंविहो असुहो सहावो ता पज्जत्तं मम रज्जेण, गिण्हामि तुह समीवे पवज्जं जाव अभिसिंचेमि कमवि अत्तणो पयंमिति वागरिऊण गओ नयरिं, निवेसिओ निययरज्जंमि भाइणेज्जो, सो य अमच्चो नाओ जहा पलाणोत्ति । तओ मोत्तूण य रायसिरिं हरिवम्मनराहिवो अणगारियं पडिवन्नोत्ति ॥

इय भो गोयम ! एसो पाणिवहाविरइमंतजंतूणं । पाउब्भवइ मंहतो अणत्थसत्थो जओ तम्हा ॥ १ ॥

सद्वपयत्तेणं चिय संकप्पियपाणिघायवरमणं । सग्गापवग्गसोक्खाइं कंखमाणेहिं कायवं ॥ २ ॥ इइ पढममणुच्चयं ।
अह अलियवयणविरईसरूवमेयं अणुच्चयं बीयं । भणिमो तं पुण अलियं दुविहं थूलं च सुहुमं च ॥ १ ॥
थूलं पंचवियणं कन्नागोभूमिनासहरणेसु । कूडगसक्खेज्जंमि य एसो इह नियमविसओत्ति ॥ २ ॥
कन्नागहणं दुपयाण सूयगं चउपयाण गोगहणं । अपयाणं दवाणं सवेसिं भूमिवयणं तु ॥ ३ ॥
इयरदुयग्गहणं पुण पाहन्ननिंदसणट्ठया भणियं । सुहुमं तु अलियवयणं परिहासाईसु नेयवं ॥ ४ ॥
थूलमुसावेरमणे एयंमि अणुवए पवत्तंमि । अइयारा पंच इमे परिहरणिज्जा सुसहेणं ॥ ५ ॥
सहसा अब्भक्खाणं रहसा य सदारमंतंभओ य । मोसोवएसणं कूडलेहकरणं च निच्चंपि ॥ ६ ॥
एयस्स पालणाऽपालणासु पयडा गुणा य दोसा य । दीसंति समक्खं चिय दिट्ठतो भायरो दोन्नि ॥ ७ ॥
ते य भायरो गोयम ! निसामेसु, एत्थेव भारहे वासे वडवहनयेरे पभाकरो नाम राया, सबत्थ विक्खायजसो
दुवालसविहावयधम्मपरिपालणपरायणो जइजणपज्जुवासणवट्ठलक्खो परोवयारकरणाइगुणसहस्ससमलंकिओ
सच्चो नाम सेट्ठी, तस्स य इहलोयमित्तपडिबद्धो धम्माणुट्ठाणविरहिओ कणिट्ठो बलदेवो नाम भाया, सो य जाण-
वत्तेण परविसएसु गच्छइ, अन्नया य बहुलामो हवइत्ति णिसामिऊण गओ चोडविसए, चोडरायावि सच्चसेट्ठिणो
गुणनिवहं जणेण वन्निज्जमाणं सुणिऊणं तदंसणाणुरागरत्तो तब्भाउयं बलदेवं भणइ-सव्वहा मम दंसणत्थं सच्चसेट्ठि

आणेज्जासित्ति, एवं च नरिंदायरं पेच्छिऊण पडियुयमणेण, कालकमेण नियमंदिमुयागओ सच्चस्स परिकहेइ, अनया य चवलत्तणओ लच्छीए उदयत्तणओ अंतराइयकम्मस्स अप्पदविणो जाओ सच्चसेट्ठी, तओ तेण चोडविसग्गमणाय पुट्ठो पभाकरनरिंदो, अणुन्नाओ य तेण, तयणंतरं च उचियाइं महत्थाइं सहरयाइं विविहभंडाइं गहिऊण भाउणा समं गओ चोडविसयं सच्चसेट्ठी, तदागमणं च निसामिऊण तुट्ठो चोडराया, दयाविग्रं निवासमंदिं, पूइओ उचियपडिवत्तीए अत्तणो य समीवंमि धरिओ कइयथासराइं, अह विणिवट्ठिए भंडे गहिए सदेसपाउग्गे पडिभंडे चोडविसयाहिवइमणुजाणाविऊण समारूढो नावाए सच्चसेट्ठी,

अणुकूलपवणेपेल्लियमहल्लयवडविवट्ठियोगेगा । गंतुं जवा पयट्ठा नियपुहुत्तं तओ नावा ॥ १ ॥

तहियं आरूढा ते जाव पलयंति कोउहल्लेण । अनिलुल्लंतकल्लोभीसगं जलहिंपरंतं ॥ २ ॥

ताव नियंतुंगिमाविहियविंझगिरिविन्भमो लहुं दिट्ठो । सल्लोवरिं वंहंतो अतुच्छदेहो महामच्छो ॥ ३ ॥

तं दट्ठुं बलदेवेण जंपियं एस पवओ एत्थ । इंताणं नासि जओ ता तुब्भे मग्गपब्भट्ठा ॥ ४ ॥

निज्जामगेहिं भणियं न पवओ एस किंतु मच्छोत्ति । सो चेव अयं मग्गो वामोहं कुगह मा सामि ! ॥ ५ ॥

बलदेवेण भणियं-अहं पुण इहं चेव विविहभंडपडिहत्थं जाणवत्तं हारेमि जइ मच्छो होज्जा, एवं च उभयपक्खेहिंवि सच्चसेट्ठिं सक्खि काऊण विहिया होइडा, ते य निज्जामगा पडिवेडएण गंतुण मच्छग्रपिट्ठिमि परिक्ख-

णत्थं तणपूलयपडलं पज्जालिउमारद्धा, सो य मच्छो तेण परितत्तसरीरो झडत्ति निबुद्धो अच्छाहे जले, एवं हारियं जाणवत्तं बलदेवण, परितुट्ठा निज्जामगा, पत्ता य केमेण नियनगरं, तओ तेहिं पडिरुद्धं जाणवत्तं, समुत्तारिऊण तीरे मुक्को बलदेवो, पारद्धो अणेण झगडओ निज्जामगेहिं समं, जहा असच्चा इमे मच्छहारिणो चिलाया मए विजियत्ति काऊण आडंबरमुवदंसत्ति भणिऊण बला चैव भंडुत्तारिउमारद्धो, निज्जामगेहिं वाहिया नरवइणो आणा, न ठाइ बलदेवो, तओ रायाणं उवट्ठिया दोवि पक्खा, तेसिं च परोप्परं विवदंताणं परमत्थमविद्याणिऊण भणियं रत्ना-अरे ! एत्थ ववहारे को सक्खी ?, निज्जामगेहिं भणियं-देव ! अत्थि चैव सक्खी, परं नियसहोयरमुवेविखऊण किं अम्हाणं सविखत्तणं करिस्सइ ?, राइणा भणियं-को पुण सो ?, तेहिं भणियं-सच्चसेट्ठी, एवं वुत्ते एगंते ठाऊण पुच्छिओ सो रत्ना कज्जपरमत्थं,

ताहे स सच्चसेट्ठी परिभावइ किं करेमि एव ठिए ? । जइ अवितहं न जंयेमि होइ ता मे वयकलंको ॥ १ ॥
जइ पुण जहेव वित्तं तहेव सांहेमि ता लहू भाया । पावइ अणत्थमत्थो जाई हीरइ पसिद्धीवि ॥ २ ॥
ता दोन्निवि गरुयाइं आवडियाइं इमाइं कज्जाइं । एक्कपि परिच्चइउं न तरामि करेमि किं इणिह ? ॥ ३ ॥
अहवा इहलोयकए कहां च चिरकालपालियं नियमं । गुरुमूले पडिवन्नं जाणंतोऽहं विराहेमि ? ॥ ४ ॥
किं एत्तो अइपावं जं जाणंतावि भवअसारत्तं । पडिसिद्धेसुवि अत्थेसु मोहओ संपयदंति ॥ ५ ॥

किं बहुणा ?-जइ पडइ सिरे वलं सयणोऽवि परंमुहो हवइ लच्छी । वच्चइ तहावि अलियं कहमवि नाहं वइस्सामि ॥ ६ ॥

इति निच्छयं काऊण भणिओ सो सेट्ठिणा नराहिवो-जं इमे वरागा निजामगा जंपति तं सच्चं, मम भाया पुण अलियवाइत्ति, इमं च सोच्चा तुट्ठो राया चित्तिउं पयट्ठो-अहो अज्जवि एरिसा सच्चवाइणो दीसति जे नियसहोयर-सिरीविणासेवि नियमज्जायं न चयंति, ता मंडिज्जइ एवंविहेहिं कलिकालेऽवि भूमिमंडलंति परिभाविऊण आहूया निजामगा, सरोसं तज्जिया य, जहाने दुरायारा ! जइ कहवि अमुणियपरमत्थेणं मम वणिएण तहाविहं जंपियं ता किं वयणछलमेत्तेणवि अणेगमंडभरियवोहिदत्थं घेत्तुं उवट्ठिया ?, एवमाइहिं वयणेहिं निब्भच्छिऊण किंचि दाऊण निद्धाडिया, दव्वसारंपि समप्पियं सच्चसेट्ठिस्स, बलदेवोऽवि भणिओ-मा पुण एवं करेज्जासु,

इय अलियवयणपरिहारकारिणो इह भवेऽवि जणपुज्जा । हुंति नरा परलोए लीलाए जंति निच्चाणं ॥ १ ॥ इइ बीयमणुच्चयं२ भणियं बीयमणुच्चयमेत्तो तइयं अदत्तदाणवयं । साहिज्जइ सयलाणत्थसत्थनित्थारणसमत्थं ॥ २ ॥

तं पुण दुविहमदत्तं थूलं सुहुमं च तत्थ सुहुममिणं । तरुछायाठाणाई अणणुग्गायं भयंतस्स ॥ ३ ॥

अइसंकिलेसपमवं जं निवदंडारिहं च तं थूलं । सच्चित्ताइतिभेयं थूले गिहिणो हवइ नियमो ॥ ४ ॥

एत्थ उ अप्पडिवन्ने जे दोसा ते जणेऽवि सुपसिद्धा । वहंबंधतरुलंबणसिरच्छेयाई चोराणं ॥ ५ ॥

पडिवन्नेऽविहु एत्थं भवभयभीरुत्तणं परिवहंतो । सुस्सहो अइयारे पंच इमे वज्जइ सयावि ॥ ६ ॥

चोरोवणीयगहनं तक्कजोगं विरुद्धरज्जगमं । कूडतुलकूडमाणं तण्डिलरुवं च वयहरं ॥ ७ ॥

चोरिकाउ विरत्ता कहपि चोरोहिं संपउत्तावि । वसुदत्तोच्च न पायंति आवइ सुइसमायारा ॥ ८ ॥

गोयमसामिणा भणियं-भयवं ! को एस वसुदत्तो ? , जयगुरुणा कहियं-अच्चक्खित्तचित्तो निसामेसु, वसंतपुरे नयरे वसुदेवो नाम इब्भो, तस्स य वसुमित्ता नाम भारिया, तीसे य अवच्चं न होइ, तओ सा चित्तेइ-जइ अवच्चस्स कारणे एस मम भत्ता अन्नं परिणिस्सइ ता अहं गेहस्स असामिणी, अह अच्चतनिब्भरणुरागरंजियमणो अन्नं न परिणइ, तत्थ य मरणपज्जवसाणयाए एयस्स नरवरदाइदाईहिं हीरंते गेहसारे सचिसेसं असामिणी चेव, अओ जइ कहवि मम पुत्तो हवइ ता सोहणं संपज्जइ, इमेण य अभिष्णाएणं सा अणवरयं देवयाणं उववाइयसयाणि पयच्छइ मंततंतवाइज्जणं चापुच्छइ । इओ य सोहम्मे कप्पे अरुणाभविमाणे महिद्धिओ विज्जणभो नाम देवो, सो य पच्चा-सन्नचवणसमयत्तणेण अत्तणो पयइविवज्जासं पेच्छऊण वक्खित्तचित्तो भयसंभंतो परिचिंतेइ-

कह रयणनियरउग्गाढपीढियादढनिबद्धमूलोऽवि । निच्चावट्ठियरूथोवि कप्परुक्खो पकंपेइ ? ॥ १ ॥

सुंदरमंदारतरुप्पसूयमालाऽमिलाणपुट्ठावि । कारणविरहेऽवि कहं पमिलायइ संपयं सहसा ? ॥ २ ॥

कह जच्चंरुचणुड्ढामरोऽवि देहस्स कंतिपब्भारो । ताविच्छगुच्छसंछाइयव मालिन्नमुवहइ ॥ ३ ॥

कह वा भुयंगनिम्मोयनिम्मलाईपि देवदूसाइं । कज्जलजलधोयाणिव अइकसिणाइं विभाविति ? ॥ ४ ॥

कह वा मम नयणजुयं सभावओ च्चिय निमेसपरिहीणं । देवत्तविरुद्धेवि हु निमीलणुम्मीलणे कुणइ ? ॥ ५ ॥
 कह अंतरंतरा पेच्छणाइयक्खित्तचित्तमवि पावा । लद्धावसरच्चिय वेरिणिच्च विद्वइ मं निहं ? ॥ ६ ॥
 अच्चंतेपमपरवसचित्तोऽवि हु परिणो कहमियाणिं । कइवयदिणदिट्ठो इव न वयणमभिन्दए मज्झ ? ॥ ७ ॥
 ता सबहा न कुसलं तेक्कमि अहं सजीवियवस्स । कल्लाणकारिणो जेण होति न कयाइ उप्पाया ॥ ८ ॥
 इय एवंविहचिंतासंताणुप्पन्नतिवपरितावो । कप्पहुमोव वणदवपलीविओ भाइ सो तियसो ॥ ९ ॥
 एवं जाव सोगपमिलाणो सिंघासणगओ अच्छइ ताव तस्स चेव पियमित्तो कणगप्पमो नाम देवो समागओ
 तं पएसं, तं च तहट्ठियं दट्ठूण चित्तियमणेण-कहं अज्ज पियमित्तो सुण्णचित्तलक्खोव लक्खीयइ ?, जओ अन्नव-
 लासु दूराओ च्चिय मं आगच्छमाणं पलोइऊण सायरं सप्पणयं पढमालायासणप्पणामाइणा अभिणंदन्तो, संपयं पुण
 समीवमुवगयंपि न पच्चभिजाणइ, ता नूणं कारणेण होयव्वंति विभाविऊण भणिओ अणेण-भो विज्जुप्पम ! किं चिं-
 तिज्जइ ?, उट्ठमवल्लोइऊण जंपियं विज्जुप्पमेण-भो वरमित्त ! कणगप्पम इओ एहि, इमं च आसणमलंकारेहिच्चि वुत्ते
 उवविट्ठो एसो, पुच्छओ य अणेण वेमणस्सयाकारणं, कहिओ य विज्जुप्पमेण स निययवुत्तंतो, तओ कणगप्पमेण
 भणियं-पियमित्त ! सबहा न सुंदरमेयं, ता एहि तित्थगरस्स पुच्छामो, कहिं एत्तो तुह चुयस्स उप्पत्ती भविस्स-
 इत्ति, विज्जुप्पमेण भणियं-एवं होउ, तओ गया विदेहखेत्ते, वंदिओ तित्थगरो, सविणयं पुच्छिओ य, जहा-भयं !

कथ अहं उववज्जिस्सामि?, भयवया भणियं-वंसंतपुरे नयरे वसुदेवस्स वणिणो वसुमिच्चाए भारियाए गब्भंमि पुत्तो तुमे पाउब्भविस्ससि, एवं च निसामिऊण जहागयं पडिनियत्तो विल्लुण्णभो, अन्नंमि य दिवसे सिद्धपुत्तरूवं विउ-विऊण अवयरिओ वसुदेवगिहे, साइसओत्ति कलिऊण अब्भुट्ठिओ वसुमिच्चाए, पुट्ठो य-भो महाभाग ! जाणासि तुमं मम पुत्तो भविस्सइ न यत्ति?, देवेण भणियं-जइ तं पव्वयंतं न वारेसि अहं तहा करेमि जहा ते पुत्तो होइत्ति, पडिस्सुयमणाए, अहं कवडेण मंडलगण्यापुरस्सरं महया वित्थरेण देवयापूयं काऊण देवो भणइ-भहे ! अमुगंमि दिथहे विसिट्ठुमिणसूइओ पुत्तो ते गब्भे आयाही, तीए भणियं-तुमह पसाएण एवं होउ, देवो अइंसणमुवगओ, अवरंमि य वासरे सो चविऊण उप्पण्णो तीसे गब्भे, जाओ कालक्कमेण, कयं वद्धावणयं, पइट्ठियं से वसुदत्तोत्ति नामं, उचियसमए य गाहिओ कलाकोसलं, नीओ य एगया साहूण समीवे, कहिओ य तेहिं दुवालसवयसणाहो सावगधम्मो, पुव्वभवजिणवयणाणुरागरत्तत्तेण य परिणओ एयस्स, तओ पडिवण्णो भावसारं तेण, गहियाणि य दुवालसवि वयाइं, परिपालेइ य निरइयाराइं, अन्नया य सविसेसजायधम्मवासणाविसेसेण तेण पुब्बिअया साहुणो मुणिधम्मं, कहिओ य तेहिं । कहां चिय ?—

पंच उ महवयाइं गुत्तीओ तिन्नि पंच समिइओ । सीलंगसहस्साइं अट्टारस निरइयाराइं ॥ १ ॥

छुहतण्हापमुह परीसहा य बावीस बाढदुविसहा । विणओ य चउब्भेओ अणियववासो य मुत्ती यं ॥ २ ॥

पिंडविसुद्धी सुत्तथचित्तणं गुरुकुले सया वासो । अणवरयं तवचरणंमि उज्जमो कोहचाओ य ॥ ३ ॥

गामकुलाइसु पडिबंधवज्जणं उत्तरोत्तरगुणेषु । अब्भुज्जमो य निच्चं बाढं संसारनिव्वेओ ॥ ४ ॥

जहठियजिणमगगरुवणा य सत्तेसु करुणभावो य । करणाण निग्गहो तह सत्तत्तपरिभावणं निच्चं ॥ ५ ॥

इय आजम्मं सुंदर ! सुणिउं धम्मस्स (सुणिधम्मसमग्ग)साहणविहाणं । अच्चंतमपमत्तेहिं कीरमाणं सिवं देइ ॥ ६ ॥

एवं सुणीहिं कहिए संबहुइयगाढधम्मपरिणामो । वसुदत्तो भणइ लहुं भयवं ! मह देह पव्वज्जं ॥ ७ ॥

ताहे सुणीहिं भणियं जणणीजणगाणणुणवणपुव्वं । पव्वजापडिवत्ती जुज्जइ नेवऽण्णहा काउं ॥ ८ ॥

ता सकुडुवं मोयाविऊण दिक्खं पव्वज्जसु ज्वेण । सण्णाणफ़लमिमं चिय जं चाओ सव्वसंगस्स ॥ ९ ॥

एवं सुणीहिं वागरिए गओ सो अम्मापिऊण सगासे, कहिओ निद्यचित्तपरिणामो, तेहिं भणियं-पुत्त ! भुत्तभोगो पव्वज्जं गिणहेज्जासि, अणुव्वयाइणा सावगधम्मेण ताव अत्ताजं परिकम्मेषु, तओ सो तेंसिं अप्पत्तियपरिहरणट्ठया साहूण समीवे पढतो गिहत्थवित्तीए चेव अच्छइ, पव्वजागहणनिच्छएण जोव्वणत्थोऽवि नेच्छइ परिणेउं, तं च तहाविहं पेच्छिऊण जणणीए भणिओ वसुदेवो-एस पुत्तो तवस्सिजणसंसंगीए वासियहिद्यओ नावेक्खइ विसयपडि-वत्तिं न मन्नइ दारपरिगहं नायरइ सरिरालंकरणं, ता पज्जत्तं धम्मियसेवाए, सव्वहा खिवसु एयं दुल्लियगोद्धीए, जइ पुण तहाविहसंसंगीए भावपरावत्ती जायइत्ति, पडिस्सुयमेयं सेट्ठिणा, तओ जे वाणियगा पुत्ता समाजजाइ-

वयविभवा ताण मज्झे मेलिओ एसो, ते य अच्चतविसयगिद्धा दविणक्खयं कुणता पियरेहिं सिक्खविज्जतावि दुहं-
तिंदियत्तेणेण न तरंति नियत्तिउं, सगेहेसु य धणमलभमाणा चोरियं करंति । अन्नया य सुसणनिमित्तेण पलोइयं
तेहिं बहुधणधणणसमिद्धं समिद्धजज्जजत्तायतन्निवासिजणसमूहं विमुक्केथेरीरक्खणं महेसरदत्तस्स मंदिरं, तओ
विजणंति काऊण पयट्ठा रथणीए तं मुसिउं, सो य वसुदत्तो पुक्खरपत्तंपिव पंक्तकलंकेण सुसाहुव्व कुसीलसंसरेण
न मणांगपि छिन्नो तेसिं कुसमायारेण, केवलं जणजिज्जयाणुवित्तिमवलंबंतो रज्जुबद्धोव्व वसहो असुणियपरमत्थो
चेव पट्ठिओ तेसिमणुमग्गेणं, ते य सणियं सणियं तस्स महेसरदत्तस्स गिहे पविसमाणा वसुदत्तेण पुच्छिया-भो
किमेत्थ तुम्हे पविसह !, तेहिं भणियं-भह ! चोरियाए एत्थ पविसिस्सामो, सुसमाहियचरणवयणवावारो तुमं
एज्जाहि, तेण भणियं-नाहमिहमागमिस्सामि कुणह जं भे रोयह, इइ भणिऊण ठिओ सो बाहिं चेव, ते पविट्ठा
भवणब्भंतरे, सुणिया य थेरीए, तओ सा पायवडणच्छलेण ते सुसंते मा पुत्ता ! एवं करेहिति भणंती भोरपि-
च्छत्तेण चलणेसु लंछेइ ।

वसुदत्तो पुण चित्तइ पेच्छह अम्मापिऊण मूढत्तं । जं एवंविहुस्सीलमज्झयोरं खिवंतहिं ॥ १ ॥
नो तेहिं चित्तियमिमं जह पावजणस्स संगइवसेण । जायइ गुणपरिहाणी पडंति विविहावयाओवि ॥ २ ॥
सयमवि पावपओयणपसाहणब्भुज्जओ इमो जीवो । किं पुण कुमित्तसंजोगसंभवतासुहसहावो ॥ ३ ॥

ता परिचयमि एए वचामि समंदिरमि एत्ताहे । दुन्नयपरनरजोगे मरणपि हु आवडइ जेण ॥ ४ ॥

अहवा गुरुवयणं लंघिऊण गेहंमि वचमाणस्स । संपज्जइ दुव्विणओ तम्हा जं होइ तं होउ ॥ ५ ॥

इति परिभाषितस्स ते सयलं गेहसारं सुसिऊण नीहरिया मंदिराओ, गया उज्जाणे, विविहण्यरोहिं कीलि-
उमारद्धा, वसुदत्तोऽवि गुरुवयणरज्जुसंदाणिओ अचंतविरागमुच्चहतो तेसिमेव समीवे चिट्ठइ, एत्थंतरे समुगयं माय-
डमंडलं, विहडियं तमकंडं, सा य थेरी पाहुंडं गहाय गया नरवइसमीवे, कहिओ सयलो जहावित्तो रयणिवइयरो,
राइणा भणियं-अचंतगंभीरयाए नयरस्स को वा कहिं वा नज्जिही?, तीए भणियं-देव! ते मए सवेऽवि मऊर-
पिच्छेण पाएसु अंकिया अच्छंतित्ति बुत्ते राइणा आणत्ता सबत्थ पुरिसा, सुनिऊणं गवेसंतहि य तेहिं उज्जाणसं-
ठिया दिट्ठा ते सवेऽवि, उवलक्खिया इंगियागोरोहिं, उवणीया य नराहिवस्स, तेणावि वाहराविया थेरी, तीएवि वसु-
दत्तं विमोत्तूण अन्ने परिकहिया चोरत्तणेणंति, रत्ता भणियं-कहमेसो चोरमंडलीमज्झगओऽवि न चोरो, थेरी भणइ-
न चलणेसु लंछिओत्ति, राइणा भणियं-जइ अट्ठो ता सुयह एयं, वसुदत्तो भणइ-देव! कहमहं दुट्ठसंसग्गीएवि
न ट्ठो जं ममावि न कुणह निग्गहं, रत्ता कहियं-भइ! जइ एयंपि जाणसि ता कीस दुट्ठसंसग्गि मूलाओ चिय
न उज्जेसि?, तेण भणियं-देव! दिव्वं पुच्छह, एत्थंतरे सुणियजहावट्ठियतच्चइयेण भणियमेगेण पुरिसेण-देव!
एस पवज्जं पडिबज्जिउकामो भावपरावत्तिनिमित्तं अम्मापियरोहिं सिणेहाणुबंधकायरोहिं संपयं चैव दुल्ललियगोटीए

पविशन्तो, ता तदणुरोहो चैव एयस्स अवरज्झइ, एवं निसामिऊण नराहिवेण तंबोलाइदाणेण सम्मणिऊण पेसिओ सगिहं, इयरे पुण दुक्खमारेण मारियत्ति ।

इओ य मुणिसमुचियविहारेण भवियपडिबोहमायंता अप्पडिवद्धावि जिणाणाए पडिवद्धा दुरणुचरतवचरण-पज्जालियकम्मवणावि सबसत्तसुहकारया समोसढा विजयासिंहाभिहाणा सूरिणो, जाया य तियचउक्कचचरेसु हरि-समरनिम्भरस्स जणस्स अवरोग्गपरमुहावा अहो ! अगाहभवोहनिवडंतजन्तुगणजाणवत्ता सिवसुहपसाहणासत्ता भयवंतो सुग्गहियनामधेज्जा सूरिणो इह समोसरिया, तहाविहाणं नामसवणमेत्तंवि पावपब्भारपणासणसमत्थं, किं पुण वंदणनमंसणं ? अओ गच्छामो देवाणुप्पिया ! तेसिं वंदणत्थं, एवं च सोच्चा गंतुं पयत्ता सूरिसमीवे नायया । सो य वसुदत्तो राइणा पेसिओ समाणो गओ निययेगेहे, कहिओ जणणिजणगाण पुव्ववइयरो जहा तुम्ह कूडवच्छेण अहं अज्ज अकयधम्मो चैव विणासिओ होतो, ता कीम सिणेहवच्छेण अणत्थपत्थारीए संखिवह जं न सुयह धम्मकरणायत्ति वुत्ते अणुन्नाओ सो जणणिजणगेहिं, गओ सूरिणो पांसे, गहिया पवज्जा, तओ एगं-तधम्मकम्मज्जओ जाओत्ति ।

इय इंदमूह गोयम ! विमुक्कचोरिक्कपावठाणाणं । मणुयाण उभयलोगेऽवि जीवियं जायए सफलं ॥ १ ॥ इइ तइयमणुव्वयं । कहियं तइयमणुव्वयमेत्तो मेहुणनिविच्चित्तिनिष्फणं । मण्णइ चउत्थमणुव्वयमवहियच्चित्तो निसामेसु ॥ १ ॥

तं मेहुन्नं दुविहं सुहुमं थूलं च तत्थ सुहुममिमं । कामोदएण ईसिं जमिदियाणं विगारोत्ति ॥ २ ॥
 थूलं पुण संभोगो मणाइचेट्ठा व भोगकामस्स । तं पुण दुविहं नेयं ओरालविउच्चभेएणं ॥ ३ ॥
 ओरालियं तु दुविहं माणुसतेरिच्छभेयओ होइ । वेउच्चं पुण दिच्चं माणुसयंपि य वयं तिविहं ॥ ४ ॥
 परदारवज्जणं वा सदारतोसो य वंभचेरं वा । तत्थ य दिच्चित्तिरिक्खं मेहुन्नं पारदारं च ॥ ५ ॥
 जो परिहरइ सुसट्ठो निच्चलचित्तो सुवम्मणडिवद्धो । सो तद्विरओ एसो निर्इयारट्ठया सम्मं ॥ ६ ॥
 वज्जेइ इत्तरियपरिग्गहियागमणं अणंगकीडं च । परवीवाहकरणं कामे तिच्चाभिलासं च ॥ ७ ॥
 किंच-असुइब्भूएसुं निंदिएसु पज्जंतदुहविवोगेसु । कामेसु केऽवि धन्ना निसगओ चिय विरज्जंति ॥ ८ ॥
 अन्ने पुण उब्भडमयणबाणनिब्भज्जमाणसवंग्गा । अगणियजुत्ताजुत्ता अविभावियनियतणुविणासा ॥ ९ ॥
 पररमणीसु परिभोगलालसा मुक्कलज्जमज्जाया । तज्जम्भे चिय पावंति आवयं किं पुणऽन्नभवे ? ॥ १० ॥ जुम्मं ।
 अवेरे य तहाविहगुरूवएसओ जायनिम्मलविवेया । परजुवईणं संगं विवज्जमाणा पयत्तेण ॥ ११ ॥
 तद्विरइमेत्तच्चिय वट्ठंतविसुद्धधम्मपडिबंधा । होति सिवनयरनिलया सुरिंददत्तोच्च नरवसहा ॥ १२ ॥ जुम्मं ।
 गोयमेण जंपियं-तइलोक्किदिवायर ! को एस सुरिंददत्तो ? कंहं वा एयस्स गुरूवएसओ विवेयलाभो ? कंहं च पर-
 दारविरइमेत्तेणवि से निच्चाणसंपत्तिं ? , जयगुरणा वागरियं-निसामेसु । इहेव भारहे वासे नीसेसवसुधराभोगभूसणं

रणंतमणिर्किंकिणीमणहरेवजयतीविराडयसुरमंदिरसमुत्तुंगसिंगं सिंगारुम्भडरुवरामागणोवसोहित्रं विजयपुरं नाम नगरं, तर्हि च समग्गनरिंदवग्गपणयसासणो सिवभदो नाम नराहिवो, सयलंतउरण्ववरा रायसिरी नाम से भारिया, तेसिं च देवकुमारोवमरूवो धणुव्वेयपमुहकलाकोसल्लपडिहत्थो सुरिंददत्तो नाम पुत्तो, सो य पुव्वभववालगिलाण- गुरुथेरतवसुसियमुणिजणवेयावच्चावज्जियपुन्नपम्भारवसविटत्तगाढसोहगोदएण पढमुम्मिलंतजोव्वणगुणत्तणेण य अच्चं- ताभिरामसरीरो जत्थ जत्थ परिब्भमइ तत्थ तत्थ परिचत्तवावारंतराहिं अवगणियगुरुजणलज्जाहिं अणवेक्खियकु- लाभिमाणाहिं नयरनारीहिं अणमिसच्छीहिं पिच्छिज्जइ, वाढमब्भत्थिज्जमाणो य सेट्टिसत्थवाहण्णहाणजणजुवईहिं सद्धिं सद्धम्मपरम्मुहो अभिरमइ य, लोगोवि एयमतथं जाणमाणोऽवि जे चैव रक्खणा तेऽवि लुंगगत्ति चिं- तंतो न किंपि जंपइ ।

अन्नया य नयरंमि जाओ अच्चंतचोरोवइवो, तथो पउरजणेण साहिंयं नरिंदस्स, तेणावि तज्जिओ आरक्खिगो, कया य सव्वण्णएसेसु जामरक्खगपरिखेवा, रयणीए सुत्तपमत्तारक्खिगनिरिक्खणत्थं कयवेसपरावत्तो पाणिपरिग्ग- हियखगो एगागी सयमेव निग्गओ गेहाओ तियचउक्कचच्चाइसु परिब्भमिउमारद्धो य, तहा भमंतस्स य रण्णो विजणंति पडियमेणेण थेरपुरिसेणं—

चोरोहिं गेहसारो, हीरइ कुमरेण नयरतरुणिजणो । एवंविहरक्खाए नरिंद सिवभइ ! भइं ते ॥ १ ॥

पट्टिट्टिओ य राया सोच्चं से गओ समीवंमि । अच्चंतविहियमणो सणियं भणिउं पवत्तो य ॥ २ ॥
 भो कहसु पडियगाहापरमत्थं तेण जंपियं सुहय ! । रायविरुद्धकहाए तीए किं मज्झ कहियाए ? ॥ ३ ॥
 रत्ना वुत्तं सच्चं एवमिमं किं तु एत्थ एगंते । साहिज्जंतीएवि हु न कोऽवि दोसो अओ कहसु ॥ ४ ॥
 तो तेण समगो नयरतरुणिविसओ कुमारवुत्ततो । चोरोवद्वसहिओ कहिओ सिवमदनरवइणो ॥ ५ ॥
 अह तं निसामिऊणं पलयानलभीमकोवरत्तच्छो । आबद्धुब्भडभिउडी राया एवं विचिंतेइ ॥ ६ ॥
 अहह ! महंतमकज्जं पावेण सुएण मज्झ आयरियं । हरिणंकनिम्मलंपि हु कुलमेवं मइलियं जेण ॥ ७ ॥
 ता किं अहुणच्चिय कंधराए धरिऊण तं महापावं । निद्धाडेमि पुराओ ? किं दुव्वयेणहिं तज्जेमि ? ॥ ८ ॥
 अहवा मंतीहिं समं सम्मं वीमंसिऊण तस्सुच्चियं । पकरेमि जेण सहसा कयाइं दूमेति कजाइं ॥ ९ ॥

इय चिंतिऊण राया गओ निययभवणं, पसुत्तो सुहसेज्जाए, जाए य पभायसमए वाहराविया मंतिणो, सिट्ठो
 य तेसिं रयणिवुत्ततो, मंतीहिं भणियं-देव ! अम्हेहिं पुंघंपि कुसमायावत्ता निसामिया आसि, परं न कोऽवि सो
 अवसरो जाओ जत्थ तुम्ह कहिज्जइ, रत्ना जंपियं-होउ ताव समइकंतत्थविकत्थणेण, संपयं सोहेह, किमेयस्स
 दंडं निवत्तेमो ? , मंतीहिं वागरियं-देव ! अलं दंडेण, एत्तियमेत्तमेव जुत्तं तुम्ह काउं जमेसो निजइ सुसाहुसमीवे,
 सुणाविज्जइ धम्मसत्थाइं, पढाविज्जइ रायनीइ, उववेसाविज्जए विसिट्ठगोहीए, एवमवि होही एयस्स कुसमायार-

परिचायपरिणामो, पडिवन्नं रत्ना, वाहराविओ कुमारो, तेण य समेओ गओ धम्मसेणसूरिणो समीवे, तं च
बंदिऊण निसन्नो उचियट्ठाणंभि, सूरिणाऽवि पारद्धा धम्मकहा ॥ कहं?—
सो भो देवाणुपिया! जइ वंछह सिवमुहाइं उवलडुं । ता मोत्तूण पमायं जिणंदधम्मंमि उज्जमह ॥ १ ॥
तं नो कुणंति अहिमरविसहरिणारिवेरियायाला । अच्चंतं कुवियाविहु जमिह पमाओ महापावो ॥ २ ॥
सो पुण पंचवियप्पो नेयवो निवुइपरिहरूवो । मइरा-कसाय-निद्दा-विगहा-विसयाण गहणेण ॥ ३ ॥
मइरापाणपरव्वसमणपसरो जुत्तमियरममुणंतो । तं नत्थि नूण पावं जं जीवो नो समायरइ ॥ ४ ॥
एत्तो चिय सुरकयकणयपवरपागारगोउरावि पुरी । बारवई जायवसंकुलावि मच्चुंमुहं पत्ता ॥ ५ ॥
पज्जंतकयविसाया महापिसाया व दिन्नअववाया । जणियदुरज्झवसाया न होति सुहया कसायावि ॥ ६ ॥
एएहिं निहयमइणो जं जीवा चरियदुक्करतवावि । करडुकरुडुव सत्तमनरथपुढवीए निवडंति ॥ ७ ॥
निद्दापमत्तचित्तावि पाणिणो पाउणंति न कयावि । सुयनाणधणं पत्तंयि कहंवि हारंति धीरहिया ॥ ८ ॥
तेणं चिय चउदसपुविणोऽवि निन्नट्ठपवरसुयरयाणा । मरिउं कालमणंतं अणंतकाएसुवि वसंति ॥ ९ ॥
मोत्तूण निययकिच्चं भोयणदेसिस्थिरायसंवद्धा । कीरंति जेहिं विकहा कह नो ते दुक्खिया होति ॥ १० ॥
कहवा न बालिसेणवि अच्चमगलजंपिरत्ति गहिलत्ति । कित्तिज्जंती? मणुयत्तणेऽवि को वा गुणो तेसिं? ॥ ११ ॥

सेविज्जन्ता जमणिट्टकारिणो ते धुवं किमच्छरियं । सुमरणमेत्तेणपिवि दित्ति दुरंतं भवं विसया ॥ १२ ॥
 विसयाण कए पुरिसा सुदुक्करपिवि कुणंति ववसायं । आरोवेति य संसयतुलाए नियजीविचद्वपि ॥ १३ ॥
 चिरकालपालियंपि हु कुलभज्जायं चयंति तद्वसगा । सबत्थ वित्थरंतं अवजसपंसुपि न गणंति ॥ १४ ॥
 वंचंति सयणवग्गं तणं व मन्नंति निययजणगंपि । धम्मोवएसदायगमवहीरंती गुरुजणंपि ॥ १५ ॥
 पहसंति विरागिजणं विसिट्ठगोड्ढिं चयंति दूरेण । वंछंति नेव सोउं सणकुमाराइचरियाइं ॥ १६ ॥
 इय ते विसयमहाविसवामूढमणा मणागमेत्तंपि । नेवुइमपावमाणा पावेसु वहुं पसज्जंति ॥ १७ ॥
 बाहिरविच्चीए तहाविहेसु धम्मसु संपवत्तावि । पंचगिगपमुहुक्करतवसंतावियसरीरावि ॥ १८ ॥
 कम्मवसेणं अप्पुण्णविसयवंछा विणस्सिउं पावा । निवडंति दुग्गईए भागवयमुहंकरमुणिच्च ॥ १९ ॥
 इय पंचविहपमायं एवंविहदोसदूसियं नाउं । नरनाह ! तदेगमणो जिणंदधम्ममि उज्जमसु ॥ २० ॥
 एवं सूरिणा उवइहे पमायप्पवंचे सुरिंददत्तकुमारो जायनिम्मलचित्तपरिणामो भणिउं पवत्तो-भयवं ! को एसो
 पुव्वकहियसुहंकरमुणी ? कहं वा अपुण्णविसयवंछो सो मरिउं दुग्गइं गओत्ति साहेह ममं, सूरिणा भणियं-साहेमि ॥
 मालवविसए विक्खायजसा चक्कपुरी नाम नयरी, तहिं च अणेगवणियजणचक्खुभूओ पभूयदव्वसंभारो सोम-
 दत्तो नाम सेट्ठी, तस्स सत्तण्हं पुत्ताणं कणिट्ठिया अणेगोवजाइयसयसंपसया देवसिरी नाम धूया, सा य अच्चंत-

रूपा संपत्तजोवणावि तहाविहवराभावेण कालं बोलेइ, इओ य तीए नयरीए अदूर उच्छलतमहल्लकल्लोलिवदलिय-
कूलाए अणेगविहगकुलकलयलाउलदियंतराए जमुणामहानईए उत्तरपुरत्थिमदिसिबिभागे वेयपुराणभारहरामा-
यणवक्खाननाणविन्नाणनिउणो नियदरिसणत्थविथारणपवणो सब्बत्थ विक्खायजसो नीसेसभागवयमुणिपहणो
सुहंकरो नाम लोइयतवस्सी परिवसइ, सो य तवेण य वयणसोहणेण भविस्सजाणेण य जणसम्मयत्तेण य सयलस्सवि
नयरजणस्स बाढं पूयणिज्जो, अन्नया य तेण सोमदत्तसेट्ठिणा गुणगणावज्जियहियएण निमंतिओ सो भोयणक-
रणत्थं नियमंदिरे, गाढतवयणाणुरोहेण य कइवयसिस्सपरियरिओ संपत्तो भोयणसमयंमि, सपरियेण परमभत्तीए
नमंसिओ सोमदत्तेण, सम्मज्जिओवलत्तिमि भवणभागंमि दवाविंयं से आसणं, तहिं च निसन्नो एसो, सेट्ठिसुएहिं
कयं परमायेरेण चलणपक्खालणं, अणेगकलहोयमयकचोलिसिप्पिसंकुलं च पइट्ठियं पुरओ परिसलं, सेट्ठी य समयमेव
निब्भरभत्तिभरतरलियचित्तो नाणाविहवज्जणसणाहं पउरखंडखज्जयाइमणहरं रसवइं परिवेसिउं पवत्तो, सावि सेट्ठि-
धूया देवसिरी रणंतमणिनेउरारावमुहलियदिसावगासा हारद्धहारकुंडलकडयअंगरसणापमुहाभरणभूसियसरीरा नि-
यंसियपवरपट्टणुगयदिवचीणंसुया कणप्रदंडतालविटमादाय तस्स भोयणं कुणंतस्स वीजणत्थमुवट्ठिया, एत्थंतरे
साहिलासं तं पलोइऊण सुहंकरतवस्सी तक्कालवियंभमाणमयणहुयवहपलित्तहियओ विभाविउमारद्धो । कइं ?—

सुसहा पन्नगपमुक्कफारफौंकारजलणजालोली । उब्भडकोदंडविक्खित्ततिक्खनारायराईवि ॥ १ ॥

न उण इमीए एए कुवलयदलदीहरच्छिविच्छोहा । सोढुं सका निक्खिमयरद्वयभावसंवल्लिया ॥ २ ॥
 रइरंभाहरिदइयातिलोत्तमापमुहदिव्वनारीओ । मन्ने इमीए रूवेण लज्जियाओ न दीसंति ॥ ३ ॥
 विन्नाणं ज्ञाणं सत्थकोसलं देवथाण पूया य । विहलं सर्वपि इमं जइ एयमहं न पावेमि ॥ ४ ॥
 केवलमुवायओ संगमेऽवि एयाए कहवि दिव्ववसा । सवत्थ वित्थरंतो अवन्नवओ दुसरोहो ॥ ५ ॥

अहवा किमणेण ?-हरिहरहरिणगन्भा वसिद्धजमदग्निवा(चा)सुदवासा ।

हरिणच्छवयणनिद्देसकारिणो जइ पुरा जाया ॥ ६ ॥

ता किं अम्हारिसमुणिजणस्स सुद्धवि विसिद्धम्मस्स । लज्जा वयणिजं वा ? ता पज्जत्तं विगण्येहिं ॥ ७ ॥ जुम्मं ।
 तहं कहवि केरेमि जहा इमीए सद्धिं समागमो होइ । इय निच्छिऊण गंभीरभावमब्भुवगओ एसो ॥ ८ ॥

आगारसंवरं च काऊण जहापउत्तनाएण भोचुं पवत्तो, अह तक्कालवियंभियमयणगुरूवएसवसओ इव जाया से
 बुद्धी, जहा विण्यारोमि एयं सेद्धिं, जेण वयणिज्जिचिरहिओ एयाए लाभो हवइत्ति, एवं संपेहिऊण सेट्ठिणो पलोय-
 माणस्स दुस्सहदुक्खावेगसंसूयगो विमुक्को अणेण सिक्कारो, ससंभमेण निरुविओ सेट्ठिणा, खणंतरंमि य गए पुणोऽन्वि-
 पुवक्कमेण पयडियलोमुद्धोसनिम्भरे सवयणभंगभासुरे दोचं तचं च विमुक्कमि सिक्कारे अहो किंपि अचंतमणिट्टमावडि-
 हित्ति विभावितो जाव सेट्ठी अच्छइ ताव सो मुहसुद्धिं काऊण समुट्ठिओ भोगणमंडवाओ, उवविट्ठो अन्नय, सेट्ठीवि

कज्जसेसं काऊण समागओ तस्समीयं, निवडिओ तस्स चलणेसु, जोडिय करसंपुडं च भणिउमाढत्तो-भयवं ! पसायं काऊण साहेह, किं कारणं भोयणं कुणंतेहिं तुम्हेहिं तिमखुत्तो दुस्सहदुक्खावेगसूयगो इव सिक्कारो विसुक्कोत्ति? सुहंकरेण भणियं-भो महाणुभाव ! किं साहिज्जइ?, एरिसा चेव हयपयावइणो रुई, जं सवं चिय रयणं सोवदवं निम्मवेइ, तहाहि-

सयलकलानिलयस्स य गयणसरोवरसहस्सपत्तस्स सुरलोयभवणमंगलकलस्स पइयक्खं खओ दओ निसायरस्स, नीसेसतिरियलोयपईवस्स कमलसंडजड्डखंडणेक्कपयंडकिरणस्स भयवओ मायंडस्स अणिवत्तयउगाढकुट्टोसेण विणासिया चरणा, अणेगरयणसंभारभरियगंभीरकुच्छिभागस्स महाजलुणीलपवाहियविपरंमुहसरियासहस्सस्स सायरस्सवि अणवरयसलिलसंहारपच्चलो निवेसिओ कुच्छिमि वज्जानलो, एवं च ठिए वत्थुपरमत्थे किमत्थि कहणिज्जं? को वा वोढवो चित्तसंतावो?, सेट्ठिणा भणियं-भयवं ! न मुणेमि किंपि गंभीरवयणेहिं, ता फुडक्खरं साहेह, किमिह कारणं?, सुहंकरेण भणियं-कहेमि, अलाहि एत्तो जंपिएण, नियमजायाविवायपरिहारसमुज्जओ चेव जइजणो होइ, एवं भणिऊण डंभसीलयाए समुट्ठिऊण गओ सो निययासमपयं, सेट्ठिवि अयंडविडुरसूयगं से वयणं निसामिऊण सं-खुट्ठो परिभाविउं पवत्तो-अहो तिकालगयत्थपरिघ्राणनिउणेण महातवस्सिणा अणेण नूणं अम्ह किंपि गाढभावयान-डणमवलोइऊणवि चित्तपीडापरिहरणट्ठया न य पयडक्खरोहिं समुल्लवियं कज्जतंतं, ता जावज्जवि न समुज्जइ कोऽवि अणत्थो ताव तं मुणिवरं गाढाणुरोहेपुव्वगमापुच्छिऊण जहोचियमायराभिमिच्चिंतिऊण गओ तस्स आसमं,

पडिओ से पाएसु, पणयगब्भपत्थणाहिं बहुप्पयारं तथा तथा भणिओ जहा जाओ सो अणुकूलचित्तो, तथो भणिय-
मणेण-अहो सोमदत्त ! बाढमकहणिज्जेमेयं, केवलं तुह असरिसपक्खवाएण विहरियं मे हिययं, न एत्तो गोविउं पारेइ,
अओ आयन्नेहि-भो महायस ! जा एसा तुह दुहिया सा थेवदिणमज्झमि कुडुवक्खयमाणिस्सइत्ति लक्खणेहि
नाऊण मए भोयणे पारद्धे अकंडविणिवायतरलियचित्तेण तथाविहमणिट्ठं गोविउमसहंतेण पुणो पुणो सिक्कारो
कओ, ता भो महाणुभाव ! एयं तं कारणं, इमं च सेट्ठी निसुणिऊण वज्जासणिताडिओव्व मुच्छानिमीलियच्छो
इव खणं ठाऊण कहवि समवलंविथीरभावो भणिउमाढत्तो—

भयवं ! एत्तियमेत्तं जह तुमए जाणियं सुबुद्धीए । तह उत्तरंपि किंची जाणिहिसि अओ तयं कहसु ॥ १ ॥
जं पयडमिमं लोगे जो विज्जो सुणइ रोगिणो रोगं । सो तदुचियमोसहमवि ता भंते ! कुणसु कारुणं ॥ २ ॥
तुम्हाणणुग्गहेणं जइ देवगुरूण पूयणं कुणिमो । अम्हे अदीणमणा ता किमजुत्तं हवेज्ज इह ? ॥ ३ ॥
निरुवमधम्माधाराण तुम्ह नोवेक्खणं खमं जेण । परहियकरणेक्कपरा चयंति नियजीवियवंपि ॥ ४ ॥
तम्हा उज्झसु संखोभमणुचियं कहह जमिह कायव्वं । पुव्वमुणिणोऽवि जेणं परोवयारं करिंसु सया ॥ ५ ॥
एवं सेट्ठिणा कहिए ईसिमउल्लियनयणेणं जंपियं तेण-भो सोमदत्त ! सुनिच्चलं जंतिउम्हि तुह दक्खिण-
रज्जूए, एत्तोचिय महाणुभावा गिहिसंगं मोत्तूण विजणवणविहारमब्भुयगया पुव्वमुणिणो, सेट्ठिणा भणियं-अच्छउ

अणुकूला मह कम्मपरिणई, केवलं एवंविहं रमणिरयणं एवं उज्झमाणे ग केणवि नूणमप्पणो असिवपसमणं संभा-
 वियं भविस्सइ, ता न जुत्ता रिक्ता चेव मंजूसा पवाहिउंति परिभाविऊण सन्निहियवणहुट्टमक्कडं तदंभंतरे निक्खि-
 विऊण निविडं दुवारं च से वंधिऊण भगवइ जमुणे मा मे कुण्णज्जसित्ति भणिऊण पुव्वनाएण पवाहिया एसा,
 पावियसुरलोयसिरिसमुदयं व अप्पाणं मन्नतो तं कुवल्लयदलदीहरञ्छि घेत्तूण गओ जहागयं, सावि मंजूसा जलेण
 बुज्झमाणी गया कोसमेत्तं, दिट्ठा य सुहंकरसीसेहिं, तओ नियगुरुणो विन्नाणाइसयं वन्नमाणेहिं नईमज्झे पवि-
 सिऊण आयड्हिया मंजूसा, उवणीया य गुरुणो, तेणावि असंभावणिज्जमाणंदसंदोहमुव्वहंतेण संगोविया गेहमज्झे,
 भणिया य नियसिस्सा-अरे अज्ज अहं देवयापूयं महया वित्थरेण भवणंभंतरे ठिओ सव्वरयणिं करिस्साभि, ता
 तुभेहिं बाढं निविज्जणं कायच्चं, पडिबन्नं तेहिं, अह समागयंमि रयणिसमए मयरद्धयनिइयसरसहस्सपहारजजरिय-
 सरीरो पवरविलेवणकुसुमतंबोलप्पमुहोवगरणपरियरिओ पिहिऊण सयलगेहदुवाराहं तं मंजूसमुग्घाडित्ता एवं जं-
 पितं पवत्तो—

हे हरिणञ्छि! किसोअरि! पीणत्थणि! कमलवयणि! वरतरुणि!। पम्मुकुभयासंकं संपय मं भगमु दइयं व ॥ १ ॥
 वच्चउ विगासमहुणा लोयणकमलं मणोरहेहिं समं । सुयणु ! तुह संगमेणं मयणोऽवि मणागमुवसमउ ॥ २ ॥
 एत्थंतरंमि गाढावरोहसंजायतिववरकोवा । तणहाछुहाकिलंता अच्चंतं चावलोवेया ॥ ३ ॥

वणदुहुमक्कडी तडतडत्ति पुच्छच्छडाहिं ताडती । तत्तो विडंविद्यमुही नीहरिया दुरुहुरती सा ॥ ४ ॥ जुम्मं ।
आ कीस चंदवयणे ! करेसि रोसंति वाहरंतो सो । चुंबणवंछाए मुहं तदभिमुहं जाव संठवइ ॥ ५ ॥
पढमं चिय ताव तडत्ति तोडिओ तिवखदसणकोडीहिं । तीए नासावंसो मूलाओ चिय समग्गो सो ॥ ६ ॥
तयणंतरं च अइतिवखनक्खनिवेहेण दारियं अंगं । आमूलाओ उम्मूलियावि सवणावि से ताए ॥ ७ ॥
अणिवारियपसराए एवं तीए हणिज्जमापेण । तेण भयकंपिरेणं वाहरियं गुरुसरेणेवं ॥ ८ ॥
रे रे धावह सिस्सा ! उग्घाडह मंदिरस्स दाराइं । एस पिसाईए अहं निज्जामि जमस्स गेहस्मि ॥ ९ ॥
इय एवं वाहरंतो भयवससंखुद्धमाणसो धणियं । तायारमलभमाणो नहदंसणुल्लिहियसव्वगो ॥ १० ॥
रोसुक्कडाए वणमक्कडीए पुणरुत्तधुरुहुरंतीए । तह विणिहओ वरागो जह सो पंचत्तमणुपत्तो ॥ ११ ॥
अह उग्गयंमि दिणयेरे समागया तस्स सीसा, कया तेहिं सदा, न देइ सो य पडिवयणं, तओ विहाडियाइं
कवाडाइं, दिट्ठो विणट्ठजीओ सुहंकारो, सावि वणमक्कडी उग्घाडिएसु कवाडेसु पलाइरुण गया जहागयं, सीसेहि-
वि असुणियपरमत्थेहिं कओ सुहंकरस्स सरीरसक्कारो ।

इय भो कुमार ! विसयाउराण अणुव्ववच्छियट्ठणं । निवडंति आवयाओ पयडंचिय जेण भणियमिमं ॥ १ ॥
सहं कामा विसं कामा, कामा आसीविसोवमा । कामे पत्थेमाणा, अकामा जंति दुग्गइं ॥ २ ॥

मूलाओ साहेसु, तओ तेण सिद्धो नरिंदमंतिजणणुणुल्लवधुत्तंतो, तं च सोच्चा समुण्णल्लज्जो कुमारो परिचित्तित्तं पवत्तो-अहो अच्चंतमज्जुत्तमायरियं मए, जं तहाविहं कुलक्कमविरुद्धं कुणत्तेण न गणिओ लोयण्णवाओ न वीमंसिओ धम्मविरोहो न य परिभाविंयं तायस्स लहुयत्तणं, एवं च ठिए कंहं विसिद्धपुरिसाण नियययणं दांसित्तो न लज्जामि, तम्हा न जुज्जइ इह निवसिज्जति चित्तिज्ज मज्झरत्तसमयमि निब्भरपसुत्ते परियणे तोणीरं धणुदंडं च घेत्तूण पुव्व-देसाभिमुहं गंतुं पयट्ठो ।

इओ य-गयणवल्लहनयरे विज्जाहरन्ना महावेगनामेण पुट्ठो नाणसाराभिहाणो नेमिच्चिओ, जहा एयाए मह धूयाए वसंतसणाए को पई होहित्ति?, तेण? कहियं-जो सावत्थीनयरीनाहं कुसुमसेहरनारिंदं निय-भुयवल्लेण एगागी हयपरक्कमं काहित्ति, एवं सोच्चा विज्जाहरेण भणिया खेमंकराइणो विज्जाहरा-ओ गच्छह तुम्भे सावत्थि नयारिं, तहिं च ठिया जया एवंविहपरक्कमं पुरिसं पेच्छह तथा तं झत्ति घेत्तूण मम समण्णेह, जं देवो आणवेइत्ति सिरसा पडिच्छिज्ज से सासनं गया ते तं पुरिं, सुरिंदत्तकुमारोऽवि एगागी नाणविहदेससु परिम-मंतो पत्तो तामेव नयारिं, ठिओ य नयरीसमीववत्तिणो उज्जाणस्स एगमि लयाहरे, तहिं च जाव पसुत्तो अच्छइ ताव कयवयचेडीपरिवुडा कुसुमसेहरायमुया इओ तओ कीलंती कहवि कम्मविचित्तयाए एगाणिणी पविट्ठा तमेव लयाहरं, दिट्ठो अण्णडिमरूवो पसुत्तो कुमारो, सा य तीए समुण्णन्निवाणुरागाए पडिबोहिज्ज पारद्धो अणु-

कूलवयणेहिं उवसगिउं, नियमविगधकारिणित्ति कलिऊण निम्मत्थिया सा कुमारेण, कहं?—

पाविट्ठि दुठसीले! निक्कारणधम्मवेरिणि! तुमं मे। अवसर चक्खुपहाओ पज्जतं दंसणेण तुहं ॥ १ ॥

तुम्हारिणीण संभासणेऽवि असणिव दारुणा पडइ। इहपरभवपडिक्कूला अच्चत्थमणत्थपत्थारी ॥ २ ॥

इय एवमाइवयणेहिं तज्जिया सा न जाव नीहरइ। ताव करे धेत्तूणं कुमारेण दढेण निच्छूढा ॥ ३ ॥

आ पाव! पावसि तुमं एत्तो पंचत्तमिति य जंपित्ता। कवडेण सयंचिय नहसिहाहिं उल्लिहियकायलया ॥ ४ ॥

सा दूरे ठाऊणं हलबोलं काउमेवमारद्धा। रे रे लयाहरगयं गेणहह पुरिसाहमं एयं ॥ ५ ॥

कुल्लुवइदूसिया जेण मज्झ एवंविहा कयावत्था। तमुवेहंता संपइ दंसिस्सह कह मुहं रओ? ॥ ६ ॥

एवं सोच्चा नरवइसुयाय वयणं परूढकोवेहिं। आरक्खियसुहडेहिं लयाहरं वेढियं झत्ति ॥ ७ ॥

कुमरोऽवि तीए हिययं व निट्ठुरं पाणिणो धणुं धेचुं। तत्तो विणिकखमित्ता तेसिं ठिओ चक्खुपसरंमि ॥ ८ ॥

ताहे तेहिं समगं पम्मुक्का चक्केसेल्लसरनियरा। छेयत्तणेण वंचाविद्या य सयला कुमारेण ॥ ९ ॥

तप्पहरणेहि य लहुं निहया गोमाउयव ते तेण। अह निमुणियवुत्तंतो रायावि समागओ तत्थ ॥ १० ॥

अंचंतजायकोवो जुज्झेणोवट्ठिओ सयं चेव। करितुरयरहारूढा विंयंभिया सुहडसत्थावि ॥ ११ ॥

तो चउदिसि पसरियउ सचुसिन्नु, पेक्खेवि अलुडु जिंव कुंभयन्नु।

आपीडियपरियरु सो कुमार, जुज्झणहं लगु सो दढणहार ॥ १२ ॥
 सरकाणियपक्खरतुरयधट्ठ, सुसुमरियेवरियरुडमरट्ठ ।
 जसु संसुट्ठु किर जो खिवइ चक्खु, सो तक्खणि जायइ जमह भक्खु ॥ १३ ॥
 एगोऽविट्ठु भयवसकंपिमाण, सो णेरुव हूओ वेरियाण ।
 लक्खिज्जइ बाणसुयं तु केम्ब, जलधार सुयंतउ मेहु जेव ॥ १४ ॥
 उब्बद्धजडूभडभिउडिभीस, तिकखंडिय सत्तहु सरहिं सीस ।
 तसुदारुणरणकम्मेण तुट्ठ, ओइन्ननहंणि तियसंवठ ॥ १५ ॥
 अवरोप्परेपल्लिरि सुहडसत्थि, नासणह पयट्ठइ अइव हत्थ ।
 विवरंसुहि सावत्थीए नाहि, पवहंतइ नरुहिरप्पवाहि ॥ १६ ॥
 समरंगणि जोधइ जा कुमार, संचिट्ठइ रिउ अकयण्णहार ।
 ता पुव्व भणियविज्जाहरोहिं, अवहरिवि हरिसभरनिम्भरोहिं ॥ १७ ॥
 उवणीओ खयरनरनायगस्स, हरिसूसंतसुहपंकयस्स ।
 अह आगयंमि सुदिणंमि तेण, परिणविओ कुमार वसंतसेण ॥ १८ ॥

सो तीए सहिउ पंचप्पथार, उवभुंजइ विसय अणन्नसार ।
अइनिच्चलु पालइ जिणह धम्म, दूरेण विवज्जइ पावकम्म ॥ १९ ॥
कालक्कमेण विसहय विरत्तु, पव्वज्ज लेइ सुपसंतच्चित्तु ।

तवचरणेहिं झोसिउ पावकम्म, पच्चक्खु विरायइ नायधम्म ॥ २० ॥

अह ससहरनिम्मलु पाविवि केवलु, पडिबोहिवि चिरु भव्वजणु ।

सिवभइह नंदणु भवभयमइणु, वच्चइ निव्वइ वरभवणु ॥ २१ ॥

इय परदारनिचित्तीमित्तिं अणुव्वयं पवन्नमिमं । एवंविहोत्तरोत्तरकल्लणनिवंधणं होइ ॥ २२ ॥
भणियं चउत्थणुव्वयमेत्तो पंचमगमाणुपुवीए । सयलपरिगहपरिमाणकरणविसयं पयंपेमि ॥ १ ॥
दुविहो परिगहो सो थूलो सुहुमो उ तत्थ सुहुमो य । परकीएसुवि वत्थुसु ईसिं सुच्छाइपरिणामो ॥ ३ ॥

थूलो पुण नवभेओ धणे य धन्ने य खेत्तवत्थूसु । रुप्पसुवन्नचउप्पय दुप्पयकुविएसु मुणिअव्वो ॥ ३ ॥

इय नवभेयपरिगहपरिमाणं भावसारमादाय । पंचइयारविवज्जणपरायणो सावगो मइमं ॥ ४ ॥

खेत्ताइहिरन्नाइधणाइदुपयाइकुप्पमाणकमे । जोयणपयाणवंधणकारणभावेहिं नो कुणइ ॥ ५ ॥

जो पुण अइलोभवसा भणिज्जमाणोवि गुरुजणेण वहुं । थेवंपि नो परिगहपरिमाणवयं पवज्जेइ ॥ ६ ॥

सो दविणाहनिमित्तं वचंतो दूरदेसनयरेषु । पविसंतोऽवि समुहं कुणमाणो विविहववसायं ॥ ७ ॥
लामेऽविहु पइदिणवहुमाणधणवद्धणाभिलासो य । अचंतमहादुक्खं वासवदत्तोव पावेइ ॥ ८ ॥ विसेसयं तीहिं ।
अह गोयमेण भणियं वासवदत्तो जिणिंद ! को एस ! जयगुरुणा संलत्तं सीसय ! सम्मं निसामेसु ॥ ९ ॥
कणयखलंमि महानयरे सुवल्यचंदो नाम सेट्ठी, तस्स धणा नाम गिहिणी, तेसिं अचंतवल्लभो सब्बकलाकलाव-
निउणो वासवदत्तो नाम पुत्तो, सो य महारंभो महापरिगहो गरुडालभसंभवेऽवि महालोभसंगओ, अहोनिंसं दब्बो-
वज्जणोवाए पयट्ठंतो कालं बोलेइ, तस्स य अम्मापिउणो अचंतसावगधम्मकरणसीलाणि जिणवयणायन्नणेण सुणि-
यअविरइकुविचागाणि तं नियपुत्तं अणवरयाणेणपावट्ठाणपसत्तं पलोइऊणं भणंति-वच्छ ! सुभियोवमं जीवियं
असारा विसया सकज्जाणुवत्तणमेत्ता सयणसंजोगा खणविपरिणामधम्मा रिद्धिसमुदया, अओ किंनिमित्तं न कुगसि
धणधन्नखित्तवत्थुहिरन्नसुवन्नदुपयचउप्पयाइसु इच्छापरिमाणं, न वा परलोयसुहावहं समज्जिणोसि धम्मं, तहा
वच्छ ! पिउपियामहपुरिसपरंपरागयं न माइ दब्बं, अओ निरत्थओ तदज्जणगाढपरिस्समो, अह अपुवं लंछिउ उवव-
ज्जिउमिच्छसि तहावि जहासत्तीए इच्छापरिणाममेव कल्लाणकारगमिचाइ बहुणपयारवयणेहिं पन्नविज्जमाणोऽवि न
पडिबज्जइ कम्मभारियत्तणेण एसो मणांगपि तद्वयणं, सच्छंदचारित्ति उवेहिओ अम्मापिऊहिं । अन्नया य देसंत-
रागवणिया पुच्छया वासवदत्तेण-अहो किं तुम्ह देसे भंडमगवइ ? , तेहिं कहियं-अमुगंति, तओ तद्वयणनिसाम-

णचउगुणीभूयलोभाभिभूओ तद्देसोचियभंडनिवहभरियं सगडिसागडं गहिऊण पयट्ठो देसंतरं, निसिद्धो य वाढं जणणिजणगेहिं, तहावि न ठिओ, एवं च सो अणुदिणं वच्चतो गओ तामलित्तिं नयरिं, विणिवट्ठियं भंडं, समासाइओ दसगुणो लाभो, वियंभिओ य अच्चंतलोभसागरो, जाया बहुययरा तदज्जणवंछा, अन्नदिक्खे य दुवारगएण तेण दिट्ठाइं दूरेदसागयाइं विविहसारवत्थुभरियाइं जाणवत्ताइं, ताणि य पेच्छिऊण पुच्छिओ तच्चाणियगो अणेणंभो महायस ! कत्तो आगयाइं एयाइंति ? तेण जंपियं-कलहदीवाओ, वासवदत्तेण कहियं-भइ ! इहच्चभंडेण तत्थगएण केत्तिओ संपज्जइ लाभो ? तेण भणियं-वीसगुणो, वासवदत्तेण जंपियं-किं सच्चमेयं ? तेण कहियं-अज्ज ! किमसच्चभासणे फलं ? एवं च निसामिऊण वासवदत्तेण भाडियाइं जाणवत्ताइं भरियाइं विविहकंसदोसभंडस्स, पट्ठिओ कलहदीवाभिमुहं,

अह परियणेण भणियं-चिरं विमुक्काण जणणिजणगाणं । होही दढमणुतावो सामिय ! तुम्हं विओगंमि ॥ १ ॥

ता सारिज्जउ गेहं सम्माणिज्जंतु सयणवग्गावि । पुणरवि अत्थोवज्जणकरणे को वारिही तुम्हं ? ॥ २ ॥

इय भणिए सो रुद्धो निट्ठुरवयणेहिं भणिउमाढत्तो । रे तुम्ह कोऽहिगारो एवंविह भाणियवंमि ? ॥ ३ ॥

न तुमाहिंतोवि अहं लुत्तालुत्तं मुणेमि किं पावा ! । लद्धावयासया अहव किं न भिच्चा पयंपति ? ॥ ४ ॥

एवं खरफरुसगिराहिं तज्जिया तेण तह अदोसावि । लज्जामिलंतनयणा जह ते सोणं समल्लीणा ॥ ५ ॥

तेणावि सायरे पवाहिथाई जाणवत्ताई, सिग्धवेगेण गंतुं पयत्ताणि, कयेण पत्ताई कलहदीवं, उत्तारियं तेहिंतो भंडं, विक्रिणिंयं च, जाओ वहुओ लाभो, ठिओ य कहयथासराई, गहिया मणिमोचियसंखपट्टुत्तपमुहपहाणकथा-
णगाई, तओ पयट्टो तामलित्तिसंमुहं, इतस्स य जलाहिमज्जे दंसिओ निजामगेहिं तस्स रथणदीवो, कोउहल्लेण पुच्छिया
अणेण-अरे किमिह उप्पज्जइ?, निजामगेहिं भणियं-कक्कयणपउमरागवज्जिंदनीलाइणो महारथवाविसेसा ते इह
उप्पज्जंति, तेसिं समीवधरणमेत्तेण विहवइ संददारिहोवद्दवो, न पासंमि परिसप्पइ दधुब्भडो सय्यो, न नियडम-
क्कमइ चंडावि डाइणी, खिलियसुहोव न कडुयमुल्लवइ खलयणोवि, तओ अपरिकलियविणासेणं जायतगहणगाढा-
भिलासेण भणियं वासवदत्तेण-अहो निजामगा! जइ तत्तो हुत्तं नेह सह नावं तो चउग्गुणं देमि भे वित्तिं, तेहिं
भणियं-निजइ, केवलं उवलपडलाउला भूमी, जइ कहवि नावा भंगं पाविज्जा ता सवनासो जाएज्जा, तओ ईसि
विहसिऊण वासवदत्तेण भणियं—

जइ गयणं निवडेज्जा पल्लथेज्जा रसायले पुढवी । कुलगिरिणो य सपक्खा होउं व महीए वजेज्जा ॥ १ ॥
जलनिहिणो वा वेलाए महियलं सव्वओवि बोलिज्जा । जणणी वा नियपुत्तं हणेज्ज पढमप्पसूयंपि ॥ २ ॥
ता रत्नंपिक्ख सुन्नं होज्ज जयं किं तुं हवइ नो एयं । नय सव्वहावि अघटंतमेरिसं चित्तिउं जुत्तं ॥ ३ ॥
जो पुण इय चित्ताए पयट्टए सो धुवं महासुद्धो । करकमलगोयगयं लंछिं हारेज्ज किं चोजं ? ॥ ४ ॥

ता मेल्लह कुविगणं नावं पेलेह दीवयाभिमुहीं । उच्छिदह दारिद्रं आचंदं रयणगहणेण ॥ ५ ॥
 एवं च तेण कहिए पणट्टविणिवायभएहिं निज्जामगेहिं पवाहिया तदभिमुही नावा, जाव य केत्तिथं पि विभागं
 गया ताव समुट्ठिओ महामगरो, तेण य मंदरमंथेणव महियं जलहिजलं, उच्छालिया पयंडकल्लोला, तदभिघाएण
 भिन्ना सयसिकरा नावा, निवुडो अत्थसारो, खरपवणपहओ पलालपूलउव्व दिसो दिसि पलीणो परिणो, वासव-
 दत्तोऽवि कहकहवि समासाइयफलहखंडो वेलाजलेण वुज्झमाणो पाविओ सायरस्स पारं, कंठगगयजीविओ य
 दिट्ठो एमेण तावसेणं, तेणावि करुणाए नीओ निययासमे, काराविओ कंदमूलाइणा पाणवित्तिं, वीसंतो कइवय-
 वासराइं, समुवलद्धसरीरावट्ठंभो य पट्ठिओ नियनयराभिमुहं

इओ य तस्स अम्मापिउणो परलोयं गयाइं, जाया य नयरंमि वत्ता, जहा-वासवदत्तोवि समुहे वोहित्यभगेण
 विणासं पाविओ, ओच्छिन्नसामियंतिकाऊण गहियं धणकणसमिद्धं पि तम्मंदिरं नरिंदेण, वासवदत्तोऽवि संबलरहि-
 यत्तणेणं धणविणाससमुत्थसोगेण य किलंतदेहो महाकटुकप्पणाए संवच्छरमेत्तकालेण संपत्तो कणगखलनयरं, पवि-
 सिउमारद्धो य नियमंदिरं, एत्थंतरे उग्गीरियदंडा पधाविथा नरवइनिरूविथा धरारक्खगपुरिसा, भणिउं पवत्ता-
 अरे कप्पडिय ! धरसामियव्व निब्भओ कीस इह पविससि ?, किं न याणसि इमं रण्णो गिहं ?, तेण भणियं-कि-
 मेयं कुवल्लयचंदसेट्ठिणो न भवइ ?, तेहिं कहियं-हंत हुंतं पुव्वकाले, संपयं पुण असाभियंति रत्नो जायं, तेण भणियं-

अरे ! कहं मइ जीवन्ते असाभियंति वुच्चइ ? , किमहं कुवल्यचंदसेट्ठिणो पुत्तो वासवदत्तो तुब्भेहिं नो सुणिओ न वा दिट्ठोत्ति वुत्ते किं रे ! मिच्छा पलवसित्ति निब्भच्छिऊण कंधराधरणपुव्वयं निद्धाडिओ सो तेहिं मंदिराओ, गओ य एसो सयणाणं समीवे, तेहिंवि मा पुव्वदेयं दधं मग्गिस्सइत्ति कुविगप्पेण पच्चभिजाणंतेहिंवि न नयणमेत्ते, णावि संभाविओ, गहिलोत्ति कलिऊण रत्तावि उवेहिओ ।

अहं गेहसयणधणनासपमुहदुहजलणजालपजलिओ । सो चित्तिउं पवत्तो विवन्नलायन्नदीणसुहो ॥ १ ॥
कह अकलियपरिसंखं पुरिसपरंपरसमागयं दधं ? । कह वा समुयवलेण य विटत्तयं तं च अइवहुयं ॥ २ ॥
एक्कपयं चिय सधं निन्नट्ठं मज्झ मंदभग्गस्स ? । हा ! किं करोमि संपइ ? पुव्वं व हवेज्ज कह व धणं ? ॥ ३ ॥
एमाइविचित्तविकपकप्पणुप्पन्नचित्तवामोहो । उम्मत्तयं उवगओ हिंदंतो नयरत्थासु ॥ ४ ॥
चिरकालमाउयं पालिऊण बहुरोगसोगसंतत्तो । अट्टज्झाणोवगओ मरिउं तिरियत्तणं पत्तो ॥ ५ ॥
इय गोअम ! जीवाणं परिग्गहारंभविइरहियाणं । निवडंति आवयाओ जं तेणमं गुणकरंति ॥ ६ ॥
पंचवि अनुव्वयाइं सोदाहरणाइं ताव कहियाइं । एत्तो गुणव्वयाइं तिन्निवि लेसेण साहेमि ॥ १ ॥
उट्ठाहोतिरियदिसिं चाउम्मासाइकालमाणेणं । गमणपरिमाणकरणं गुणव्वयं होइ पढममिह ॥ २ ॥
वज्जइ उट्ठाइक्कममाणयणप्पेसणोभयविसुद्धं । तह चैव खेत्तवुद्धिं कहिंवि सइअंतरद्धं च ॥ ३ ॥

एयंमि निरइयारं दिसिद्वए भावओ पवत्तंमि । होइ सिरी मोक्खोविय जिणपालियसावगस्सेव ॥ ४ ॥

गोयमसामिणा भणियं-जयनाह ! को एस जिणपालिओ ? , सामिणा कहियं-भो ! निसुणेसु पुंडवड्डुणनयरे विक्रम-
सेणो राया, मयणमंजूसा से पट्टमहादेवी, सुबुद्धी अमच्चो, तत्थ य नयरे जिणभावियमणो जिणदत्तसेट्ठिस्स सुलसाए
भारियाए पुत्तो जिणपालिओ नाम सावगो परिसइ, तेण य गुरुसमीवे दिसागमणपरिमाणव्वयं गिणहंतोण
पन्नासं पन्नासं जोअणाइं चउसुवि दिसाए मुक्काइं, एवं सो उत्तरोत्तरगुणब्भासं कुणमाणो अच्छइ । इओ य विक्क-
मेसेणनराहिवस्स पंचतदेसवत्ती सीहसेणो नाम भिष्साहिवइ देसं विद्विउमाढत्तो, तस्स य उयरि महया संभेण
हरिकरिरहजोहवूहपरिगओऽविकखेवण चलिओ विक्रमसेणो, भणिओ य सुबुद्धिणा अमच्चेण-देव ! किं तस्स गो-
माउयस्स उवरिं तुम्हे विजयजत्तं करेह ? , तुम्ह पयपयावपडिहयपरक्कमस्स का तस्स सत्ती ? , ता नियत्तह नयरी-
हुत्तं देह ममाएसं जेण तहा करेमि जहा पडिच्छइ सिरेण सो देवस्स सासणंति वुत्ते चउरगिणीसेणासणाहो
पेसिओ अमच्चो, सीहसेणोऽवि तं सबलवाहणं इंतं चारपुरिसेहितो नाऊण विसमगिरिकडगं घेचूण ठिओ, अम-
चोऽवि तहाठियं पेच्छिऊण जुज्झिउमपारयंतो तमेव गिरिकडगं परिवेढिऊण तत्थेव आवासिओ, दुग्गममग्गत्त-
णओ य धन्नघयाइं महग्घीहूयं सिबिरे, जणपरंपराए य निसुणियमेयं जिणपालिएण, तओ भूरिघयभरियदोद्वियगणं
करभेसु समारोविय वणियजणसेओ चलिओ सो सिबिराभिमुहं, सो य सीहसेणो दुग्गे निरुद्धजवसाइपयारो

अच्छिउमचायंतो सारधणं करितुरयसाहणं च समादाय पलाणो रयणीए, मुणियवित्तंतो य अमच्चो लग्गो तस्स अनुमगेण, नासंतो य दस जोअणे गंतूण वेढिओ सव्वतो अमच्चसन्नेण, तओ सो सीहसेणो वहलतरुवरगहणंमि गिरि-
निकुंजं निस्साए काज्ज ठिओ, इओ य जिणपालिओ पुद्वावासियसिबिरसंनिवेसं पत्तो समाणो दिसिपरिमाणं चित्ति-
ऊण भणइ-अहो किमहमिणिह करेमि?, पन्नासं जोयणाइं मे परिमाणं, तं च इत्तियमेत्तेणं चिय पडिपुद्गप्पायं, सेन्न च दसहिं जोयणेहिं दूरीभूयमियाणिं, ता वलिस्साभि पच्छाहुत्तं, न कोसमेत्तपि एत्तो वच्चिस्साभि, सहाइणा बलिय-
लोणेण भणियं-अहो! मा मुहा अत्थहाणिं करेहि, तत्थ गयस्स तुह पभूयदविणलाभो जायइ, तेण भणियं-अलाहि तेण देवेणं जं नियमखंडणाए संपज्जइ,

अह तस्स नियमनिच्चलचित्तपरिक्खट्ठया सुरो एणो । कयउब्भडसिंमारो सव्वत्तो पुरिसपरिअरिओ ॥ १ ॥
सत्थाहिवरूवधरो सुरलोआओ समोअरेऊणं । पच्चासन्नो ठाउं पयंपिउं एवमाढत्तो ॥ २ ॥
हंहो सावय ! नो कीस एसि तं सप्पिविक्कयनिमित्तं? । जिणपालिएण भणियं वयमंगो हवइ जइ एसि ॥ ३ ॥
देवेण जंपियं सुट्ठु वंचिओ तंसि घुत्तलोएण । जो कुग्गहेण हारसि करट्ठियंपि हु महालाभं ॥ ४ ॥
अहवा वयस्स भंगे पायं होइत्ति तुज्झ संरुप्पो । ता तल्लामेणं चिय पायच्छित्तं चरेज्जासु ॥ ५ ॥
जिणपालिएण वुत्तं अहो किमेवं अणगगलं वयसि? । वञ्चति धम्मगुरुणो कयाइं किं भवसत्तज्जणं? ॥ ६ ॥

हंत ! जइ तेऽवि वंचति कहवि ता किं न चंदविबाओ । अमयमथाओ निवडइ पलित्तगयणानलकणोली ? ॥ ७ ॥
 किं वा न सूरविंवे विप्फुरमाणेऽवि तिमिरसंभारो । भरियमुवणंतरालो विधरइ रयणिं अकालेऽवि ? ॥ ८ ॥
 तां भइ ! नेव जुज्जइ गुरुहुत्तं तुज्झ जंपिउं एवं । अचंतपावजणगत्तणेण मज्झंमि नो सोउं ॥ ९ ॥
 जं च तए भणियमिमं वयलोवसमुत्थपावसमणत्थं । पायच्छित्तं पच्छा सेविज्जाहिति तमजुत्तं ॥ १० ॥
 जं पढमंपि न जुज्जइ तं काउं जत्थ होइ वयलोवो । लुत्ते य तत्थ विहलो पायच्छित्ताइवावारो ॥ ११ ॥
 सहसक्काराणाभोगओव वयमयलणंमि पच्छित्तं । पढमं चिय जाणंतो जो लोवइ तस्स तं विहलं ॥ १२ ॥
 इय भणिए सो देवो रंजियचित्तो विसिट्ठरूवधरो । चलियमणिंकुंडलामलमऊहविच्छुरियगंडयलो ॥ १३ ॥
 ससिणेहं जोडियपाणिसंपुडो भणिउमेवमाढत्तो । धन्नो सि तुमं सावय ! वयंमि जो निचलो एवं ॥ १४ ॥
 देवोऽहं तुह सत्तं परिकिखउं संपयं समणुपत्तो । परितुट्ठो य इयाणिं ता भण किं ते पयच्छामि ? ॥ १५ ॥
 जिणपालिएण भणियं जिणमुणिपयपूयणाणुभावेण । सव्वंचिय परिपुट्ठं न मग्गियव्वं किमवि अत्थि ? ॥ १६ ॥
 ताहे सुरेण कहियं जस्सेरिस निचलत्तणं धम्मो । सो तं कयकिच्चो नणु तहावि ममणुगहट्ठाए ॥ १७ ॥
 विसदोसहरणदक्खं रयणमिमं गिणह तं महासत्त ! । एवं तमप्पिऊणं देवो अहंसणं पत्तो ॥ १८ ॥
 जिणपालिओऽवि गहिऊण तं गहिऊण घयाइमंडं च । इयरवणियाण दाऊण गओ सनयरं, तत्थ य जाव

कइवि दिवसाणि अच्छइ ताव अन्नदिवस सा नरिंदभज्जा मयणमंजसा वासभवणांमि सुहपसुत्ता खइया विसहरेण,
तक्खणेण य निच्चिद्धा जाया, समाज्जलीहूओ विक्कमसेणो राया, बाहराविया गारुडिया, पउत्ता तेहिं मंतततोवयारा,
न य जाओ कोऽवि विसेसो, तओ पच्चक्खाया तेहिं, नरिंदेणवि गाढनेहमोहिण्ण नीणाविओ पडहगो, उग्घोसाविं
च, जहा-जो देविं उट्टावेइ तस्स अद्धं गामनगरसमिद्धस्स रज्जस्स देमिच्चि, इमं च पडहगताडणपुब्बयं उग्घोसिज्ज-
माणं सुणियं जिणपालिण्ण, तओ निवारिओ-अणेण पडहगो, देवसमप्पियरणं गहाय गओ नरिंदमंदिरं, रयणा-
भिसगसल्लिपणविहिणा विगयविसविगारा कया देवी, सुत्तपबुद्धं समुट्ठिया सयणीयाओ, तुट्ठो राया, दाउमारद्धो
य रज्जद्धं, जिणपालिण्ण जहोचियं घेत्तूण सेसं पडिसिद्धं, रायावि से निलोभयं दहूण पडिबुद्धो देवीए ससं सावगो
जाओ, जिणपालिओऽवि संपुन्नघणवित्थारो चेइयसाहुपूयारओ सम्मसुभयलोगसफलं जीवियं काज्जण मओ सममाणो
परंपराए मोक्खसोक्खभागी जाओत्ति ॥

इय गोयस ! दिसिवयपालणाए अइयारंपंकुस्काए । हुंति विसिट्ठसुहकरा गुणनिवहा इहपरम्वेसु ॥ १ ॥

भोगपरिभोगपरिमाणकरणमेत्तो गुणव्वयं बीयं । तं भोगणओ तह कम्मओ य दुविहं मुणेअव्वं ॥ १ ॥

भोगणओ पडिवन्ने इमंमि वज्जेज्जणंतकायाई । पंनुवरि महुमेरयं च रयणीयभत्तं च ॥ २ ॥

सच्चित्तं पडिबद्धं अपउलदुप्पउल तुच्छभक्खणयं । भोगणओ अइयारा वज्जेयवा इमे पंच ॥ ३ ॥

कम्मयओ पुण एत्थं पडिवन्ने सव्वमेव खरकम्मं । वज्जेअध्वं निच्चं किं पुण इंगालकम्ममाइं ? ॥ ४ ॥
 इंगाली वणसाडी भाडी फोडी सुवज्जए कम्मं । वाणिज्जं चेव य दंतलक्खरसेकेसविसविसयं ॥ ५ ॥
 एवं खु जंतपील्लणकम्मं निल्लणं च दवदाणं । सरदहतलायसोसं असइपोसं च वज्जेज्जा ॥ ६ ॥
 दुविहपयारं च इमं जहभणियविहिए पालमाणाणं । धन्नाण भवभयं नेव होइ रविपालयाणं व ॥ ७ ॥
 इंदभूइणा वागरियं-भयवं ! के इमे रविपालया ? जयगुरुणा भणियं-कहेमि, एत्थेव जंबूदीवे दीवे भारहे खेत्ते
 कोसलविसयप्पहाणे दसपुरंमि नगरे नरिंदसम्मया माहणकूलसंभूया चउइसविज्जाठाणपारगा दोन्नि भायरो रवी
 पालगो य परिचसंति, अन्नया य गामाणुगामं विहरमाणा बहुसिस्सगणपरिवुडा विजयसेणाभिहाणा सूरिणो
 समागया, ते य तेसिं जाणसालाए अणुजाणाविज्जण ठिया वासारत्ते, ते य दोवि भायरो सूरिसमीवे धम्मवीसंसाए
 समांगंतूण मणंति-भयवं ! मणह नियधम्मं, सूरिणा भणियं-आयन्नह—

जीवदयापरिणामो सव्वन्नुनिवेइयइत्थपडिवत्ती । परिगहपरिमाणं चिय एसो धम्मो समासेण ॥ १ ॥
 तेहिं कहियं-भयवं ! जीवदयापरिणामोत्ति जं तुम्हेहिं बुत्तं तं न घडेइ, जओ जन्नकज्जे पसुविणासोऽवि धम्म-
 त्तणेण निदिट्ठो, तहा सव्वन्नुनिवेइयत्थपडिवत्ती एयंपि न सुंदरं, सव्वन्नूणं वेदे अकहणाओ, जं च परिगहपरि-
 माणंति बुत्तं तंपि निरत्थयं, जेसिं वराडियामेत्तंपि नत्थि तेसिं विफलमेव परिगहपरिमाणकरणं, विज्जमाणपयत्थे

चेव तस्स गुणकारित्तणओ, गामसञ्भावे चिय सीमासफलत्तणओत्ति, तम्हा अन्नं किंपि धम्मं परिकहेसु, सूरिणा भणियं-आउसंतो ! न जुज्झइ तुम्ह एवं वोत्तुं, जओ इहलोयपडिबद्धुरिसवयणभयं जन्नकजे पसुविणासो धम्मोत्ति, कहमेयंति ? , बुच्चइ-‘आत्मवत् सर्वभूतानि, यः पश्यति स पश्यती’ति पारमार्थिकसुनिवचनात्, जइ पुण जीववि-णासे धम्मो ता मच्छब्धलुद्धयाइणो सगंमि वच्चेजा । जं च सव्वन्नणो वेदेसु न कहियत्ति वुत्तं तंपि वेयरहस्सा-निसामणाओ, यतस्तत्रैव शान्त्युद्घोषणाप्रस्तावे उक्तं—‘लोकप्रतिष्ठितान् चतुर्विंशतिं तीर्थकरान् ऋषभाद्यान् वर्धमानान्तान् सिद्धान् शरणं प्रपद्यामहे । ॐ पवित्रमग्निं उपस्पृशामहे, येषां जातं सुजातं येषां वीरं सुवीरं येषां नमं सुनमं ब्रह्म सब्रह्मचारिणो उचितेन मनसा अनुदितेन मनसा देवस्य महर्षिभिर्महर्षयो जुहोति, याज-कस्य जनस्य च एषा रक्षा भवतु शान्तिर्भवतु वृद्धिर्भवतु तुष्टिर्भवतु स्वाहा ” एवं च पसिद्धेसु सव्वत्थपइट्ठिएसु सव्वन्नसु अभावकप्पणं महासंमोहो । जं च कहियं विज्जमाणपयत्थे चेव परिमाणं जुज्झइ एयंपि अणुचियं, असंतेवि अत्थे आसवनिरोहभावाओ पच्चक्खाणं गुणकरं चेव, ता भो महाणुभावा ! असेसदोसगिसणघणसरिसं सव्वन्नमयं अमयं व पियह अजरामरत्तकरं, सुंचह मिच्छत्तमोहसंपसूयं कदासयविसेसं, मज्झात्थत्तणभवलंविऊण चित्तेह पर-मत्थं, जच्चकणगं व कसळेयतावपमोक्खवहुपरिक्खाहिं सुपरिक्खिऊण धम्मं सम्मकरं सम्ममायरह । एवं च सूरिणा पन्नत्ते लहुकम्मयाए पडिबुद्धा ते महाणुभावा, पडिबुद्धो भावसारं जिणधम्मो, गहियाइं अणुवयाइं, ‘अंगीकयाइं’

तिन्निवि गुणद्वयाहं, पालिति य सबजत्तेण । अन्नया य रविमाहणस्स भोगणं कुणमाणस्स उवरिद्धियवरकोइलगेण कओ
 उच्चारो, वविखत्तचित्तत्तणओ न सुणिओ अणेण, तम्मिसभोगणकरणे य पवडियं से उयरं, खीणाहं मंससोणियाहं,
 तणुइहूयाओ बाहाओ, सुक्काओ जंघाओ, सुसियं वयणं, वड्डिया तणहा, जाओ सावसेसाउओ, दंसिओ य पालएण
 विज्जाणं, तेहि वि असज्झोत्तिकाऊण पच्चक्खाओ एसो, एवं च विसमदसावडियं तं पलोइऊण झूरइ परियणो,
 रौवइ भारिया, बहुप्पयाहं विलवइ पालगो, सो य अदीणमाणसो सम्ममहिहयासेइ, अन्नवासरे च समागओ एगो
 देसंतरविज्जो, तस्स सयणवग्गेण दंसिओ रवी, तेणा वि संमं पलोइऊण भणियं-अहो कुडुधिरोलियापुरीससंभवो
 एस दोसो, ता पंचुवरिफलाहं समभागाहं चित्तगरोज्झमंसंभीसियाहं सुराए वट्टिऊण देह जेण सिग्घं पसमइ
 महोदरवाही, रविणा भणियं-भो भो वेज्जा ! भोगणओ वीयगुणद्वयपरिमाणं कुणतेण पच्चक्खायं मए एयं, वेज्जो
 सयणवग्गो य भणइ-पगुणीभूयसरीरो सोहिं करेज्जासु, तेण कहियं-जराद्युणज्जरियविसारासरीरपंजरासारयं
 जाणंतो नाहं मरणे वि एयमाथरामि, एवं च उज्झिओ वेज्जेण । अन्नमि य वासरे जाव सो निसन्नो एगंतदेसे अच्छइ
 ताव पेच्छइ वसहमुत्तमज्झे निवडियं घरकोइलगं, तक्खणं विय विणस्संतं च पेच्छिऊण चित्तियमणेण-अहो जहा
 एयं कोइलगविणाससमत्थं तहा तं दुट्ठं विसविगारमवि हणिउमलं, तम्हा जुज्झइ मज्झ एयं पाउंति परिभाविऊण
 सुमुहुत्ते णमोक्कारसुमरणपुरस्सरं वसहमुत्तं पीयमणेण, अह धम्मपभावेणं वेयणियखओवसमजोणा ओसह-

साहस्येण य जलोदरं से पसंतंति, जाओ पुणन्नवंगो, जयइ जिणिंदस्स धम्मसामत्थं, इय सवत्थ पवाओ वित्था-
रिओ नयरलोएण

सो य पालगो तन्नयरसामिणा भणिओ जहा ममामच्चत्तणं पडिवज्जमु, पालगेण भणियं-देव ! मए खरकम्माणं
बलाहियत्तारक्खिगतपमुहाणं नियमो कओ, राइणा भणियं-किं कारणं ? तेण कहियं-देव ! न जुत्तमेयं सावगाणं,
जओ तत्थ निउत्तहिं जणो पीडियवो, परच्छिद्वनिहालणं कायव्वं, नरेदचित्तावज्जणपरोहिं सवण्णयोरेण दव्वमुप्पाय-
णिज्जं, तं च न जुत्तं पडिवन्नवयणांति, रत्ता भणियं-दुट्ठाण सिक्खणे साहूण पालणे किमजुत्तं ? पालयेण जंपियं-
देव ! को एवं मुणइ-एस दुट्ठो एसो साहुत्ति, जओ अवराहस्स कारीवि अत्तणो साहुत्तणमेव पगासेइ, न य अपडिवन्न-
दोसो विणासिउं पारियइ, कयाइ पिसुणोवणीओ साहूवि परिहम्मइ, तम्हा अइसयनाणसज्जं दुट्ठनिगहसिद्धपालणं,
अणइसइणा कीरंतं विवज्जासंपि जाएज्जा, एवं च भणिए पयंडसासणत्तणओ रुट्ठो राया भणिउमाढत्तो य-अरे
बंभणाहम ! वेयपुराणपइट्ठियं बंभणत्तं परिहारिय धम्मंतरं कुणमाणो मूलाओ च्चिय निगहट्ठाणं तुमं विसेसओ
इयाणिं ममाऽऽणालोवपयट्ठो, ता न भवसि संपयंति भणिऊण आणत्तो वज्झो, नीओ मसाणभूमीए, समारोविउ-
मारद्धो सुलाए, एत्थंतरे तप्पएसोवगएण दिट्ठो वाणमंतरेण, दढधम्मोत्ति जायाणुकपेणं तेण सुलाठाणे कयं कण-
यसिंहासणं, तेहि य रायपुरिसेहिं पहाओ खगपहारोहिं, देवण्णभावेण य पहाट्ठाणेसु समुट्ठियाणि भेवेयपमुहाणि

आभरणाणि, निवेद्यं च रत्नो, अह भयसंभ्रमणो राया सयमेव परियणसमेओ तस्स सगासोवगओ कयंजली भणिउमाढत्तो-भो भो सद्धम्मपरेक्कचित्त! जं निन्निमित्तमवि मोहा एवंविहं अवत्थं उवणीओ तं खमसु मज्झ, एवं च सुचिरं पसाइऊण करेणुगाखंधे समारोहिऊण य महाविभूइए पवेसिओ नयरे पालओ, जहोचियं तंबो-लाइणा संमाणिऊण पेसिओ सगिहं, परितुट्ठो जेट्टमाया, कयं वद्धावणयं । अवरवासरे य पालगेण भणियं-हे माय! सब्बधुम्ममाहणमेयं जं वसहसुत्तमेत्तेणवि तुह पसंतो जलोयरवाही, ममावि निक्कारणमेव कणयसिंहासणत्तेण परिणया सूलिगा, पहारावि जाया आभरणत्तेणं, ता सुच्चउ गेहवासवासंगो, अंगीकीरउ एत्तो सबविइ, को हि नाम सुणियामयपाणगुणो विससलिलं पाउमुच्छहेज्जा?, रविणा भणियं-एवं होउ, तओ ते दोवि थेराणं अंतिए पव्वजं गहाय समाराहिथसंपुन्नसमणधम्मा सुरसिक्खसुहभायणं जायत्ति ॥

इय इंदभूइसुणिवर! वीथगुणव्वयमिमं विनिहिट्ठं । एत्तो तइयं वोच्चइ अणत्थदंडस्स विरइत्ति ॥ १ ॥

सो पुण अणत्थदंडो नेअव्वो चउव्विहो अवज्झाणो । पमयायरिए हिंसप्पयाण पावोवएसो य ॥ २ ॥

कंदप्पे कुक्कुइए मोहरियं संजुयाहिकरणं च । उवभोगपरीभोगाइरेगयं चेत्य वज्जेइ ॥ ३ ॥

जेऽणत्थदंडविरया न हुंति तेऽणत्थगाइं जंपंता । पावंति धुवं मरणं लोइयकोरिट्ठमुणिव्व ॥ ४ ॥

जो पुण एसो कोरिट्ठो मुणी जह व मरणमणुपत्तो । तह संपय सीसंतं सबं गोयम! निसांभेसु ॥ ५ ॥

सालिसीसयंमि गामे भहिलो नाम माहणो, सोमदिना य से भारिया, तेसिं च कोरिंटो गो नाम पुत्तो अंचतवि-
रुवो, कहं?—

सुहबाहिचिणिगयदीहविरलदंतगभगउडुडो । करहसिसुपुच्छसत्थविण्णुहुहरोमदोपेच्छो ॥ १ ॥

मज्जारकक्कड्छो अइटप्परकन्नघोरजुयलिकखो । अंचंतकविलदेहो पायडदीसंतनसजालो ॥ २ ॥

संपजंततहाविहभोयणजायंतउदरपूरोऽवि । कयमासुववासो इव अंचंतं किसियसवंगो ॥ ३ ॥

इय सो पुव्वक्कियकम्मदोसओ गाममज्झयारम्मि । दुइसणत्तणेणं हीलाठणं परं जाओ ॥ ४ ॥

एयारिसे य तम्मि जोव्वणपत्ते जणणिजणगेहिं चित्तिं—कहं एस कलत्तभोगी भविस्सइ?, जओ सव्वायरम-
गियावि न सग्गामवासिणो दिति एयस्स कन्नयंति । अन्नया दूरयरगामवासिणो बंभणस्स बहुकुमारी बहुदविण-
दाणपुव्वयं वरिया अणेहिं से निमित्तं, जाए य लगसमए कोरिटंगं कयसिंगारचारुवेसं समादाय गयाइं तत्थ, तत्थ
पारद्धो विवाहोवक्कमो, रइया वेइगा, पज्जालिओ घयमहुसणाहो हुयासणो, पइविट्ठो वेइगामंडवंमि कोरिटो,
तक्खणं चिय दिट्ठो तीए बहुकुमारीए, तं च पलोइऊण सचमक्कारं भणियमणाए—

अहह किमेस पिसाओ इहागओ? अहव रक्खसोवावि? । किं वा कयंतपुरिसो? नहु नहु तत्तोऽवि भीमयो ॥ १ ॥
सहि! पेच्छ पेच्छ कीलेव्व विलइओ दिवसूसणसमूहो । एयंमि पावरूवे कहमवि नेवावहइ सोहं ॥ २ ॥

पारद्धंमि विवाहे लक्खिज्जइ एस धूमकेउव्व । ता भायइ मज्झ मणो सहसा एयंमि दिट्ठमि ॥ ३ ॥ .

सहिंए भणियं-सुयणु ! मा एवमुल्लवसु, एसो तुज्झ पाणनाहो भविस्सइ, तीए भणियं-सहि ! सच्चमेयं ? , एस मे पाणनाहो भविस्सइ ? , तीए भणियं-सहि ! सच्चमेयं होही ? , सहिंए भणियं-को इत्थ विब्भमो ? , वड्डुकुमारीवि जइ परं पराभवित्ति भणिज्जण विसायवसविसप्पमाणतिवसंतावा सणियं सणियमवक्कमिज्जण जणमज्झयाओ पुरोहडा-वडंमि निवड्डिया वेगेण, तओ जाव इओ तओ समीवट्ठियजणविमुक्कहाहारवनिसामणेण धाविओ उत्तारणत्थं जणो ताव अइपरसलिलत्तणेण कूवस्स अवस्संभवियव्वयाए विणासस्स मया एसा, विगयजीविद्या य बाहिं पक्खित्ता कूवयाओ, कओ से सरीरस्स सक्कारो, ताणि य कोरिंटगजणजणगाईणि जणेण हील्लिजमाणमणि गयाणि स-मामं, भणिओ य तेहिं एसो-वच्छ ! कोरिंटग तुह परिणयणनिमित्तं न सो कोऽवि उवाओ जो न कओ; केवलं तुह कम्मपरिणइवसेण सव्वो विहलत्तणं पत्तो, ता मा सुणिहिंसि जहा अम्मापियरो ममं उवेहगाणित्ति, तेण भणियं-पुव्वकयकम्ममेव एत्थ अवरज्झइ, का तुम्ह उवेहा ? , जइ खुज्जओ दूरमूसवियवाह्वि फलं न पावइ ता किं कप्पतरुवरस्स वयणिज्जंति ? , एवं च तेसिं परोप्परोल्लावेण जाया रयणी, अह तेसु निब्भरपसुत्तेसु परमं चित्तपरितावमुव्वहंतो कोरिंटगो नीहरिओ गेहाओ, पयट्ठो तित्थदंसणत्थं, कमेण य दट्ठण सयललोइयत्तिथाइं ग-हिया अणेण कावालियतवस्सिदिक्खा, सुणिओ तहरिसणाभिप्पाओ, सिक्खियाइं भूमिलक्खणपमुहाइं विन्नाणाइं ।

इओ य कुसुमपुरे नयरे अरिमहणो नाम राया, तस्स य पर्यईए चिय दयादाखिन्नविवेयसच्चविसिद्धुद्धिसंगओ सुमई नाम अमच्चो, तेण य राइणा कारावियं महंतं सरोवरं, आरोविओ पालीसु विचित्तरुसमूहो, चउसुवि पोसेसु कयाओ अणाहसालाओ, निरुवियाइं अवारियसत्ताइं, तस्स य सरोवरस्स अचंतभरिअस्सवि विवरदोसेण कइवयदि-
णमेत्तेणवि सुसंतं सलिलमवलोइऊण विसंनेण जंपियं रत्ता-अहो निरत्थओ दव्वखओ जाओत्ति, परियेण भणियं-
देव ! मा संतप्पह, पूरिज्जउ एस सिलाइहिं विवरो, जइ पुण एवं कए न विप्पणस्सइ सलिलं, रायणा भणियं-
एवं कीरउ, तओ तक्खणं चैव कट्टसिलाइट्ठगाहिं पूरिओ सो विवरो, जाए य वरिसयाले निवडंतुहायसलिलधा-
राहिं सरियं सरोवरं, तं कहियं च नरेहिं नरवइणो ।

ताहे तुट्ठो राया पलोयणट्ठा गओ सयं तत्थ । जावउच्छइ खणमेगं उब्भिन्नो ताव सो विवरो ॥ १ ॥

पुणरवि पुव्वपवाहेण पाणियं तेण विवरमगेण । अणिवारियप्पयारं पायाले गंतुमारद्धं ॥ २ ॥

तं दट्ठूण नरिंदो सोगमहासल्लपीडिओ झत्ति । मंताइसत्थकुसलं पुरलोयं वाहरावेइ ॥ ३ ॥

भणइ य तुम्हे सत्थत्थपारया ता केहेह सलिलमिमं । पायाले वचंतं ठाइस्सइ केणुवाएणं ? ॥ ४ ॥

परिचित्तिज्ज सम्मं पयंपियं तेहिं देव ! विन्नाणं । नेवउत्थि एत्थ वत्थुमि अम्ह किं साहिमो तेण ? ॥ ५ ॥

अह नरवइणा भणियं तहावि साहह किमेत्थ कायव्वं ? । मा विफलं चिय वच्चउ सुचिरं वेद्वियं दव्वं ॥ ६ ॥

तेहिं भणियं-देव ! जइ एवं ता नगरस्स वाहिं विदेसियसालासु य पवामंडवेसु य देवमंदिरेसु य पय्हियसमू-
हमीलगेसु य तवस्सिज्जणासमेसु य निरुवेह पुरिसे, पुच्छावेसु य तन्निवासिलोयं विवरपूरणोवायं, जइ पुण तेहिंतो
कोइ कंप्पि उवायं कहेज्जा, राइणा भणियं-साहु जंपियं, बहुयणा वसंधरा, किमिह न संभविज्जत्ति अनुमन्निऊण
तवयणं जहाभणियं सवट्ठणेसु विसज्जिया पुरिसा, ते य जहाभणियविहीए समारद्धा पुच्छिउं ।

इओ य सो कोरिङ्गकावाल्लो इओ तओ देसंतरेसु परिभमतो मंतंतोसहीसंगहं कुणंतो धाउवायखन्नवायप-
मुहदवोवज्जणोवायं परिचिंततो समागओ तमेव पुरं, ठिओ देसियसालाए, सवप्पयारेहिं अपुट्टित्तिकाऊण सविणयं
पुच्छिओ सरोवरविवरपूरणोवायं रायपुरिसेहिं,

एत्थंतरंमि तेणं नियविन्नाणावेलवनडिण्ण । भणियं साहंकारं किन्त्तियमेत्तं इमं मज्झ ? ॥ १ ॥

रायपुरिसेहिं-कहियं-जइ एवं एहि ता नरिंदपुरो । पयडसु नियविन्नाणं लहसु पसिद्धिं धरावलए ॥ २ ॥

एवं च सो वुत्तो समाणो अप्पणो विन्नाणेण तिहुयणंपि तणं व मन्नंतो पट्ठिओ तेहिं समं रायउलं, कमेण य पत्तो
अत्थाणमंडवं, सुणित्तिकाऊण पणमिओ राइणा, दवावियं आसणं, निसन्नो एसो, पत्थावे य पुरिसेहिं निवेइओ
रन्नो तदब्भुवगमो, तओ हरिसवियसियच्छेण भणिओ रन्ना एसो-भो रिसिवर ! करेसु पसायं, पणासेसु सरोवरस्स
विवरं जेण तण्हापरिसुसियसरीरो चउव्विहोवि भूयगामो खुहेण सव्वकालं जहिच्छाए जलप्राणं कुणइत्ति, कोरिं-

दगेण भणियं-महाराय ! केत्तिमेत्तं एयं ? दंसेह तं विवरं जेण तदुच्चियमुयायं सोहमि, एवं वुत्ते दंसिओ सो पएसो, तेणवि तं समंतओ पलोइऊण भणियं-महाराय ! जइ एत्थ विवरे कसिणचउइसीए टणपरकन्नं भंक्कडवन्नं वोक्कडुच्चं तालसरूवं कक्कडयच्छं अइवीभच्छं बंभणगोत्तं संजमवंतं पुरिसं खिवेह दिसिदेवयाण बलिदाणपुच्चंगं नूणं ता मिलइ एस विवरो, न नीरसुवरमइ थेंवपि, एवं तेण कहिए राइणा सव्वत्थ गामागराइसु पेसिया पुरिसा, निभालिउमारद्धा य जहोवइट्टुगुणविसिठ्ठं बंभणं, कत्थवि अपेच्छमाणेहि य तेहिं पडिनियत्तिऊण निवेइयं नरिंदस्स, तओ संभंतचित्तेण भणियं राइणा-भो सुमइअमच्च ! किमेवं अमह धम्मकज्जे निरुज्जमो तुमं ? न संपाडेसि जहोवइट्टु बंभणांति, इमं च निसामिऊण चित्तिं मंतिणा-अहो धम्मच्छलेण पावज्जणं मुद्धलोयस्स, अहो अणत्थदंढपडियत्तणं पासंडियाहमस्स, जं एवंविहं पावट्टाणमुवइसंतेण न गणिओ पंचिदियविणासो न परिचितिओ बंभणहच्चाकलंको न परिकलिओ नियतवल्लोवो, अहवा किमणेणं ? , तथा करेमि जहा पावोवएससमुल्लाववंच्छा इयरलोयस्सवि न जायइत्ति परिभावि-ऊण भणियमणेण-देव ! जारिसो अणेण पुरिसो कावालयिमुणिणा समाइट्टो तारिसो एसो चेव जइ परं हवइ, ता देव ! धम्मट्टाणे एत्थ जइ एसो च्चिय खिणिही ता किमजुत्तं जाएजा ? , इट्ठं धर्मे नियोजये'दिति लोकेऽपि कथ्यते, राइणा भणियं-एवं होउ। अह समागए चउइसीवासरे सो च्चिय कोरिटगो जहोवइट्टुविहिजा “हितं न वाच्यं अहितं न वाच्यं, हिताहितं नैव च भाषणीयम् । कोरिटकः स्नाह महाव्रती यत्, स्ववाक्यदोषाद्विवरं विशामी” ॥१॥” ति

पुणरुत्तं विरसमारसंतो बला चैव पक्खित्तो विवरस्मि पाविओ य विणासति ।

अह सच्चत्थवि नयरे वित्थरियं जहा कयालियतवस्सी । नियजीहादोसेणं पंचत्तं पाविओ विवसो ॥ १ ॥

ताहे सच्चोऽवि जणो भासागुणदोसचिंतणुज्जत्तो । सुमुणिच्च संपयत्तो किमसक्कं मरणभीयाण ? ॥ २ ॥

इय तुज्झ मए काहिओ गोअम ! उच्छिखलुल्लवणरूवो । जमदंडोच्च पयंडो अणत्थदंडो दुहोहकरो ॥ ३ ॥

तिन्निवि (एयाइं मए) भणियाइं गुणवयाइं एत्ताहे । चत्तारिवि सीसंती (सिक्खाइं) निमुणसु तं गोअमसगोत्त ! ॥ १ ॥

सावज्जेयरजोगाण वज्जणासेवणोभयसरूवं । सामाइयंति तेसिं पढमं सिक्खावयं होइ ॥ २ ॥

मणवयणकायदुप्पणिहाणं इह जं न उ विवज्जेइ । सयकरणयं अणवट्ठियस्स तह करणयं च गिही ॥ ३ ॥

सामाइए उज्जुत्ता अविचलचित्ता सुरोवसग्गेऽवि । होति भवपागरामी सत्ता नणु कामदेवोच्च ॥ ४ ॥

जह कामदेवसद्धो संमत्तं पाविओ ममाहिंतो । सामाइए निक्कपो सुरोवसग्गेऽवि तह सुणसु ॥ ५ ॥

चंपानथरीए विजियमंडलो जियसत्तू नाम राया, कामदेवो सेट्ठी, नियनियकम्मसंपउत्ता कालं वोर्लिति, अन्नया य गामाणुगामं विहरंतो अहं तत्थ समोसढो, तओ उज्जाणपालगेहिं विन्नत्तो राया, जहा-देव ! भवियकमलबो-हणदिवायरो चरिमत्तिथयरो सहसंववणुज्जाणे समोसढोत्ति, एवं सोचा रन्ना दिन्नं तेसिं महंतं पारिओसियं, दवाविओ नयरीए पडहगो-जहा नायकुलेकेउणो महावीरस्स भगवओ वंदणत्थं पत्थिवो निगगच्छइ, ता भो

लोगा ! आगच्छेह भगवंतं वंदितं भणिए तक्कालमिलियपुरजणसमेओ ससागओ राया समंतियं । इओ य सो कामेदेवो पासायतलासीणो एगाभिमुहं जणनिवहमवलोइय परियणमापुच्छेइ-किं नं देवाणुप्पिया ! एस पुरजणसमुदओ एगदिसाए नीहरइ ? एयमट्टुवुलभिय साहेह, तेहिं निच्छऊण निवेइयं, जहा-तिहुयणेक्कनाहो जिणो समोसदो तवंदणवडियाए पुरलोणो वच्चइ, तओ सो समुप्पन्नसद्धाइसओ णहाओ चंदणोवलित्तगत्तो चाउरदं-टरहारूढो अप्पमहग्घाभरणभूसिओ सियकुसुमदामोवसोहिओ निग्गओ नयराओ, समोसरणासन्ने य ओइन्नो रहवराओ पमुक्कुसुमदामो परिहरियंतवोलो कयमुहसुद्धी एगसाडीएणं उत्तरासंगेणं चक्खुफासे अंजलि-पग्गहेणं मणसो एगत्तीभावेण य पविट्ठो समोसरणे, तिवसुत्तो आयाहिणपयाहिणं काऊण वंदिओ अहं, उवविट्ठो सट्ठणे, निसामिए धम्मे संजायधम्मपरिणामो संमत्तमूलाइं पंचाणुव्वयाइं तिन्नि गुणव्वयाइं चत्तारि सिक्खावयाइं भावसारं पडिवज्जिय गिहमुवगओ, पालेइ निरइयारं सावगधम्मं । अन्नया य कुडुंबचित्ताए जेट्टुत्तं ठवित्ता पोसह-सालाए पडिमापरिकम्मकरणट्ठा सामाइयं पडिवज्जिय ठिओ रयणीए काउसगणेणं, एत्थंतरंमि तब्भावनिचलत्तं परिकिखुत्तं एणो तस्स समीवे ठाउं सुरो सरोसं इमं भणइ-

रे रे वणियाहम ! धम्मकम्ममेवं समुज्झसु जवेणं । पाविट्ठ कोडहिगारो तुह एरिससाधुचेट्ठासु ? ॥ १ ॥
मा पविसअकाले चिय कयंतमुहकुहरमुग्गदाढिळं । मम वयणं अवगन्नि य पुत्तकलत्ताइपरियरिओ ॥ २ ॥

एवं ब्रुतोवि न जाव कं पिओ सो तया महासत्तो । ताव परुहो देवो गइरूवं विउवेइ ॥ ३ ॥
 तयणंतरमुल्लालियपयंडुडो घणोव्व गज्जतो । वेणेण धाविऊणं गेणइ तं सावयं झत्ति ॥ ४ ॥
 सव्वत्तो गत्तं विइवेइ चलणेहिं पक्खिवइ गयणे । तत्तो निवडंतं पुण पडियच्छइ दंतकोडीहिं ॥ ५ ॥
 एवं बहुप्पयारं तं पीडिय कुणइ भुयगरूवं सो । पच्छा तिव्खाहिं दढं दाढाहिं तणुं विदारेइ ॥ ६ ॥
 तहविहु अखुब्भमाणे गिहिप्पहाणंमि कामदेवंमि । रक्खसरूवं काउं उवसगं काउमारद्धो ॥ ७ ॥
 अह खणमेगं घोरदुहासकरतालतालणं काउं । परिसंतो सो तियसो भत्तीए तयं इमं भणइ ॥ ८ ॥
 भो कामदेव ! सावय तियसोऽहं तुज्झ सत्तनाणट्ठा । एत्थागओ महायस ! ता पसिय वरेसु वरमेत्तो ॥ ९ ॥
 थेवोऽविहु उवयारो विहिओ तुम्हारिसे गुणनिहिंमि । अस्संखसोक्खखंधस्स कारणं होइ निब्भंतं ॥ १० ॥
 एवं भणिओऽवि सुरेण सायरं वरमुणिव्व थंवि । जाव न स कामदेवो कहमवि पच्चुत्तरं देइ ॥ ११ ॥
 ताव नमंसिय चरणे उक्कित्तिय गुणगणं च से तियसो । परमच्छरियमुवगओ जहागयं पडिनियत्तो य ॥ १२ ॥
 इयरोऽवि धम्ममाराहिऊण तइए भवंमि निव्वानं । सायत्ताणंदसुहं पाविस्सइ निहयकम्मसो ॥ १३ ॥
 इय जइ गिहिणोऽवि समुज्जमंति धम्मंमि निचला धणियं । ता उज्झियगिहवासा तवस्सिणो किं पमायंति ? ॥ १४ ॥
 एवं वीरेण जिणेसरेण जइणो पडुच्च वागरिए । सविसेससंजमुज्जयचित्तो जाओ समणसंघो ॥ १५ ॥

इय जह सामाइयनिच्चलत्तणं कामदेवसहेणं । भवभयभीएण कयं अन्नेणवि तह विहेयद्वं ॥ १६ ॥
दिसिवयगहियस्स दिसापरिमाणस्सेह पइदिणं जं तु । गमणपरिमाणकरणं वीयं सिक्खावयं एयं ॥ १ ॥
वज्जइ इह आणयणप्यओगेपेसप्यओगयं चैव । सइणुरूववायं तह बहिया पोगलक्खेवं ॥ २ ॥
इहलोयमिवि पइदिण दिसपरिमाणंमि कीरमाणंमि । उभएवि नो अणत्था सागरदत्तस्स व हवन्ति ॥ ३ ॥
गोयमसामिणा भणियं-जयगुरु ! को एस सागरदत्तो ? कहं वा तस्स दिसिवयपरिमाणसेवणे इहपारभविया-
अणत्थप्यणासो जाओत्ति साहेसु, महंतमिह कोऊहल्लं, भगवथा जंपियं-परिकहेमि, पाडलिसंडे नयरे धणसारस्स
इब्भस्स सुओ सागरदत्तो नाम, सो य असेसवसणसयसंपरिगहिओ दुल्ललियगोटीए परिगओ, तेहिं तेहिं पयारेहिं
दवविणासमायरइ, अन्नया य विणट्ठमि दव्वसारे गओ सो देसंतरेसु, पारद्धा य बहवे दविणोवज्जणोवाया, समासा-
इयाइं कइयवि दीणारसयाइं, तेहिंवि गहिऊण किंपि भंडं गओ सिंधुदेसं, विणिवदियं तं च, उट्ठिओ बहुलाभो,
जाओ से परितोसो, चित्तिउमारद्धो य-अहो किं इमिणा अत्थेण ? जो नियसुहियसयणवगस्स न जाइ विणि-
ओगं ?, ता गच्छामि नियनयरं, पेच्छामि जणगं, समप्पेमि तस्स अत्थसंचयं, दुप्पडियारो खु सो महाणुभावो,
विविहाणत्थसत्थेहिं मए संताविओ य इति परिभाविऊण गहियपवरजच्चतुरंगभो पयट्ठो पाडलिसंडपुराभिमुहं,
अविच्छिन्नपयाणएहिं इंतस्स अद्धपहेच्चिय जाओ वासारत्तो, अणिवारियपसरा निवडिया सलिलवुट्ठी, पवूढा गिरि-

नईओ, नवहरियसहूलं जायं धरणिमंडलं, नियनियगेहाइसु अल्लीणो पहियसत्थो, बहलचिक्खल्लोत्तणेण दुग्गभी-
हूया भूमिमग्गा, तओ सो गंतुमसमत्थो तत्थेव य छाइऊण ठिओ, अन्नदिवसे य चरमाणं तुरंगमाणं अणुमग्ग-
लग्गो जाव किच्चियं भूभागं वच्चइ ताव गिरिगुहागओ एगचलणोवरिनिहियसवंगभारो धम्मनिचओव मुत्तिमंतो
उवसंतपरोपरवेरिहं हरिहरिणसहूलसूयरपमुहतिरिएहिं परिचत्तचरणपाणिएहिं उवासिज्जमाणो चउमासतवोविसेसं
पडिवन्नो दिट्ठो अणेण अज्जसमिओ नाम चारणो सुणिवरो, तं च दट्ठुण परमविम्वहयमुव्वहतेण चित्तिं सागरदत्तेण-
अहो अञ्जरियमञ्जरियं जमच्चंतदुट्ठसत्तावि एवमेयं महासुणिं पज्जुवासंति, न सव्वहा हवइ एस सामन्नविक्रमो, ता
दंसणमवि एयस्स पवित्तयाकारणं, किं पुण विसेसवंदणंति समुञ्जलियनिब्भरभत्तिपभारनिस्सरंतरोमंचो समीवे
गंतूण पंचंगपणिवायपुरस्सरं निवडिओ से चलणेसु, सुणिणावि उस्सगं पाराविऊण भवोत्तिकाऊण धम्मलाभेण
पडिलाभिओ एसो, तओ हरिसवियसियञ्छिणा भणियं सागरदत्तेण-भयवं ! किमेवं अइहुक्करं समायरह तुब्भे तवं ? किं
वा निवसह एवविहे एगंतवासे ?, को वा फलविसेसो एयस्स दुरणुचराणुट्ठाणस्स ?, सुणिणा भणियं-भो महाणुभाव !
एयस्स अवस्सविणस्सरस्स सरिरस्स एस चेव लाभो जमणुट्ठिज्जइ संजमो, एसो य मणसो एगत्तीकरणमंतरेण न सम्मं
तीरइ काउं, अओ एगंतवासो सुतवस्सीहिं सेविज्जइ, जं च तए भणियं-किमेअस्स फलं ?, तत्थ सुंदर ! निसामेसु ।

नरतिरियाइदुग्गइनिवायसंभवसुतिक्खदुक्खाइं । दोगच्चवाहिवेयणजरसरणपमोक्खवसणाइं ॥ १ ॥

लीलाए चिय उम्मूलिऊण सचरियसंजमा पुरिसा । वच्चंति सिवपयं जेण तेण (महयं) फलं तस्स ॥ २ ॥
 एत्तो चिय सप्पुरिसा रज्जं लच्छिं च भोगविच्छडुं । एकपए चिय मोत्तुं संजमजोगं पवज्जंति ॥ ३ ॥
 ते धन्ना कयपुन्ना ते चिय कल्लाणकोसभूया य । जे परलोयसुहावहेमं धम्मं उवचिर्णाति ॥ ४ ॥
 तत्तो सागरदत्तेण जंपियं जायपरमसद्धेण । भयवं ! भुवणच्छरियं एक्कं चरियं परं तुज्झ ॥ ५ ॥
 पढमवए चिय जेणं विणिज्जिओ दुज्जओ विसमवाणो । उम्मूलिओ य मोहो निगहिओ कोहजोहोडवि ॥ ६ ॥
 विद्धंसिओ य लोभो पणासिओ सबहाडभिमाणोडवि । नियडिडुङ्गीगहणं निहडुं ज्ञाणजलणेण ॥ ७ ॥
 एवंविहेण तुमए पवित्तियं तिहुअणपि नीसेसं । भवकूवे निवडंतो जाओ लोगोडवि सालंबो ॥ ८ ॥
 एक्को अहं अघन्नो जो तुच्छेहियसुहस्स कजेणं । अज्जवि तुम्ह समीवे पवज्जं नो पवज्जामि ॥ ९ ॥
 चिंतामणिलाभंमिवि अहवा जो जेत्थिस्स किर जोगो । सो लहइ तत्तियं चिय ता मम उचियं कहह धम्मं ॥ १० ॥
 एवं तेण भावसारं निवेइए निययाभिप्पाए पयडिओ साहुणा सम्मत्तमूलो दुवालसवयसणाहो सावगवम्मो,
 गहिओ अणेण, तओ कइवयवासराइं परिचत्तवावारांतरो तमेव सावगधम्मं सप्पभेयं युणिणो समीवे सम्मं वियाणिऊण
 समागए सरयसमए उवसंतासु गिरिसरियासु बहंतसु पहिएसु ते जच्चतुरए गहाय गओ नियनयरं, दिट्ठो जणगो,
 समप्पियं च से दविणजायं, जाओ य इमस्स परितोसो, सो य सामाइयाइधम्मनिरओ कालं बोलेइ । अवरंमि य वासरे

कओ सागरदत्तेण दिसिगमणसंखेवो, जहा अज्ज अहोरत्तंपि न गेहाओ चाहिं नीहरिस्सामित्ति, एत्थ य पत्थावे
 चरणट्टया गया ते जच्चतुरगा, हरिया दोहिं चोरोहिं, तदवहरणं च निवेइयं रक्खगोहिं सागरदत्तस्स, तेणावि नियय-
 म्माणुट्ठानिच्चलचित्तत्तेण निसामिऊणवि न दिन्नं पच्चुत्तरं, सयणवग्गोवि लग्गो जंपिउं-अहो सागरदत्त ! किमेवं
 कट्टसमो मोणमवलंबिय चिट्ठसि ? न धावसि चोराणुमग्गओ, जओ गोसामिए उदासीणे तयणुचरा कह पयट्ठति ? ,
 सागरदत्तेण भणियं-होउ किंपि, न विराहेमि मणांगंपि नियवयं, तओ निच्छयमुवलम्भ रोसेण जहागयं पडिनियत्तो
 सयणवग्गो, इओ य-ते दोउवि तक्करा पिट्ठओ कुडियमित्तमपेच्छमाणा निम्भया निरुद्धिग्गा गंतुं पयत्ता, गच्छंताण
 य नीसेसतुरगहणलोभदोसेण समुप्पन्नो दोणहंपि परोप्परं वहपरिणामो, तओ भोयणसमए पविट्ठा एगंमि गामे,
 कारावियं रंधणीगिहेसु पुढो पुढो थालीसु भोयणं, पक्खित्तं च अणलक्खिज्जमाणेहिं तत्थ दोहिवि महाविसं, सिद्ध
 य भोयणे कयतक्कालोचियकायच्चा अमुणियावरोप्पराभिप्पाया उवविट्ठा भोयणं काउं, अह पढमकयल-
 कवलणेउवि अभिभूया ते विसविगारेण, निवडिया महीपले, कओ महाणसिणीए कलयलो, मिलिओ गामलोगो, क-
 हिओ अणाए वुत्तंतो, ते य विसाभिभूया गया तक्खणमेव पंचत्तं, तुरंगमावि निस्सामियत्तिकाऊण रक्खिया
 गामजणेण, इओ य-सागरदत्तो पडिपुन्नमि देसावगासियनिग्रमे जिणविंबयूयापडिवत्तिं काऊण कइवयपुरिस-
 पक्खित्तो चलिओ तुरयाणुमग्गेण, अच्चंतविसिट्ठसउणोवलम्भे य जायलामनिच्छओ समुप्पन्नचित्तुच्छाहो अविलंबि-

यगईए संसुहमागच्छन्तं पहिथलोगं तुरयपउत्तिमापुच्छंतो कम्मधम्मसंजोएण पत्तो तं चेव गामं, पुट्ठो य तन्निवासि-
जणो, तेणावि समणिया तुरगा, कहिओ य चोरवुत्तंतो, सागरदत्तेणऽवि साहिओ गामलोगस्स नियमवइयरो, अओ
जिणिंदधम्मपससा ॥

अह सागरदत्तेणं चितियमुप्पन्नभवविरागेण । जह जिणधम्मपभावो पच्चक्खं चिय मए दिट्ठो ॥ १ ॥
ता किं अज्जवि वामूढमाणसो तिकखदुक्खदायारं । घरवासं पासंपिव सयखंडं नेव तोडेमि ? ॥ २ ॥
इय चित्तिज्ज चत्ताइं तेण सव्वाणि पावठाणाणि । गहिया जिणिंददिकखा सिवसुहभागी य जाओ य ॥ ३ ॥
इय इंदभूइ ! सिक्खावयस्स बीयस्स पालणे भणियं । फलमेत्तो तइयं पुण भणिमो सिक्खावयं ताव ॥ ४ ॥ १० ॥
आहारदेहसक्कारवंभवावाचागनिप्फणं । इह पोसहंति वुच्चइ तइयं सिक्खावयं पवरं ॥ १ ॥
दुविहं च इमं नेयं देसे सवे य तत्थ सब्बमि । सामाइयं पवज्जइ नियमा साहुच्च उवउत्तो ॥ २ ॥
अप्पडिप्पडिलेहियऽपमज्जेज्जाइ वज्जइ एत्थ । सम्मं च अण्णुपालणमाहारइसु सवेसु ॥ ३ ॥
पोसेइ कुसलधम्मे जं ताहाराइचागणुट्ठाणं । इह पोसहोत्ति भणइ विहिणा जिणभासिएणव ॥ ४ ॥
पाणंतिगोवसग्गेऽवि पोसहं धेत्तु जे न खंडंति । जिणदासो इव ते सुरसुहाइं भोक्खं च पावंति ॥ ५ ॥
गोयमसामिणा भणियं-भुवणेक्कदिवायर ! को एस जिणदासो ?, भयवया वागरियं-साहेमि, वसंतपुरे नयरे

अंचंतभवविरत्तचित्तो सच्चन्नवद्दुपरमत्थभावियमई जिणदासो नाम सावगो, नावच्च पडिक्कलचारिणी मंगलमुत्तिच्च
तिव्वारागाणुगया मंगलां नाम से भारिया, सो य बहुसो सामाइयपोसहतवोविससनिसेवणाभिरओ पव्वज्जं पडि-
वज्जिउकामो बलतुलणं करेइ । सा य से भारिया अंचंतसंकलिट्ठयाए उक्कडवेयत्तणेण समणं व तं विजियमयण-
वियारमवलोइऊण फरुसगिराए निब्भच्छंती भणइ—

हे सुद्ध ! धुत्तलोएण वंचिओ तंसि विज्जमाणेवि । जो भोगे वज्जित्ता अविज्जमाणं महसि मोक्खं ॥ १ ॥
निछक्खण ! दुरणुचरं तवोविससं निसिंविउं कीस । सोसेसि नियसरीरं ? किं अप्पा वेरिओ तुज्झ ? ॥ २ ॥
जइ तं विसयविरत्तो पढसं चिय ता न कीस पव्वइओ । जाओ ? जमिणिह मं परिणिऊण एवं विडंबेसि ॥ ३ ॥
अह तं ममनिरवेक्खी जहाभिरुइयं करेसि एवं च । अहमवि तुह निरेक्खा जं भावइ तं करिस्सामि ॥ ४ ॥
एवं तीए भज्जायवज्जिए जंपियंमि जिणदासो । उवसमभावियचित्तो महुरगिराए इमं भणइ ॥ ५ ॥
भेइ ! सद्धम्मपरम्महासि निम्भेरसुल्लवसि तेण । तुच्छेऽवि विसयसोक्खे कहऽन्नहा होज्ज पडिबंधो ! ॥ ६ ॥
थोयं जीयं जरमरणरोगसोगाऽणिचारियधसरा । एवं टिएवि कह सुयणु ! कुणसि तं विसयवामोहं ? ॥ ७ ॥
तीए(ता) भणियं होउ अलं तुज्झ सद्धम्मदेसणाए ममं । सयमवि नद्धो दुच्चेट्ठ ! धिट्ठ अन्नपि नासेसि ॥ ८ ॥
इय तीए दुट्ठनिट्ठरसुहीए दुविणयमूलभूमीए । निब्भच्छिओ समणो जिणदासो मोणमल्लीणो ॥ ९ ॥

अन्नया य चउद्दसिदिणमि पडिवन्नो अणेण उववासो गहिउं चउव्विहंपि पोसहं, ठिओ य गिहेगंतभूयाए जाण-
सालाए निंसिमि काउस्सग्गेण, मंगलावि मयरद्धएण वाहिज्जमाणी उडिज्जयकुलाभिमाणा अगणिथाववाया नीय-
गामिणीउ कामिणीउत्ति य पवायं सच्चवित्तिव वडिया सह विडेण, गेहजणलज्जाए पयडं चिय अकज्जमाथरिउ-
मपारयंती पुव्वदिन्नसिंगारेण विडेण सद्धिं रयणीए समागया तं चेव जाणसालं, अच्चंधयारत्तणेण काउस्सग्गट्ठियं
जिणदासमपेच्छमाणीए तंमि चेव पएसे पक्खित्तो लोहकीलगतिकखपइट्ठानो पल्लको अणाए, तक्कीलेणेण य समी-
ववत्तिणो जिणदासस्स विद्धो सहावकोमलो चलणो, सा य विडेण सद्धिमकज्जमायरिउमारद्धा ।

जिणदासो पुण अइतिकखलोहकीलगविभिन्नचलणतलो । उप्पन्नगाढवियणो चित्तिउमेवं समाढत्तो ॥ १ ॥

मा ! जीव काहिसि तुमं मणागमेत्तपि चित्तसंतावं । समयमि दिट्ठे विलिए भज्जाए अकज्जसत्ताए ॥ २ ॥

जं परमत्थेण न एत्थ कोऽपि भज्जा व सयणवग्गो वा । किंतु सकज्जविणासे संधपि परंमुहं ठाइ ॥ ३ ॥

अविय-तावच्चिय दंसइ पणइभावमायरइ ताव अनुकूलं । निययत्थविसंवायं जाव न पेच्छइ पणइलोगो ॥ ४ ॥

ता एयाए धम्मत्थसुन्नचित्ताए एत्थ को दोसो ? । इत्थी सभावओ चिय दुग्गेज्झा वुच्चइ जेण ॥ ५ ॥

अइरक्खियावि अइपालियावि अइगाढरूढपणयावि । बाढं उवयरियाविहु देइ दुरंतं भयं महिला ॥ ६ ॥

एत्तो चिय मुणिवसभा सुबुद्धिमाहप्पमुणियपरमत्था । पच्चक्खरक्खसीहि व महिलाहिं समं न जंपंति ॥ ७ ॥

ता ते चिय इह धन्ना सुलद्धनियजम्मजीवियफला य । जे उज्झिऊण महिला संजमसेल समभिरूढा ॥ ८ ॥
 धन्नो सणकुमारो जो पुरमंतेउरं सिरिं रज्जं । उज्झित्ता निक्खंतो परमप्पा मोक्खसोक्खकए ॥ ९ ॥
 एक्को अहं अधन्नो जो कुलडाए अणत्थमूलाए । दुट्ठमहिलाए कजे एवं वुत्थोऽहि घरवासे ॥ १० ॥
 अहवा समइकंतत्थसोयेणं इमेण किं बहुणा ? । एत्तोवि सच्चविरइं भावेणाहं पवज्जामि ॥ ११ ॥
 इय चिंतिऊण तेणं तिविहंतिविहेण वोसिरिय संगं । पंचपरमेट्टिमंतो पारद्धो सरिउमणवरयं ॥ १२ ॥
 अह पवलचलणपीडोवक्कमियाऊ चइत्तु नियदेहं । भासुरसरीरधारी देवो वेमाणो जाओ ॥ १३ ॥
 आउक्खयंमि तत्तो सो चविऊणं विदेहवासंमि । निट्ठवियकम्मगंठी पाविस्सइ सासयं ठाणं ॥ १४ ॥
 इय गोयम ! निच्चलमाणसस्स जिणभणियधम्मकज्जंमि । जायइ जीवस्स धुवं अकालखेवेण सिवलामो ॥ १५ ॥ ११ ॥
 भणियं तइयं सिक्खावयं इमं संपयं पुण चउत्थं । एदंपज्जसमेयं जह होइ तहा निसामेह ॥ १ ॥
 अन्नाईणं सुद्धाण कप्पणिज्जाण देसकालजुयं । दाणं जईणमुचियं चउत्थ सिक्खावयं एयं ॥ २ ॥
 सच्चित्तिनिक्खवणयं वज्जइ सच्चित्तिपिहणयं चेव । कालाइक्कम परववएस मच्छरिय पंचेव ॥ ३ ॥
 अन्नाईण पयाणं निचंपिय होइ गिहिजणस्सुचियं । जइणो पडुच्च किं पुण पोसहउववासपारणए ? ॥ ४ ॥
 अतिहीण संविभागं नूणमकाउं न जे पजीमंति । ते साहुरक्खिओ इव देवाणवि होंति महणिज्जा ॥ ५ ॥

गोयमेण जंपियं-मुवणत्तयसामिसाल ! साहेसु को एस साधुरक्खिओ?, कहं देवमहणिज्जोत्ति, भगवया वागरियं-
आयन्नसु—अत्थि सयलदिसावलयविकखाया वाणारसी नाम नयरी, ताहिं वसू नाम राया, सव्वतेउरपहाणा वसुमई
देवी, वणियलोयसम्मओ जिणपालिओ सेट्ठी, जिणमई से भारिया, एयाणि चत्तारिवि परमसावगाणि परोप्परं
परुढगाढेप्पमाणि य एक्कचित्तत्तणेणं जिणधम्मं पालेत्ति, अन्नया सेट्ठिणी नरिदपत्ती य पंचवन्नसुरहिङ्कुसुमदहि-
यक्खयसुगंधिगंधधूववासपडिपुन्नपडलकरपरियरियाओ गयाओ जिणालयं, विरइया अणेगविच्छित्तिमणहरा सव्व-
नुबिबाण पूया, तओ विचिच्चथुइथुत्तदंडएहिं सुचिरं जिणं थुणिऊण पयाहिणं दाउं बाहिं नीहरिया, ताहिं एगत्य
पएसे अचंतदुइंसणो मच्छियाजालाभिणिभिणारावभीसणो वणसुहनस्सरंतकिमिसवलययूयप्पवाहो सडियंगुलि-
नासोदो कुट्टवाहिविणदुहो दिट्ठो एगो पुरिसो, तं च दहूण देवीए भणियं-भो महाणुभाव ! कीस सव्वन्नमासा-
यणं इहट्ठिओ करेसि?, तेण भणियं-नाहमेत्थ निवासत्थी समागओ, किंतु चेइयवंदणत्थं, सेट्ठिणीए भणियं-देवि !
जइ इत्तियमेत्तमेव पओयणं पडुच अच्छइ ता अच्छउ, को दोसो ?, जओ सुस्समणावि जाव चेइयाइ वंदंति
वक्खाणं वा करिंति सिणाणं वा पेच्छंति (सिस्साणं वायणं वा पयच्छंति पु.) ताव जिणभवणे निवसंति, देवीए
भणियं-तहावि विणदुसारीरत्तेण न जुजइ एयस्स अच्छिउं, अहवा निट्ठिवाणइ अकरिंतो सम्मसुवउत्तो निमेसमित्तं
जिणविवावलोयेण अप्पणो समाहिमुप्पाएउ, किमजुत्तं ?, सेट्ठिणीए भणियं-एवमेयं, को महाणुभावस्स एयस्स

अवराहो?, दुष्पडियाराणि पात्रकम्माणि एवंविहाहिं विडवणाहिं कयत्थिहिं निस्सरणं पाणिगणं, देवीए भणियं-
अलमुच्चावयभणियेव्वेणं, भो महाणुभाव ! साहम्मिओत्तिकाऊण पूयणिज्जोसि तुमंति ता साहेसु-किं ते पियं की-
रउ?, तेण जंपियं-किमेत्थ कायव्वं अत्थि?, पुर्विं दुच्चिन्नाणं कम्माणं फलविवागमणुहचंतस्स समाहिमरणं चिय मे
पत्थियव्वं, तंपि भागविवज्जएण दुल्लभं व लक्खिज्जइ, ताहिं भणियं-कहमेवं जाणिज्जइ?, कुट्टिणा भणियं-अहं
मंदभग्गो, अइसइणा भणियं-जहा तुमं मरणकाले सम्मत्तं वमिहिसि तेणेमं जाणामि, चित्तसंतावं च उव्वहामि,
ताहिं जंपियं-भइ ! तुह जइ एवं ता विससमावडियंति, एवं च खणमित्तं विगमिऊण विम्बियमणाओ गयाओ
ताओ सगिहं । अन्नमि य वासरे चउनाणोवगओ सूरतेओ नाम सूरी समोसरिओ, तओ सेट्ठिणी देवी य गया
तंवदणत्थं, सुया धम्मकहा, पत्थावे य पुच्छियं ताहिं-भयवं ! पुवं चेइए गयाहिं अहेहिं जो कुट्टी दिट्ठो सो कीस
सम्मत्तं मरणसमए वमिही?, सूरिणा भणियं-सो पज्जंतसमए माणुस्सेसु आउवंधं काऊण उप्पज्जिही, न य गहिय-
सम्मत्तो अणंतरभवे मणुअत्तं तिरियत्तं वा पावइ, जेण भणियं-

सम्मदिट्ठी जीवो विमाणवज्जं न बंधए आउं । जइ उ न संमत्तजडो अहव न बद्धाउओ पुर्विं ॥ १ ॥

रायपत्तीए भणियं-कहिं पुण सो उव्वज्जिही?, सूरिणा जंपियं-एयाए सेट्ठिणीए पुत्ताएत्ति, एवं सोच्चा वि-
म्बियाओ वंदिय सूरिं नियत्ताओ ताओ सगिहं, निरुत्ताविओ भाविपुत्तसिणेहेण सो कोट्टी सेट्ठिणीए, न य कहंचि

दिदो, अहंकेतु य कहवयवासरेसु सो मरिजण पाउब्भओ तोए सेट्ठिणीए गब्भे, जाओ य पडिपुन्नदियहेहिं, कयं वद्धावणयं, समागओ राया सह वसुमईए देवीए, कयमुचियकायवं सेट्ठिणा, तं च देवकुमारोवमं दारयं पेच्छिऊण भणियं देवीए-भो जिणमइ ! पेच्छ अच्छरियरूवं कम्मपरिणहं,

नीणंतपुयपवहो भीसणवणनिस्सरंतकिमिजालो । मच्छीहिं भिणिभिणंतो सडियंगुलि गलियनासोदो ॥ १ ॥

एवंविहो वराओ तुज्झ गिहे पवरविहवकलियम्मि । उववन्नो कयपुन्नो सो कोट्ठी कह विसिट्ठंगो ? ॥ २ ॥

सेट्ठिणीए भणियं-देवि ! एवंविहे संसारविलसिए परमत्थेण न किंपि अच्छरियमत्थि, जओ-कम्मवसवत्तिणो पाणिणो केण केण पयारेण न परिणमंति?, देवीए जंपियं-एवमेयं, अह अहंकेते वारसाहे कयं से नामं साहुराक्खियत्ति, कोलेण य पत्तो कुमारभावं, गाहिओ कलाओ, संपत्तजोवणो सोहणमि तिहिमुत्तंसि परिणाविओ इब्भकन्नंगं, विवाहपज्जेते य समाहूओ सेट्ठिणा देवीए समेओ राया, पूइओ पहाणरयणाभरणवत्थसमण्णेण, पाडिओ ताण चलणेसु नववहूसणाहो साहुराक्खिगो, सो य देवीए सहासं भणिओ-वच्छ ! पेच्छ तं तारिसं इमं च एरिसं, साहुराक्खिएण भणियं-अंब ! न याणामि इमस्स अत्थं, एवं च तेण कहिए हसियं सहत्थतालं परोपरं देविसेट्ठिणीहिं, तओ रत्ता जंपियं-सेट्ठि ! किमेयाओ हसंति?, सेट्ठिणा भणियं-देव ! अहंपि सम्मं न याणामि, जओ ममाप्ति कोउगं, पुच्छउ देवो, तओ पुच्छियं रत्ता-देवि ! किमेवं तए वागरियं?, सवहा साहेहत्तिं वुत्ते तीए

सिटो पुवुत्तो कुट्टित्तो, तं च सोच्चा सुमरियपुव्वभवो साहुरक्खिओ परं निव्वेयभावन्नो संसारवासस्स । अन्नया य तप्पुन्नपन्नभारसमागरिसिओव्व समागओ विजयवोसो नाम सूरी, पउरलोणेण समं सो गओ तव्वंदणत्थं, सविणयं पणमिऊण निसन्नो गुरुचलणंतिए, सुया धम्मदेसणा, तहाविहकम्मक्खओव्वसमेण जाओ से देसविरइयरिणासो, पडिवन्नो य सूरिसमीवे दुवालसरूवो सावगधम्मो, अन्नया य अट्टमीए कओ अणेण पोसहोववासो, इओ य कप्पसमत्तीए विहरिया सूरिणो, सो य पारणगदिवसे पोसहं पाराविऊण उचियसमए अतिहिंसंविभागं काउमणो पडिओ य साहुसमीवे, गेहाओ नीहरंतो य भणिओ जणणीए—वच्च ! कहिं वच्चसि?, मुंजेसु ताव सिद्धं वट्ठइ, साहुरक्खिओ भणियं—अम्मो ! अतिहिंसंविभागवयं पडिवज्जिय कहं गुरुणो असंविभाइय सयं भुंजामि ?, ता वाहरामि ताव साहुणो, तीए भणियं—पुत्त ! विहरिया अन्नत्थ भयवंतो किं न याणसि तुमं ?, एवं तीए कहिए गहिओ सो रणरणएण समाहओ सोगेणं पारद्धो अरइए, नियत्तिऊण य पडिओ मंचिए, चिंतिउमाढत्तो य—

कह पोसहोववासो कओ मए ? कह व विहरिया गुरुणो ? । अन्नं चिंतियमन्नं च निवडियं मंदमग्गस्स ॥ १ ॥

अहवा मरुत्थलीए किं कप्पतरू कयावि उग्गमई । मायंगमंदिरे वा छज्जइ अइरावणो हत्थी ? ॥ २ ॥

आजम्मरोरगेहे विसट्ठकंदोदुदलविसालच्छी । लच्छी कयावि पविसइ करयलेरंहंतसरसिद्धहा ? ॥ ३ ॥

अम्हारिसस्स किं वा पुन्नविहीणस्स एत्थ पत्थावे । अधरियिचित्तमणिणो सुणिणो भिक्खट्टया इति ? ॥ ४ ॥
सग्गापवग्गसंसग्गमूलेऊवि मज्झ पावस्स । एवं च निरण्वंधो मन्ने सम्मत्तलाभोऽवि ॥ ५ ॥

इय सो जाव अट्टहुट्ठो सोगससुदयरुद्धकटो अब्बइ ताव जणणीए पुणो भणिओ-अहो पुत्त ! मा चिरावेहि,
केरुसु भोयणंति, साहुरक्खिएण भणियं-अम्मो ! अलाहि भोयणेण, जइ समणे एत्थ पत्थावे सहत्थेण न पडि-
लाभेमि ता निब्भंतं न भुंजामि, एत्थंतरे तेइसमागएण दिट्ठो सो देवेण, तओ चित्तियमणेण-अहो महाभागस्स
परिणइ अहो निययसरीरनिरवेक्खया, ता तहा करेमि जहा पारेइत्तिविगण्णिऊण अणेण विउच्चिओ साहुसंघाडो,
पविट्ठो तस्स गेहे, तं च पेच्छिऊण ससंभमं भणियं जणणीए-पुत्त ! तुह पुट्ठोदएण आगया कत्तोऽवि साहुणो,
ता एहि सहत्थेण पडिलाभेसु संपयं, एवं सोच्चा अणणसरिसं हरिसुल्लासं वंहतो झत्ति परिचत्तसयणिज्जो वंदिऊण
तवस्सिणो परमभत्तीए पडिलाभिऊण य कयकिच्चमप्पाणं मन्नंतो केत्तियंपि भूभागमणुगमिय नियत्तिओ सगिहं,
गिलाणाइचित्तं च काऊण जिमिओत्ति । एवं सो उभयलोगसाहो जाओ ।

इय गोथम ! संखेवेण तुज्झ कहियाइ बारस वयाइं । एत्तियमेत्तो य इमो सावधम्मस्स परमत्थो ॥ १ ॥
एयस्स सेवणेणं गंतूण भवन्नवस्स पज्जंतं । पत्ता अणंतजीवा सासयसोक्खंमि मोक्खंमि ॥ २ ॥
ते धन्ना सण्णुरिसा तोहिं सुलद्धं च माणुसं जम्मं । जे भावसारमतुलं एयं धम्मं पवज्जंति ॥ ३ ॥

ता गोअम ! जं तुमए पुवं पुट्टोसिंह कह भवम्मि जिया । पुणरुत्तमणंतदुहोहपीडिया परिभमंतित्ति ? ॥ ४ ॥
 तत्थेमं चिय नणु मूलकारणं जन्न सहरिसं विरइं । सम्मत्तगुणसणाहं भणियविहाणेण गिणहंति ॥ ५ ॥
 एवं कहिए तित्थंकरेण गिहिधम्मवित्थरे तुट्टो । पयवीढलीढसीसो पढमो सीसो जिणं थुणइ ॥ ६ ॥
 जय तियलोयपियामह ! वम्महमाहप्पनिहलणधीर ! । ललणासिंगारुम्भडकडखखेवेडवि अक्खुम्भ ! ॥ १ ॥
 भवगत्तपडंतजणोहसरण रणरहिय महिय तियसेहिं । नायकुलंवरपुन्निममयंक ! जय जय निरायंक ! ॥ २ ॥
 एगेणवि जह तुमए पयत्थसत्था जए पवित्थरिया । तह अन्नतित्थिएहिं न समत्थेहिवि मणागंपि ॥ ३ ॥
 तुह अत्थसारलेसं मन्ने रोरव तित्थिया धेत्तुं । जाया अनन्नमाहप्पगव्विया नाणविभवेण ॥ ४ ॥
 जं न हणिज्जइ दिणयरकरप्सरपईवजोइरयेणहिं । चित्तम्भंतरलीणं तंपि तमं पहु ! हयं तुमए ॥ ५ ॥
 असरिसं जयगुरुगुरुभत्तिपभावनिस्सरंतरोमंचो । इय थोऊण निविट्टो सट्टाणे गणहरवरिट्ठो ॥ ६ ॥
 एत्थंतरे दुवालसवयेदसणानिसामणसमुप्पन्नभववरगेहिं केहिवि पडिवन्ना देसविरइं, अन्नाहिं उज्झियाइं मिच्छत्त-
 कायच्चाइं, केहिवि गहिया सब्बविरइं । इओ य सेणियनरिंदो थोवमेत्तंपि विरइं काउमसमत्थो तित्थाहिंवं पणमिऊण
 भणिउमाढत्तो-भयवं ! जो अच्चंतमहारंभो महापरिगहो सब्बहा विरइरहिओ सो कंहं भवन्नवं नित्थरिस्सइ ? ,
 जयगुरुणा भणियं-भो नरिंद ! सेणिय ! देसविरइं वा सब्बविरइं वा काउमपायंतो सम्मत्ते निच्चलो होज्जा, एवं

जयगुरणा उवइष्टे तहत्ति पडियज्जिऊण जहाणयं पडिगओ राया नमतमउलिमंडलो, देवलोगं पट्टिया आखंडला, विइकंता पढमा पोरसी । अह चारणगणेहिं थुवंतो जयगुरू सिंघासणाओ समुट्टिऊण पुवं चिय सुरविरहयमि देवच्छंदयमि सुहसेज्जाए निसन्नो । गोयमसामीउवि कण्पोत्तिकाऊण भगवओ मणिपायपीढासीणो धम्मदेसणं काउमारद्धो । सो य केत्तियं पुव्वभवाइं साहइ ? केरिसो वा लक्खिज्जइ ? तत्थ भन्नइ—

संखाईए उ भवे साहइ जं वा परो उ पुच्छेज्जा । न य णं अणाइसेसी वियाणइ एस छउमत्थो ॥ १ ॥

असुरसुरखयरकिन्नरनरतिरिया मुक्कसेसवाचारा । सबणंजलीहिं तद्देसणामयं परिपियंति दढं ॥ २ ॥

आइक्खइ गणनाहो धम्मं ता जाव पोरिसी बीया । पच्छा पइदिणकिच्चं सामाथारिं समायरइ ॥ ३ ॥

एवं च समइक्कंतेसु कइसुवि वासरेसु एयमि वासरे सिंहासणे निसन्नस्स वद्धमाणस्स नियनियट्ठाणनिविट्ठे चउ-
विहेवि देवनिकाए पंजलिउडं पज्जुवासमाणे य सेणियमहानरिंद एगो सुरो मायासीलयाए कुट्टिरूवं विउवि-
ऊण सरसगोसीसचंदणरसच्छडाहिं सरिरविणिस्सरंतपूयसंकाकिणीहिं भयवओ समीवमल्लीणो चलणकमलवि-
लेवणं काउमारद्धो, तं च तहाविहं दुगुंणिज्जरूवं पेच्छिऊण चित्तियं सेणिएण-अहो को एस दुरायारो गलंत-
गाढकोढसुडियसरीरदुगंगंधगंधोहेण दूमितो सरिसं भुवणेक्कगुरुणो समीवट्टिओ एवं अचासायणं
कुणइ ?, अहवा कुणउ किंपि ताव उट्टियाए पुण परिसाए अवस्सं मए निग्गहियव्वोत्ति विकण्पतेण छीयमाणेण

अह कोटियसुरेण भणियं-जीवसुत्ति, मुहुत्तरे य बोलीणे छिक्कियमभयकुमारेण, पुगो तेण भणियं-जीवाहि वा मराहि वा, कालसूयरिएण छीए भणियं-मा जीव मा मर, समइक्कंते य खणंतरे भुवणेक्कगुरुणा छीयं, भणियं-मर-सुत्ति, तं च सोच्चा अच्चंतजिणनाहपक्खवाएण वियंभियपवलकोवानलेण राइणा भणिया समीववत्तिगो पुरिसा-अरे एयं दुरायारं गुरुपच्चणीयमुट्ठियाए परिसाए हत्थे घेत्तूण मे समप्पेज्जह जेण दंसेमिदुव्विणयफलं, तेहिं भणियं-जं देवो आणवेइत्ति, अह जायंमि पहरपज्जवसाणे सट्ठाणं पट्ठिएसु तियसेसु सो कुट्ठिसुरो जयगुरुं परमायेण पणसिऊण गंतुमारद्धो, ते य पुरिसा नरिंदाएसमणुवत्तंता तं घेत्तुमुवट्ठिया, तयणंतरं च एस गओ एस गओ सो कुट्ठा एवमु-ल्लवंताण रायपुरिसाण पुरओ देवो अहसणं पत्तो, [इय वाहरंतेहिं] तेहिं विलक्खीभूयमाणसेहिं निवेइयमेयं राइणो, अह वीयदिवसे परमकोऊहलमुव्वहंतेण रत्ता पत्थावे पुच्छिओ जयगुरू-भयवं! अइक्कंतवासरे तुम्हं समीववत्ती कुट्ठ-विलीणकाओ अविभावणिज्जसरूवो को पुरिसो आसि?, भयवया जंपियं-महाराय! देवो, सो संपयं ददुरंक्कविमाणे समुण्णन्नो, रत्ता भणियं-कहं चिय?, भगवया वागरियं-निसामेसु,

अत्थि वच्छाविसए कोसंबी नाम नयरी, तहिं च सयाणिओ नाम नरवई, साड्डयगो नाम माहणो, सो य ज-म्माणंतरमेव रुंददारिद्रोवद्दवपीडिओ कहकहवि कणवित्तीए कालं गमेइ, अन्नया य आवन्नसत्ताए खरमुहीनायाए भज्जाए भणिओ एसो-भो बंभण! आसन्नो पसवसमओ, न य घरे घयंतदुलाइं अत्थि, ता कीस निच्चितो चिट्ठसि?

तेण भणियं-भेइ ! पइदिणभिकखाभमणेण नट्ठा मे बुद्धी, ता तुमं चेव साहेसु को एत्थ पत्थोवे दवज्जणोवाउत्ति ? , तीए भणियं-गच्छ, पत्थिवं ओलगेसु सवायेरण, न तं विणा अण्णिज्जइ दालिंदति वुत्ते सो पइदिणं कुसुमहतथो पत्थिवं ओलगिउमाढत्तो, अन्नया य अणुक्कलयाए विहिणो से विणयमवलोइऊण तुट्ठो राया, भणियं च तेण-भो बंभण ! मग्गसु जहिच्छियंति, तेण भणियं-देव ! वंभणिं आयुच्छिऊण मग्गामि, अणुमन्निओ रत्ता गओ गेहंमि, भणिया वंभणी-भेइ ! तुट्ठो राया, ता साहेसु किमहं पत्थेमि ? , तीए भणियं-पइदिवसमग्गासणे भोयणं दीणारं दक्खिणाए दिणमज्जे एगवारं ओसारं च पत्थेहि, एत्थियमेत्तेण चेव तुज्झ पओयणं, किमन्नेण किलेसायासनि-बंधणेण आहिगाराइणत्ति ? , पडिस्सुयमणेणं, निवेइयं च एयं रत्तो, पडिवन्नं च तेण, एवं च राइणो पुरो पइदिणं भुंजमाणो जाओ सो महाधणो, रायाणुवित्तीए य पइदिणममंतिज्जइ भोयणकरणे य संतिसामंतेहिं, दक्खिणालोभेण य सो गले अंगुलीपक्खेवपुव्वयं पुव्वभुत्तभोयणं वमिऊण पुणो पुणो अवरारविहिहेसु भुंजमाणो गहिओ कुट्टवाहिणा, संभिन्ना सेववि तस्स सरीरावयवा, दुइसणोत्ति पडिसिद्धो राइणा, तट्टाणे से पइदिओ जेइपुत्तो, सो य रायउलमि भोयणं लहइ, इयरो य वेलाए भोयणमेत्तमवि अपावमाणो पुत्तेहिं एगंतपरिचत्तो परिभूयमण्णं कलिऊण हिययंतो अमरिसमुव्वहतो चित्तेइ-अहो अकयन्नओ खलसहावो य पुत्ताइपरियणो जेण मं एवं परिभन्नइ, ता तहा करेमि जहा एयस्सवि एसा अवत्था हवइत्ति चित्तिऊण वाहराविओ तेण जेइपुत्तो, भणियो य-वच्छ ! वहरोगमरविहुरियस्स

तुम्हारिसमुहकमलपलयेणेऽपि असमत्थस्स मे न जुज्झइ खणंपि जीविउं, केवलं वच्छ ! अम्ह कुले एस समागारो-
 मंतेहिं पसुं चिरमभिमंतिऊण कुंडुवस्स भक्खणत्थं पणामिज्झइ, पच्छा अप्पा उवसंहरिज्झइ, एवं कए पुत्ताइसंता-
 णस्स कल्लणं हवइ, ता संपाडिज्झउ मे एक्को पसू जेणऽहं तहा करेमि, परितुट्ठेण समप्पिओ पुत्तेण, तेणाच्चि वधा-
 इणा अप्पाणं अब्भंगिऊण उच्चलणियाओ पइदियहं मुंजावत्तेण कुट्टवाही संचारिओ तस्स, वाहिसंभिन्नगतं च तं
 मुणिऊण आहूओ तेण जेट्टपुत्तो, भणिओ य-पुत्त ! एस पसू मए अभिमंतिओ वट्ठइ, ता तुमं सपरियणो एयमंस-
 सुवमुंजसु जेण कल्लणभागी भवसि, अहंपि सरीरचायं करेमि, तहा कयं पुत्तेण, संकंतो य तम्मंसभोयेणेण सपरि-
 यणस्स तस्स कुट्टवाही, तओ पहिट्टुहियओ सो निग्गओ नयराओ, पइदिणं गच्छमाणो पत्तो महाडविं च, तत्थ य
 गिम्हुम्हकिलंतो तण्हासुसियकंटो सलिलन्नेसणत्थं इओ तओ परिब्भमंतो गओ एगं गिरिनिगुंजं, दिट्ठं च तत्थ विचि-
 त्तकसायतरुत्तपुप्फफलरसपागकलिलं सलिलं, तं च आकंटं पीयमणेण, तवसेण य जाओ से विरेगो, निवडियाइं कि-
 मिजालाइं सुज्झिउमारद्धं सरीरं, एवं च अणुदिणं तप्पाणेण पणट्टुकुट्टवाही जायपुणन्नवसरीरो नियत्तिऊण गओ
 सगिहं, तहिं च गलंतकुट्टविणट्ठदं पुत्ताइपरियणं दट्ठूण सामरिसं जंपियं तेण-अरे पेच्छह निग्रदुच्चलिसियाणं
 कडुवियागं, तेहिं भणियं-कहं चिय ? एवं पुच्छिए तेण सिट्ठो पुव्वबुत्तंतो । ताणि य एवमायन्निऊण रुट्ठाइं अक्को-
 सिउमारद्धाइं । कहं चिय ?—

रे पावकम्म ! निग्घण ! चिलायसमसील ! एरिसं काउं । अज्जवि अम्हाण पुरो कह निययणं पयासेसि ? ॥ १ ॥
मायंगणवि अणुचियमेवंविहकम्ममायंतेण । नरयंमि पाडिवाओ कुलकोडीओ असंखाओ ॥ २ ॥
दुज्जम्मजाय ! तुमए लोयपयाओऽवि एस किन्न सुओ । जं सकरवाडिओ विसतरुत्ति नो छिदिउं जुत्तो ? ॥ ३ ॥
इय गेहज्जेण बहुप्पयारदुव्वयणदूमियसरीरो । तत्तो विणिक्खमित्ता संपत्तो एत्थ नयरम्मि ॥ ४ ॥

खुहाभिहओ य अल्लीणो नयरदुवारपालस्स, तेणावि किंपि भोयणविसंसं दाऊण भणिओ-अरे इह दुवारदे-
वयाए समीवाडिओ चिट्ठेज्जासु जाव अहं भयवंतं महावीरं वंदिऊण आगच्छामिन्ति, पडिबन्नं च तेण, इयरोऽवि
आगओ मम वंदणत्थं, तत्थ य पत्थावे ऊसवविसंसयसओ पुरनारीजणो बलिपूयलियाईहिं तीसे दुवारदेवयाए पूयं
करेइ, सो य माहणो रोरव अच्छिन्नवंछो तं बलिं भक्खिऊण पकामाहारेण रयणीए समुप्पन्नतण्हो अइभरियपो-
टुत्तणेण अंतो अमायंते सलिलंमि अट्टज्झाणोवगओ मरिऊण इहेव नयरादूरवत्तिणीए पउरजलभरियाए वावीए
दहुरो जाओ, तत्थ य जाव पज्जत्तीभावमुवागओ ताव निसामेइ जलवाहिविलयाणं परोषपरोल्लवं, जहा-हले ! हले
सिग्घं पयच्छसु मे मगं जेण कयकायवा झत्ति भयवंतं महावीरं वंदामिन्ति, एयं च सुणंतस्स कत्थवि मए एस
सदो सुयपुव्वोत्ति ईहापोहमगणं कुणंतस्स समुप्पन्नं से जाईसरणं, सुणिओ पुव्वजम्मो, तओ अहंपि तं भयवंतं
वंदामिन्ति चिंतिऊण भत्तीए नीहरिओ वावीओ, पयट्ठो आगंतुं रायमगगेण, तक्खणं च तुह तरलतुरयखरखुरण-

हारज्जरियसरीरो सुहज्जवसायवसेण मओ समानो दहुंके विमाणे देवत्तणेणमुप्पत्तो, अवहिमुणियपुद्गयइयरो य मम वंदणत्थं आगओ । ता देवाणुप्पिया ! न एस कुट्ठी, किंतु-सुरोत्ति ॥

सेणिएण भणियं-भयवं ! कीस पुण इमेण मया छीए भणियं-जीव, अभयकुमारेण छीए-जीव वा मर वत्ति, कालसूयरिएण छिक्किए-मा जीव मा मर, तुब्भेहिं छीए भणियं-मरसुत्ति, जयगुरुणा जंपियं-सुणासु एत्थ कारणं-तुमं हि जीवमाणो रज्जसुहमुवमुंजसि, मरणे य नरयं गमिस्ससि, अओ अणेण महाणुभावेण भणियं-जीवसुत्ति । अभयकुमारोऽवि धम्मनिरत्तणेण सावज्जवज्जरई ता तस्स जीवमाणस्स रायलच्छिभोगो मयस्सवि सुरसोक्ख-लाभो, अओ जंपियं जीव वा मर वत्ति, कालसोयरिओऽवि जीवमाणो अणेगनिरवराहपाणिगणघायेणण बहुं पावम-ज्जिणइ, मओ पुण नियमा नरयगामी, तेण भणियं-मा जीव मा मरत्ति, अवि य—

अइहुट्ठकम्मवसओ अवस्स गंतव्व नरयठाणेण । नरनाहाईण परं जीवियमेक्कं हवइ सेयं ॥ १ ॥

तवनियममुट्ठियाणं कल्लाणं जीवियंमि मरणंमि । जीयंतऽज्जंति गुणा मयावि पुण सोग्गइं जंति ॥ २ ॥

अहियं मरणं अहियं च जीवियं पावकम्मकारीणं । तमसंमि पडंति मया वरं वहुंति जीवंतां ॥ ३ ॥

जं च मए छीयंमि मरसुत्ति भणियं तत्थवि इमं निमित्तं-तुमं किमिह मच्चलोए विविहावयानिगसभूए वससि?, जं न माणुस्सं विग्गहमुज्झिऊण एयंतसुहं सिवं गच्छसिन्ति ।

अहं सेणियनरिंदो पुवुत्तनरयनिवडणायन्नणजायगाढसोगावेगो भणिउं पवत्तो-भयवं ! समग्गभुवणत्तयरक्खाव-
बद्धलक्खे तुमंमि सामिसाले किं मए नरए गंतवं ? जेण—

तुह नाममेत्तसंकित्तणं पि नासइ दिणुब्भवं पावं । कमकमलपलोयणमवि विणिवारइ दुरियरासिपि ॥ १ ॥

एक्केणऽवि तुह चलणोवारिंमि खित्तेण नाह ! कुसुमेण । चोज्जमिणं रुंदाणिवि नरयदुवाराइं रुज्झंति ॥ २ ॥

एक्कोऽवि नमोक्कारो कीरंतो तुज्झ सामि ! भत्तीए । जायइ हेऊ सग्गापवग्गसंवाससोक्खाणं ॥ ३ ॥

ता वाहिरोगसोगुब्भवाइं दुक्खाइं नाह ! विलसंति । जाव न सवणपुडैहिं पविसइ वयणामयं तुज्झ ॥ ४ ॥

तां कह णु नाह ! तुह नाममंतसारक्खेरहिं चितंतो । सेलुवुक्किन्नेहिवि होज्जा मे नरयदुहलाभो ? ॥ ५ ॥

दुग्गइगत्तभंतरपडंतलोकएक्कसाहार । नाहे तुमएवि ममं एवंविहवसणमावडियं ॥ ६ ॥

धी धी निरत्थयं मज्झ जीवियं मंदभगसिरमणिणो । जं एरिससामग्गीयवि जस्स इमा दुग्गइ जाया ॥ ७ ॥

इय एवंविहअइगाढसोगविगलंतनयणसलिलेण । नरवइणा जयगुरुणो विन्नत्तं नरयभीएण ॥ ८ ॥

एवं च ससोगजंपिरं पुहइवइं अवलोइऊण करुणाभरमंथरनयणेण भणियं जिणेण-भो देवाणुण्णिय ! कीस संता-
वमुववहसि ? जइविय सम्मत्तलाभाओ पुवमेव निवद्धाऊत्ति नरए निवडिस्ससि तहावि लद्धं तुमए लहिअवं, जओ

खाइगसम्मदिट्ठी तुमं, आगमिस्साए य उस्सप्पिणीए तत्तो उवट्ठित्ता पउमनाभनामो पढमत्तिथयो भविस्ससि ।
एवं निसामिऊण पहिट्ठो राया भणिउमाढत्तो—

जइ तित्थयो होहामि नाह ! तुह पायपूयणपसाया । ता थेवकालिया नरयेवणा मज्झ किं काही ? ॥ १ ॥
किं चोजं जयबंधव ! जं तुह सरणेवि मारिसेहिं लहुं । भुवणब्भुयभूयाइं सामिय ! सोक्खाइं लब्भंति ? ॥ २ ॥
अहवा किं सोऽवि प्हू संविज्जइ जोगयंपि दट्ठण । जो अत्तणो न तुछं देइ पयं सेवगजणस्स ॥ ३ ॥
एवंविहवरकल्लाणदायगं जाणिउं पि जो न तुमं । सेवेइ जो न मणुओ सो नूणं अत्तणो सत्तू ॥ ४ ॥
एवं सुचिरं जयगुरुं अभिनेदिऊण नयरं पविट्ठेण सेणिएण वाहरिओ मंति सामंत अंतउरपमुहो जणो, भणिओ
य-जो जयगुरुणो समीवे पव्वजं पडिवज्जइ तमहं न वोरमि, एवं सोच्चा वहवे छुमारा मंतिणो सामंता अंतउरीजणो
नायरलोगो य निक्खंतो भयवओ समीवे, कइवयदिणावसाणे य अणेगाहिं देवकोडीहिं अणुगम्ममाणो भगवं वद्ध-
माणो बहिया विहरिउमारद्धो ।

एगया तद्दिणदिक्खियाणंपि थेवपव्वजापजायाणं मुणीणं केवलनाणमुपज्जमाणमवलोकूण जायंससओ जयगु-
रुमापुच्छइ-भयवं ! किमहं केवलालोयभागी भविस्सामि न वा ?, सामिणा जंपियं-भो देवाणुप्पिय ! मा संतप्पसु,
अंते तुल्ला भविस्सामोत्ति, इमं सोच्ची तुट्ठो गोयमो । अह भयवं तेसु तेसु पुरागराइसु अइमुत्तयलोहज्झयअभय-

कुमारधन्वसालिभद्वंदयसिवपमुहं भवजगं पद्माविज्जणं चंपापुरिं वचंतो विन्नविओ सालमहासालरायिसीहिं-
सामि ! तुम्हाणुणाए अम्हे पिट्ठिचंपाए जामो, जइ पुण तहिं गयाणं सयणवग्गस्स सम्मत्ताइलाभो जायइत्ति वुत्ते
गोअमसामीं नायगं तेसिं दाऊणं भुवणिक्कबंधवो गओ चंपापुरिं, तहिं च पुव्वक्कमेण विरइयंमिं समोसरणे निसन्नो
जयगुरू, आगओ चउद्विहो देवनिकाओ नयरजणो य, पत्थुया तित्थाहिवइणा धम्मदेसणा, तत्थ केणइ पत्थावेण
सामिणा इमं वागरियं-जो नियसत्तीए अट्ठावयं विलग्गइ सो तेणेव भवेण सिज्झइ, इमं च सोचा विम्बियमणा देवा
अन्नमन्नस्स कहिउं पवत्ता । इओ य गोअमसामीं पिट्ठिचंपाए नयरीए सालमहासालाणं भगिणीसुयं गांगलिनरिंदं जण-
णीजणगसमेयं पद्माविज्जणं इयरजणं च धम्मे ठाविज्जणं चंपानयरीहुत्तं गंतुं पयट्ठो, तेसिं च सालमहासालाणं अम्मापि-
उसमेयस्स गांगलिसुणिणो य सुहज्झाणवसाओ समुप्पन्नं केवलं नाणं, एवं ताणि उप्पन्नानाणि अलंकिखयसरूवाणि
मग्गंमि इति । अह गोअमसामीं तं जयगुरूवइट्ठं अट्ठावयारोहसिद्धिंलाभरूवं देवपवायं सुणेइ, तेण य विम्बियहियओ
पत्तो जिणंतिंयं, तओ तिपयाहिणापुव्वयं पणमिज्जणं जयगुरूं जाव मग्गओ पलोयइ ताव सालमहासालाइणो सामीं
पयविखणेउं 'नमो तित्थस्स'त्ति भणित्ता केवलपेरिसाभिमुहं पट्ठिए दट्ठूणं भणइ-भो भो कहिं वच्चह ?, एत्तो एह,
सामीं वंदहत्ति, सामिणा भणिंयं-गोअम ! मा केवली आसाएहि, ताहे सो खामेइ, संवेगमुग्गओ चित्तेइ य-अहो
इमेहिं महाणुभावेहिं थेवपव्वज्जापज्जाएणवि पाविंयं पावणिज्जं, अहं पुण सुचिराणुचरियसामन्नोऽवि न केवलालो-

यमुवलमामि, ता किमिह कीरइ?, अहवा किमणेण चिंतिएण?, वच्चामि अट्ठावयं, जेण देवेहिं इसमाइहुं-जो किर
 ससत्तीए अट्ठावयमारोहइ सो तेणेव भवेण सिज्झइत्ति, एवं च चिंतयत्तस्सं तस्स अभिप्पायं अट्ठावयकडगवासि-
 तावसोत्तरारं च सुणिऊण भणियं जिणेण-भो गोयम! चेइयवंदणट्ठमट्ठावयसेलं वच्चसुत्ति, तओ भयवं गोअमो पहि-
 ट्ठहियओ पट्ठिओ अट्ठावयं, तहिं च अट्ठावए तमेव सुरप्पवायं निसामिऊण पत्तेयं पंचपंचतावससयपरि-
 वारा कुंडिन्नदिन्नसेवालथनामानो तिन्नि कुलवइणो जहक्कमचउत्थळट्ठुमपारणगदिणेषु सचिच्चकंदमूलाइपरिसडि-
 यंपडुपत्तसुक्केसेवालभोइणो पढमवीथतइयमेहलासु समारूढा समाणा तक्खणं चिय तरुणतरणिभासुरोदारसरीरं
 गोयमसामीं तं पएसमणुपत्तं दट्ठूण जंपंति-अहो किमेस पीवरसरीरो समणो आरुहिही जं अम्हे महातवस्सिणो
 तवकिसियसरीरा न तरामो आरुहिउं?, एवं च तेसिं जंपंताणं भयवं गोअमो जंवाचारणलद्धीए लूयातंतुरविकर-
 मेत्तंपि निस्साए काऊण अविलंबियगईए समारूढो अट्ठावयं, अह तंमि चक्खुगोयरमइक्कंतंमि ते तिन्निवि कुल-
 वइणो विम्बियमाणसा चिंतंति-जइ एस महप्पा इमिणा पहेण ओयरइ ता वयमेयस्स सिस्सा भवामोत्ति, गोअ-
 मसामीवि उसमाइजिणिंदे वंदिऊण ईसाणदिसिविभागे असोगतरुतले मणिसिलापट्टए तं रयणीवासमुवगओ ।
 एत्थ य पत्थावे वेसमणो नाम सक्कदिसापालो चेइयपूयाए पज्जेते गोअमसामीं वंदित्ता समीवे निसीयइ, भयवंपि
 समणगुणे सवित्थरं कहइ, जहा-भयवंतो साहवो अंताहारा पंताहारा विचिच्चतवक्किसियेदेहा हवंति इच्चाइ, वेस-

मणो चित्तेह-एस भयवं एरिसे साहुगुणे कहेह, अप्पणा उ तं सररिसरिसुवहइ जा तियसानवि नत्थि, इमं च तदभिप्पायं मुणिऊण गोयमसामी पुंडरीयज्झयणं परूवेइ । जहा—

पुंडरिगिणीपुरीए राथा नामेण आसि पुंडरिओ । कंडरिओ से भाया पव्वज्जं सो पव्वन्नो य ॥ १ ॥

अइदुकरयाए संजमस्स सो अन्नया पराभग्गो । पव्वज्जं मोत्तुमणो विसयपिवासाए पारद्धो ॥ २ ॥

गुरुकुलवासं चेच्चा समागओ भाउणो समीवमि । तेणाविह सो नातो जहेस रज्जं समीहेइ ॥ ३ ॥

ताहे पुंडरिएणं निययं रज्जं समप्पियं तस्स । तवेसो पुण गहिओ चलिओ य गुरुस्स पासमि ॥ ४ ॥

गच्छंतो स महप्पा अणुचियआहारदोसओ मरिउं । सुद्धज्झवसाणाओ उवचियेदेहोऽवि उववन्नो ॥ ५ ॥

सवट्ठविमाणंमि इयरो पुण गाढाकिसियगतोऽवि । रुद्धज्झवसाणाओ सत्तममहिनारगो जाओ ॥ ६ ॥ जुम्मं ।

ता भो देवाणुप्पिय ! किसत्तमियरं च एत्थ नो हेऊ । किं तु सुहज्झवसाणं तं पुण जह होइ तह किच्चं ॥ ७ ॥

इय गोयमेण भणिए सो देवो मुणियमाणसविगण्णो । वंदित्ता भत्तीए जहागयं पडिनियत्तोत्ति ॥ ८ ॥

गोयमसामीऽवि निसावसाणे जिणनिंवाइ नमसिऊण नगवराओ ओयरंतो हरिसुन्नामियकंधरोहिं सविणयं विन्नत्तो तावसेहिं-भयवं ! अम्हे तुम्ह सिस्सा तुम्हे अम्ह धम्मगुरुणो, ता पसीयह दिक्खादाणेणं, गणहारिणा जंपियं-भो महाभावा ! तुम्हं अम्हाण य तिलोयनाहो गुरु, तेहिं भणियं-तुम्हवि अन्नो गुरु?, तओ गोयमो जयगुरुणो

गुणसंथवं काउमारद्वो, ते य सुदुयरं बड्डियपरिणामा उवड्डिया पवइउं, पद्माविद्या य गणहारिणा, समप्पियाणि
 तेसिं देवयाए रयहरणाइं, अह तेहिं पन्नरसतावससएहिं परियरिओ गंतुं पयत्तो, जाए य भोयणसमए गोय-
 मसामिणा भणिया ते, जहा-भो देवाणुप्पिया ! किं तुमह पियं भोयणं पणामिज्जउ ? तेहिं भणियं-पायसोत्ति,
 तओ सबलद्धिसंपन्नो भयवं घयमहुसणाहस्स पायसस्स पडिगहं भरित्ता आगओ, अक्खीणमहाणसिलद्धिसामरथेण
 य सवे जहिच्छाए पजेमिया, तदुव्वरियसेसं च अप्पणा भुंजति, एवंविहं च अइसयं भगवओ पेच्छऊण ते सुदुयरं
 आणंदिया, नवरं सुक्कसवोलभक्खीणं पंचणहवि तावससयाणं सुहज्झवसाणाओ केवलनाणमुप्पन्नं, कमेण य तत्तो
 वचंता पत्ता चंपापुरिं, तेहिं च दिन्नस्स सपरिवारस्सवि भगवओ छत्ताइछत्तं पेच्छंतस्स, कौडिन्नस्सवि सामिणो
 रूयंदसेणेण केवलमुप्पन्नं, एवं जायकेवलेहिं तेहिं पन्नरसहिवि सएहिं समेओ गोयमो भयवंतं पयाहिणीकरइ, ते य
 पयाहिणावसाणे तित्थपणामं काऊण केवलपरिसं पडुच्च गच्छते पेच्छऊण भणइ-भो किमेवं वच्चह ? एह सामिं
 वंदह, जयगुरुणा कहियं-मा केवलियो आसाएहि, तओ सो मिच्छादुक्कंडंति काऊण अप्पणो नाणाणुप्पाएणं अद्धिइ
 कुणंतो वुत्तो सामिणा-भो देवाणुप्पिय ! किं देवाणं वयणं गेज्झं ? उयाहु जिणाणं ? गोअमो भणइ-जिणाणं,
 जयगुरुणा जंपियं-जइ एवं ता किं अद्धिइं पक्केसि ? जेण मए तं पुव्वंचिय मणिओ, जहा-अंते तुल्ला भविस्सामोत्ति,
 जं पुण संपयं चिय तुह नाणं न उप्पज्जइ तत्थ इमं कारणं—

चिरभवपरंपरापरिचिओ सि चिररूढगाढनेहोसि । तं मे गोयम ! जेणं तेण न ते जायई नाणं ॥ १ ॥

अइथेवसंथवुत्तोऽवि नेहभावो दुमिछओ होइ । किं पुण बहुकालन्नोन्नतुल्लसंवाससंजणिओ ? ॥ २ ॥

एत्तो चिय विणिहयनायगव सेणाहयंमि मोहम्मि । कम्मावली दलिज्जइ लीलायच्चिय समग्गावि ॥ ३ ॥

ता नेहपसरमुच्छिदिऊण मज्झत्थयं समायरसु । मोक्खभवाइसु किर परमसाहुणो निष्णिहा होति ॥ ४ ॥

इय भणिए जयगुरुणा सविणयपणओ तहत्ति भणिऊण । पडिवज्जइ तं वयणं गोयमसामी मुणिवरिंदो ॥ ५ ॥

एवं गोयमसामीं संबोहिऊण विहरिओ तत्तो जयगुरु । अह परिभमंतो गामागरनगरसुंदर वसुंधराभोगं कमेण पत्तो मिहिलापुरिं, समोसढो य माणिमद्दाभिहाणंमि चेइए, समागया ससुरासुरावि परिसा, सिट्ठो य भगवया अभयप्पहाणमूलो अलियवयणविरइप्पहाणो परधणपरिवज्जणमणहरो सुरनरतिरियरमणीरमणपरंमुहो आकिंचणगुणरघविओ समणधम्मो, तहा पंचाणुव्वथपरियरिओ गुणव्वयतियालंकिओ चउसिक्खावयसमेओ सावयधम्मो य । तं च सोऊण बुद्धा बहवे जंतुणो, केऽवि गहियसामन्ना अन्ने पडिचन्नदंसणा जायत्ति । एत्थंतरे गोयमसामी परेणं विणएणं पणमिऊण जयगुरुं भणइ-भयवं ! महंतं मे कोऊहलं दूसमाए सरूवसवणविसए, कुणह अणुगहं, साहह जहाभाविरंति, भणियं जिणेण-गोयम ! भाविरमवि दूसमाए वुत्तंतं साहिज्जंतं एगगमणो निसामेसु— .

मइ निव्वाणसुवगए पंचमअरओ उ दूसमा होही । तीए वसा भवोऽवि हु न जणो धम्मज्जमं काही ॥ १ ॥
 मुणियोऽवि परोप्परकलहकारिणो बहुपरिगहासत्ता । वट्टिस्सति न सम्मं बाहुल्लेणं सधम्ममि ॥ २ ॥
 पासंडियोऽवि नियनियगंथपरंमुहा मयणमूढा । पम्मकुधम्मकम्मा ओल्लिगिस्सति राईणं ॥ ३ ॥
 पागयलोगो मोत्तुं कुलभरं तेसु तेसु कज्जेसु । अबंतगरहिणसुवि वट्टिस्सइ जीविगाहेउं ॥ ४ ॥
 अत्थप्पिया य अइदप्पिया य परच्छिदपेच्छणपरा य । पीडिस्सति जणोहं पयंदडेहिं नरवइणो ॥ ५ ॥
 एकजणणीपसूयावि भाइणो जणगदवल्लोभेण । अन्नोन्नजीववायं काउं दढमभिलसिस्सति ॥ ६ ॥
 धम्मच्छलेण पावं विमूढमइणो समायरिस्सति । पसुमेहकूवखणणाइसु कम्मसु वट्टता ॥ ७ ॥
 भूयभविस्सत्थेसु य विन्नाणं देवयावयारो वा । विज्जा सिद्धी य वरा बाहुल्लेणं न होहिंति ॥ ८ ॥
 उम्मग्गदेसणामगनासणावंचणाभिरयचित्ता । गुरुणोऽवि जहिच्छाए धम्मायारं चरिस्सति ॥ ९ ॥
 तविहिंति खरं रविणो नो वरिसिस्सति समुचियं मेहा । रोगायंका मारी य विद्विस्सति जणनिवहं ॥ १० ॥
 उस्सिखलखलजणहीलणाहिं अणिमित्तऽणत्थघडणाहिं । पाविस्सइ खणमेत्तपि नेव सोक्खं विसिट्ठजणो ॥ ११ ॥
 वाससहस्सा इह एकवीसइ जाव दोसपरिहीणं । दुप्पसहंतं चरणं पवित्तिही भरहखेत्तमि ॥ १२ ॥
 इय एसो संखेवेण तुज्झ गोयम ! मए समणुसिट्ठो । दूसमकालसमुत्थो वुत्ततो भवभयजणगो ॥ १३ ॥

एयं सोच्चा मुणिणो संजवकज्जमि तह पयट्ठह । तक्कालसमुत्थविडंबणाउ पावह जहा नेव ॥ १४ ॥
 एवं जिणेण सिट्ठे सविसेसं संजमुज्जया जाया । समणजणा अह भयवं मिहिलानयरीउ निक्खंतो ॥ १५ ॥
 पत्तो पोयणपुरं, तहिं च संखवीरसिवभट्ठपमुहा नरिंदा दिक्खा गाहिया, एवं च जएक्कनाहो महावीरो गोयम-
 सामिप्पमुहाणं चउट्ठसण्हं समणसहस्साणं अज्जचंदणाईणं छत्तीसाइ अज्जियासहस्साणं आणंदसंखपमुहएरूणस-
 ट्ठिसहस्ससमहियस्स सावयलक्खस्स सुलसारेवईपमुहाणं तिण्हं सावियलक्खाणं अट्टारससहस्सहिगाणं तिण्हं चउ-
 ट्ठसपुविसयाणं अट्ठण्हं अणुत्तरोववाइयसयाणं मगदेसगत्तं गुरुत्तं सामित्तं उच्चंतो नाणकिरणेहिं तमनियरमवहरतो
 चिरं विहरिओ वसुंधराए । अह अग्गिभूइवाउभूईवियत्तमंडियमोरियपुत्ताकंयियायलभाइमेयज्जपहासनामेसु नवसु
 गणहरेसु सिद्धिं गएसु केत्तियंपि कालं भवसत्तपडिवोहणं काऊण अप्पणो मोक्खगमणकालं पच्चासन्नमुवलक्खिऊण
 भयवं वट्ठमाणो गओ असेसदेसलद्धपसिद्धीए पावापुरीए, तहिं च नियमुयनिहलियपडिवक्खो हत्थिपालो नाम नरिंदो,
 तस्स अणेगखंभसथसमहिट्ठियाए विसिट्ठिविचित्तचित्तकम्ममणहराए पवरसालभंजियाभिरामदुवारातरणाए सव्वसत्तो-
 वरोहरहियाए महइमहालियाए सुंकसालाए नरिंदाणुन्नापुरस्सरं ठिओ चरिभवासारत्तंमि जयगुरू । कमेण पत्तंमि जय-
 गुरू कत्तिथस्स अमावसादिणे अप्पणो उव्वरि केयलालोयविग्घकारयं सिण्हं कुणंतं गोयमं भणइ-भो देवाणुण्णिय !
 एत्थ पच्चासन्नगामे गंतूण देवसम्माभिहाणं माहाणं पडिवोहेसुत्ति, जं सामी आदिसइत्ति जंपिऊण गओ गोयमो,

कयं जहाइदं, तुत्यो य तत्थ । अह तस्स चैव दिणस्स पच्छिमनिसाए साइरिक्खंमि वट्टमाणंमि तीसइवरिसंखं
केवलपज्जायं परिपालिऊण कयलट्टतवोक्कम्मो पलियंकासणसंठिओ भयवं महावीरो सबसंवरूवं सेलेसिं जावज्जवि
न पवज्जइ ता असंभमुब्भंतनयणनलिणीवणेण तक्कालुगमंतभासरासिक्कूरगहविभावियजिणसासणोवपीडेण सबहु-
माणं विन्नत्तो सक्केण—

भयवं ! कुणह पसायं विगमह एवंपि ताव खणमेक्कं । जावेस भासरासिस्स नूणसुदओ अवक्कमइ ॥ १ ॥

जे एयस्सुदएण तुमंहं तित्थं कुत्तिथएहिं ददं । पीडिस्सइ सक्कारं न तहा पाविस्सइ जणाउ ॥ २ ॥

न य तुमहे असमत्था एवंविहकज्जसाहणे जेण । जो तोलइ तइलोक्कं बलेण का तस्स इह गणणा ? ॥ ३ ॥

तथा—कहउणंतसत्तिजुत्ता जिणा हवंतित्ति वयणमवि अमहे । पत्तिज्जिस्सामो पहु ! जइ न तुमं ठासि खणमेक्कं ॥ ४ ॥

अह जयगुरुणा भाणियं सुरिंद ! तीयाइत्तिविहकालेऽवि । नो भूयं न भविस्सइ न हवइ नूणं इमं कज्जं ॥ ५ ॥

जे आउक्कम्मविगमेऽवि कोवि अच्छेज्ज समयमेत्तमवि । अचंताणंतविसिट्टसत्तिपब्भारजुत्तोऽवि ॥ ६ ॥

अवि जोडिज्जइ सयखंडियंपि वयरागरूभवं रयणं । परिसडियमाउदलियं न उ तीरइ कहवि संघडिउं ॥ ७ ॥

ता जइ अचंतमभूयमत्थममहे न साहिमो एयं । किं एत्तिएण नाणंतसत्तिणो ? सुयसु ता मोहं ॥ ८ ॥

इय वोहिऊण सक्कं सेलेसिं जयगुरु समाकहिउं । समगं चिय वेयणिथाउनामगोत्ताइ खविऊण ॥ ९ ॥

जस्तसद्वाए क्रीरइ पुरमंदिररज्जलच्छिंसचागो । मुच्चइ सिणेहवंधुरवंधवजगगाढपडिंबयो ॥ १० ॥
आयाविज्जइऽसइ गिम्हुम्हवणिहसंतत्तसक्कले । भूमीयलंमि हिमकणदुविसहे सीयकालेऽवि ॥ ११ ॥
भुंजिज्जइऽसइ सुंछुत्तुच्छमरसं च भोयणं पाणं । निवसिज्जइ भीमसुसाणसुन्नगिहरन्नमार्हसु ॥ १२ ॥
सेविज्जंति पइदियहमेव वीरासणाइठाणां । छट्ठमाहुक्करतवचणांइ पि कीरंति ॥ १३ ॥
अहियासिज्जइ नरतिरियदेवविहिओवसग्गवग्गोऽवि । न गणिज्जइ दुविसहो परीसहाणं पंबयोऽपि ॥ १४ ॥

तिहुयणपणमियचलणो भवभयमहणो जिणो महावीरो ।

उभउच्चिय एगागी तं मोक्खपयं समणुपत्तो ॥ १५ ॥ सत्ताहिं कुलयं ।

अह सव्वेऽवि सुरिंदा चउविहदेवेहिं परिवुडा झत्ति । चलियासणा विद्याणियजिणनिवाणा समोइन्ना ॥ १६ ॥
विगयाणंदा बाहण्णवाहवाउलियनयणपमंता । जगनाहस्स सरीरं नमिउमदूरे निसीयंति ॥ १७ ॥
अह सोहम्माहिवई गोसीसागरुपमोक्खदारूहिं । नंदणवणाणिइहिं चियमेगंते रया चित्ता ॥ १८ ॥
अह सुराहिखीरसायरजलेण ण्हविज्जण जिणवरसरीरं । हरिचंदणोवलित्तं नियंसियामलदुगूलं च ॥ १९ ॥
सद्वाणपिणद्वविचित्रयणकिणुब्भडाभरणरुहरं । सिबियाए संठविच्चा नेह चियाए समीवंसि ॥ २० ॥
अह देविंदेसु जयजयारवं निब्भरं कुणंतेसु । कुसुमुक्करं मुयंतेसु सव्वओ खयरनियेरेसु ॥ २१ ॥

नच्चंतीसु सुरसुंदरीसु तूरेसु वज्रमाणेसु । अचंतसोगविहुरे संधमि य संथुगंतमि ॥ २२ ॥
 अग्निकुमाराण जलणजालजालापलीविद्याए लहुं । आरोवेति चियाए जिणबुद्धिं असुरसुरवइणो ॥ २३ ॥
 वाउकुमारा वायं कुगंति अघरे सुरा पुण खिवंति । गंधद्वधुमुट्ठिं घयमहुकुंभे य पुणरुत्तं ॥ २४ ॥
 मंसाइएसु दइसु तो चियं निव्विंति थणियसुरा । स्त्रीरोयवारिधाराहिं सिसिरंगंधाभिरामाहिं ॥ २५ ॥
 अह पहुणो उवरिल्लं मंगलकएण दाहिणं सकहं । गिणहइ सक्को हेट्ठिल्लयं च चमरो असुराराया ॥ २६ ॥
 ईसाणिंदो वामं उवरिल्लं तस्स हिट्ठिमं च वली । इयरे सुरासुरिंदा जहारिहं अंगुवंगाइ ॥ २७ ॥
 तत्तो चियाय ठाणे विचित्तरयेणेहिं विरइयं थूमं । निव्वाणगमणमहिमं जत्तेण कुगंति जयगुरुणो ॥ २८ ॥
 अह निव्वत्तियतक्कालजोगनीसेसनियकायच्चा । सोगभरमंथरणिं एवं भणिउं समाढत्ता ॥ २९ ॥
 अज्जं चिये अत्थमिओ दिवायरो अज्ज भारहं खेत्तं । अन्नहरियसाररणं जायं नाहे सिवं पत्ते ॥ ३० ॥
 एत्तो पयंडभववेरिपीडियाणं पणट्ठुद्धीण । अम्हारिसाण सरणं को होही नाह ! तुह विरहे ? ॥ ३१ ॥
 समुरासुरं पि भुवणं मन्ने निधुन्नयं समगं पि । अन्नह कुलसेलाऊ हुंतोसि तुमं जिणवरिंदा ! ॥ ३२ ॥
 अहवाउवस्संभाविसु वत्थुसु संतावकप्पणा विहला । एक्कमियाणिं विजयउ सइ तित्थं तुज्झ जयनाह ! ॥ ३३ ॥
 इय जंपिऊण दुस्सहजयगुरुविरहगिद्धमिया सक्का । नंदीसरंमि गंतुं काउं अट्ठाहियमहिमं ॥ ३४ ॥

वचंति देवलोगं वहरामयवदृवरसमुगोसु । जिणसंकहाओ ताओ खिवंति जत्तेण पृहत्ता ॥ ३५ ॥
 अह सा जिणस्स निवाणजामिणीसुरतनूकउज्जोया । दीवूसवोत्ति अज्जवि पइवरिसं कीरइ जणेण ॥ ३६ ॥
 गोअमसामीवि नहोयंतसुरवरविमाणपेच्छणओ । नाउं जिणनिवाणं चित्तेउमिमं समाढत्तो ॥ ३७ ॥
 एक्कादिणमेत्तकज्जेण कीस नाहेण पेसिओऽहमिहं ? । चिरसंथुएसु किं वा जुज्जइ एवंविहं काउं ? ॥ ३८ ॥
 हा हा अहं अहन्नो जो सुचिरं सेविऊण कमकमलं । पज्जते जयगुरुणो संपइ विच्छोहिओ एवं ॥ ३९ ॥
 अहवा जिणंमि वोच्छिन्नपेमदोसंमि कीस हे हियय ! । पढमं चिय पडिवंधं कुणसि ? जमेत्तो वहसि सोगं ॥ ४० ॥
 संसारवल्लिजलसारणीसमो दुग्गदुग्गइदुयारं । सिवसोक्खकंखिराण मूलमणत्थाण पडिवंधो ॥ ४१ ॥
 ते धन्ना सप्पूरिसा लीलाए च्चिय निसुंभिओ जेहिं । सुहहरिणक्खयकारी मोहमहाकेसरिकिसोरो ॥ ४२ ॥
 इय सुक्कज्झाणानलनिदहुवणवाइकम्मदारुस्स । गोअमपहुस्स सहसा उप्पन्नं केवलं नाणं ॥ ४३ ॥
 बारस वासाइं विवोहिऊण भवे सिवं गए तंमि । भयवं सुहम्मसामी निवाणपहं पयासेइ ॥ ४४ ॥
 तंमिवि चिरकालं विहरिऊण सिरिज्जुसामिणो दाउं । गच्छगणामणुन्नं संपत्ते सिद्धिवासंमि ॥ ४५ ॥
 एवं विज्जाहारसुरिंदसंदोहवंदणिज्जेसु । समइक्केतसु महापहूसु सेज्जंभवईसु ॥ ४६ ॥
 अइसयगुणरणनिही मिच्छत्ततमंधलयोयदिणनाहो । दूरच्छारियवइरो वइरसामी समुप्पन्नो ॥ ४७ ॥

साहाइ तस्स चंदे कुलंमि निप्पडिमपसमकुलभवणं । आसि सिरिवद्धमाणो मुणिनाहो संजमनिहिच्च ॥ ४८ ॥
 बहलकलिकालतमपसरपूरियासेसविसमसमभागो । दीवेणं व मुणीणं पयासिओ जेण मुत्तिपहो ॥ ४९ ॥
 मुणिवइणो तस्स हरअट्टहाससियजसपसाहियासस्स । आसि दुवे वर सीसा जयपयडा सूरससिणोच्च ॥ ५० ॥
 भवजलहिवीइसंभंतभवियसंताणतारणसमत्थो । वोहित्थोच्च महत्थो सिरिसूरिजिणेसरो पढमो ॥ ५१ ॥
 गुरुसाराओ धवलाउ सुविहिया (निम्मला पु.) साहुसंतई जाया । हिमवंताओ गंगच्च निग्गया सयलजणपुज्जा ॥ ५२ ॥
 अन्नो य पुन्निमायंदसुंदरो बुद्धिसागरो सूरी । निम्मवियपच्चरवागरणल्लदसत्थो पसत्थमई ॥ ५३ ॥
 एगंतवायविलसिरपरवाइकुरंगभंगसीहाणं । तेसिं सीसो जिणचंदसूरिनामो समुप्पन्नो ॥ ५४ ॥
 संवेगरंगसाला न केवलं कच्चविरयणा जेण । भवजणविम्हयकूरी विहिया संजमपवित्तीवि ॥ ५५ ॥
 ससमयपरसमयन्नू विसुद्धसिद्धंतदेसणाकुसलो । सयलमहिवलयवित्तो अन्नो ऽभयदेच्चसूरिन्ति ॥ ५६ ॥
 जेणालंकारधरा सलक्खणा वरपया पसन्ना य । नवंग (सिद्धंत पु.) वित्तिरयणेण भारई कामिणिच्च कया ॥ ५७ ॥
 तेसिं अत्थि विणेओ समत्थसत्थत्थवोहकुसलमई । सूरी पसन्नचंदो चंदो इव जणमणाणंदो ॥ ५८ ॥
 तच्चयणेणं सिरिसुमइवायगाणं विणयेलेसेण । गणिणा गुणचंदेणं रइयं सिरिवीरचरियमिमं ॥ ५९ ॥
 एयस्स विरयणंमी निच्चंधो जेसि गाढमुप्पन्नो । ते पुण मूलाओ चिय साहिजंते निसामेह ॥ ६० ॥

सियजसजोणहाधवलियनायकुलनहयले मयंकुव । पुव्वमहेसि महेसीपणओ सिरिजीत्रदेवपहू ॥ ६१ ॥
 तस्स सुमिस्सो सिद्धंतसिद्धसुविमिद्धसंजमाभिरओ । गुणरणरोहणगिरी पयडो जिणदत्तसूरिति ॥ ६२ ॥
 गंभीरिमाए पसमेण बुद्धिविभवेण दक्खिणत्तेण । सुंदरनएण जेसिं कोऽवि न तुल्लो जए जाओ ॥ ६३ ॥
 तेहिंतो पडिबुद्धो वायडकुलभवणजयपडायनिभो । कण्णडवाणिज्जपुरे सेट्ठी गोवद्धणो आसि ॥ ६४ ॥
 नंदीसरावलोयणमणण भवाण दंसणत्थं च । कारावियं सुतुंगं बावन्नजिणालयं जेण ॥ ६५ ॥
 धम्मधरणीए गिहिणीए तस्स सोढित्ति नामधेयाए । अगणियगुणगणनिलया पुत्ता चत्तारि उष्णन्ना ॥ ६६ ॥
 पढमो अम्मयनामो वीओ सिद्धोत्ति जज्जणागो य । तइओ चउत्तओ पुण विक्खाओ नन्नओ नाम ॥ ६७ ॥
 नयविणयसच्चधम्मत्थसीलकलिहं जेहिं दिट्ठहिं । नूणं जुहिट्ठिह्लइवि सद्दहिज्जंति सण्णुरिसा ॥ ६८ ॥
 अह संथारयदिकखं पवज्जिउं भावसारसंतंभि । गोवद्धणंभि सगं गंयंमि तह पढमपुत्तदुगे ॥ ६९ ॥
 सो सेट्ठी जज्जणागो छत्तावल्लीए वासमकारिं सु । सब्बकणिट्ठो नन्नयसेट्ठी पुण मूलठाणेवि ॥ ७० ॥
 तेसिं च भइणिपुत्तो नियपुत्ताओवि गाढयडिंभवो । आसि जसणागनामो सेट्ठी सुविमिद्धगुणनिलओ ॥ ७१ ॥
 अह नन्नयस्स पुत्ता पयडा साविच्चिकुच्छिसंभूया । दोन्नि चिय उष्णन्ना गोवाइओ कवही य ॥ ७२ ॥
 सत्तुंजयपमुहसमत्थतित्थजत्ता पयट्ठिया जेण । पढमं चिय तस्स कवडिसेट्ठिणो को समो होज्ज ॥ ७३ ॥

पुरिसत्थकरणनिरयस्स जज्जणागस्स विस्सुयजसस्स । अत्थि जिणधम्मनिरया कलत्तमिह सुंदरी नाम ॥ ७४ ॥
 जाओ तीसे सुंदरविचित्तलक्खणविराइयसरीरो । जेद्धो सिद्धो पुत्तो बीओ पुण वीरनामोत्ति ॥ ७५ ॥
 को तेसि दाणविन्नाणबुद्धिसुविदुधधम्मगेहाण । निउणोऽवि गुणलवंपिहु होज समत्थो य वित्थरिउं ? ॥ ७६ ॥
 नागो इव पिंडिज्जइ वंभंडकरंडए अमायंतो । जस्स जसोहो सारयनिसिच्छणमयलंछणच्छाओ ॥ ७७ ॥
 जिणविंवसुपसत्थतित्थजत्ताइधम्मकरणेण । धम्मियजणाण मज्जे जेहि य पत्ता पढमरेहा ॥ ७८ ॥
 अन्नाणतण्हसमणी सुयनाणपवा पयट्ठिया जेहिं । सयलागमपोत्थयलेहणेण निच्चपि भद्धान ॥ ७९ ॥
 तेहिं तित्थाहिचपरमभत्तिसव्वस्समुद्वहंतहिं । वीरजिणचरियमेयं कारवियं सुद्ववोहकरं ॥ ८० ॥
 जमजुत्तमेत्थ भणियं नियमइदुव्वलओ मए किंपि । तं साहंतु गुणह्वा ओच्छाइयमच्छरा विउसा ॥ ८१ ॥
 छत्तावल्लिपुरीए मुणिअंबेसरगिंहमि रइयमिमं । लिहियं च लेहएणं माहवनामेण गुणनिहिणा ॥ ८२ ॥
 नंदसिहिरुदंसंखे(११३९)वोक्कंते विक्कमाओ कालमि । जेट्ठस्स सुद्धतइयातिहिमि सोमे समत्तमिमं ॥ ८३ ॥

निहयसयलविग्घोऽणप्पमाहप्पजुत्तो जयइ जयपसिद्धो वद्धमाणो जिणिंदो ।
 तयणु जयइ तस्सासंखसोक्खेक्कमूलं, गरुयभवभयाणं नासणं सासणं च ॥ ८४ ॥

असिधसमणदक्खो पाणिणं कप्परक्खो, जयइ जयपयासो पासनाहो जिणेसो ।
तयणु जयइ वाणी दिव्वपंकेरुहत्था, सुयरयणधरिन्ती पंकयालीणहत्था ॥ ८५ ॥
इय जिणवरवीरस्सड्डुमो ताव वुत्तो, परमपयपयाणो नाम पत्थाव एसो ।
चरियमवि समत्तं एयसंकित्तणाओ, हवउ सुहकरं वो नूणमाचंदसूर ॥ ८६ ॥
एयं वीरजिणेसरस्स चरियं जे भावसारं जणा, वक्खाणंति पढंति निचलमणा निच्चं निसामिति य ।
तोसिं इड्ढविओगऽणिट्ठपड्डणादोगचरोगावया-पामोक्खं खयमेइ दुक्खमखिलं सोक्खाणि वद्धंति य ॥ ८७ ॥

॥ ग्रंथाग्रं. १२०२५ ॥ शुभं भवतु श्रीसंघस्य ॥

यावल्लवणसमुद्रो यावन्नक्षत्रमंडितो मेरुः ।
यावच्चन्द्रादित्यौ तावदिदं पुस्तकं जयतु ॥

इति श्रेष्ठि-देवचन्द्र लालभाई-जैनपुस्तकोद्घारे ग्रंथाङ्कः ७५ ॥

इइ सिरिचन्दकुलीणऽभयदेवसूरिपट्टपहुसिरिपसणचंदसूरिवियणेण सिरिसुमइ-

वायगविणयगणिसिरिगुणचन्दनिम्मियं कप्पडवाणिज्जभिजण-


गोवद्धणसुतजज्जणागपुत्तसिट्टवीरगहकारियं

सिरिवीरजिणचारियं सम्मत्तं.

इति श्रेष्ठि-देवचन्द लालभाई-जैनपुस्तकोद्धारे ग्रंथांकः ७५ ॥

16416

शेठ देवचंद लालभाई जैन पुस्तकोद्धार फाउंडे



जहंदरी बजार-मुंबई.

मंत्र १२८४

गोपीपुरा-मुमुत

६०००-४-२८.

श्रीकृष्ण स्त्रीग प्रेम

मुम्ता मारकेट, धनजी स्ट्रीट मुंबई